

# Quiarinio pueyaso rupaa pa jiyaniijia Je- sucristojiniji pueyano rupaaajinia

Arabela New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

|                    |     |
|--------------------|-----|
| MATEO .....        | 4   |
| MARCO .....        | 51  |
| LUCAS .....        | 80  |
| JUAN .....         | 128 |
| MIISHANO.....      | 163 |
| ROMA .....         | 210 |
| 1 CORINTO.....     | 232 |
| 2 CORINTO.....     | 256 |
| GÁLATA .....       | 271 |
| ÉFESO .....        | 280 |
| FILIPO.....        | 288 |
| COLOSA.....        | 294 |
| 1 TESALÓNICA ..... | 299 |
| 2 TESALÓNICA.....  | 304 |
| 1 TIMOTEO.....     | 307 |
| 2 TIMOTEO.....     | 313 |
| TITO .....         | 318 |
| FILEMÓN .....      | 321 |
| HEBREO.....        | 323 |
| SANTIAGO.....      | 341 |
| 1 PEDRO .....      | 347 |
| 2 PEDRO .....      | 354 |
| 1 JUAN .....       | 358 |
| 2 JUAN .....       | 363 |
| 3 JUAN .....       | 364 |
| JUDAS.....         | 365 |
| NIQUISHANO .....   | 367 |

# MATEO

## Jesucristo supuetanaajiniji pohuatasano (Lc 3.23-38)

**1** Jesucristoori supuetana Abraham jiuhuacuajinio supueno quiqiaari, supuetana David niquiohuacuajinionio. Nioori Jesucristo supuetanaa sesaca. Naa quiqiaaritij:

<sup>2</sup> Abrahamri Isaac que quiqiaari. Isaacri Jacobo que quiqiaari. Jacoboori Judá que quiqiaari, tapueyocua que juhuj. <sup>3</sup> Judaari Fares que quiqiaari, Zara que juhuj. Cuno pojori nucuaari quiqiaari Tamar, Judá niquiocua. Faresri Esrom que quiqiaari. Esromri Aram que quiqiaari. <sup>4</sup> Aramri Aminadab que quiqiaari. Aminadabri Naasón que quiqiaari. Naasónri Salmón que quiqiaari. <sup>5</sup> Salmónri Booz que quiqiaari. Booz nucuaari quiqiaari Rahab. Boozri Obed que quiqiaari. Obed nucuaari quiqiaari Rut. Obedri Isaí que quiqiaari. <sup>6</sup> Isaiiri David que quiqiaari. Davidri Israel pueya jiyaniijia quiqiaari. Davidri Salomón que quiqiaari. Salomón nucuaari coteenu quiqiaari Urías niquiocua.

<sup>7</sup> Salomónri Roboam que quiqiaari. Roboamri Abías que quiqiaari. Abíasri Asa que quiqiaari. <sup>8</sup> Asaari Josafat que quiqiaari. Josafatri Joram que quiqiaari. Joramri Uzías que quiqiaari. <sup>9</sup> Uzíasri Jotam que quiqiaari. Jotamri Acaz que quiqiaari. Acazri Ezequías que quiqiaari. <sup>10</sup> Ezequíasri Manasés que quiqiaari. Manasésri Amón que quiqiaari. Amónri Josías que quiqiaari. <sup>11</sup> Josíasri Jeconías que quiqiaari, tapueyocua que juhuj. Jiyacaritij, Israel pueyapueeri quioosaaquiaari Babilonia jiyajiniara. <sup>12</sup> Babilonia jiyajinia, Jeconíasri tii mueratequiaari Salatiel. Salatielri Zorobabel que quiqiaari. <sup>13</sup> Zorobabelri Abiud que quiqiaari. Abiudri Eliaquim que quiqiaari. Eliaquimri Azor que quiqiaari. <sup>14</sup> Azorri Sadoc que quiqiaari. Sadocri Aquim que quiqiaari. Aquimri Eliud que quiqiaari. <sup>15</sup> Eliudri Eleazar que quiqiaari. Eleazarri Matán que quiqiaari. Matánri Jacobo que quiqiaari. <sup>16</sup> Jacoboori José que quiqiaari. Joseeri María niyaca quiqiaari. Cuno Maríari Jesu nucua quiqiaari. Jesu sesa tarajanuuri quiqiaari Cristo. Nioori pueyano rupaajinia sequeya “Pueyaso jiyarosano jiyaniijiarano”.

<sup>17</sup> Naacuajitij, Abrahamjiniji, catorce supuetanaari quiqiaari Davidta. David nuhuaji, socua catorce supuetanaari quiqiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiqiaari Cristo jaara rasaaquiaari.

## Jesucristo rasacari pohuatasano (Lc 2.1-7)

<sup>18</sup> Naa quiqiaariti Jesucristo rasacari: na nucuarano Maríari tari Joseeta camiriquiano quiqiaari. José nu-muetuqueyaquishacarijia María, Maríari tariucua manajaraca quiriquiaa. Pueyaso Sohuanucuaajaari na manajetequiaari. <sup>19</sup> Neyacarano José jaara niishiquiaari necorano tariucua manajaraca quiya, nojuajaari jiyanohua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiqiaari. Majaari María na cararonu paniniu quiqiaari pueya niquiara. <sup>20</sup> Naa José niishiriojosacari na cartenura juucuatej, Pueyaso seruuri nocua muetaquiaari na maquenujina. José sequereeri:

—Supuetana jiyaniijia David niquiohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. <sup>21</sup> Maríari neyanu ranutaniya. Quiocua na sesojore “Jesu”. Sesa na pueya miijosano tuujunutaniya nojori jiuujiajinijiiri. Naaratej, na sesaari quiniutaniya “Jesu”.

<sup>22</sup> Jesu rasaanuuri naa quiqiaaritij, tariucuaaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanohua tarijiatej:

<sup>23</sup> “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’”. Nioori pueyano rupaajinia sequeya “Pueyaso pata quiyani”.

<sup>24</sup> José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaariiri na tiajiniara necocuara. <sup>25</sup> Nojoriiri maja na quiniu quiqiaari juhua seetanujuanaa camitioono, María jaara raquiaari neyanujuatijia. Jaara na raquiaari, na sesojoreeri “Jesu”.

### Niishijiaa tiuquiiijosacari conaajaacua

**2** Jesuuri rasaaquiaari Belén tiacajinia, Judea jiyajinia. Cuno quishacari, Herodesri jiyaniijia quiqiaari Judea jiyajinia. Jesu rasaanu nuhuaji, niishijiaaari tiuquiiioquiaari Jerusalén tiacajinia. Nojoriiri Jesu niquiniuria tiuquiiioquiaari jiya pajamaji. <sup>2</sup> Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaarucuaani? Canaari niishiyani nojuajaari tari rasaarucuaa. Canaari na rijia niquiquianu jiya pajamajini, canaa jiyajinia

canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

<sup>3</sup>Jiyaniijia Herodes tojishacari naa niishijia seque-sanotej, jyanohua tacaquiaariiri. Puetunu Jerusalén tiacajinia quiniaajanaari tacaquiaarijuhuaj. <sup>4</sup>Nocujaji, Herodesri Judiocuacaacuara secojonaa sequequiaari nocua nojori nijionura, Moisés Rootasanojiniji niishitiojonaano. Nojori tiuquiiijosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiaranotej?

<sup>5</sup>Nojoriiri na riucaquiaari:

—Belén tiacajinia rasaanutaniyano, niya Judea jiyajiniani. Naa naajiotasano quiyacuajaari Pueyaso sequesano caminiujunaa sequesano. Cuno tariucuacaanu naajiotasanoacuajaari naa sequeyatej:

<sup>6</sup>“Belén tiacajinia quiniaanaa, nia tiacaari maja najuhuaana shiitianiyojua tiaca Judea jiyajinia. Cuno nia tiacajiniani, Jiyaniijiajanaa cutaraari supenutaniya. Nojuajaari socua cutara Jiyaniijiajanaa quiniutianiya tamasa jiyaniijiacajiniji Judea jiyajinijinio. Cunoori maninia jiitanutaniya cua pueya, Israel pueya”.

<sup>7</sup>Naa pueya sequesano na tojinu nuhuajitij, Herodesri cuno jiya pajamaji nijiono niishijia nequesoreetaquiaari jiyasohuaja:

—¿Taacari rija niquishaacanu seetanujuanaani?

<sup>8</sup>Nojori riucaanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoretasee cuno mueyajiniji. Niaa jaara na riuriatare, niocua cua numootecuhua. Janiyacua nocua quiaare jaaniuhuaj cua shuquiritianura nojuaja.

<sup>9</sup>Niishijia tojinu nuhuaji naa jiyaniijia Herodes sequesantej, nojoriiri quiojiyareecuhua. Jiya pajamaji na niquitiushano rija niquitiuriiri nojori puetaano. Rijiaari pootia tiushii tia caco, tee mueya quiriquiaacua-jani. <sup>10</sup>Nojori niquishacari rija, niishijiaaari jyanohua timitiuquiaari. <sup>11</sup>Tiaco tiuquitiaseeri. Conaaja niquitiushii na nucua Maríataari. Conaajaacuara mojuquetacoquiaariiri. Na shuquiritiatureeri. Na nuhuaji, niishijiaaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijasocoriquianojuhuaj, tamaatiuucua shanohua jaanutajanio. Na sesaari tahue rupaajinia “mirra”. <sup>12</sup>Na nuhuaji, Pueyasoori cuno niishijia sequequiaari na maquenujia, maja Herodescua nojori tacatenuhuara Herodes nojori pohuatanuhua conaajajiniji. Naacuajitij, niishijiaaari tamonu nucuahua tacatequiaariuhua na jiyajiniohuara.

**Egipto jiyajiniara Jesu mashitiasaanujiniji pohuatasano**

<sup>13</sup>Niishijia jaara quiaquiaariuhua, Pueyaso seruuri Josecua muetaquiaari na maquenujia. José sequeereeri:

—Quia sanere! ☩Conaaja quia mashitiare na nucua Egipto jiyajiniara! Quiniqui nia quishii, janiya cuara sequerohua quiajanijaaatijia. Herodesri Belén tiaca-

jinia na pueya pajetenutaniya conaaja, na motesocoriquiano.

<sup>14</sup>Joseeri sanequiaari. Cuno niucuaaja, conaaja mashitiaree na nucuatataari Egipto jiyajiniara. <sup>15</sup>Nojori tiuquishacari Egipto jiyajinia, tii quishiiquiaariiri, Herodes cuara cusooraajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujunaa:

“Cua niyanu piiriinijia, Egipto jiyajiniji na tacatenuhuara”.

**Herodes puecootesacari muerasu**

<sup>16</sup>Jiyaniijia Herodes jaara niishijiaaari cuno niishijiaaari na ruuretaquiaari saaja, Herodesri jyanohua juaaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quinia muerasunio. Naa miiquiaariiri Jesu na monura juucua. Herodesri na pueya sequequiaari cuara puecoosaaria puetunu shusha roosanojuanaa, mariyata canapuate caapiqui marija shocoteo quiquiaarijiani. Herodesri naa sequequiaari niishijia pohuatanuucua nojuaja, Jesu rijiaari tarija niquishaaquiaari. Juhuanujuajaari maja caapiqui marija shocojonu quiquiaari rija niquishaanujiniji.

<sup>17</sup>Naacuajitij, tariucuacaanu Pueyaso sequesano caminiujunaa Jeremías sequesanoori tohuateequiaari. Jeremías sequesanoori naa naajiotasaaquiaaritij:

<sup>18</sup>“Sapuenuari tojishiya Ramá tiacajinia. Jyanohua taraatia. Raquelri necohuacua sariyacojia. Majaari na paniniu na cumaniijasaanura. Necohuari tari puecoosaarucua”.

<sup>19</sup>Na nuhuaji, Herodes jaara cusoquiaari, Pueyaso seruuri Josecua muetaquiaariuhua na maquenujia, Egipto jiyajinia nojori quishacarijia. <sup>20</sup>Na sequeereeri:

—Quia sanere. Mueya quia tacaretaarohua Israel jiyajiniohua na nucuatata. Mueya monu panijiaaari tari cusonuucua.

<sup>21</sup>Joseeri sanequiaari. Mueya tacaretaquiaariuhua Israel jiyajiniohuara na nucuatataari. <sup>22</sup>Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocujaji, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujia, tamocora na quianura. Naaratej, Joseeri mueya nucua pacuquiaari Galilea jiyajiniara. <sup>23</sup>Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujunaa sequesanoori tohuateequiaari nojori jaara naa naajiotaqueiaaritij: “Jiyaniquishaanutaniyari Nazaret tiacajinijinio pueyano”.

**Tiuquinijiona Juan pohuatasacari cariquia jiyajinia**  
(Mr 1.1-8; Lc 3.1-9, 15-17; Jn 1.19-28)

**3** Na nuhuaji, tamonu pueyanoori cariquia jiyajinia quiquiaari Judea jiyajinia, Jordán moo shuriucua.

Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. <sup>2</sup> Naa pohuataquiaaritiaj:

—[Nioojia nia tacatore sesa nia miiniujiniji! Pueyasoori tari nia jiyanooni paniya, na muerasu nia quiniuria seetanujuanaa.

<sup>3</sup> Jiyanoohua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritiaj:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeeecanamitiri Jiyaniijia nuu, maja mojoquetunu na quiniuria’”.

Tiuquinijiona Juanjanaacuajaari nio tariucuaaanu pohuatasano tohuateequiaari, pueya na niishitiojosacari nojori jeenucuanura nojori jiuujia Jesuucuaaji.

<sup>4</sup> Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriasano sequeru, samiyatunio.

<sup>5</sup> Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiojuhuj, puetunu Jordán mooshocuaqueyajinijiojuanaano. <sup>6</sup> Pueya jaara pohuataquiaari Juan niquiara sesa nojori miijosano, Juanri nojori tiuquinijioquiaari Jordán moojinia, Pueyaso toji-jara nojori quini panishacari.

<sup>7</sup> Na tiuquinijosacari pueya, Juanri queraatia Fariseocuaa niquiquiaari nocua nijiyano, Saduceocuaano. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—[Niaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucuaaji nijaniyani? Nio pa quishacarini, quera Pueyaso saniitionutaniya nijaniya, na tojiyashijiaca nia quiniucua. <sup>8</sup> Naa jaara seetanujuanaa nioojia tacatore sesa nia miiniujiniji, ßaaja maninia nia miiri, maja sesa! <sup>9</sup> Majaari nia jiyaniinu niaari Pueyaso muerasu, Abraham niquiohuacuajinio supueno nia quiniucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijiuhuaj. <sup>10</sup> Nio miriqui sequesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijiasocoriquiano. Naajuhuj, Pueyasoori quera saniitionutaniya nijaniya, na tojiyashijiaca nia quiniucua.

Tiuquinijiona Juanri pueya sequequiaari socua:

<sup>11</sup> —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanoohua socua jiyaniijajanaa janiyajiniji. Janiya maara jiyanoohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. [Nojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Naa jeequenutaniyajaariuhua juhua manitia, sesa nia miishanojiniji. <sup>12</sup> Naa tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuaaanuji

na totinijiasocoriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuj, cua nuhuaji niniiaari tariucua pueca, na tojtianaa na rijionura na quiquiojiniara, saniniuujia na tojiyashijiaca na quejoonura manijinia na saniitionura, tee mani maquesaaquiyacujani.

### Jesu tiuquinishacari moojinia

(Mr 1.9-11; Lc 3.21-22)

<sup>13</sup> Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeeseeri:

—Cua tiuquinirijia.

<sup>14</sup> Juanri saaja na sequeree:

—Maja jiyaniijianaa. [Quiaa cutaraari maninia pueyano! ¿Casaara cucua quia nimiaa cua tiuquininuria quiajaniya moojiniani? [Cua tiuquiniri juhuari cutara!

<sup>15</sup> Jesuuri saa sequereejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuajitij, Juanri na tiuquiniquiaari. <sup>16</sup> Jesu jaara tiuquinishaaquiaari, nojuajaari ritia tacaquiaari moojiniji. [Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. <sup>17</sup> Jiyacaritij, jiyocuaaanuji Pueyaso rupaari tojishaaree naa sequeyano:

—Nioori cua Niyununiyojua. [Na shuquiritiaa jiyanohuanijia!

### Samaruhua jiyaniijia saniniujishacari Jesu

(Mr 1.12-13; Lc 4.1-13)

**4** Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujishocoriquiano cuniqui.

<sup>2</sup> Majaari quenaaja Jesu miaquenu quiquiaari.

Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri.

<sup>3</sup> Sesaacaari jiyacari nocua niquiaari na saniniujinuria. Jesu sequeeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

<sup>4</sup> Jesuuri saaja na riucaaree:

—Maja. Pueyaso Rupaajiniacuajaari naa naajio-tasano quiyatej:

“Pueyanoori maja na naatanu saa miaquesanoocuaaja. Seetanujuanaa saminio quiya cutaraari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuaaanuuri, Pueyaso Secojoua tia cacojiria. <sup>6</sup> Na sequereeri:

—Quiaa jaara seetanujuanaa Pueyaso Niyanu quiri, niiquiji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucujaji”.

<sup>7</sup> Jesuuri na riucaaree:

—[Maja! Pueyaso Rupaajinia, naa naajiotasanoori quiyajuhujaj:

“Maja quia saniniujiuniu quia Jiyaniijia Pueyaso”.

<sup>8</sup> Na nuhuaji, Sesaacaari Jesu tacaniquiaari socua jiyanoohua jiyaconaja tuhuananuucua. Cuniqiji na niq-uitirii puetunu jiya jiyaniijiacajanaari. Jiyanoohua cumaacaraca quijiaca. Jiyanoohua queraatia casamiriac-aca quijiacajuhujaj. Jiyanoohua maninia niquishano. <sup>9</sup> Jesu sequereeri:

—Janiyacua quia jiyatere jiyaniijiajanaara nojori niti-ni, quiaa jaara cua cariquimijaji mojuquetare quia shuquiritianura janiya, quia jiyaniijia cua quiniuria.

<sup>10</sup> Jesuuri na sequeree:

—[Ni qiji quia quiaare Satanásnaa! Naa naajio-tasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cu-tara. Saaja nojuaja quia tojiri”.

<sup>11</sup> Na nuhuaji, Sesaacaari na tarinitiaquiaari. Jiyacari-tij, Pueyaso seyari Jesuucua niqiaari na mianuutenu-ra.

### Jesu coteesacari poonijionu Galilea jiyajinia

(Mr 1.14-15; Lc 4.14-15)

<sup>12</sup> Jesu niishishacari Tiuquinijiona Juan nujuatesaarucua nujuatejojuajinia, nojuajaari Galilea jiyajinia quiaquiaariuhua. <sup>13</sup> Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niqiuoacuajinio supueno pueya jiya, Neftalí niqiuo-huacuajinio supueno pueya jiyano. Zabulón, Neftalíno, nojoriiri supuetana Jacobo niqiuo-hua quiquiaari. <sup>14</sup> Jesu quishacari cuno jiyajinia, na tohua-teequiaariiri taa tariucuacaanu Pueyaso sequesano caminiujiunia Isaías pohuataquiaari cuno jiyajinijicua-jani. Nojuajaari naa pohuataquiaari Pueyaso niishi-tiosano nojuaja taa na nuhuaji na sequesano tohua-teenutaniyani:

<sup>15</sup> “Zabulón pueya jiya, Neftalí pueya jiyano, cunoori caminia shuriuquiumia neteja nuuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani. <sup>16</sup> Cuno jiyajinia quiniari ninishiqui quijiaca quiquiaari. Quiarjia saniniuujia, no-joriiri jiuujia Cuhuatana niqiriucuaa. Nojoriiri cusunu pueretujuaca quiquiaari tarijia. Quiarjia cutara nojori-iri cuhuatasaaree nojori puereyaquiniuucujaji”.

<sup>17</sup> Jiyacaritij, Jesuuri Pueyaso rupaa pohuatuani cotee-quiaari. Naa sequequiaariiri:

—Nioojia nia tacatore sesa nia miiniujiniji. Pueya-soori nia paniya na pueya nia quiniuria.

### Jesu saquiriojosacari sapitiaaja ritianaa

(Mr 1.16-20; Lc 5.1-11)

<sup>18</sup> Jesuuri Galilea caminia shuriuquioco rucuaneriquiaa. Jiyacaritij, Pedro niqiriiri, tarajanu Andrés-

nio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaqueroortariquiaa. <sup>19</sup> Jesuuri nojori sequeree:

—[Miji! Cua tarajare. Cua pueyara nia quiri. Janiyacua nia jiyatere pueya quiojuara saniniuunijia, juhua sapitia-aja quioonaa.

<sup>20</sup> Nojoriiri na shiyaru tiujiaquiaari ritia. Jesuta quioji-yareeri.

<sup>21</sup> Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionu-uriquiaari. Jesuuri Santiago sequeree Juannio, na pueyara nojori quiniuriajuhuaj. <sup>22</sup> Nojoriiri ritia bote tiujiaquiaari na queta, Jesuta na quiojonura.

### Jesu niishitiojosacari queraatia pueya

(Lc 6.17-19)

<sup>23</sup> Jesuuri puetunu Galilea jiyajiniajanaa rucuanejo-quiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jiitianu paniya maninia na pueyani. Puetunu tamaatia cusonuunu jiiticojuajanaa naatanijioquiaariiri. Puetunu nootunejaca pueyajanaa shaataquiaariiaariuhujaj. <sup>24</sup> Naa maninia na miis-hanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitiajaca-janaano, cumatacuruhua cusosuhujuhujaj, nootunejacano. Nocua jiyatasaquiaarijuhuaj samaruhuaraca quijiaca, canashiyaquiji cusojonuujacano. Jesuuri nojori naatanijioquiaari puetunujuanaa. <sup>25</sup> Jiyanoohua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhua-jiquiaarijuhua Jerusalén tiacajinijinio, Judea jiyajinijio-juhuaj, mariyata Jordán moo taquijiria jiyajinijionio.

### Jesu pohuatasacari Pueyaso rupaa tuhuananujiniji

(Lc 6.20-23)

**5** Jesu niquishacari jiyanoohua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari. <sup>2</sup> Jesuuri nojori niishitiojonu coteequiaari. Naa na pueya sequereeri:

<sup>3</sup> —Shuquiriaatia quijiaca cutaraari noo pojori, canapete niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

<sup>4</sup> Shuquiriaatia quijiaca cutaraari noo pojori canapete taraatia quiyani sesa na miiniuucua. Pueyasoori nojori cumanijanutaniya.

<sup>5</sup> Shuquiriaatia quijiaca cutaraari noo pojori, canapete maja tama nerajaaja niishiriojojuacani. Nojoriiri nio jiya camaruhua quiniutaniya, taa Pueyaso seque-quiaaricujani.

<sup>6</sup> Shuquiriaatia quijiaca cutaraari noo pojori, canapete maninia quiniuucua jiaatiaa jiyanohuani, taa pa

jiatiaacuaa miaquenuucuanu. Pueyasoori maninia qui-  
jiacara nojori jiyatenutaniya.

<sup>7</sup>Shuquiriaatia quijiaca cutaraari noo pojori, cana-  
puete naquiya miishanoocua taraajejani. Pueyasoori  
nojoriicua taraajenutaniyajaacuhuj.

<sup>8</sup>Shuquiriaatia quijiaca cutaraari noo pojori cana-  
puete maninia jiuujjaracani. Nojoriiri Pueyaso  
niqiniutianiya cutara.

<sup>9</sup>Shuquiriaatia quijiaca cutaraari noo pojori, cana-  
puete pueya jiyanootejani. Nojoricuajaari Pueyaso  
muerasu quiniutianiya.

<sup>10</sup>Shuquiriaatia quijiaca cutaraari noo pojori, cana-  
puete naquiya miishanoni, Pueyaso panishano nojori  
miiniuucua. Pueyasoori nojori jitianutaniya pueyara-  
caanu shuquiriaatia, na muerasu nojori quishacari.

<sup>11</sup>Shuquiriaatia quijiaca nijaniya, tamasa jaara  
nia macaatiri cua tojtiajaca nia quishacari, naajuhuj,  
nojori jaara miya naquiya nijaniya. Naajuhuj, niaari  
shuquiriaatia quijiaca, nojori jaara saquiriojotare ni-  
aacuara na sapojonuta, maninia nia tojiniuucua janiya.

<sup>12</sup>Niaa jaara naa miishaaretej, jiyanohua nia tim-  
iquiore. Shuquiriaatia nia quirijihuj! Pueyasoori  
cunora jiyanohua maninia nia miiniutianiya jiyocua-  
caanu nia quishacari nata. Tariucuacaanu Pueyaso se-  
quesano caminiujuniacuajaari naa naquiya mi-  
ishaaquiarijihuj, nia supueyaquishaacarijijojua.

**Pueyaso muerasuuri juhua shoni quiya mijiria, juhua  
ninishiqui cuhuatanaajuhuj**  
(Mr 9.50; Lc 14.34-35)

<sup>13</sup>Mijiria, niaari juhua shoni quiya, mijiria quiniaa  
mariqui socua seseyareeri. Shoni jaara na tiquiriiquia  
jatama, ¿maatucua taa tiquiriiquiara quiriuhuani? Maja  
na naata. Shoni jaara naa qiritij, najuhuana quiyari,  
shaaca. Jiyano shoni cuara jatasaaria nuujinia, pueya  
rapijiosocoriquiano.

<sup>14</sup>Naajuhuj, niaari juhua ninishiqui cuhuatana mi-  
jiria quiniaara. Tiaca jaara tuhuananuucua quiri, ma-  
jaari na naata na jamaaniu. <sup>15</sup>Naajuhuj, pueya jaara  
samaritii noshitiri, jiyocuaanu morotashiyari, tiaco  
na cuhuatanura maninia, pueya niqiniuria maninia  
nocuaji. Majaari samaritii niatasaanu conatu cariquia-  
co. <sup>16</sup>Naajuhuj, nijaniya cuara maninia miiria pueya  
niquiara. Maninia nia miishacari, niaari pueya cuhu-  
ataa juhua samaritii. Naa maninia mijia nia  
quishacaritij, pueyari jiyocuaanu Quijia nia Que  
Pueyaso maniniuhuaqueetanutaniya.

**Jesu niishitiojosanoori tariucuacaanu Moisés  
Rootasanojiniji**

<sup>17</sup>Majaari nia jyaniniu janiyari niquiaarini Moisés  
Rootasano cua tarinitiniuria nijaniya, Pueyaso seque-  
sano caminiujuniaa rootasano. Maja. Niquiaari cu-  
taranijia puetunu cunoro rootasanojuanaa cua tojiniuria,  
cua tohuateenurajuhuj. <sup>18</sup>Pueyanaa, seetanujuanaa  
nia sequeyanijia. Nio jiya quishacarijia, jiya cajin-  
iocuano, majaari quenaaja niquiriyatu naashanoniyo-  
jua Pueyaso Rupaajiniji shaajetesaanu quiniutianiya.

Majaari na shaajetesaanu quiniutianiya puetunu  
Pueyaso naajotesanojuanaa cuara tohuateerejaatijia.  
<sup>19</sup>Naaratej, tamonu pueyano jaara jyaniri tamonu  
rootasano tariucuacaanu Pueyaso Rupaajiniji najuhua-  
na sequesano, nojuajaari cocuaatia miya. Nojuaja  
jaara cunoro tariucuacaanu rootasano tojiyaquiri, cunoro  
pueyanoori socua rerequetesano quiniutianiya narta  
Pueyaso muerasujinijinio. Naajuhuj, nojuaja jaara  
pueya niishitiojore nojori tojiyaquiniuria cunoro  
rootasano, cunoro pueyanoori socua rerequetesano  
quiniutianiya puetunu narta Pueyaso muerasujiniji-  
janaa. Saniniuujia, cante tariucuacaanu Pueyaso  
rootasano tojiquiaanijia, na niishitiojoquiaa tamasa-  
jaariuhuj, cunoro pueyanoori socua tojishano pueyano  
quiniutianiya Pueyaso shuriucua jiyocuaanu. <sup>20</sup>Nia  
numooteyanijia, niaa jaara quiyacari socua maninia  
quijiaca Fariseocuacajiniji, Moisés Rootasano niishitio-  
jonaajinijinio, majaari Pueyaso muerasu nia quiniu  
quiniutianiya.

**Jesu niishitiojosano maja pa juaaniuria**  
(Lc 12.57-59)

<sup>21</sup>Niaacuajaari tojiquiaari taa pa supuetanaa seque-  
saaquiariicujani: "Maja monu. Cante pueyano mo-  
nani, nojuajaari nequesoreesaanutaniya". <sup>22</sup>Janiyari  
saniniuujia nia niishitiojiyani, cante narta pueyanota  
juaajiani, cunoro nequesoreesaanutaniya. Naajuhuj,  
cante narta pueyano saarijiojuani, cunoro neque-  
soreesaanutaniya jyaniijianucua niquiara. Naajuhuj,  
cante narta pueyano sesacareeni, cunoro quera  
jatashiya mani quiquiojinia, pueyaracaanu saniitioso-  
coriquiano.

<sup>23</sup>Naacuajitij, nia niqitionu panishacari Pueyasora  
nia casaa, niaa jaara jiyacari niishiqui, quiaari quiarta  
pueyano juaatiriucuaa quiocuara, ritia quia tiujiare cu-  
niqui quia niqitiosocoriquiano Pueyasora, catijiaja  
shuriucuanu. <sup>24</sup>Quiarta pueyanota quia  
jiyanootioocoocuara coteenu. Na nuhaji cutara quia  
naata niqitionu quia casaa Pueyasora.

<sup>25</sup>Tamono jaara quia jiyataa nequesoreenaacua,  
sesa quia miiniuucua nojuaja, maninia quia pohuatare  
ritia nojuaja, taa quia miiniutianiyanu na jyanooniuria  
quiajaniya. Ritia nia jeecatoore nuacu nia quiasacari-  
jia, quiaa mariqui nequesoreena niqitiosoareeri.  
Nequesoreena naasucuaari quia niqitionutaniya nu-  
juatejojua camarnu saniniuujia. Nojuajaari quia nuju-  
atenutaniya nujuatejojua. <sup>26</sup>Seetanujuanaa nia se-  
queyanijia, majaari quia tohuatanu quiniutianiya,  
quiaa cuara niqitiojeaatijia puetunu na sequesano  
cumaneeajanaa quia cumaneecajiniji.

**Jesu niishitiojosano, maja pa camishoo maajicua pa ji-  
aatiaaquiuria**

<sup>27</sup>Niaacuajaari tari tojiquiaari nio tariucuacaanu  
rootasano: "Maja tamonu niquiocua numuetucunu".  
<sup>28</sup>Janiya cutaraari nia sequeyani, pueyano jaara na  
camishoo maaji niquiri nocua na jiaatianuta, cunoro  
juhua na numuetucuree tari noojajinia.



<sup>29</sup> Na nuhuaji, Jesuuri nio miriqui sequesano sequesani pueyara, jiyanohua na niishitiojonura nojori: —Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatara. Quiajaniyara socua maninia cutaraari namijijiu quia quiniuria, maja quia jatasaanura mani quiquiojina puetunu quia cuaqueyatajanaa. <sup>30</sup> Naajuhuj, quia miaquetajara quia numatu jaara quia miitiri sesa, quia jiyatarenj. Tucuaaanu quia jatara. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria nauyia tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

### Jesu niishitiojosano maja pueya cartenura necocua (Mt 19.9; Mr 10.11-12; Lc 16.18)

<sup>31</sup> Jesuuri naa niishitiojoquiaarijiuhuj:

—Pa supuetanaari naa rootasaaquiaarijiuhuj: “Pueyano jaara necocua cartere, maaji cuaara niquitiosaaria naajione, pueya niishiniuria neyacaqui na carteree”. <sup>32</sup> Janiyari saniniuuja nia sequeyanijia, pueyano jaara necocua cartere, sesa miya Pueyaso niquiaraari. Naacuajitij, na cartesano maajiiri tamonuta quiniutianiya na nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

### Jesu niishitiojosano maja pa sapojonura

<sup>33</sup> Naaari tarijia tojtiaquiaari taa pa supuetanaa rootasaaquiaariini. Naa rootasaaquiaariiri: “Majaari nia jatanu nia sequesano, niaa jaara sequere: ‘Seetanujua-naari cua sequesano. Pueyasocuaajaari niishiya majaari cua sapojonu’”. <sup>34</sup> Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere “jaa”. Jaara seetanujuanaa quiaquiri nia sequesano, saaja nia sequere “maja”. Majaari nia sequesano nia maatenu najuhuaana naatej: “¿Janiyate sapojonu? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? <sup>35</sup> Naajuhuj, ¿casaara nia sequesaniaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequesaniaa: “Cua sequesanoori juhua Jerusalén tiaca? Pueyaracaanu quiniutianiari”. Maja naa sequenutej. Jerusalén tiacaari pa Jiyaniijia Pueyaso tiaca. <sup>36</sup> Naajuhuj, ¿casaara nia sequesaniaa naa najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Naa jaara naa sequerej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio.

<sup>37</sup> Naaratej, pueyaracaanu saaja seetanujuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano niajaniya.

### Jesu niishitiojosano maja pa naminiuria (Lc 6.29-30)

<sup>38</sup> Naaacuajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartasariajuhuaj, pueya nequesoreena niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasariajuhuaj”. <sup>39</sup> Janiyari saniniuuja nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. <sup>40</sup> Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niquitiore nareja. Majaari jamueja quia quiniu. <sup>41</sup> Tamonu camarnu jaara quia sequere na naacutanura na casami quia jatanura nuu cajiniocua, majaari na tarijionu. Saniniuuja, shuquiriaatia quia naacutare na casami jatanura socua tucuaaanu na sequesanojiniji. <sup>42</sup> Tamonu pueyano jaara quia casami masenu paniya nera, quia niquitiore nareja. Naajuhuj, tamonu pueyano jaara quia casaa panu paniya nareja rupaquijiaara, quia niquitiore. Majaari na ruuretanu. Capora quia quiri.

### Jesu niishitiojosano pa paraca pa paniniuria (Lc 6.27-28, 32-36)

<sup>43</sup> Naaacuajaari nio tariucuacaanu sequesano tojtiaquiaarijiuhuj: “Quia shuriucua quinia quia paniri. Saniniuuja, majaari quia paraca quia niquiniu”. <sup>44</sup> Janiya cutaraari nia sequeyani, nia paraa nia paniri. Nia sesacaja pueya nia maniniuhuaqueetare pueya niquiara. Pueyano jaara niaacuara saquirojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. <sup>45</sup> Naa maninia nia miishacarijia, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijia pueyara, sesa miijiacarajuhuj, maninia nojori nataacuaca moritianura. <sup>46</sup> Naa jaara saaja nia panijia pueya panijia quiriqia, ¿Pueyasoteeri cunora nia shuquiritianutaniya, socua na casaajiniji na niquitionura niajaniya? Maja. Sesa miijia pueyani, noo pojori canapuate cumaneeca masejoquiaa na sapojonutani, nojoriiri maninia miijiaa na panishano pueyajuahuaj. <sup>47</sup> Naa jaara saaja nia panishano pueya saruhuaquiaa, ¿ni-aateeri cunora maninia miijia quia Pueyaso niquiara? Maja. Pueyaso niishiyashijia pueyari naa maninia miijiaa na panishano pueyajuahuaj. <sup>48</sup> Naaratej, maninia miijiaa nia quiri juhua jiyocua-

caanu Quijia nia Que Pueyaso. Nojuajaari seetanujua-naa maninia miijia. Rimiajata miyashijia cutara.

### Jesu niishitiojosano saaja maninia pa miiniuria Pueyaso niquiara

**6** 'Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niqutionu quiniutianiya nijaniya socua, maninia nia miiniucua. <sup>2</sup> Naaratej, niaa jaara casamijiuniucua pueya niqutionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niqutionu panishacari na casaa, puetunu pueyjanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacajuhuj, pueya maniniuhuaqueetanura nojori. Seetanujanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. <sup>3</sup> Saniniuujia, niaa jaara nia casaajiniji casamijiuniucua niqutionu paniri nareja, quia mueneca cuaara niishiyaquiiria quia niquticosano quia miaquetajata. <sup>4</sup> Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutaniya na casamijiniji, na shuquiritiasacari nijaniya.

### Jesu niishitiojosano naa pa secojonura Pueyaso (Lc 11.2-4)

<sup>5</sup> 'Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujuanuta pueya niquiara, saaja pueya shootianura nojori. Nojoriiri naa secojonuquiaa Pueyaso secojojua tiacajinatej, tiaca nuucua-jiniajuhuaj, tee queraatia pueya quiyacuajani. Seetanujanaa nia sequeyanijia, cuno pojoriiri tari maniniuhuaqueetasareecuaja. Jiyano pueyatej, majaari nojori masenu quiniutianiya socua Pueyasojiniji. <sup>6</sup> Nijaniya saniniuujia, nia secojosacari Pueyaso, nia sohucamara nia tiuquiri. Nia tiootiu nia tiore. Na nuhujia, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuquiritiasacari nijaniya.

<sup>7</sup> 'Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijia. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. <sup>8</sup> Majaari juhua nojori nia miiniu. Pa secojiyaquishaacarijiyojua, pa Que Pueyasocujajaari tari niishiya casaa pa paniyani. <sup>9</sup> Naaratej, naate nia secojore:

"Canaa Quenaa, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia.

<sup>10</sup> Quia quiri canaa Jiyaniijia, canaa quia jiitianura. Quia panishano cuaara miishaaria mijiria, taa jiyocuacaanu na miishaaquiaacuaani. <sup>11</sup> Canaa quia niqutiore canaa miaquesocoriquiano quiarijiani. <sup>12</sup> Canaa quia jiyanoori sesa canaa miishanojiniji, taa canaa jiyanooquiaa tamasacacuaani, sesa nojori miishacari canaa. <sup>13</sup> Majaari canaa quia shanacunu canaa saniniuujishaanura sesa canaa miiniuria. Saaja canaa quia cojuare cutara Sesaacaacujia. Saaja quiajaniya cutaraari seetanujanaa Jiyaniijijanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaracaanutej. Tariucujaja".

<sup>14</sup> 'Naatej, niaa jaara jiyanoori tamasaca, sesa na miishacari nijaniya, nia Que Pueyasoori nia jiyanoonutianiyajuhuj. <sup>15</sup> Saniniuujia, niaa jaara tamasaca jiyanoyaquiri, nia Que Pueyasoori maja na jiyanoonutianiyajuhuj sesa nia miishanojiniji.

### Jesu niishitiojosano taate pa naata miaqueyaquiniuni Pueyaso pa secojonura

<sup>16</sup> 'Niaa jaara miaqueyaquiya Pueyaso nia secojonura, majaari macuhuajeconu pueya niquiara, taa sesa jiuujiaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujanaa nia sequeya cutaranijia, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. <sup>17</sup> Nijaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia muesu, taa nia miiquiaa pueyaracaanucujani. <sup>18</sup> Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacuajitij, nojuajaari nia niqutionutaniya na casamijiniji na shuqiritianuucua nijaniya.

### Pa casami pa racatare jiyocuacaanu Pueyaso shuriucua (Lc 12.33-34)

<sup>19</sup> 'Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenu-taniya. Tiyarashiniutianiyajaariuhuj. Nohuasenuujacaari nocua tiuquiniutianiya na nohuasenuura. <sup>20</sup> Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejojuaari maja na naata nocua tiuquiniu tii, jiyocuacaanuji nia casami na nohuasenuura. <sup>21</sup> Naa jaara nia casami racatare mijiria, niaari nocua niishiriojonutaniya pueyaracaanu. Naa casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

### Pa cuaqueyajinia cuhuatanajiniji pohuatasano

(Lc 11.34-36)

<sup>22</sup>Pa namijaari juhua poojia cuhuatana. Naacuajitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. <sup>23</sup>Niaa jaara sesa casaacua jiaatiajaca quiri saniniuujia, nioojaari juhua ninishiqui quiya. Nioojia jaara sesa casaacua jiaatiajaca quiri, nioojaari socua ninishiqui quiya cariyujuaru pueyanojiniji.

### Pueyaso panijia pa quiri, maja cumaneeca panijia

(Lc 16.13)

<sup>24</sup>Maja nia naata poonijionu maninia caapiqui camarnura. Niaa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu paniyaquiniutianiyacujua. Naacuajitij, niaari shuquiriaatia poonijionutianiya nia panishano camarnura. Niaari tamonu sojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijihuhuj.

### Pueyaso na muerasu cojuaja

(Lc 12.22-31)

<sup>25</sup>Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutianiyani. Pueyaso jaara pa shipiniquiaari pueyano pa quiniuria, ¿maja-teeri na niquitionu quiniutianiya pa miaquenu panishano, pa cushiniu panishanonio, maninia pa rishinuria? Taaquiririnij. <sup>26</sup>Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na mijajaura. Naajaa, pa Que Pueyasoori nojori niquitioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujucajiniji. <sup>27</sup>¿Nia naatate socua jiyaconajara maashiniu, jijanohua nia tacaaniutia? Maja.

<sup>28</sup>Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucua nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitijara shitianujuhuj. <sup>29</sup>Seetanujuanaa nia sequeyanijia, pa supuetanaa jiyaniijia Salomónri jijanohua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucucajiniji. <sup>30</sup>Naana shuuri saaja rupaquijia shanohua niquishano. Jaara sorere, namitiasiyari catijasocoriquiano. Pueyasoori naana shu shipiniquiaari saaja rupaquijia shanohua niquishocoriquiano, na nuhuaji catijasocoriquianonio. Nojuaja jaara naa shanohua naana shuucua shipiniquiaari, ¿majateeri socua maninia na miiniu quiniutianiya niaara? ¿Casaara nia tiyuaquiya nia Que Pueyasoori? <sup>31</sup>Naaratej pueyanaa, maja nia tacaani. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani? <sup>32</sup>Pueyaso niishiyashijiaaari naa sequeja-

catej, puera nojori tacaashacari puetunu na panishano casaacuajanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. <sup>33</sup>Naaratej, coteenu nia niishiriojore Pueyaso tojijia nia quiniuria cutara. Pueyasocua nia niquitiojore puetunu nia panishanojuanaa. <sup>34</sup>Naajuhuj, majaari tariquiria nia tacaani. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaa quiarijia nia niishiriojosano nio juucara. Majaari socua tariquiria nia tacaani. Saaja nia Que Pueyasocua nia tiuuri, juhuajaniya nia quiniuria.

### Majaari quarta pueyanooacara soqueto nia quini

(Lc 6.37-38, 41-42)

**7** 'Maja niarta pueyano nia soquenu najuhuanaj, Pueyaso mariqui nia jiyanoaquirijiaariuhuj. <sup>2</sup>Taa nia sesacaquiaa tamasaacuaani, niaari naa sesacaanutanijajuhuj. Naatej, taa nia miiquiaa tamasaacuaani, Pueyasoori mariyata naa miiniutianiya nijaniyajuhuj. <sup>3</sup>Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuca maca jiiitiaa tama nia namijiajiniajaaja cutara? <sup>4</sup>Maca nia jiiitiasacari tama nia namijiajiniajaaja, ¿casaara nia sequeya niarta pueyanoni: "Cuno rucucua pa taquiri quia namijiajiniji"? <sup>5</sup>Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jeecare coteenu, na nuhuaji cutara niocua maninia nacasure niarta pueyano. <sup>6</sup>Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiaaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutianiya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

### Pueyaso pa secorej

(Lc 11.9-13; 6.31)

<sup>7</sup>Pueyaso nia secorej. Nojuajaari nia niquitionutianiya nia masesano. Niaa jaara pajere, niaari nia pajesano riuriatanutianiya. Tohuateyaji nia piquiri, niaacuaajiiri riataaanutianiya. <sup>8</sup>Cante Pueyaso maseya na panishanonio, seetanujuanaa na masenutaniyari. Naajuhuj, cante pajejani, na panishano riuriatanutaniyari. Cante tohuateyaji piquijiani, nocuajiiri riataaanutaniyajuhuj.

<sup>9</sup>Mueya jaara na que nenecojore neecaruura, ¿na queteeri na niquitionutianiya saajia? [Maja! <sup>10</sup>Mueya jaara na que nenecojore sapitiaajara, ¿na queteeri na niquitionutianiya soconu? [Maja! <sup>11</sup>Nijaniyari sesa miiniu niishijiaa. Naajaa, niaacuajaari maninia casaa niq-

uitionsu niishijia, nia mueya jaara nia nenecojore. Nia Que Pueyaso cutaraari jiyanoehua socua maninia niquitionu niishijia, na muerasu secojosacari nojuaja.

<sup>12</sup> Pueyaracaanu maninia nia miiri tamasa, taa nia paniquiaa pueya miiniuria niajanuyacuajani. Naa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasano juanaa, tariucuacaanu Pueyaso sequesano caminiuju-niaa rootasanonio.

### Pueyasocua nuuri secanuniyojua

(Lc 13.24)

<sup>13</sup> Pueyasocua neteja nuu nia pajere, shiitianiyojua nuuri tuneja. Saniniuuja, puereetuua nuuri neteya mani quiquiojiniara. Puereetuua na tuneja. Puereetu-ucaari neteya, carianujuhuaj. Naaratej, queraatia pueyari juhuajaniya cuno nucuaco quiojiya saniitiosocoriquiano. <sup>14</sup> Saniniuuja, shiitianiyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoehua shiitaniyo-juuari cuno nuu tuneja. Secaja pueyari na riuriataa, cam-i na quiojonura.

### Naanaari niishishano na jajaujiniji

(Lc 6.43-44)

<sup>15</sup> Tama nia cuaqueyajaaja nia cojuare sapojonuujua-caacuaji, noo pojoriicuaji canapuate najuhuaa seque-jacuajani: "Pueyaso Rupaa pohuatananijia". Nojoriiri sapuenu juhua maninia pueya niquishano, nojori sapojonura niajanuya. Nojoriiri sapuenu juhua borre-goniyojua niquishano, seetanujuanaa juhua puereeta sare nojori quishacari, sayoru. <sup>16</sup> Niocua nojori niishiri, sesa nojori miiniucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuj, cuno sesa jiuujiaraca pueyari maja na naata maninia miiniu. <sup>17</sup> Maninia naanaari, maninia jajau muetujua cutara. Saniniuuja, sesa naanaari, sesa jajau muetujuaaja. <sup>18</sup> Maninia naanaari maja na naata sesa jajau muetunu. Naa-juhuaj, sesa naanaari maja na naata maninia jajau muetunu. <sup>19</sup> Naana jaara sesa jajau muetujua quiri, nushiyari, manijinia catijasocoriquiano. <sup>20</sup> Naacuajitij, niocua cuno sapojonuujua pueya niishiri nojori miishanojiniji sesa.

### Saaja noojiaqueya pueyari Pueyaso muerasura quiniutianiya

(Lc 13.25-27)

<sup>21</sup> Cuno pojori canapuate cua sequejacani: "Cua Jiyaniijianaa, cua Jiyaniijianaa", noojiaqueya nojorijini-jiniori maja nojori tiuquitianu quiniutianiya cua Que Pueyaso quiquiojinia. Saaja seetanujuanaa cua Que to-jitiajaca cutaraari nocua tiuquitianutaniya. <sup>22</sup> Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijianaa, cua Jiyaniijianaa, canacuajaari quia rupaa pohu-ataquiaari pueya niquiarani. Canaa sequesacari quia

sesa, canaari samaruhua tohuatanijioquiaari quia cumaacatani. Naajuhuj, canaari cusosuhua naatani-jioquiaarini quia sesa canaa jiyaniquishacari". <sup>23</sup> Jani-yari saniniuuja naa sequejaca riucuanutaniyani: "Maja cua niishiniu niajanuya. [Nia quiojorohua! Niaari saaja sesa miijiaca quiquiaari".

### Jesu tojitiajaca miishanoori pueyaracaanu rishiniutianiya cutara

(Mr 1.22; Lc 6.47-49)

<sup>24</sup> Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. <sup>25</sup> Na nuhuaji, maruuri jiyanoehua niquiaari. Moori pajaashiquiaari. Paratuuri jiyanoehua piyarojo-quiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. <sup>26</sup> Cante cua sequesano tojjiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquijinia tiaquiaari. <sup>27</sup> Maruuri jiyanoehua niquiaari. Moori pajaashiquiaari. Paratuuri jiyanoehua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanoehua taraatia quiquiaari na tia pojotasacari.

<sup>28</sup> Jesu jaara niishitiojonu pucaquiaari, pueyari jiyanoehua jiuujiateriquiaa na niishitiojosano nojori to-jishacari. <sup>29</sup> Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijia-janaa, maja juhua Moisés Rootasanojiniji niishitiojon-aa. Cuno pojoriiri nareja tariucuacaanu rootasano caminiujuquiaari pueyaracaanu.

### Jesu naatanishacari sesa cusonu jiitiaja

(Mr 1.40-45; Lc 5.12-16)

**8** Jesu jaara tuhuananujiniji rosequiaariuhua na co-jiniaata, jiyanoehua queraatia pueyari na nuhua-jiriquiaa. <sup>2</sup> Tamonu pueyano cusosuuri jiyacari Jesuu-cua catecanoquiaari. Jiyanoehua sesa cusonu jiiti-aquiaariiri. Tahue rupaajinia, cuno cusonu sesaari quiquiaari "lepra". Pueyano shuuri juhua miaquesano quijia na cuaqueyajinia cuno cusonu na jiitiasacari. Cusosuuri Jesu cariquimiaji mojuquetaquiaari Jesu na se-quenura na panishano. Naa na sequereeri:

—Jiyaniijianaa, quia jaara paniri, niishiyacuajaniija quia naata cua cusonu cushiriitiniu.

<sup>3</sup> Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu. [Jiyacaritij, ritia cushiriiri! Jeequerohuari. <sup>4</sup> Na nuhuaji, Jesuuri naa na rootaquiaari:

—Cua tojiri. Maja tamasa niquiara quia pohuatanu cua miishano quiajanuya. Saaja Pueyaso secojonaa jiyaniijia quia cuaqueya quia niquitiri, na cartenura quiajanuya, pueya tajinia quia rucuanenuhua juhujaniya. Na nuhuaji, ritia quia niquitiore quia seru Pueyasocuaa catijasocoriquiano. Naa quia miiritij taa Moisés niishitiojioquiaari tarijiacuajani, juhua jee-

quesano quia quiniuria Pueyasora. Naacujitij, pueyari niishiniutianiya quiaari tari jeequerohua quia cusonujiniji.

**Jesu naatanishacari Romano capitán seru**  
(Lc 7.1-10)

<sup>5</sup> Jesu jaara tiuquiquiaariuhua na pueyata Capernaum tiacajinihua, Romano soldadohua jiyaniijaari Jesuucua niquiaari na secojonura Jesu. <sup>6</sup> Naa na sequequiaariiri:

—Jiyaniijanaa, cua seruuri cusosu mataa maquetujinia. Majaari na naata pooniniu quenaaja. Jiyanhua naquiya miya na noonutaari.

<sup>7</sup> Jesuuri na sequequiaari:

—Janiyacujaari nocua quianutaniyani na cusonu cua shaatanura.

<sup>8</sup> Soldadohua jiyaniijaari na riucuaaree:

—Maja jiyaniijanaa! Janiyari maja pueyano maniniuni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajaniija, quiaari na shaatanutaniya saa quia rupaataja. <sup>9</sup> Janiyari jiyaniijiaracajaniuhua. Na tojiquiaanijia. Naajuhua, cua soldadohuari cua tojitaquiaajuhua, cua sequesacari nojori. Naacujitij, janiya jaara tamonu sequereni: “Quia quiaare”, cunoori ritia quiaquiaa. Naajuhua, janiya jaara tamonu sequereni cuaara niiria, cunoori ritia niya cucua. Janiya jaara cua pataaco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

<sup>10</sup> Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—Seetanujuanaa nia sequeyanijia, majaari quenaaja parta Israel pueyajinijinio cua niqiniu quiquiaa Pueyasocua tiuujia cutara, juhua nio tahue! <sup>11</sup> Seetanujanaa nia sequeyanijia, queraatia taucuaari Pueyasocua tiuujiaa quiniutianiya juhua nio tahue. Nojoriiri tucaaanuji nijionutaniya pananu metasamaji, pananu tiuquishocojijuhua. Nojoriiri pa supuetanaata cajitiniutianiya na miaquenuunura Pueyaso shuriucua. Tii quiniutianiya shuquiriaatiari pa supuetanaata: Abrahamta, Isaactajuhua, Jacobotano. <sup>12</sup> Parta Israel pueya, canapete Abraham jiniuanucujiniosupuenoni, nojoriiri saniniujia tamocora quejoosaanutaniya ninishiqui, nojori tojitiaaquiniucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyani na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanucujiniosojori quishacari.

<sup>13</sup> Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia sequereecuajani.

Jiyacartij, na seruuri ritia naataquiaariuhua.

**Jesu naatanishacari Pedro reyarucua**  
(Mr 1.29-31; Lc 4.38-39)

<sup>14</sup> Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. <sup>15</sup> Jesuuri na juaashiquia quiaasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

**Jesu naatanijosacari queraatia pueya**  
(Mr 1.32-34; Lc 4.40-41)

<sup>16</sup> Shusha ninishacari cuno juucaja, cuno tiacajinijinio pueyari queraatia samaruharaca pueya jaatucunuquiaari Jesuucua. Jesuuri cuno samaruhua tohatanijioquiaari saa na rupaataja. Puetunu cusosuhua-janaa naatanijioreejaariuhua. <sup>17</sup> Naa tohuateequiaariti supuetana Isafas naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujanaa na jatanura”.

**Tamasaca pueya quiniu panishacari Jesu pueyara juucua**  
(Lc 9.57-62)

<sup>18</sup> Jesu jaara jiyanhua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

<sup>19</sup> Jiyacartij, Moisés Rootasanojiniji niishitiojona pueyanoori Jesu sequeree:

—Niishitiojonanaa, janiyari quiata quianu paniyani. Janiyacua quia tarajareni puetunu tiqiyocujanaa quia rucuanesacari.

<sup>20</sup> Jesuuri na riucuaaree:

—Quioojuapue cutaraari na raa jiiitiaa. Shuhuari na jesuhua jiiitiaajuhua. Saniniujia, pueyano cua quishacari mijiria, majaari cua maquejara cua jiiitanu quenaaja, taa cuno casami jiiitiaacuaa na maquetujuarani.

<sup>21</sup> Tamonu Jesu pueyajinijinioori Jesu sequeree:

—Cua jiyaniijanaa, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

<sup>22</sup> Jesuuri na riucuaaree:

—Naajaa, cuata quia quiaare cutara. Quia tarinitiare nojuaja. Macunucua cuaara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

**Jesu suraajasacari paratu, mohuacanio**  
(Mr 4.35-41; Lc 8.22-25)

<sup>23</sup> Na nuhuaji, Jesuuri botejinia tacaquiaari. Na saquiriojosano pueyari nata quiojoquiaari. <sup>24</sup> Paratuuri senota piyarajonu coteequiaari nojori niuutiasacari. Jiyanhua piyarajoriquiaari. Caminiaari jiyanhua queyocuariquiaa paratu piyarajosacari. Mohuacaari bote jiniacuma mishiriquiaa. Jesuuri jiyacari maque-

riquiaa. <sup>25</sup> Na pueyari cunora na niucujasee. Jesu se-  
quitureeri:

—¿Jiyaniijianaa, canaa quia naacutare! ¿Paa tari  
tiuquitiareeni!

<sup>26</sup> Nojori riuuareeri:

—¿Casaara nia pueretiyani? ¿Majateeri nia niishiniu  
Pueyasocua tiuuniu?

Jesuuri saneree. Paratu sequereeri, mohuacanio:

—¿Niaaj, nia suraajere!

Paratu, mohuacaari ritia suraajequiaari. <sup>27</sup> Jesu  
pueyari jiuujiatequee. Tama nojorijiaarijia seque-  
quiaari:

—¿Juhuej! ¿Taamueca pueyanotucuaanojoni? ¿Paratu-  
uri na tojiya, mohuacajuhuaaj!

**Jesu tohuatanishacari samaruhua, caapiqui pueyajiniji  
Gadara jiyajinia**  
(Mr 5.1-20; Lc 8.26-39)

<sup>28</sup> Jesuuri na saquiriojosano pueyata tiuquiiioquiaari  
caminia taquijiria Gadara jiyajinia. Jiyacaritij, caapiqui  
pueyanoori Jesuucua tohuareetaquiaari raacajiniji, ma-  
cunucua nucuha paaquiosaquiji. Nojoriiri  
samaruhuaraca quiquiaari. ¿Jyanohua pueya puere-  
sano! Cuno nucuaco, majaari pueya rucuanenu quijia,  
cuno pojori na puerenuucua. <sup>29</sup> Samaruhuaraca  
caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa?  
¿Quiaate juhuacarijia niyaree canaa quia saniitionura  
Jesunaa?

<sup>30</sup> Jiyacaritij, cushiyari cateca naataja miaquenu-  
uriquiaa. Jyanohua queraatia cushiyari quiquiaari.

<sup>31</sup> Samaruhuari cuno caapiqui pueya pocuatequiaari.  
Naa Jesu secojoreeri:

—¿Quiaa jaara canaa tohuatanijiore nio caapiqui  
pueyanojiniji, canaa quia jiyarore cuno cushiyacua  
canaa tiuquitianura!

<sup>32</sup> Jesuuri cuno samaruhua sequereeri:

—¿Nia quiaare!

Samaruhuari cuno caapiqui pueyajiniji tohuaree-  
taquiaari. Cushiyacua tiuquitiaseeri. ¿Cushiyari cocu-  
atequee! Saaja caminiajinia totesee tacobinijiiri. Cushi-  
yari tii shushiniuushii.

<sup>33</sup> Cushiya cojuanaari netecuatuquiaariuhua na shiri-  
iquiniutia na tiacajiniara. Nojori tiuquiiiosacariuhua,  
pueya niqiara pohuatatuquiaari cushiyajinijiiri,  
samaruhuaraca pueyajinijinio. <sup>34</sup> Naaratej puetunu  
pueyajanaari cuno tiacajiniji nijioquiaari Jesuucua. No-  
jori niquishacari Jesu, na sequitureeri nojori jiyajiniji  
na quianura tamaqui.

**Jesu naatanishacari cumatacuruhuaana cusosu**  
(Mr 2.1-12; Lc 5.17-26)

**9** Na nuhuaji, Jesuuri botejinia rosetaquiaari na  
saquiriojosano pueyata. Caminia taquijiria niuuti-  
aquiariuhuari tama na tiacajiniarajaaja. <sup>2</sup> Tii nojori  
tiuquiiiosacari, Jesuucua patasaaquiaariiri cumatacu-  
ruhuana cusosu pueyano. Patasaaquiaariiri na matu-

jinia. Jesu niquishacari taa na patanaa tiuquiaari  
jyanohua nocuani, cusosu sequereeri:

—¿Quia shuquiriri sanajanaa! Quiaacuajaari tari  
jiyanooshaaree sesa quia miishanojiniji.

<sup>3</sup> Noojiaqueya Moisés Rootasanojiniji niishitiojonaari  
Jesu sequesano tojitiariquiaa. Nojoriiri tama noojajini-  
ajaaja niishiriojonuuquiaari: “¿Nio pueyanoori tama  
na cuaqueyajaaja jiyateya juhua Pueyaso na quiniuria naa  
na sequesacari! ¿Cunoori jyanohua sacuaraatia!”. <sup>4</sup> Je-  
suuri cuno pueya niishiriojosano niishiquiaari. Nojori  
sequereeri:

—¿Casaara sesa nia niishiriojijiani? <sup>5</sup> Seetanujuanaa,  
pueyano maja na naata jyanooniu pueya miishano  
sesa. Naajuhuaaj, majaari na naata tamajaaja pueya na  
naataniniu. <sup>6</sup> Naajaa, janiyari nia niishitiniutianiyani  
janiyari mijiria jiyarosaaquiaarini cua jyanooniuria  
pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya  
niqiara:

—¿Quia sanere! Quia matu quia pataarohua quia tia-  
jinia.

<sup>7</sup> Cusosuuri sanequiaari. Na tiajinia quiaarohuari.

<sup>8</sup> Na niqitiushacari Jesu miishano, puetunu pueya-  
janaari shiriquitiuquiaari. Nojoriiri Pueyaso manini-  
uhuaqueetaquiaari pueya na niqitionuucua na  
cumaaca, naa Jesu miiniuriatej.

**Jesu sequesacari Mateo na pueyano na quiniuria**  
(Mr 2.13-17; Lc 5.27-32)

<sup>9</sup> Jesu quiasacari cuno tiacajiniji, tamonu pueyano  
niquiquiaari cajiyanoori cumaneeca masejojuajinia Ro-  
mano jiyaniijiaara. Na sesa quiquiaari Mateo. Nojuacua-  
jaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

<sup>10</sup> Na nuhuaji, janiyari Jesu masuuquiaarini cua tia-  
jinia na miaquenura, na pueyajuhuaaj. Naacuajitij Jesu-  
uri cua tiajinia tiuquitiuquiaari miaquenura. Queraatia  
cuarta cumaneeca masejonaari canaa cojiriquiaa-  
juhuaaj, queraatia noo pojorijuhuaaj, Fariseocuaca  
jiyaniquitiushano sesoriquia pueyatatej. Puetunu  
canaajanaari Jesuta miaquenuuriquiaani.

<sup>11</sup> Fariseocuaca jaara Jesu niquiquiaari miaqueyano  
canaata, nojori soosano pueyani, nojoriiri naa Jesu  
saquiriojosano pueya nequesotaree:

—¿Casaara nia niishitiojona miaqueya cuno  
sacuaraatia cumaneeca masejonaatani, sesoriquia  
pueyatano?

<sup>12</sup> Jesuuri naa nojori sequesano tojirii. Nojori se-  
quereeri miriquiiri:

—Cante na cuaqueya jiyaniyani maja cusosu na  
quiniu, nojuajaari maja naarajona na paniniu. Cuso-  
suhua cutaraari naarajona panijia. Naajuhuaaj, sesa mi-  
ijiaa pueyari cua paniya nojori cua jyanooniuria sesa  
nojori miiijosanojiniji. <sup>13</sup> Niaa cuara niishitiojosuhua  
socua, maninia nia niishiniuria casaa tariucuaanu  
Pueyaso sequesano niishitiojijiani naa na sequesacari-  
tij:

“Niaacuajaari nia seya catijiaquiaa cucuara. Maninia juhuari nia taraajenura tamasaacua. Cuno cutaraari cua shuquiritasano”.

Naara niquiaarinijia nia sequesano sesa miijiaca cua jiyanooniuria sesa nojori miishanojiniji. Maja cutaraari mijiria cua niniu quiquiaari maninia pueyacu.

**Pueya nequesotasano casaara Jesu pueya tarinitiaaquiquiaa quenaaja miaquenuni**

(Mr 2.18-22; Lc 5.33-39)

<sup>14</sup> Tiuquinijiona Juan pueyari Jesuucua niquiaari naa na nequesotanura:

—¿Casaara quia pueya tarinitiaaquiquiaa quenaaja miaquenuni, nojori secojonura Pueyasoni? Canaacua-jaari miaquenu cartequiaani Pueyaso canaa secojonura taa Fariseocuaca miiquiaacuaani.

<sup>15</sup> Jesuuri nojori riuuaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

<sup>16</sup> Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaae toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya. <sup>17</sup> Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhua nia niitianura uva caaca. Naajuhuj, majaari na naata cua niishitiojosano cojitishaanu tariucuacaanu niishitiojosanota. Cua niishitiojosano nia tojitiare cutara.

**Caapiqui maajipohua naatanijiosacari**

(Mr 5.21-43; Lc 8.40-56)

<sup>18</sup> Jesu pocuasacarijia, nocua niquiaariiri Pueyaso secojojua tia camarnu. Jesu cariquimiaji mojqoetaquiaariiri. Na sequereeri:

—¿Quiyatuuri shusha cusoquee! Naajaa, miji, cuata quia quiaare. Niishyanijia quiaa jaara niare nocua quia juaashiquia, samiitianutanihuari.

<sup>19</sup> Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj. <sup>20</sup> Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maajiiri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama niishiriojoriquiaaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiaasee jiyasohuaja. <sup>22</sup> Jesuuri na

nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiuushacari, quia nanacaari tari curetaquee.

Jiyacaritij, cuno maaji jiniacumaari ritia sacuan-taquee.

<sup>23</sup> Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneniuuyano taraatia, sapiyoniuyanonio.

<sup>24</sup> Jesuuri cuno pojori sequeree:

—Nliquiji nia tohareetare! Nio maaji samiriuri maja macu. Nareja maqueyano.

Pueyari Jesu saroojotaree saaja, naa na sequesacari-tij. <sup>25</sup> Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaaseeri. Maaji samiriuri sanemaa! <sup>26</sup> Naa Jesu miishanojinijiiri pohuatasaaquiaari puetunu cuno jiyajiniajanaa.

**Jesu jeecasacari caapiqui cariyojuaru namijiaa**

<sup>27</sup> Canaa jaara tohareetaquiaari cuno tiajinijini, caapiqui cariyojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri see-tanujuanaa Pueyaso Jiyarosano. Naaratej, Jesu sequeturiquiaari:

—¿Bupuetana David niquiohuacuajinio supueno pueyanonaa, canaacua quia taraajere quenaaja!

<sup>28</sup> Canaa tiuquishacarihua canaa quijia tiajinia, cariyojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riuuatureeri:

—Jaa, jiyaniijianaa. Quia naatacuaaquinatejaj!

<sup>29</sup> Jesuuri na juaashiquia niaree nojori namijiaacua. Jesuuri cariyojuarujuri sequeree:

—Cucua nia tiuuniuucua, cuara quiriia taa nia sequereecuajani,

<sup>30</sup> Cuno pojori namijiaari maniniuajiacara quiquiaarihua. Jesuuri jiyanojua nojori rootaree:

—Maajari tamasa niquiara nia pohuatanu cua miishano!

<sup>31</sup> Na tohareetasacari, cuno cariyojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

**Jesu pocuatesacari tiquia pueyano**

<sup>32</sup> Cariyojuarujuri tohareetanu nuhuaji, tamasa pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj. <sup>33</sup> Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacari-tij, nojoriiri jiyanojua jiuujiatequiaari. Sequetureeri:

—Naa miishanoori maja na niquishaanu quiquiaari Israel jiyajinia!

<sup>34</sup> Fariseocuacaari saaja Jesu macaatiquiaari pueya niquiara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuajitij, na naata samaruhua tohuatanijionu.

### Jesu taraajesacari pueyacua

<sup>35</sup> Jesuuri puetunu tiacajiniajanaa rucuanajoquiaari Pueyaso rupaa na pohuatanura, puereetuuca tiacajinia, shiitaniyotua tiacajinianio. Maninia rupaa pohuataquiaari Pueyaso secojojua tiacajiniaqueya, pueya niishiniuria taa Pueyaso jiyanooni pania nojorini. Naajuhuj, nojuajaari queraatia tamaatia cusonu naatanijioquiaari puetunujuanaa, nootunejacanio.

<sup>36</sup> Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. <sup>37</sup> Cunora, Jesuuri canaa na saquiriojosano pueya sequequiaari:

—[Nia niquiri! Jiyanohua queraatia pueya. Cuno pojoriiri juhua puereetuuca sucohua. Saniniuujia, secajaari na senoonaa. <sup>38</sup> Nocuaji nia sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

### Jesu saquiriojosacari doce pueya na jiyaramiquishocoriquiano

(Mr 3.13-19; Lc 6.12-16)

**10** Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niquitioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhuj.

<sup>2</sup> Niioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuj. Pedro tarajanu Andrésri quiquiaarijuhuj. Quiriqiaajaariuhua Santiago, tarajanu Juannio. Cuno pojoriiri Zebedeo niquiohua quiquiaari. <sup>3</sup> Felipeeri quiriqiaajaarujuhuj, Bartolomé, Tomásnio. Quiriqiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijia. Quiriqiaajaariuhua socua tamonu Santiago. Cuno Santiagoori Alfeo niyanu quiquiaari. Quiriqiaajaariuhua Lebeo. Na sesa tarajanuuri quiquiaari Tadeo. <sup>4</sup> Quiriqiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriqiaajaarujuhuj. Nojuajaari Jesu quiteriquiano quiquiaari mosocoriquiano.

### Jesu rootasano na pueya na jiyaramiquiyaquishacarijia

(Mr 6.7-13; Lc 9.1-6)

<sup>5</sup> Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiaariiri, canaa na jiyaramiquiyaquishacarijia. Naa canaa sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu Samaria pueya tiacajinia. <sup>6</sup> Saaja parta Israel pueyacua nia quiaare cutara. Nojoriiri juhua borregohua tashuquioono quiya. <sup>7</sup> Nojori niquiara nia pohuatare puetunu tiacajiniajanaa. Nojori nia sequere: “Pueyasoori quiarjia nia jiitianu pania, niaa jaara na rupaa tojitiajacara quiri”. <sup>8</sup> Cusosuhua nia naatanijiore. Macunucua nia samiitianijiore. Canapue te lepra cusonu jiitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuj. Majaari cua cumaaca nia jamuenu.

<sup>9</sup> Majaari cumaneeca nia panu. <sup>10</sup> Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuara niquitioora saniniuujia nia panishano.

<sup>11</sup> ‘Nia rucuanijosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jijojetare, niaa cuara cuniquiji quiaarejaatijia. <sup>12</sup> Naa jaara tamonu tiajinia tiuquishiiquia, pueya nia sequere naatej: “Pueyaso cuara nioojia cajitiiria”. <sup>13</sup> Cuno tiajinia quinaa jaara maninia pueya quiri, juhuajaniya quiniutianiyari taa nia sequereecuajani. Nojori jaara Pueyaso tojijashijia quiri saniniuujia, nojori jiuujiaacari cajitijaquishaanutaniya. <sup>14</sup> Tamonu tia camaru jaara nia tiuquinitianu paniaquiri na tiajinia, Pueyaso Rupaa ruuretajaca nojori quiniucua, nojori niquiara nia niohuacaacuaji nia rapijiotare jiya joocua. Naacuajitij, cuno pueyari niishiniutianiya Pueyasoori nojori jiyanoyaquiniutianiya, nojori maseyaquiniucua na rupaa pohuatanaa. Naa nia miirijuhuj cuno tiaca pueya niquiara, cuno pojori jaara Pueyaso rupaa tojiniu paniaquiri nia pohuatasacari. <sup>15</sup> Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

### Pueyaso rupaa pohuataanaari naquiya miishaanutaniya

<sup>16</sup> ‘Socua cua tojitiare. Janiyari nia jiyaroya Pueyaso tojitiaashijia niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya niajaniya. Nocuaji jiyanohua niishijia nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. <sup>17</sup> Tama nia cuaqueyajaaja nia cojuare tamasa pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniaquishacari cua rupaa. Niaari Pueyaso secojojua tiacajinia piquishaanutaniya. <sup>18</sup> Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuj. Naajaa, naacuajitij, niaari nojori



niquiara pohuatanutaniya janiyajini, taucuaca jiyani-  
ijianucua niquiaranio. <sup>19</sup> Niaa jaara jiyaniijianucua tacho-  
ji nujuatesaare nequesoreesocoriquiano, majaari nia  
niishiriojonu taa nia riucuanutaniyani. Nia riucuanu  
panishacari, niaari jiyacari niishitiosaanutaniyacua  
maninia nia riucuanura. <sup>20</sup> Naacujitij, nia riu-  
cuasanoori maja tama nijaniyajiniijiaaja quiniu-  
tianiya. Pueyaso Sohanu cutaraari nia pohuatenu-  
taniya jiyaniijianucua niquiara.

<sup>21</sup> Pueyari tama tarajanujuaaja niqutionutaniya  
mosocoriquiano, tarajanu tiuushacari cucua.  
Pueyanoori neyanu niqutionutaniya mosocoriquiano,  
cucua neyanu tiuuniucua. Mueraasapueeri tama na  
queya tacartanutaniyajaacujua na motenura, na queya  
tiuushacari cucua. <sup>22</sup> Puetunu pueyajanaari nia  
niquiniu paniyaquiniutianiya, cucua nia tiuushacari.  
Naajaa, cante seetanujuaana cucua tiuujia quiya  
pueyaracaanuni, nojuaja cutaraari jatanishaanutaniya  
pueyaracaanu shacantuua quijia na quiniuria.  
<sup>23</sup> Pueya jaara naquiya nia miiri Pueyaso rupaa nia po-  
huatasacari nojori tiacajinia, cuno tiacajini nia mashiri  
tamonu tiacajiniara tii nia pohuatanura. Seetanujua-  
naa nia sequeyanijia, juhuanujuaja nia tucu-  
ataaquishacari nia pohuatanu Pueyaso rupaa puetunu  
Israel pueya tiacajinijanaa, janiyari jiyocuacaanuji  
tacenutaniuhuanu.

<sup>24</sup> Nio nia niishirijiuhuaj. Pueyanoori maja socua to-  
jishano na niishitiojonajini. Naajuhua, seruuri maja  
socua tojishano na camarnujini. <sup>25</sup> Pueyano jaara  
maninia tojiri quia na niishitiojona, maniniacuajaari no-  
juaja jaara na nuhuaji juhua na niishitiojonara quiri-  
juhuaj. Maniniacuajaari, seru jaara juhua na camarnura  
quirijiuhuaj. Naaratej, nia Jiyaniijia jaara jiyaniquishiy-  
acuaa "Sesaacata", ¿taariquitijia socua na muerasu  
sesacasaanutaniyatej?

### Cante socua pa pueresanoni

(Lc 12.2-7)

<sup>26</sup> Naaratej, majaari nia puerenu niarta pueya.  
Puetunu jiyasohuaja pueya miishanojuanaari niishis-  
hano quiniutianiya. Puetunu pueya seetasanojuanaari  
niishishaanutaniyajuahuaj. <sup>27</sup> Jiyasohuaja cua niishitio-  
josano nijaniyani, cuno nia pohuatere puetunu pueya  
niquiarajanaa. Cua sasacojosano nia numaa pajamani,  
cuno nia nacatare puetunu pueya niquiarajanaa.

<sup>28</sup> Majaari nia puerenu pa puecojuaca. Nojori nia maja  
na naata pa sohanu monu. Saaja nia puerere cutara  
nooj, cante cumaacaracuajani mani quiquiojinia nia  
sohanu na quejoonura, nia cuaqueyanio.

<sup>29</sup> Pa naata saaja niquiriyatu cumaneeniyajuata  
caapiqui shiyajuaniyojua masenu pa miaqueso-  
coriquiano. Naajaa, pa Que Pueyasoori puetunu cuno  
shuhua niishiyajanaa. Naacujitij, majaari quenaaja  
niquiriyatujua shiyojua cusonu Pueyaso  
paniyaquishacari. <sup>30</sup> Naajuhua, Pueyasoori puetunu  
nia naca cajasu niishiyajanaa. Puetunujuaanari na  
serojosano quiya. <sup>31</sup> Naacujitij, maja nia puerenu. Ni-

aari jiyano hua socua Pueyaso panishano queraatia  
shuhua jini.

### Maja cumaati Jesucristojini pa caririquiniu

(Lc 12.8-9)

<sup>32</sup> Niaa jaara tamasa pueya niquiara sequere niaari  
cucua tiuujia cutara, janiyacua jiyocuacaanu quijia  
cua Que niquiara sequere janihuaj, niaari cua muera-  
su. <sup>33</sup> Cante saniniujia cucuaji seetaja tamasa  
niquiarani, janiyari cua Que niquiara na tamacanu-  
taniyajaacuhua.

### Jesuucua tiuujia pueyari narta pueya juaashano

(Lc 12.51-53; 14.26-27)

<sup>34</sup> Majaari nia jyaniniu janiya mijiria niquiaarini  
pueya quiniuria juhuanijia. Maja. Mijiria cua niniu-  
cua, pueyari juayonuujutanutaniya. <sup>35</sup> Niquiaari cu-  
taranijia pueya tiuuniuria cucua. Naacujitij, pueya tiu-  
ushacari cucua, cucua tiuyashijia pueyari nojori  
niquiniu paniyaquiniutianiya. Naacujitij, pueyanoori  
na que paracaaniutianiya, cucua tiuujia na que quiniu-  
ucua. Maajiiri na nucua paracaaniutianiyajuhua, na  
nucua tiuuniucua cucua. Pueyano niquiocuaari na re-  
yarucua paracaaniutianiyajuhua, cucua tiuujia na re-  
yarucua quiniucua. <sup>36</sup> Naacujitij, tama pueya panis-  
hano pueyajaajaari na paracara quiniutianiya, cucua  
nojori tiuuniucua.

<sup>37</sup> Cante na queya panijia socua janiyajini, jiyano  
pueyanoori maja maninia cua pueyano na quiniuria.  
Cante necohua panijia socua janiyajini, jiyano  
pueyanoori maja maninia cua pueyano na quiniuria-  
juhuaj. <sup>38</sup> Cante tama na cuaqueyajaaja panitia quijia  
na tojiniuria janiyani, cunoori maja maninia quiria.  
<sup>39</sup> Cante saaja tama na cuaqueyajaaja cojuanu paniya  
shuquiriaatia na quiniuria mijiriani, jiyano pueyanotej,  
nojuaja cutaraari shaajasaanutaniya, pueyaracaanu  
taraatia na miitiasaanura. Saniniujia, cante tama na  
cuaqueyajaaja panitia naquiya na miishaanura cua  
tojijia na quiniucuanu, nojuaja cutaraari rishijia  
jatanishaanutaniya. Seetanujuaana cuata shuquiriaa-  
tia quiniutianiya pueyaracaanuuri.

### Pueyasoori maninia miijia niquitionutaniya na jiiti- asanojiniji

(Mr 9.41)

<sup>40</sup> Cante na tiaco nia tiuquinitiaja cua rupaajini nia  
pohuatasano na tojiniuriani, cuno pueyanoori cua to-  
jijijuhua. Cuno, cante cua tojijiani, nojuajaari cua Ji-  
yarona tojijijuhua. <sup>41</sup> Naajuhua, cante Pueyaso rupaa  
pohuatana tiuquinitiaja na tiaconi, Pueyaso rupaa po-  
huatana na quiniucuanu, Pueyasoori cuno pueyano  
niqutionutaniya maninia na casaajini. Nojuajaari niq-  
uitiosaanutaniya mariyata taa Pueyaso rupaa pohu-  
atana niqitiosaanutaniyacuaani, Pueyasojiniji na po-  
huatanu sami. Cante maninia miijia pueyano tiuquini-  
tiaja na tiaconi, maninia pueyano na quiniucua, na  
tiaco tiuquinitiaja pueyanoori maninia casaa niq-  
itiosaanutaniya mariyata taa maninia miijia pueyano

niquitiosaanutaniyacuaani. <sup>42</sup> Naajuhuj, cante que-naaja shiniitiuniacu mohuaca raateya tamonuni, cua mueyaniojua na quiniuucua, Pueyasoori seetanujua-naa na jiitiasanojiniji na niquitionutaniya na raatenu sami.

**Tiuquinijiona Juanri na pueya jiyaroquiaari Jesu nequesotanura**  
(Lc 7.18-35)

**11** Jesu jaara canaa na doce saquiriojosano pueya rootanu tucataquiaari tii, nojuajaari tiji quiaquiaari cuno jiya tiacajinia quinia na niishitiojonura Pueyaso rupaa.

<sup>2</sup> Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

<sup>3</sup> —¿Quiaate seetanujuaana Cristo, tariucuacaanu Pueyaso sequesano canaacua niriqianotej? ¿Canaate tamonu sashiya soj?

<sup>4</sup> Jesuuri nojori riucuarree:

—Nia quiaarohua. Tiuquinijiona Juan nia pahuata-suhua puetunu cua miishanojuanaa nia niquishano, nia tojishanojuhuaj. <sup>5</sup> Naa nia pahuatasuhua: “Cariyo-juarujuriiri tari niquitiarohua. Shipiiniquiuniuujiaaari maninia rucoorohua. Shu miaqueja cusonu jiitiajacaari tari jeequerohua. Numueejunucuaari tari tojitiarohua maninia. Macunucuaari samiitiacorohua. Casamiijiunucua pueyari Pueyaso rupaa pahuatasaaeree, Pueyaso muerasura nojori quiniuria”. <sup>6</sup> Shuquiriaatia quijia cutaraari noo pueyano, cante cucuaji taacanuyaquijiani.

<sup>7</sup> Tiuquinijiona Juan pueya jaara quiojoquiaariuhua Juancua, Jesuuri Tiuquinijiona Juanjiniji naa pahuatanu coteequiaari pueya niquiaratej:

—¿Casaa niquiniuucua nia quiojocanu cariiquia jiyajiniani? ¿Niaateeri paratu piyarajosano naajua niquiniuucua quiacanu? Maja. ¿Tiuquinijiona Juanteeri noojia niquijiteja? Maja. <sup>8</sup> Cua sequette, ¿casaa niquiniuucua nia quiojocanuni? ¿Niaateeri pueyano niquiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaa cutara, maja cariiquia jiyajinia. <sup>9</sup> ¿Taa-teerinitioj? ¿Casaacua nia quiojocanuurini? ¿Pueyaso sequenu panishano caminiujunia niquiniuucuatee? Jaa. Seetanujuaana nia sequeyanijia, Tiuquinijiona Juanri jiyanojua socua cutara pueyano tamasaqa Pueyaso sequesano caminiujuniaajiniji. <sup>10</sup> Cuno Juanjinijicuaajaari tariucuacaanu Pueyaso Rupaajinia pahuatasaaquiaari. Naa naajotasaaquiaari miriquiiri Pueyaso sequesano janiya nojuajiniji:

“Janiyari cua pueyano jiyaronutaniya quiocujini. Nojuajaari quia puetanutaniya, quia nuu jecariquiano quiocujaji”.

Juanri naa maninia miiquiaari cucuaji, pueya tojinuria janiya cua tiuquishacari.

<sup>11</sup> Seetanujuaana nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muera-

suniyojua quia cucua na tiuushacarini, cunoori socua cutara pueyano Tiuquinijiona Juanjiniji.

<sup>12</sup> Tiuquinijiona Juan jaara coteequiaari Pueyaso rupaa pahuatanu, pueyari jiyanojua saniniujuriaa Pueyaso muerasu nojori quiniuria. Pueyari naa saniniujia quiarijiajuhuaj. Cante jiyanojua saniniujia Pueyaso muerasu na quiniuriani, naa quiniutianiyari. <sup>13</sup> Supuetana Moisés, mariyata puetunu Pueyaso sequesano caminiujuniaajanaari tariucuacaanu pahuataquiaari taa Pueyaso jiitianutaniya pueyani. Naa poojotasaaquiaariiri Tiuquinijiona Juan jaara tiuquiquiaariiatijia. Quiarijiani, Tiuquinijiona Juanta, nojori pahuatasanoori tari tohuateenu coteya. <sup>14</sup> Naa jaara nio cua pahuatasanoocua tiuuniu paniri, nia tojiri nio: Tiuquinijiona Juancuaajaari tariucuacaanu pueyara Pueyaso sequesano caminiujunia Elíascauja. Elíascaujaari sequesaaquiaari niriqiano. <sup>15</sup> Cante nu-maaracani, cuara tojiiria cua sequesano.

<sup>16</sup> ‘Nia pahuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapueete carijiniacuma tacuarishijionu pania juucuanu. Nojoriiri narta naatujooriicua naca, nojori tacuarishijionu panishacari juucua. <sup>17</sup> Naa nacaari: “Canaari juucua naajua jonenejiani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu”. <sup>18</sup> Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. <sup>19</sup> Na nuhuaji, janiyari tiuquiquiaarini. Janiya cutaraari sumatuucua miaquejani, mashaca ratuajujuhuaj. Pueyari cua sequequiaa: “Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaraatiajuhuaj”. Naa nia soosacari janiya, Tiuquinijiona Juan-nio, niaari puetunu Pueyaso niishitiojosanojuanaa ru-uretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

**Jesu piriyojosacari tojiyashijianucua pueya**  
(Lc 10.13-15)

<sup>20</sup> Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasaqa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiyauquiquiaari. Nojoriiri maja noojia na tacatonu quiquiaari sesa nojori miiniu-jiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quinia pueyari:

<sup>21</sup> —[Niaari taraatia saniitiosaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuj, nojori maara juaca quejooquiaari na nacaacua, noojia nojori

tacatosacari Pueyasocua, sesa nojori miiniuucua.  
<sup>22</sup> Naaratej, janiyari nia numooteyani: Jiya pueque-  
 sacari, niaari socua jiyanoehua saniitiosaanutaniya Tiro  
 tiacajinia quiniaa pueyajiniji, Sidón tiaca pueyajinijinio.  
<sup>23</sup> Capernaum tiacajinia quiniaanaa, ¿niaateeri jiyaniya  
 niaari tamasa tiaca shocotanutaniya nia jiyani-  
 ishacari niaari socua maninia cutara? [Maja! Niaari  
 mani quiquiojinia quejoosaanutaniya. Janiya jaara cua  
 cumaacata cutara casaa miiquiaari Sodoma pueya tia-  
 cajiniani, taa cua miiquianu nia tajiniacuaani, Sodoma  
 tiaca maara quiriquiajaj. <sup>24</sup> Nocuaji nia sequeya cu-  
 taranijia: Jiya puequesacari, niaari socua jiyanoehua  
 saniitiosaanutaniya Sodoma tiaca pueyajiniji.

### Jesuucua tiuuniaari samaateriquiano cutara

(Lc 10.21-22)

<sup>25</sup> Jiyacaritij, Jesuuri na Que Pueyaso sequequiaari:  
 —Quia shuquiritiaanijia cua Quenaa. Quiaari Jiya ca-  
 marnu, jiyocuacaanu camarnunio. [Quiaari maninia!  
 Quiaari niishiyashijia pueya maninia casaa niishitirii,  
 niishijia pueyacuaji quia jamosanoni. Niishijia  
 pueyari saaja tama nojori niishishanoocuaajaaja tiuujia-  
 ca. <sup>26</sup> Naacuajitij cua Quenaa, quiaari maninia niishitirii  
 niishiyashijia pueya, taa quia paniquiaaricuaajani.  
<sup>27</sup> Cua tojitiare pueyanaa, cua Queeri cua niqutio-  
 quiaari puetunu casaajanaa cua jiitiasocoriquiano. Ma-  
 jaari seetanujuanaa tamasa niishiniu janiya. Saa cua  
 Queja cutaraari cua niishiya. Naajuhujaj, majaari see-  
 tanujuanaa tamasa niishiniu cua Que. Saaja janiya,  
 Neyanuni, na niishiya cutaranijia, naajuhujaj canapue  
 cua niishitiniu paniya cua Quecuajani. <sup>28</sup> Cucua nia ni-  
 jiore, puetunu niajanijajanaa, canapue tacaquioy-  
 ani, canapue puera niishiriojonuujuacani. Naa jaara  
 cucua nimia, janiyari nia samaraatanutaniyani. <sup>29</sup> Cua  
 niishitiojosano nia tojiri. Janiyajiniji nia niishiri taamue-  
 catucuaa janiyani. Janiyari ritia juayashijiani. Janiyari  
 pueya shocoteyaquijiani. Naacuajitij, nioojiaari maja  
 na tacaaniu quiniutianiya nia rupesacari janiya. <sup>30</sup> Naa  
 tojishacari janiya, nioojiaari juhuajaniya quiniutianiya.  
 Cua poonitijosacari niajanija, majaari jiyajeneta na  
 quiniu quiniutianiya niaara, cua cumaquishacari nia-  
 janiya.

### Jesu pueya carojotasacari trigo samaatenu juuca

(Mr 2.23-28; Lc 6.1-5)

**12** Jiyacaritij, Jesuuri canaa na saquiriojosano puey-  
 ata cuhuariquia jiuujiaaco tajiriquiaa samaatenu  
 juuca. Canaari jiyacari miaajeriquiaani canaa  
 quiasacari nucuaco. Canaari secaja trigo jajau  
 jotanuu coteequiaarini. Canaari na miojonuuriquiaani.  
<sup>2</sup> Fariseocuaca jaara canaa niquiquiaari naa miyanotej,  
 Jesu sequeureeri:

—[Quia niqiri! [Quia pueya trigo shuniitaa! [Na  
 shuquiuquijoniuyari! [Naa nojori miishacaritij, pooni-  
 jioniyari! Cuno maja panishano samaatenu juuca mi-  
 iniuria. [Pa supuetana Moisés cuajaari naa pa  
 rootaquiaaritij!

<sup>3</sup> Jesuuri cuno pojori riucaaree:

—¿Majateeri nia serojonu quiquiaari Pueyaso Rupaa-  
 jinia taa pa supuetana David miiquiaari na miaaje-  
 sacarini, na pueyano? <sup>4</sup> Nojoriiri Pueyaso Secojoua  
 tiajinia tiuquitiaquiaari. Pueyasora niqutiojosano pan  
 satureeri. Cuno panri saaja pueyacuara secोजना  
 sasocoriquiano quiquiaari, maja socua tamonu  
 pueyano sasocoriquiano. Naajaa, Davidri na saquiaari.  
 Na miishanoori maninia quiquiaari Pueyaso niqiuara.  
<sup>5</sup> Naajuhujaj, ¿majateeri nia serojonu quiquiaari tariu-  
 cuacaanu Moisés naajosanojinia, taa pueyacuara sec-  
 ojonaa pueyaracaanu poonijioquiaa Pueyaso Secojoua  
 tiajiniani? Nojoriiri naa poonijionuuquiaa  
 samaatenu juucajuhuaj. Naa nojori poonijosacari  
 Pueyaso Secojoua tiajinia samaatenu juucatej,  
 cunoori maja sesa. <sup>6</sup> Moisés cuajaari pa rootaquiaari  
 maja pa poonijionura samaatenu juuca. Naajaa, cuno  
 rootasanoori seetanujuanaa maja na quiniu Pueyaso  
 Niyanura, jaara Pueyaso Secojoua tiajinia poonijion-  
 aara quiaquirijihujaj. <sup>7</sup> Maja naasucuaari nia niishiniu  
 quiquiaari casaa nio tariucuacaanu naajiotasano ni-  
 ishitojija niajanija juucuanu. Naa sequeyari: “Janiya  
 cutaraari socua nia panitiaani niarta pueyacuara nia  
 taraajenura, maja saaja nia niqutiojonura nia seya cu-  
 cuara catijasocoriquiano”. Naa jaara nio naajiotasano  
 niishijia quiriquia, niaa maara sesa miyashijia puey-  
 acuara tonujiaquiriquiaj. <sup>8</sup> Cua tojitiare quiaritia. Janiy-  
 acuajaari Pueyaso Niyanuni. Naacuajitij, mijiria cua  
 quishacari cua naata sequenu casaate samaatenu juu-  
 ca miishiyani.

### Jesu jeeacasacari pueyano juashiquia cuseetucoujara joojequetano

(Mr 3.1-6; Lc 6.6-11)

<sup>9</sup> Na nuhuaji, canaari Jesuta quiojoquiaari quiniquiji-  
 ni. Canaari Pueyaso Secojoua tiajinia tiuquishiini.  
<sup>10</sup> Pueyanoori tii quiriquiaa cuseetucoujara joojeque-  
 tano na juashiquia. Taa canaa Judiocuaca camarucua  
 Jesuucua saquiriojotanuu paniriquiaa juucacuajani,  
 jiyacaritij, na sapojonuta Jesu nequesotaturee naari.  
 —¿Maninateeri samaatenu juuca cusosu naatanini-  
 uria? Paacuajaruhua niishitiojosaaquiaarini maja pa  
 poonijionura samaatenu juuca.

<sup>11</sup> Jesuuri cuno pojori riucaaree:

—Naa jaara tiyare raama samaatenu juuca, ¿majateeri  
 nocua nia quianu, raamaji nia panura nia seruniyojua?  
 [Taaquiriirinij! <sup>12</sup> ¿Majateeri pueyano socua jiyanoehua  
 panishano borregonijini? Taaquiriirinij. Naaratej, maja  
 pa tarinitianu maninia pa miiniuria pueyaracaanu,  
 samaatenu juucajuhuaj.

<sup>13</sup> Na nuhuaji, sesarucouja sequereeri:

—Quia juashiquia quia shiitioree.

Na juashiquia shiitioreeri. Ritia jeequequeeri juhua  
 tanecaraja. <sup>14</sup> Naa Fariseocuaca niquishacari Jesu miis-  
 hanotej, tohuareetaqueeri. Tama nojorijiaaritia roojo-  
 tooquiaari nojori motenura Jesu.

### Jesujiniji pohuatasano tariucuacaanu naajiotasanojinia

<sup>15</sup> Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhuajiquiaari canaata. Jesuuri puetunu cuso-suhujanaa naataniioquiaari. <sup>16</sup> Jesuuri na naatani-jiosano pueya rootaquiaari maja tamasaca niquiara nojori pohuatanura cante nojuajani. <sup>17</sup> Naacuajitij, tariucuacaanu Pueyaso sequesano caminiujunia Isafas pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

<sup>18</sup> "Niocuajaari cua seru, cua saquiriojosano. Na timitaanijia. Nojuajaari jiyanoohua cua panishano. Janiyari cua Sohuanu jiyaronutaniya nocuani. Nojuajaari tamasaca pueyapue pohuatanutaniya janiyajiniji, nojori quiniuria cua muerasura pueyaracaanu. <sup>19</sup> Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniutianiya tiacaacaco. <sup>20</sup> Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquishajanu quiniutianiya jatarinitiaja nojiano samaritiu. Nojuajaari naa sesa miijiaca jiyanooniutianiya, nojuaja jaara tiuquiriohuajaatijiaj, puetunu sesa miiniujianaa na puecanura, jiyaniijajanaa na quiniuhua pueyacaanu. <sup>21</sup> Puetunu tiqiyocuacajinijinio quijiaca pueyajaari nocua tiuuniutianiya".

#### Pueya sequesacari Jesu samaru cumaacaracana

(Mr 3.20-30; Lc 11.14-23; 12.10)

<sup>22</sup> Tiquiaari Jesuucua jaatucusaaquiaari. Cariyojuaru quiriquiaajaariuhuj. Naa quiquiaariiri samaruraca na quiniuucua. Jesuuri na jeecaree. Naacuajitij, tiquiaari pocujara quiquiaari, niquijiarajuhuj. <sup>23</sup> Cunora, puetunu pueyajaari nocuaji jiuujiatequiaari. Seque-tureeri:

—[Nio jiyoteeri pa supuetana David niquiohuacajinio supueno pueyano, tariucuacaanu sequesano pa jiyaniijara quiriquianotej!

<sup>24</sup> Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—[Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. <sup>25</sup> Jesuuri cuno pueya niishiriojosano niishiquiaari. Cunora, nojori se-quereri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqui. Naajaariuhuj, pueyano jaara juayonuujutare tapueyocuacata tama na tiajiniajaaja, majaari nojori naata jatiqui quiniu. <sup>26</sup> Jaara naa quirijitij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu.

<sup>27</sup> Janiya jaara samaruhua tohuatanijiya Satanás cumaacatani, taa nia sequeya janiyacujani, cua se-queretoj, ¿cante nia niishitiojosano pueya cumaquia samaruhua nojori tohuataniniuriani? ¿Satanástee? Ma-jaruhua. Nojoricuajaari samaruhua tohuataniquiaa Pueyaso cumaacata. Naacuajitij, nojori tohuatani-jiosacari samaruhua Pueyaso cumaacata, niaari jiyanoohua jiyajeneya nia sequesacari janiya samaruhua tohuatanijiya Sesaaca cumaacatani. <sup>28</sup> Seetanujuanaa Pueyaso Sohuanu cumaquishacari janiya, samaruhua cua tohuatanijionura, nia cumaati cua sequesano tojirii. Naa cua tohuatanijiosacari samaruhuatej, niaacuajaari niishiya Pueyasoori tari poonijia juhua jiyaniijia, mijiria nia tajinia.

<sup>29</sup> ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiaquiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariuutiaa Sesaaca jiitiasano pueyani.

<sup>30</sup> Cante cua jiyano quiyaquiyani, cunoori cua paraca. Cante cua naacutaquia pueya rereconjura Pueyasorani, nojoriiri saaja pueya cocuataa Pueyasocujia.

<sup>31</sup> Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara.

<sup>32</sup> Cante Pueyaso Nyanu sesacajani, nojuajaari na naata jiyanooshaanujuhuj. Saniniuujia, cante Pueyaso Sohuanu sesacajani, nojuaja cutaraari jiyano-aquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuj.

#### Naanaari niishishano na jajaujiniji

(Lc 6.43-45)

<sup>33</sup> Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyani taamueca naanatenojoni. <sup>34</sup> Niaari juhua sacocua. ¿Ni-aatucua taa maninia pocujaca quirini, nia jaara pueyaracaanu sesa miijiaca quiyajaa? Paari poojajiniji pa niishiriojosano pocuquiaani. <sup>35</sup> Naacuajitij, maninia jiuujiaraca pueyanoori saaja maninia casaa pocujaja. Sesa jiuujiaraca pueyano saniniuujia, sacuaraatia casaa pocuajia. <sup>36</sup> Nia sequeya cutaranijia, Pueyaso saniitonu juuca, pueyari puetunu najuhuaana sesa na pocuasanojinijianaa nequesoreesaanutaniya. <sup>37</sup> Cante maninia casaa pocujaja quiquiaarini, cunoori sequesaanutaniya "maninia pueyanota". Naajuhuj, cante sesa casaa pocujaja quiquiaarini, nojoriiri saniitiosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

**Fariseocuaca niqiniu panishacari Jesu miishano  
Pueyaso cumaacata**  
(Mr 8.12; Lc 11.29-32)

<sup>38</sup> Noojiaqueya Moisés Rootasanojiniji niishitiojonaari tii quiriqiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriqiano.

<sup>39</sup> Jesuuri nojori riucuaaree:

—Niaari sesoriqiaa pueya, Pueyaso tojiyashijiaca. Majaari nia niqiuara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niqiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari. <sup>40</sup> Nojuajaari puereetuuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuaaj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. <sup>41</sup> Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatanutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijijanaa cutara Jonásjiniji.

<sup>42</sup> Naajuhuaaj, tariucuacaanu jiyaniijia maajiiri niqiuari tucuacaanu pa supuetanaa jiyaniijia Salomón tojiniuucua. Cunoori quiquiaari jiyanoahua niishijia Salomón quiniuucua. Cuno maajiiri pananu shuucuaji niqiuari Salomón na tojiniuria, jiyanoahua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

**Samaruuri na tohuatanishaquiji tacatejohua**  
(Lc 11.24-26)

<sup>43</sup> Samaru jaara tohuatare pueyanojiniji, joojuashiquio rucuaneyari na samaatejara na pajesacari.

<sup>44</sup> Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriata-suhuari juhua camaruuju tia, netoosano, maninia jeenucuasano. <sup>45</sup> Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanoahua sesa nojuajiniji. Puetunu nojorijianaa jaara tiuquitiare cuno pueyanoocua tii na quiniuria, cuno pueyanoori na nuhuaji socua jiyanoahua sesa quijara jiyacateja.

Naa quiniutianiyajaariuhua nio pa quishacari pueyara na tojitiaaquinuucua janiya. Nojoriiri socua sesa quijiacara jiyacatenutaniuhua taa cua niyacarijia quijiacara nojori quiquiaaricujani.

**Cante seetanujuanaa Jesu nucuani, tapueyocuacajuhuaaj**  
(Mr 3.31-35; Lc 8.19-21)

<sup>46</sup> Jesu pohuatasacarijia pueya niqiuara, na nucuuari tiuquijioquiaari Jesu tapueyocuacata Jesuucua. Carijiniacuma quitiuriqiaari. Jesuta pocoojonu paniriquiaa juucuaari. <sup>47</sup> Tamonu pueyanoori Jesu sequeeree:

—Niishitiojonanaa! Quia nucuaqui quia tapueyocuacata cariiniacuma quiya. Quiata pocoojonu paniyaquiniaari.

<sup>48</sup> Jesuuri saaja na numootena pueyano riucuaaree:

—¿Cante cua nucuani? ¿Cante cua tapueyocuacani?

<sup>49</sup> Jiyacaritij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nucuua, juhua cua tapueyocuaca cutara. <sup>50</sup> Naacuajitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuano.

**Natoojua pueyanojiniji pohuatasano**  
(Mr 4.1-9; Lc 8.4-8)

**13** Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriqiaani. <sup>2</sup> Jiyanoahua queraatia pueyari nocua rerequeejoquiaari. Puera pueya quiniuucua, Jesuuri botejina tacaquiaari. Tii cajishiiri. Puetunujuanaa pueyari jaaquiajina jateequiaari, tiji na tojitianura Jesu canaata. <sup>3</sup> Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajina. <sup>4</sup> Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoji na natau miojoquiaariiri. <sup>5</sup> Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. <sup>6</sup> Pananu jaara tacaquiaari, cuno natauri ritia sorequiaari maja puera nujuacaraca na quishacari. <sup>7</sup> Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. <sup>8</sup> Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiyoneejinijijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhuaaj. Socua tamonu jiyoneeri muetuquiaari treinta jajau. <sup>9</sup> Niaa jaara numaraca quiri, nia tojitiare cua pohuatasano.

**Casaara Jesu niishitiojiya miriquini**  
(Mr 4.10-12; Lc 8.9-10)

<sup>10</sup> Jesuuri naa pohuataquiaari miriqui pueya niqiaratej. Na nuhuaji, canaa, Jesu saquiriojosano

pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

<sup>11</sup> Jesuuri canaa riuuaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijiyi pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiya-sohuaja Pueyasojiniji niishishano nojori niishishocoriquiano. <sup>12</sup> Cante Pueyaso rupaa tojjiaa cutarani, nojuajaari socua niishitiojosaanutaniya, Pueyasojiniji jiyanojua na niishiniuria. Cante Pueyaso tojjiyashijiani, shiitianiyojua Pueyasojiniji nojori niishishanoori puetunu jaariuutiasaanutaniyanaa nojorijiniji. <sup>13</sup> Cunora, janiyari miriqui pohuatariquiaa nojori niquiarani. Naacujitij, nojoriiri najuhua niquiquiaa cua miishano na niishiyaquiniutia. Nojori tojjishacari cua pohuatasano, na numaa shama tojjituuquiaa saajaari. Majaari quenaaja nojori niishiniu na tojjishano.

<sup>14</sup> Naa nojori quiniuucatej, tari tohuateereeri juhuacarijia supetana Isaías sequesano nojorijiniji. Pueyara Pueyaso sequesano caminiujunua na quiniuucua, nojuajaari naa sequequiaari pueyatej:

“Niaari seetanujanaa Pueyaso rupaa tojjiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. <sup>15</sup> Nojoriiri cumajiuujiaaca quia. Nojoriiri juhua numueju, tojjiyashijiaa. Nojoriiri juhua nimishitiu quiyajuhuj. Naa juhua nimishitiu quituyari nojori niquiyaquiniuucuj. Nojoriiri naa juhua numueejunucujuhuj, nojori tojjitaaquiniuucuj noojiata. Naa quituyari nojori niishiyaquiniuucuj noojiata, cucua nojori tacatenuhara cua jeecanura nojori jiuujia seque”.

<sup>16</sup> “Cua pueyanaa, niaari saniniuujia shuquiriaatia quia maninia nia niishishacari cua miishano, nia tojjishacari cua pohuatasanojuhuj. <sup>17</sup> Seetanujanaa nia sequeyanijia, queraatia tariucuacaanu pueyari quiarjia nia niquishano niquiniuucua jiaatiaquiaari juucua. Naa nio niquiniuucua jiaatiaquiaari tariucuacaanu Pueyaso sequesano caminiujunua, queraatia maninia pueyano. Majaari nojori niquiniu quiquiaari saaja. Nojoriiri nia tojjishano tojjiniuucua jiaatiaquiaari juucujuhuj. Majaari nojori tojjiniu quiquiaari saaja.

**Jesu niishitiojosacari miriqui na pohuatasano natojjuajiniji**

(Mr 4.13-20; Lc 8.11-15)

<sup>18</sup> “Nia pohuatareera nia niishiniuria cua pohuatasano natojjuajiniji. <sup>19</sup> Canapuate Pueyasojiniji cua pohuatasano niishiyaquiyani, nojoriiri juhua nuucaco toteno jajau. Sesaacaari niquiaa. Pueyaso Rupaa jaarutiaa nojiajinijiiri. <sup>20</sup> Nojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. <sup>21</sup> Nojoriiri juhua nujua-caaju. Majaari cumaatia na nujuatunu. Naaratej, nojori

jaara naquiya miishaare Pueyaso Rupaa tojjiaa nojori quiniuucua, nojoriiri ritia Pueyaso tojjiniu tariniti-aquiaa. <sup>22</sup> Nojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojjiri. Na nuhuaji, nojoriiri saaja puera tacaquiaa nio jiya casamiicua. Naajuhuj, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacujitij, cuno pueyari juhua natau muetuhoo quiquiaa. <sup>23</sup> Saniniuujia, cante maninia tojjiaa Pueyaso Rupaani, maninia na niishiyari. Cunoori juhua jiya maniniujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyanojua maninia pueyari quiquiaa na tojjishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujujuhuj.

**Jesu pohuatasano miriqui trigo tajinia moritaja sesa jiyasocujiniji**

<sup>24</sup> Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojjitaaashijiaa pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquajinia. <sup>25</sup> Puetunu pueyanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquajiniaari. Na natanu nuhuaji, tacateyaro-huari. <sup>26</sup> Trigo jajauri maashiquiaari. Na nuhuaji, na jajau mueratusacari shusha, sesa jiyasocuaari mariyata niquishaaquiaari maashiyano. <sup>27</sup> Cuhuariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquiriojosano jajau quiquianucujia quia natasano cuhuariquajiniani? ¿Teje cuno sesa jiyasocua moritiarucuaa quia natau tajiniacuaraarini?” <sup>28</sup> Cuhuariquia camaruuri nojori riuucuaaree: “Pa paracaari cunohuj, naa pa miirucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” <sup>29</sup> Na seya sequere saajaari: “Maja. Maja nia jayotanu jiyasocua, niaa mariqui trigo na cojiritiareeri. <sup>30</sup> Naajaa, nia tarinitiare cuaara maashiiria, mariyata cuaara noshiirajaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiuuicojonura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

**Jesu pohuatasano miriqui mostaza jajaujiniji**

(Mr 4.30-32; Lc 13.18-19)

<sup>31</sup> Jesuuri socua miriqui pohuataquiaari pueya niquiara, na niishitiojonura taa Pueyaso poonijiyi pueya jiuujiajiniani, nocua nojori tiushacari. Naa sequereeri:

—Tamonu pueyanoori mostaza jajau nataquiaari na cuhuariquiajania. <sup>32</sup> Seetanujuanaa mostaza jajauri socua jiyanoohua shiitianiyojua puetunu tamonu jajau-jiniijianaa. Naajaa, cuno mostaza jaara maashiri, socua puereetuucara maashijaari narta natacuacajiniji. Naacujitij, shuhuari na cashacucuaacua jesuya. Naajuhuaaj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

### Jesu pahuatasano miriqui pan poreetajiniji

(Lc 13.20-21)

<sup>33</sup> Jesuuri nio miriqui pahuatasano pahuataro-huacuhua pueya niquiara, taa Pueyaso Rupaa pooni-jiya mijiriani. Nojori sequereeri:

—Pueyaso rupaari jiyanoohua cumaacaraca na poonijonura juhua pan poreetaja. Maaji jaara pan poreetaja cojitiri jiuujianaraca shiitianiyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuaaj, pueya na jataniniuria quiariniora.

### Casaara saaja miriqui sequesano pahuatasaaquiaa pueya niquiarani

(Mr 4.33-34)

<sup>34</sup> Puetunu Jesu pahuatasanojuanaa pueya niquiarani, miriqui sequesanoori quiquiaari. Puetunu na pahuatasanojuanaari naa quiquiaaritij. <sup>35</sup> Naacujitij, maninia tohuateequiaariiri tariucuaaanu pueyara Pueyaso sequesano caminiujunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pahuatasano. Naacujitij, janiyari pueya pahuatanutaniya pueyaraanu nojori niishishoo casaani, shusha jiya shipin-ishaanujiniji’”.

### Jesu niishitiojosacariuhua miriqui na pahuatasano sesa jiyasocujiniji

<sup>36</sup> Na nuhuaji, Jesuuri pueya maanu sequeree:

—Tariucujaja pueyanaa. Nia quiojorohua.

Na nuhuaji, nojuajaari na quijia tijania tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pahuatasano cuno sesa jiyasocujiniji.

<sup>37</sup> Jesuuri canaa sequeree:

—Janiyacujajaari cunoni, maninia jajau natojojuani.

<sup>38</sup> Nio jiyari juhua cuno cuhuariquia. Pueyaso muerasuri juhua cuno maninia jajau, cuhuariquiajania natanoni. Tamasacaari saniniujia Sesaaca muerasu quiya. Nojoriiri juhua cuno sesa jiyasocua, cuhuariquiajania natau tajinia maashinioni. <sup>39</sup> Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senoosacari quiniutianiya. Jiyocuaaanuji Pueyaso seyari juhua cuhuariquia senoonaa quiniutianiya. <sup>40</sup> Naatej, taa sesa jiyasocua

namitiashiya catijasocoriquianocuaani, naa quiniutianiyaariuhua nio jiya puequesacari. <sup>41</sup> Janiyari cua seya jiyaronutaniya jiyocuaaanujini. Nojoriiri sesa miijiaa quioonutaniya, mariyata canapueete tamasaca miitiquiaa sesani. <sup>42</sup> Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quica miaquenutaniyari. <sup>43</sup> Na nuhuaji, Pueyaso tojitiajacaari jiyanoohua shacantuucara quiniutianiya juhua pananu, na Que Pueyaso jiitiasacari nojori pueyaracaanu. Cante numaacani, cuara tojitiaara cua sequesano.

### Jesu pahuatasano miriqui jiyanoohua panishano casaa-jiniji

<sup>44</sup> Jesuuri canaa na pueya pahuataquiaari miriqui, Pueyaso muerasu pa quiniuni, cunoori jiyanoohua panishano. Nojuajaari naa sequequiaaritij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanoohua panishano casaa. Tiijia na jamorohuari tee na quiriquiaacuajani. Jiyanoohua na shuquiritiasacari na riuriatasano casaa, puetunujuanaa tama na casamijiaaja niquitiojoreeri queraatia cumaneeca na jiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacujitij, cuno jiyanoohua na panishano casaari tama na casaara quiquiaarijiaaja. Naajuhuaaj, socua jiyanoohua panishano cutaraari, Pueyaso pueyanora nia quiniuria. Cunoori jiyanoohua socua panishano puetunu pa panishano casaajiniijianaa.

<sup>45</sup> ‘Socua nia tojiri nio pahuatasano. Casami niquitiojonaari pueyaracaanu rucuanajoriquiaa shanohua cohuaajaaca tiujiau na pajenura. Cunoori noturu shipinijosano sai quiquiaari. <sup>46</sup> Tamonu juuca, jiyanoohua shanohua noturu saaja niquitishaaquiaariiri. Jiyanoohua na panishano. Naaratej, puetunu na jiitiasanojuanaa niquitiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajaari, jiyanoohua na panishano. Naajuhuaaj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

### Jesu pahuatasano miriqui shiyarujiniji

<sup>47</sup> ‘Pueyaso Rupaari juhua puereetuuca shiyaru na camaru jartasano caminiajania. <sup>48</sup> Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriquiaa. Pueyari jaaquiajania cajitiuquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniujia jacutasaaquiaari. <sup>49</sup> Naa quiniutianiyaariuhuaaj jiya puequesacari. Naacujitij, Pueyaso seyari rosetanutaniya, sesa miijiaa na saquiriojonura maninia pueya tajiniji. <sup>50</sup> Na nuhuaji, sesa pueyari quejoosaanutaniya mani quiquiojinia, taa sesa sapitiaaja

jacutasaaquiaaricuaani. Nojoriiri tii sapuenutaniya. Na quiaa miaquenutaniyajaariuhua naquiya na miiniutia.

**Pueyaso Rupaari jiyanoehua panishano: tariucuacaanu naajiotasano, quiari naataja naajiotasanonio**

<sup>51</sup> Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohu-  
atasanojuanaacujaja?

Canaari Jesu riucaareeni:

—Taaquiririnij Jiyaniijianaa.

<sup>52</sup> Jesuuri canaa sequeere:

—Maniniacuajajui. Tariucuacaanu Pueyaso Rupaa-  
jijini niishitiojona jaara quiarinio cua niishitiojosano  
Pueyasojinijini niishirijuhua, nojuaja cutaraari Pueyaso  
Rupaa niishijia seetanujuaanaa. Nojuajaari juhua tia ca-  
maru, cante tariucuacaanu shanohua casamiriaca-  
cua, quiarinio casamiriacajuhua, na tiajiniaaco racata-  
sano. Na panishacari, na camaruuri na racatasanojinijini  
na panishano rijia.

**Jesu quishacari Nazaret tiacajinia**

(Mr 6.1-6; Lc 4.16-30)

<sup>53</sup> Jesu jaara puecaquiaari miriqui pohuatanu, tiji  
quiaquiaariuhuari. Canaari na nuhuajiriquiaani.

<sup>54</sup> Canaari na maashijia tiacajinia tiuquiquiaariuhua.  
Canaa tiuquiiiosacari, canaari Pueyaso secojojua tia-  
jinia tiuquiquiaarini. Jesuuri tii pueya niishitiojonu co-  
teequiaari. Pueyari jiuujiatequiaari na niishitiojosano  
nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaarani? ¿Tejenote-  
jaara na cumaacani, cusosuhua na naatanijionurani?

<sup>55</sup> Na shipininiocujajaari suruhuatujinijini casaa shipini-  
jiona qijia. Na nucuacuajajaari María. Na tapueyocua-  
caari Santiago, José, Simón, Judasno. <sup>56</sup> Na rim-  
iatuhuari mariyata niya pa tajinia quiya. ¿Taa na ni-  
ishiya pueraarini?

<sup>57</sup> Naaratej, pueyari na ruuretaquiaari saaja. Naa na  
tiacajinijinio pueya tojitiaaquishacari nojuajatej, Jesu-  
uri nojori sequequiaari:

—Puetunu tiqiyocua pueyajanaari maninia tojiti-  
aquiaa cutara Pueyaso sequenu panishano caminiujju-  
nia. Saaja narta pueya tama na jiyajinijiniojuaarjia na  
tojitianu paniyaquiya, tama na tiajinijiniojuaja  
pueyano.

<sup>58</sup> Naa nojori ruuretanuucua Jesutej, majaari puera  
na cumaacata na miiniu quiquiaari tii, nojori  
tiyaquiniuucua nocua.

**Herodes motesacari Tiuquinijiona Juan**

(Mr 6.14-29; Lc 9.7-9)

**14** Cuno quishacari, Galilea jiya jiyaniijia Herodesri  
pohuatasaaquiaari Jesu miishanojinijini na cumaa-  
cata. <sup>2</sup> Herodesri na seya sequequiaari Jesujinijini:

—¿Nojuacuajajaari cua mosano Tiuquinijiona Juan!  
¿Samiitiarohuacuaaqui! Naacuajitij, jiyanoehua cumaaca

jiitiaari, jiyajeneta casaa na miiniuria Pueyaso cumaa-  
cata.

<sup>3</sup> Herodesri naa sequequiaariti na monuucua  
Tiuquinijiona Juan. Nojuajaari naa miiquiaari Juantej:  
coteenu na quiatequiaariiri. Na morojoquiaariiri  
cumayocua shipinishano jiyocuata. Na nuhuaji, na nu-  
juatequiaari nujuatejojuajiniaari. Herodesri naa mi-  
iquiaari na juaaniutia Juantej, Juan nacasunuucua no-  
juaja, Herodes quiniuucua tarajanu Felipe niquiocuata.

<sup>4</sup> Tiuquinijiona Juanri naa Herodes sequequiaari  
quiasano na quiyaquishacarjia:

—¿Quiaari Pueyaso tojiyashijia! ¿Majaari maninia quia  
quiniuria Herodíasta! ¿Nojuacuajajaari quia tarajanu Fe-  
lipe niquiocua!

<sup>5</sup> Herodesri cunora Juan monu paniriquiaa juucua. Ju-  
diocuaca puereriquiaa saajaari. Judiocuacaari ni-  
ishiquiaari cutara, Juanri seetanujuaanaa Pueyaso se-  
quenu panishano caminiujjuna quiquiaari. <sup>6</sup> Tiuquini-  
jiona Juan nujuasacarjia nujuatejojuajinia, Herodesri  
na rasaanu juucajinia queranacuquiaari na masu-  
sano pueyata. Jiyacaritij, cuno maaji Herodías niyatuuri  
nianujuquiaari Herodes masuusano pueya niquiara.  
Jiyaniijia Herodesri jiyanoehua na shuquiritiaquiaari.

<sup>7</sup> Naaratej, Herodesri necanuru sequequiaari puetunu  
pueya niquiarajanaa:

—Sanaunaa, cua sequeere casaa quia paniyani. Janiy-  
acua quia niquitiore quia panishanoni. ¿Seetanujuaanaa  
quia sequeyanijia! Majaari cua rupaa cua jatanu  
quiniutianiya. ¿Casaa quia paniniutianiya?

<sup>8</sup> Jiyacaritij, niyacoo nucua Herodíasri neyatu  
rotaquiaari jiyasohujaja, casaa na masenutaniyani.  
Naaratej, niyacoori jiyaniijia Herodes sequeere:

—Cua quenunaa, cua niquitiore Tiuquinijiona Juan  
naca miacojuajinia.

<sup>9</sup> Jiyaniijia Herodesri taraajequee niyacoo sequesano  
na tojishacari. Naajaa, majaari na naata na rupaa  
jatanu quiquiaari, seetanujuaanaa na sequenuucua na  
masuusano pueya niquiara. Naacuajitij, Herodesri na  
seya sequequiaari cuara niquitiosaarianoj.

<sup>10</sup> Naaratej, na pueyano jiyaroquiaari nujuatejojuajini-  
aari, Tiuquinijiona Juan na nacatanura. <sup>11</sup> Na nuhuaji,  
Juan nacaari patasaaquiaariuhua miacojuajinia. Niya-  
coo niquitiosaasuhuari. Niyacoori saniniujjia na nu-  
cuaacua na pataquiaari.

<sup>12</sup> Na nuhuaji, Tiuquinijiona Juan pueyari quiojo-  
quiaari na quete na panura. Na jamotuquiaariiri. Na  
nuhuaji, nojoriiri nijioquiaari Jesu pohuatanuucua  
Tiuquinijiona Juanjinijini.

**Jesu mianuutesacari cinco mil pueya**

(Mr 6.30-44; Lc 9.10-17; Jn 6.1-14)

<sup>13</sup> Jesu tojishacari Tiuquinijiona Juan tari mosaaru-  
cuaa, nojuajaari canaa jiyataquiaari botejinia  
tamaquiria, pueya quiyaquishaquiria. Pueya jaara ni-  
ishiquiaari tee Jesu quiaareeni, queraatia pueyari cuno  
jiya tiacajinijini quiojoquiaari tirirajuhua. Nojoriiri na  
neteyotaquiaari nucuaco caminia shuriuquioco. Cuno  
pueyari canaacuaji cutesee. <sup>14</sup> Naacuajitij, Jesu ros-



esacari botejiniji, jyanohua queraatia pueya niquishii saajaari. Nojoriicua taraajereeri. Cuno pueya pa-tootasano cusosuhua naatanijoreeri. <sup>15</sup> Tariucua tenacari, canaa, Jesu saquirojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhucarijia pueya quia sequere nojori cuara quiojohuara tiacajinia, na miaquesocoriquiano nojori masenura.

<sup>16</sup> Jesuuri canaa sequeree saaja:

—¿Maatucua casaara quiojijiarohuani? Niaa mariqui nojori mianuutere saniya.

<sup>17</sup> Canaari Jesu sequereeni:

—Maja canaa jitianu miaquesano. Niya quiya saajaari cinco pan, caapiqui sapitiaajanio.

<sup>18</sup> Jesuuri canaa sequeree:

—Miji nia patare.

<sup>19</sup> Jesuuri sequeree pueya cuara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niquitiojoreeri puetunu pueyajanaa canaa niquitiojosocoriquiano. <sup>20</sup> Puetunu pueyajanaa miaquenuquiaari. Maninia tooquioreeri. Nojori puecasacari miaguenu, canaari pan neeca reratequiaarihuani, sapitiaaja raquiquiano. Doce canaasatuuri mishinijiosaaquiaari na raacuata. <sup>21</sup> Jyanohua queraatia pueyari miaquenuquiaari; cinco mil quiquiaari saacanuuja. Majaari maajipohua serojosaanu quiquiaari, naatujoorinio.

#### Jesu rucuanesacari mohuaca caco

(Mr 6.45-52; Jn 6.16-21)

<sup>22</sup> Na nuhuaji, Jesuuri canaa na saquirojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. <sup>23</sup> Pueya jaara tari quiojoquiaarihuua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tiiquiriquiaa tamajaaja. <sup>24</sup> Canaari saniniuujia caminia jiuujiajinia tari jaaretariquiaacuani. Mohuacaari saaja canaacuara cajiniuucuariquiaa, paratu piyarojosacari canaacuara. <sup>25</sup> Juhuaquenu panishacari, Jesuuri canaa rupesee mohuaca caco na rucuanenuta. <sup>26</sup> [Canaa niquishacari casa mohuaca caco rucuaneyano, canaari jyanohua shiriiquitiuriini! Canaari sariyocua-tureeni.

—[Yae! [Samaruruhua!

<sup>27</sup> Jesuuri ritia pocuaree. Canaa sequereeri:

—[Nioojia nia cumaquiri! Janiyacuajanijia. Maja nia puerenu.

<sup>28</sup> Canaa tojishacari Jesu, Pedroori Jesu sequeree:

—[Jaara seetanujuanaa quiajaniya quiri Jiyaniijianaa, cua sequere quiocua cua quianura mohuaca caco!

<sup>29</sup> Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. <sup>30</sup> Na niquishacari paratu jyanohua piyarojijano, Pedroori puerequiaari. Na pueresacari, moo cariquimia tiuquiniu coteequiaariiri. Nacareeri:

—[Jiyaniijianaa cua quiare!

<sup>31</sup> Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua.

¿Casaara cua sequesanoocuaji quia taacanuureeni?

<sup>32</sup> [Nojori jaara botejinia tacataquiaarihuua, paratuuri jiyacari pueyajequee! <sup>33</sup> Canaa niquishacari naa Jesu miishano na cumaacatatej, canaari Jesuucuaa mojqetacoquiaarini. Canaari na sequereeni:

—[Quiaaqui seetanujuanaa Pueyaso Nianu!

#### Jesu naatanijosacari cusosuhua Genesaret jiyajinia

(Mr 6.53-56)

<sup>34</sup> Canaa jaara caminia taquijiria niutiaquiaarini, canaari Genesaret jiyajinia shiitiaseeni. <sup>35</sup> Genesaret pueya jaara niishiquiaari Jesu tiuquirii, nojoriiri puetunu na jiyajiniajanaa pueya numootequiaari, cuara patootasaaria cusosuhua Jesuucua. Naacuajitij, Jesuucua patootasaquiaariiri puetunu cusosuhua-janaa. <sup>36</sup> Pueyari Jesu sequetuquiaari:

—Nareja quia shanacure cusosuhua quiocua, nojori cuara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaarihuua na cusonujiniji.

#### Casaate sesa miitijia pueyanoni

(Mr 7.1-23)

**15** Na nuhuaji, Jerusalén tiacajinijinio pueyari canaacua tiuquiiioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

<sup>2</sup> —Quia pueyari shuquitiojua miaquenuquiaa.

¿Casaara nojori tojitiaaquiquiaa canaa niishitiojosano pa supuetanaajinijini? [Nojori cuara miiria taa pa supuetanaa miiquiaaricuaani!

<sup>3</sup> Jesuuri nojori nequesotaree saniniuujia:

—¿Niajanियarihuaj? ¿Casaara nia tojitiaaquiquiaa saniniuujia Pueyaso Rupaani, nia supuetanaa jii-tishano miiniu nia miiniuriani? <sup>4</sup> Pueyasocujaari sequeriquiaari: “Quia que tojijia quia quiri, quia nucia tojijiano. Majaari nojori rerequetenu”. Naacuajitij, maninia pa cojuare pa queya. Pueyasoori sequeriquiaarijuhuaj: “Cuaara mosaaria cante na que sesacajani, na nucia sesacajanio”. <sup>5</sup> Niaari saniniuujia sequeriquiaacujua, maniniacuajaari pueyano jaara na queya sequere: “Cua quena, cua nucuaana, janiyari Pueyasora niqutionutaniya cua casamini. Naacuajiti majaari cua naata nia naacunu cua jii-tiasano casamitia”. <sup>6</sup> Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiy-

ateya najuhuanara. <sup>7</sup> [Sapueno Pueyaso Rupaa tojtia-jacanaa! Supuetana Isafasquiiri maninia naajio-taquiaaricuaaja nijaniyajiniji, na caminiujiushacari nio rupaa Pueyasojiniji:

<sup>8</sup> "Nio pueyari saa na rupaataja cua maniniuhuaqueetaquiaa. Nojori jiuujiaari saniniuujia tucuacaanu quiya janiyajiniji. <sup>9</sup> Nojoriiri najuhuaana rerejoquiaa na maniniuhuaqueetanura janiya. Nojori niishitio-josanoori tama nojori niishishanojuaja, maja cua rupaa".

<sup>10</sup> Na nuhuaji, Jesuuri puetunu pueyajanaa sequeree:

—Miji, niya cua tojtiasaecuarajaj maninia nia ni-ishiniuria. <sup>11</sup> Pa miasanoni, cunoori maja sesara na jiy-atenu poojia. Pa rupaata pa pocuasano sesani, cuno cutaraari poojia sesojua.

<sup>12</sup> Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuacaari juaaquioree naa quia sequesacaritij?

<sup>13</sup> Jesuuri canaa riuuaree:

—Naajaa. Cuaara juaaquiorea. Cuno pojoriiri juhua sesa jiyasocua, Sesaaca natasano cua Que cuhuariquiajinia. Nojoriiri juhua sesa jiyasocua jay-otasaanutaniya. <sup>14</sup> Seetanujuanaa Pueyaso ni-ishiyashijiaca nojori quishacari, nojoriiri juhua cariyujuaru quiya. Narta cariyujuaru jaatucuyari. Cariyujuaru jaara narta cariyujuaru jaatucure juucua, nojoriiri mariyata raama totenutaniya.

<sup>15</sup> Pedroori Jesu sequeree:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasano-jinijini.

<sup>16</sup> Pedro riuuareeri:

—¿Niaateeri na niishiyaquiyajuhuj? <sup>17</sup> ¿Majateeri nia niishiniu, pa miaquesano pa rupaataari pa seecojinia tiuquiyaa saaja? Na nuhuaji, pa marecuhuacuma tajimi-aari. <sup>18</sup> Saniniuujia, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quiya Pueyaso niquiara, sesa casaa na pocuanuucua. <sup>19</sup> Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaa-cojonu paniniu. <sup>20</sup> Puetunu naa sesa pueya niishirio-josanojuanaa cutaraari pueyano sesojua. Saniniuujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

### Taatu tiushacari Jesuucua

(Mr 7.24-30)

<sup>21</sup> Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhuj. <sup>22</sup> Canaa rucuanajosacari tii, cuno jiyajini-jinio taatuuri Jesuucua niquiaari. Nojuajaari Cananeo

pueyajinijinio maaji quiquiaari. Jesu nuhuaji nacariquiaari:

—[Jiyaniijianaa, cucua quia taraajere! [Pueyaso Jiyarosanonaa, cucua quia taraajere quenaaja! Quiyatu samaru jiiitaa. Jiyanohua taraatia na miiquiaari.

<sup>23</sup> Jesuuri maja na riuucuanu quiquiaari. Sanaa canu-juriquiaa saajaari. Naaratej, canaari Jesu cate-canoquiaarini canaa sequenura nojuaja:

—[Jiyaniijianaa, na panishano quia miiri cuaara quiohuara! [Taaajeta naca pa nuhuajini!

<sup>24</sup> Jesuuri canaa riuuaree:

—Janiyari saaja Israel pueyacia jiyarosaaquiaarini. Nojoriiri juhua borregohua tashuquioono. Nojoriicua taraajeyanijia.

<sup>25</sup> Cuno maajiiri Jesu sequesano tojirii. Naajaa, Jesu cariquimijia mojuquetaseeri. Na sequereeri:

—[Jiyaniijianaa, cua naacutare!

<sup>26</sup> Jesuuri na riuuaree:

—Majaari maninia pa jaariutianura pa niqiuohua miaquesano, sare niqiuohua niqitiosocoriquiano saniniuujia.

<sup>27</sup> Maajiiri saaja na sequeree:

—Maniniacuaja quia sequesano Jiyaniijianaa. Naajaa, sareyaniojuacuajaari miaquesano shiriya miaquenu-uquiaa, na camaru totinijosano na miaquejajiniji.

<sup>28</sup> Jesuuri maaji sequeree:

—Maniniacuaja quia sequesano maajinia. Quiaaqui jiyanohua cucua tiuya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

### Jesu naatanijosacari queraatia cusosuhua

<sup>29</sup> Canaari Jesuta cuniquiji quiaquiaariuhua. Canaari Galilea caminia shuriuquioco tajimiaani. Canaari tuhananuucua tacatamaani. Jesuuri tii cajishii. <sup>30</sup> Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiiniquiujiunaa pueya, cariyujuaru-jurinio, tiqianucujuhuj, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa. <sup>31</sup> Pueyari jiuujiate-quiaari nojori niquishacari tiqianucua pocoyano, shipiiniquiujiunaa rucuaneyano maninia, cariyujuaru-juri niquishacari maninijuhuj. Naajuhuj, sesarunecatohuari maninia numatucuaraca quiquiaariuhua. Naa pueya niquishacari Jesu miishanotej, nojoriiri Pueyaso maniniuhuaqueetaree. Sequetureeri: —[Jiyanohua maninia Israel pueya Pueyaso!

### Jesu mianuutesacari cuatro mil pueya

(Mr 8.1-10)

<sup>32</sup> Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacia taraajeyanijia. Nojoriiri tari jiuujianaraca juuca camueenujia niya pata. Majaari nojori jiiitatu quenaaja casaa na miaquetuso-coriquiano. Majaari cua jiyaronu paniniu miaqueyojua

nojori, nojori mariqui na miaajenuta cusojoniuvarohua nucuacoori.

<sup>33</sup> Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

<sup>34</sup> Jesuuri canaa nequesotaree:

—¿Taa pan nia jiitiaani?

Canaari na riuuareeni:

—Canaa saaja siete pan jiitiaani, secaja sapitiaajaniy-ojuanio.

<sup>35</sup> Jesuuri pueya sequeree na cajitiuniuria. <sup>36</sup> Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niquitiojonura pueya. <sup>37</sup> [Puetunu pueyajanaari maninia miaquenuquiaari! Tooquioreeri. [Canaari miaquesano cureenota mishinijioquiaari siete canaasatuni! <sup>38</sup> Queraatia pueyari na miaquenuquiaari. [Saaja canuuri serojosaquiaari cuatro mil pueya! Majaari maajipohua serojosaanu quiquiaari, naatujoorinio. <sup>39</sup> Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

**Fariseocuaca, Saduceocuaca niquiniu panishacari Jesu miishano Pueyaso cumaacata**  
(Mr 8.11-13; Lc 12.54-56)

**16** Fariseocuacaari Saduceocuacata Jesuucua nijioquiaari nojori saniniuuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

<sup>2</sup> Jesuuri nojori sequeree saaja:

—Jiya jaara naatuuca qiri pananu tiuquishacari, niari sequequiaa: “Maninia juucaqui tariqui quiniutianiya”. <sup>3</sup> Naajuhuj, pananu jaara tariquicuaji jama, niquitioocua jaara niquishaarejuhuaj, niari sequequiaa: “Maruqui niniutianiya”. Niaari naa niishiquiaa taamueca juucate quiniutianiyan jiya nia niquishacari. [Mosanucuaanaa! ¿Casaara saniniuujia nia niishiyaquia casaa Pueyaso niishitiojia juucua nijaniyani? Nojuacuajaari juucua na cumaacata na miishano miiquiaa nia niquiara najuhuanaj.

<sup>4</sup> Jesuuri nojori niquiara sequereejuhuj:

—Nio sesoriquia pueya, Pueyaso tojitiaashijacani, nojoriiri Pueyaso cumaacata cua miishano niquiniu paniya juucua. Majaari nojori niquitishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niquiniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

**Jesu numootesacari na pueya Fariseocuaca niishitiojosoanooquaji**  
(Mr 8.14-21)

<sup>5</sup> Canaa niuutiasacari caminia taquijiria, canaari canaa coseyaca panu niyajetaquiaari canaa saso-coriquianoni. <sup>6</sup> Jiyacaritij, Jesuuri canaa sequeree:

—Niishijica nia qiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>7</sup> Cunora, canaari tama sequetooreejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

<sup>8</sup> Jesu niishishacari naa canaa sequesantej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? <sup>9</sup> ¿Majateeri juhuanajuaja nia niishiniu tari cua miishanoinijia? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? <sup>10</sup> Naa jiyoteeri niyajetarucuaajuhuj taa canaasatu mishajate curecanuni, cuatro mil canuu jaara miaquenuucanu siete panjinijitij. <sup>11</sup> ¿Casaara nia jiyaniiriini janiya miaquesanojinijia sequeriquaani? Maja cua sequenu panjinijia. Nia sequeriquaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

<sup>12</sup> Naa na sequesacaritij, canaari jiyacari niishiquiini majaari Jesu sequenu quiriquiaa pan poreetajajinijia. Canaari shusha niishiquiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosoanooquaji, Saduceocuaca niishitiojosoanooquajinio.

**Pedro sequesacari Jesuuri seetanujuanaa Pueyaso jiyarosano**  
(Mr 8.27-30; Lc 9.18-21)

<sup>13</sup> Canaa tiuquiiijosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

<sup>14</sup> Canaari Jesu riuuareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitarohuacuaa. Tamasacaari sequequiaacuajua, quiaanaari Elías, tariucuacaanu pueyara Pueyaso sequesano caminiuujia. Tamasacaari saniniuujia quia sequequiaacuajua, quiaanaari supuetana Jeremías, pueyara Pueyaso sequesano caminiuujiajuhuaj, ta-monu Pueyaso sequesano caminiuujia soju.

<sup>15</sup> Jesuuri canaa nequesotarohua socua:

¿Niajanariuhuj? ¿Taa nia sequeyanijia? ¿Cante janiyani?

<sup>16</sup> Simón Pedroori na riuuaree:

—[Quiaacuajaari Pueyaso Jiyarosano! Quiaari Cristo, Pueyaso Niyanu.

<sup>17</sup> Jesuuri Simón Pedro sequerohua:

—Quiaacuajaari Pueyaso shuquiritasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishitishano quiajaniya. <sup>18</sup> Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuaanaa cucua quia tiuushacari, quia niishishacari janiyari Pueyaso Niyanuni. Naajuhuj, puetunu pueyajanaa cante cucua tiuuriini taa cucua quia tiuyacuani, janiyari nojori jiyatenutaniya cua muerasurani. Puetunu cua saquiriojosano pueyajanaari cumaatia nujuatanutaniya, nojori niishishacari janiyari Pueyaso Niyanuni. Naacuajitij, nojori juhua puereetuca saajiacua tiasano quiniutianiya. Puetunu cua muerasujanaari juhua cua tia quiniutianiya, cua quiqio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu que-naaja janiya, cua tiasacari cua quiqiora. <sup>19</sup> Naajuhuj Pedronaa, quiaari juhua cua quiqio tiotiu riatataja jitiania quiniutianiya. Naacuajitij, quiaari coteenu pohuatanutaniya pueya niqiuara janiyajiniji, nojori tiuuniuria cucua, juhua Pueyasocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiiriatej. Naajuhuj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuj.

<sup>20</sup> Na nuhuaji, Jesuuri canaa na pueya rootaree maja canaa pohuatanura tamasaca niqiuara nojuacuajaari Pueyaso Niyanu.

### Jesu numootesacari na pueya, nojuajaari mosaanutaniya

(Mr 8.31-9.1; Lc 9.22-27)

<sup>21</sup> Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judiocuaca jiyaniijianucuaari tii cua miiniutianiya naquiya jiyanoohua. Pueyacuara secojonaa jiyaniijianucuaari nojori rupuenutaniya naa cua paracaashaanurajuhuj, mariyata tariucuacaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutanihuani.

<sup>22</sup> Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyanoohua Jesu sequereeri:

—[Maja naa pocuanutej! [Pueyaso cuaara cojuaraa quiajaniya maja naa quia miishaanuratej!

<sup>23</sup> Jesuuri saaja Pedro nijiniaquequee. Na sequereeri:

—[Niiquiji quia quiaare Satanásnaa! [Quia sanaajere! Sesaacaari naa quia pocuaterree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaji cua tarinitiniu paniya juucua.

<sup>24</sup> Na nuhuaji, Jesuuri canaa na pueya sequequiaari:

—Pueya jaara cua tojjiara quiniu paniya, nojori cuaara carteera tama nojori panishanojuaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. <sup>25</sup> Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanoohua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. <sup>26</sup> Naajuhuj, pueyano jaara masere puetunu nio jiya casamijianaa, na casamiiri najuhua quiniutianiya nera, na camaru jaara jatasare mani quiqiojinia na shaajesacari. Nojuajaari maja na naata Pueyaso jiyanootiniu tama na cuaqueyajaaja, naajaa, nojuaja jaara puetunu na casamijianaa niquitiore Pueyaso, Pueyaso samiitianihuara nojuaja.

<sup>27</sup> Janiyacuajaari jiyanoohua shacantuuca quiijara quiniutianiyani, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianihuua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niquitiosaanutaniya maninia nojori miiniuucua. Pueyaso tojitiaashijiacaari saniniuujia naquiya miishaanutaniya, sesa nojori miiniuucua. <sup>28</sup> Seetanujuaana nia sequeyanijia, noojiaqueya nijaniyajinijinio niya cuata quiyani, majaari nia shaajenu quiniutianiya juhuanujuaja, niaa cuaara niquirijiaatijia Pueyaso cumaaca cucua tiuquiyano, cucua tiuujiaa jitiariquiano.

### Jesu jatasacari shacantuucara

(Mr 9.2-13; Lc 9.28-36)

**17** Seis juuca nuhuaji, Jesuuri nio pojori jiyataquiaari jiyaconaja tuhananuucua. Nojoriiri quiqiuari Pedro, Santiago, Santiago tarajanu Juannio. Jiyareta tama nojorijiaarijia quiaquiaari. <sup>2</sup> Jesuuri tii tamaatiara jataquiaari nojori niqiuara. Na jiquiocoori jiyanoohua shacantuucara jataquee, juhua pananu. Na toqueeri mariyata jiyanoohua cohuajara jataquiaarijihuaj, juhua cuhuatana. <sup>3</sup> Jiyacaritij, nojoriiri caapiqui supuetanaa niqiri, Moisés, Elíasnio. Jesuta pocoojoriquiaari. <sup>4</sup> Cunora, Pedroori Jesu sequereeri:

—[Jiyaniijianaa, canaaqui namitia niya quiyani! Quiaa jaara paniri, canaa quiocuaji suhuoronutaniyani, Moisésrajuhuj, Elíasranio.

<sup>5</sup> Pedro pocuasacarijia, shacantuuca najacaari nojori mishiquioma. Najacajiniji, rupaari tojishaaquiaari naa sequeyano:

—[Nioori cua Niyanuniyojua, cua shuquiritasano! [Saaja nojuaja nia tojitiare!

<sup>6</sup> Naa nojori tojishacari Pueyaso pocuaanotej, nojoriiri jacamatuquiaari jiyanoohua na puerenuta. <sup>7</sup> Jesuuri nojoriicua nimiaa. Nojori quiaseeri na juaashiquiata. Nojori sequereeri:

—Nia saneecuaturouhua. Maja puereenu.

<sup>8</sup> Nojori jaara niqinijionuuquiaari, majaari tari na niquitiuniu quiqiuari cuno supuetanaa. Saaja Jesuuri quiqiuara.

<sup>9</sup> Nojori rosetasacariuhua tuhuananujiniji, Jesuuri naa nojori rootaquiaari:

—[Majaari nia pohuatanu pueya niquiara tuhuananujiniji nia niquishano! Niocua na pohuatarohua cutara janiya jaara samiitiarohuani.

<sup>10</sup> Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuararini, supuetana Elíasnaari quiocuaji mijiria niniutianihua coteenu, pueya na jiyanooototenuhuara necohuata?

<sup>11</sup> Jesuuri riucuaaree:

—Elíasri seetanujuanaa coteenu niriqiano quiquiaari, puetunu pueya jiuujiaajanaa na jeenucuanura. <sup>12</sup> Janiya cutaraari nia sequeyani, Elíascuajaari tari niquiaari. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricuajani. Nojoriiri naa cua miiniutianiya naquiyajuhuj.

<sup>13</sup> Naa Jesu pohuatasacari Elásjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

### Jesu naatanishacari samaruraca caya samijia

(Mr 9.14-29; Lc 9.37-43)

<sup>14</sup> Jesu jaara tuhuananujiniji tiuquijioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucuaa mojuquetaseeri na sequenura neyanuucuaa. <sup>15</sup> Jesu sequeereeri:

—[Jiyaniijianaa, cua niyanuucua quia taraajere que-naaja! [Nojuajaari pueyaracaanu cusojoquiaa! Na jiitasano cusonuuri na taquiriocatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojiniano. <sup>16</sup> Janiyari quia pueyacu na tiuquitiasee na naataniniuria juucuaani. Nojoriiri maja na naata na naataniniu.

<sup>17</sup> Jesuuri cunora sequeere:

—[Niaaqui Pueyasoocua tiuyashijaca, na tojiyashijacanio! ¿Janiyateeri nia rejeretanutaniya pueyaracaanuni? ¿Taacarari nia niishiniutianiya Pueyaso tamajaajaarini? Miji nia jaatucuma cuno mueya.

<sup>18</sup> Mueya tiuquishacari nocua, Jesuuri samaru juaarii. [Na tohuatereeri! Jiyacaritij, caya samijiaari maninia quiquihua.

<sup>19</sup> Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

<sup>20</sup> Jesuuri canaa riucuaaree:

—Maja puera maninia nia tiuuniu juhuanajuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacarari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”.

<sup>21</sup> Saniniuujia, jiyano samarutej, na naata tohuatanis-

hano cutara saaja Pueyaso nia secojosacari nia mi-aqueyaquiniutia.

### Jesu pacutesacari pohuatanu nojuajaari mosaanutaniya

(Mr 9.30-32; Lc 9.43-45)

<sup>22</sup> Tamonu juuca Jesu rucoojosacari canaa na pueyata Galilea jiyajinia, Jesuuri canaa sequere:

—Janiyari sapojonuta niquitiosaanutaniya taucua-cani. <sup>23</sup> Nojoriiri cua monutaniya. Jiuujianaraca juucajinia, janiyari samiitianutaniuhuanu.

Naa Jesu sequesacari canaatej, canaari jiyanoohua taraajequiaarini.

### Cumaneeca niquitiosacari Pueyaso Secojoua tiaacuara

<sup>24</sup> Canaa jaara tiuquijioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojoua tiaacuara. Cuno pueyanoori Pedro nequesotaree:

—¿Majate nia niishitiojona niquitionu na cumaneeca Pueyaso Secojoua tiaacuara, taa pa jiyaniijianucua sequequiaaricuajani?

<sup>25</sup> Pedroori na riucuaaree:

—Na niquitioquiaanocua.

Na nuhuaji, Pedro tiuquishacariuhua na tijajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuaajiniji soj?

<sup>26</sup> Pedroori Jesu riucuaaree:

—Taucuaca niquitiojoteshiyanocuaaja nojori jiya jitiiana sequesano.

Jesuuri na sequere:

—Naacuaaquinatejaj. Naacuajitij, tama na pueyajaarjia maja na niquitionu. Pueyaso Secojoua tiacuaajaari cua Que tia. Naaratej, maja cumaati Neyanu sequesaaanu na niquitionura na cumaneeca. <sup>27</sup> Naajaa, pa niquitioire juhuari nojori sequesano, paa mariqui nojori juaatiriiri. Nocuaaji quia rioosee caminiyajinia. Quiocua coteenu quia jatasano sapitiaaja rupaama niquiri. Quiaari tii cumanee riuratanutaniya. Quiocua cuno cumanee niquitiosuhua nojori, quiria, quiara-juhuj.

### Cante jiyaniijajanaa cutarani

(Mr 9.33-37; Lc 9.46-48)

**18** Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijianaa, canaa quia sequeretoj, puetunu quia pueyajinijinojuanaani, ¿cante jiyaniijajanaa cutarani?

<sup>2</sup> Jesuuri naatujua piirii. Canaa tajinia na nuju-atereri.

<sup>3</sup> Na nuhuaji, Jesuuri canaa sequere:

—Nia niyajetare socua tojishano pueyano nia quiniu paniniu tamasaajini. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja.

<sup>4</sup> Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari socua jiyaniijiajanaa quiniutianiya cutara narta Pueyaso muerasujini. <sup>5</sup> Naajuhuj, cante naatujua maseja maninia na paniniucua janiyani, nojuajaari cua maseyajuhuj.

### Paari cocuaatia miyani sesa pa miishacari

(Mr 9.42-48; Lc 17.1-2)

<sup>6</sup> Sesu cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetuajau saajia na riquiajinijia morotasano. <sup>7</sup> Mijiria quiniaria jiyanoahua cocuaatia miiquiaa sesa na miitishacari tamasa! Mijiria, pueyari pueyaracaanu sesa miitishaquaa juhuanajaj. Taraatia quiniutianiya cutaraari noo pueyanora, cante sesa miitirii tamonuni!

<sup>8</sup> Nio miriqui cua niishitiojosano nia tojiri: nia juaashiquia, nia nioluaca jaara sesa miitiya nijaniya, nia rashiquiarenoj, tucuaaanu jatasocoriquiano. Naa nia miiri niaa mariqui mani quiquiojinia jatasareeri puetunu nia cuaqueyatajanaa. Socua maninia cutaraari juaashiquiaaju, nioluacaaju nia tiuquitanura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. <sup>9</sup> Naajuhuj, nia namijia jaara nia miitiri sesa, nia jiatere. Tucuaaanu nia jatarenoj. Jiyanoahua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojinia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanoahua canaa miiniu panishano, cuno jaara sesa miijiaa jiyateriquia canaa.

### Jesu pahuatasano miriqui borrego tashucuanojinij

(Lc 15.3-7)

<sup>10</sup> Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniucuaaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuj, Pueyasocuaajaari na muerasuranocua niishitiojoquiaa. <sup>11</sup> Naaratej, janiyari mijiria niqiaarini tashucano pueya cua pajenura, nojori cua jaariutianura Sesaaca.

<sup>12</sup> ¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashucua tapueyocuaajini, ¿majateeri na camaru na borregohua cureeno tiujianu rupaquijia, tashucano na pajenura? Taaquiririni. <sup>13</sup> Jaara na riuriatere,

seetanujuanaa socua jiyanoahua cuno borrego tashucano shuquiritiaari tamasa na borregohuajini.

<sup>14</sup> Naajuhuj, jiyocuacaanu quijia nia Queeri maja na paniniu quenaaja niquiriyatujua nio muerasujini quiniutianiya tashucuanura puetunurajanaa.

### Taa pa jiyanoahua pa tarajanuni

(Lc 17.3)

<sup>15</sup> Quiarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj. <sup>16</sup> Nojuaja jaara tojiyaquiri quiajaniya saniniuuja, nocua quia quiaare socua tamonu pueyanota, caapiqui pueyata soj. Nojori niqiaara quia nacasure cuno sesa miinia. Naa jaara naa miiritij, naa quiniutianiyari taa tariucuaaanu Pueyaso Rupaajinia niishitiojosaaquiaaricuaajani: “Querajaa pueya jaara mariyata pahuatare na niqishano, na tojishanojuhuj, cunoori maja sapojonu”. Naacujitij, nojori saquiriojotasanoori seetanujuanaa quiniutianiya.

<sup>17</sup> Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niqiarajanaa quia pahuatare sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiriia juhua Pueyaso niishiyashijia niaara. Naacujitij, majaari socua nia rupuenunoj.

<sup>18</sup> Seetanujuanaa nia sequeyanijia, cana nia jiyanoahua quiriijia, na tojiniu paniyaquishacari nijaniya, cunoori jiyanoahuaquishano quiniutianiya jiyocuacaanu cua Que Pueyasorajuhuj. Naajuhuj, cana nia jiyanoori mijiria na tojishacari nijaniyani, cunoori jiyanooshano quiniutianiya jiyocuacaanu cua Que Pueyasorajuhuj.

<sup>19</sup> Naajuhuj, janiyari seetanujuanaa sequeya nijaniyani. Caapiqui nijaniyajini quiniutianiya jaara mariyata niishitiojore nia panishanoocua nia secojonura Pueyaso, cua Queeri nia tojiniutianiya. Nojuajaari jiyocuacaanujii naa maninia miiniutianiya niaara, taa nia secojosacari nia sequereecuajanoj. <sup>20</sup> Querajaa nijaniyajini quiniutianiya jaara rerejore, cucua tiuujia nia quishacari, janiyari tii niaata quiyajanihuaj. Naacujitij, cua Queeri nia secojosano tojiniutianiya cutara.

<sup>21</sup> Jiyacaritij, Pedroori Jesu nequesotasee:

—Jiyaniijanaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucuaaja, janiya jaara na jiyanoori siete sesa na miishanojinij janiyani?

<sup>22</sup> Jesuuri Pedro riucaaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

### Jesu pahuatasano jiyanoahua serujinij

<sup>23</sup> Naaratej, cua tojiri pueyanaa. Naa pahuatareera nia niishitiojore taa Pueyaso paniya jiyanoorijua na

muerasu nia quiniuriani. Tamonu jiya jiyaniijaari nera poonijionaa pueya sequequiaari nojori cuaara tari niq-uitiojooora nojuaja na cumaneeca, nojori na niq-uitiojosanojiniji na casami. <sup>24</sup> Noojiaqueya nera poonijionaa pueya jaara tari nojori pasano casamijiniji niq-uitiojori quiacuaa tama nojori cumaneecajinijiaaja, jiyacari-tij, tamonuuri tiuquinishaareejuhuj. Nojuajaari jiyanohua queraatia casami masejoquiaari na jiyaniija-jiniji, queraatia millón cumaneeca. <sup>25</sup> Nojuajaari maja na jitianu quiquiaari na cumaneeca, na jiyaniija na niq-uitionuhua. Na jiyaniijaari cunora na pueya se-queeree: "Tamonu camarnu nia niq-uitiore nio cua seru, necocuataja, cua cumaneecara, necohujuhuj, puetunu na casamijianaano. Naacuajitij, na cuentaari puequenutaniya". <sup>26</sup> Cuno na seru tojishacari naa na jiyaniija sequesantej, nocuara jacamaquiaariiri. Na jiyaniija sequereeri: "¿Cua tarinitiare quenaaja cua jiyaniijanaa! ¿Rupaquijiaara cua tarinitiarejaara! Janiyacuajaari quia cumaneeca niq-uitionutaniya puetunu-juaanaa!". <sup>27</sup> Na jiyaniijaari nocua taraajeree. [Na carterohua puetunujuanaari! Naa na jiyanooriiri, nocua na taraajenucua.

<sup>28</sup> Cuno seru tohuatasacari jiyaniija tiajiniji, narta seruta naacuneetooreeri. Cuno narta seruuri tarija masequiaari shiitaniyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequereeri: "¿Ritia cua niq-uitiore cumaneeca, tarija quia masesano janiyajiniji!" <sup>29</sup> Narta seruuri na riquiajinia mininia cariquimijia mojuquetaree. Na sequereeri: "¿Cua tarini-tiarecuaraja quenaaja! ¿Janiyacuajaari quia cumaneeca quia niq-uitionutaniya!" <sup>30</sup> Majaari na sashiniu paniniu quiquiaari. Saaja na nujuatequiaari nujuatejojuajini-aari cuaara na cumaneeca na niq-uitiorejaatijia. <sup>31</sup> Nar-ta seya niq-uitiore nio nio cunora na jiyanooshano seru miis-hanotej, nojoriiri jiyanohua taraajequiaari. Nojoriiri jiyaniijaacuaa quiojoquiaari puetunu sesa narta seru miishanojuanaa nojori pohuatanura. <sup>32</sup> Naaratej, jiyaniijaari tamonu na seru jiyaroree cuno jiyanooshano seru riniucua. Na tiuquishacari, jiyaniija-aari na juaarii. Na sequereeri: "¿Quiaaqui jiyanohua sesajuhuanajaj! Quia sequesacari janiya, janiyari quia jiyanooriicuaani, maja quia naata niq-uitionu quishacari quia cumaneeca. <sup>33</sup> ¿Majateeri quia naata quiriquiaa taraajenu quiarta seruucua, taa cua taraa-jeree quicuacuaani?" <sup>34</sup> Jiyaniijaari jiyanohua juaarii. Cunora, cuno sesa miijia seru jiyarotareeri nujuatejo-juajinia na nujuatesaanura. Sequereeariuhuj cuaara naquiya miishaaria tii, cuaara puetunujuanaa na cumaneeca niq-uitiorejaatijia, casami na pasanojiniji.

<sup>35</sup> Nia Que Pueyasoori naa miiniutianiya nijaniya-juhuj, niaa jaara seetanujuanaa jiyanoyaquiri niarta Pueyaso muerasu.

Jesu niishitiojosano maja pa niq-uitiojooora pa cartenura  
(Mr 10.1-12; Lc 16.18)

**19** Jesu jaara naa pohuatanu puecaquiaaritij, canaa na pueyata quiaquiaari Galilea jiyajinijiiri. Canaari Judea jiya shuriucua tiuquishii Jordán moo taquijiriani. <sup>2</sup> Jiyanohua queraatia pueyari Jesu nuhuajiyaree. Quiniqui canaa quishacari, Jesuuri cusosuhua naatanijoree.

<sup>3</sup> Jiyacari-tij, noojiaqueya Fariseocuacajinijioori Jesu-ucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niq-uitiojooora, jaara pa juaatiri?

<sup>4</sup> Jesuuri nojori riucaaree:

—¿Majate nia serojonu quiquiaacuaja Pueyaso Ru-paajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio.

<sup>5</sup> Naaratej, nojori shipiniquiaari sequequiaari: "Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari". <sup>6</sup> Naaratej, caya, maa-ji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiqii. Naacuajitij, majaari maninia Pueyaso rupuetootesano rupartanura.

<sup>7</sup> Nojoriiri Jesu sequereeri:

—Jaara naa quiriritij, ¿casaara supuetana Moisés rootaquiaaricuaraarini caya cuaara naajione niq-uitioora necocua, na cartenu panishacari?

<sup>8</sup> Jesuuri nojori riucaaree:

—Moisés cuajaari niishiquiaari niaari puera cumajiu-ujiaaca. Naaratej Moisésri nia tarinitiaquiaari nia niq-uitiojooora nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. <sup>9</sup> Cua tojitiare pueyanaa. Janiyari nia sequeya cutarani. Cante necocua carteree najuhua-nani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanohua sesa miya Pueyaso niq-uitiojooora. Jaara naa miiritij, Pueya-sora, nojuajaari sesoriquia pueyano. Nojuacuajaari juhua pueyano, cante narta pueyano niq-uitiojooora nu-muetucujuani. Naajuhuj, cante cartesano maaji camiyani, naa sesa miyajaariuhuj.

<sup>10</sup> Canaa, Jesu saquiriojosano pueyani, canaa to-jishacari naa Jesu sequesantej, canaari na se-queereeri:

—Jaara naa quiriritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

<sup>11</sup> Jesuuri canaa riucaaree:

—Maja na naata puetunu pueyajanaa nio cua niishi-tiojosano tojinuu. Saaja noojiaqueya pueya cutaraari na tojinutianiya, noo pojori canapuete jiyocuacaanuji cumaaca niq-uitiojooora na tojinuria. <sup>12</sup> Naajuhuj, noojiaqueya canuuri maja na naata caminiu, riyacaja-jaaju nojori quishacari. Nojoriiri naa rasanujuhanajaj.

Tamasaca canuuri maja na caminiu saniniuujia, jiatejosano nojori riyacajajau quishacari. Tamasacaari maja na caminiujuhuaj tama nojori paniyaquishacarijaaaja, saaja Pueyasora nojori poonijionu panishacari. Cante na naata naa miiniuni, cuara naa miiriatej.

### Naatujooriicua Jesu secojosacari Pueyaso

(Mr 10.13-16; Lc 18.15-17)

<sup>13</sup> Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. <sup>14</sup> Jesuuri saniniuujia canaa sequeree:

—Maja nojori tenujunu! Nia tarinitiare naatujoori cuara cucua nijioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriquiano.

<sup>15</sup> Na nuhuaji, Jesuuri na juaashiquia niaquiaari naatujooriicua, nojoriicua na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

### Jiyanhua casamiriaca mashaja pocoojosacari Jesuta

(Mr 10.17-31; Lc 18.18-30)

<sup>16</sup> Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyani maninia cua quiniuria Pueyaso niquiara, pueyaracaanu quijiara cua quiniuriani?

<sup>17</sup> Jesuuri na riucaaree:

—¿Casaara quia sequeya janiya maninia pueyanotani? Saaja niquiriyatujuaari maninia quijia cutara. Nojuacuajaari Pueyaso. Naajaa, quiaa jaara maninia quiniucua jiaataia Pueyaso pueyano quia quiniuria, quia tojiri tariucuaaanu Moisés Rootasano Pueyasojiniji.

<sup>18</sup> Jesu riucaareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiriojotanu tamonuucua quia sapojonuta. <sup>19</sup> Quia que, quia nucua tojjia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

<sup>20</sup> Mashajaari Jesu sequeree:

—Janiyacujaari puetunujuanaa nio tojjia quiquiaari cua naatujuajini. ¿Casaa cua miiniutianiya socuani?

<sup>21</sup> Jesuuri na sequeree:

—Quiaa jaara seetanujuanaa maninia quiniucua jiaataia Pueyaso niquiara, quia quiaarohua quia tijinia. Quia niquitiojore puetunu quia casamijanaa cumaneecara. Na nuhuaji, casamijiuniucua quia niquitiojore nareja quia cumaneeca. Naacujitij, quiaari queraatia casami jitianutaniya jiyocuacaanu. Na nuhuaji, quiocua nimiohua cutara, cua tojjia quia quiniuria.

<sup>22</sup> Na tojishacari naa Jesu sequesantej, mashajaari taraatia quiaarohua jiyanhua casamiriaca na quiniucua.

<sup>23</sup> Jiyacaritij, Jesuuri canaa sequeree:

—Seetanujuanaa nia sequeyanijia, jiyanhua jiya-jenetaari pueyano tojiniuria Pueyaso, na pueyano na quiniuria, cuno pueyano jaara puera jiyanhua casamiriaca quiri. <sup>24</sup> Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¿Socua jiyanhua jiyajenetaari casamiriaca pueyanora, Pueyaso pueyanora na jatanishaanural!

<sup>25</sup> Canaa tojishacari naa Jesu sequesantej, canaari jiyanhua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

<sup>26</sup> Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

<sup>27</sup> Pedroori Jesu sequeree:

—¿Canaarijataj? Canaari puetunu canaa casamijanaa tiujiaquiaarini canaa rupenura quiajaniya. ¿Casaa canaa masenutaniyariniija?

<sup>28</sup> Jesuuri canaa riucaaree:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniija cajitiujinia puetunu cua Quejiniji shanhua cua cumacatajanaa. Jiyacaritij cua pueyanaa, niaari mariyata cajitijiosaanutaniya doce jiyaniija cajitiucujinia. Niaari pa supuetana Israel doce niquiohuacujinio caneno pueya nequesoreenaa quiniutianiya.

<sup>29</sup> Cua pueya tojiniuria janiya, noojiaqueya nojorijinijioori na tia tiujianutaniya, tapueyocuaca, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanhua queraatia masenutaniya nojori tiujiasanojiniji. Nojoriiri pueyaracaanu shuquiriaatia quijia quiniutianiyajuhua, shaajeyashijia. <sup>30</sup> Saniniuujia, queraatia tojishano pueyari Pueyaso shocotasano quiniutianiya na tojtiaashijia nojori quiniucua. Naajuhua, mijiria, queraatia pueyari juhua shocotasano pueya quia Pueyaso niishiyashijia pueyara. Cuno pojori jyanishano najuhua quijiacani, nojoriiri Pueyaso shuquiritasano pueya quiniutianiya cutara.

### Jesu pohuatasano cuhuariquiajina poonitijosano pueyajiniji

**20** 'Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuani. Cuno cuhuariquia camaruuri quiaquiaari tariquicuaji pueya na pajenura na uva cuhuariquiajina nojori poonijionura. <sup>2</sup> Cuhuariquia camaruuri pueyata pocoojoquiaari taa cumaneeca na niquitionutaniya cuno juuca nojori poonijosanojinijini.



Poonijionaa pueyari na sequeree: “Maniniacuajaari taa quia sequereecuajani”. Na nuhuaji, cuno pueya jiyaroreeri uva cuhuariquiajinia nojori poonijionura.

<sup>3</sup> Pananu tacasacari, cuhuariquia camaruari tohuataquiaariuhua na tiajiniji. Jiyacaritij, socua tamasaca pueya niqishiiri juhuajaniya quiyano tiaca jiuujiajinia curotasano cajitiucuajinia. <sup>4</sup> Cuhuariquia camaruari nojori sequeese: “Nia quiaarejuhuaj, cua uva cuhuariquiajinia nia poonijionura. Janiyacua cumaneeca nia niqitiorohua nia poonijionu samini”.

<sup>5</sup> Naacuajitij, nojoriiri quiojoquiaari cuno cuhuariquiajinia poonijionurajuhuj. Na camaruari socua tohuataquiaariuhua panacari. Socua tamasaca pueya niqishiiri juhuajaniya quiyano tiaca jiuujiajinia curotasano cajitiucuajinia. Nojori sequereeaariuhuj nera nojori poonijionura cuno juuca. Pananu mueecosacari, socua pueya riurataquiaariiri. Nojori jiyaroree poonijionuucuajaariuhuj. <sup>6</sup> Tariucua pananu piriushacari, na camaruari socua tohuataquiaariuhua. Socua tamasaca pueya niqishiiri tiaca jiuujiajinia curotasano cajitiucuajinia najuhua quiyano. Nojori sequereeri: “¿Casaara nia quiojiaquiyaree poonijionuucuanii? ¿Casaa nia miya niyani? Niaa mariqui poonijiore”. <sup>7</sup> Nojoriiri na riucaaree: “¿Canaatucua taa poonijioreni, canaa jaara pajeshiyaquiri poonijionurani?”

Cuhuariquia camaruari nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niqitiorohuani”. <sup>8</sup> Pananu tiuquishacari, cuhuariquia camaruari na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niqitiojore puetunu nojorijanaa taa cua sequeree coteenujuanaa quiria poonijionaacuajani. Majaari rimiajata nojori niqitiojonu. Coteenu quia niqitiojore tariucua pananu piriushacari cua jiyaramiquishano. Naa quia niqitiojore puetunujuanaa. Quiocua naa tucuatate niqitiojonu noo pojorijuhuj, canapuate tariquicuaji coteeree poonijionuacuajani”.

<sup>9</sup> Jiyacaritij, tariucua pananu piriushacari poonitijosano pueyari niijomaa. Puetunu nojorijanaaari cumaneeca niqitiosaaree taa cuhuariquia camarua coteenujuanaa tariquicuaji poonijionaa pueya sequequiaaricuajani. Majaari rimiajata nojori niqitiosaanu quiquiaari cumaneeca, nojori poonijionu sami. <sup>10</sup> Na nuhuaji, coteenujuanaa poonijionaa pueyari seque-saaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niqitiosaanutaniya rupaquijia poonitijosano pueyajiniji. Nojoriiri saaja niqitiosaaree taa cuhuariquia camarua sequeree nojori cuno juucacuajani. <sup>11</sup> Nojori masesacari na cumaneeca, nojoriiri cuhuariquia camaruta juaaquioree. <sup>12</sup> Na sequetureeri: “Cuno pueyari saaja rupaquijia poonijioree. Quiaari nojori niqitioeree taa quia niqitioeree canaacuaani. Canaari pananucari cateree cutarani, pueyaracaanu canaa poonijosacari”.

<sup>13</sup> Cuhuariquia camaruari tamonu nojorijinijinio sequeree saaja: “Sanajanaa, maja sesa cua miiniu quirii

quiajaniya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarjia quia sequereeni janiyari naa cumaneeca quia niqitioanutaniyani? Quiaari cua riucaaree: ‘Maniniacuaja’.

<sup>14</sup> Naaratej, quia jiyataarohua quia cumaneeca quia tiajiniohua. Janiyacuajaari naa niqitioanu paniriquiaa tariucua pananu piriushacari cua poonitijosano pueyani, taa cua niqitioeree quiajanuyacuaani. <sup>15</sup> ¿Majateeri cua naata miiniu tama cua panishanojuuaaja tama cua cumaneecatajaaja? ¿Quiaateeri socua cumaneecaacua jiaatiajara quiquii, capora cua quiniucua?”

<sup>16</sup> Na nuhuaji, Jesuuri naa sequequiaarjijuhuj, na pahuatasanojiniji na niishitiojonura:

—Naa quiniutianiyari taa cua sequeriquiaacuajani: canapuate nuhuajishanaani, nojoriiri coteetanaa quiniutianiya. Naajuhuj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

### Jesu camishacariuhua pahuatanu taa na mosaanutaniyani

(Mr 10.32-34; Lc 18.31-34)

<sup>17</sup> Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuriuquicora, tamajaaja canaata na pocoojonura. Canaa sequereeri:

<sup>18</sup> —Cua tojiri. Niaacuajaari niqiyi paa tari Jerusalén tiacajiniara tacataani. Janiyari tii niqitiosaanutaniya pueyacuara secojonaa jiyaniijianucuanii, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura. <sup>19</sup> Nojoriiri cua niqitioanutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitanutanihuani.

### Santiago, Juan nucua sequesacari Jesu, maninia na miniuria necohua

(Mr 10.35-45)

<sup>20</sup> Jiyacaritij, Zebedeo niqiuocuaari Jesuucua catecanoquiaari necohuata. Jesuucuaa mojuquetaseeri Jesu na sequenura nera na miiniuria na panishano. <sup>21</sup> Jesuuri na sequeree:

—¿Casaa quia paniyani?

Jesu riucaareeri:

—Quiaa jaara jiyaniijia jiyatesaare, quiocua cua niqiuohua cajitijiore quia shuriucua, Santiago, Juannio. Tamonu cuara cajiria quia miaquetajara, tamonu quia muenecara, quia naacuna nojori quiniuria, juhua jiyaniijianucujuhuj.

<sup>22</sup> Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuani?

Nojoriiri saaja Jesu riucaaree:

—Taaquiririnij. Canaa naatacuuacquinatejaj.

<sup>23</sup> Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu nijaniya, cante cua miaquetajara cajiniutianiyani, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaaji na jeenucuaquiaaricua-jani.

<sup>24</sup> Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. <sup>25</sup> Jesuuri saniniuujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. <sup>26</sup> Nijaniya saniniuujia, majaari naa nia quiniu quiniutianiya. Naacuajitij, cante tojishano pueyano quiniu paniya nijaniyajiniinioni, cuno cuaara quiiria narta Pueyaso pueya cumaquinia. <sup>27</sup> Cante nia jiyaniijia quiniu paniyani, cuno cuaara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani. <sup>28</sup> Janiya cutaraari Jiyaniijiani. Naajaa, majaari mijiria cua niniu quiquiaari pueya cua poonitijionura quiria, shuquiriaatia cua quiniuria tamajaaja. Niqiaari cutaranijia pueya cua naacunura, tama janiyajaaja mosaanura pueya niti, queraatia pueyacuaaji cua ritianura Sesaaca.

### Jesu jeecasacari caapiqui cariojuaru namijiaa

(Mr 10.46-52; Lc 18.35-43)

<sup>29</sup> Jesuta canaa quiasacari Jericó tiacajiniji, jiyanhua queraatia pueyari Jesu nuhuajiriquiaa. <sup>30</sup> Jiyacaritij, caapiqui cariojuaruuri nuu shuucuaaji cajitiuriquiaa. Nojori niishishacari Jesuuri nojori tajiriquiaa, nojoriiri nacan coteequiaari:

—Jiyaniijianaa! Ccanaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

<sup>31</sup> Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—Jiyaniijianaa, canaacua quia taraajere, Pueyaso Jiyarosanonaa!

<sup>32</sup> Jesuuri socua nujuasee. Nojori sequereeri:

—Miji! ¿Casaan nia paniya cua miiniuria nijaniyarani?

<sup>33</sup> Jesu riuacatureeri:

—Jiyaniijianaa, canaa namijiaa quia jecare!

<sup>34</sup> Jesuuri nojoriicua taraajeree. Nojori namijiaa quia-reeri. Nojoriiri niqijiacara quiquii! Na nuhuaji, Jesucua sacuaaree canaataari.

### Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

**21** Canaa quiojosacari, canaari socua tiuquijioosee Betfagé tiacajiniani, Olivo nacuhua tuhuananu shuriucua. Cuniqijiji, majaari puera tucuaaanu

quiquiaari Jerusalén tiacajiniara. Jiyacaritij, Jesuuri caapiqui canaa na pueyajiniinio sequequiaari:

<sup>2</sup> —Cuno tiacajinia nia quiaare, nooj pocuaji niqishiyatej. Niaari tii riuritanutaniya niqiojuaraca burro morotasano. Niocua na samaacartasee. Niocua miji na jaatucuyarohuanoj, necojuataja. <sup>3</sup> Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutanihuacuaja”.

<sup>4</sup> Naa tohuateequiaariiri tariucuaaanu Pueyaso sequesano caminiujunua sequesano, nojuaja jaara naa naajioquiaari Jerusalén tiacajinia quiniaa pueyara:

<sup>5</sup> “Sión tiacajinia quiniaa pueya nia sequere: ‘Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’”.

<sup>6</sup> Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani.

<sup>7</sup> Nocua jaatucutuquiaariuhua burroori, necojuataja. Na nuhuaji, Jesu cajijia, canaari canaa tucuaque toqueya niojoquiaari burro nijiniani, necojuaja nijiniano. Na nuhuaji, Jesuuri na nijinia cajirii. <sup>8</sup> Jiyanhua queraatia pueyari tii quiriqiaa. Nojoriiri na tucuaque toqueya muejoquiaari nucoo Jesuucuaaji.

Tamasacaari jaamasucua piyotacuaari Jesuucuaaji niojotasocoriquiano nucoo, nuu niqishaanura shanhua, juhua cutara jiyaniijiaacuaji maniniushitshano. <sup>9</sup> Jesu puetanaa, mariyata na nuhuaji nijionajuhuj, nojoriiri naa coteequiaari nacojonura:

“Pueyanaa, nioori pocuaji Tacuna! Nojuacuajaari pa Jiyaniijia, pa supuetanaa jiyaniijia David niti! Ccuaara quiiria shuquiriaatia pa Pueyaso jiyarosano! Jiyanhua maniniaari pa Pueyaso! Ccuaara shuquiritiasano quiri!”

<sup>10</sup> Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

<sup>11</sup> Jesuta tiuquijionaari nojori riuacuree:

—Nojuacuajaari Jesu, Pueyaso sequenu panishano caminiujunua, Nazaret tiacajiniinio pueyano, Galilea jiyajiniinio.

### Jesu jaacasacari seya niqutiojonaa Pueyaso Secojuatia cariji

(Mr 11.15-19; Lc 19.45-48; Jn 2.13-22)

<sup>12</sup> Na nuhuaji, Jesuuri Pueyaso Secojuatia cariji mat-acajinia tiuquiquiaari. Tii pueya niqishiiri seya niqutiojiano. Jesuuri puetunu nojorijianaa tohuataniijoree. Cumaneca tacatojuuaca juhuacutucua caponeetareeri, tee pueya niqutiojoriquiaa taucuaa cumaneeca, Pueyaso Secojuatia jinia niqutiojosocoriquiano cumaneecaracuajani. Mococonu niqutiojonaa cajitiucua caponeetareejaariuhuj, tee mococonu niqutiojosaariquiaacuajani Pueyasocuaa catijiasocoriquiano. <sup>13</sup> Jesuuri nojori sequeree:

—Pueyaso sequesanoacuajaari naa naajio-tasaquiaari tarijia:

“Cua quiquioori sesojosaanutaniya Pueyaso Secojuatia”.

¶Niaari saniniuujia na jiyatecanu nohuasenuujuaca quiquiora!

<sup>14</sup>Secojojua tiajinia na quishacarijia, cariyojuarujuri pueya, mariyata shipiiniquiujuunaa pueyari nocua nijioquiaari. Jesuuri nojori naatanijioree. <sup>15</sup>Pueyacuara secojonaa jiyaniijianucuaari Moisés Naajioneejiniji niishitiojonaata Jesu shootiariquiaa cusosuhua naatanijiano. Jiyacaritij, naatujooriiri Secojojua tiajinia na nacooriguiaa Jesujiniji: “¶Pa supuetanaa jiyaniijia David niquiohuacuajinio supueno pueyano! ¶Nojuajaari pa Jiyaniijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. <sup>16</sup>Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¶Nojoriiri jiyaniya quiaari Pueyaso Jiyarosano!

Jesuuri nojori riucaaree:

—¶Taaquiriirinij! Na tojiyacujanijia. Maniniacuajaari nojori sequesano. ¿Majateeri nia serojonu quiquiaacuaja tariucuacaanu Pueyaso Rupaajinia na sequesanotej:

“Quiaari naatujoori niishitirii conaajanio, seetanujuaanaa nojori maniniuhuaqueetanura quia Jiyarosano?”

<sup>17</sup>Naa nojori na sequenu nuhujitij, Jesuuri nojori tiujiaquee. Jerusalén tiacajiniji quiaqueeri canaata Beta-nia tiacajinia. Canaari tii maqueseeni.

**Jesu sesacasacari higo naana, muetuhuo na quiniucua**

(Mr 11.12-14, 20-26)

<sup>18</sup>Tariquicuaji, Jesuuri Jerusalén tiacajiniara taceriquiohua canaa na saquiriojosano pueyata. Jesuuri miaajeriquiaa. <sup>19</sup>Higo naana niquiriiri nuu shuriucua nujuuaano. Nocua canujyareeri. Shaanoori quiriqiaa, saa na jaamasucujaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¶Naanaari ritia sorequee! <sup>20</sup>Naa canaa niquishacarijia, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

<sup>21</sup>Jesuuri canaa riucaaree:

—Seetanujuanaa nia sequeyanijia, niaa jaara Pueyasocua tiuujiaca quiri nioojia nia niquijitoteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”.

<sup>22</sup>Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutaniya.

**Judiocuaca jiyaniijianucua nequesoreesacari Jesu, cante na jiyaronani**

(Mr 11.27-33; Lc 20.1-8)

<sup>23</sup>Jesuuri Pueyaso Secojojua tiajinia tiuquiquiaari. Tii pueya niishitiojoriqiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari,

canaa Judiocuaca camarucuanio. Nojoriiri Jesu nequesotaree:

—¿Canteeri quiajaniyani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

<sup>24</sup>Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riucaare, janiyacua nia sequerohua saniniunijia cante cua jiyaroquiaari naa cua miiniuriani.

<sup>25</sup>Naacuajitij, cua riucaature coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarijia juayonuutunu coteequiaari jiyasohuaja. Tama sequetooreejaarijia:

—Paa jaara na riucaareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaqueequianucuaarini?” <sup>26</sup>Saniniuujia, paa jaara sequereni: “Nojuajaari nareja pueya jiyarosano quiquiaari”, ¶pueereeta quiniutianiya pajaniyara! Paacuajaari niishiyani puetunu pueyajanaari sequiquiaa Tiuquinijiona Juana seetanujuanaa Pueyaso sequesano caminiujuunia quiquiaari.

<sup>27</sup>Naaratej canaa Judiocuaca jiyaniijianucuaari Jesu riucaaree:

—Maja canaa niishiniu canariquitijia na jiyaroquiaaritiaj.

Jesuuri nojori sequeree:

—Janiyajuhuj, majaari cua sequenu quiniutianiya nijaniya cante cua jiyaronani, naa cua miiniuriatej.

**Jesu pahuatasano pueyano niquiohuajiniji**

<sup>28</sup>Jesuuri naa nojori sequerohuacuhuj:

—¶Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquajinia quiarijia”. <sup>29</sup>Neyanuuri saaja na riucaaree: “Maja cua quianu paniniu”. Na nuhujia, niishiriojorohuari. Quiaqueeri. Poonijioseeri. <sup>30</sup>Na queeri naa na nuhujishana sequereehujaj. Neyanuuri na riucaaree: “Maniniacuaja, cua quena. Janiya quianutaniyani”. Na nuhujia, majaari na quianu quiquiaari saaja. <sup>31</sup>¿Taa nia sequeyani pueyanaa? ¿Teyano cuno caapiqui necohuajinijiniote na que tojijia quiquiaarini?

Nojoriiri Jesu riucaaree:

—Na jiyapueranucujaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneeca masejonaa pa pueyajiniji Roma tiacajinia quijia jiyaniijiarani, mariyata paanaturinio, cuno nia soosano pueyari nia shocotanutaniya Pueyaso muerasura nojori quiniuria. <sup>32</sup>Cua tojitiare casaara naa cua sequeree nijaniyani. Tiuquinijiona Juanri niquiaari na niishitiojonura juucua nijaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneeca masejonaa nia soosano pueya cutaraari nocua tiuquianu, paanaturinio. Nojoriiri na tojitiajara quiquianu. Niaacuajaari na niquiquianu taa cuno sesa miijica pueya maninia

pueyara jatacanuni. [Niajanियarijiataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijaca quiquianu.

**Jesu niishitiojosano cuhuariquia cojuanaa sesa miijia-cajiniji**

(Mr 12.1-12; Lc 20.9-19)

<sup>33</sup> Socua tamonu cua pahuatasano nia tojiri. Tamonu pueyanoori cuhuariquiajinia uva natooquiaari. Maninia matacoquiaari puetunu na shuriuquiocojuanaari maja casaa tiuquitianura nocua. Saajia quejaquiaarijuhauaj uva rapijiojuara, na caaca reratesaanura. Jiaconajara tiaquiaarijuhauaj, cojuana niquijiaara tiji nohuasejojuacuajia. Na nuhuaji, na camaruuri tamasa pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuaaanu quiaquiaari pueyaracaanu camueenujunura. <sup>34</sup> Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacu. Nojori jiyaramiquiquiaari nojori masenura cuhuariquia cojuanaa carojotasanojiniji, taa nojori pocojoquiaari taricuajani. <sup>35</sup> Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. <sup>36</sup> Na nuhuaji, na camaruuri socua queraatia seya jiyaramiquiquiaariuhauaj. Nojoriiri naquiya miishaaquiaarijuhauaj.

<sup>37</sup> Na nuhuaji, na camarujuanaari tama sequereejaja: “Jiyaroreera cua niyanu. Maja cutara nojori rerequetenu quiniutianiya cua niyanu”. <sup>38</sup> Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetooreejaja: “[Cunocuaajaqui cuhuariquia camaru quiriqiano na que niti, na que jaara shaajequee! [Pa morej! Naacuajitij, pocua nio cuhuariquia camaruhuaa quiqini!”.

<sup>39</sup> Naaratej, camarnujuanaa niyanu tiuquishacari, cuhuariquia cojuanaari na quiaree. Na jaacutureeri cuhuariquiajiniji tamama. [Cuniqui na motureeri!

<sup>40</sup> Naa Jesu pahuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

<sup>41</sup> Jesu tojitianaari na riucauteree:

—[Cuno cuhuariquia camaruuri nojori puecoontaniya, nojoriicua na taraajeyaquiniutia! Na nuhuaji, tamasa pueya sequenutaniya cutaraari, nojori cojuanaa nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

<sup>42</sup> Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricuaja nio, tariucuacaanu Pueyaso Rupaajini-ani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujau naasucua. Cuno saajiacuajaari socua panishano saajia quiquiaari. Jiyaniijia-

janaari naa na jiyatequiaari. Cuno saajia tiaree maninia cutaraari. Pueya niquishacari, jiuujiate-coreeri”.

Naa naajiotasano quiyacuajaari.

<sup>43</sup> Camarucuaanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojitianaa quiniutianiya cutara, Pueyaso muerasu canenura jiyanohua nera, juhua cuhuariquiajiniji senoosano queraatia. <sup>44</sup> Cuno saajiajiniji saniniuujia, pueyano jaara cuno saajiacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacaanaa na miiniutianiyari.

<sup>45</sup> Pueyacuara secojonaa jiyaniijianucua, mariyata Fariseocuaca tojitasacari naa Jesu pahuatasanojete, nojoriiri niishiquii Jesuuri nojoriiniji pahuatariquiaa miriqui. <sup>46</sup> Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujanaa Pueyaso sequenu panishano caminiuujia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

**Jesu pahuatasano miriqui camishacari queranacunu-jiniji**

(Lc 14.15-24)

**22** Na nuhuaji, Jesuuri socua niishitiojoquiaari miriqui pahuatasano. Naa pahuataquiaaritij:

<sup>2</sup> —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaana. Cuno jiyaniijiaari shuquiriaatia quini paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. <sup>3</sup> Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. <sup>4</sup> Jiyaniijiaari socua tamasa na seya sequeree: “Cua masuusano pueya nia numootejocoo. Nia sequeese: ‘Jiyaniijia nia sashiya. Puetunujanaari tari jeenucasano nia queranacunura. Tari puecoosaaree na juyaca, na shiyoshitishano seyanio. Tariucua rariyosanoori quiya. Ritia nia nimia. Nia miaquenuusee”. Naa na seya na rootanu nuhuajitij, jiyaniijiaari nojori jiyaramiquiriiri. <sup>5</sup> Masuusano pueyari saaja tojitiaquirii. Puetunujanaari tama na panishanojuaaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujua. <sup>6</sup> Tamasacaari saniniuujia jiyaniijia seya quiooree. Jiyanohua naquiya nojori miiriiri. Na nuhuaji, nojori puecootureeri. <sup>7</sup> Jiyaniijia niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhauaj. <sup>8</sup> Na nuhuaji, jiyaniijiaari na seya sequeree: “Puetunujanaari tari jeenucasano pa queranacunura cua niyanu camishacari. Cua masuusano pueyacuajaari saaja cua

ruuretareeni. Namitia majaari nojori nijionu quimiasa, saaja cua rerequetajaca nojori quiniuucua. <sup>9</sup> Quiarijia cutara, nia quiaare nuu tunequetajajinia, tee queraatia pueya tajiniuucua quiaacuajani. Nia masuure puetunu nia niquishano pueyajanaa”.

<sup>10</sup> Na seyari quiojoquiaari tiaca nucuaco. Nojoriiri puetunu na riuratasano pueyajanaa rerejoteree, maninia pueya, sesa pueyano. Queranacunuusaquiiri mishi quiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

<sup>11</sup> Na nuhuaji, jiyaniijiajanaari tiuquiquiaari masuusano pueya na niquiniuria. Tamonu pueyano niquishiiri camishacari cushiyosano toqueeu. <sup>12</sup> Jiyaniijiaari na sequeree: “Pueyanonaa, ¿taa quia tiuquimiasa camishacari cushishano toqueejuni?” Pueyanoori sanaa na tojiriquiaa. Majaari na riuucuanu quirii. <sup>13</sup> Cunora, jiyaniijiaari na seya sequeree: “Nia morojore na cashacua, na numatucuanio! Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

<sup>14</sup> Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojosaanutaniya nojorijinijinio seetanujuanaa na muerasura nojori quiniuria.

#### Jiya jiyaniijia cuara niquitiojosaaria na sequesano cumaneeca

(Mr 12.13-17; Lc 20.20-26)

<sup>15</sup> Na nuhuaji, Fariseocuacaari quiojoquiaari Jesu shuriucujia tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. <sup>16</sup> Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijia pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequese:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. <sup>17</sup> Naaratej, canaa quia sequere taa canaa miiniutaniyani. Paari sequesaaquiarini pa cumaneeca pa niquitiojonura jiyaniijiajanaa Césarra, taa cuno tahue César sequequiaaricujani. Quiajaniryahuaj, ¿taa quia sequeya saniniunijia?

<sup>18</sup> Jesuuri ritia niishiquii, nojoriiri naa na nequesotariquiaa na sapojonuta. Nocujia nojori sequereeri:

—Sapuenu maninia quijiacananaa, ¿casaara nia saniniujia naa janiyani? <sup>19</sup> Cua niquitiri nia cumaneetoj, cuno, jiyaniijia César sequesano pa niquitiojonura nojuajani.

Nojoriiri Jesu niquitirii cumanee. <sup>20</sup> Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojanihuahaj?

<sup>21</sup> Nojoriiri na riuucua:

—Jiyaniijia César naaquicuaja, na sesajuhuj.

Jesuuri nojori sequeree:

—Jaara naa quiritij, César nia niquitiojore tama na casaajaaja. Nojuacuajaari na camaru. Saniniuujia, Pueyaso nia niquitiojore nerano tama na casaajaaja. Nojuaja cutaraari pa camarnu.

<sup>22</sup> Nojori tojishacari naa Jesu sequesantej, jiuujiatecoreeri. Na tariniatureeri. Quiojyarohuari.

#### ¿Macunucuate samiitiaconutaniuhua?

(Mr 12.18-27; Lc 20.27-40)

<sup>23</sup> Cuno juucua, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequese:

<sup>24</sup> —Niishitiojonanaa, supuetana Moisésri pa sequiquiaari na naajiotasanojinia, pueyano jaara cusoyare mueyaju, na tarajanu cuara camiria mashiquio, mueya na mueratenura tarajanu niti. <sup>25</sup> Tarijia, tamonu pueyanoori niya quiquiaari. Siete niquiohwaraca quiquiaariiri, saa canuuja. Jiyapueranuuri camiquiaari. Na nuhuaji, shaajequiaariiri muetuhujua. Naaratej, na mashiquioori camitishaaquiaari neyaca tarajanuta. <sup>26</sup> Nojuajaari muetuhujua shaajequiaarijihuhaj. Naaratej, neyaca tarajanuuri mashiquio camiquiaarijihuhaj. Nojuajaari mueyaju cusoquiaarijihuhaj. Naa cusonuuquiaariiri puetunu cuno siete canujuanaa. <sup>27</sup> Na nuhuaji, mashiquioori cusoquiaarijihuhaj. <sup>28</sup> Saniniuujia, macunucua jaara samiitacorohua, ¿teyano cuno siete neyacaajiniijiotete seetanu neyacajanaa quiniutianiyani, puetunu cuno pojorijianaa jaara neyaca quiquiaari?

<sup>29</sup> Jesuuri nojori riuucua:

—Niiaari jiyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! <sup>30</sup> Macunucua samiitacosacariuhua, majaari canuu camiyonu quiniutianiya maaji. Naajuhuj, maa-jipohuari maja na camiyonu quiniutianiya neyacaara. Caya, maajinio, nojoriiri juhujaniya quijiaca quiniutianiya juhua jiyocuacaanu quijiaca Pueyaso seya, maja camiyosano. <sup>31</sup> Socua cua tojitiare. Macunucuaari seetanujuanaa samiitacoriqianohua. ¿Majateeri nia serojonu quiquiaacuaja taa Pueyaso sequequiaari nia janiyacujani? Naa sequequiaariiri:

<sup>32</sup> “Janiyari nia supuetana Abraham Jiyaniijiani, nia supuetana Isaac Jiyaniijajuhuj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajicononi, nojoriiri maja macunucua na quiniu. Canapete seetanujuanaa Pueyaso muerasuni, nojori cutaraari pueyacaanu quijiaca.

<sup>33</sup> Pueya tojishacari naa Jesu niishitiojosantej, nojoriiri jiyanohua jiuujiateeree.

**Puetunu Pueyaso rootasanojinijianaani, teyanote socua na pueya tojishocoriquianoni**  
(Mr 12.28-34)

<sup>34</sup> Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniuuniuria nojuaja, nojori nequesoreenuta. <sup>35</sup> Nojoriiri jaarajaaja Jesu pocuatenu paniriquiaa sesa juucua. Tamonu nojorijinijiniiori Moisés Rootasanojiniji niishitiojona quiquiaari. Na saniniuuniuria, nojuajaari Jesu nequesotaree:

<sup>36</sup> —Niishitiojonanaa, ¿Pueyaso rootasanojinijini, teyanote socua pa tojishocoriquianoni?

<sup>37</sup> Jesuuri na riucuarree:

—Naa naajosano quiyacuajaari:

“Quia Jiyaniijia Pueyaso quia paniri puetunu quioojiatajanaa, puetunu quia sohanutajanaa, puetunu quia niishitijatajanaano”.

<sup>38</sup> Niocuajaari socua na pueya tojishocoriquiano Pueyaso rootasano. <sup>39</sup> Tamonu na sequesanoori quera juhua niojuhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

<sup>40</sup> Puetunu Moisés rootasanojuanaa, mariyata puetunu tariucuacaanu Pueyaso sequesano caminiuuniuria rootasanojuanaari nio caapiqui rootasanojinijicuaaja.

**¿Cante Cristo supuetanani?**

(Mr 12.35-37; Lc 20.41-44)

<sup>41</sup> Fariseocuaca quishacarijia cuniqui, Jesuuri nojori nequesotaree:

<sup>42</sup> —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuarree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

<sup>43</sup> Jesuuri nojori sequerohuacuahuaj:

—Taaquiriririni. Jaara naa quiriritij, ¿niaateeri niishiyacuaja casaara David sequequiaari “cua Jiyaniijata” Cristocuaraarini, Pueyaso Sohanu jaara na pocuatequiaari? Naa sequequiaariiri:

<sup>44</sup> “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocojotare quioacuajijiatijia”.

<sup>45</sup> ¿Cristotucua taa David niquiohuacuaji supuereni, David jaara Cristo jiyaniiquiya na jiyaniijata?

<sup>46</sup> Nojoriiri Jesu niquitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

**Jesu juaashacari Fariseocuaca, Moisés Rootasano niishitiojanaano**

(Mr 12.38-40; Lc 11.37-54; 20.45-47)

**23** Na nuhuaji, Jesuuri tii quiniaa pueya sequeree, canaa na saquiriojosano pueyano:

<sup>2</sup> —Moisés Rootasanojiniji niishitiojanaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura.

<sup>3</sup> Naaratej, nia tojitiare puetunu nojori sequesanojuanaa nijaniya. Saniniuujia, maja cutaraari nia miiniu taa nojori miiquiaacuaani. Nojoriiri najuhuana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaja.

<sup>4</sup> Nojoriiri tama nojori niishishanojuaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya mi-

ishocoriquianoni, cunoori juhua jiyanohua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta.

<sup>5</sup> Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiquiaa na jiniji morotasano, na numatucuaacuanio.

Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhuj, nojoriiri na toqueecuaji sohuat-

acojua tunujutaquiaa taa pa supuetanaa Pueyaso tojitiata miiquiaaricuaani. Saniniuujia, nojoriiri puera tuacuajuara na tunujutaquiaa saaja pueya

niquishocoriquiano, pueya shootianura nojori. <sup>6</sup> Nojori jaara masuusaare tamonu tijania queranacunura, nojoriiri secoquiaa socua panishano cajitiujinia nojori

cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucuajinia pueya

shootianura nojori. <sup>7</sup> Nojori rucanejosacari tiacajinia, nojoriiri paniquiaa pueya saruhuatanura nojori. Panitiquiaajaarihua pueya jiyaniquiniuria nojori “niishitiojonaata”.

<sup>8</sup> “Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria nijaniya “niishitiojonaata”. Niajaniya cutaraari niquiriyatujua Niishitiojonaraca. Puetunu nijaniyajanaari niarta Pueyaso pueya tapueyocuaca. <sup>9</sup> Naajuhuj, majaari tamonu pueyano mijiria nia jiyaniquiniu “cua queta”.

Niaacua jaari niquiriyatu Queraca. Nojuajaari jiyocuacaanu Quinia. <sup>10</sup> Naajuhuj, majaari pueya nia shanacunu niaacua, nojori jiyaniquiniuria nijaniya “cua jiyaniijata”.

Niaari niquiriyatujua Jiyaniijiaracacuaaja. Nojuacuajaari Pueyaso jyarosano nia Jiyaniijiaranoni. <sup>11</sup> Cante jiyaniijijajanaa cutara nijaniyajinijinioni, cuno cuaara jiyateera tama na cuaqueyajaaja nia cumaquinia na quiniuria.

<sup>12</sup> Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani,

cunoori jiyaniijia jiyatesaanutaniya cutara.

<sup>13</sup> “Cua tojitiare, Moisés Rootasanojiniji niishitiojanaanaa, nijaniya Fariseocuacajuhuj, niaari cocuaatia miiquiaa! [Niaari sapuenu juhua maninia quijia niquishano! Niaari pueya tarinitiaaqui quiaa nojori rupuenura Pueyaso. Niaari maja nia tiuuniu Pueyaso socua. Naajuhuj, majaari pueya nia tarinitianu no-

jori tiuuniuria Pueyasooocua, na muerasura nojori quiniuria.

<sup>14</sup> [Niaari taraatia miishaanutaniya, Moisés Rootasanojiniji niishitiojonaanaa, nijaniya Fariseocua-cajuhuaj! Niaari sapuenu juhua maninia miijiaca niquishano. Niaari mashiquiopue tiaca masequiaa se-caja nia cumaneecata, nia sapojonuta nojori. Naacuajitij, niaari nojori tiaca masequiaa tama nijaniyarajaaja. Naa nia miiniu nuhuajitij, niaari shitiarayocua secojoquiaa najuhua Pueyaso, pueya niquiara, maninia pueya nia jiyanihaanura. Naaratej, niaari socua jiyanhua saniitiosaanutaniya tamasa pueyajiniji.

<sup>15</sup> [Niaari puereeta miishaanutaniya Moisés Rootasanojiniji niishitiojonaanaa, nijaniyajuhua Fariseocuaanaa! Niaari sapuenu juhua maninia miijiaca niquishano. Niaari tucuaaanu rucuanajoquiaa jiya caco, shoniniacu caminia taquijirianio, tamonu nia niishitiojonura najuhua Pueyaso tojjijara na quiniuria juucua, juhua tama nijaniyajaaja. Nia niishitiojosano pueyano jaara nia tojjijara quiri, nojuajaari socua jiyanhua saniitiosocoriquiano quiya nijaniyajiniji, sesa nia rootasano tojjija na quiniuucua.

<sup>16</sup> [Niaari taraatia miishaanutaniya mosanucuaanaa! Nijaniyari juhua cariojuaru, cante tamonu pueyano jaatucuya juucua, nuu nia niishiyaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: "Taa oro Pueyaso Secojoua tijinia pueyaracaanu quiyacuaani, naajuhua, cua sequesano quiajanitari seetanujuanaa tohuateenutaniya quiaara". Saniniuujia, niaari sequequiaa, Pueyaso Secojoua tijinia oro jaara sequeyaquishaare, majaari na sequesanoocua tiushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequere: "Taa Pueyaso Secojoua tia pueyaracaanu quiyacuaani, naajuhua, cua sequesano quiajanitari seetanujuanaa tohuateenutaniya quiaara". Niaari sequequiaa cuno sequesanoocuaari maja tiushaanu. <sup>17</sup> [Mosanucuaanaa, niaari juhua cariojuaru! ¿Teyanote socua puersanoni, cuno orotee, Pueyaso Secojoua tia soj? Cuno oroori naa puersanora jiyatesaaquiaari saaja Pueyaso Secojoua tijinia na quiniuucua. <sup>18</sup> Niaari rootaquiaajuhua, pa sequesacari parta pueyano, casaa pa miiniutianiya nerani, pocua na tiuuniuria paa cuara sequeera naatej: "Seetanujuanaa quia sequeyanijia. Naatej, taa casaa Pueyasooocua catijiaja juhuacutucua niasano jiyanhua maninia quiyacuaa Pueyasorani, naajuhua, cua sequesanoori saaja maninijuhua. Majaari cua sapojonu". Naacuajitij, niaari sequequiaa, paa jaara naa sequereni, paa cuara miiria pa sequesano. Saniniuujia, niaari sequequiaa: "Pa sequesanoori najuhua sequesano, paa jaara saaja Pueyasooocua catijiaja juhuacutu sequereni. Majaari nocua tiushaanu". <sup>19</sup> [Cariojuarujurinia! ¿Majateeri nia niishiniu? ¿Teyanote socua maniniani, Pueyasooocua catijasocoriquiano casaatee, Pueyasooocua catijiaja juhuacutu soj? Catijasocoriquiano casaari

narejajuhuanajaj, jaara Pueyasooocua catijiajaacua niasoo quiyaquiri. <sup>20</sup> Naaratej, cante Pueyasooocua catijiaja sequere seetanujuanaani, nojuajaari maja saaja Pueyasooocua catijiaja na sequenu quiri. Nojuaja catarari na caco niasano sequerejuhuaj. <sup>21</sup> Naajuhua, cante Pueyaso Secojoua tia sequere najuhuanani, cunoori maja saaja Pueyaso Secojoua tia na sequenu quiri. Nojuajaari Pueyaso sequerecuaaja, Pueyaso Secojoua tia na sequesacari. [Pueyasocuaajaari na Secojoua tijinia quijia! <sup>22</sup> Naajuhua, pueyano jaara sequere na sequesano seetanujuanaa juhua jiya cajiniocua, nocua tiushaanura, cunoori maja saaja jiya cajiniocua na sequenu quiri. [Pueyaso cajishaqui sequerejaarihuaj, Pueyasojuaa sequerejaarihuaj, jiyocuaaanu casaa na sequesacari!

<sup>23</sup> [Niaari taraatia miishaanutaniya, Moisés Rootasanojiniji niishitiojonaanaa, nijaniyajuhua Fariseocuaanaa! Niaari sapuenu juhua maninia miijiaca niquishano. Niaari Pueyaso niquitiojoquiaa maninia puetunu nio nia nataujinijianaa, shanhua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijianaa, Pueyasora nia niquitiosocoriquiano taa supuetana Moisés sequequiaaricuaani. [Niaari saniniuujia socua pa tojshocoriquiano Moisés rootasano tojitiaaquiquiaa! [Naacuajitij, majaari maninia pueyano nia quiniu taa Moisés rootaquiaaricuaani! [Majaari nia taraajenu quiquiaa niarta pueyanoocua! [Majaari nia tiuuniu Pueyasooocua! Niaari maninia niquitiojoquiaa nia nataacuacajiniji. Taa nia niquitiojoquiaa nia nataacuacajinijicuaani, [naa nia tojitiarejuhua socua pa tojshocoriquiano rootasano Moisés Naajiotasanojiniji! <sup>24</sup> Pueya nia niishitiojosacari Moisés Rootasanojiniji juucua, niaari juhua cariojuaru cante narta cariojuaru jaatucuya juucua. Niaari juhua tamonu pueyanohua. Na ratusacari, nujujua taquirii na mashacajinijiri. Socua na ratusacarihuua, [saaja cuartia miataaree juhuajaniari!

<sup>25</sup> [Niaari cocuaatia miiquiaa, Moisés Rootasanojiniji niishitiojonaanaa, nijaniyajuhua Fariseocuaanaa! Niaari sapuenu juhua maninia miijiaca niquishano. Niaari juhua noo pueyajuhua, cante nareja na ratujua cuaqueya jeequejoquiaani, na miacojua cuaqueyano. Na jiniacumaari saniniuujia jiyanhua curuutuua quiyajaa. Nio miriqui cua sequesano nia niishiri. Niojiaari naa quiyajuhua. Niaari nohuasenujuaca, jamuejacio. <sup>26</sup> [Cariojuaru Fariseocuaanaa, nia ratujua jiniacuma nia jeequere coteenu, nia miacojua jiniacumano! Naacuajitij, na cuaqueyari maninia jeequesano quiniutianiyajuhua.

<sup>27</sup> [Niaari taraatia miishaanutaniya, Moisés Rootasanojiniji niishitiojonaanaa, nijaniyajuhua Fariseocuaanaa! Puetunu nijaniyajanaari sapuenu juhua maninia miijiaca niquishano, juhua macunucua quiquio shanhua niquishano, cohujata noshijosano. Saniniuujia na jiniacuma quiyari sacuaatia jaanujua pueya nuchua mocua. <sup>28</sup> Niaari naajuhua. Niaari

sapueno juhua maninia pueya niquishano. Saniniuujia nioojaari jiyanoehua sesa, jiyanoehua sapojonu niishijia.

<sup>29</sup> ¶Niaari taraatia miishaanutaniya, Moisés Rootasanojiniji niishitiojonaanaa, nijaniyajuhua Fariseocuacanaa! Niaari sapueno juhua maninia miijia-ca niquishano. Niaari macunucua niojotajara shanohua niquishano shipinijioquiaa, tariucuacaanu pueyara Pueyaso sequesano caminiujiuniaa nu-cuhuacuaji. Naajuhua, iaari tariucuacaanu Pueyaso tojtiajaca puecoosano quiquio maniniushitijia. <sup>30</sup> Naa nia miishacaritij, iaari juhua sequequiaaruhua: “Paa jaara shipinijiosaaquiaari pa supuetanaa quishacarijia tariucuacaanuni, paa maara nojori cojiyaquiquiaari cutarani, nojori puecoosacari Pueyaso sequesano caminiujiuniaa”. <sup>31</sup> Saniniuujia, naa nia sequesacaritij, iaari tama niaacuara toreejaacujua. Niaaquiiri cuno tariucuacaanu Pueyaso sequesano caminiujiuniaa puecoonaacuajinio supuenocuaja. <sup>32</sup> Naa Pueyaso sequesano caminiujiuniaa puecoonacuajinio supueno nia quishacaritij, Pueyaso Jiyarosan nia morejuhuaj, nia tucuatanaa nia supuetanaa coteesano.

<sup>33</sup> ¶Sesa miijia pueyanaa, iaari noonacuraca, juhua sacocua! ¿Niaateeri jiyaniya iaari saniitioy-aquishaanutaniya mani quiquiojinia nia supuetanaata? <sup>34</sup> ¶Cua tojtiaie! Janiyari Pueyaso rupaa caminiujiuniaa jiyaramiquiniutianiya niaacuani, Pueyaso Rupaa niishijacajuhua, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasa teetonutaniya niyacutesanojinia nojori nia monura. Niaari tamasa majacunutaniya Pueyaso secojojua tiacajinia. Niaari tamasa neteyojotanutaniya puetunu tiacajinijianaa, naquiya nia miiniuria nojori. <sup>35</sup> Niaacuajaari niishiya, coteenujanaa mosaaquiaariiri Abel, maninia miijia pueyano. Naa puecoosaaquiaariiri queraatia Pueyaso tojtiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasoocuaa catijiasaqui shuriucua. Monu porocua nia quiniucua taa nia supuetanaa quiquiaaricuaani, iaari saniniuujia nocua namishaanutaniyacujua puetunu tariucuacaanu Pueyaso tojtianaa puecoosaanuucujanaa. <sup>36</sup> Seetanujanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

**Jesu nujuquesacari Jerusalén tiacajinia quinia puey-  
acua**  
(Lc 13.34-35)

<sup>37</sup> ¶Jerusalén tiacajinia quinia pueyanaa, jiyanoehua taraajeya niaacuaniija! Niaari Pueyaso sequesano caminiujiuniaa pueya puecoojua. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucua nia taraatia nia miyaquishaanuucujia cua tacunura niaacuaji, naate

taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura nijaniya. <sup>38</sup> Cua tojtiaie. ¶Niaari nia quiquiojiniji sanaajasaanutaniya niiquijii! <sup>39</sup> Seetanujanaa nia sequeyanijia, majaari socua nia niquiniu quiniutianiya janiya, niaa cuaara cua tiuquishacariuhua sequerejaatijia: “Pueyaso cuaara shuquiritiiria pa Jiyaniijia quiriqiano na jiyarosano.”

**Jesu pohuatasacari, Pueyaso Secojojua tia ni-  
yartasaanutaniya**  
(Mr 13.1-2; Lc 21.5-6)

**24** Jesuuri Pueyaso Secojojua tiajiniji tohuataarohua. Nata canaa quiojosacari nucuaco, canaa, na saquirojosano pueyani, canaari nocua catecanoquiarini. Canaari Jesu niquitiriquiaa Pueyaso Secojojua tiani, shanohua niquishano tia. <sup>2</sup> Jesuuri saa canaa riucuaarejaa:

—Jaa, na niquiyacuajaniija. Naa cumaati maninia na niquiyacuaja. ¶Seetanujanaa nia sequeyanijia, cuno tia niaa na niquiyani, cunoori niyartasaanutaniya puetunujuanaa! ¶Majaari quenaaja tamonu saajia manu quiniutianiya tamonu caco!

**Taa pa niishiniutianiya quera jiya puequesacari**  
(Mr 13.3-23; Lc 21.7-24; 17.22-24)

<sup>3</sup> Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquirojosano pueyani, canaari nocua catecanoquiarini. Tama canaa quishacarijiaaja, canaari na nequesotareeni:

—Canaa quia sequere ¿taacari Pueyaso Secojojua tia niyartasaanutaniya? Naajuhua, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaj, ¿taacari jiya puequenu-taniya?

<sup>4</sup> Jesuuri canaa riucuaaree:

—Tama nia cuaqueyajaaja nia cojuare tamasa mariqui nia sapojoreeri. <sup>5</sup> Queraatia sapojonuujaacari supuenutaniya. Nojoriiri tama na cuaqueyajaaja sequenutaniya: “Janiyacuaja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniya. <sup>6</sup> Naajuhua, iaari pueyapue miaquetoojonujiniji tojiniuniutianiya, niya, tamonu jiyacajiniano. Niaari miaquetoojonura miananajotoonujiniji tojiniuniutianiyajuhua. Naa jaara naa tojiniuuri-tij, majaari puerenu. Naa quiniutianiyari mijiria. Naa-jaa, juhuanoujaajaaja maja jiya puequesacari quiniutianiya. <sup>7</sup> Tamonu pueyari tamasa pueyata miaquetoojonutaniya. Tamonu jiyajiniji jiyaniijaari tamonu jiyaniijaata miaquetoojonutaniyajuhua. Jiyacaritij, jiyanoehua miaajenuuri quiniutianiya queraatia jiyacajinia, cusununujuhuaj. Rijiaari queraatia jiyacajinia jiuquijiuutianutaniya. <sup>8</sup> Naa naquiya miishacari mijiriatej, cunoori juhua manjaraca coteesacari noonu. Na nuhuaji, socua jiyacatenutaniya naquiya miishacari, mijiria cua tiuquiyaquishacarijia.



<sup>9</sup>Jiyacaritij, niaari jiya camarucua niqutiojosaanutaniya cua muerasu nia quiniuucua, naquiya nojori mitianura nijaniya. Niaari puecoosaanutaniya. Puetunu jiyacajinijinio pueyajanaari nia niqiniu paniyaquiniutianiya, cua muerasu nia quiniuucua. <sup>10</sup>Jiyacaritij, queraatia cucua tiuunaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niqiniu paniniu quiniutianiya tarijia narta Pueyaso muerasu. <sup>11</sup>Queraatia sapojonuujuaca Pueyaso rupaa pohuatanaari supenutaniya. Nojoriiri queraatia pueya sapojonutaniya. <sup>12</sup>Jiyacaritij, sesa miiniuuri socua jiyanohua jiyacatenutaniya mijiria. Cunora, queraatia pueyari narta pueya paniniu tarinitianutaniya. <sup>13</sup>Saniniuujia, cucua tiuujia jaara rejeretare pueyaracaanu cuno naquiya miishacari jiya cuara puequerejaatijia, nojuaja cutaraari shacantuaa quijara jatanishaanutaniya, pueyaracaanu na rishiniuria. <sup>14</sup>Pueyaso rupaa jaara pohuataasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

<sup>15</sup>Pueyaso sequesano caminiujiunia Danielri tariucuaanu pohuataquiaari sacuaaraatia casaanaari supenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuara niishiiria casaa na sequeyani.) Niaa jaara cuno sacuaaraatia casaa niquiri Pueyaso Secojoua tijania nujuatesano, niocua mashiri. <sup>16</sup>Jiyacaritij, canapuate Judea jiyajinia quiyani, nojori cuara mashiiria tuhuanuhuacua. <sup>17</sup>Canapuate na tia cacojiria quiyani, nojori cuara tiuquiyaquiri na tijaniaaco maja na tarishiniuria na casamiicua. <sup>18</sup>Canapuate cuhuariquiajia quiyani, cuara tacateyaquiuhua na tijanياهو na toqueyacua. <sup>19</sup>Jiyacaritij, jiyanohua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jiitiaani. <sup>20</sup>Juhuacarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. <sup>21</sup>Cuno quishacari, jiyanohua naquiya miiniuuri quiniutianiya seetanujuaana. Jiya coteenujiniji, jiyano naquiya miiniuuri maja na niquishaanu quiquiaari tari. Naajuhuaaj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. <sup>22</sup>Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

<sup>23</sup>Jiyacaritij, majaari nia tojiniu, tamonu jaara seque niajaniya: “Cua tarajanunaa, Cristoqui tari tiuquirohua! Niya quiyano”. Naajuhuaaj, majaari nia tojiniu tamonu jaara nia seque: “Nooj, jati quiyatej”.

<sup>24</sup>Queraatia sapojonuujuacaari supenutaniya. Nojoriiri tama na cuaqueyajaaja jiyatenutaniya juhua Pueyaso jiyarosana. Tamasacaari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miis-

hanota. Naa nojori miishacarijij, mijiria quiniaa pueyari jiyaniutianiya nojoriqui seetanujuaana Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaarihuaj.

<sup>25</sup>Pueyanaa, naa cua sequesacari niajanijatej, janiyacuaajaari juhuacarijia nia numootereeni. <sup>26</sup>Naaratej, majaari nia quianu cua pajenuucua, pueya jaara seque niajaniya: “Cristo jati cariiquia jiyajinia quiya”. Naajuhuaaj, majaari pueya nia tojiniu nojori jaara seque niajaniya: “Miji, Cristo sohuacamara cajiya. Nia niquishijia”. Majaari nia shanacunu naa nia sapojosaa-nuratej. <sup>27</sup>Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niquiquiaa miacana nunujiyano pananu muetasamajicuaani, pananu tiuquishocoranio, pueyari naa cua niqiniutianiya cua tiuquishacariuhua. <sup>28</sup>Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitosaanutaniya.

#### Taa na quiniutianiya Cristo tiuquishacariuhua

(Mr 13.24-37; Lc 21.25-33; 17.26-30, 34-36)

<sup>29</sup>Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri niishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiitiajacaari tetecatunutaniya. <sup>30</sup>Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani.

Puetunu nio jiyajinia pueyapuejanaari sapiyonunutaniya, jiyanohua nojori taraajeneta. Na nuhuaji, cua niqitiuniutianiyari cohuaja najacajinia roseyano, jiyanohua cua cumaacata, jiyanohua shacantuuca.

<sup>31</sup>Janiyari jiyocuaaanuji cua seyata tiuquiniutianihua, cua jiyaramiquiniuria nojori puetunu cua saquiriojosano pueyacuaanaa. Nojori tojtiasacari trompeta jonenenu jiyanohua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

<sup>32</sup>Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niquishacarijij, niaari niishiya tacareejonuqui quera quiniutianiya. <sup>33</sup>Naa-juhuaaj, niaa jaara puetunu cua sequesanojuanaa niquiri tari tohuatayano, niocua niishiri janiyari quera tiuquihuaani. Tari jiya puequesacari quera. <sup>34</sup>Seetanujuaana nia sequeyanijia, nio pa quishacari pueyani, majaari nojori shaajenu quiniutianiya juhuanouaja, nojori cuara puetunujuaana cua pohuatasano niquirijiaatijia. <sup>35</sup>Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

<sup>36</sup>Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihuaani. Jiyocuaaanu quiniaa Pueyaso seyari maja na niishiniujiuhuaaj. Majaari quenaaja cua

niishiniujuhuaj. Saaja cua Queeri tamajaaja na ni-  
ishiya cutara.

<sup>37</sup> Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. <sup>38</sup> Jiyacaritij, nio jiya pajaashitiaaquishacariija, supuetanaari juhuajaniya miaquenuujua quiquiaari. Juhuajaniya queranacunuuriquiaaariuhua. Juhuajaniya necohua camiyoteriquiaaariuhua. Noé jaara tiuquitiaquiaariijaatijia na puereetuca buquejiniacuma. <sup>39</sup> Nojoriiri saaja juhuajaniya quiriquiaa pajaa jaara nojori pajaashitiaquiaariijaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. <sup>40</sup> Jiyacaritij, caapiqui pueya quishacari cuhuariquiajiniya, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniujia. <sup>41</sup> Naajuhua, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. <sup>42</sup> Nocuaji juhua sutejaca nia quiriqia. Majaari nia niishiniu taacari nia Jiyaniijia tiuquiniutianihuani. <sup>43</sup> Nio nia niishiri. Tia camaru jaara niishiriqia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. <sup>44</sup> Naaratej pueyanaa, niaa cumaati cua sashiya, janiya mariqui nia jiyajenetemohuarini.

**Jesu pahuatasano maninia serujiniji, sesoriquia serujinijio**  
(Lc 12.41-48)

<sup>45</sup> Socua cua pahuatasano nia tojitiare pueyanaa. Jiyanoehua casamiriaca pueyanoori queraatia seyaraca quiquiaari. Cuno jiyaniijaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjijajuhua. <sup>46</sup> Cuno seruuri shuquiriaatia quiniutianiya na camarnu jaara na riuritasuhua maninia poonijiyano taa na camarnu sequequiaari na nuhuajiriacuajani. <sup>47</sup> Naaratej, seetanujanaa nia sequeyanijia, na camarnuuri na jiyatenutaniya puetunu na jiiitasanojuanaa cojuanara. <sup>48</sup> Saniniujia, cuno seru jaara sesa mijia quiri, nojuajaari tama sequenutaniyajaacujua: “Cua jiyaniijaari jiyanoehua tarishiniutianiya”. <sup>49</sup> Jaara naa niishiriojore, nojuajaari narta seya piquiniu coteenutaniya. Mashaasequenuujua ca cojiniutianiyajaariuhua queranacunuunura. <sup>50</sup> Naa juhuajaniya na quishacaritij, na jiyaniijaari jiyacari na jiyajenetenutaniya. <sup>51</sup> Naa sesa na quiniuucuatej, na jiyaniijaari jiyanoehua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano mijia pueyata. Nojoriiri tii nujuquetunutaniya. Na quiaa miaquenuunutaniyari, naquiya na miiquiosacari.

**Jesu pahuatasano diez niyacoorijiniji**

**25** ‘Nia pahuatareera taa Pueyaso shuriucua tiuquitianu panijiaa quiniutianiya cua tiuquishacariuhua. Nojoriiri juhua diez niyacoorjori quiniutianiya, canapueete camiriquiano pueyano sashiriqiaacuajani. Cuno niyacoorjori quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. <sup>2</sup> Cinco cuno niyacoorjorijiniji mosanucua quiquiaari. Tamasacaari saniniujia niishijiaa quiquiaari cutara. <sup>3</sup> Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. <sup>4</sup> Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. <sup>5</sup> Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. <sup>6</sup> Shiyaqueya, tamonu pueyanoori nacaquiaari: “[Camiriquiano pueyano cumaji tari! [Nia naacusee!” <sup>7</sup> Puetunu cuno niyacoorjorijianaari ritia saneecuatuquiaari. Quera pueetacoyano na samaritiu nishiriiniuri. Nocuaji niishijiaa niyacoorjori socua na pootusano samari noshitirii. <sup>8</sup> Jiyacaritij, mosanucua niyacoorjori narta niyacoorjori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. <sup>9</sup> Cuno cinco niishijiaa niyacoorjori nojori riucaaree: “Maja. Maja maninia canaa niqutionura nijaniya, puetunu pa samaritiujianaacua senota pueetama. Ritia nia quiaare juhua na masejosaqui, socua nia masenura tiji”. <sup>10</sup> Cuno mosanucua niyacoorjori quiojosacari samari masenuucua, camiriquiano pueyanoori nojori niyacari tiuquishii. Cuno samaritiurica niyacoorjori cutaraari camiriquiano pueyanota tiuquitiaquiaari camishaqui tiaco queranacunura. Tia tiotiuuri mishiquiosaaree. <sup>11</sup> Na nuhuaji, mosanucua niyacoorjori tiuquijioquiaariuhua. Tia tohuatayaji jiquioonuuuhuari. Sequetureeri: “[Jiyaniijianaa, jiyaniijianaa, canacuaji quia riatareja tiotiu!” <sup>12</sup> Jiyaniijaari saa sequereeja: “Seetanujanaa nia sequeyanijia, maja cua niishiniu nijaniya”.

<sup>13</sup> Naa na pahuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianihuani, casaa juucatej.

**Miriqui Jesu pahuatasano cumaneeca poonitijionajiniji**  
(Lc 19.11-27)

<sup>14</sup> Na nuhuaji, Jesuuri socua miriqui pahuataquiaari canaa na niishitiojonura taa Pueyaso muerasu miishaanutaniya jiya puequesacari. Jesuuri naa canaa pahuataquiaaritij:

—Tamonu jiyaniijaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijiaso-

coriquiano. <sup>15</sup> Naacuajitij, coteenu seru niquitioree cinco mil cumaneecaari. Tamonuuri niquitiosaaree dos mil. Tamonuuri niquitiosaaree mil cumaneeca. Na jiyaniijaari naa nojori niquitiojoquiaari na niishishacari nojoriiri rimiajata niishijaca quiquiaari, socua cuno cumaneeca nojori canijianura. Na nuhuaji, nojori jiyaniijaari quiaquiaari. <sup>16</sup> Cinco mil cumaneeca jiiitianaari ritia coteequiaari casami masenura na niquitiosocoriquiano socua cumaneecara, na reratenura na jiyaniijaari. Naacuajitij, cuno seruuri socua cinco mil cumaneeca reratequiaari coteenu na jiiitiasanojiniji. <sup>17</sup> Naajuhuj, dos mil cumaneeca jiiitianaari socua dos mil cumaneeca reratequiaari na jiiitiasanojiniji. <sup>18</sup> Mil cumaneeca masenaari saniniuujia maja na poonitijionu quiquiaari na jiyaniija niquitiosano cumaneeca. Nojuajaari saaja jiyajinia jiuutiaquiaari na jamojuara na jiyaniija cumaneeca. <sup>19</sup> Seya jiyaniijaari camueenujuquiaari jiyanhua. Socua tiuquiquiaariuhuari na cumaneeca na masejonuhua na seyajiniji. <sup>20</sup> Coteenu nocua tiuquiquiaari cante cinco mil cumaneeca niquitiosaaquiaaricuajani. Nojuajaari na jiyaniija sequere: "Jiyaniijianaa, quiaari cua niquitio cano cinco mil cumaneeca. Niya quiyari socua cinco mil cumaneeca quiara, cua poonijosanojiniji cua reratesano". <sup>21</sup> Na jiyaniijaari na sequere: "Maniniacuaja. Quiaacuajaari maninia cua seru. Majaqui najuhua cua tiuuniu quiquianu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenutaniya queraatia jiiitanarani. Miji quia tiuquimia. Niya cuata quia quishii shuquiriaatia". <sup>22</sup> Na nuhuaji, tamonu seruuri na jiyaniijaacua tiuquishiijuhuaj, nooj, cante dos mil cumaneeca niquitiosaaquiaaricuajani. Na jiyaniija sequereeri: "Jiyaniijianaa, quiaari cua niquitio cano dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji". <sup>23</sup> Na jiyaniijaari na sequere: "Maniniacuaja. Quiaacuajaari maninia cua seru. Majaqui najuhua cua tiuuniu quiquianu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenutaniya queraatia jiiitanarani. Miji quia tiuquimia. Shuquiriaatia niya quia quishii cuata". <sup>24</sup> Na nuhuaji, tamonu seruuri tiuquishiijuhuaj cante mil cumaneeca niquitiosaaquiaaricuajani. Na jiyaniija sequereeri: "Jiyaniijianaa, janiyari niishiyani quiaacuajaari quiarta pueyacuata taraajeyashijia. Quiaari tamasa natoosanojiniji senoojuua. Quiaari tamasa poonijosanojiniji miajajuhuj. <sup>25</sup> Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa". <sup>26</sup> Na jiyaniijaari na juaari: "Quiaaqui sesoriquia pueyano! Taajeca seque! Quiaateeri niishiquianu janiyari tamasa natoosanojiniji senoojuani, tamasa poonijosanojiniji miajajuhuj?" <sup>27</sup> Quiaa jaara cua jiyaniquianu naa quijiatej, ¿casaara cua cumaneeca quia niquitioy-aquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na

canijiacanu quiria". <sup>28</sup> Jiyacaritij, jiyaniijaari tamasa na seya sequere: "Nio sesa cua serujiniji nia jaariuutiare cua mil cumaneeca. Nia niquitiore cutara cua maninia seru, cante diez mil jiiitiaa tariucuajani.

<sup>29</sup> Naacuajitij, cante casaa jiiitiaacuani, nojuajaari socua niquitiosaanutaniya, queraatia jiiitaja na quiniuria. Saniniuujia, cante secaja jiiitiaa najuhuanani, nojuajaari secaja na jiiitiasano jaariutiasaanutaniya puetunujuanaa. <sup>30</sup> Nio najuhua quijia seru saniniuujia, nia jatara carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na miishacari".

#### **Jiya puequesacari, puetunu pueyapuejanaari nequesoresaanutaniya saniitiosocoriquiano**

<sup>31</sup> Puetunu cua seyajanaari jiyocuaaanuji cua cunjiniutianiya janiya jaara tiuquiriohuani Pueyaso shacantuuca cumaacata, Jiyaniijaanaa cua quiniuria mijiria. Janiyari shanohua puereeta jiyaniija cajitujinia cajiniutianiya, pueya cua nequesoresacari.

<sup>32</sup> Puetunu pueyapuejanaari cucua rerejotesaanutaniya puetunu nio jiyajinijiojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuata tajinijicuaani. <sup>33</sup> Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. <sup>34</sup> Na nuhuaji, janiyari cua miaquetajara nujuatiuyano sequenutaniya: "Miji, cua Que shuquiritasano pueyanaa. Shusha jiya shipinishacari niaarano cua Que riuriotaca nia masere. <sup>35</sup> Cunoori niajanijara, maninia miijiaca nia quiniucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanesacari, niaari nia tiaco cua tiuquinijia. <sup>36</sup> Toqueeju cua quishacari, niaari cua niquitioquiaari. Cusosu cua quishacari, niaari cua niquiniucua quiaja. Nujuatejojuajinia cua quishacari taraatia, niaari cucua quiojojuua cua cumanijanuucua". <sup>37</sup> Na nuhuaji, maninia pueyari cua nequesotanutaniya: "Jiyaniijianaa, ¿taacari canaa niquiquiaari quiajaniya miaajeyanoni? ¿Canaateeri quia miaquetequiaarini? Majoruhua. ¿Taacari canaa niquiquiaari quiajaniya jiyamueyanoni? ¿Canaateeri quia raatequiaarini? <sup>38</sup> ¿Taacari canaa niquiquiaari quiajaniya canaa jiyajinia rucuanesacari? ¿Canaateeri canaa tiajinia quia tiuquiniquiaarini? Majoruhua naa canaa miiniu quiquiaari quiajaniya. ¿Naajuhuj, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. <sup>39</sup> ¿Taacari canaa niquiquiaari quiajaniya cusosuni, nujuatejojuajinianio? ¿Canaateeri quioqua quiojoquiaari canaa niquiniuria quiajaniya? Maja".

<sup>40</sup> Janiyari cuno maninia pueya rucuanutaniya:

"Seetanujuanaa nia sequeyanijia. Niaa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhuj".

<sup>41</sup> Na nuhuaji, janiyari cua muenecara nujuatiuyano sequenutaniya: "Cua shuriucuaji niqijiji nia quiaare,

sesoriquia pueyanaa! [Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samarhuacuajinio. <sup>42</sup> Niaari naa miishaanutaniyaqui nia taraajeyaquinuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. <sup>43</sup> Cua rucuanesacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhuj, majaari toque nia niqutionu quijia janiya. Nujuatejojuajinia cua quishacari, cusosu cua quishacarijiuhuj, majaari nia quianu quijia cua niquiniuucua quenaaja”.

<sup>44</sup> Jiyacaritij, cuno pueyari cua nequesotanutaniya: “Jiyaniijiana, ¿taacari canaa niquiquiaari quiajaniya miaajeyanoni, jiyamueyanojuhuj? Majaari canaa niqiniu quijia quiajaniya canaa jiyajinia rucuaneyajiano tiaaju, toqueeju quiyano, cusosu quiyano, nujuatejojuajinia quiyanojuhuaj. Canaa jaara naa quiyano quia niquiquiaarini, canaa maara quioocua taraajequiaarini”. <sup>45</sup> Janiyari nojori riucuanutaniya: “Seetanujuanaa nia sequeyanijia, nia taraajeyaquinuucua tamonu cua muerasuniyojuacuua, niaari seetanujuanaa cucua taraajeyaquinuucua”. <sup>46</sup> Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miiija pueyari Pueyaso shuriucua quianutaniya, pueyaracaanu shuquiriaatia nojori quiniuria.

### Judiocuaca camarucua roojotoosacari Jesu nojori quianura

(Mr 14.1-2; Lc 22.1-2; Jn 11.45-53)

**26** Jesu jaara puetunu nio pahuatasanojuanaa pohuatanu puecaquiaari, canaa na saquiriojosano pueya sequereeri:

<sup>2</sup> —Niaacuajaari niishiya, tama tariquiiri Pascua juucara queranacusacari. Janiyari jiyacari taucua niquitiosaanutaniya, mosocoriquiano niyacutesanojinia teetesano.

<sup>3</sup> Jiyacarijiuhuj, canaa Judiocuaca camarucuaari rerejoquiaari Caifás tiajinia. Caifásri pueyacuara secjonaa jiyaniijiana quiquiaari. Cuno pueya rerejoquiaarini, nojoriiri quiquiaari pueyacuara secjonaa camarucua, canaa Judiocuaca camarucuanio. <sup>4</sup> Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. <sup>5</sup> Nojoriiri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

### Tamonu maaji tosasacari na shanohua jaanutaja Jesuucua

(Mr 14.3-9; Jn 12.1-8)

<sup>6</sup> Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusonujiniji Jesu naatanishano quiquiaari. <sup>7</sup> Miaquejajinia Jesu cajishacari, tamonu maajiiri nocua catecanoquiaari. Shiitianiyoju

shucuariquiaja pataconiyojua cacatariquiaari, cohuaja saajiajiniji quejasano. Tii quiriquiaari shanohua jaanutaja. Cuno jaanutajaari jyanohua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. <sup>8</sup> Canaa jaara niquiquiaari naa cuno maaji miishanotej, canaari juaaquioreeni. Noojiaqueya canaajiniijinoori naa sequeturee:

—¿Casaara cuno maaji niitiaree najuhuana shanohua jaanutajani? <sup>9</sup> [Cuno jaanutaja maara queraatia cumaneecara niquitiosaare, casamiijiuniucua niquitiosocoriquiano!

<sup>10</sup> Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? [Na miishano janiyani, cunoori jyanohua maninia quiria! <sup>11</sup> Casamiijiuniucuaari niaata quiriqiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. <sup>12</sup> Nio maaji tosasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. <sup>13</sup> Seetanujuanaa nia sequeyanijia, pueyaracaanu pueya pahuatasacari Pueyaso rupaa janiyajiniji, nio maaji miishanoori pahuatasaanutaniyajuha puetunu jiyacajinijanaa. Naa na miishano janiyani, majaari na niyajetasaanu quiniutianiya pueyaracaanu.

### Judas tacartasacari Jesu, na quiatenura

(Mr 14.10-11; Lc 22.3-6)

<sup>14</sup> Jiyacaritij, Judasri pueyacuara secjonaa jiyaniijianucuaacua quiaquiaari. Nojuajaari niquiriyatu canaajiniijinio Jesu doce saquiriojosano pueyano quiquiaari. Na sesaari quiquiaari Judas Iscariote.

<sup>15</sup> Secjonaa jiyaniijianucua sequeseeri:

—¿Taa cumaneeca nia niqutionutaniya janiyani, janiya jaara nia quiatere Jesuni?

Nojoriiri ritia treinta cumaneeca niquitioquiaari Judas. <sup>16</sup> Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

### Jesu miaquesacari na nuhuajiria na pueyata

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Puetunu marijarajanaa, canaa Judiocuacani, canaari poreetesoo pan miaquenuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijiana, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

<sup>18</sup> Jesuuri canaa riucaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’”.

<sup>19</sup> Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

<sup>20</sup> Jaara niniquiaari, Jesuuri canaa na doce pueyata miaquejajinia cajitiuriquiaa. <sup>21</sup> Canaa miaquenu-usacari, Jesuuri canaa sequereee:

—Seetanujuanaa nia sequeyanijia, tamonu niajaninya-jinijiniori cua tacartanutaniya, cua paraa na quietenura janiya, nojori monura janiya.

<sup>22</sup> Canaari jiyanhua taraajequeeni naa Jesu sequesacarij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

<sup>23</sup> Jesuuri canaa riucaaree:

—Cante cuata tureneetaa pa miacojuajinijini, no-juacuajaari cua quietanutaniya mosocoriquiano.

<sup>24</sup> Janiyacuajaari mosaanutaniyani taa janiyajiniji naa-jiotasaaquiaaricuajani tariucuacaanu Pueyaso Rupaa-jinia. Saniniuujia, jiyanhua taraatia miishaanutaniyari cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

<sup>25</sup> Na quiateriquiano Judasri socua Jesu nequesotareejuhuaj:

—¿Janiya jiyoteeri Niishitiojonanaa?

Judas riucaareeri:

—Taaquiririnij. Quiajaniyacuaaquinatejaj.

<sup>26</sup> Canaa miaquesacari, Jesuuri pan ririi. Na Que Pueyaso secjoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

<sup>27</sup> Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niquitioree. Canaa sequereeri:

—Niojiniji nia rature puetunu niajanijajanaa.

<sup>28</sup> Nioori cua nanaca, Pueyaso jiyanooniuria niajanija. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji.

<sup>29</sup> Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyanhua maninia quiniutaniyari cuno quishacari. Paari mariyata jiyanhua shuquiriaatia quiniutianiya pueyaracaanuni.

**Jesu sequesacari Pedro, nojuaja nocuaji seetanutaniya**  
(Mr 14.26-31; Lc 22.31-34; Jn 13.36-38)

<sup>30</sup> Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua. <sup>31</sup> Jesuuri jiyacari canaa sequereee:

—Puetunu niajanijajanaari cucua tiuuniu tarinitianutaniya quiari niucujaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niaquejonutaniya tamajaaja”. <sup>32</sup> Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

<sup>33</sup> Pedroori Jesu sequereee:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocujaji.

<sup>34</sup> Jesuuri Pedro sequereee saaja:

—Seetanujuanaa nio niucujajani, caacaraja niuni-jiyaquishacarijia, quiaari naa pacutejonutaniya seetanu cucujaji: “Maja cua niishiniu cuno pueyano”.

<sup>35</sup> Pedroori Jesu sequereee:

—Pueya cuaara moora janiyaqui, naajaa, majaari cua seetanu quiniutianiya quiocujaji!

Puetunu canaa Jesu pueyajanaari mariyata naa sequequiaaritij, taa Pedro sequeriquiaacuaani.

**Jesu secojosacari Getsemaní cuhuariquiajinia**

(Mr 14.32-42; Lc 22.39-46)

<sup>36</sup> Na nuhuaji, Jesuuri tamonu cuhuariquiajinia tiuquiiioquiaari canaa na saquiriojosano pueyata. Cuno cuhuariquia sesaari quiquiaari Getsemaní. Jesuuri canaa sequereee:

—Niyaja nia cajitiuri cua secojosacari cua Que jati socua nia taccoji.

<sup>37</sup> Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanhua tacaariquiaajaarihuaj. <sup>38</sup> Jiyacaritij, Jesuuri nojori sequereee:

—Coojia quera jiaqueya jiyanhua cua taraajenuta! Quera cusoyanijia! Niyaja cua sashitiuri. Nia sutere nia tarajanura janiya quenaaja.

<sup>39</sup> Jesuuri nojori shuriucuaji canujiyaree tamajaaja socua nojori taccoji. Jiyocuara jacamaseeri Pueyaso na secojonura. Naa sequereeri:

—Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuaara miishaariaqui taa quia paniyacuajani, maja juhua cua panishano.

<sup>40</sup> Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? <sup>41</sup> Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

<sup>42</sup> Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuaara miishaariaqui taa quia paniyacuajani.

<sup>43</sup> Jesuuri na pueyacuata tacateyarohuacuahuaj. Maquetiuyano nojori riuriasuhuarihuaj. Nojori namijiaari saaja seecutariquiaa jiyanhua nojori maquenu paniniutia. <sup>44</sup> Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucuajani.

<sup>45</sup> Na nuhuaji, na pueyacuata nimiohuarihuaj. Nojori sequesuhuari:

—Quiarijia cutara nia maquetiuyare. Nia paniyaterere cutara maquetunu. [Quaj! [Nia tojiri! [Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. <sup>46</sup> [Nia saneecua-ture! Pa quiaare. Cumaji tari cua quiateriquiano.

### Moronucua na paraa jaatucutasacari Jesu

(Mr 14.43-50; Lc 22.47-53; Jn 18.2-11)

<sup>47</sup> Jesu pocuasacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquirojosano pueyajiniji quiquiaari. [Queraatia pueyari Judasta nijioquiaari! Nojoriiri secojonaa jiyani-ijianucua jiyaramiquishano pueya quiquiaari, canaa Ju-diocuaca camarucua jiyaramiquishano pueyajuhuj. Nojoriiri nijiniaquetucuaja mueruu pooriquiaa, maca-canio. <sup>48</sup> Judasri tari niishitioquiaari Jesu quia-turiquiano pueya taa nojori niishiniutianiyan teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujaaari nojuaja. Niocua na quiasee ritia”. <sup>49</sup> Naacuajitij, Judas tiuquishacari Jesuucua, na sequeseeri:

—Quiocua tiuquiyaniijia Niishitiojonanaa.

Jiyacarijia na nujuureeri. <sup>50</sup> Jesuuri na sequereeri:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee.

<sup>51</sup> Jiyacaritij, tamonu canaajinijinio pueyanoori ritia shi-tiaree na nijiniaquetucuaja mueruu na shuucuaji. Nata jaateree secojonaa jiyaniijia seru numocoori. <sup>52</sup> Jesuuri na sequereeri:

—[Na co jiniacuma quia shiriohua quia mueruu! ¿Ma-jate quia niishiniu, cante mueruuta miaqueja pueyanoni, mueruuta mosaanutaniyajaariuhuj?

<sup>53</sup> ¿Quiaate niishiyacuiyajuuhuj, janiya jaara cua Que sequereni cucua na jiyaramiquiniuria na seya jiyocua-caanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? <sup>54</sup> Naa-juhuaj, janiya jaara naa cua Que sequere na coju-atenura janiyani, ¿tariucuaaanu Pueyaso Rupaajinia janiyajiniji naajiotasanotucua taa tohuateereni?

<sup>55</sup> Jiyacaritij, Jesuuri na paraa sequereeri:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucajanaa Pueyaso Secojoua tijinia cajiyano, pueya cua niishi-tiojosacari. ¿Casaara tii nia quiaaquiquianu janiyani? <sup>56</sup> Naajaa, naacuajitij puetunu nia miishanojuanaari to-huateenutaniya, taa tariucuaaanu Pueyaso Rupaajinia naajiotasaaquiaari janiyajinijicujani.

Jiyacaritij, canaa, na saquirojosano pueyani, canaari Jesu tiujiaquiaari niquiriyatuni. Puetunu canaajanaari mashiycuatureeni.

### Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesu quianaari na jaatucuquiaari jiyaniijia Caifás-cua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucujaji rerejoquiaari Caifás tijinia. Nojoriiri quiquiaari Moisés

Rootasanojiniji niishitiojonaa, canaa Judiocuaca ca-marucuanio. <sup>58</sup> Pedroori Jesu nuhuajiquiaari tucua-caanuji secojonaa jiyaniijia tijiniara. Cuno puereetuu-ca tia shocuaari mataca quiquiaari. Pedroori tii carijini-acuma tiuquiquiaarijuhuaj. Jiyaniijia Caifás seya tijinia cajishiiri, na niqiniuria taa nojori miiniutianiya Jesuni.

<sup>59</sup> Pueyacuara secojonaa jiyaniijianucuaari puetunu canaa Judiocuaca camarucuatjanaa pajeriquiaa pueya, nojori saquirojotanura na sapojonuta Jesuu-cuara, na mosaanura. <sup>60</sup> Queraatia pueyari najuhuaa Jesuucua saquirojotaree juucua. Nojori seque-sanoori rimiajata quiquiaari tamasa sequesanojiniji. Na nuhuaji, socua caapiqui pueyari mariyata sesa saquirojotaree Jesuucua. <sup>61</sup> Nojoriiri naa sequereeri:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tu-cuatanutanihua jiuujianaraca juucajiniani”.

<sup>62</sup> Jesuuri sanaa nujuariquiaa saaja. Nocuaji, secojon-aa jiyaniijiaari nujuaree. Jesu sequereeri:

—¿Majate quenaaja quia riuucuanuujua? ¿Quiaate pueya tojirii quiocuara saquirojotaano? ¿Seetanute-janaa nojori sequesano?

<sup>63</sup> Jesuuri saaja sanaa na tojiriquiaa. Nocuaji secojon-aa jiyaniijiaari Jesu sequereeri:

—[Cua tojiri! Paa niya quia Pueyaso niqiarani. [Cua riuucua! [Majaari sapojonu! ¿Quiaate Cristo, Pueyaso Niyanu?

<sup>64</sup> Jesuuri na riuucaree:

—Jaa. Nojuacuajaniijia taa quia sequereecuajani. Cua tojitiare. Na nuhuaji, niaari cua niqiniutianiya Pueya-so miaquetajara cajiyano. Niaari cua niqiniutianiya-juhuaj jiyocuaaanuji tacateyanohua cohuajajinia.

<sup>65</sup> Pueyacuara secojonaa jiyaniijia jaara tojiquiaari naa Jesu sequesanootej, tama na toque sutareejaarijia na juaaniutia. Nata quiniaa sequereeri:

—[Juhuej! [Nia tojishuriucua na sequesano! [Noju-jaari tama na cuaqueyajaaja jiyateya juhua Pueyaso na quiniuria! [Jiyanohua sacuraatiaari na sequesano Pueyaso niqiarani! ¿Paatucua casaara sashiri socua ta-monu saquirojotanura nocuaraarini? Niaacuaja shusha tojitiaree tama na sequesanojuaja sacuraatia Pueyaso niqiarani. <sup>66</sup> ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riuucaree:

—[Cuaara mosaaria!

<sup>67</sup> Jiyacaritij, tamasaari Jesu jiquioco riocojoree. Na jiquioco na masetejotureejaariuhuj. Tamasaca sanini-uujia, Jesu namijia na morotunu nuhuaji, na mcoritia na piquitiuriiri. <sup>68</sup> Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

### Pedro seetasacari Jesuucujaji

(Mr 14.66-72; Lc 22.56-62; Jn 18.15-18, 25-27)

<sup>69</sup> Pedroori jiyacari tii cajiriquiaajaa carijiniacuma. Jiy-acaritij, secojonaa jiyaniijia seruuri Pedro niqishii. No-juajaari niyacoo quiquiaari. Pedro sequereeri:

—¿Jaj, quiaacuaja cuno Jesuta rucuanajoja, cuno Galilea jiyajiniinio pueyanotani!

<sup>70</sup> Pedroori jiyacari seetaree puetunu pueya niquiara-janaa. Naa sapojoreeri:

—¿Maja cua niishiniu casaa quia sequeyani!

<sup>71</sup> Pedroori tohuateyajiria canujyaree. Jati, tamonu niyacoori na niquirijihuhaj. Cuno seruuri jiyacari tii quiniaa sequeeree:

—¿Nio pueyanoori cuno Jesuta quijiajuhuaj, cuno Jesu, Nazaret tiacajiniinio pueyanoni!

<sup>72</sup> Pedroori Jesujiniiji socua seetanu camirio-huacuhaj:

—¿Maja cua niishiniu cuno pueyano! ¿Pueyasocua-jajari niishiya, seetanujuanaa nia sequeyanijia!

<sup>73</sup> Pasaja na tarishiniu nuhuaji, quiniqui quiniaari Pedro sequetusee:

—¿Quiaaqui seetanujuanaa cuno Jesu pueyajiniinio! ¿Quiaari juhua nojori pocuaajuhuj!

<sup>74</sup> Jiyacaritij, Pedroori socua jiyacateree sapojonura. Naa cuno pueya sequeereeri:

—¿Pueyasocuaajari niishiya maja cua niishiniu cuno pueyano, niaa na sequeyani! ¿Pueyasocuaajari cua sequesano tojiya! ¿Majaari cua sapojonu nijaniya!

Caacarajaari canashiyaquiji niunijioquee. <sup>75</sup> Jiyacaritij, Pedroori naa cuno niucuaja Jesu sequesano niishiquii: “Pedronaa, caacaraja niunijiyaquishacarijia, quiaari tari janiyajiniiji seetanu pacutejonutaniya”. Pedroori tia shocua matacajiniiji tohuataquiaari ritia. ¿Jiyanohua nujuquequeeri na taraajenuta!

### Judiocuaca camarucua niquitosacari Jesu jiyaniijia Pilato

(Mr 15.1; Lc 23.1-2; Jn 18.28-32)

**27** Tariquicuaji, puetunu pueyacuara secojonaa jiyaniijianucuaajanaari rerejoree narta Judiocuaca camarucua. Nojoriiri rojotooree taa na miitiuniutianiya Jesu na motenurani. <sup>2</sup> Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

### Judas Iscariote cusosacari

<sup>3</sup> Judasri jiyanohua macuhajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niquitionuhuaa cuno treinta cumaneeca. <sup>4</sup> Judasri nojori sequesee:

—¿Janiyaqui sesa miirucuaani, najuhuaa cua quiatenuucua maninia pueyano nijaniya!

Nojoriiri saa na riucaareejaa:

—Naajaa. Maja canaa miishano. Cunocuaajari tama quia miishanojuaja.

<sup>5</sup> Judasri nojori cari cuno treinta cumaneeca jataree Pueyaso Secojouja tiajinia. Tiji quiacuhuari. Na riquia-jiniiji morotaquiaari sohaneyocuaari. Naa cusoquiaari-iri. Sohaneyocuaacuaji jaasutaari. <sup>6</sup> Secojonaa jiyani-

ijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

<sup>7</sup> Puetunu nojorijianaa jaara niishiriojoquiaari taa na miitiuniutianiya cuno cumaneecani, nojoriiri marau paniyuru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari rucoonaa jamojuara, nojori jaara cusoyare Jerusalén tiacajinia nojori quishacari. <sup>8</sup> Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. <sup>9</sup> Naacuaajitij, Pueyaso sequeno panishano caminiujiunia supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhuariquia masenura marau paniyuru pueyanojiniiji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneecata masesaaria cuno pueyano’”.

### Pilato nequesoresacari Jesu

(Mr 15.2-5; Lc 23.3-5; Jn 18.33-38)

<sup>11</sup> Jesuuri jaatucusaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Jaa. Naacuaaquinatejaj, taa quia sequeereecujani.

<sup>12</sup> Secojonaa jiyaniijianucua, canaa Judiocuaca camarucuanio, nojori jaara Jesuucuaa saquiriojotariquiaa, Jesuuri sanaa tojiriquiaa nojori. <sup>13</sup> Naaratej, jiyaniijia Pilatoori Jesu sequeeree:

—¿Majate quia tojiniu nojori, quiocuara tonujijano queraatia?

<sup>14</sup> Majaari Jesu riucaanu quirii quenaaja. Pilatoori nocuaji jiuujiateree, casaara na riucaaquia quenaajani.

### Pilato sequesacari Jesuuri mosaanutaniya

(Mr 15.6-20; Lc 23.13-25; Jn 18.38-19.16)

<sup>15</sup> Puetunu Pascua juucarajanaa, Pilatoori nujuatejoiujajinia nujuatesano pueyano cartenu jitiquiaari. Judiocuaca panishano pueyanoori cartesaaquiaari pueyaracaanu. <sup>16</sup> Cuno quishacari, tamonu pueyanoori nujuatejoiujajinia nujuatesano quiriquiaa, Barrabás jiyaniishano. Puetunu pueyajanaari na niishijia sesa na miiniucua. <sup>17</sup> Pueya rerejosacari Jesu na nacojo-tasacari Pilato niquiara, Pilatoori nojori nequesotaciaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

<sup>18</sup> Pilatoori naa nojori nequesotaree na niishishacari casaara canaa Judiocuaca camarucua monu

paniriquiaa Jesuni. Puetunu pueyajanaari tari canaa camarucua tojitiaquiriquiaa, nojori tojitianura Jesu. Cunora, camarucuaari Jesu monu paniriquiaa.

<sup>19</sup> Pilato cajishacari na nequesoreesaqui, necocuaari nocua jiyaroquiaari tamonu na seru, naa na nu-mootenuratej: “Narejatejataj, nareja! Jjanियari niucua maquiyojoree puereeta cuno pueyanoocuaajini!”

<sup>20</sup> Jiyacaritij, secojonaa jiyaniijianucuaari, canaa Judiocuaca camarucuata pueya niishitiojoriquiaa nojori sequenura, Barrabás cuara cartesaaria, Jesu cuara mosaaria saniniuujia. <sup>21</sup> Naacuaajitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucaaree:

—Barrabás quia cartere!

<sup>22</sup> Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucaaree:

—Cuaara teetsaaria niyacutesanojinia!

<sup>23</sup> Pilatoori nojori nequesotarohuacuahuaj:

—¿Casaarateni? ¿Sesa miiritijiaara?

Pueyari saaja socua jiyanhua nacaree:

—Cuaara mosaaria niyacutesanojinia teetsano!

<sup>24</sup> Pilato cartenu saniniuujishacari Jesu juucua, pueyari saaja socua jiyanhua nacooriguiaa. Socua jiyanhua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucuaajani, nojuajaari mohuaca maseree. Pueya niquiara shuquitiareeri. Na shuquitiasacari, Judiocuaca sequereeri:

—Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. Cunoori tama nia miishanojuaja!

<sup>25</sup> Puetunu pueyajanaari na riucaaree:

—Naajaa. Jaara mosaare, cuara tiutiasaaria canaacua, canaa niquiohuacuano!

<sup>26</sup> Na nuhuaji, Pilatoori Barrabás tohuateree nujuate-jojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

<sup>27</sup> Jiyaniijia Pilato soldadohuari jiyacari Jesu jaaturee Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. <sup>28</sup> Na nuhuaji, nojoriiri Jesu toque jocuaturee. Tamonu tu-cuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na maca-tiniuria. <sup>29</sup> Nojoriiri juhuacontucua maaturee na naca-querajuhua. Na nuhuaji, na cushititirii Jesuuri. Naa-jua niquitiosaareejaariuhua, juhua na macara, na mia-quetajata na muetunura juhua jiyaniijia. Na nuhuaji, soldadohuari Jesuucuaa mojuquetacoquiaari. Nojori-iri naa na macatirii:

—Jejee, Judiocuaca jiyaniijianaa!

<sup>30</sup> Nojoriiri Jesu riocojoree. Na naajua na jaariuti-areeri. Nataja na naca piquitiuriiri. <sup>31</sup> Naa nojori macatiniu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja

cushitishaarohuari. Na nuhuaji, nojoriiri na jiy-ataquiaari na teetenura niyacutesanojinia.

### Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

<sup>32</sup> Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajiniinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. <sup>33</sup> Nojoriiri tiuquijioseesa sesa miijia puecoosaqui. Pueya puecoosaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. <sup>34</sup> Quiniqui, soldadohuari Jesu raateree vino juucua, casaa piajata cojitishano. Jesu jaara na saniquiaari, majaari na ratunu quirii.

<sup>35</sup> Jesu jaara niyacutesanojinia teetsaaquiaari tari, soldadohuari saitia tacuarishijoree nojori niishiniuria cante Jesu toque poonutianiya nerani. Naacuaajitij, tama nojoriijaarijia Jesu toque seraatiaquiaari. Naa tohua-teequiaariiri tariucuaaanu Pueyaso sequesano caminiujunia sequesano, nojuaja jaara naa naajio-taquiaari:

“Pueyari saitia tacuarishijoree cua toque nojori ser-aatianura”.

<sup>36</sup> Na nuhuaji, cuno soldadohuari cajitiquiaari Jesu na cojuanura.

<sup>37</sup> Jesu nacaacuma, naajioneeri rupotasaquiaari. Tii naajiosano quiriquiaari casaara na teetsaareeni. Naa naajiosano quiriquiaari: “Nioori Jesu, Judiocuaca Jiyani-ijia”.

<sup>38</sup> Caapiqui nohuasenujuacaari Jesu shuriucua teetsaaquiaarijuhuaj, socua tamonu caapiqui niya-cutesanojinia; tamonu na miaquetajara, tamonu na muenecara. <sup>39</sup> Tamasaca pueya tajishacari nucuaco Jesu shuriuquico, nojoriiri Jesu macatiquiaari. Na maanuquenuta, nojoriiri Jesu sequetuquiaari:

<sup>40</sup> —Jaj! Cumaacaraca quijia naatijia! Quiaacuajaari sequeja quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juuca-jinia. ¿Naatee? Quiaa jaara naa cumaacaraca quirijij, canaa niquiara quia roserecuarajaj, quiaa jaara Pueyaso Niyanu quiri seetanujuanaa!

<sup>41</sup> Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macatiriquiaa-juhuaj. Tama sequetooriquiaajaarijia:

<sup>42</sup> —Saaja tamasa naatanijiojuajiri. Maja cu-taraari na naata tama nocuajijiaaja tacunu. Jaara see-tanujuanaa pa Israel pueya jiyaniijia quiri, cuara roseera quiarijia pa niquiara niyacutesanojiniji, nocua pa tiuuniuria. <sup>43</sup> Pueyasoocua tiuujia naatijia! Jaara naa quirijij, Pueyaso cuara na roshiniiria, nojuaja jaara seetanujuanaa Pueyaso panishano quiri. No-juacuajaari pa sequeja: “Janiyari Pueyaso Niyanuni”.

<sup>44</sup> Cuno caapiqui nohuasenujuaca Jesu shuriucua teetejosano quiriquiaani, nojoriiri Jesu macatiriquiaa-juhuaj.



### Jesu cusosacari

(Mr 15.33-41; Lc 23.44-49; Jn 19.28-30)

<sup>45</sup> Panacari, mijiriarini ninishiquiria quiquii! Pananu mueecosacari cuhuatemohuari. <sup>46</sup> Jiyacaritij, Jesuuri jiyanoahua nacaquiaari naatej:

—Elí, Eliinaa! ¿lama sabactani?

Nioori pueyano rupaaajinia sequeya: “¿Cua Pueyasonaa, cua Pueyasonaa!, ¿casaara quia carteree janiyani?”

<sup>47</sup> Tamasaca na shuriucua nujuatunaari na toji-tiariquiaa. Nojoriiri sequeree:

—Nia tojiri! ¿Supuetana Elías jiiquioonuyano! Noo Elías, tariucuaaanu pueyara Pueyaso sequesano caminiujuunia quiquiaaritij.

<sup>48</sup> Tamonuuri ritia netequee namasu casaa na rini-uria. Naajuaacua na morotanu nuhuaji, jereeca vino-jinia na shiriiri. Na nuhuaji, Jesuucua na shiitioreeri na raatenura. <sup>49</sup> Tamasacaari sequeree:

—Pa shanacure! Elías jiyoteeri nocua niniutianiya na roshininiuria niyacutesanojiniji!

<sup>50</sup> Jiyacaritij, Jesuuri jiyanoahua nacarohua! Na nuhuaji na sohuanu tohuataniriiri! ¿Cusoqueeri!

<sup>51</sup> Pueyaso Secojojua tiajinia, shiquiaruque toquejiniji sohuacaari quiquiaari Pueyaso Quishaqui mishiquiota-ja. ¿Jesu cusosacari, cuno toqueeri sutequee jiyocua-caanuji jiyocua puetunujuanaa! ¿Rijiaari jiya jiuuquiu-tiaquiaari jiyanoahua! ¿Sairi jiaquetacoquiaari noojiaa-coji! <sup>52</sup> ¿Macunucua raacaari riatequequiaari! ¿Queraa-tia tariucuaaanu Pueyasoocua tiuuniaari samiitiacoo-quee na raacajinia! <sup>53</sup> Jesu jaara samiitiaquiaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacu muetaquiaari tii, Pueyaso panishano tiacajiniani. <sup>54</sup> Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niquiara. Nojori jaara jiya niquitiquiaari jiu-uquiutiaano, socua puetunu nojori niquishanojuanaano, nojoriiri jiyanoahua puereturee. Sequetureeri:

—Nio pueyanoqui seetanujuanaa Pueyaso Niyanu quiquianu!

<sup>55</sup> Queraatia maajipohuari tii quiriqiaajuhuj. Nojoriiri tucuaaanuji shootiatuquiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenu-uriquiano. <sup>56</sup> Cuno maajipohua tajinia quiriqiaari María Magdalena, Santiago nucua Maríajuhuj, José nucua Maríano, mariyata Zebedeo niquiohua nucuanio.

### Jesu quete niasacari raaco

(Mr 15.42-47; Lc 23.50-56; Jn 19.38-42)

<sup>57</sup> Tamonu pueyanoori quiquiaari Arimatea tiacajini-jinio. Jiyanoahua casamiriaca quijiaari. Na sesa quiquiaari José. Nojuajaari tarijia Jesu tojijia quiquiaari. Joseeri Jesu cusuon juucaja tiuquiquiaari cuno tenacari. <sup>58</sup> Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niquitiosaarianoj. <sup>59</sup> Joseeri Jesu quete paquiaari na jeenucuanura raaco na niasocoriquiano.

Na jiuniooreeri quenaaruque cohuajaque toquejinia.

<sup>60</sup> Na nuhuaji na niaquiaari tama na raacojaarijia.

Quiarinio raa quiquiaariiri, José jiuutianishano saajia-jinia. Na nuhuaji, Joseeri puereetuca saajia saquiti-niquiaari raa tiootiuria. Quiacuhuari. <sup>61</sup> María Magdalenaari na sesaanucua cajituriquiaa raa caneja taquijiria.

### Soldadohua cojuasacari Jesu raa

<sup>62</sup> Pascuara jeenucuanu juuca nuhuaji, secojona jiyaniijianucuaari Pilatoocua quiojoquiaari Fariseocua-cata. <sup>63</sup> Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuanu”. <sup>64</sup> Nocujia na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara na sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosannoni”.

<sup>65</sup> Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

<sup>66</sup> Nojoriiri soldadohua nujuatejoquiaari raa nojori cojuanura. Raa tiootiuri rupanacusaaquiaarijuhuaj jiyaniijia Pilato sesa naajiotajata.

### Jesu samiitiasacariuhua

(Mr 16.1-8; Lc 24.1-12; Jn 20.1-10)

**28** Samaatenu juuca jaara shocoquiaari, coteenu juuca seamaanajinijinio juhuaquesacari, shusha cuhuatesacari, María Magdalenaari raa niquiniuucua quiariquiaa na sesaanucua. <sup>2</sup> ¿Canashiyaquiji, rijiaari jiyanoahua jiuuquiutiaree! Cunoori quiquiaari Pueyaso seru rosenuucua jiyocuaaanuji raacua. Raa tiootiu saajia saquitinishiiri. Na nuhuaji, saajiaacua cajirio-huari. <sup>3</sup> ¿Pueyaso seruuri niquishaaquiaari shacantuu-ca juhua miacana! Na toqueeri jiyanoahua cohuajaque quiquiaari, juhua sohuanatuu. <sup>4</sup> Raa cojuatunaari jiyanoahua shiriiquitiuquiaari nojori niquishacari Pueyaso seru. Jiyanoahua tetecatureeri. Na puerenuta socua cusojonureeri. <sup>5</sup> Maajipohua jaara tiuquiquiaari raajinia, Pueyaso seruuri nojori sequeree:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. <sup>6</sup> Maja niya na quiniu. Tari samiitiarohuano, taa nojuaja sequequiaari niajanuyacuajani. Miji. Nia niquishushiiria na masaqui. Shaaqui. <sup>7</sup> Ritia nia quiaarohua. Na saquiriojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pohuatasuhua na pueya.

<sup>8</sup> Maajipohuari masaacujutanuuriquiohua raajiniji na puerenuta, na shuquiriniutiajuhuaj. Nojoriiri socua netecuatiuyarohuaj, canaa na pohuatanuhua

Pueyaso seru sequesano nojori. <sup>9</sup> ¶Jiyacaritij, Jesujua-naari canashiyauquiji nojoriicua muetaquee nuujinia! Nojori saruhuatareeri. Maajipohuari nocua cate-canoree. Na cariquimiaji mojuquetacoreeri. Jesu niohuaca quiatureeri. Jesu shootiatureeri na jiuujiatenuta. <sup>10</sup> Jesuuri nojori sequeree:

—Maja nia puerenu. Nia quiaarohua. Cua pueya nia sequesuhua nojori cuara quiojoora Galilea jiyajinia. Nojoriiri seetanujuanaa cua tapueyocuaca. Nojoriiri jati cua niqutiuniutianiya.

### Raa cojuanaa pohuatasano

<sup>11</sup> Maajipohua quiojosacariuhua, noojiaqueya raa cojuanaajiniiniori tiacajinia quiojoquiaariuhua pueyacuara secojonaa jiyaniijianucua nojori pohuatanura nojori niquishano. <sup>12</sup> Pueyacuara secojonaa jiyaniijianucuaari canaa Judiocuaca camarucuata rerejoree na roojotoonura taa na miitiuniutianiyani. Na nuhuaji, nojoriiri queraatia cumaneeca niqutioquiaari raa cojuanaa, pueya niquiara nojori pohuatanura tamaatia nojori niquishanojiniji. <sup>13</sup> Soldadohuari naa rootasaaquiaaritij:

—Niocua naa sequere pueyatej: “Canaa maquesacari, Jesu pueyaquiiri niucua nohuasequee Jesu quete raajiniji”. Niocua naa sequeretej. <sup>14</sup> Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shiniajanutaniyani jaara juaari. Naacuajitij, majaari na juaaniu quiniutianiya nijaniya.

<sup>15</sup> Jiyacaritij, soldadohuari cumaneeca maseree. Nojoriiri naa pohuatanu coteequiaari taa nojori rootasareecuajani. Nojori cuaracashishanoori ritia caminiujiushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

### Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

<sup>16</sup> Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuu-cuani. Jesuuri canaa sequequiaari canaa quiojonura tiriara, tii canaa coquetonura nata. <sup>17</sup> Canaa niquishacari Jesu quiyano tii, canaari nocuara mojuquetacoquiaari canaa shuquiritianura nojuajani. Tamasaca canaajiniiniori jyaniriquiaa maja naascuaari Jesu. <sup>18</sup> Jesuuri canacua catecanoree. Canaa sequereeri:

—Janiyari puetunu cumaacajanaa niqutiosaareeni, Jiyaniijiajanaa cua quiniuria jiyocuacaanu, mijiriano. <sup>19</sup> ¶Naaratej, nia quiojore! ¶Puetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. <sup>20</sup> Nojori nia niishitiojore puetunu cua rootasanojuanaa nijaniya, nojori tojishocoriquiano. Nia niishiri nio: ¶Janiyacujaari niaata quiniutianiya pueyaracaanuni, jiya cuara puequerejaatijia!

# MARCO

## Cariiquia jiyajinia Tiuquinijiona Juan poojotasacari Pueyaso rupaa

(Mt 3.1-12; Lc 3.1-9, 15-17; Jn 1.19-28)

**1** Pueyaso Niyanu Jesucristojiniiri naa cotee-tasaaquiaari pohuatanutej. <sup>2</sup> Tariucuacaanu pueyara Pueyaso sequesano caminiujiunia Isafasri Pueyaso Niyanu niyacari naajiotaqueaari. Naajiotaqueaari taa Tiuquinijiona Juan poojotanutaniya pueya jeenucuanura nojori jiuujiani, niriqiano Jesu tojjia nojori quiniuria. Isafasri naa naajiotaqueaari Pueyaso sequesano miriqi Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. <sup>3</sup> Na nacanuuri tojishaanutaniya cariiquia jiyajinia. Naa pueya sequeyari: “Nia jeenucuare Jiyaniijia nuu! Nia nuunore maninia, maja shuutiuniu!”

<sup>4</sup> Quiari naataja, Tiuquinijiona Juanri seetanujuanaa naa miiquaari cariiquia jiyajinatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—Nioojia nia tacatore sesa nia miiniujiniji, moojinia cua tiuquinijionura niajaniya! Pueyasocua sesa nia miishanojiniji nia jiyanoori puetunujuanaa!

<sup>5</sup> Puetunu Judea jiyajininio pueyajanaari nocua nijioquiaari nojori tojtianura nojuaja, Jerusalén tiacajininio pueyano. Cuno pueya jaara sesa na miishano pohuataquiaari Juan niquiara, Pueyaso niquiarajuhuj, Juanri nojori tiuquinijioquiaari Jordán moojinia.

<sup>6</sup> Tiuquinijiona Juan toqueeri camello cajacajiniji shitasano quiquiaari. Na cajiniocua na camarucutesanoori quiquiaari shoque sacuanijasano. Na miaquesanoori quiquiaari sequeru, samiyatunio, cariiquia jiyajinia na riuriasano. <sup>7</sup> Juanri pueya niquiara pohuataquiaari naatej:

—Tamonuuri cua nuhuaji niniutaniya. Nojuajaari socua cumaacaraca janiyajiniji. Janiya maara shuquiri-aatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijajanaa cutara janiyajiniji. <sup>8</sup> Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohuanu tiuquinijionutaniya nioojajinia, na cumaaca nia jitianura, seetanujuanaa maninia miijica nia quiniuria.

## Jesu tiuquinishacari moojinia

(Mt 3.13-17; Lc 3.21-22)

<sup>9</sup> Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquaari Jordán moojinia. <sup>10</sup> Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niquiquaari riateyano. Pueyaso Sohuanu niquiriiri nocua roseyano juhua mococoonu. Nocua tiuushiiri. <sup>11</sup> Jiyacaritij, jiyocuacaanu ti tojishaquiaari Pueyaso pocuaano. Naa Jesu sequequiaariiri:

—Quiaari Quiyanuniyojua, cua panishano! Jiyanojua quia timitaanijia!

## Samaruhua jiyaniijia saniniujiushacari Jesu

(Mt 4.1-11; Lc 4.1-13)

<sup>12</sup> Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara. <sup>13</sup> Jesuuri cuarenta juuca shocotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojjiara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhuj.

## Jesu coteesacari poonijionu Galilea jiyajinia

(Mt 4.12-17; Lc 4.14-15)

<sup>14</sup> Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaarihua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jitianutaniya na muerasuni. <sup>15</sup> Jesuuri naa sequequiaari pueyatej:

—Nia sequeyanijia, nio pa quishacarini, quarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtiajaca nia quiniuria.

## Jesu saquiriojosacari pueya, na tarajariquiano

(Mt 4.18-22; Lc 5.1-11)

<sup>16</sup> Galilea caminia shuriuquioco Jesu rucuanijosacari, nojuajaari Pedro niquiquaari, tarajanu Andrésnio. Nojoriiri shiyaru jaquerootanaa quiquaari. Jiyacaritij, nojoriiri shiyaru jaquerootariquiaa caminajinia. <sup>17</sup> Jesuuri nojori sequesee:

—Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

<sup>18</sup> Nojoriiri ritia na shiyaru tiujiaquiaari. Jesuta quioji-yareeri.

<sup>19</sup> Socua shiitianiyojua na tacoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. <sup>20</sup> Jesuuri jiyacari nojori sequequiaari nata nojori quianurajuhua. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

### Samaruraca pueyanonijiji pahuatasano

(Lc 4.31-37)

<sup>21</sup> Nojoriiri Capernaum tiacajinia tiuquishii. Samaanu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. <sup>22</sup> Pueyari jiyanojua jiuujiatequiaari na rootasano nojori tojishacari. Jesuuri juhua jiyaniijiajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pahuatasanojiniji caminiujuquiaari, pueya niquiara nojori pahuatasacari Pueyaso Rupaa. <sup>23</sup> Samaruraca pueyanoori Pueyaso secojojua tiajinia quiriqiaa tiijuhua. Nojuajaari nacaquiaari:

<sup>24</sup> —[Nazaret tiacajininio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. [Quiaacuajaari Pueyaso Niyanu!

<sup>25</sup> Jesuuri cuno samaru juaarii. Na sequereeri:

—[Quia sanaajere! [Quia tohuatare nio pueyanonijiji!

<sup>26</sup> Jiyacaritij, samaruuri jiyanojua taraatia miirii cuno pueyano. Jiyanojua na sariyotequiaariiri na tohuatasacari nojuajiniji. Juhua macu tiujiaquee pueyanoori. <sup>27</sup> Puetunu pueyajanaari shiriiquitiuquiaari. Tama nojoriijaarijia nequesoreetooquiaari:

—¿Casaatucuaa nioni? [Nioruhua quiarinio niishitiojono! [Nio pueyanoqui cumaacaraca! [Taa samaruhua tojitiaa nojori na jiyarosacariiri!

<sup>28</sup> Pueyari ritia caminiujuquiaari Jesujiniji puetunu Galilea jiyajinijanaa.

### Jesu naatanishacari Simón Pedro reyarucua

(Mt 8.14-15; Lc 4.38-39)

<sup>29</sup> Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juananio. <sup>30</sup> Simón reyarucuaari naseeca matariquiaa maquetujinia. Cusosutuhua. Tiajinia quiniaari Jesu sequeturee nojuaja cusosu mataa. <sup>31</sup> Jesuuri nocua canujiyaree. Na juaashiquiajiniji cusosu sanaseeri. Na cusonuuri seetanujanaa ritia tajiquiaari nocuaji. Naacuajitij, nojuajaari pueya mianuutenu coteequiaari ritia.

### Jesu naatanijosacari queraatia cusosuhua

(Mt 8.16-17; Lc 4.40-41)

<sup>32</sup> Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyano. <sup>33</sup> Puetunu cuno tiacajiniji pueyajanaari tia tohuatayaji rerequeequiaari tee Jesu quiriqiaacuajani.

<sup>34</sup> Jesuuri queraatia puetunu tamaatia cusonuujanaa naatanijosquiaari na rupaa cumaacata. Queraatia samaruhua tohuatanijosquiaari tamasaca pueyajinijiaariuhua. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

### Jesu pahuatasacari Pueyaso rupaa Galilea jiyajinia

(Lc 4.42-44)

<sup>35</sup> Jesuuri jiyanojua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. <sup>36</sup> Na nuhujia, Simónri Jesu pajenuucua quiojoquiaari, nata quiniaata. <sup>37</sup> Jaara na riuriatatuquiaari, na sequetuseeri:

—[Puetunu pueyajanaa quia juuretaa!

<sup>38</sup> Jesuuri saaja nojori sequereeri:

—Pa quiaare juhua catecanaataja tiacajinia. Tii pa pahuatarehua Pueyaso rupaa pueya niquiara. Janiyacuajaari cunora jiyasohuaja tohuataareni.

<sup>39</sup> Naacuajitij, Jesuuri puetunu Galilea jiyajinijanaa rucuanajoquiaari. Pueyaso rupaa pahuataquiaariiri Pueyaso secojojua tiacajiniaqueya puetunu Galilea jiya tiacajinijanaa. Nojuajaari samaruhua tohuatanijosquiaarijuhuaj.

### Jesu naatanishacari lepraraca pueyano

(Mt 8.1-4; Lc 5.12-16)

<sup>40</sup> Lepraraca cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

<sup>41</sup> Jesuuri nocua taraajequiaari. Na juaashiquia niaree nocuuari. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

<sup>42</sup> Jesu jaara naa na sequequiaaritij, na lepraari ritia cushiriiquii. Na cuaqueyariniji shaajequiaariiri na cusonu. Na cuaqueyari maninara quiquiaariuhua. <sup>43</sup> Na jiyaroyaquishacarijia na naatanishano pueyano, Jesuuri jiyanojua na rootaquiaari. Na sequereeri:

<sup>44</sup> —[Cua tojiri, majaari pueya quia pahuatanu cua miishano! Saaja pueyacuara secojonaa jiyaniijia quia cuaqueya quia niquitishii, na cartenuhuara quiajanija, pueya tajinia quia rucuanefonuhua juhuajaniya. Mariyata ritia quia niquitio quia seru Pueyasooacara catijasocoriquiano. Naa quia miiri taa Moisés niishitiojoquiaaricujani, puetunu pueyajanaa niishiniuria quiaa tari naatarohua quia cusonujiniji.

<sup>45</sup> Cuno pueyano jaara quiaquiaari, juhuacatecara pahuataquiaari puetunu pueyajanaari taa na naatanisharuani. Naaratej, puetunu pueyajanaari Jesu niquinu panijia. Cunora, Jesuuri maja tari na naata tiuquinu quiquiaari juhuajaniya tamonu tiacajinia. Nocuaji Jesuuri pueya quiyaquishaqui rucuanajojua. Naajaa, puetunu cuno jiyajiniji pueyajanaari saaja nocua nijioquiaari na niqiniuria.

### Jesu naatanishacari cumatacuruhuana cusosu

(Mt 9.1-8; Lc 5.17-26)

2 Na rucuanenon nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tiajinia tiuquiriohua, <sup>2</sup> queraatia pueyari nocua nijioquiaari cuno tiajinia. Nojoriiri tiaco mishiquiaari, tohateyajiuhua. Jesuuri cuno pueya niqiara pohuataquiaari Pueyaso rupaa. <sup>3</sup> Jesu quishacari tii, nocua patasaaquiaari pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniucua. <sup>4</sup> Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. <sup>5</sup> Jesuuri cusosu patanaa pueya niquirii seetanujuanaa nocua tiuyano. Naaratej, Jesuuri cusosu sequeree: —Quiyanunaa, sesa quia miishanojiniji quia jiyanoorii taricuajanijia.

<sup>6</sup> Moisés Rootasanojiniji niishitiojonaari tii caji-tiuriquiaa. <sup>7</sup> Nojori tojishacari Jesu jiyanoyno cuno pueyano, nojoriiri niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni sesa pa miishanojiniji. [Nojuajaari tama na cuaqueyajaaja jiyateya juhua Pueyaso na quiniuria! [Cunoori jiyanohua sacuaraatia! [Saaja Pueyaso cutaraari na naata pa jiyanooni!” <sup>8</sup> Jesuuri tamajaaja ritia niishiquiaari noojiajinia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojijani? <sup>9</sup> ¿Casaate jiyajenetoshiya sequenurani: “Sesa quia miishano tari jiyanooshaaree”? ¿Mariyata jiyajenetateeri sequenurajuhua: “Quia sanere. Quia matu quia patarohua”?

<sup>10</sup> Seetanujuanaa nia sequenianijia, janiyari quiarinijia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jitiiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

<sup>11</sup> —Cua tojiri. [Quia sanere! Quia matu quia patare. Quia tiajinia quia quiaarohua.

<sup>12</sup> Cusosuuri ritia sanequee. Pueya niqiara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaaritij, na shuquiritiasacari Pueyaso:

—[Majaari quenaaja pa niqiniu quiquiaari naa miishanotej!

### Jesu sequesacari Leví na nuhuajiniuria

(Mt 9.9-13; Lc 5.27-32)

<sup>13</sup> Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori ni-

ishitiojoquiaari Pueyaso rupaa. <sup>14</sup> Na nuhuaji, Jesu quiojosacari na saquiriojosano pueyata cuniquiji, Jesuuri Leví niqimiamaa cajiyano Roma tiacajinia quijia jiyaniijia cumaneeca masejojuajinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

<sup>15</sup> Cuno niucuaaja, Jesuuri Leví tiajinia miaqueriquiaa. Leví tiajinia miaquenuuriquiaaariuhua queraatia narta cumaneeca masejonaa. Queraatia tamasaca pueyari nojoritia miaquenuuriquiaajuhua, canapue Judiocuaca camarucua sequequiaari sesa pueyatacuajani. Nojoriiri Jesuta miaquenuuriquiaa, Jesu saquiriojosano pueyatano. Jiyanohua queraatia pueyari Jesu rupuenaa quiriquiaa. <sup>16</sup> Moisés Naajioneejiniji niishitiojonaa, mariyata Fariseocuaca jaara Jesu niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijacatani? ¿Casaara cuno pojoritia na ratuyajaanuhua?

<sup>17</sup> Jesuuri cuno pueya sequesano tojirii. Nojori sequeree miriquiiri:

—Jiyotuucari maja na paniniu naarajona. Cante cusosuni, cuno cutaraari naarajona paniya. Majaari cua niniu quiquiaari maninia miijiacuaca. Niqiaraari cutaranijia nia sequesano sesa miijiacua cua jiyanooniuria sesa nojori miijiosanojiniji.

### Pueya nequesotasacari Jesu, casaara na pueya miacquenu carteyaquiyani, nojori shuquiritiniuria Pueyaso

(Mt 9.14-17; Lc 5.33-39)

<sup>18</sup> Tamacari, Tiuquinijiona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquia miaquenu quenaajani? Tiuquinijiona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miijiaajuhua. ¿Casaara naa quia pueya miyaquiyajaanuhua?

<sup>19</sup> Jesuuri nojori riucaaree miriqui:

—¿Masuusano pueyateeri miaajenutaniya nojori jaara queranacusaqui quia, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari. <sup>20</sup> Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiyana cutara.

<sup>21</sup> Seetanujuanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaaree. <sup>22</sup> Naajuhua, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhua niitiaa uva caacani, shoqueno. Cunora,

maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhanaj, shoquenio.

Jesuuri naa pohuataquiaariti, pueya na niishitiojonura quiarinio na niishitiojosanoori maja na naata cojitihaanu tariucuacaanu niishitiojosanota.

### Jesu pueya carojotasacari trigo samaatenu juuca

(Mt 12.1-8; Lc 6.1-5)

<sup>23</sup> Jesuuri samaatenu juuca quiojoquiaari cuhuariquiajiniaaco na saquirojosano pueyata. Na pueyari jiyacari trigo carojotanu coteequiaari na miaajenuta. <sup>24</sup> Fariseocuaca jaara na niquiquiaari, Jesu sequetureeri:

—[Quia niquiri! ¿Casaara quia saquirojosano pueya poonijiya samaatenu juucani? [Pueyaso Rupaajinia, paari priyojoshiyacujani maja samaatenu juuca pa poonijionura!

<sup>25</sup> Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiitaaquishacari na coseyaca? <sup>26</sup> Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaariiaariuhua nata quiniaa pueyara.

<sup>27</sup> Jesuuri nojori sequequiaarijihuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara. <sup>28</sup> Naaratej, pueyano cua quishacari mijiria, janiyari cumaacaraca cua Quejinijini cua sequenura casa pa miiniutianiya samaatenu juucani. Janiyacuajaari samaatenu juuca camarnuni.

### Jesu jecasacari pueyano juaashiquia cuseetucjuara joojequetano

(Mt 12.9-14; Lc 6.6-11)

**3** Jesuuri Pueyaso secojoua tiajinia tiuquiquiaariuhua na saquirojosano pueyata. Tii quiriqiaari pueyano, cuseetucjuara joojequetano juaashiquiara. <sup>2</sup> Cuniqiu quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucjuua pueyano juaashiquia jeeanutianiya samaatenu juucani?

Nojoriiri Jesuucua saquirojotanu paniriquiaa, nojuaja jaara samaatenu juuca poonijiore. <sup>3</sup> Jesuuri jiyacari sesarucjuua pueyano sequeree:

—Quia sanere. Niya quia nujuasee canaa tajinia pueya niquiara.

<sup>4</sup> Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshiyajanaa soj?

Nojoriiri sanaa niquitariquiaa saaja, Jesu sequesacari naatej. <sup>5</sup> Jesuuri na shocuaqueya nujuatiuyano pueya niquiniijiore na juaaniutia. Nojoriicua taraajeriquiaajaariuhua, cumajiuujiaaca nojori quiniucua. Majaari nojori niishiniu paniniu quiquiaari taa Pueyaso paniya pueyacuara taraajeja pa quiniuriani. Jesuuri sesarucjuua pueyano sequeree:

—[Quia juaashiquia quia shiitiore!

Na juaashiquia shiitioreeri. [Jiyacariti, na juaashiquiaari ritia jeequequee! <sup>6</sup> Fariseocuaca niquishacari naa Jesu miishanotej, nojoriiri tohuareetaquee na juaaniutia. Nojoriiri Herodes panijia pueyata pocoojoquiaari ritia, taa nojori monutaniya Jesuni.

### Queraatia pueya rerequejosacari caminia casaqueyaj

<sup>7</sup> Na nuhuaji, Jesuuri quiojoquiaari caminiajinia na saquirojosano pueyata. Queraatia pueyari na nuhuajiquiaarijuhua Galilea jiyajiniji. <sup>8</sup> Pueya niishishacari puetunu Jesu maninia miishanojinijianaa na cumaacata, queraatia pueyari nocua nijioquiaari na niquiniuria. Nojoriiri nocua nijioquiaari puetunu jiyacajinijiojuanaa: Judea jiyajinijinio pueya, Jerusalén tiacajinijinio pueyajuhua, Idumea jiyajinijinio pueyano. Nijioquiaariiaariuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhua na niquiniuria Jesu. <sup>9</sup> Nocujaji Jesuuri na saquirojosano pueya sequetucjuara:

—Niocua juhuacaritia bote cojuare quiria, cua tacajara pueyacuaji, maja pueya tanuujunura janiya.

<sup>10</sup> Jesuuri jiyacari jyanohua queraatia pueya naatanijioriquiaa. Nocujaji cusosuhuari Jesuucua riuticonetariquiaa na quianura Jesu, nojori cusonujiniji nojori naataconuhua.

<sup>11</sup> Samaruharaca pueya jaara Jesu niquitiuquiaari, nojoriiri nocua mojuquetacoquiaari. Naa nacatuquiaariiri:

—[Quiaacuajaari Pueyaso Niyanu!

<sup>12</sup> Nocujaji Jesuuri nojori sequequiaari na juaaniutia, maja nojori sequenura pueya niquiara cante nojuajani.

### Jesu saquirojosacari doce pueya na pueyajinijinio, na rupaa pohuatariquiano

(Mt 10.1-4; Lc 6.12-16)

<sup>13</sup> Na nuhuaji, Jesuuri tacaquiaari tuhananuucua. Nojuajaari tiji sequequiaari cana na paniquiaaricujani. Nocua nijioquiaariiri na jiyaniquishano pueya. <sup>14</sup> Jesuuri doce pueya saquirojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohuatanura. <sup>15</sup> Nojori niquitioree na cumaacari, cusosuhua nojori naatanijionura, samaruhua nojori tohuatejonurajuhua. <sup>16</sup> Niioori na saquirojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. <sup>17</sup> Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. <sup>18</sup> Socua quiquiaariiri Andrés, Felipe, Bar-

tolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaca pueya maanujinijinio quiquiaari. <sup>19</sup> Quiquiaarijaariuhua Judas Iscariote, Jesu quiatequiaari mosocoriquianoni.

**Judocuaca camarucua sapojosacari, Jesu samaruhua cumaaca jiitiaa**

(Mt 12.22-32; Lc 11.14-23; 12.10)

<sup>20</sup> Na nuhuaji, Jesuuri na saquirojosano pueyata tamonu tiajinia tiuquitiaquiaari tamonu tiacajinia. Querataia pueyari tiuquitiaquiaarijuhua cuno tiajinia Jesuucua. Naacuajitij, majaari nojori naata miaquenu quiquiaari. <sup>21</sup> Jesu tapueyocuaca jaara niishiquiaari naa nocuajitij, nojoriiri nocua nijioquiaari na riniuucua juucua. Tama sequetooriquiaaajarjia:

—Jesuqui tari paatecara quirijuhuanajaj!

<sup>22</sup> Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniijia Satanáscuajaari cumaaca niq-uitiorucuaa cuno pueyano. Cunora, samaruhua tohutanijia pueyajinijiiri.

<sup>23</sup> Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. <sup>24</sup> Naajuhuj, mijiria jiya jiyaniijia jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasaanutaniya. <sup>25</sup> Naajariuhuj, pueyano jaara tapueyocuacata juayonutare, majaari nojori naata jatiqui quiniu nojori tiajinia. <sup>26</sup> Niaari saniniuujia cua sequeree, janiyana Satanás cumaacata tohuatanijioquiaa samaruhuanu. Satanás jaara naa miiritij, cuno maara tari quiri na shaajasaa-nurajanaa.

<sup>27</sup> Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

<sup>28</sup> Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. <sup>29</sup> Saniniuujia, cante sesa rimiaaqueja Pueyaso Sohanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitosaanutaniya.

<sup>30</sup> Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohanu cumaacata na tohuatejosacari samaruhua.

**Jesu nucuajiniji pahuatasano, Jesu tapueyocuacajinijinio**

(Mt 12.46-50; Lc 8.19-21)

<sup>31</sup> Jiyacaritij, Jesu nucuaari tiuquijioquiaari, Jesu tapueyocuacanio. Majaari tiajiniaaco na tiuquitianu

quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoricuara. <sup>32</sup> Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pajenuyaquinia.

<sup>33</sup> Jesuuri saaja nojori sequeree:

—¿Cante cua nucuani, cua tapueyocuacajuhuj?

<sup>34</sup> Na nuhuaji, na shocuaqueya cajitiuniaa niqini-jioreeri. Sequereeri:

—Nio pueyari cua nucuana, cua tapueyocuacanio.

<sup>35</sup> Cante cua Que panishano miijiani, nojuaja cutaraari cua tarajanu, cua rimiatu, cua nucuanio.

**Miriqui pahuatasano natoojoua pueyanojiniji**

(Mt 13.1-9; Lc 8.4-8)

**4** Jesuuri socua Pueyaso rupaa niishitiojonu coteequiaariuhua caminia casaqueyaji. Jiyanohua querataia pueyari rerequeejojuaari nojori tojitianura nojuaja. Boteeri tii cuatariquiaa caminiajinia. Naacuajitij, Jesuuri botejinia tacaquiaari. Tii cajishiiri, caminia casaqueyaji rerequeejono pueya na niishitiojonura tiji. <sup>2</sup> Cuno pueya niishitiojoreeri queraatia miriqui pahuatanota. Na niishitiojosacari pueya, Jesuuri naa sequequiaaritij:

<sup>3</sup> —Nia tojitiare nio sequesano. Tamonu juuca, pueyano na cuhuariquiajinia natoojonuucua quiaquiaari. <sup>4</sup> Na jacutasacari, nucuaco totequiaariiri tajaaca. Shuhuari na mijoree. Majaari na moritianu quiquiaari. <sup>5</sup> Tajaacaari totequiaari sai tajiniaqueyaju-juhaj. Majaari cuniqui puera jiya quiniu quiquiaari na maashiniuria. Naacuajitij, najuhuana ritia moritiquiaariiri. <sup>6</sup> Pananu jaara jaquiaari, na catijiareeri. Maja puera nujuacaraca na quishacari, ritia sorequeeri. <sup>7</sup> Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiu-cuara quiquiaari saniniuujia. Naaratej, majaari na mietunu quiri. <sup>8</sup> Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaaquiaariiri treinta jajau. Tanajajiniji socua sesenta jajau, naajuhuj socua cien jajau tanajajiniji.

<sup>9</sup> Jesuuri nojori sequeree:

—Cante numaaracani, cuara cua sequesano tojiti-aara.

**Casaarate miriqui pahuatasanonni**

(Mt 13.10-17; Lc 8.9-10)

<sup>10</sup> Na nuhuaji, Jesu quishacari tamajaaja, na saquirojosano doce pueyari na nequesotaquiaari, tamasaca pueyano. Cuno pojoricuajaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pahuatasano sequenu paniyani?

<sup>11</sup> Jesuuri nojori sequeree:

—Pueyasoori nia niishitiojiya jiyasohua na miini panishano, taa na muerasu na jiitianutaniya pueyara-

caanu cutarani. Tamasacara saniniuujia, canapuate Pueyaso ruuretajacani, nojoriiriari miriqui pohu- atashiyacujua. <sup>12</sup> Naacujitij, nojoriiri cua cumaacata cua miishano niquitiquiaa pueyaracaanu najuhuanaj. Majaari nojori niishiniu na niquishano. Naajuhuj, no- jori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

**Jesu niishitiojosacari miriqui na pohuatasano natoo-  
jonajiniji**  
(Mt 13.18-23; Lc 8.11-15)

<sup>13</sup> Jesuuri nojori sequequiaarijuhuaj:

—¿Majateeri nia niishiniu miriqui cua pohuatasano? ¿Niaatucua taa niishiriquia socua tamonu cua pohu- atasanoni? <sup>14</sup> Cua pohuatasano cuhuariquiajinia natoo- jonajinijini, nojuajaari juhua Pueyaso Rupaa pohu- atana. <sup>15</sup> Noojiaqueya pueyari juhua nucuaco toteno jajau. Najuhua Pueyaso Rupaa tojiyari. Na tojiniu nuhuaji, Satanásri nimiaa. Nojuajaari puetunu Pueya- so Rupaajanaa noojiajinia natasano jaariutiaquiaa. <sup>16</sup> Tamasaca pueyari juhua noo jajau saniniuujia, sai tajiniaqueya jacutasanotej. Nojori jaara Pueyaso Ru- paa tojiri, jiyanohua na timitiaari. <sup>17</sup> Cunoori juhua se- caje nujuacaraca moritiano jajau, sai tajinia na mori- tianuucua. Majaari na rishiniu. Naajuhuj, cuno pueya jaara saniniuujishaare taraatia, jaara naquiya mi- ishaarejuhuaj Pueyaso Rupaa tojijiaa nojori quiniuu- cua, nojoriiri ritia Pueyasocua tiuuniu tarinitiaja. <sup>18</sup> Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojiyari. <sup>19</sup> Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapo- josaaquiaa puera na shuquiritiasacari mijiria casami. Nio jiya casamiicua jiaatiaquiaajaarijuhuaj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacujitij, nojoriiri juhua muetuhuo quiya. <sup>20</sup> Noojiaqueya pueya saniniuujia, nojori cu- taraari maninia tojtiaja Pueyaso Rupaa. Cuno pueyari juhua cuhuariquiajinia natau, queraatia muetujua, maninia jiyajinia natasano. Cuno maninia nataujinijini- ion, noojiaqueyari maja puera na muetunu. Tarajanu- uri maninia muetuna. Naajuhuj, tarajanuuri jiyanohua queraatia muetujua. Naajuhuj, cante Pueyaso Rupaa tojijia cutarani, nojuajaari juhua maninia muetujua natau.

**Pueyaso muerasuuri juhua samari**  
(Lc 8.16-18)

<sup>21</sup> Jesuuri nojori sequerejuhuaj:

—¿Samaritutiiri noshitishano, conatu cariquiaco jamotasocoriquiano, maquetu cariquiacojuhuaj? Maja. Samaritui jaara noshitishaare, morijiuucua moro- tashiyari, tiajiniaaco na cuhuatanura maninia. <sup>22</sup> Naa- juhuaj, jiyasohua nia miishanoori puetunujuanaa ni- ishishaanutaniya. Cua pohuatasanoori juhua samari- tiu, puetunu pueya jiuujiajanaa na cuhuatanura. Naa-

juhuaj, Pueyaso Rupaa jaara nioojiajinia jamosaare, juhua muetunutanitari puetunu pueya niquishocoriquianojuanaa. <sup>23</sup> Niajaniya, canapuate nu- maa jitiiani, nia tojitiare cua pohuatasano.

<sup>24</sup> Jesuuri naa nojori sequequiaarijuhuaj:

—Nia niishiri nia tojishano. Nia shanacutajataja, teyanota nia shanacujuquiaa nia niquitioso- coriquianocujani, Pueyasoori cunotaja niaara shana- cunutanijuhuj. Naacujitij, niaa jaara capora quiriqiaa tamasaacata, Pueyasoori socua capora quiniu- tianiya niaarajuhuj. <sup>25</sup> Cante na rupaa tojijiani, socua na niishitiojonutanitari. Saniniuujia, canapuate na ru- paa tojtiaaquiyan, secaja na niishishanoori puetunu jaariutiasaanutanijajanaa.

**Miriqui pohuatasano natau moritianojiniji**

<sup>26</sup> Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jitiiasano nojori quiniuria. Ta- monu pueyanoori na cuhuariquiajinia nataquiaari ja- jau. Na nuhuaji, majaari na tacatenu quiquiaariuhua pueyaracaanu na natasano na niquiniuria. <sup>27</sup> Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacate- sacariuhua na natasano na niquiniuria, tariucua puereetuucari quiquiaari. Majaari na camaru ni- ishiniu quiquiaari taa na moritiareeni. <sup>28</sup> Jiyari tamajaa- ja moritianiatau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapiiaacara quimiam na noshiniuria. <sup>29</sup> Na natau jaara noshimia, na senonaari na senoojua na racat- asocoriquiano. Pueyaso muerasuuri naa miishaanu- tianijuhuj.

**Miriqui pohuatasano mostaza jajaujiniji**  
(Mt 13.31-32; Lc 13.18-19)

<sup>30</sup> Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniuujiniuni, taa Pueyaso Rupaa poonijia pueya jiuujiajiniani? Quiarijia nia po- huatareeraj. <sup>31</sup> Pueyaso Rupaari pueya jiuujiajinia quiya juhua mostaza jajau. Mostaza jajauri jiyanohua socua shiitianiyojua puetunu tamasaacata jajaujiniji- jianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiu- ushacari. <sup>32</sup> Mostaza jajau jaara natasaaare, maashiyari socua puereetuucara tamasaacata nataujiniji. Na cashacucuaari maashiya puereetucucua. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhuj, na jataniniuria na tojijia, maninia mijia na quiniuria.



**Jesu niishitiojosacari pueya saa na miriqui pohu-  
atasanotaja**  
(Mt 13.34-35)

<sup>33</sup> Jesuuri naa queraatia miriqui pohuatasanota ni-  
ishitiojoquiaari Pueyaso rupaa saaja pueya niishishano  
casaata. Majaari socua jiyajeneta casaa na pohuatanu  
quiquiaari. <sup>34</sup> Naacuajitij, nojuaja jaara casaa niishitio-  
jonu paniquiaari pueya niquiara, nojuajaari puetunu-  
juanaa naa niishitiojoquiaari miriqui na pohuatasano-  
ta. Tamajaaja nojori quishacari saniniuujia, Jesuuri na  
saquirojosano pueya niishitiojoquiaari maatia, casaa  
miriqui na pohuatasano sequenu paniriquiaani.

**Jesu pueyajetesacari paratu, mohuaca cajiniuucua-  
nuno**  
(Mt 8.23-27; Lc 8.22-25)

<sup>35</sup> Cuno juuca jaara niniquiaari, Jesuuri na saquiro-  
josano pueya sequequiaari:

—Camina taquijiria pa quiaare.

<sup>36</sup> Cuniqijia pueya tiujiatiuyareeri, nojori quianura  
caminia taquijiria. Na pueyari Jesuta quiojiyaree cuno  
botejiniaja, tee nojuaja quiriqiaacuajani. Jesu  
quiasacari caminia taquijiria, tamasaca boteeri nata  
jaatequetariqiaajuhua. <sup>37</sup> Maja puera na quenaacoy-  
aquishacarijia, maruuri paratuta canashiyaquiji  
jiyanohua niquiaari nojoriicua nojori niuutiasacari.  
Paratuuri jiyanoahua cajiniuucuatequiaari mohuaca no-  
jori botejiniaacumara. Nocuaji na boteeri tari quera  
tiuquitiariquiaa mohuacata. <sup>38</sup> Jesuuri jiyacari bote pa-  
jamaji maqueriquiaa juhuajaniya. Na nacaacuaji mata-  
ja caco maqueriquiaari. Na pueya niucujatusacari no-  
juaja, Jesu sequetureeri:

—Niishitiojonanaa!, ¿majateeri quia puerenuujua  
paa tari tiuquitiaareeni?

<sup>39</sup> Jesuuri sanemaa. Paratu sequereeri, caminianio:

—Quia suraajere! ¶Tariucuaaja!

Paratuuri tajimiohua. Caminiaari pootia maquee.

<sup>40</sup> Jesuuri na saquirojosano pueya sequereeri:

—¿Casaara nia puereya puerani? ¿Niaateeri Pueya-  
soocua tiuyashijiaa quiyajaaruhaaj?

<sup>41</sup> Nojoriiri jiyanoahua shiriqitiurii. Tama nojorijaari-  
jia sequetooquiaari:

—¿Cantejaaranononi? ¶Paratu, caminiaari na tojirii!

**Gerasa jiyajininio samaruhuaraca pueyanonijiji pohu-  
atasano**  
(Mt 8.28-34; Lc 8.26-39)

**5** Na nuhuaji, nojoriiri caminia taquijiria tiuquijio-  
quiaari, Gerasa jiyajinia. <sup>2</sup> Jesu tacasacari botejiniji,  
nocua niquiaariiri tamonu pueyano raacajiniji, ma-  
cunucua nuchua paaquiosaquiji. Cuno pueyanoori  
samaruraca quiquiaari. <sup>3</sup> Raacajinia quijia quiquiaariiri.  
Majaari na naata moronu quishaaquiaari quenaaja  
cumayocua shipinishano casaata. <sup>4</sup> Pueyari juucua na  
morojojua, na cashacucua, na juaashiquiacanio. Saaja  
na turojotajaari. Majaari quenaaja na nujuataja  
pueyano quiniu quijia. <sup>5</sup> Pueyaracaanu tuhua-

nanuhuacua rucuanajoquiaariiri, raacajinianio. Na ru-  
cuanejosacari sariyacojojaari, juuca, niucuanio. Tama  
na cuaqueyajaaja piqijia saitiaari. <sup>6</sup> Nojuaja jaara Jesu  
niquiquiaari tucuacaanuji, nocua netequiaariiri. Jesu  
cariquimiaji mojoquetaseeri. <sup>7</sup> Jesuucuaa nacareeri:

—¿Casaacua miji quia niyani, Jesunaa, jiyocuacaanu  
Quijia Pueyaso Niyanunaa? [Quia secojiyanijia maja  
naquiya quia miiniuria janiya!

<sup>8</sup> Samaruhuaraca pueyanoori naa sequereeri Jesutej,  
tari Jesu sequenuucua samaru nojuajiniji na tohuata-  
nura.

<sup>9</sup> Jesuuri na nequesotaree:

—¿Taa sesanaacatequia?

Na riucaareeri:

—Canaa jiyanoahua queraatiani, cunora cua sesa  
“Queraatia”.

<sup>10</sup> Cuno samaruuri jiyanoahua Jesu secojoriquiaa maja  
nojori na taanuunura cuno jiyajiniji. <sup>11</sup> Cushiyari jiyacari  
cateca naataja miaquenuuriquiaa tuhuananucari.  
Jiyanoahua queraatia cushiyari quiriqiaa.

<sup>12</sup> Samaruhuari Jesu secojoree naatej:

—[Canaa quia jiyarore canaa tiuquitianura cuno  
cushiyacua!

<sup>13</sup> Jesuuri samaruhua jiyaroree. Samaruhuari  
pueyanonijiji tohuareetaquee. Cushiyacua tiuquiti-  
aseeri. Dos mil cushiya naasucuaari quiriqiaa. Cuno  
cushiyari cocuatequiaari, samaruhuaraca nojori quini-  
uucua. Tacobiniji totesee caminiajiniaari. Puetunujua-  
naari tii shushiniuquiaari.

<sup>14</sup> Cushiya cojuanaari jiyacari netecuaturuhua na  
shiriqiniutia. Na tiacajinia pueya poojotanuuhua  
nojori niquishanoori, cuhuariquiacajinia quiniaa  
pueyano. Nocuaji pueyari nijioquiaari nojori niquini-  
uria casaate quiquiaari. <sup>15</sup> Cuno pueya jaara tiuqui-  
ijioquiaari Jesu quishaqui, cuno tarijia samaruhuaraca  
quijia pueyano niquitiushiiri panaatia cajiyano, toquer-  
aca. Naa nojori niquishacari nojuajatej, pueyari puere-  
tuquiaari. <sup>16</sup> Jesu miishano niquitiuniaari cuno pueya  
pohuataquiaari taa samaruhuaraca pueyano miishaa-  
reeni, mariyata cushiyajininio. <sup>17</sup> Cunora, cuno  
pueyari Jesu secoteree na quianuhua cuniqijiji, no-  
jori jiyajiniji.

<sup>18</sup> Jesu jaara tacaquiaariuhua na botejinia, cuno tari-  
jia samaruhuaraca quijia pueyanoori nata quianu  
paniquiaari juucua. <sup>19</sup> Majaari Jesu paniniu quiquiaari.  
Na sequereeri saajaari:

—Quia quiaarohua quia tiacajinia quia pueyacua. Quia  
pohuatasuhua nojori taa Pueyaso miirii quiajaniani,  
quiocua na taraajenuucua.

<sup>20</sup> Pueyanoori quiaarohua. Nojuajaari pohuatanu co-  
teequiaari cuno na jiya diez tiacajinia taa Jesu mi-  
iquiaari maninia nojuajani. Puetunu pueyajanaari jiuu-  
jiatequiaari nojori tojishacari nojuaja. Cuno diez tiaca  
sesa quiquiaari “Decápolis”.

Jairo niyatujiniji pohnatasano, Jesu toque quiana maa-  
jijiniijiuhuaj  
(Mt 9.18-26; Lc 8.40-56)

<sup>21</sup> Jesu jaara niuutiaquiaariuhua botejinia caminia taquijiriohua, queraatia pueyari nocua tiuquiiioquiaari na quishaqui. <sup>22</sup> Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojovia tia jiyaniijia. Na sesa quiquiaari Jairo. Jaara Jesu niuquiquiaari, na cariquimijaji mojuquetaseeri. <sup>23</sup> Naa Jesu secojoree jiyanoahuari:

—[Quiyatu quera cusoya! [Miji, quia juaashiquia nocua quia niaquee na naatanuhua!

<sup>24</sup> Jesuuri jiyacari nata quiaaree, na saquiriojosano pueyano. Puera jiyanohua queraatia pueyari na nuhuajiriquiaa. Jesu tanuujuturiquiaari. <sup>25</sup> Cuno pueya tajinia quiriquiaaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. <sup>26</sup> Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuana na cumaneeca puecaquiaariiri na naarajosaa-nura juucua. <sup>27</sup> Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiaasee pueya tajiniaari. <sup>28</sup> Cuno maajiiri tama sequequiaarijiaaja: “Janiya jaara quenaaja na toque quiaareni, janiyari naatanutaniuhua!” <sup>29</sup> Naacuajitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaarijia: “[Cua cusonu tari tajiyatemaa!” <sup>30</sup> Jesuuri jiyacari niishiquii nojuaja na cumaacata cusosu naatanirii. Cunora, nojuajaari tacareecuaree na niquniuria pueya. Pueya nequesotareeri:

—¿Cante cua toque quiaareni?

<sup>31</sup> Na saquiriojosano pueyari na sequeree:

—Quiaacuajaari queraatia pueya niquniya quia tanuujiyano. Quiaari najuhua nequesotaariquiohua saajujuaj: “¿Cante cua quiaareni?”

<sup>32</sup> Jesuuri saaja na shocuaqueya niquniijiriquiaa, na niquniuria cante na toque quiaareni. <sup>33</sup> Maajiiri jiyacari tetecariquiaa na puerenuta. Jesu cariquimijaji mojuquetasee ritiaari. Nojuajaari niishiquiaari Jesu cumaacata na naataniriohua. Cunora, Jesu sequere puetunu seetanujuaari. <sup>34</sup> Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhuaaniya quia quiaarohua. Quia cusonucua tari tajiyatemohua quicuajaji.

<sup>35</sup> Jesuuri cuno maajiicua pocuariquiaajaa pueya tiuquiiiosacari Jairo tajiniji. Cuno pojoriiri maaji samiriu que sequetusee:

—[Quia niyatu tari cusoquee! Maja najuhua Niishitiojona riniu quia tajiniara.

<sup>36</sup> Jesuuri nojori sequesano tojirii. Naaratej, maaji samiriu que sequereeri:

—[Maja puerenu! [Cucua quia tiuuri saaja!

<sup>37</sup> Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. <sup>38</sup> Nojori jaara

tiuquiiioquiaari Jairo tajinia, pueya niqunishii nujuquetiuyanoori, sariyocuatuyanoonio. <sup>39</sup> Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

<sup>40</sup> Pueyari saaja Jesu saroojotaquiaari nojuaja na rerequetenuta, naa nojori na sequenuucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajonio, cuniqui tii nata qutiuriquiaani. <sup>41</sup> Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “[Maaji samiriu-niaa, quia sequeyanijia, quia sanere!”

<sup>42</sup> Jiyacaritij, maaji samiriuuri ritia sanequee. Juhua-catecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niqunishacari naa Jesu miishanotej, nojoriiri jiyanohua jiuujiatequiaari. <sup>43</sup> Jesuuri jiyanohua nojori rootaree maja nojori pohnatanura pueya niquniaria na miishano. Saaja sequere cutaraari maaji samiriu cuaara mianuutesaaria.

### Jesu quishacari Nazaret tiacajinia

(Mt 13.53-58; Lc 4.16-30)

**6** Jesuuri cuniquiji quiaquiaariuhua tama na jiyajin-  
iohuajaaja. Na saquiriojosano pueyari nata quio-  
joquiaarijiuhua. <sup>2</sup> Jaara quiquiaari samaatenu juuca, Jesuuri tii niishitiojonu coteequiaari Pueyaso secojovia  
tjajinia. Queraatia pueyari na tojitiariquiaa. Nojoriiri ji-  
uujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacano, jiyajeneta miishano na miiniuriani? <sup>3</sup> Nojuacuajaari suruhuatujiniji casaa shipinijona tjajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simón-nio. Na rimiatuhuari niya quiyajujuaj pa tiacajiniani.

Cunora, majaari nojori tojtianu paniniu quiquiaari Jesu. <sup>4</sup> Naaratej, Jesuuri nojori sequeree:

—Pueyari tiqiyocua Pueyaso sequenu panishano caminiujinunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajujuaj, tama na tjajinia quiniaajaajonio.

<sup>5</sup> Naacuajitij, nocua nojori tiyuaquiniucua, majaari na naata na cumaacata na miiniu quiquiaari. Saaja se-caja cusosuhucua niojoquiaari na juaashiquiaari, nojori na naatanijionura. <sup>6</sup> Jesuuri jiuujiatequiaari nojori tiyuaquishacari nocua. Na nuhuaji, Jesuuri rucuanajoquiaari pueya na niishitiojonura, queraatia shiitianiyojua tiacajinia catecaja na tiaca shocua.

**Jesu jiyaramiquishacari na saquiriojosano pueya  
Pueyaso rupaa pohuatanura**  
(Mt 10.5-15; Lc 9.1-6)

<sup>7</sup> Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niquitiooree na cumaacaari samaruhua nojori tohutanijionura pueyajini. <sup>8</sup> Nojori sequereeri maja nojori panura nojori panishano, saaja nojori miojotu cutara. Nojori sequereejariuhuj, maja nojori panura caashoque, coseyaca, cumaneecanio. <sup>9</sup> Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. <sup>10</sup> Nojori sequereejariuhuj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia.

<sup>11</sup> Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijihuaj, niocua cuniquiji quiaare. Niocua nia niohuacaacujaji jiya jooocua piitiare nojori niquiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniuucua.

<sup>12</sup> Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuuquiaari pueya tacatonuhua nojori jiuujia Pueyasooocua.

<sup>13</sup> Nojoriiri queraatia samaruhua tohutanijioquiaari. Naajuhuj, nojoriiri cusosuhua tarooquiaari naana jajau shiyocua, nojori naatanijosacari queraatia pueya.

**Tiuquinijiona Juan mosacari**  
(Mt 14.1-12; Lc 9.7-9)

<sup>14</sup> Jesu miishanojinijiri caminiujiushaaquiaari puetunu cuno jiyajinijanaa. Naacujitij, Galilea jiya jiyaniijia Herodesri Jesujiniji pohuatasaaquiarjihuaj. Herodesri cunora sequequiaari:

—Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiyajeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniuucua. <sup>15</sup> Tamasaca pueyari Jesujiniji sequequiaari tamaatia saniniujia, nojori jiyajenesacarijihuaj. Naa sequetuquiaariiri:

—Nojuacuajaari tariucuaaanu pueyara Pueyaso sequesano caminiujunia Elías!

Tamasaca pueyari saniniujia naa sequequiaari, nojori jiyajenesacarijihuaj:

—Nojuacuajaari quiarjia nio pa quishacari Pueyaso sequesano caminiujunia pajaniyara, juhua tariucuaaanu pueyara Pueyaso sequesano caminiujuniajuhuaj.

<sup>16</sup> Herodes jaara pueya sequesano tojiqiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohuacuaaquiiri.

<sup>17</sup> Tiuquinijiona Juan moyaquishacarijia, nojuajaari Herodías rupaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. <sup>18</sup> Nocujaji, Tiuquinijiona Juanri Herodes nacasujujua. Naa na sequejaari:

—Pueyasora, majaari maninia quia jitianura quia tarajanu niquiocua!

<sup>19</sup> Cunora, cuno maaji Herodíasri maja na niquiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. <sup>20</sup> Herodesri Tiuquinijiona Juan puereja. Nojuajaari niishiquiaari Tiuquinijiona Juanri maninia pueyano, Pueyaso tojjia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojinu maniniucua. Nojuajaari saaja noojia niquijitoteja quiquiaari. Majaari na niishiniu quijia taa na miiniutianiyani. <sup>21</sup> Saniniujia, cuno maaji Herodíasri pueyaracaanu niishiriojoriquiaa, Tiuquinijiona Juan na motenura. Jiyacarij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajiniujio jiyaniijianucua masuuquiaari, tama na soldadohua jiyaniijianucuaajaanio. <sup>22</sup> Jiyacarij, Herodíasri niyatuuri tiuquiquiaari queranacusaqui, tii na nianujunura puetunu pueya niquiarajanaa. Herodesri niyacoo nianujunu shuquiritiaquiaari jiyanohua. Nata miaque-naa pueyari jiyanohua na shuquiritiaquiaarijihuaj. Naaratej, jiyaniijia Herodesri niyacoo sequereeri:

—Cua masere quia panishano. Janiyacua quia niquitiooreni.

<sup>23</sup> Herodesri socua puetunu pueya niquiarajanaa na sequerohuacuhuj:

—Seetanujuanaa quia sequeyanijia, maja cua sapojonu! Janiyari quia niquitionutaniya quia masesanoni. Quiaa jaara cua masere cua jitianano cajiniocua, naajaa, janiyari quia niquitionutaniyani.

<sup>24</sup> Niyacoori tohuataquee na nucua Herodías na nequesotanura. Na sequeseeeri:

—Cua nucuaanaa, ¿casaa cua masenutaniya cua quenuni?

Na nucuaari na sequeseeeri:

—Quia masere Tiuquinijiona Juan naca!

<sup>25</sup> Cuno niyacoori ritia tiuquiquihua jiyaniijia Herodes quishaqui. Na sequeseeeri:

—Quiarjia cua niquitioore Tiuquinijiona Juan naca miacojuajinia!

<sup>26</sup> Naa jiyaniijia Herodes tojishacarij, jiyanohua taraajequeeri. Naajaa, seetanujuanaa na sequenuucua na masusano pueya niquiara, majaari tari na naata ruuretanu quiquiaari cuno niyacoo masesano.

<sup>27</sup> Naaratej, jiyaniijiaari ritia jiyaree na soldado, Juan naca na niquitionura cuno niyacoo. <sup>28</sup> Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na

niquitiosuhua. Nojuajaari na nucua na niquitiose saniniuujia.

<sup>29</sup> Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.

### Jesu mianuutesacari cinco mil pueya

(Mt 14.13-21; Lc 9.10-17; Jn 6.1-14)

<sup>30</sup> Jesu jiyaramiquishano pueyari tiuquiijoquiaariuhua Jesuucua nojori rucuanefonu nuhuaji Pueyaso rupaa nojori pohuatanura. Nojoriiri Jesu pohuataquiaari puetunu nojori miitushanojuanaa, nojori niishitiojosanojinijinio. <sup>31</sup> Na nuhuaji, Jesuuri nojori sequeree:

—Miji, pueya quiyaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoricua nijioriquiaa. Tamasacaari quiojoriquiohuacuaa. Tamasacaari saniniuujia shusha tiuquiijoriquiaacujua. Naaratej, majaari jeya nojori quiniu quiquiaari na mi-aquenura quenaaja. <sup>32</sup> Jiyacaritij, Jesuuri saaja na jiyaramiquishano pueyata quiaquiaari botejinia, pueya quiyaquishaqui. <sup>33</sup> Queraatia pueyari saaja nojori niq-uitiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquico tiacajinijianaa pueyari netecuatuquiaari. Nojoriiri Jesuucuaaji cutesee. <sup>34</sup> Jesu rosesacari botejiniji, saaja queraatia pueya niquiriiri. Nojori na niquishacari, cuno pojoricua taraajequiaariiri. Nojoriiri juhua cojuanaaju borreghua quiriqiaa. Naaratej, Jesuuri nojori niishitiojonu coteeree queraatia casaa Pueyasojiniji. <sup>35</sup> Jaara quiquiaari tari tenacari, na saquiriojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. <sup>36</sup> Pueya quia sequere, nojori cuaara quiojoora cateca naataja tiacajinia, na miaquesocoriquiano nojori masenura tii.

<sup>37</sup> Jesuuri nojori riucaaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririjanaa? ¡Pa mi-anuutenura nojori, panishiyari dosciento cumaneecal! Majaari pa jiitiano.

<sup>38</sup> Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuhuari:

—Cinco pan quiya, caapiqui sapitiaajanio.

<sup>39</sup> Jesuuri jiyacari na pueya sequeree nojori cajitijonura pueya jiyasocujania, na mianuutesocoriquiano. <sup>40</sup> Pueyari cajitiurii cien, tamocora cincuenta, tamaqui socua cien, camiria cincuenta. Pueyari naa queraatia maapuera saquiriojotasaaree nojori mianuutesaanura. <sup>41</sup> Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na seconura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. <sup>42</sup> Puetunu pueyajanaari

maninia miaquenuquiaari. Maninia tooquioreejaariuhuj. <sup>43</sup> Na nuhuaji, doce canaasatuuri mishini-jiosaaquiaari pan raacuata, sapitiaaja raquiquiatanio. <sup>44</sup> Cinco mil pueyari cuno panjiniji miaquenuunaa quiquiaari.

### Mohuaca caco Jesu rucuanenujiniji pohuatasano

(Mt 14.22-27; Jn 6.16-21)

<sup>45</sup> Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajinohua. <sup>46</sup> Pueya jaara tari quiojoquiaariuhua, Jesuuri tuhananuucua tacaquiaari tii na seconura na Que Pueyaso. <sup>47</sup> Jaara niquiaari, boteeri tari caminia jiuujiajinia jaaretariquiaa. Jesuuri juhuanajuaja na ja-teesaqui quiriqiaajaa. <sup>48</sup> Jesuuri nojori niquiquiaari najuhua juaarioconuyano. Majaari nojori naata jaaretanu quiriqiaa, puera paratu piyarojosacari nojoriicuaara. Quera juhuaquenu panishacari, Jesuuri nojori rupesee. Mohuaca caco canujuriquiaari. Quera nojori tajiriquiaari. <sup>49</sup> Nojori jaara na niquitiuquiaari mohuaca caco canujiano, nojoriiri na jyanitiuquiaari samaru. Nocuaji sariyocatureeri. <sup>50</sup> Puetunu nojorijianaari na niquitiurii. Shiriiquitiurii. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajaniija.

<sup>51</sup> Botejinia tacasee nojoriicuaari. Paratuuri jiyacari pueyajequee. Nojoriiri na shootiariquiaa tacuriitia, jiyanohua na jiuujiatenuta. <sup>52</sup> Nojoriiri juhuanajuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiaari juhua ninishiqui quiquiaariija.

### Jesu naatanijosacari cusosuhua Genesaret jiyajinia

(Mt 14.34-36)

<sup>53</sup> Jesuuri na pueyata caminia niuutiaquiaari. Tiuquijioseeri Genesaret jiyajinia. Nojoriiri tii morotasee na bote. <sup>54</sup> Nojori jaara tohuareetaquiaari botejiniji, cuniquijinio pueyari ritia Jesu niishiquiaari. <sup>55</sup> Pueyari jiyacari netecuatuquiaari, Jesujiniji nojori pohuatanura puetunu cuno jiyajinijanaa. Cusosuhuari juhucatecara patootasaaquiaari na matucuajinia tee Jesu quiriqiaa na rucuanijosacari nojori jiyajiniacuajani. <sup>56</sup> Tiquiyocua Jesu rucuanijosacari, cusosuhuari nocuaji niojotasaquiaari nucuaco, tuhuaqui tiacajinia, queraatia shiitaniyojua tiacajinijuhua, cuhuariquiacajinianio. Pueyari Jesu seconura cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaariuhua.

### Casaate sesoriquiara pa jiyateja Pueyasarani

(Mt 15.1-20)

**7** Jesuucua catecanoquiaariiri Fariseocuaca, Moisés Rootasanojiniji niishitiojonaanio, canapuate Jerusalén tiacajiniji nijioquiaaricuajani. <sup>2</sup> Cuno pojori

quishacari tii, nojoriiri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyanjia, nojori rucuanijosacari sesa miijiaa pueya tajinia, sesa nojori quiniu na naata nojoriicua pacunu. Nojoriiri cunora shuquitianu jitiqiaaari, nojori jiyani- ishacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. <sup>3</sup> Cuno Fariseocuaca, puetunu narta Judiocuacajanaanio, no- joriiri maja na cartenu quijia tariucuacaanu nojori supuetanaa niishitiojosano. Naaratej, majaari nojori miaquenu quijia shuquitioo. <sup>4</sup> Naacujitij, nojori jaara miaquesano niquitiojosaquiji tacatequiouhua, majaari nojori miaquenu shuquitioojua. Socua queraatia qui- yari cuno pojori niishishano. Naacujitij, nojoriiri jiyaniquiaa, sesa nojori quiyaquiniucuaaji Pueyaso niquiara, nojori cuaara na ratujua jeequejoora, pataco, coshi, na maquetucuanio. <sup>5</sup> Naaratej, Fariseocuaca, Moisés Rootasanoinijii niishitiojonaanio, nojoriiri Jesu nequesotaquiaari:

—¿Casaara quia pueya tojtiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

<sup>6</sup> Jesuuri cuno pojori riucaaree:

—[Niaari sapuenu juhua maninia pueya niquishano! [Niaacuajaari seetanujuanaa sesa miijiaa! Pueyaso se- quesano caminiujunia Isaíasri maninia sequequiaari nijajaniyajinjicuaaja, naa na naajiotasacari Pueyaso se- quesano:

“Nio pueyari saaja na rupaata shuquiritiaa janiya. No- jori jiuujiaari saniniujia tucuacaanu quiya janiyajiniji. <sup>7</sup> Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. No- jori niishitiojosanoni, cunoori tama pueya niishitio- josanojuaaja, maja cua sequesano”.

<sup>8</sup> Niaari cua pueya pocuariquiaa. ¿Niajanijariuhujaj? ¿Casaara Pueyaso sequesano nia tojijaquiquiaanijia? Niaacuajaari Pueyaso sequesano tojijaquiya, tama nia supuetanaa niishishanojuaaja nia miiniuria najuhua- naj.

<sup>9</sup> Jesuuri socua naa sequequiaari cuno pojoritij:

—Tama nia miiniu jiiitishanoocua nia miiniurijaaja, [niaari Pueyaso sequesano shocortaa saaja! <sup>10</sup> Moisés- cuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuaara mosaaria”. <sup>11</sup> Niaari sequeya saniniujia, maniniacuaja, pueyano jaara na que, na nucua sequere: “Maja cua naata naacutanu nijajaniya cua casamitia. Janiya tari Pueyasora jiyateere puetunu cua jiiitiasanojuanaani”. <sup>12</sup> Niaari sequequiaajuhujaj, pueyano jaara naa se- queretej, maniniacuaja maja na naacutanura na que, na nucuanio. <sup>13</sup> Naacujitij, niaari Pueyaso sequesano shocortaa saaja, tama nia niishishanojuaaja nia miini- uria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miiquiaa juhua cunouhujaj.

<sup>14</sup> Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu nijajaniyajanaa, maninia nia niishiniuria. <sup>15</sup> Casaa pa miaqueyani, Pueyasora naa- jaa. Cunoori maja na naata pueyano jiyatenu sesa mi- ijiara. Poojiajinia pa niishiriojosano cutaraari sesara pa jiyateya Pueyasora. <sup>16</sup> Cante numaaracani, nojuaja cuaara tojtiaara cua sequesano.

<sup>17</sup> Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. <sup>18</sup> Jesuuri nojori sequeree:

—¿Niaateeri cua sequesano niishiyaquiyajuhujaj? ¿Majateeri nia niishiniu? Puetunu pa jiniacuma tiuquiji- ajanaani, cunoori maja na jiyatenu sesa miijiaa pa- janiya. <sup>19</sup> Pa miasanoni, majaari na tiuquiniu poojia- jinia, saaja pa seecojinia mishiya cutaraari. Na nuhuaji pocoma tajiyari pa marecuhucuma.

Nio sequesano, pueya niishitiojoriquiaari, puetunu miaquesanojuanaari maniniacuaja pa miaqueso- coriquiano. Maja cutaraari na naata na jiyatenu pa- janiya juhua curuutuucara Pueyasora. <sup>20</sup> Jesuuri se- quereejuhujaj:

—Pueyano niishiriojosano sesa noojiajiniani, cuno cutaraari sesara na jiyatequiaa. <sup>21</sup> Pueyano jiuujiajiniji supueya cutaraari sesa niishiriojosano, sesa na miini- uria. Naacujitij, pueyanoori na camishoo maajipohua numuetucujua, seya numuetucujuaajuhujaj. Tamonu pueyano casami nohuasejoquiaari. Pueya moquiaa- jaariuhujaj. <sup>22</sup> Narta pueyano niquiocua numuetu- cuquiaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu ji- itishanota. Narta pueyano miananajoquiaari. Tamonu- ucuaara tonujuquiaari. Naajuhujaj, saaja tama na cuaqueyajaaja shuquiritiaa quiquiaari. Juhujaniya sesa miiquiaajaariuhujaj, moseeca na quiniucua.

<sup>23</sup> Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaa pueya jiyate- ja Pueyaso niquiara.

### Taatu tiuushacari Jesuucua

(Mt 15.21-28)

<sup>24</sup> Jesuuri cuniquiji quiaaree Tiro tiaca shocua jija- jiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. <sup>25</sup> Tamonu maajiiri ritia Jesujiniji niishiquiaari. Neyatu- uri samaruraca quiriquiaa. Naaratej, maajiiri Jesuucua niquiaari. Na cariquimiaji mojuquetaseeri. <sup>26</sup> Cuno maajiiri Sirofenicia jiyajinijinio taatu quijia. Jesu seco- joseeri samaru na tohuataniniuria neyatujiniji. <sup>27</sup> Jesu- uri maaji sequeree miriqui:

—Quia tarinitiare, muerasu cuaara coteenu miaque- nuura. Majaari maninia muerasu pa jaariutianura na miaquesano, sareyacari jatasocoriquiano.

<sup>28</sup> Maajiiri Jesu riucaaree:

—Jaa, Jiyaniijanaa. Naajaa, sareyacuajaari miaqueja cariquiacoji tatucuaja, muerasu totinijosano miaquesano shiriya.

<sup>29</sup> Jesuuri na sequeree:

—[Quiaacuaja maninia cua riucuaaree! Quia tacateyarohua. Samarucuajaari tari tohuataree quia niyatujiniji.

<sup>30</sup> Maaji tiuquishacariuhua na tiajiniohua, neyatu ruriatasuhuari na maquetujinia mataano. Samaruuri tari tohuatano quiriquiaa nocuaji.

### Jesu jecasacari numueeju, tiquia pueyano

<sup>31</sup> Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. <sup>32</sup> Tii na quishacari, nocua jaatucusaquiaariiri numueeju, tiquia pueyano. Na jaatucunaari Jesu secojotucuaari na juaashiquia na nianura nocua, na jeeanura cuno pueyano. <sup>33</sup> Jesuuri pueyano numueeju jaatucuree tamocora pueyacuaji. Na numama shirii na juaashiquiaari. Na nuhuaji, tama na juaashiquiajiniaaja riocoreeri. Na riacau cojuata pocuaashijia niti quiareeri. <sup>34</sup> Jiyacaritij, jiyocuaaanu maureeri. Noojia niareeri. Na nuhuaji, cusosu numaa sequereeri:

—[Efata!

Nioori pueyano rupaajinia sequeya: “[Quia riatere!”

<sup>35</sup> Jiyacaritij, numueeju numaari riatequequee. Na niitiiri jeequequeejuhuj. Ritia pocuaquee maniniaari.

<sup>36</sup> Jesuuri cuno pojori rootaree maja nojori pohuatanura na jecasano pueyanojiniji tamasaca niqiuara. Nojoriiri saaja tiqiyocua pohuatanuuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. <sup>37</sup> Pueyari jiyanohua jiuujiatequiaari Jesu miishano na niqitiushacari. Tama nojoriijaarijia sequetooquiaari:

—[Puetunujuanaa miya maniniaari! Numueejunucua jiyateya tojtiajacaraari. Tiquianucua pohuateyajaariuhuj.

### Jesu mianuutesacari cuatro mil pueya

(Mt 15.32-39)

**8** Jiyacaritij, jiyanohua queraatia pueyari rerejoquiaari Jesu na tojtianura. Majaari nojori jiiitanu quiquiaari casaa quenaaja na miaquetusocoriquiano. Jesuuri na saquirojosano pueya piirii. Nojori sequereeri:

<sup>2</sup> —Nio pueyacuata taraajeyanijia. Nojori tari jiuujinaraca juuca quiya niya cuata. Majaari quenaaja nojori jiiiatunu miaquesano. <sup>3</sup> Janiya jaara nojori jiyaramiquiriohua na tiajinia miaqueyojuani, nucuaco cusojoniyarohuacua. Noojiaqueya nojorijinijinoori niyara nijiorucuaa tucuaaanuji.

<sup>4</sup> Na saquirojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

<sup>5</sup> Jesuuri nojori nequesotaree:

—¿Taa pan nia jiiitaani?

Nojoriiri na sequeree:

—Nareja siete.

<sup>6</sup> Jesuuri na pueya sequeree, nojori cuaara sequereera puetunu pueyanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquirojosano pueyara na neecasereeri. Nojoriiri saniniuuja pueya na serotaree puetunujuanaa. <sup>7</sup> Secaja sapitiaaja jiiiatuquiquiaaariuhuj. Jesuuri socua nocuara secojorohuacuahuaj. Na nuhuaji, na pueya sequereeri nojori niqitiojonura pueya. <sup>8</sup> Puetunu pueyanaari maninia miaquenuuree. Tooquioreejaariuhuj. Miaquesano cureenota mishinijosaaquiaariiri siete canaasatu. <sup>9</sup> Na miaque-naa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhua. <sup>10</sup> Na nuhuaji, Jesuuri botejinia tacataquiaari na saquirojosano pueyata. Quiaareeri Dalmanuta jiyajiniara.

### Fariseocuaca niqiniu panishacari Jesu miishano Pueyaso cumaacata

(Mt 16.1-4; Lc 12.54-56)

<sup>11</sup> Fariseocuacaari Jesuucua tiuquijioosee. Nata juayonuutaseeri. Nojori saniniujuniuria Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequetere, nojori niishiniuria Jesute seetanujuanaa Pueyaso Jiyarosano. <sup>12</sup> Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu quiniutianiya nijaniya cua cumaacata cua miishano.

<sup>13</sup> Jiyacaritij, cuno pojori tiujiaqueeri. Na pueyata botejinia tacataarohuari. Caminia taquijiria niuutiaareeri.

### Jesu numootesacari na pueya Fariseocuaca niishitijosanoocuaji

(Mt 16.5-12)

<sup>14</sup> Jesu pueyari na coseyaca niyajatatuquiaari. Nareja niqiriyatujua panniyojua jiiiatuquiquiaa botejiniaari.

<sup>15</sup> Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijiuhuaj.

<sup>16</sup> Majaari na pueya niishiniu quiriquiaa naa Jesu sequesacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa sasocoriquiano.

<sup>17</sup> Jesuuri na saquirojosano pueya niishiriojosano niishiquii. Nojori sequereeri:

—¿Casaara naa nia niishiriojiya pan nia jiiitaaquishacarini? ¿Majateeri juhuanujuaja nia niishiniu tamonu juuca cua miishanojiniji? ¿Niaateeri cumajiuujiaacato, maja nia niishiniuria? <sup>18</sup> ¿Majateeri cua miishano nia niqiniu quiquiaacuaja nia namijiata? ¿Maja-

teeri nia tojiniu quiquiaa nia numaatajuhuaj? ¿Niaa-teeri ritia niyajetarucuaa cua miishano? <sup>19</sup> Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuree:

—Doce.

<sup>20</sup> —Naajuhuj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuree:

—Siete.

<sup>21</sup> Naaratej, Jesuuri nojori sequeree:

—¿Majateeri juhuanojuaja nia niishiniu naa cua miishanoinijitij?

Jiyacariti nojoriiri Jesu sequesano niishiqui.

### Jesu jecasacari cariojuaru pueyano, Betsaida tiacajinia

<sup>22</sup> Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaquiaariiri cariojuaru pueyano. Pueyari Jesu sec-ojotucuaari cuno cariojuaru namijia na quianura quenaaja. <sup>23</sup> Jesuuri cariojuaru quiaaree na juaashiquiajiniji. Tiaca jiyaquiria na jaatucuyareeri. Cariojuaru namijia piquiojoree na riacaataari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitianiyojua quenaaja?

<sup>24</sup> Cariojuaruuri niquiniu sanirii. Jesu sequereeri:

—¡Jaa! ¡Pueya niquianijia, juhua nacuhua rucoyano!

<sup>25</sup> Jesuuri socua pacuterohua na juaashiquia nianu cariojuaru namijiaacua. Cariojuaruuri niquiniu saniriohuacuahuaj. Jiyacaritij, tojetaarucujanaa maninia niquijiaa quiqiiiri. <sup>26</sup> Jesuuri na tiajinia na jiyarorohua. Cariojuaru rootaree naari:

—Majaari tiacajinia quia quianuhua pueya quia pohuatanura cua miishanoinijiji quiajaniya.

### Pedro sequesacari, Jesu seetanujanaa Pueyaso Jiyarosano

(Mt 16.13-20; Lc 9.18-21)

<sup>27</sup> Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nuco, na pueya nequesotareeri:

—¿Taa pueya sequequiaa janiyani, cantena janiyani?

<sup>28</sup> Nojoriiri na riucuree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacuua quiaanaari supuetana Elías. Naajuhuj, tamasaacari quia sequequiaa, quiaa naasucuaanaari tariucuaaanu pueyara Pueyaso sequesano caminiujunia, samiitianohuatuhuj.

<sup>29</sup> Na nuhuaji, Jesuuri nojori nequesotaree:

—¿Niajanijarijataj, taa nia sequeyani, cante janiyani?

Pedroori na sequeree:

—Quiajanijacuaja Cristo, Pueyaso Jiyarosano.

<sup>30</sup> Jesuuri nojori rootaree maja nojori pohuatanura tamasa niquiara nojuajiniji Pedro niishishano.

### Jesu numootesacari na pueya, nojuaja mosaanutaniya

(Mt 16.21-28; Lc 9.22-27)

<sup>31</sup> Jiyacaritij, Jesuuri na pueya niishitiojonu coteequiaari tama nojuajinijiaaja, taa Pueyaso Niyanu miishaanutaniya jiyanoahua naquiya taraatiani. Naa na pueya sequereeri:

—Parta Israel pueya jiyaniujanucuaari cua tojitiaaquiniutianiya, pueyacuara Pueyaso secojonaa jiyaniujanucujuhuj. Naajuhuj, Moisés Rootasanojiniji niishitiojonaari cua rerequetajaca quiniutianiya. Janiyari mosaanutaniyani. Na nuhuaji, janiyani jiuujanaraca juucajinia samiitianutaniuhuanu.

<sup>32</sup> Jesuuri naa seetanujanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqii na nacasureeri maja naa na pocuanuratej. <sup>33</sup> Jesuuri na nijiniara tacatequee saaja. Na saquiriojosano pueya na niquiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajinijinio pueya niishiriojiya.

<sup>34</sup> Naa na sequenu nuhuajitij, Jesuuri na saquiriojosano pueya piirii, puetunu cuniqii quiniaa pueyajanaano. Nojori sequereeri:

—Pueyano jaara cua tojijiaa quiniu paniri, nojuaja cuaara niiria cucua, seetanujanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuaa panitiaara tama na cuaqueyajaaja. <sup>35</sup> Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyanoahua taraatia quiniutianiya pueyacaanu. Saniniuujia, cante tama na cuaqueya panitiaa cua panishano na miinuriani, na pohuatanura janiyajinijiuahuaj, cuno pueyano cutaraari pueyaracaanu quiniutianiya shuquiriaatia. <sup>36</sup> ¿Niaarate maninia, pueyano jaara puetunu nio jiya casamijanaa jiitiare, na nuhuaji na sohanu jaara jatasaare mani quiqiojinia pueyaracaanura? <sup>37</sup> ¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. <sup>38</sup> Cante cua rupaa pohuatanu caririquiya sesa miijica pueya niquiara nio jiyajiniani, janiyani nojori caririquiniutianijajaacuahuaj. Naajuhuj, cante caririquiya mijiria quiniaa niquiara sequenurani, janiya nojori jiyaniijiani, janiyani cua tacatesacariuhua nojori caririquiniutianijajuhuj. Janiyari jiyacari cua Que cumaacata jiyocuaaanuji tacatenutaniuhuanu, maninia miijica cua Que seyatajuhuaj.

**9** Jesuuri nojori sequequiaarijuhuaj:

—Seetanujanaa nia sequeyanijia pueyanaa. Noojiaqueya niya quiniaajinijinio quiarijiani, majaari nojori cusonuunu quiniutianiya juhuanojuaja, nojori

cuaara niquirijaatijia Pueyaso cumaaca tiuquiyano cu-cua, na muerasu jiitariquianoni.

### Jesu jatasacari shacantuucara

(Mt 17.1-13; Lc 9.28-36)

<sup>2</sup> Seis juuca nuhuaji, Jesuuri jijaconaja tuhuananuu-cua tacaquiaari. Saaja nata quiojoquiaari Pedro, Santiago, Juannio. Jesu quishacari tuhuananujiniji, na cuaqueyari tamaatiuucara jataquiaari nojori niquiara.

<sup>3</sup> Na toqueeri shacantuquera jataquiaari, socua jiyanojua cohuajara sohanatuujiniji. Nio jiyajinia toqueya jeequejonaari maja na naata jiyanojua cohuajaquera toque na jiyatenu, taa Jesu toque jataquiaaricuaani. <sup>4</sup> Jiyacaritij, nojoriiri supuetana Elías niqitituaquiaari, supuetana Moisésjuhuaj, Jesuta pocojijano tii. <sup>5</sup> Jiyacaritij, Pedroori Jesu sequeree:

—Niishitiojonanaa, ¿canaa namitia niya quiyani! ¿Canaacua niaacuaji suhuorojoreni: quiara, Moisésra, Elíasranio!

<sup>6</sup> Jesu pueyari shiriiquiritiuriquiaa. Nocuaji Pedroori naa juhuajaniya pocuariquiaa. Majaari na niishiniu quiritiuriquiaa casaa na pocuariquiaani. <sup>7</sup> Jiyacaritij, jiyocuaaanu cohuaja najacaari nojoriicua rosequiaari. Cohuajaari nojori mishiquiomaa. Cohuaja najacajiniji, Pueyasoori tojishaaree pocuaano. Naa sequequiaaritij:

—Niocuaja cua Niyanuniyojua, cua shuquiritiasano! ¿Saaja nojuaja nia tojiri!

<sup>8</sup> Jiyacaritij, nojori jaara ritia niqiniijionuuquiaari na shocuaqueya, majaari quenaaja tamonu na niqitituniu quiquiaari socua. Saaja Jesuuri tamajaaja quiritiuriquiaa.

<sup>9</sup> Nojori rosetasacariuhua tuhuananuucocoji, Jesuuri nojori rotaquiaari maja nojori pohuatanuhuaa tamasaca niquiara nojori niquishano. Jesuuri nojori sequequiaari cuaara noojajinia racatatuura, nojuaja jaara samiitiarohuajaatijia. <sup>10</sup> Cunora, tama nojorijiaarijia maninia racataquiaari noojajinia nojori niqititushano. Maja cutaraari nojori niishitituniu quiquiaari, casaara naa Jesu sequeree nojorini “cua samiitiasacariuhua”. <sup>11</sup> Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaarini, Elíasna coteenu tiuquiniutianihua Pueyaso Jiyarosocoriquianoocuaji?

<sup>12</sup> Jesuuri nojori riucaaree:

—Seetanujuanaacuaaquinatejaj, Elíasri coteenu tiuquiriquiano quiquiaari, puetunu cucuaji jeenucuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutanijahuaj”. <sup>13</sup> Janiyari seetanujuanaa nia sequeyani, Elíascuajaari tari niquiara. Pueyari naquiya na miiquiaari taa nojori paniquiaaricuaajani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuanaa tari naa miishaquiaariiri.

### Jesu tohuatesacari samaru, caya samijajiniji

(Mt 17.14-21; Lc 9.37-43)

<sup>14</sup> Na nuhuaji, Jesu jaara tacatequiaariuhua na saquirojosano pueya quishaqui, queraatia pueya niquishuhuari nojori shocua maano. Tii quitiuriquiaa-jaariuhua Moisés Rootasanojiniji niishitiojonaa. Nojoriiri Jesu pueyata juayonuutariquiaa. <sup>15</sup> Pueya jaara Jesu niqitituaquiaari, puetunu pueyajanaari nocuaji jiuuji-atequiaari. Nojoriiri nocua netecuatuquiaari na saruhuatanura. <sup>16</sup> Jesuuri na saquirojosano pueya nequesotaree:

—¿Casaajiniji nia juayonuutariquiaa cuno pojoritiani?

<sup>17</sup> Tamonu cuno pueyajinijinoori Jesu riucaaree:

—Niishitiojonanaa, quiocua nitiaaree quiyanunijia!

¿Samaru jiiitiano! ¿Samaruuri na jiyatequiaari tiquiara!

<sup>18</sup> Tiquiyocua na quishaqui, samaruuri na pojotequiaa. Naa na cusojosacaritij, cushau jataquiaa na rupaamajiri. Na quiaa miaquequiaajaariuhua. Na nuhuaji, pootia maquiaari juhua macu. Quiyanuuri cunora sasacara quiyaree. ¿Socua piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojoriiri maja na naata na tohuatenu quiritiuriquiaa.

<sup>19</sup> Jiyacaritij, Jesuuri naa sequeree:

—Niaaqui Pueyasocua tiuyashijiacaja! ¿Janiyatucua pueyaracaanu nia jiitariquiani? ¿Janiyateeri pueyaracaanu nia rejeretanutaniyajaaniuhua? ¿Miji nia jaatucure cuno caya samijia!

<sup>20</sup> Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara. Tii taquiri-ocuariquiaari. Na rupaamajiri cushaariquiaa. <sup>21</sup> Jesuuri caya samijia que nequesotaree:

—¿Taacarari na coteecanu naa na quiniuria juhuacatecarani?

Na queeri Jesu riucaaree:

—Na naatujuajiniji naa quijajuhuanajaj. <sup>22</sup> Na cusojuanura juucua, cuno samaruuri sequeyarucua na pojotequiaa manijinia, moojinijuhujaj. Naaratej, ¿jaara quia naata quiri, canaacua quia taraajere quenaaja! ¿Canaa quia naacure!

<sup>23</sup> Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasocua tiuya nojiata seetanujuanaani, nera miishiyari puetunu na panishanojuanaa.

<sup>24</sup> Jiyacaritij, caya samijia queeri nacaree:

—¿Jaa, quiocua tiuyanijia! ¿Cua naacure socua cua tiuuniuria quiocua!

<sup>25</sup> Jesu niquishacari queraatia pueya nocua rerequeejijano, ritia samaru sequereeri:

—¿Tojiyashijia, tiquia samarunaa, janiya quia sequeyani, quia tohuatatare nio caya samijajiniji! ¿Puetunu quia tohuatatarejanaa! ¿Majaari socua quia tacatenuhua, nocua quia tiuquiniuhua!

<sup>26</sup> Samaruuri sariyocuaquee. Caya samijia taquiri-ocuarohuariuhua. Na tohuatesacari caya samijajiniji,



juhua macu na tiujiaqueeri. Nocuaji, queraatia na niq-uitianaa pueyari sequequiaari:

—¿Juaj! ¿Tari cusoquee cutaratej!

<sup>27</sup> Jesuuri na juaashiquiaajini na quiaree. Na sana-reeri. Caya samijaari juhuajaniya nujuaquiaariuhua.

<sup>28</sup> Na nuhuaji, Jesuuri tiaco tiuquitiaquiaari na puey-ataja. Tamajaaja nojori quishacari tii, na saquirio-josano pueyari na nequesotaree:

—¿Casaara maja canaa naata cuno samaru tohu-atenu quiriquiaani?

<sup>29</sup> Jesuuri nojori riuquaree:

—Jiyano samaruuri na naata tohuatanishaanu cutara saaja jiyano hua Pueyaso nia secojonuta nia miaque-yaquiniutia.

### Jesu pohuatanu pacutesacariuhua nojuaja mosaanu-taniya

(Mt 17.22-23; Lc 9.43-45)

<sup>30</sup> Nojori jaara quiojoquiaariuhua tiji, Galilea jiya tajimiaari. Majaari Jesu paniniu quiquiaari pueya ni-ishiniuria tee na quiyani. <sup>31</sup> Jesuuri jiyacari saaja na saquiriojosano pueyata quiniu paniriquiaa. Jiyacari, nojori niishitiojoriquiaari. Naa nojori sequereeri:

—Janiyari pueya niqutiosaanutaniyani, nojori miini-uria janiya taa nojori paniyacuajani. Nojoriiri cua monutaniya. Jiuujianaraca juucajinia, janiyari samii-tianutaniuhuanu.

<sup>32</sup> Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

### ¿Cante jiyaniijajanaa cutarani?

(Mt 18.1-5; Lc 9.46-48)

<sup>33</sup> Nojoriiri Capernaum tiacajinia tiuquiiijosee. Tari nojori quishacari tiajinia, Jesuuri nojori nequesotaree:

—¿Casaajini nia juayonuutariquiaa nucuamajini?

<sup>34</sup> Nojoriiri saaja sanaajetaquee. Na juayonuutanujini niishituriquiaacuajaari. Nucuamaji, nojoriiri riuti-oconeetariquiaa teyano nojorijiniiniote socua tojishano pueyanoni. <sup>35</sup> Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuaara quiiria juhua serura, narta pueya na naacunura puetunujuanaa.

<sup>36</sup> Na nuhuaji, Jesuuri mueya nujuatequiaari nojori tajinia. Cuno mueya patee nojori niqiuaraari. Na pueya sequereeri:

<sup>37</sup> —Cante jiyano mueya maseja na paniniutia janiyani, nojuajaari cua maseyajaacuhua. Cante cua maseyani, majaari saaja na masenu janiya. Jiyocua-caanu Quijia cua Jiyarona maseyajaariuhua.

### Tamonu pueyano tohuatanijiosacari samaruhua Jesu cumaacata

(Mt 10.42; Lc 9.49-50)

<sup>38</sup> Tamacari, Juanri Jesu sequereeri:

—Niishitiojonanaa, canaari tamonu pueyano niqiri-  
ini quia sesa jiyaniquiyano samaruhua na tohuatani-

jionura pueyajiniiji! Nojuajaari maja pajaniyajiniini. Nocuaji, ¿canaari na tenujureeni maja socua naa na miiniuriatej!

<sup>39</sup> Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniiji. <sup>40</sup> Nia ni-ishiri, cante maja pa paracani, nojuajaari pa jiyano.

<sup>41</sup> Nia rucuanijosacari, cante nia raateya mohuacaniy-ojua na paniniutia janiyani, cua pueya nia quiniuucua-juhuaj, Pueyasoori saniniuuja maninia casaa na niquti-  
nutaniya na jiitiasanojiniiji.

### Puereeta quiniutianiyari sesa miijiacara

(Mt 18.6-9; Lc 17.1-2)

<sup>42</sup> 'Nio mueyari cucua tiuuja. Cante jiyano mueya mi-itirii sesani, nera maara socua maninia quiri, puereetu-juajau saajia jaara morotasaare na riquiajiniiji, caminia queronijinia jartasocoriquiano. <sup>43</sup> Nio miriqui cua ni-ishitiojosano nia tojiri: tama nia juaashiquiaaja jaara nia jiyatere sesa miijiaara, nia juaashiquia nia rashiquiare juhuari niaa mariqui mani quiquiojinia jataaareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataaanura caapiquiquiojuata?

Jiyano hua socua maninia cutaraari niaara, juaashiquiaaju nia tiuquinishaanura Pueyaso shuriu-cua, pueyaracaanu shuquiriaatia nia quiniuria nata.

<sup>45</sup> Naajuhua, nia niohuaca jaara nia jiyatere sesa mi-ijiaara, nia rashiquiarenoj maja nia jataaanura mani quiquiojinia. ¿Niaateeri paniya tii nia jataaanura

caapiquiniocuata, pueyaracaanu tii nia saniitiosaanu-ra? Jiyano hua socua maniniaari niqiniocuata Pueya-soocua nia tiuquiniuria, pueyaracaanu nata nia quini-uria shuquiriaatia. <sup>47</sup> Naajuhua, nia namijia jaara sesa miitiriquia nijaniya, nia jaterenoj. Naa nia tarinitiare sesa nia miiniu, maja nia jataaanura caapiqui namijia-ta pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyara-caanu nojori saniitiosaanura. Cuno manijinia, majaari porohua cusununu. Maniiri tii pueyaracaanu noshiya. Majaari na maquesanu. Jiyano hua socua maniniaari nia tiuquiniuria Pueyasocua niquriyatujua namijia-ta pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyano hua na mi-iniu panishano, cuno jaara sesa miijiaara jiyateriquia nojori.

<sup>49</sup> Jesuuri socua niishitiojorohua:

—Puetunu Pueyaso muerasujuanaari saniniu-jiushaanutaniya juhua manitia, taa shu caquishiy-acuaani na moqueyaquiniuucuaaji. <sup>50</sup> Naajuhua, shoni-iri jiyano hua maninia, shu moqueyaquiniuucuaaji. Saniniuuja, shoni jaara shaacara quiri, ¿maatucua taa tiquiriiquiara quiriuhua saajaniuhua? Maja na naata. Naajuhua, Pueyaso cumaaca nia jiitiare nioojajinia, nia mariqui najuhua quijia quiriiri juhua Pueyaso ni-

ishiyashijia pueya. Naajuhuj, jiyanoojiaca nia quiri, jati qui nia quiniuria shuquiriaatia.

**Jesu niishitiojosano maja pueya cartenura necocua**  
(Mt 19.1-12; Lc 16.18)

**10** Na nuhuaji, Jesuuri Capernaum tiacajiniji quiaquiaari na saquirojosano pueyata. Judea jiyajinia quiojiyareeri, Jordán moo taquijirajuhuj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tariji-acuajani. <sup>2</sup>Jiyacaritij, noojiaqueya Fariseocuacaari Jesuucua nijioquiaari na saniniuuniuria nojori nequesotanuta, nocuara nojori saquirojotanura juucua. Cunora, cuno pojoriiri Jesu nequesotaree:

—¿Maniniate pueyano cartenura necocua?

<sup>3</sup>Jesuuri nojori nequesotaree saniniuujia:

—Cua sequeretoj, ¿taa Moisés sequequiaari nia-janiyani?

<sup>4</sup>Cuno pueyari Jesu riucaaree:

—Moisésri pa sequequiaaricuaaja, pueyanoori na naata necocua cartenu. Neyaca cuara coteenu na niq-uitioora na cartetaja naajionee, necocua na cartenura. Moiséscaajaari naa pa sequequiaaritij.

<sup>5</sup>Jesuuri cuno pojori sequereee:

—Moisésri naa sequequiaari niajanijatej, pueyara-caanu cumajiuujiaaca nia quiniuucua, nia niqiuocuaacua taraajeyashijia nia quiniuucujuhuj. <sup>6</sup>Saniniuujia, Moisésri naa naajiotaqueiaari pueyajiniji: “Pueyaso jaara puetunu casaajanaa shipiniquiaari, nojuajaari niquiriyatu caya shipiniquiaari, niquiriyatu maajinio”.

<sup>7</sup>Naaratej, pueyanoori na queya tiujianutaniya necocuara na caminiuria. <sup>8</sup>Nojori jaara camitioore, nojoriiri juhua niquiriyatujua pueyanora quiquii. Naacua-jitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. <sup>9</sup>Cunora, pueyano cuara necocua carteyaquiiria, Pueyaso rupuetootesano nojori quiniuucua.

<sup>10</sup>Majaari Jesu saquirojosano pueya niishitiumi quiquiaari naa Jesu sequesano. Na nuhuaji, tiajinia nojori quishacariuhua, na saquirojosano pueyari Jesu nequesotaquiaari casaa na sequenu paniriquiaa naani.

<sup>11</sup>Jesuuri nojori sequereee:

—Cante necocua carteya tamonu maajitia na camini-uriani, cuno pueyanoori jiyanhua sesa miya coteenu necocua. Pueyasora, naa na miishacaritij, nojuajaari juhua narta pueyano niqiuocuata quijia. <sup>12</sup>Naajuhuj, maaji jaara cartere neyaca tamonuta na caminiuria, cuno maajiiri sesa miya Pueyaso niquirarajuhuj.

**Jesu niasacari na juaashiquia naatujooriicua**  
(Mt 19.13-15; Lc 18.15-17)

<sup>13</sup>Na nuhuaji, Jesuucua jaatucunuusaaquiaariiri naatujoori, Jesu nianura na juaashiquia nojori nacaacua. Na saquirojosano pueyari naatujoori jaatucunaa tenujuriquiaa saaja. <sup>14</sup>Jesu jaara na niqiuquiaari, juaaquiiri. Nojori sequereeri:

—[Nia tarinitiare naatujoori cuara niiria cucua! [Ma-ja na tenujunu! Canapuee Pueyaso muerasura quiniu paniyani, nojori cuara juhua nio naatujooriria jataara. <sup>15</sup>Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacuajiti niaari Pueyaso pueyara jiyatesaanutaniya cutara, pueyaracaanu Pueyaso jiiitasano nia quiniuria.

<sup>16</sup>Jesuuri jiyacari cuno naatujooriniyojua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

**Jiyanhua casamiriaca mashaja pocoojosacari Jesuta**  
(Mt 19.16-30; Lc 18.18-30)

<sup>17</sup>Quera Jesu quianu panishacari quiniquiji, nocua netequiaariiri tamonu pueyano. Jesu cariquimijia mo-joquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

<sup>18</sup>Jesuuri na sequereee:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. <sup>19</sup>Quiaacuajaari Pueyaso niishitiojosano niishiya. Moiséscaajaari naa na naajiotaqueiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucua tonu-junu sapojonuta. Maja cuarachashijionu. Quia queya to-jijia quia quiriquia”.

<sup>20</sup>Pueyanoori Jesu riucaaree:

—Niishitiojonanaa, janiyacuaajaari puetunu cuno rootasanojuanaa tojjia pueyaracaanu cua naatujua-jinijini.

<sup>21</sup>Jesuuri na paniniutia na niquirii. Na sequereeri:

—Juhuanojuaa niquiriyatu casaari quiyajaa quia mi-ishoo. Quia quiaarohua. Puetunu quia casamijianaa quia niqitiojocoo. Na nuhuaji, casamijiuucua nareja quia niqitioore quia masenea cumaneeca quia casa-mi sami. Naacuajitij, quiaari quia casami jiiitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriquiano.

<sup>22</sup>Cuno pueyano jaara tojjiquiaari naa Jesu sequesantej, jiyanhua taraajequeeri. Na taraajenuta quiacuhua na tiajiniaari. Nojuajaari jiyanhua casamiriaca pueyano quiquiaari. <sup>23</sup>Na nuhuaji, Jesuuri na shocuaqueya niqiniijiooree. Na saquirojosano pueya sequereeri:

—[Jiyanhua jiyajeneta cutaraari casamiriaca pueyano quiniuria Pueyaso pueyanora!

<sup>24</sup>Na saquirojosano pueyari shiriqitiquiaari naa na sequesacariitij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanhua jiyajenetaari casamiriaca pueyano quiniuria Pueyaso pueyanora. <sup>25</sup>Taa camello maja na naata cusupuetaja cuhuoco tamajiria tajiniucuaani, naa-juhuaj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

<sup>26</sup> Na saquiriojosano pueya jaara na tojitiaquiaari, nojoriiri socua jiyanoehua jiuujiateree. Naaratej, tama nojorijiaarijia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

<sup>27</sup> Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

<sup>28</sup> Pedroori Jesu sequereeri:

—Jiyaniijianaa, canaari puetunu canaa jiiiasanojuaanaa tiujiaquiaarini quia pueya canaa quiniuria.

<sup>29</sup> Jesuuri nojori riucuaere:

—Seetanujanaa nia sequeyanijia, shuquiriaatia quijia quiniutianiya cutaraari noo pueyano cante na jiiiasano tiujiaja cua tojijia na quiniuucuanu, janiyajiniji pohuatana na quiniuucuaajuhua. Cante na tia tiujiajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanoehua queraatia niqitiosaanutaniuhua na tiujiasanojiniji. Niqitiosaanutaniyari tiaca, tapueyocuaca, na rimiatuhua, na nucua, necohua, cuhuariquiano. Naajuhua, naquiya miishano quiniutianiya cua tojijia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiya quiarinio jiyajinia. <sup>31</sup> Saniniuujia, queraatia tojishano pueyari najuhua quijia quiniutianiya Pueyasora, nojori tojiyaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhua quijia niqishano quiquiaa. Naajaa, nojoriiri na nuhuaji seetanujanaa juhua jiyaniijianucua quiniutianiya Pueyasora, na tojitiajaca nojori quiniuucua.

**Jesu pacutesacariuhua pohuatana nojuaja mosaanutaniya**

(Mt 20.17-19; Lc 18.31-34)

<sup>32</sup> Jerusalén tiacajiniara nuquamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajitiuriquiaa nojori puerenutajuhua. Nuujiajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

<sup>33</sup> Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Niyanu niqitiosaanutaniya pueyacuara secojonaa jiyaniijianucuanu, Moisés Rootasanojiniji niishitiojonaano. Cuno pojoriiri cucua tonujunutaniya jiyaniijianucua na sapojonuta, cua mosaanura. Janiyari taucua niqitiosaanutaniyani. Janiyari jiyanoehua naquiya miishaanutaniyani. <sup>34</sup> Nojoriiri cua rerequetenutaniya. Cua riocojotunutaniyari. Cua piqitiuniutianiyajaariuhua. Naa cua miishaanu nuhuajitij, nojoriiri socua cua monu-

taniya. Naajaa, jiuujianaraca juucajinia, janiyari seetanujanaa samiitianutaniuhua.

**Santiago, tarajanu Juanta, nojori sequesacari Jesu, maninia nojori na miiniuria**

(Mt 20.20-28)

<sup>35</sup> Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niqiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

<sup>36</sup> Jesuuri nojori nequesotaree:

—¿Casaa nia paniya cua miiniuria niaarani?

<sup>37</sup> Nojoriiri Jesu riucuaere:

—Pueyaso jaara quia jiyatere pueya jiyaniijia, quiocua canaa cajitijore quia shuriucua, tamonu quia miaquetajara, tamonu quia muenecara, quia naacuna canaa quiniuria.

<sup>38</sup> Jesuuri nojori sequereeri:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyanoehua noonu quiniutianiya juhua pueyano jaara mani noshiyanojinia tiuquinishaare.

<sup>39</sup> Nojoriiri na riucuaere:

—Taaquiririnij, canaa naatacuacuaquinateja naquiya miiniu rejeretanu juhua quiajaniya.

Jesuuri nojori sequereeri:

—Seetanujanaa, niaari na nuhuaji cua ratusano ratuquianojuhua. Niaari juhua manijinia tiuquinishaariquianojuhua, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyanoehua naquiya na miishaanutaniyani, na cusosacari pueyacuara. Jesuuri naa nojori sequereeri socuatej:

<sup>40</sup> —Maja cutara cua naata niqitiojoni niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niqitiosaanutaniya cutara, canra tari na jeenucuasaaquiaricuaani.

<sup>41</sup> Narta saquiriojosano pueya jaara tojiquiaari nojori masesano Jesu juucua, nojoriiri juaaquiocuaari. <sup>42</sup> Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiiitiaquiaa juhua na seya, tama nojori panishano na miiniurijaaja nojoritia. Naajuhua, pueya jiyaniijianucuaari na jiiiasano pueyacuara paquetaquiaa na cumaaca, tojishano pueya nojori quiniuria. <sup>43</sup> Niajaniya saniniuujia, majaari naa nia quiniu quiniutianiya. Cante tojishano pueyanora quiniu paniya niajaniyajinijini, cuno cuara jiyateera tama na cuaqueyajaaja juhua narta Pueyaso pueya serura na quiniuria. <sup>44</sup> Cante nia jiyaniijia quiniu paniyani, nojuaja cuara quiiria narta Pueyaso muerasu cumaquina.

<sup>45</sup> Janiyajuhua, majaari mijiria cua ninu quiquiaari pueya cua poonijiotenura quiria, tama cua cuaqueya cua shuquiritiniurijaaja. Janiya cutaraari niqiaarini pueya cua naacutanura, tama janiyajaaja mosaanura

pueya niti, queraatia pueyacuaji cua ritianura Sesaaca.

### Jesu jeecasacari Bartimeo namijia

(Mt 20.29-34; Lc 18.35-43)

<sup>46</sup> Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhua. Jiyacaritij, tamonu cariyajuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyajuaru na quiniuucua. Nojuajaari maja na naata poonijionu quijia tamajaaja. <sup>47</sup> Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nacanuu coteeree:

—[Jesunaa, Pueyaso Jiyarosanonaa, cucua quenaaja quia taraajereja!

<sup>48</sup> Queraatia pueyari na tenujuriquiaa na sanaajanura juucua. Saaja socua nacaree jiyanohuari:

—[Pueyaso Jiyarosanonaa, cucua quia taraajere!

<sup>49</sup> Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyajuaruuri naa sequesaree:

—[Quia sanere! [Quia shuquiriri! [Quia sequeyacuaja! [Nocua quia canujiyare!

<sup>50</sup> Naa na tojishacaritij, cariyajuaruuri na tucuaque toque jataquee. Ritia jaaqueeri Jesuucua na catecanonura. <sup>51</sup> Jesuuri na nequesotaree:

—¿Casaa quia paniya cua miiniuria quiajaniani?

Cariyajuaruuri na riucaaree:

—[Niishitiojonanaa, niqijijara quiniu panihuanijia! [Cua namijia quia jeecarohua quiria!

<sup>52</sup> Jesuuri na sequeree:

—Quia quiaarohua. Quia namijiaacuaja tari jeequerohua cucua quia tiuuniucua.

Jiyacaritij, cariyajuaruuri tari na naata niqiniu quiriqiaa. Nucuaco Jesu nuhuajiyareeri.

### Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

**11** Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquiiijiosee Olivo cuhuariquia tuhananuucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaree tiji. <sup>2</sup> Nojori sequereeri:

—Cuno tiacajinia nia quiaare, pa taccoji niqishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niqishiinioj, niocua na samaacartasee. Niocua na jaatucumohua miji. <sup>3</sup> Pueya jaara naa nequesotare niajaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqitnutanihuacuaja”.

<sup>4</sup> Nojoriiri quiojoquiaari. Burro riuriatatuseri morotasano nuujinia, tamonu tia tohuataya shuriucua. Nojoriiri na samaacartasee.

<sup>5</sup> Tamasaca tii quiniaari nojori sequeree:

—¿Casaa nia miyani? ¿Casaara nia samaacartaa cuno burroni?

<sup>6</sup> Nojoriiri na riucaquiaari taa Jesu rootaquiaari nojoricuajani. Naaratej, cuno pueyari nojoriria na tarinitiaquiaari. <sup>7</sup> Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajijia. Na nuhuaji, Jesuuri nocua cajirii. <sup>8</sup> Queraatia pueyari na toqueya muejoquiaari nucuaco, Jesuucua nojori maniniushitiniuria nuu. Tamasacaari jaamasucua piyotaquiaari cuhuariquiacajiniji, Jesuucua nojori niojotasocoriquiano na nucuacojuhuaj. <sup>9</sup> Jesu puetanaa, mariyata na nuhuaji nijionaari jiyanohua nacojonu coteequiaari nojori shuquiriniutia. Naa sequeturiquiaari:

—[Pa shuquiritiare pa Jiyaniijia Pueyaso! [Jiyanohua maniniacuaja pa Jiyaniijia, cuno, Pueyaso cumaacata tiuquiyani! <sup>10</sup> [Pueyaso cuaara na jiyateera maninia Jiyaniijia na quiniuria pajaniyara! [Nojuajaari pa supuetanaa jiyaniijia David niti pa jitianutaniya maninia cutara! [Jiyocuacaanu Quijia pa Pueyasocuaajaari pa shuquiritasano!

<sup>11</sup> Jesuuri naa tiuquiquiaari Jerusalén tiacajinatej. Pueyaso Secojojua tiacajinia tiuquishiiri. Na niqiniujionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriqiaa.

### Jesu sesacasacari jajauju higo naana

(Mt 21.18-19)

<sup>12</sup> Tariqui, nojori quiojosacari Betania tiacajiniji, Jesuuri miaajeriquiaa. <sup>13</sup> Tucuaaanuji niquirii higo naanaari queraatia jaamasucuaraca. Nocua canujiyareeri na niqiniuria seetanujanaa jajauracate quiriqiaa. Saaja queraatia jaamasucuaari quiriqiaa. Maja higo muetusacari quiquiaari jiyacari. <sup>14</sup> Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

### Jesu jaacasacari seya niqitiojonaa Pueyaso Secojojua tiacajinia

(Mt 21.12-17; Lc 19.45-48; Jn 2.13-22)

<sup>15</sup> Nojori jaara tiuquiiioquiaari Jerusalén tiacajinia, Jesuuri tiuquiquiaari Pueyaso Secojojua tiacajinia. Tiji pueya tohuatanijionu coteereeri, cuno pojori, canapuee Pueyasocua puecosocoriquiano seya niqitiojoriquiaa cumaneecaracuajani. Na masejonaa tohuatanijioreejaariuhua. Cumaneeca tacatojojuaca juhua-cutucua caponeetareeri, tee pueya tacatojoriquiaa taucua cumaneecacuajani, Pueyaso Secojojua tiacajinia niqitiojosocoriquiano cumaneecaracuajani. Naa juhuaj, Jesuuri mocoonu niqitiojonaa cajitiucua caponeetaree. <sup>16</sup> Naajuahuaj, majaari na shanacunu quiquiaari pueya niyacunura najuhua Pueyaso Secojojua tia, na nitiootasano casamitia. <sup>17</sup> Na nuhuaji,

pueya niqiuara niishitiojonu coteereeri. Naa se-  
quereeri:

—Tariucuacaanu Pueyaso Rupaajinia naa naajio-  
tasanocuajaari quiya:

“Cua tia sesaari quiniutianiya, Pueyaso Secojoua tia.  
Puetunu jiyacajinijuanaa pueya secojonuujuara  
quiniutianiyari”.

Niaari saniniuujia na jiyatequiaari nohuasenujuaca  
quiuiora.

<sup>18</sup> Pueyacuara secojonaa jiyaniijianucua, mariyata  
Moisés Rootasanojiniji niishitiojonaari niishiquiaari  
naa Jesu miishanojiniji. Cunora, nojoriiri rojo-  
tooquiaari taa na motunutaniya Jesuni. Saniniuujia,  
puetunu pueyajanaari jiuujiateriquiaa Jesu niishitio-  
josano nojori tojishacari. Cunora, Judiocuaca jiyani-  
ijianucuaari Jesu puereturiquiaa, puetunu pueyajanaa  
tojishacari na niishitiojosano. <sup>19</sup> Jaara niniquiaari, Jesu-  
uri Jerusalén tiacajiniji quiacuhua na saquirojosano  
pueyata.

### Higo naana sorenojiniji pohuatasano

(Mt 21.20-22)

<sup>20</sup> Tariquicuaji, nojori shocosacari higo naana, na  
niquitiuquiaariiri tariucua soreno, puetunu na nujua-  
catajanaa. <sup>21</sup> Pedroori jiyacari Jesu sequesano ni-  
shiquii. Jesu sequereeri:

—Niishitiojonanaa, Quia niquiri! Quia sesacasano  
higo naanaqui tari soreree!

<sup>22</sup> Jesuuri nojori riucaaree:

—Pueyasooqua nia tiuuri. <sup>23</sup> Seetanujuanaa nia se-  
queyanijia, niaa jaara Pueyasooqua tiuuriquia nia taa-  
canuyaquiniutia, nia naata nio tuhuananu sequenu:  
“Shiiquia niiquiji. Quia jaataare shoniniacu caminia-  
jinia”. Niaa jaara naa sequere seetanujuanaa Pueya-  
soocua nia tiuuniutia, niaari nia sequesano niquiniu-  
tianiya. Naacuajitij, Pueyasooquaji nia taa-  
canuyaquishacari, nia sequesanoquajaari tohuateenu-  
taniya taa nia sequerecuajani. <sup>24</sup> Janiyari cunora nia  
sequyani, puetunujuanaa nia masesano nia seco-  
josacari Pueyasoni, nia niishiri niaa na jiitiaa tari. Na  
nuhuaji, niaari seetanujuanaa na masenutaniya. <sup>25</sup> Naa  
secojosacari, niaa jaara niishiquii niaa sesa quiya ta-  
monu pueyanota, sesa na miiniuucua nijaniya, nojua-  
ja nia jiyanoori. Naacuajitij, jiyocuacaanu Quijia nia  
Queeri nia jiyanooniutianiya sesa nia miishanojinijiji-  
uhuj. <sup>26</sup> Naa jaara jiyanyashijia quiriquia, jiyocua-  
caanu Quinia nia Queeri nia jiyanyoquiniutianiya,  
sesa nia miishanojinijijihuj.

### Pueya nequesotasacari Jesu, cante na jiyaronani

(Mt 21.23-27; Lc 20.1-8)

<sup>27</sup> Na nuhuaji, nojoriiri quiaquiaariuhua Jerusalén tia-  
cajinihua. Jesu rucuanajosacari Pueyaso Secojoua  
tiajinia, nocua catecanoquiaariiri pueyacuara secojon-  
aa jiyaniijianucua, Moisés Rootasanojiniji niishitiojon-  
aajuhuj, narta Judiocuaca camarucuanio.

<sup>28</sup> Nojoriiri Jesu nequesotaree:

—¿Cante quia sequecanu naa quia miiniuriani?

¿Cante quia jiyatecanu Pueyaso Secojoua tia jiyaniijia  
quia quiniuriani?

<sup>29</sup> Jesuuri nojori riucaaree:

—Janiya nia nequesotanutaniya saniniunijia. Naa  
jaara cua nequesotasano riucaare coteenucuaa, jani-  
yari nia sequenutaniyajuhuj cante cua jiyaroquiaari  
naa cua miiniuriani. <sup>30</sup> Cua riucaaturetoj, ¿cante  
Tiuquinijiona Juan jiyaroquiaari pueya na tiuquinijionu-  
ra moojiniani? ¿Narejaca pueyatee, Pueyaso soj? Cua  
riucaature.

<sup>31</sup> Jiyacaritij, cuno pueyari jiyasohuaja tama juayonu-  
utano coteequiaariijaaja. Naa sequetooquiaariiri:

—Paa jaara na sequereni Pueyaso na jiyaroquiaari,  
pa riucaarucua: “¿Casaara nocua nia tiuyaquiquianu-  
cuaraarini?” <sup>32</sup> ¿Paatucua taa sequereeri, nojuaja nare-  
ja pueya jiyarosano quiquiaari?

Cuno pojoriiri narta Israel pueya puereturiquiaa se-  
quenura, Tiuquinijiona Juanri nareja pueya jiyarosano  
quiquiaari. Nojoricuajaari niishiriquiaa puetunu pueya-  
janaari niishiquiaari Tiuquinijiona Juanri seetanujua-  
naa Pueyaso sequesano caminiuujia quiquiaari.  
Cunora, nojoriiri Tiuquinijiona Juan rerequetenu  
pueretuquiaari, pueya quishacari tii. <sup>33</sup> Naacuajitij, ma-  
ja na naata na riucaatunu quishacari, Jesu seque-  
tureeri:

—Maja canaa niishiniu.

Jesuuri nojori sequeree:

—Janiyajuhuj, maja cua sequenu quiniutianiya nia-  
janiya, cante cua jiyaroquiaari naa cua miiniuriani.

### Miriqui pohuatasano sesa miijiaca poonijionaajiniji

(Mt 21.33-46; Lc 20.9-19)

**12** Jiyacaritij, Jesuuri miriqui pohuatanu cotee-  
quiaari cuno pojori niqiuara. Cuno camarucua  
sequereeri:

—Tamonu pueyanoori cuhuariquiajinia uva na-  
tooquiaari. Na nuhuaji, na shuriuquico maticoreeri.  
Naajuhuj, saajia quejaquiaariiri uva rapijiojuara, na  
caaca reratesaanura. Jiyaconajara tiareejaariuhuj, tiji  
na cuhuariquia na cojuajara nohuasejojuacuaji.

“Na nuhuaji, tamasa poonijionaa pueya na niqui-  
tioreeri nojori cojuasocoriquiano nera. Naacuajitij, uva  
carojotasacari, nojoriiri nojuaja niqutionutaniya tijiji-  
uhuj, na camarujanaa na quiniuucua. Na nuhuaji,  
nojuaari tucuacaanu quiaquiaari, tii marijia na  
shocotejonura. <sup>2</sup> Jaara tari quiquiaari uva carojot-  
tasacari, saniya cuhuariquia camarujanaari na seru ji-  
yaroquiaari cuhuariquia cojuanaa pueyacu. Na jiyaro-  
quiaariiri cuhuariquia cojuanaa niqutionura nojori  
carojotasanojiniji, taa na camarujanaa pocoojo-  
quiaaricuaa nojoritia tarijiani. <sup>3</sup> Cuhuariquia cojuanaa  
pueyari saaja jiyarosano seru quiaturee. Na piquitiuri-  
iri. Na nuhuaji, juhuasu na jiyaroturohua na camarnu-  
ucuaari. <sup>4</sup> Na camaruuri socua jiyaroquiaari tamonu na  
seru. Cuno seruuri jacusaaree saitia. Na nacaari sur-  
tasaaree saajiata jasano. Na sesacatureejaariuhuj.  
<sup>5</sup> Na camaruuri socua jiyaroquiaari tamonu na seru.

Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijinijiniojuanaani, tamasaara piquishaaquiaari. Tamasaara puecoosaaquiaari cutara.

<sup>6</sup> Cuhuariquia camaruari saaja niquiriyatujua niyanunioyua jiitiaquiaari, jiyanoahua na panishano. Cunora, nojuajaari socua cuno neyanunioyua jiyaroquiaari. Na queeri tama sequequiaarijaaja: “Cuno pueya jaara niqiri cua niyanu, nojoriiri na tojiniutianiya cutara”.

<sup>7</sup> Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—Niioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. [Pa morej! [Pocua nio cuhuariquia camaruhuaa quiquii tamajaajani!

<sup>8</sup> Cunora, na quiatureeri. Na motureeri. Na motunu nuhuaji, nojoriiri macu jatatee cuhuariquiajiniji tama.

<sup>9</sup> Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa pueconutaniya. Na nuhuaji, tamasaara pueya niqutionutaniya cuno cuhuariquiaari, nera nojori cojuanura.

<sup>10</sup> ¿Majateeri tariucuaaanu Pueyaso Rupaajinia nia serojonu quiquianucuaaja nio? Naa sequeyari:

“Tiajonaa pueyari tamaatiujajau saajia jatatee nojori tiasacari saijiniji tia. Na nuhuaji, cuno jatasano saajiaari socua cutara saajiaa jiyatesaahua tamasa saijiniji. <sup>11</sup> Cunoori pa Jiyaniijia miishano. Pajaniyara, na miishanoori jiyanoahua maninia. Nocuaji jiuujitatesano”.

<sup>12</sup> Jiyacaritij, cuno Judiocuaca camarucuaari niishiricuaaja miriqui Jesu pohuatasanoori tama nojorijinijijaaja quiquiaa. Naaratej, nojoriiri Jesu quiatunu panirii juucua, nojori nujuatesocoriquiano. Nojoriiri pueya puereriquiaa saaja, naa nojori miinuria Jesutej. Naacuajitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijijaaja pohuatariquiaa.

**Jiya jiyaniijia cuaara pueyaracaanu niqitiosaaria na sequesano cumaneeca**  
(Mt 22.15-22; Lc 20.20-26)

<sup>13</sup> Na nuhuaji, Jesuucua jiyaramiquishaaquiaariiri noojiaqueya Fariseocuaajinijinio, Herodes panijiaa pueyajinijiojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotatura nocuara. <sup>14</sup> Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niqiniu pueyajuhuaaj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojotua, taate pa naata maninia quiniu Pueyaso niquiarani. Naaratej, canaa quia sequere, ¿maninate pa niqitiojonura pa cumaneecajini-

ji jiyaniijia Césarra, taa cuno tahue sequequiaari pajaniyacuaajani? ¿Taa quia sequeyani, niqitiojoshiyatee, maja soj?

<sup>15</sup> Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequere:

—¿Casaara nia saniniujiya janiyani? Miji nia riri cumanee cua niquishocoriquiano.

<sup>16</sup> Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajiotasanojaniuhuaaj?

Nojoriiri na riucuaaree:

—Jiyaniijia César naaquicuaaja, na sesajuhuaaj.

<sup>17</sup> Jesuuri jiyacari nojori sequere:

—Jaara tama César casaajaaja quiri, tama na casaajaaja nia niqitioire na camaru. Saniniuujia, Pueyaso nia niqitioire nerano tama na casaajaaja.

Jesu jaara naa nojori riucuaquiaaritij, nojoriiri jiyanoahua jiuujiatequiaari.

**¿Macunucuate samiitiaconutaniuhua?**

(Mt 22.23-33; Lc 20.27-40)

<sup>18</sup> Fariseocuaa nuhuaji, noojiaqueya Saduceocuaajinijinoori Jesuucua nijioquiaari. Saduceocuaaari jiyaniya macunucua maja na samiitiaconu quiniutianuhua. Naaratej, nojoriiri Jesu nequesotasee nojori niishiniuria taa na sequenutaniya macunucuaajinijini. Na sequetuseeri:

<sup>19</sup> —Niishitiojonanaa, supuetana Moiséscaajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. <sup>20</sup> Tariija, tamonu pueyanoori niya quiquiaari. Siete niqiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoju. <sup>21</sup> Naaratej, na nuhuajishanaari tarajanu mashiquio camiquiaari. Nojuajaari muetuhuoju cusocuaarijiuhuaaj. Naajuhuaaj, jiyareta na nuhuajishanaari na camiquiaari. Nojuajaari juhua tapueyocuaa cusocuaari mueyajuhuaaj. <sup>22</sup> Cuno siete canuuri naa camiyocuaari cuno maaji. Puetunu nojorijianaari cusonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusocuaarijiuhuaaj. <sup>23</sup> Naacuajitij, macunucua jaara samiitacorohua, ¿teyano cuno siete neyacaajinijinote seetanu neyacajanaa quiniutianiya, puetunu cuno pojorijianaa jaara neyaca quiquiaari?

<sup>24</sup> Jesuuri nojori riucuaaree:

—Niaari jiyanoahua jiyajeneya Pueyaso Rupaajinia naajiotasano nia niishiyaquishacari, Pueyaso cumacano. <sup>25</sup> Macunucua samiitacosacariuhua, majaari canuu camiyonu quiniutianiya maaji. Naajuhuaaj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuaaanu quijiaa Pueyaso seya, maja camiyosano. <sup>26</sup> Naa macunucua samiitianijionujiniji

nequesoreetaate. ¿Majateeri nia serojonu quiquiaacuaja supuetana Moisés naajioneejinia, taa Pueyaso sequequiaari Moisés cuaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

<sup>27</sup> Naacuajitij, paari niishiyani Pueyaso pueya shaajecoonoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanhua jiyajeneya nia niishiyaquiniucua Pueyaso Rupaa.

**Puetunu Pueyaso Rootasanojinijianaani, teyanote socua pa tojishocoriqianoni**

(Mt 22.34-40)

<sup>28</sup> Tamonu pueyanoori Jesu tojiriquiaa Saduceocuaca riuhaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuaaanu Pueyaso Rootasanojinijinoote socua pa tojishocoriqianoni?

<sup>29</sup> Jesuuri na riucaaree:

—Pueyaso sequesano socua na pueya tojishocoriqianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijijanaa. Majaari tamonu quiniu socua. <sup>30</sup> Nia Jiyaniijia Pueyaso nia paniri puetunu nioojiatajanaa, puetunu nia sohuanutajanaa, puetunujuanaa nia niishitajata, puetunu nia cumacatajanaano”. Nio rootasanoori socua pa tojishocoriqiano puetunu Pueyaso rootasanojinijianaa. <sup>31</sup> Socua tarajanu na rootasano pa tojishocoriqianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriqiano nio caapiqui na rootasanojiniji.

<sup>32</sup> Jiyacaritij, cuno Moisés Rootasanojiniji niishitiojonaari na sequeree:

—Quiaacuaja maninia sequeree, niishitiojonanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. <sup>33</sup> Seetanujuanaa jiyanhua maninia cutaraari Pueyaso pa paniniuria puetunu poojiatajanaa, puetunujuanaa pa niishitajata, puetunu pa sohuanutajanaa, puetunujuanaa pa cumacatano. Naajuhuj, jiyanhua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiacu quirini, cunoori jiyanhua socua maninia Pueyasora, puetunu seya catijasanojinijianaa nocuara, mariyata puetunu pueya niquitiojosano na casamijinijianaa nera.

<sup>34</sup> Jesu jaara tojiquiaari naa cuno pueyano riucaasano maninatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriqiaa Jesu.

**¿Canaacuajinio supuenote Cristoni?**

(Mt 22.41-46; Lc 20.41-44)

<sup>35</sup> Jesuuri Pueyaso Secojoua tiajinia niishitiojoriquiaa pueya. Jiyacaritij, nojuajaari na tojtianaa pueya nequesotaree:

—¿Casaara Moisés Rootasanojiniji niishitiojona sequequiaacuaraari: “Cristonaari supuetana David niquiohuacuajinio supuenutaniya”? <sup>36</sup> Pueyaso Sohuanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijaara cua miaquetajara, janiya cuaara quia paraa shocotatare quiocuajijiatijia, Jiyaniijijanaa quia quiniuria pueyaracaanu cutara’”.

<sup>37</sup> Supuetana David jiyaniijiacasacari Cristo, ¿Cristotucua taa supuetana David niquiohuacuajinio supueno quirini? Davidcuajaari na jiyaniquiya “cua Jiyaniijata”.

Queraatia pueyari shanhua tojitiariquiaa Jesu pohuatasano.

**Jesu sequesano Moisés Rootasano niishitiojonaajiniji**

(Mt 23.1-36; Lc 11.37-54; 20.45-47)

<sup>38</sup> Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucaque toque cushiyonu maniniucuaaja nojori rucuanetajata, pueya shootianura nojori. Nojoriiri timiquiaa pueya saruhuatasaari nojori, nojori quishacari tiaca jiuujiajinia curotasano cajitiucujinia. <sup>39</sup> Nojori jaara masusaare tamonu tiajinia queranacunura, nojoriiri ritia secoquiaa socua panishano cajitiujinia nojori cajitiuniuria tia camar shuriucua. Naajuhuj, Pueyaso secojoua tiacajiniaqueya pueya rerejosacari, nojoriiri camarucua cajitiucujinia cajitiuniu paniquiaa, pueya shootianura nojori. <sup>40</sup> Nojoriiri mashiquiopue tiaca masequiaa secuja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojoua shitiarayocua pueya niquiara, maninia pueya nojori jyanishaanura. Naaratej, Pueyaso saniitiosacari maninia miyashijiaca pueya, nojoriiri socua jyanohua naquiya miishaanutaniya tamasaajiniji.

**Casamijiu mashiquio niquitiosacari na cumanee juurane Pueyasora**

(Lc 21.1-4)

<sup>41</sup> Tamacari, Jesuuri cajiriquiaa Pueyaso Secojoua tiajinia cumaneeca niquitiojoua tacoji, tee pueya niojoriquiaa na cumaneeca Pueyasora cuajani. Jesuuri tiji pueya shootiariquiaa na cumaneeca niquitiojiano. Queraatia casamiriaca pueyari queraatia cumaneeca niquitiojoriquiaa. <sup>42</sup> Jiyacari tiuquishiijiaariuhua casamijiu mashiquio. Caapiqui cumaneeniyojua niasee cumaneeca niojuujajiniaari. Cuno cumaneeca na niasanoori maja puera cumaneeca na quiniu quiriqiaa. Saaja cobrejiniiji shipinishano quiquiaariiri.

<sup>43</sup> Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamiiiju mashiquio cutaraari socua queraatia niqutioree puetunu tamasaajiniijianaa. <sup>44</sup> Puetunu pueyajanaari na cumaneeca cureenoinijia niqutiojoriquiaa. Saniniuujia, nio maajiiri puetunujuanaa na miaqueso-coriqiano na masetajarano niqutioree cutara.

### Jesu sequesacari Pueyaso Secojoua tia niyartasaanutaniya

(Mt 24.1-2; Lc 21.5-6)

**13** Jesu tohuareetasacari Pueyaso Secojoua tiajinijii, tamonu na saquiriojosano pueyajiniinooori na sequeree:

—Niishitiojonanaa, quia niqiri Pueyaso Secojoua tia, puereetujaaca saitia tiasano. □Jyanohua shanohua tia!

<sup>2</sup> Jesuuri na riucuree:

—¿Quiaateeri cuno shanohua tia niqiyia, saijinijii tiasano jiyaconajani? Cuniqii, majaari saajia cureenu quiniutianiya tamonu caco maano quenaaja. Puetunu niyartasanouanaa quiniutianiya.

### Taa pa niishiniutianiya jiya puequesacari quera

(Mt 24.3-28; Lc 21.7-24; 17.22-24)

<sup>3</sup> Na nuhuaji, nojoriiri quiojoquiaari olivo cuhuariquia tuhananuucua. Cuniqijii, maja puera tucuaaanu quiquiaari Pueyaso Secojoua tia. Na taqijirijia quiquiaariiri. Jesu cajishacari tii, nocua cate-canoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

<sup>4</sup> —Canaa quia sequere taacari Pueyaso Secojoua tia niyartasaanutaniya. ¿Canaa Pueyaso miiniutianiya canaa niishiniuria quia sequesano quera tohuateya?

<sup>5</sup> Jesuuri nojori riucuree:

—Tama nia cuaqueyajaaja nia cojuare tamasa sapojiaquiniuucaaji niajaniya. <sup>6</sup> Nia numooteyacua-janijia, queraatia sapojonuujuacaari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

<sup>7</sup> Naa jaara tojinuuri miaquetoojonujinijii niya, tucuaaanujuhuaj, majaari najuhua nia shiriiquitiuniu. Seetanujuanaa naa quiniutianiya. Naajaa, jiyacari, majaari jiya puequesacari quiniutianiya juhuanojuaja.

<sup>8</sup> Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajinijii miaquetoojonutaniya tamonu jiyajiniinooori pueyata. Naajuhuj, rijiaari jiuuquijutianutaniya queraatia tiqiyocua tiacajinia. Jyanohua miaajesacariiri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

<sup>9</sup> Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niqutiosaanutaniya saniitosocoriqiano. Naajuhuj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuhua tiaca jiyaniijaacua, jiya jiyaniijianucuaacuanio, nojori nequesoreenura niajaniya,

janiyajinijii pohuatanaa nia quiniuucua. Naacuajitij, niocua janiyajinijii pohuatere nojori niquiarajuhua.

<sup>10</sup> Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajiniajanaa.

<sup>11</sup> Cua tojiri, niaa jaara jiyatashiyare jiyaniijianucuaacua nequesoreesocoriqiano, majaari nia tacaaniu taa nia sequenutaniya, taa nia pocuanutaniya. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohanu niishitiojosano niajaniya. Nia pocuasanoori maja niajaniyajinijii quiniutianiya, nia pocuasacari nojori niquiara.

Cunocuaajaari Pueyaso Sohanu niishitishano quiniutianiya, na pocuatesacari niajaniya. <sup>12</sup> Jiyacarijuhuaj, pueyanoori sesa miiniutianiya tama tarajanuujaaja, cua tojjia tarajanu quiniuucua. Tama tarajanuujaarijia na niqutionutaniya mosocoriqiano. Jiyacaritij, pueyari tama necohuajaaja miiniutianiya sesa, cucua tiuujiaca necohua quiniuucua. Naajuhuj, necohuari tama na queya tacartanutaniya monujuaja, na queya tojinuuca Pueyaso rupaa. <sup>13</sup> Puetunu nio jiyajiniinooori pueyajanaari maja na niqiniu paniniu quiniutianiya niajaniya, cua tojitiacua nia quishacari. Naajaa, cante seetanujuanaa pueyaracaanu cucua tiuyajaani nio jiya jaara puequerejaatijia, nojuaja cutaraari shacantuuca quijia jatanishaanutaniya, pueyaracaanu cuata na quiniuria shuquiriaatia.

<sup>14</sup> Naa jaara cuno jyanohua sacuraatia casaa niqiri Pueyaso Secojoua tiajinia nujuatesano, taa supuetana Daniel sequeya na naajioneejiniacuaajani, niocua ritia mashiri. (Cante nio serojiani, nojuaja cuara niishiiria casaa na sequeyani.) Judea jiyajinia quinia cuara mashiiria ritia tuhananuhuacua, cuno sacuraatia casaa jaara nujuatesaare Pueyaso Secojoua tiajinia. <sup>15</sup> Canapuate jiyacari quiya na tia cacojiriani, nojori cuara tiuquitiaaquiiria tiajiniaaco na casaa na riniuria juucua. <sup>16</sup> Canapuate jiyacari quiya na cuhuariquajiniani, nojori cuara tacateyaquihuara na toqueya na poonuhua. <sup>17</sup> Jiyacaritij, jyanohua taraatia quiniutianiya maajipohuara, nojori jaara manajaa-tohua quiya, jaara jiyacari jitiare supuejaca conajajuhuj. <sup>18</sup> Naa secojosacari, Pueyaso nia maseriquia juhuacarijia, nia mashiyocuatucacari cuara quiyaquiria shiniquia quishacari. <sup>19</sup> Cuno quishacari, jyanohua naquiya miiniu quiniutianiya. Tariucuaaanu, majaari naa naquiya miiniu quiquiaari Pueyaso shipiniu nuhuaji nio jiya. Naajuhuj, cuno naquiya miiniu nuhuaji, majaari jiyano naquiya miiniu quiniutianuhua socua, juhua nio. <sup>20</sup> Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajaari ritia tajitiniutianiya cuno naquiya miiniu, na saquiriojosano pueyacua na taraajenuucua.

<sup>21</sup> Jiyacaritij, tamasa jaara nia sequere: “Nia niqiri, Cristo tari niya quiya”, jaara sequerejuhuaj: “Nooj, jati quiyatej”, majaari na tojitianunooj. <sup>22</sup> Jiyacaritij, queraatia sapojonuujuacaari supuenutaniya. Nojoriiri sequenutaniya: “Janiyacuaaja Cristoni”. Tamasaari sequenutaniyajuhuj: “Janiya Pueyaso sequenu panis-



hano caminiujiuniani". Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaniya. <sup>23</sup> Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

### Pueyaso Niyanu tacatenujiniji pohuatasano

(Mt 24.29-35, 42, 44; Lc 21.25-36)

<sup>24</sup> Naa naquiya pueya miiniu nuhuajitij, pananuuri ninishiquiria quiniutianiya. Naajuhuj, racaari maja na cuhuatanu quiniutianiya mijiria. <sup>25</sup> Riyari totenutaniya. Jiyocuacaanu cumaacaraca quijiacaari tete-catunutanijuhuj. <sup>26</sup> Jiyacari, janiya Pueyaso Niyanuri niquishaanutaniya jiyocuacaanuji roseyano cohujajiniani, jiyano hua shacantuuca cua cumaacata. <sup>27</sup> Jiyacaritij, janiyari cua seya jiyaramiquiniutianiyan nojori rerejotenura puetunu cua saquiriojosano pueyajanaa. Nojoriiri puetunu nio jiyajiniinjiojuanaa rerejotesaanutaniya, socua jiyano hua tucuacaanu jiya cajiniocua puequeetujinijinio.

<sup>28</sup> Quiarjia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaca quiri, quiarinio jaamasucuaari mueratumohua. Naa jaara naa niquiritij, niaari niishiquiaa tacareejonuqui quiniutianiya. <sup>29</sup> Quiarjia saniniuujia, naatej taa nia niishiquiaa higo naanacuaani, niocua naa niishirijuhuj janiya quera tiuquihuani, niaa jaara puetunu cua pohuatasanojuanaa niquiri tohuateyano. <sup>30</sup> Seetanujuanaa nia sequeyanijia, puetunu cua pohuatasanojuanaari niquishaanutaniya nio pa quishacari quiniaa pueya cusonuyaquishacarijia. <sup>31</sup> Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

<sup>32</sup> Maja cutaraari nia niishiniu taacari cua tiuquiniutianihuani, casaa juucatej. Majaari jiyocuacaanu quijiaa Pueyaso seya niishinijuhuj. Janiyajanaari maja cua niishiniu. Saaja cua que Pueyaso cutaraari tamaaja nia niishiya.

<sup>33</sup> Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niquitiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuajaari nia niishiniu taacari cua tiuquiniutianihuani. <sup>34</sup> Cunoori quiniutianiya juhua tamonu pueyano quianu panishacari tamonu jiyajiniara tucuaaanu. Na quianura, nojuajaari na seya seerataaree maninia nojori cojuanura na tia. Tamasaca niquitioyaree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuaara tiuquihuaraajatijia. <sup>35</sup> Naaratej, nia sutere. Maja maquenuujunu. Majaari nia niishinucuaaja taacari tia camar tiuquiniutianihuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniutianihuani? Jo-

huaj, maja pa niishiniu. <sup>36</sup> Cunora, juhua sutejaca nia quiriquia, janiya mariqui nia jiyajenetesuhuari, canashiyaquiji cua tiuquishacariuhua niaacua. <sup>37</sup> Cua sequesano niajaniani, cunoori puetunu pueyara-janaa: "¡Nia sutereja! ¡Maja maquenu!"

### Judiocuaca camarucua roojotoosacari nojori quianura

Jesu

(Mt 26.1-5; Lc 22.1-2; Jn 11.45-53)

**14** Jiyacari, juhuanujuaja querajaa juuca quiriquiaajaari Pascua juucara queranacunura.

Pascua juucajuhuj, poreetajaaju shipinishano pan mi-aquenu coteesaaquiaari siete juucara. Pueyacuara secjonaa jiyaniijnucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohujani, na motusocoriquiano. <sup>2</sup> Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyajanaa juaatiriiri.

### Tamonu maaji tosasacari na shanohua jaanutaja Jesuucua

(Mt 26.6-13; Jn 12.1-8)

<sup>3</sup> Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lep-ra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitaniyojua shucuariquaja pataconiyojua cacatariquiaari, shanohua cohujaja saajajiniji quejasano. Mishaja quiriquiaari shanohua jaanutajata, nardo jaamasucujiniji shipinishano. Jiyano hua queraatia cumaneecata masesano quiquiaariiri. Jiyacaritij, cuno maajiiri na shucuariquaja pataconiyojua cocuataree, na totanura Jesu nacaacua. <sup>4</sup> Tamasaca tii quiniaa pueyari juarii naa cuno shanohua jaanutaja niitiasaanucua. Tama nojorijiaarjia sequetooriquiaa:

—¿Casaara cuno shanohua jaanutaja niitiasaaree najuhanani? <sup>5</sup> ¡Cuno jaanutaja maara niquitiosaanu queraatia cumaneecara, casamijiuniucua niquitiosocoriquiano!

Nojoriiri juhuacatecara cuno maaji juarii.

<sup>6</sup> Jesuuri nojori sequere saaja:

—¡Nia tarinitiare! ¿Casaara nia rimiaaqueya nio maajiicuarani? Naa na miishano janiyani, cunoori jiyano hua maninia quiria. <sup>7</sup> Casamijiuniucua pueyacuajaari pueyaracaanu quiriquiano niaata. Naa naatacuajaari maninia miiniu nojori nia panishacari. Janiya saniniuujia, maja cutaraari cua quiniu quiniutianiya pueyaracaanu niaata. <sup>8</sup> Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na tosasacari cucua na shanohua jaanutajani, nojuajaari juhuacarijia cua cuaqueya jeenucua, raaco cua niasaanura janiya jaara mosaareni. <sup>9</sup> Seetanujuanaa nia sequeyanijia, puetunu jiyacajinijanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyjuhuj.

Naa na miishano janiyatej, majaari na niyajetasaanu quiniutianiya.

### Judas tacartasacari Jesu, na quiatenura

(Mt 26.14-16; Lc 22.3-6)

<sup>10</sup> Jiyacaritij, Judas Iscarioteeri quiaquiaari pueyacuara secojonaa jiyaniijianucuata roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijuhuaj.

<sup>11</sup> Jiyaniijianucua jaara tojiquiaari, Judas nojori quiatenu paniya Jesu, nojoriiri jiyanoehua shuquiririi. Nojoriiri Judas sequere:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

### Jesu miaquesacari na nuhujiria na pueyata

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Puetunu mariijarajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara riuriotaca borregohua, Pueyaso niqiara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ztee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

<sup>13</sup> Jiyacaritij, Jesuuri caapiqui na saquiriojosano pueyajinijinio sequere:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacojinia. Niaa jaara na riuriatasee, niocua na nuhujimia. <sup>14</sup> Jaara tiuquishii tiajinia, niocua cuno tia camaru sequeese: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua niucuan?’” <sup>15</sup> Jiyacaritij, nojuajaari nia niqitiniutianiya puereetuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetese, niucua pa miaquesocoriquiano.

<sup>16</sup> Na saquiriojosano pueyari quiojoquiaari. Tiacajinia tiuquiiioseeri. Nojori tiuquiiiosacari, nojoriiri puetunujuanaa riuriatasee taa Jesu sequere nojoricuajani. Nojoriiri tii majeetese borrego, Pascuara miaquesocoriquiano.

<sup>17</sup> Jaara niniquiaari, Jesuuri tiuquiiiose na saquiriojosano doce pueyata. <sup>18</sup> Nojori miaquenuusacari, Jesuuri nojori sequere:

—Seetanujanaa nia sequeyanijia, tamonu nijaniyajinijinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

<sup>19</sup> Jesu sequesacari naatej, nojoriiri jiyanoehua taraajee. Jiyacaritij, tama nojoriijaarijia na nequesoreetanu coteere:

—¿Janiya jiyoteeri quia quiatenutaniyani Jiyaniijianaa?

Puetunu nojoriijianaari naa na nequesotaree.

<sup>20</sup> Jesuuri nojori riucaaree:

—Niquiriyatujua doce nijaniyajinijiniocuaja, nojuacuajaari nio, shusha pan shiya miacojuajiniani, nojuajaari cua quiatenutaniya. <sup>21</sup> Janiyacuajaari maninia tohuateenutaniya puetunujuanaani, taa tariucuaaanu Pueyaso Rupaajinia janiyajiniji naajiotasaaquiaaricua-jani. Saniniuujia, jiyanoehua taraatia quiniutianiari cuno pueyanora, cantucuaja cua quiatenutaniya mosocoriquianoni. Maara socua maninia quiquiaari cuno pueyanora, nojuaja jaara raaquishaaquiaari.

<sup>22</sup> Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqitiojoreeri. Na niqitiojosacari, naa miriqui sequequiaariiri:

—Jajaa. Nia miaquere. Nioori cua cuaqueya.

<sup>23</sup> Na nuhuaji, Jesuuri ratujua pataree. Na Que Pueyaso secojoreeri nojori ratusocoriquianoocuara. Na secojonu nuhuaji, na saquiriojosano pueya niqitiojoreeri nojori ratunura tiji. Puetunu nojoriijianaari ratujuajiniji raturee. <sup>24</sup> Nojori sequere miriquiiri:

—Nioori cua nanaca. Cua nanacaari queraatia pueyacuara shoonutaniya. Naacuajitij, Pueyasoori seetanujanaa jiyanooniutianiya pueya, saaja nojori tiuuniucua cucua, taa Pueyaso sequequiaaricua-jani. <sup>25</sup> Seetanujanaa nia sequeyanijia, maja socua cua ratunu quiniutianihua uva caacajiniji, janiya cuara tacate-mohuajaatijia pueyaracaanu Jiyaniijajanaa cua quiniuria. Jiyacaritij, janiyari shusha niaata na ratunutaniuhuaní.

### Jesu sequesacari Pedro, nojuaja nocuaji seetanutaniya

(Mt 26.30-35; Lc 22.31-34; Jn 13.36-38)

<sup>26</sup> Pueyasora na jaaquenuunu nuhuaji, nojoriiri quiojoquiaari olivo cuhuariquia tuhuananuucua. <sup>27</sup> Na quiojosacari, Jesuuri nojori sequere:

—Nio niucujani, puetunu nijaniyajanaari cucua tiuuni tarinitianutaniya. Naa naajiotasano quiyacuajaari nijaniyajiniji tariucuaaanu Pueyaso Rupaajinia. Naa sequeyari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaja”.

<sup>28</sup> Na nuhuaji, janiya jaara samiitarohua macujinijini, janiyari nia puetanutaniya Galilea jiyajiniani.

<sup>29</sup> Pedroori jiyacari Jesu sequere:

—Niya cuata quiniaa naasucua quiocuaji carajenutaniya. ¶Janiya cutara maja cua catenu quiniutianiya quiocuaji!

<sup>30</sup> Jesuuri saaja na sequere:

—Pedronaa, janiya seetanujanaa quia sequeyani, nio niucujani, quiaari janiyajiniji naa seetanutaniya pueya niqiara: “¶Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

<sup>31</sup> Pedroori saaja na pataariquiaa naa Jesu seque-sacari nojuajatej. Socua sequerohuari:

—[Janiya cuara mosaaria quiataqui, naajaa, majaari cua seetanu quiniutianiya quiocuaji!

Narta saquirojosano pueyari naa sequetureejuhuj.

**Taraatia Jesu secojosacari Getsemaní cuhuariquiajinia**  
(Mt 26.36-46; Lc 22.39-46)

<sup>32</sup> Nojoriiri jiyacari tiuquiiioquiaari tamonu cuhuariquiajinia. Cuno cuhuariquia sesa quiquiaari Getsemaní. Jesuuri na saquirojosano pueya sequereer:  
—Niyaja nia cajitiuri, cua secojosacari cua Que socua nia tacoji.

<sup>33</sup> Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacate-cara shiriiquiriquiaa. Tacaariquiaajaariuhuj. <sup>34</sup> Nojori sequereeri:

—[Coojiajinia taraajeya jyanohuanijia, quera cusoy-anijia! Niyaja nia jijojetare. [Niocua niquitiareja! [Majaari maquenu!

<sup>35</sup> Jesuuri socua shiitaniyosua quiaaree nojori tacoji. Na secojonura Pueyaso, mojuquetaseeri. Jiyocuara jamaquiaariiri. Pueyaso masereeri, maja naquiya na miishaanura juucua. <sup>36</sup> Na secojosacari, nojuajaari naa sequequiaariti:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiyaquiiria juhua cua panishano. Saaja cuara quiiria cutara taa quia paniyacuajani.

“Nio raatonuque” na sequesacari, Jesuuri miriqui sequequiquiaa naquiya na miishocoriquiano.

<sup>37</sup> Na secojonu nuhuaji, na saquirojosano pueyacuatacayaruhoari. Nojori riuriatasuhua maquetiuyanoori. Jesuuri Pedro sequereer:

—Simónnaa, ¿quiaate maqueya? ¿Majateeri quenaa-ja quia naata rejeretanu rupaquijia quia maquenu?

<sup>38</sup> Nia sutere. Maja maquenu. Pueyaso nia secojore niaa mariqui sesa miitishaareeri. Seetanujuanaa, pooji-aari maninia miiniu panijia. Pa cuaqueyari saniniuuja sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria nijaniya maninia nia miiniuria.

<sup>39</sup> Jesuuri quiaquiaariuhua socua secojonuhua. Na secojosacari, socua sequenu pacutequiaariiri juhua co-teenu na sequesano. <sup>40</sup> Na nuhuaji, socua tacatequiaariuhua na saquirojosano pueyacuari. Nojori riuriatasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutanijanoj. <sup>41</sup> Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? [Tariucuaja! [Quiaritia cutara janiyari sesa miijiaa pueya quiatesaanutanijani, nojori miiniuria janiya taa nojori panitiuyacuajani! <sup>42</sup> Nia saneecuate. Pa quiaare. Cua quiateriquiano tari cumaji.

**Na paraa quiasacari Jesu**  
(Mt 26.47-56; Lc 22.47-53; Jn 18.2-11)

<sup>43</sup> Jesuuri pocuariquiaajaa Judas tiuquishacari nojori-icua. Cuno Judasri, Jesu saquirojosano doce pueyajini-nio quiquiaarijuhuaj. Queraatia pueyari Judasta nijio-quaari. Cuno pueyari nijiniaquetucuaja mueruu pooriquiaa, macacanio. Cuno pojoriiri pueyacuara sec-  
ojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyani-  
ijianucua jiyaramiquishanojuhuaj, Judiocuaca camarucua jiyaramiquishanonio. <sup>44</sup> Judas, Jesu quia-  
teriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacari, cunocuajaari nojuaja. Niocua na quiasee. [Niaari maninia morojosano jaatucutaarohuaquinioj!

<sup>45</sup> Naacuajitij, Judas jaara tiuquiquiaari Jesuucua, nocua catecanoquiaariiri. Na sequereeri:

—[Niishitiojonanaa!

Jiyacari na nujuureeri. <sup>46</sup> Judasta nijionaa pueyari jiy-acari Jesu quiasee. Morojosanoori jaatucutashiyarohua.

<sup>47</sup> Cuniqi Jesuta quiniaa pueyajinijinioni, niquiriyatu nojorijinijinioori na shuucuaji shitiaquiaari nijiniaque-tucuaja mueruu. Nata jaateree pueyacuara secojonaa jiyaniijia seru numocoori. <sup>48</sup> Jesuuri nocua nijionaa pueya sequereer:

—¿Casaara cucua nia nijioree nijiniaquetucuaja mueruutani, macacatano, morojosano nia riniuria janiya juhua nohuasejojuani? <sup>49</sup> Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitiojosacari pueya niqiara. Majaari tii cua quishacari nia quianu quiqianu janiya. Naajaa, naa nia miiriqui, tariucuacaanu janiyajiniji Pueyaso Ru-paajinia naajiotasano tohuatenura.

<sup>50</sup> Jiyacaritij, puetunu Jesu saquirojosano pueya-janaari na shuriucuaji mashiyocuatuquiaari. Tamajaaja Jesu tiujiatuqueeri. <sup>51</sup> Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojuajaari saaja puereetueque lino toquerauta cuhuajaatiariquiaa. Jesu quiatunaa niquishacari nojuaja, na quiatureejaariuhuj. <sup>52</sup> Nojuajaari saaja na toque tiujiaquee nojori juaashiquiajinia. Juhuasuuri ritia netequee. Mashimiaari. Janiyacuajaari cuno pueyano quiquiaarini, nio naajionajuhuj.

**Judiocuaca camarucua nequesoreesacari Jesu**  
(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesu quiatunaaari Jesu jaatucuquiaari pueyacuara secojonaa jiyaniijia tiajinia. Puetunu nio pojorijianaari tii rerejoquiaari: pueyacuara secojonaa jiyaniijianucua, Judiocuaca camarucuajuhuj, Moisés Rootasanojiniji niishitiojonaano. <sup>54</sup> Pedroori Jesu nuhuajiquiaari tu-cuacaanu. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia ca-jishiiri. Mani jitiuriquiaa nojoritia cuniquiri.

<sup>55</sup> Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucua. Jesuucua tonujuriquianoori pajesaaquiaari juucua, na motenura. Saaja shaaqui quiquiaari sesa casaa, nocuara tonujusocoriquiano. <sup>56</sup> Queraatia pueyari nocuara tonujuriquiaa juucua, nojori sapojonuta. Nojori saquiriojotasanooi saaja rimiajata quiriquiaa puetunujuanaa. <sup>57</sup> Na nuhuaji, tamasaari sanetaquiaari nocuara nojori tonujunura na sapojonutajuhua. Nojori na sequetuquiaariti:

<sup>58</sup> —Canaa na tojiqianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujianaraca juucujinia, janiyari tamajaaja na tianu tucuatanutaniuhuani. Cunoori maja pueyata tiasano na quiniu quiniutianiya”.

<sup>59</sup> Nojori saquiriojotasanooi saaja rimiajata quiquiaari jiyaniijianucua niquiara.

<sup>60</sup> Jiyacariti, pueyacuara secojonaa jiyaniijaari nujaree pocuanura. Jesu nequesotareeri:

—¿Majate quenaaja quia riuucuanuujua? [Quia tojiri, pueyaruhua quiocuara tonujija!

<sup>61</sup> Jesuuri saaja sanaa nujuariquiaa. Majaari na riuucuanu quiriquiaa quenaaja. Pueyacuara secojonaa jiyaniijaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

<sup>62</sup> Jesuuri na riuuaree:

—Jaa, nojuacuajaniija. Niaari cua niquiniutianiya jiyocuacaanu cumaaca Jitiana miaquetajara cajiyano. Na nuhuaji, niaari cua niquiniutianiya tacatehuano cohujajinia jiyocuacaanuji.

<sup>63</sup> Pueyacuara secojonaa jiyaniija jaara tojiquiaari naa Jesu sequesantej, tama na toquejaaja sutaree na juaaniutiari. Sequereeri:

—¿Casaara pa sashiya tamasa saquiriojotanura saa nocuaraaranuuhua? <sup>64</sup> Niaacuaja shusha tojirii Pueyasocua na sequesano sacuraatia. ¿Niajanijarijataj, taa nia niishiriojiani?

Puetunu pueyajanaari sequequiaari:

—[Cuaara mosaaria!

<sup>65</sup> Jiyacariti, tamasaari Jesu riocjonu coteequiaari. Na jiquioco morotureejaariuhua maja na niquiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiurijuhua.

#### Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

<sup>66</sup> Pedroori jiyaniija tia carijiniacuma quiriquiaa. Jiyacariti, tamonu niyacoori rucuaneriquiaa carijiniacuma. Nojuajaari pueyacuara secojonaa jiyaniija seru quiquiaari. <sup>67</sup> Pedro niquishii cajiyanoori, mani jitiuyano. Tacuriitia na shootiariquiaari. Na nuhuaji na sequereeri:

—Jaj, quiaacuajaruhua Jesuta rucuanerijuhua, cuno Nazaret tiacajiniinio pueyanotani.

<sup>68</sup> Pedroori na seetaree. Na sequereeri:

—[Cuno pueyano maja cua niishishano! [Majaari quenaaja cua niishiniu casaa quia sequeyani!

Pedroori canujyaree. Mataca tohuateyaji nujuaseeri. Caacarajaari jiyacari niunijoree. <sup>69</sup> Cuno niyacoo jaara Pedro niquiquiaariuhua socua, juhuacatecara nata quinia sequereeri:

—[Nio pueyanooi cuno Jesu pueyajiniiniojuhua!

<sup>70</sup> Pedroori socua na seetaquiaari. Pasaja na tarishishacari, cuniqui nata quiniaari Pedro sequereeri socua:

—Seetanujuanaa, quiaari cuno pueyajiniinio.

Quiaacuajara Galilea jiyajiniinio pueyano. Canaa tojishacari quiajaniya, quia pocuanuuri juhua nojori pocuanujua.

<sup>71</sup> Pedroori socua jiyanohua sapojonu coteequiaari. Naa sequereeri:

—[Pueyaso cuara saniitooa janiyaqui, janiya jaara sapojiani! [Seetanujuanaa, maja cua niishiniu cuno pueyano, canajiniji nia nequesoreetaacuajani!

<sup>72</sup> Jiyacariti, caacarajaari niunijionu pacuterohuacuaj. Pedroori jiyacari niishiqui naa Jesu sequesano nojuajatej: “Juhuanouaja caacaraja niunijionu pacutejiyaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiqui naa Jesu sequesano nojuajatej, jiyanohua nujuqueeri.

#### Jesuucua pueya saquiriojotasacari Pilato

(Mt 27.1-2, 11-14; Lc 23.1-5; Jn 18.28-38)

**15** Tariquicuaji, pueyacuara secojonaa jiyaniijianucuaari rerejoquiaari Judiocuaca camarucua, Moisés Rootasanoiniji niishitiojonaatajuhua, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilatoocua jaara Judea jiya jiyaniija quiquiaari. <sup>2</sup> Pilatoori Jesu nequesotaree:

—¿Quiaate Judiocuaca jiyaniija?

Jesuuri na riuuaree:

—Jaa. Naacuaaquiniatej, taa quia sequereecuajani.

<sup>3</sup> Pueyacuara secojonaa jiyaniijianucuaari Jesuucua tonujuriquiaa queraatia sesa casaa. <sup>4</sup> Pilatoori Jesu nequesotarohuacuaj:

—¿Majateeri quenaaja quia riuucuanuujua? Quia tojiri taa cuno pojori saquiriojotaa quiocuarani.

<sup>5</sup> Jesuuri maja na riuucuanu quiriquiaa quenaaja. Cunora, Pilatoori jiyanohua jiuujiatequiaari.

#### Na paraa sequesacari Jesu cuara mosaaria

(Mt 27.15-31; Lc 23.13-25; Jn 18.38-19.16)

<sup>6</sup> Puetunu marijarajanaa, Pascua queranacunu juuca, Pilatoori nujuatesano pueyano tohuaniniu jitiquiaari nujuatejoajiniji, cana pueya paniquiaari na cartesaanuracuajani. <sup>7</sup> Jiyacariti, tamonu pueyanooi nujuatejoajinia nujuariquiaa. Na sesa quiquiaari Barrabás. Nojuajaari tamasa pueyata pueyano moquiaari. Cunoori quiquiaari nojori juaashacari, Ro-

mano taucuaca jiyaniijia jitianuucua Judiocuaca. <sup>8</sup> Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia miiquiaacuaja puetunu marijiajajanaani.

<sup>9</sup> Pilatoori nojori riucaaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

<sup>10</sup> Nojuajaari tama niishiquiaarijiaaja, pueyacuara secojonaa jiyaniijianucuaari Jesu niqiniu paniyaquiquiaari pueya shocotenuucua nojori saniniujia Jesuucua. <sup>11</sup> Pilato nequesotasacari nojori, pueyacuara secojonaa jiyaniijianucuaari jiyacari pueya shiniujuquiaari nojori sequenura Pilato, nojuaja cuara cartera Barrabás. <sup>12</sup> Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

<sup>13</sup> Nojoriiri naa nacaree jiyanhua:

—¿Cuaara mosaaria niyacutesanojinia teetesano!

<sup>14</sup> Pilatoori nojori riucaaree:

—¿Casaarateni? ¿Casaa na miiquianu sesajaarani? Nojoriiri saaja jiyanhua nacaree:

—¿Niyacutesanojinia quia teetere!

<sup>15</sup> Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniujia, Jesu majacuteree cutaraari. Na nuhuaji, na soldadohua na niqitioreeri, niyacutesanojinia na teetsaanura.

<sup>16</sup> Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. <sup>17</sup> Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishareejaariuhua na nacaquera. <sup>18</sup> Na nuhuaji, nojoriiri na rupaa paaretanu coteequiaari Jesu na macatiniuria:

—¿Jejee, Judiocuaca camarnuna nooj!

<sup>19</sup> Nojoriiri na naca piquirii naajuata. Na riocojotureejaariuhua. Nocuaa mojuquetacoreeri juhua jiyaniijiajanaa cariquimijia, nojori sapojonuta na macatiniuria nojuaja. <sup>20</sup> Naa na rerequetesaanu nuhuajitij, toque naatuqueeri nocuaji jocusaaquiaari. Tama na toquejaaja cushitishaarohuari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

### Jesu teetesacari niyacutesanojinia

(Mt 27.32-44; Lc 23.26-43; Jn 19.17-27)

<sup>21</sup> Soldadohua jiyatasacari Jesu, tamonu pueyanoori jiyacari tacateriquiohua na cuhuariquajiniji. Cuno pueyano sesa quiquiaari Simón. Soldadohuari Jesu teetearano niyacutesano patanirii nojuaja. Nojuacuajaari Alejandro que, Rufo quenio.

<sup>22</sup> Jesuuri shiitianiyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaajinia sequeya, "Pueyano naca-co". <sup>23</sup> Soldadohuari Jesu raatequiaari vino juucua, mirrata cojitishano. Saaja na ratuyaquiriiri. <sup>24</sup> Jiyacaritij,

nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoriirajaaja.

<sup>25</sup> Jiyacaritij, niyacutesanojinia na teetesacari, shusha pananu tacasacariiri quiquiaari. <sup>26</sup> Naajioneeri na nacaacuma rupotasano quiquiaarijuhuaj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: "Nioori Judiocuaca jiyaniijia". <sup>27</sup> Jiyacaritij, caapiqui nohuasenuujuacaari Jesu shuriucua teetejosaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara. <sup>28</sup> Naa tohuateequiaariiri taa tariuacuacaanu Pueyaso Rupaajinia na naajiotasaquiaaricuajani. Naa sequeyari:

"Na sesaari sesa miijiaa pueya sesacata cojiriti-asaaquiaari naajiotasaanujuhuaj".

<sup>29</sup> Pueya tajishacari nucoo Jesu shuriuquico, nojoriiri na macatiquiaari. Na maanuquenuta naa na sequetuquiaariiri:

—¿Jaj! ¿Majateeri quiajaniya cumaacaracuaja? ¿Quiaateeri jiyaniiriquiaa, quiaa jaara Pueyaso Secojoua tia niyartare, quia naata na tianu tucuatenuhua jiuujianaraca juucajinia? <sup>30</sup> Quiaa jaara naa cumaacaraca quirritij, niyacutesanojiniji quia roserecuarajaj.

<sup>31</sup> Pueyacuara secojonaa jiyaniijianucua, Moisés Rootasanojiniji niishitiojonaari na macatiquiaarijuhuaj. Tama nojoriijaarijia naa sequetooquiaari:

—¿Maatucua saa tamasa naatanijioriquiajaari? Tama nojuaja cutaraari maja na naata niyacutesanojiniji rosenu. <sup>32</sup> Jaara seetanujuanaa quiri Pueyaso Jiyarosano, pa jiyaniijia na quiniuria, cuara roseera niyacutesanojiniji pa niqiara. Pocua jiyacari nocua tiuri cutarani.

Cuno nohuasenuujuaca Jesu shuriucua teetejosano quiriquiaani, nojoriiri na sesacariquiaajuhua.

### Jesu cusosacari

(Mt 27.45-56; Lc 23.44-49; Jn 19.28-30)

<sup>33</sup> Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari. <sup>34</sup> Jiyacaritij, Jesuuri jiyanhua na rupaa paaretaquiaari:

—Eloi, Eloi, ¿lama sabactani?

Nioori sequeya: "Cua Pueyasonaa, cua Pueyasonaa, ¿casaara quia cartereeri janiyani?"

<sup>35</sup> Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—¿Nia tojiri, supuetana Elías jiiquioonuyano, nocua na niniuria!

<sup>36</sup> Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuacuajaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¿Pa shanacure! ¿Supuetana Elías jiyoteeri nocua niniutianiya na roshiniuria niyacutesanojiniji!

<sup>37</sup> Jiyacaritij, Jesuuri jiyanoehua na rupaa paaretaro-huacuhaj. Cusoqueeri. <sup>38</sup> Jiyacaritij, Pueyaso Secojua tiajiniacuma, shiquiiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasooocua nojori tiuquishacari juucua, jiyanooshoojua nojori quishacari. <sup>39</sup> Cuno Romano soldadoehua jiyaniijiaari Jesu tajoji nujuariquiaa. Na niquishacari taa Jesu nacaquiaarini, naajuhuj, taa Jesu cusoquiaari na rupaa na paaretanutani, jiyacariti nojuajaari naa sequere:

—[Nio pueyanoqui seetanujuanaa Pueyaso niyanu!

<sup>40</sup> Maajipohuari tii quiriquiaajuhuj. Tucuacaanuji Jesu shootiaturiquiaari. María Magdalenaari nojoritia quiriquiaajuhuj, socua narta maajipohuanio. Cuno maajipohuani, nojoriiri quiriquiaari Salomé, Maríano, cante Santiago, José nucua quiriquiaaricujani. Nio Santiagoni, nojuajaari socua naatujua na sesaanucua Santiagoiniji. <sup>41</sup> Puetunu nio maajipohujanaari Jesu nuhuajiniaa quiquiaari. Nojoriiri nera pueraquenu-naa quiquiaari, Galilea jiyajinia na quishacari. Socua queraatia maajipohuari tii quiriquiaajuhuj, canapue te Jerusalén tiacajiniara nijioquiaari Jesutacuajani.

#### Jesu quete niasacari raaco

(Mt 27.57-61; Lc 23.50-56; Jn 19.38-42)

<sup>42</sup> Jesu cusonu juucani, cuno juuca sesa quiquiaari “Jeenucuanu juuca”, maja samaatenu juuca poonijionura. Saniniuujia, tariqui quiriquiaariiri samaatenu juuca. Cunora, pueyari juhuacarijia jeenucuaquiaari puertunujuanaa. <sup>43</sup> Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquiniuucua jiaatiaja quiquiaarijihuuj, canaa Jiyaniijiajanaa na quiniuria. Nojuajaari maja na puere nu quiquiaari Pilatoocua na tiuquiniuria, Jesu quete na masenura. <sup>44</sup> Pilatoori jiyanoehua jiuujiatequiaari na tojishacari Jesu tari cusoquee. Pilatoori soldadoehua jiyaniijia sequere nocua na niniuria. Nocua na tiuquishacari, na nequesotareeri:

—¿Taacarí Jesu cusoqueeni?

<sup>45</sup> Soldadoehua jiyaniijia jaara na riucuaquiaari taacari na cusoqueeni, Pilatoori jiyamitia José sequere Jesu quete na panura. <sup>46</sup> Joseeri jiyacari shanohua que-naaruque toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiunioceeri. Na nuhuaji, na ni-aquiaari raacoori. Cuno raari jiuutiasano quiquiaari saajiajinia. Joseeri raa tioree jiyanoehua puereetuca quejasano saajiata. <sup>47</sup> María Magdalena, José nucua Maríano, nojoriiri na niquitiariquiaa tee na niasareeni.

#### Jesu samiitiasacariuhua

(Mt 28.1-10; Lc 24.1-12; Jn 20.1-10)

**16** Samaatenu juuca jaara shocoquiaari, María Magdalena, Santiago nucua Maríajuhuj, Salmeeenio, nojoriiri shanohua jaanutaja masequiaari macuucua na tuujutasocoriquiano. <sup>2</sup> Jiyanoehua tariquicuají Domingo juuca, shusha pananu muetasacari, nojoriiri raajinia quiojoquiaari. <sup>3</sup> Nucua na quiojosacari, tama nojoriijaarijia sequetooriquiaa:

—¿Canteeri pocuaji shuquitiniutianiya tamocora raa tiotiuni?

<sup>4</sup> Nojori jaara niquiquiaari raa, saajia niquitiuriiri tariucua tamocora shuquitishano. Puereetuca saajiaari quiquiaari raa tiotiui. <sup>5</sup> Nojoriiri raaco tiuquitiamaa. Mashaja niquitiushiiri tii cajiyano nojori miaquetajara, cohuj tucaque toque cajitiaano. Nojoriiri jiyanoehua shiriiquitiuquiaari na niquitiushacari nojuaja. Cuno mashajaari Pueyaso seru quiriquiaa. <sup>6</sup> Maajipohua sequereeri:

—[Maja nia shiriiquiniu! Janiyari niishiyacuajani, ni-aari Jesu pajeya, Nazaret tiacajinijinio pueyano, niyacutesanojinia teetsaarucuaani. [Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. <sup>7</sup> Na saquiriojosano pueya nia sequesuhua, Pedrojaajanio: “Nojuajaari nia puertanutianiya Galilea jiyajiniara. Niaari tii na niquiniutianiya, taa na sequedanu nijaniyacujani”.

<sup>8</sup> Maajipohuari netecuatuquiaariuhua raajiniiji. Nojoriiri tetecaturiquiaa na shiriiquiniutia. Majaari que-naaja tamasa pueya na sequetunu quiquiaari na puere nuta.

#### Jesu muetasacari María Magdalenaacua

(Jn 20.11-18)

<sup>9</sup> Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujanaa muetaquiaari María Magdalenaacua. Jesucujaaari tarijia siete samaruhua tohuatanijioquiaari cuno Maríajiniiji. <sup>10</sup> María Magdalena niquiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. <sup>11</sup> María Magdalenaari nojori sequese:

—Pueyanaa, [Jesu tari samiitiarohua! [Janiya na niquiriini!

Nojoriiri María sequesano cuaracashitirii saaja.

#### Jesu muetasacari caapiqui na saquiriojosano pueyacu

(Lc 24.13-35)

<sup>12</sup> Na nuhuaji, Jesuuri socua caapiqui na pueyacu muetaquiaari nojori quiojosacari tamocora. Nojuajaari tamaatia niquishano quiriquiaa nojoriia. <sup>13</sup> Nojori niishishacari nojuacuaja Jesu quiquiaari, nojoriiri ritia ri-ujuuquiaariuhua tamasa nojoriinijinio nojori numootenuhuara. Naajuhuj, Jesu saquiriojosano pueyari nojori pohuatasano cuaracashitiriijuhuaj.

**Jesu rootasacari na jiyaramiquishocoriquiano pueya**  
(Mt 28.16-20; Lc 24.36-49; Jn 20.19-23)

<sup>14</sup> Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucujaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: "Canaa Jesu niqiriini, samiitiarohuacuaaqui". <sup>15</sup> Na nuhuaji, Jesuuri nojori sequeree:

—Nia quiaare puetunu jiyacajiniajanaa, janiyajiniji Pueyaso rupaa nia pohuatanura, puetunu nia pohu-  
atasanooocua tiuujiaa pueyapuejanaa jiyanooshaanura. <sup>16</sup> Cante moojinia tiuquinishiya Pueyaso rupaacua na tiuuniuucuan, Pueyasoori na jiyatenutaniya na pueyanora. Saniniuujia, cante Pueyaso rupaacua tiuyaquiiani, nojuajaari saniitiosano quiniutianiya. <sup>17</sup> Cucua tiuujiaaari nocuaji pueya jiuujiatesano casaa miiniutianiya cua cumaacata, pueya niishiniuria Pueyaso rupaaqui seetanu rupaajanaa. Naacuajitij, cucua

tiuuniaa pueya nia quiniuucua, niaari samaruhua tohuatanijionutaniya cua cumaacata, nia jiyaniquishacari cua sesa. Niaari nia niishiyaquishoo rupaaca pocujajaca quiniutianiyajuhujaj. <sup>18</sup> Naajuhujaj, niaa jaara soconu sajitishaare, niaa jaara casaa raatesaarejuhujaj nia cusosuaanura juucua, majaari nia cusonu quiniutianiya. Naajuhujaj, cusosuhuacua nia niasacari nia juaashiquia, cusosuhuari naataconutaniuhua.

**Jesu tacasacariuhua jiyocuacaanu na Queecua**  
(Lc 24.50-53)

<sup>19</sup> Na pocuanu nuhuaji, Jiyaniijia Jesuuri tacanishaaquiaariuhua jiyocuacaanu. Nojuajaari Pueyaso miaquetajara cajiquiaariuhua. <sup>20</sup> Na nuhuaji, na saquiriojosano pueyari quiojoquiaari Pueyaso rupaa nojori pohuatanura puetunu jiyacajiniajanaa. Jiyaniijia Jesuuri pueyaracaanu nojori cumaquiriquiaa. Pueya niqitirijiaariuhua na cumaacata na pueya miijiosano, pueya niishiniuria maatia, Jesu jiyaramiquishano pueya pohuatasanoori seetanu rupaajanaa.

# LUCAS

## Niya pahuatashiyari casaara Lucas naajioaquiaari nioni

**1** Queraatia pueyari suraattia naajionu saniniuujiquiaari puetunu canaa tajinia miishanojuanaa. <sup>2</sup>Nojoriiri naajioquiaari taa Jesu jiyaramiquishano pueya pahuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pahuatanaara jiyatesaaquiaari. <sup>3</sup>Janiyari niishiriojoriquiaani, maniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniji. <sup>4</sup>Naacuajitij, quiocuara naajiyaniija na coteenujiniji, seetanujuanaa quia niishiniuria puetunujuanaa, taa quia niishitiojosaacanucujani.

## Pueyaso seru pahuatasacari Tiuquinijona Juan rasaanutaniya

<sup>5</sup>Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maa-jiiri supuetana Aarón niquiohuacuajinio supueno quiquiaari. Nojori supuetanaari mariyata tariucacaanu pueyacuara secojona quiquiaari. <sup>6</sup>Zacaríasri necocua Isabelta maninia miijiaca quiquiaari Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiuujunaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. <sup>7</sup>Nojoriiri maja na muetunu quijia, niyajaru Isabel quiniucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

<sup>8</sup>Tamacari, Zacaríasri narta pueyacuara secojonaata poonijioriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari. <sup>9</sup>Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saaja naajiosano jacutanura juhua tacuarishijosacari, nojori niishiniuria teyano nojorijini-jiniote Pueyaso Shuriucua Quiquio tiuquiniutianiyani, shanohua jaanutaja na catijianura tii. Cuno juuca saniniuujia, saajaari Zacaríascuara tacatequiaari. Naacuajitij Zacaríasri seeratasaaquiaari tii na tiuquini-

uria shanohua jaanutaja na catijianura. <sup>10</sup>Na catijiasacari, puetunu pueyajanaari Pueyaso secojonu-uriquiaa Secojoua tia carijiniacuma. <sup>11</sup>Jiyacaritij, Pueyaso seruuri Zacaríascu muetaquiaari. Nujuariquiaari shanohua jaanutaja catijiasaqui miaquetajara. <sup>12</sup>Zacaríasri shiriquirii na niquishacari Pueyaso seru. Jiyanohua na puerereeri. <sup>13</sup>Pueyaso seruuri na sequere:

—Maja puerenu Zacaríasnaa. Pueyasocuajaari quia secojosano tojiquiaari. Quia niquiocua Isabelri quiaa muetunutaniya. Quiocua na sesojore “Juan”. <sup>14</sup>Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. <sup>15</sup>Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. <sup>16</sup>Nojuajaari queraatia Israel pueya tacatonutaniuhua nojori Jiyaniija Pueyasoocua. <sup>17</sup>Nio Juanri pa Jiyaniija puetana quiniutianiya. Nojuajaari pueyara Pueyaso sequesano caminiuujunia supuetana Elías sohuanu jitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojitiaashijia pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiaacari jeenucuasano quiniutianiya pa Jiyaniijaacua.

<sup>18</sup>Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuatenuutaniya quiria? Janiyari tari saaquianoni. Cua niquiocuaari motajajuhuj.

<sup>19</sup>Pueyaso seruuri na riuquaree:

—Janiyacuajaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaree cua pahuatanura quiajaniya nio maninia casaa Pueyasojiniji. <sup>20</sup>Quiariija saniniuujia, cua sequesanoocua quia tiuyaquiniucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari naa quiniutianiya taa Pueyaso paniyacuajani.

<sup>21</sup>Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shiriquitiurii pueyaracaanu Zacarías tarishishacari Pueyaso Shuriucua Quiquiojinia. <sup>22</sup>Zacaríasri socua tohuatamohua. Majaari na naata pocuanu quiriqiaa. Nareja shishinijoriquiaari. Naacuajitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.



<sup>23</sup> Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. <sup>24</sup> Na nuhuaji, necocua Isabelri manajeree. Na manaja jamaatiaquiaariiri. Majaari na metanu quiquiaari na tiajiniji cuaara na shocojoquiaariijaatijia cinco raca. Nojuajaari tama sequequiaariijaaja: <sup>25</sup> “Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

#### Pueyaso seru sequesacari Jesu rasaanutaniya

<sup>26</sup> Seis raca jaara shocojoquiaari Isabel manajesacarcuaa, Pueyasoori na seru Gabriel jiyaroree Nazaret tiacajinia, Galilea jiyajinia. <sup>27</sup> Tamonu niyacoocua na jiyaroreeri, cante tari sequesaaquiaaricuajani José jyanishano pueyanota na caminiuria. Na camiriquianoori supuetana jyanijia David niquiohuacuajinio supueno pueyano quiquiaari. Niyacoo sesa quiquiaari María.

<sup>28</sup> Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiritasano niyacoona. Jyanijia Pueyasoori quiata quiya, socua shuquiriaatia quia quiniuria tamasa maajipohuajiniji.

<sup>29</sup> Maríari jyanohua tacaquiaari naa Pueyaso seru sequesacari nojuaja. Nojuajaari tamajaaja niishirioriquiaa: “¿Casaara naa na sequeree janiyani?” <sup>30</sup> Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuquiritianiya. Quiaacuajaari na timitiasano. <sup>31</sup> Quiarijiani, quiaari manajenutaniya. Quiaari cayaniyotara ranutaniya. Quiocua na sesojore “Jesu”. <sup>32</sup> Nojuajaari cutara pueyano quiniutianiya. Sesojosaanutaniyari “Pueyaso Nyanu”, jiyocuaaanu Quijia Nyanu. Pa Jyanijia Pueyasoori na jiyatenutaniya Jyanijiarajanaa na quiniuria na supuetana David niti. <sup>33</sup> Israel pueya jyanijia quiniutianiya. Pueyaracaanu jitianutaniya na pueyari. Majaari na shaajenu quiniutianiya Jyanijia na quishacari.

<sup>34</sup> Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

<sup>35</sup> Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia nyanuranoni, cunoori Pueyaso Nyanu quiniutianiya. Nojuajaari seetanujuanaa Pueyaso tojjia quiniutianiya. <sup>36</sup> Naajuhuj, quia supuetanajinijinio motaja Isabelri neyanu ranutaniyajuhuj. Cuno maajiri sequesaaquiaari “niyajaru maajitia”. Naajaa, seis racaari tari na shocojia na manajesacari. <sup>37</sup> Pueyasoora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

<sup>38</sup> Maríari sequeree:

—Maniniacuajaqui. Janiyacuajaari cua Jyanijia Pueyaso seruni. Pueyaso cuaara miiria janiya taa quia sequereecuajani.

Na nuhuaji, Pueyaso seruuri quiacuhua.

#### María quiasacari Isabel niquiniuucua

<sup>39</sup> Maríari jiyacari quiaquiaari na seconuta Judea jiyajinia, Zacarías tiajinia tamonu tiacajinia. Cuno jiyari tuhuananuhuaraca. <sup>40</sup> Zacarías tiajinia María tiuquishacari, Isabel sequereeri. <sup>41</sup> Isabel tojishacari María sequesano nojuaja, Conaajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jitianura. <sup>42</sup> Naacuajitij, Isabelri jiyacari na rupaa paaretaree. Naa María sequereeri:

—Pueyasocujaari socua maninia miiriucuaa quiajaniya tamasa maajipohuajiniji! Maninia miiniutianiya quia nyanujaariuhua! <sup>43</sup> ¿Janiyateeri pueya tojishano maajini, cua Jyanijia nucua tiuquiniuria cua tiajinia, na niquiniuria janiya? Maja! Naajaa, jyanohua timianijia! <sup>44</sup> Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. <sup>45</sup> Shuquiriaatia quia quiri, quia tiuuniucua Pueyaso sequesanoocua quiajaniya.

<sup>46</sup> Maríari sequeree:

—Coojia jyanohua shuquiritiaa cua Jyanijia Pueyaso! <sup>47</sup> Cua sohuanuuri cua Jyanoonia Pueyaso timitiaani! <sup>48</sup> Juhua najuhuaa quijianijia. Naajaa, Pueyasoori cua jyanoorii. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritasano María”.

<sup>49</sup> Pueyasoori jyanohua maninia miirii janiya! Nojuajaari puetunu cumaacaracajanaa. Nojuajaari tojetaarucuajanaa maninia quijia. <sup>50</sup> Nojuajaari pueyaracaanu jyanooquiaa na tojtianaa, canapuate na rerequeteyaquiicacuajani. <sup>51</sup> Nojuajaari jyanohua maninia miiquiaa na cumaacata! Nojuajaari niishijia pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. <sup>52</sup> Nojuajaari cutara jyanijianucua jatatee, cuno pojori jyanishano niishiyashijia pueya jiyatesaanura jyanijia nojori niti saniniuujia. <sup>53</sup> Miaajeejunucua tootijioreeri maninia sumatuuta. Puera casamiriaca pueya taanuquiaariiri, casaaju nojori quiojonura. <sup>54</sup> Na pueya Israel naacureeri. Majaari na niyajetanu quiquiaari nojoriicua na taraajenu. <sup>55</sup> Naa miiquiaariiri taa na sequenciaari pa supuetanaacuajani. Pueyasoori naa pa supuetana Abraham sequequiaari: “Seetanujuanaa quiocua taraajenutaniyanijia, quioacuajinio superiquiano pueyacuano”.

<sup>56</sup> Na nuhuaji, Maríari queraatia tarishiquiaari Isabel tiajinia. Jiuujanaraca raca nuhuaji, Maríari tacatequiaariuhua na tiajiniohua.

#### Tiuquinijiona Juan rasacari

<sup>57</sup> Na nuhuaji, Isabel rasacari quiquiaari. Jiyapuerateeri. <sup>58</sup> Na shuriucua quiniaa, mariyata na jiyasocuuajinio supueno pueyajuhuj, nojoriiri jyanohua shuquiriquiaari nojori tojishacari taa Pueyaso jyanohua taraajequiaari Isabelcuani, na shuquiritiniuria neyanuta. Nojoriiri Isabelta shuquiriquiaariiji-

uhuj. <sup>59</sup> Nojoriiri Zacarías tiajinia rerejoquiaari conaaja jiitiasacari ocho juuca, na cararaatiuuquia co miatesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. <sup>60</sup> Na nucuaari saaja sequeree:

—[Maja! Sesojosaanutaniyano “Juan”.

<sup>61</sup> Pueyari saaja sequeree:

—¿Casaarateni? [Majaari quenaaja tamonu quia pueyajiniinio cuno sesaraca na quiniu quiquiaari! ¿Casaara naa quia sesojonu paniyarini?

<sup>62</sup> Cunora, pueyari na que Zacarías shishinioree na nequesotanura taa na sesojonu paniriquiaa neyanuni.

<sup>63</sup> Zacaríasri naajioju casaa maseree na naajionura tii neyanu sesarano. Naajioreeri: “Na sesa, Juan”. [Pueyari jiuujiatequee! <sup>64</sup> Jiyacaritij, Zacarías nitiiri sasaquitacuhua. Juhuacatecara pocuarohuari. Pueyaso miishano pohuatere pueya niquiaraari, na shuquiritiasacari Pueyaso. <sup>65</sup> Cunora, na tia shuriucua quiniaa pueyari jiuujiatere. Puetunu nojuanaari caminiujiushaaquiaari puetunujuanaa cuno Judea tuhuanuhucua quijiaca pueyara. <sup>66</sup> Puetunu nio tojitianaa pueyajanaari niishiriojonuuquiaari. Tama nojoriiaari nequesoreetooquiaari:

—¿Casaquitijia cuno mueya quiniutianiya na nuhujitijia?

Pueyari niishiquiaari Pueyasoori seetanujuanaa cuno mueyata quiriqiaa, na cumaquiniuria.

### Zacarías sequesano na shuquiritiasacari Pueyaso

<sup>67</sup> Na que Zacarías jiuujiaari jiyano hua mishaja quiriqiaa Pueyaso Sohanuta. Pueyaso Sohanuuri na pohuatere. Naaratej, Zacaríasri naa sequequiaari:

<sup>68</sup> —[Jiyano hua maninia pa Jiyaniijia Pueyaso, pa supuetana Israel Jiyaniijia! [Cuaara jiyano hua shuquiritiasaaria mijiria na niniucua na pueyacu, pocuaji na tacunura! <sup>69</sup> Pocua jiyaree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuaacanjani. <sup>70</sup> Tariucuaaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niquiniu paniyaquijia pueyano. <sup>72</sup> Nojuajaari sequequiaarijuhuaj, majaari na niyjetanu quiniutianiya na sequesano pa supuetanaa, pocua na taraajenura. <sup>73</sup> Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. <sup>75</sup> Nojuajaari Abraham sequequiaarijuhuaj maninia quijia pa jataniniutianiyaquiniaari, saaja nera pa quiniuria pueyaracaanu. <sup>76</sup> Quiajaniya saniniuujia, quiyanuniyोजना, quiaari sesojosaanutaniya Jiyocuaaanu Quinia sequenu panishano caminiujiunia. [Quiaari pa Jiyaniijiaranojuanaa puetanutaniya, juhua na nuu jeenucuariquiano! <sup>77</sup> Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojinijia Pueyaso pueya nojori quiniuria. <sup>78</sup> [Pa Pueyasoori jiyano hua jiyanoojia! Pocua

taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. <sup>79</sup> Maninia pa cuhuatanutaniyari, maninia pa rucanejonura Pueyaso niquiara, panaatia poojia-cata. Naacujitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

<sup>80</sup> Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasoocua tiuujia na quiniuria. Nojuajaari pueyaraaanu cariquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaariijaatijia narta Israel pueya niquiara.

### Jesu rasacari

(Mt 1.18-25)

**2** Tiuquinijiona Juan rasaanu nuhuaji, jiyaca jiyaniijiajanaa César Augustoori Roma tiacajinijia sequequiaari puetunu na jiitiasano pueyapuejanaa cuara serojosaaria puetunu nojori jiyacajinijiajanaa. <sup>2</sup> Pueya jaara coteenujuanaa serojosaaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. <sup>3</sup> Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

<sup>4</sup> Joseeri jiyacari Nazaret tiacajinia quiriqiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua. <sup>5</sup> Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijuhuaj Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriqiaa. <sup>6</sup> Belén tiacajinia nojori quishacari, jiyacari tari quiquiaari María ranu juuca. <sup>7</sup> Tii jiyapueratereeri. Conaaja juniocoquiaari toqueraacuacajiniaari. Na nucuaari na niaquiaari juyaca miaquejajinia. Maríari naa raquiaari cuniqui maja quiquio quishacari nojoriria rucoonaa tiuquijia tiajinia.

### Pueyaso seya muetasacari borrego cojuanaa pueyacu

<sup>8</sup> Belén tiaca shuriucua cuno niucuaaja, borregohua cojuanaari suteriquiaa cuhuariquajinia, na seya nojori cojuasacari. <sup>9</sup> Canashiyaquiji Pueyaso seruuri nojoricua muetaquiaari. Jiyaniijia Pueyaso shacantuuca cumaacaari nojori cuhuataquiaari. [Nojoriiri jiyano hua shiriiquitiurii! <sup>10</sup> Pueyaso seruuri nojori sequeree:

—[Maja nia puerenu! Niaacua nimiaanjia, jiyano hua maninia casaa cua pohuatanura nijaniya. Cunora, puetunu pueyajanaari shuquiriniutianiya. <sup>11</sup> [Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. <sup>12</sup> Níaa jaara nocua quiaare, niaari conaaja riuriatanutaniya toqueraacuacajinia juniocosano, juyaca miaquejajinia maano. Naacujitij, niaari niishiniutianiya, seetanujuanaari cua pohuatasano nijaniya.

<sup>13</sup> Jiyacaritij, narta Pueyaso seyari na cojishii. Jiyanoehua queraatia quiriquiaari. Nojoriiri naa maniniuhuaqueetariquiaa Pueyaso:

<sup>14</sup> —[Jiyanoehua maninia pa Pueyaso, jiyocuacaanu Quijia! [Nojuajaari jiyanoehua pa shuquiritiasano, na jiyaronuucua jiyacua quiniaa Jiyanoonia! Naacujitij, cana Pueyaso shuquiritiaani, nojoriiri jiyanoootionutaniya narta pueyata.

<sup>15</sup> Pueyaso seya jaara tacataquiaariuhua jiyocuacaanu na quiqiojiniohwa, borregohua cojuanaari tama sequetooquiaarijiaaja:

—[Belén tiacajinia pa quiaarequij! [Pa niquishii cuno, casaajiniji pa Jiyaniijia numooteree pajaniyacujani!

<sup>16</sup> Nojoriiri ritia quiojoquiaari. Conaaja riuriata-tuseeri, María, Josénio. Conaajaari juyaca miaquejajinia niasano mariquiaa. <sup>17</sup> Nojoriiri niquishacari conaaja, nojoriiri ritia tii quiniaa pueya caminiujurii conaajajiniji Pueyaso seru pohuatasano nojori. <sup>18</sup> Puetunu pueyajanaa, cante nojori pohuatasano tojiriquiaani, nojoriiri jiuujatere. <sup>19</sup> Majaari María niyajetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuuri. <sup>20</sup> Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niquishanojininio. Puetunujuanaari naa quiquiaari taa cuno niucua Pueyaso seru pohuataree nojoricujani.

#### Conaaja Jesu pasacari Pueyaso Secojoua tiajinia, Pueyasora jiyatesocoriquiano

<sup>21</sup> María conaaja jaara ocho juuca jiitiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacujani, na manajeyaquishacarijia.

<sup>22</sup> Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. <sup>23</sup> Na queyari naa miiquiaaritij, tariucuacaanu Pueyaso Rupaajinia naajiotasano tojtijajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. <sup>24</sup> Naaratej nojoriiri quiaaree na seru mosaanura nojoriicuaara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shinijia”.

<sup>25</sup> Jiyacaritij, tamonu pueyanoori Jerusalén tiacajinia quiqia quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyaroori Israel pueyacujia Tacuriquiano. Nojuajaari Pueyaso

Sohuanu jiitiaja. <sup>26</sup> Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano.

<sup>27</sup> Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacujitij, Jesu jaara pasaaquiaari Secojoua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. <sup>28</sup> Simeónri Jesu patee. Na cacanuureeri. Naa Pueyaso sequeree jiyanoehua na shuquiriniutiaari:

<sup>29</sup> —[Cua Jiyaniijianaa, tariucuaja! [Quiarijia cutara cua naata cusonu juhuajaniya, shuquiriaatia cua quishacari! Quiaacujajari tari cua niquitirii tarijia quia sequesano janiya, quia seru cua quiniucua. <sup>30</sup> Tari niquirii quia Jiyarosanocujajinjia, canaacujia Tacuriquiano. <sup>31</sup> Nojuajaari quia niquitiosano puetunu jiyacajinia quiniaa pueyapueecuarajanaa. <sup>32</sup> Nojuajaari puetunu taucuaca jiuujiajanaa cuhuatanutaniya, maninia nojori niishinuria quiajaniya. Naajuhuj, quia pueya Israelni, nojoriiri tamasaca pueya shuquiritiasano quiniutianiya na seera.

<sup>33</sup> Jesu que, na nucujuhuj, nojoriiri jiuujatere na Simeón sequesacari conaajajiniji. <sup>34</sup> Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia nijaniya.

Jesu nucua María sequereejariuhuj:

—[Cua tojiri! [Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuuja, queraatia Israel pueyari cumaatia nujuatujuaca quiniutianiya, nocua nojori tiushacari. Na cumaacata na miiniucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja.

<sup>35</sup> Naacujitij, tama pueya niishiriojosano noojiacajinia-jarijia niishishaanutaniya. Quiara saniniuuja, jiyanoehua taraatiaari quiniutianiya. Quioojiaari juhua mueruuta tohuariquitiishaanutaniya quia mueyacua quia miishacari.

<sup>36</sup> Cuniqijia, Pueyaso Secojoua tiajiniani, tamonu motajaari tii quiriquiaajuhuj. Cuno motajaari Pueyaso sequesano caminiujunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquiohuacuajinio supueno maaji quiquiaari. Jiyanoehua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. <sup>37</sup> Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiaari Pueyaso na secosacari pueyaracaanu.

<sup>38</sup> Simeón pocuasacarijia, jiyacaritij, Anaari nocua nima. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “[Paacarasho!” Na nuhuaji, nojuajaari juhuacatecara Jesujiniji pohuataree Pueyaso Ji-

yarosocoriquiano sashijaca pueya niquiara. Nojori se-  
quereeri:

—[Niocuaajaari pa sashishano pa pueyacuaji  
Tacuriquiano!

### Na queya tacartasacariuhua conaaja Nazaret tiacajin- iohua

<sup>39</sup> Jesu queyari puetunu Moisés naajioneejinia Pueya-  
so rootasanojuanaa tucataquiaari na conaajara. Na  
nuhuaji, nojoriiri Galilea jiyajiniara tacatequiaariuhua  
tama nojori tiacajiniohuajaaja, Nazaret tiacajinia.

<sup>40</sup> Naatujua Jesuuri maashiquiaari. Socua cumuecara  
quiquiaariiri, maninia niishijiaranio. Pueyasoori  
jiyanohua na naacujua.

### Mashajaniyojua Jesu quishacari Pueyaso Secojoua tia- jinia

<sup>41</sup> Puetunu marijijarajanaa, Jesu queyari quiojoquiaari  
Nazaret tiacajiniji, Jerusalén tiacajiniara, Pascua juuca-  
jinia nojori queranacunura. <sup>42</sup> Doce marijia jaara Jesu  
shocojoquiaari tari, Jesuuri nojoritia jiyacari  
quiaquiaari shushajanaa, taa nojori quianu jiitiquiaar-  
icuajani puetunu marijijarajanaa. <sup>43</sup> Queranacunuunu  
jaara puequequiaari, Jesu queyari quiojoriquiohua  
juhuajaniya. Jesuuri jiyacari Jerusalén tiacajinia jiyaje-  
quiaari. Majaari na queya niishiniu quiriquiaa. <sup>44</sup> No-  
joriiri jiyaniquiaari Jesu naasucua narta quiojonaa  
tajinia quiariquiohuajuhuj. Naacuajitij, nojoriiri juhua-  
janiya rucuaneree puetunu cuno juucajanaa. Cuno ni-  
ucuaaja, nojoriiri Jesu pajequiaari nojori pueya tajinia,  
nojori niishishano pueya tajinianio. <sup>45</sup> Shaaqui  
quiriquiaari. Cunora, nojoriiri Jerusalén tiacajinia  
tacatequiaariuhua, tii na pajenuhuara.

<sup>46</sup> Jiuujianaraca juuca nuhuaji, nojoriiri socua Jesu ri-  
uriataquiaari Pueyaso Secojoua tajinia, Moisés  
Rootasanojiniji niishitiojonaa pueya tajinia cajiyano.  
Nojori tojiriquiaari. Nojori nequesoreetariquiaajaari-  
uhuj. <sup>47</sup> Puetunu pueyajanaa, canapute na toji-  
tariquiaani, nojoriiri jiuujiatequiaari niishijia Jesu  
quishacari. Jesuuri maninia nojori rihuaneriquiaa  
saaja, nojori jaara na nequesoreeriquiaa. <sup>48</sup> Na queya  
jaara na niquiquiaari, nojoriiri shiriquitiquiaari. Na  
nucuaari na sequere:

—Quiyanunaa, ¿casaara naa quia miirii canaani?  
[Janiyari quia queta quia pajeriquiaani jiyanohua  
canaa tacaaniutia quicua!

<sup>49</sup> Jesuuri na riuuaree:

—¿Casaara nia pajeriquiaa janiyani? ¿Majateeri nia  
niishiniu, janiyari cua Que Secojoua tajinia quiniuu-  
cua jiaatiaani?

<sup>50</sup> Majaari nojori niishiniu quiquiaari Jesu sequesano.

<sup>51</sup> Jesuuri na queyata quiaarohua nojori tajiniohua  
Nazaret tiacajinia. Na queya tojijia quiquiaariiri. Na nu-  
cuaari pueyaracaanu noojiajinia racataja puetunu na  
niishishanojuanaa neyanu Jesujiniji. <sup>52</sup> Jesuuri socua  
maashiquiaari, socua niishijia quiquiaariiaariuhuj.

Pueyaso shuquiritiasano quiquiaariiri. Puetunu pueya-  
janaari na shuquiritiaquiaarijuhuaj.

### Tiuquinijiona Juan pohuatasacari Pueyaso rupaa cari- iquia jiyajinia

(Mt 3.1-12; Mr 1.1-8; Jn 1.19-28)

**3** Na nuhuaji, Tiuquinijiona Juanri Pueyaso rupaa  
pohuatanu coteequiaari. Jiyacaritij, quince mariji-  
aari tari shocojoquiaari César Tiberio, jiyaniijijanaa na  
quishacari Roma tiacajinia, puetunu jiyaca pueyapue-  
janaa camarnu na quishacari. Jiyacaritij, Poncio Pila-  
toori jiyaniijia quiriquiaa Judea jiyajinia. Herodesri  
saniniuujia jiyaniijia quiriquiaa Galilea jiyajinia. Tara-  
janu Felipeeri jiyaniijia quiriquiaajuhua Iturea jiyajinia,  
Traconite jiyajinianio. Lisianasri jiyaniijia quiriquiaa  
Abilinia jiyajinia. Puetunu cuno jiyaniijianucujanaani,  
nojoriiri jiyaniijianucua César Tiberio jiyatesano  
quiquiaari cuno jiyacajinia. <sup>2</sup> Jiyacaritij, Anásri Caifásta  
Judicuacaacuara secojonaa jiyaniijianucua quiriquiaa.  
Jiyacaritij, Zacarías niyanu Juanri cariquia jiyajinia  
quiriquiaa. Tii na quishacari, Pueyasoori na rupaa na  
niishitiquiaari. <sup>3</sup> Naaratej, Juanri puetunu Jordán moo  
shuriuquico jiyacajanaa tajiquiaari na poojotasacari  
Pueyaso rupaa pueya niquiara. Nojuajaari naa pohu-  
ataquiaaritij:

—[Nioojia nia tacatore maja socua sesa nia miiniuria,  
moojinia cua tiuquinijionura nijaniya, Pueyaso  
jiyanooniuria nijaniya sesa nia miishanojiniji!

<sup>4</sup> Naacuajitij, supuetana Isafás naajiotasanoori tohu-  
ateequiaari. Pueyaso sequenu panishano caminiuju-  
nia na quiniucua, nojuajaari naa miriqui naajio-  
taquiaari supueriquiano Juanjiniji:

“Pueyano rupaari tojishiya cariquia jiyajinia nacaano.  
Sequeyari: ‘[Jiyaniijia nuura nia jeenucuare! [Puetunu  
maninijajanaa nia nuunure, maja shuutiuniu na quini-  
uria! <sup>5</sup> [Puetunu tacocujanaa cuara mishiquio-  
josaaria maninia jamatunu na nuu quiniuria! [Puetunu  
tuhuananuhujanaa cuara jiuurioosaaria jacananu na  
nuu quiniuria! [Shuyorocotunu nuu cuara pocua-  
reesaaria! [Puetunu surocoshiquiajanaa cuara  
mishiquiojosaaria jacananu na nuu quiniuria!

<sup>6</sup> Naacuajitij, puetunu jiyacajinia pueyajanaari Pueyaso  
Jiyarosano niishiniutianiya, Pueyaso jiyanootiriquiano  
pueyani”.

Naa miriqui Isafás naajiotasanoni, cunoori pueya nu-  
mooteriquiaa juhuacarjia nojori jeenucuanura noojia-  
ca, jiyaniijia Jesu tojitiajaca nojori quiniuria.

<sup>7</sup> Pueya jaara quiojoquiaari na tiacajiniji Tiuquinijiona  
Juancua, Juan tiuquinijionura nojori, Juanri naa nojori  
juaaquiaari:

—[Niaacuajaari juhua sacocua! ¿Cante nia nu-  
mooteree nia mashiniuria jiyanohua Pueyaso sani-  
itionu panishacari nijaniyani? <sup>8</sup> [Maninia miijia nia  
quiri, canaa niishiniuria niaari seetanujuanaa nioojia  
tacatoree sesa nia miiniujiniji! [Majaari najuhua  
tama nia cuaqueyajaaja nia sequenu: “Pueyaso  
pueyanonijia, supuetana Abrahamjinijinio cua  
supenuucua”! [Nia niishiri, Pueyaso jaara paniri, no-

juajaari na naata nio saijiniji shipinini Abraham niquiohwarajuhua! <sup>9</sup> Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijiasocoriquiano. Naajuahua, nijaniyari juhua sesa muetuna naana, maninia miyashijia nia quishacari. [Niaari quera saniitioshiyacuaaja!

<sup>10</sup> Naaratej, pueyari Tiuquinijiona Juan nequesotaree:

—¿Taa canaa miyarinitioj?

<sup>11</sup> Juanri nojori riucuaaree:

—Cante querajaqueya toqueracani, nojuaja cuaara niquitioora taque cante toqueejuni. Naajuhua, cante miaquesanoracani, nojuaja cuaara niquitioora miaquesanojunucua.

<sup>12</sup> Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhua. Naaratej, nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

<sup>13</sup> Juanri nojori riucuaaree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

<sup>14</sup> Naajuhua, soldadohuari Tiuquinijiona Juan nequesotaree:

—¿Canaarijataj? ¿Casaa canaa miiniutianiyarinijia? Juanri nojori riucuaaree:

—Niaacuaajaari puecootajaraca. Naajaa, majaari pueya casami nia jaariutianu, nojori nia miananajonuta, nojoriicuaara nia tonujusacarijuhua nia saponuta. Juhua nia quiri saaja nia jiyaniijia niquitiosano cumaneecata.

<sup>15</sup> Pueyari jiyanhua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquiniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuaaanu Pueyaso sequesano na Jiyarosocoriquianotej. <sup>16</sup> Nocua, Tiuquinijiona Juanri puetunu pueyajanaa sequeree:

—Janiya nareja nia tiuquinijia moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. [Nojuajaari Pueyaso Sohanu tiuquinijionutaniya nioojiajinia, na cumaaca nia jitianura, seetanujanaa maninia miijia nia quiniuria! [Nojuajaari juhua manitia nia saniniujiutianiyajuhua, maninia jiuujaraca nia quiniuria! [Nojuajaari socua jiyanhua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, que-naaja na sapatu neyocua cua saacatanura. <sup>17</sup> Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhua, cuno pueyanoori tari niya quiya na pueya na saquiriojonura na tojiyashijaca pueya tajiniji, na rijiosocoriquiano naita nojori quiniuria. [Sesa pueyari juhua trigo sucua catijiasaanutaniya saniniuujia! [Nojoriiri jatasaanu-

taniya manijinia! [Cuno maniiri maja na maquesanu quiniutianiya!

<sup>18</sup> Tiuquinijiona Juanri naa pahuataquiaari Pueyaso rupaa pueya niquiara. Maninia rupaari, na tojtiajaca pueya quiniuria shuquiriaatia. Socua queraatia quiquiaariiri na pahuatasano na numootenura pueya. <sup>19</sup> Jiyaniijia Herodesri jiyacari tarajanu Felipe niquiocua jiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojinu quiquiaari saaja. Jiyaniijia Herodesri socua queraatia sesa casaa miijia quiquiaari. <sup>20</sup> Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniari.

### Jesu tiuquinishacari moojinia

(Mt 3.13-17; Mr 1.9-11)

<sup>21</sup> Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijuhuaj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. <sup>22</sup> Pueyaso Sohanuuri Jesuucua roseyaree juhua mococoonu niquishano. Jiyocuaaanuji, Pueyaso rupaari tojishaaree sequeyano:

—[Quiaacuaajaari cua panishano quiyanuniyojua! [Jiyanhua quia shuquiritiaanijia!

### Jesu supuetanaa sesaca

(Mt 1.1-17)

<sup>23</sup> Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujanaa na que quiquiaari. Joseeri Elí niyanu quiquiaari. <sup>24</sup> Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. <sup>25</sup> Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. <sup>26</sup> Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. <sup>27</sup> Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. <sup>28</sup> Neriiri Melqui niyanu quiquiaari. Melquiiri Adi niyanu quiquiaari. Adiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. <sup>29</sup> Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. <sup>30</sup> Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. <sup>31</sup> Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu

quiquiaari. <sup>32</sup> Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. <sup>33</sup> Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. <sup>34</sup> Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. <sup>35</sup> Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. <sup>36</sup> Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. <sup>37</sup> Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. <sup>38</sup> Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

#### Samaruhua jiyaniijia saniniujiushacari Jesu

(Mt 4.1-11; Mr 1.12-13)

**4** Jesu quiasacariuhua Jordán moojiniji, Pueyaso Sohuanuuri noojiajinia quiriqiaa puetunu na cumaacajanaa na jiiitianura. Pueyaso Sohuanuuri na jiyatequiaari pueya jijaqui cariiquia jiyajiniara. <sup>2</sup> Tii camueenujuquiaari cuarenta juuca. Sesaacaari tii na saniniujiuriquiaa. Majaari quenaaja casaa na miaque-nu quiquiaari tii na quishacari. Na nuhuaji miaajequiaariiri. <sup>3</sup> Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

<sup>4</sup> Jesuuri saaja na riucaree:

—Pueyaso Rupaajiniacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataaree jiyanoohua jiyaconaja tuhananuucua. Sesaacaari ritia niqutirii Jesu puetunu mijiria jiyacajanaa. <sup>6</sup> Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutiosaaquiarini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijia na quiniuria. <sup>7</sup> Puetunujuanaari quiara quiniutianiya, quiaa jaara cucuara mojuquetare quia shuquiritianura janiya.

<sup>8</sup> Jesuuri saaja na sequeree:

—Pueyaso Rupaajiniacuajaari naa naajiotasano quiya:

“[Quia Jiyaniijia Pueyaso quia shuquiritiare! Saaja nojuaja quia tojiri!”

<sup>9</sup> Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoja tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujuanaa Pueyaso Niyanu quiri. <sup>10</sup> Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. <sup>11</sup> Nojoriiri quia quianutaniya, saajiaacua quia jiriataaquiniuucua”.

<sup>12</sup> Jesuuri na riucaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

<sup>13</sup> Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriqiaa sesa na miitiniuria. Naaratej, rupaquijia na tariniti-aquiaari tamacaririaari.

#### Jesu coteesacari na poonijosano miiniu Galilea jiyajinia

(Mt 4.12-17; Mr 1.14-15)

<sup>14</sup> Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutioquiaari. <sup>15</sup> Jesuuri Pueyaso secojoja tiacijinaqueya niishitiojoquiaari puetunu tiacijiniajanaa cuno jiyajinia. Puetunu pueyajanaari na timitiaja.

#### Jesu quishacari Nazaret tiacajinia

(Mt 13.53-58; Mr 6.1-6)

<sup>16</sup> Jiyacaritij, Jesuuri quiaquiaari Nazaret tiacajinia, tee na canashitishaaquiaricuajani. Samaatenu juuca, Jesuuri Pueyaso secojoja tiacijinia tiuquiquiaari taa na jii-tiquiaari miiniucujani. Nojuajaari nujuaquiaari Pueyaso Rupa serojonura pueya niquiara. <sup>17</sup> Pueyari na niq-uitioree tariucuaaanu Pueyaso sequesano caminiujiunia Isafas naajione junicosano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacuajani:

<sup>18</sup> “Pueyaso Sohuanuuri coojiajinia quiyani, na cumaa-cua jiiitianura. Naacuajitij, Pueyasoori cua seeratarucua maninia rupaa cua pohuatanura casamiijuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quirohuhua Sesaaca sapojosanojiniji. Cua jiyaroreejaariuhua cariy-ojuarujuri pueya namijiaa cua jeecanura, maninia niqijiaari nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaa-tia quijiacara. <sup>19</sup> Cua jiyaroreejaariuhua cua pohuatanura pueya niquiara, quiriijiaari Jiyaniijia Pueyaso jiyanooshacari pueya”.

<sup>20</sup> Na serojonu nuhuaji, Jesuuri naajione junicorohua. Na niqutiorohua na cojuanaari. Jesuuri cajiriohuhua. Puetunu pueyajanaari tacuriitia na shootia-

turiquiaa. <sup>21</sup> Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niquiara.

<sup>22</sup> Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijiaarijia nequesoreetooriquiaa:

—¿Majate nio pueyano José niyanucuaja, niya pa tiacajinia maashiniotej?

<sup>23</sup> Jesuuri nojori sequeree:

—Niaa jiyoteeri cua sequenu paniya nio tariucua-caanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajaajani, taa nia tojiqianucuaja cua miishanojiniji Capernaum tiacajiniacuaani.

<sup>24</sup> Jesuuri socua sequeree:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja. <sup>25</sup> Supuetana Elías quishacari, queraatia mashiquiopueeri quiquiaari Israel jiyajinia. Jiyanoehua miaajesacari quiquiaariiri maru niyaquishacari pueyaracaanu. Jiuujianaraca marijaari shocojoquiaari socua seis racanio, maru niyaquishacari. <sup>26</sup> Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuajitij, cuno taatu mashiquioori mi-aquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniucua Pueyasooocua tiuujia, cuno taatu mi-aquesanoori maja na pueetanu quiquiaari nojoriria.

<sup>27</sup> Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

<sup>28</sup> Pueyaso secojojua tiajinia quiniaa pueya tojishacari naa Jesu pohuatasanootej, puetunu nojorijianaari jiyanoehua juaaquioree. <sup>29</sup> Nojoriiri saneecu-atuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, tevanoocua nojori tiaca tiasano quiquiaaricuajani. Nojoriiri na capotunu paniriquiaa juucua tajojiyaji naa na monura. <sup>30</sup> Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

#### Samaruraca pueyanojiniji pohuatasano

(Mr 1.21-28)

<sup>31</sup> Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. <sup>32</sup> Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa

cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

<sup>33</sup> Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoehua nacareeri:

<sup>34</sup> —[Nazaret tiacajinijinio Jesunaa! ¿Taa quia miiniu paniya canaani? [Canaa quia niquiri nareja! ¿Quiaate tari niyaree canaa saniitionuucua? [Quia niishiyacua-janijia, cante quiajaniani! [Quiaacuajaari sesa miyashijia Pueyaso Niyanu!

<sup>35</sup> Jesuuri samaru sequeree:

—[Quia sanaajere! [Quia tohuatere nio pueyanojiniji!

Samaruuri pueyano pojotequee puetunu pueya niqiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. <sup>36</sup> Puetunu pueyajanaari shiriiquitiurii. Tama Jesujiniji seque-tooreejaarijia:

—[Nia tojiri! ¿Taamueca rupaatucuaanojoni? [Nio pueyanoori samaruhua jiyaronu niishiya juhua jiyani-ijia! [Na rupaari jiyanoehua cumaacaraca! [Cunora samaruhua tohuataniriiri!

<sup>37</sup> Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

#### Jesu naatanishacari Simón Pedro reyarucua

(Mt 8.14-15; Mr 1.29-31)

<sup>38</sup> Jesuuri Pueyaso secojojua tiajiniji tohuareetaquiaari na pueyata. Quoijiyareeri. Simón tiajinia tiuquitiushiiri. Simón reyarucuaari jiyacari jiyanoehua naseeca matariquiaa. Pueyari Jesu sequeree na naataniniuria. <sup>39</sup> Jesuuri cusosu caco nujuasee. Jesuuri na naseeca cusonu jiyaroree. [Na naseecaari ritia shini-tiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

#### Jesu naatanijosacari queraatia cusosuhua

(Mt 8.16-17; Mr 1.32-34)

<sup>40</sup> Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesu-ucua. Jesuuri na juaashiquia niaquiaari puetunu cusosuhacuajanaa. Nojoriiri queraatia tamaatia cusonu jii-tiaquiaari. Jiyacari na naatanijioree puetunujuanaari.

<sup>41</sup> Naajuhuj, queraatia samaruhuari tohuareetaquiaari cusosuhujiniji. Samaruhuari naa nacaquiaari Jesuucua:

—[Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

#### Jesu pohuatasacari Pueyaso rupaa Pueyaso secojonu-ujua tiajiniaqueya

(Mr 1.35-39)

<sup>42</sup> Tariquicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji.

<sup>43</sup> Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiariijiani, Pueyasoori pueya jiyanooni paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajini-ajaniuhua. Janiyacuajaari cunora jiyarosaaquiaarini.

<sup>44</sup> Naacuajitij, Jesuuri puetunu Judiocuaca jiyajinia-janaa rucuanajoquiaari Pueyaso rupaa pohuatanura puetunu Pueyaso secojonuuja tiajiniaqueyajanaa.

### Sapitiaajara jaquerootanaa shiriiquitiushacari

(Mt 4.18-22; Mr 1.16-20)

**5** Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohu-atariquiaa. Puera jiyanoohua pueyari nocua cate-canoquiaari catecaji na tojtianura nojuaja. Nojoriiri Jesu tanuujuriquiaa puera. <sup>2</sup> Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. <sup>3</sup> Jesuuri Simón botejinia tacaquiaari. Simón sequereeri cuara bote juaariocotaara caminia jiuujia-jinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. <sup>4</sup> Jesu jaara niishitiojonu puecaquiaari, Simón sequereeri:

—Qeronijinia pa jaaretaare. Niocua tii jartasee nia shiyaruhua sapitiaajara.

<sup>5</sup> Simónri na riucuaree:

—Niishitiojonanaa, canaacuajaari tari jaquerootariquiaa najuhanani. Canaari naajaa nocua juhuaquemaa. **Ɔ**aa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

<sup>6</sup> Nojori jaara socua na shiyaruhua jartaquiaariuhua, jiyanoohua queraatia sapitiaaja ritatureeri! Shiyaruhuari sureequetanu coteequiaari. <sup>7</sup> Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijituree sapitiaajataari. **Ɔ**uera tiuquitiariquiaari queraatia sapitiaajata!

<sup>8</sup> Simón Pedro niquishacari naa Jesu miishano nojori-atej, Jesuucua mojoquetareeri. Jesu sequereeri:

—Jiyaniijianaa, maja cua rupuenu socua! Janiya puera sesa pueyanoni quia rupuena cua quiniuria.

<sup>9</sup> Simónri shiriiquirii, jiyanoohua queraatia sapitiaaja nojori quiasacari. Nata quiniaa pueyari shiriiquitiurii-uhua. <sup>10</sup> Cuno pojoritia quiriquiaajaariuhua Zebedeo niquiohuan, Santiago, Juannio. Nojoriiri Simón cojiniaa quiquiaari. Jesuuri Simón sequereeri miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

<sup>11</sup> Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

### Jesu naatanishacari lepraraca cusosu

(Mt 8.1-4; Mr 1.40-45)

<sup>12</sup> Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocua jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

<sup>13</sup> Jesuuri na quiaree. Na sequereeri:

—Taaquiriirinij. Quia naataniniu paniyanijia. Quia cuaqueya cuara jeequehuara.

Naa na sequesacaritij, na lepraari shaajequee na cuaqueyajiniji. <sup>14</sup> Jesuuri na rootaree maja na pohuatanura na miishano tamasa niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhua juhuajaniya. Naajuhua, quia seru quia niquitiose Pueyasooacara catijasocoriquiano. Naa quia miiri taa Moisés rootaquiaaricuajani, puetunu pueyajanaa niishiniuria quiaa tari jeequerohua quia cusonujiniji.

<sup>15</sup> Maninia Jesu miishanojinijiiri jiyanoohua socua tamaquicua caminiujiushaaquiaari pueya niquiara. Naaratej, jiyanoohua queraatia pueyari nocua nijio-quiaari na tojiniuria, mariyata Jesu naatanijionura nojori, nojori cusonujiniji. <sup>16</sup> Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

### Jesu naatanishacari cumatacuruhuana cusosu

(Mt 9.1-8; Mr 2.1-12)

<sup>17</sup> Tamonu juuca, Jesuuri pueya niquiara niishitio-joriquiaa. Na tojtianaa tajinia cajituriquiaajaariuhua Fariseocuaca, Moisés Rootasanojiniji niishitiojonaano. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanoohua Pueyaso cumaaca jitiariquiaa cusosuhua na naatanijionura. <sup>18</sup> Jiyacaritij, socua pueyari tiuquiiioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitanu paniriquiaa tiajiniaaco Jesuucua. <sup>19</sup> Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocua, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. <sup>20</sup> Jesu niquishacari taa nojori tiuuriquiaa nocuani, cunora Jesuuri cusosu sequereeri: —Pueyanonaa, quiaacuaja tari jiyanooshaaree sesa quia miishanojiniji.

<sup>21</sup> Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejara cuno pueyanoni? [Nojuajaari tama na cuaqueyajaaja jiyateya juhua Pueyaso na quiniuria! [Pueyanoori maja na naata tamonu pueyano jiyanooni sesa na miishanojiniji! [Saaja Pueyaso cularaari na naata pa jiyanooni!”

<sup>22</sup> Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? <sup>23</sup> Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia



sanere. Quia rucuanere"? <sup>24</sup> Cunora, janiyari quiarijia nia niishitiniutianiyani, janiyari mijiria jiyarosaaquiaari ni pueya cua jiyanooniuria sesa nojori miishanojiniji.

Naacujitij, Jesuuri cumatacuruhuana pueyano sequeeree:

—Cua tojiri. [Quia sanere! [Quia matu quia pataarohua quia tiajinia!

<sup>25</sup> Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta. <sup>26</sup> Puetunu pueyajanaari shiriiquitiirii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijuhuaj:

—[Paari quiarijia jiyanohua maninia miishano niquiriini! [Nocujaji jiuujiatesano!

### Jesu sequesacari Leví, na pueyano na quiniuria

(Mt 9.9-13; Mr 2.13-17)

<sup>27</sup> Nio nuhuaji, Jesuuri tohuataquiaari. Tamonu pueyano niquiriiri jiyaniijajanaa Césarra cumaneeca masesoajiqui cajiyo. Na sesa quiquiaari Leví. Jesuuri na sequeree:

—[Cua nuhuajiri, cua pueyano quia quiniuria!

<sup>28</sup> Jiyacaritij, Leviiri ritia sanequiaari. Puetunu na jiitiasanojuanaa tiujiaqueeri. Jesuta quiaqueeri.

<sup>29</sup> Na nuhuaji, Leviiri jiyanohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhuj. Nojoritia miaquejajinia cajitiuriquiaari, socua tamasa pueyano. <sup>30</sup> Moisés Rootasanojiniji niishitiojona, mariyata narta Fariseocuacaari juhuaatecara Jesu pueyacuara rimiaaquenu cotequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajano? Nojoriiri pa paraa sequera cumaneeca masejona.

<sup>31</sup> Jesuuri nojori riucaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. <sup>32</sup> Naajuhuj, majaari mijiria cua ninu quiquiaari maninia miijia pueyacu. Niquiaari cutaranijia sesa miijia cua tacatonuhua Pueyasocua, maninia miijia nojori quiniuria.

### Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura

(Mt 9.14-17; Mr 2.18-22)

<sup>33</sup> Pueyari Jesu sequeree:

—Tiuquinijiona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miijiaajuhuj. Quia pueya saniniuujia, saaja miaquequiaari, ratuquiaari. ¿Casaarateni?

<sup>34</sup> Jesuuri nojori riucaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. <sup>35</sup> Tamacari, camiriquiano pueyano jaara jaar-iutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutianiyani. Jiyacariti nojori cutaraari miaqueyaquiniutianiya.

<sup>36</sup> Jesuuri socua nojori niquiara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhaaj, toque mocujajinia na posequesacari. Cua ru-paari naajuhuj, juhua quiarinio toque. <sup>37</sup> Naajuhuj, majaari na naata quiarinia uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitiashiya. Shoqueeri najuhuana sesoshiyajuhaaj. <sup>38</sup> Naaratej, maninia cutaraari quiarinia uva caaca shuujionu shoque quiariquiojinia, maja vino niitiasaanuucujia, na quiquio shoqueno. Naajuhuj, nia niishitiojosanoori juhua tariucuaco shoque. <sup>39</sup> Naajuhuj, pueyano jaara vino tariucuanacu ratujua quiri, majaari na paniniu quiarinia vino. Sequeyari: "Tariucuanacuuri maniniacuaja". Naajuhuj, majaari cua niishitiojosano nia paniniu, quiarinio na quiniuucua.

### Jesu pueya carojotasacari trigo samaatenu juuca

(Mt 12.1-8; Mr 2.23-28)

**6** Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuquiojoriquiaa na corequetanura. Na nuhuaji, na jajau miojonuuriquiaari. <sup>2</sup> Fariseocuacaari na niquitiariquiaa. Nojoriiri Jesu pueya juaari:

—¿Casaara nia tojitiaaquiya Moisés Rootasano, taa na sequequiaaricujani maja pa poonijionura samaatenu juuca?

<sup>3</sup> Jesuuri nojori riucaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijuhuaj? <sup>4</sup> Nojuajaari Pueyaso Secojoua tiajinia tiuquiquiaari. Pueyasora niojosano pan pooquiaari. Na sareeri. Mariyata nata quiniaa niquitiojoreeri nojori sanurajuhuj. Cuno panri sequesaaquiaari saaja pueyacuara secojona sascoriquiano. Naajaa, Davidri na saquiaari. Majaari Pueyaso juaniu quiquiaari naa David miiniuucua.

<sup>5</sup> Jesuuri socua cuno Fariseocuaca sequequiaari:

—Janiyacuajaari Pueyaso Jiyarosanoni. Jiyaniijia jiyatesaaquiaarinijia cua sequenura casaate samaatenu juuca miishiyani, Pueyaso pa shuqiritiniuria.

**Jesu jeecasacari pueyano juaashiquia, cuseetucjuara joojequetano**  
(Mt 12.9-14; Mr 3.1-6)

<sup>6</sup> Tamonu samaatenu juuca, Jesuuri Pueyaso Secoju-tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucjuara joojequetano na juaashiquia miaquetajara. <sup>7</sup> Moisés Rootasanojiniji niishitiojonaa, mariyata Fariseocua-caari Jesu shanacutariquiaa. Nocuara tonujunu paniriquiaari Jesu jaara cuseetucjuara joojequetano juaashiquiaraca pueyano jeecare samaatenu juuca. <sup>8</sup> Jesuuri tari niishiriquiaa taa nojori niishirio-joriquiaani. Jesuuri cuno rimiajatucojua pueyano se-queeree:

—[Quia sanere! ]Niya quia nujuasee pueya tajinia!

Pueyanoori sanequee. Nujuaseeri tee Jesu seque-quaari na nujuanuracuajani. <sup>9</sup> Jesuuri nocuara tonu-junu panijiaa pueya sequeeree:

—Nia nequesotareeraj. Cua sequere, ¿taa pa niishi-tiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushiyajanaa monu soj? ¿Taa nia sequeyani?

<sup>10</sup> Jesuuri puetunu na shocuaqueya quiniaajanaa niquinijoree. Na nuhuaji cusosu sequeereeri:

—[Quia juaashiquia quia shiitiore!

Pueyanoori na juaashiquia shiitioree. [Na juaashiquiaari ritia jeequequee! <sup>11</sup> Cuno pueyari jiyanoohua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

**Jesu saquiriojosacari doce pueya na jiyaramiquishocoriquiano**

(Mt 10.1-4; Mr 3.13-19)

<sup>12</sup> Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucua-janaa secojoriquiaa Pueyasoori. <sup>13</sup> Jaara juhuaque-quaari, Jesuuri na tojitiajaca pueya sequequiaari nocua nojori nijionura. Puetunu nojorijinijiojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”.

<sup>14</sup> Niiori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhua, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. <sup>16</sup> Santiago niyanu Judasri saquiriojosaaquiaarijuhua, Judas Iscarioteno. Nojuajaari quiquiaari Jesu quiateriquiano mosocoriquiano.

**Jesu niishitiojosacari queraatia pueya**

(Mt 4.23-25)

<sup>17</sup> Na nuhuaji, Jesuuri tuhuananujiniji rosetaquiaari-uhua na saquiriojosano pueyata, jamatujiniara. Cuno jamatujinia, queraatia na nuhuajinia pueyari tari

nocujaji quiriquiaa. Mariyata jiyanoohua queraatia pueyari tii quiriquiaa puetunu Judea jiyajinijinio, Jerusalén tiacajinijiojuhuaj, shoniniacu caminia shuri-uquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijio-quaari nojori tojiniuria Jesu, na cusonujiniji nojori naatanijiosaanurajuhua. Jesuuri nojori naatanijioree. <sup>18</sup> Naajuhua, taraatia samaruhua miishano pueyari naatanijiosaaquiaarijuhua. <sup>19</sup> Puetunu cusosuhua-janaari Jesu quianu paniriquiaa, naatanijosano nojori quiniuria. Jesu cumaacaari jiyanoohua poonijioriquiaa. Naaratej, puetunu pueyajanaari naatanijiosaaquiaa, saaja nojori quiasacari nojuaja.

**Jesu pahuatasano shuquiriaatia quijiajiniji, taraatia quijiajinijinio**

(Mt 5.1-12)

<sup>20</sup> Na nuhuaji, Jesuuri na pueya niquirii na pocuanu-  
ra. Naa sequeereeri:

—Niaari Pueyaso shuquiritasano, niaa jaara ni-  
ishiriquia nioojia saaja sesa mijia. Niaa jaara niishiri  
nioojia naa quiyatej, niaari Pueyaso jittiasano pueya  
quiniutianiya.

<sup>21</sup> 'Niaari Pueyaso shuquiritasano, niaa jaara maninia  
mijia quiniucua jiaataa, taa miaajeyano pueyano mi-  
aquesanoocua jiaatiaacuaani. Niaa jaara naa quiniuu-  
cua jiaataa, Pueyasocuaajaari nia jataniniutianiya  
maninia quijiaari nia quiniuria.

'Niaari Pueyaso shuquiritasano, niaa jaara sesa nia  
miiniu nuhuaji taraajequiaa. Niaari na nuhuaji saroo-  
jonutaniya nia shuquiriniutia, niaa jaara  
jiyanooshaarohua.

<sup>22</sup> 'Niaari Pueyaso shuquiritasano, pueya jaara nia  
niquiniu paniyaquiri, pueya jaara nia taanuure, pueya  
jaara nia macatiri, pueya jaara nia soore cua tojijiaa  
nia quishacari. <sup>23</sup> Niaa jaara naa miishaaretej,  
jiyanoohua nia timiri. Nia jaacuatate nia shuquiriniutia.  
Niaa jaara naa nia miishacari rejeretajaca quiri, Pueya-  
soori nia niishishoo casaa racatasano jiiitaa jiyocua-  
caanu, na niqutiosocoriquiano nijaniya. Nia paraa  
supuetanaari naa taraatia miiquiaari tariucuaaanu  
Pueyaso sequenu panishano caminiujiunaa pueya-  
juhuaj.

<sup>24</sup> 'Niaari saniniuujia taraatia quijiaa quiniutianiya,  
jamuejaca casamiriaca pueyanaa. Niaacuajaari tari  
shuquiriaatia quiquianu, puetunu nia panishanoju-  
naa nia jittiasacari.

<sup>25</sup> 'Taraatia quijiaaari nijaniya, cante sequejani:  
“Janiyacujaja maninia pueyanoni. ¿Janiyatucua casaara  
paniri Pueyaso jiyanooniuria janiyani?” Naa sequejaca  
pueyanaa, na nuhuaji, niaari niishiniutianiya niaari  
saaja sesoriquia pueya seque.

'Taraatia quijiaaari nijaniyajuhua, jeya nia  
quiyaquishacari Pueyasora, saaja tamajaaja shuquiri-  
aattia nia quiniuria nia cojesacari pueyaracaanu. Niaari  
na nuhuaji sapuenutaniya Pueyasooju nia quishacari  
pueyaracaanu.

<sup>26</sup> Taraatia quijiacaari niajaniya, puetunu pueyajanaa jaara maninia pahuataquiaa niajanijajini, maninia nia cojiniuucua cuno pueya, Pueyaso tojiyashijia pueyani. Cuno pojori supuetanaacuaajaari naa shuquiritiaquiaari cuno sapojonuujua, canapue te maja seetanujuanaa Pueyaso sequesano caminiujiuni-aa quiquiaaricujani.

### Pa paraa panijia pa quirij

(Mt 5.38-48; 7.12)

<sup>27</sup> Niajaniya, cante niya cua tojtiaacuajani, cua tojitiuri. [Nia paraa nia paniri! Maninia nia miiri nia niquiniu paniyashijia pueya. <sup>28</sup> Saaja maninia nia riu- cuare nia juayano pueyano. Sesa nia miijia puey- acua nia secojore Pueyaso. <sup>29</sup> Pueyano jaara quia maseca piri, quia jiyanoori nojuaja. Jaara taquijiria piri- juhuaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niquitiorjuhuaj. <sup>30</sup> Pueyano jaara quia sequere quia casamijini quia niquitionura nojuaja, quia niquitior nareja. Pueyano jaara quia casaa jaariutiare, majaari na sequenu: "Cua niquitiorohua". <sup>31</sup> Maninia nia miiri tamasaca, taa nia paniquiaa tamasaca miiniuria niajanijacuaani.

<sup>32</sup> Naa jaara saaja nia panijia paniriquia, majaari nia jyaniniu Pueyasoori nia shuquiritiaa naa nia mi- ishacari. Sesa miijia pueyari naa paniquiaa nojori panijiacajuhua. <sup>33</sup> Maja puera maninia miijia niajaniya, niaa jaara maninia miiquiaa saaja noo pojori, cana- pue te maninia miiquiaa niajanijacuaani. Sesa miijia pueyari naa maninia miiniu niishiquiaajuhua, noo po- jori canapue te maninia miiquiaa nojoricuaani. <sup>34</sup> Maja puera maninia miijia niajaniya, niaa jaara nia masena niquitioquiaa na panishano, nia niishishacari nojuaja ritia niquitionutaniuhua niajanijajini na maseno casaa. Sesa miijia pueyari na casaa rupaquijira niquitioquiaa narta sesa miijia pueyajuhua, na ni- ishishacari nojori ritia niquitionutaniuhua nojori maseno casaa rupaquijira. <sup>35</sup> Nia paniri nia paraa. Maninia nia miiri nojori. Nia casami nia niquitior nareja, pueya jaara na paniya rupaquijira. Majaari nia taraajenu cuno pueyano jaara nia niquitioyquiriohua nia casaa. Naa nia miishacaritij, niaari seetanujuanaa Jiyocuaaanu Quijia muerasu. Pueyasoori socua jyanohua queraatia nia niquitionutaniya tamasaca nia niquitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitiojoquiaa sesa miijia pueya, mariyata canapue te na se- queyashijiacani "paacarasho". <sup>36</sup> Naaratej, jyanootio nia quiri, taa nia Que Pueyasocuaani, jyanoojia.

### Maja sesa nia niishiriojonu niarta pueyanoocua

(Mt 7.1-5)

<sup>37</sup> Maja nia rimiaaquenu tamasacaacuara, Pueyaso mariqui saniniuujia nia jyanoyquiriri. Naa jaara tamasacaacuara tonujiyashijia quiri, naajuhua, Pueya- soori maja na saneenu quiniutianiya sesa nia miis- hanojuhuaj. Naa jaara jyanootio quiri, Pueyasoori nia

jiyanooniutianiyajaacuhua. <sup>38</sup> Naa jaara tamasaca niq- uitioquiaa na panishano, Pueyasoori naa nia niqui- tionutaniya nia panishanojuhuaj, maninia shanacu- sano, jiuuquiutiasano, maninia quianujusano, mishaja quera niitiano. Pueyasoori mariyata juhua nia shana- cutajajinia nia niquitionutaniya niajaniya, taamueca shanacutajajinia nia niquitioquiaa pueyacuaani.

<sup>39</sup> Jesuuri socua niishitiojoquiaari pueya, nio miriqui sequesano:

—¿Cariyojuarute na naata narta cariyojuaru jaatu- cunu? Naa na jaatucusacari narta cariyojuarutej, no- joriiri mariyata totentaniya raama. <sup>40</sup> Pueyanoori ma- ja socua niishijia na niishitiojonajini. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhua, juhua na niishitiojonaja.

<sup>41</sup> ¿Casaara nia niquiya rucua maano quia tarajanu namijajiniani, niaa jaara puereetua maca jitiiaa tama nia namijajiniaaja? <sup>42</sup> Naa jaara puereetua maca shanacua tama nia namijajiniaaja, ¿niaatucua casaara sequere quiarta pueyanoni: "Cua tarajanunaa, cuno rucua pa taquiri quia namijajini"? Sesa jiuu- jiaracanaa, tama nia namijajiniijaaja nia pare coteenu cuno maca. Na nuhuaji cutara nia naata maninia niquiniu, cuno rucua nia taquiniuria nia tarajanu namijajini. Naaratej, majaari nia rimiaaquenu niarta pueyanoocua.

### Naanaari niishishano na jajajini

(Mt 7.17-20; 12.34-35)

<sup>43</sup> Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. <sup>44</sup> Puetunu naanajanaari maninia niishishano na muetusanoiniji. Majaari pa naata satuna carojonu shuunijajini. Naajuhua, ma- jaari pa naata tuhuaracona carojotanu saarianajini. <sup>45</sup> Naajuhua, maninia pueyanoori maninia pocuaa cu- tara, maninia jiuujiaraca na quishacari. Sesa pueyanoori saniniuujia sacuaatia rimiaaqueja, sesa jiuujiaraca na quishacari. Casaa pa niishiriojoquiaa poojajiniani, paari cuno pocuaani.

### Miriqui Jesu pahuatasano cumueca jiyajini, sasaca

jiyajinijini

(Mt 7.24-27)

<sup>46</sup> ¿Casaara nia sequequiaa janiyani, "Cua jiyani- ijianaa, cua jyanijianaa", niaa jaara cua rootasano toji- tiaaquiuaa? <sup>47</sup> Cua tojiri. Cante cua rupenara quiri cua rootasano tojia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueca jiyajini na morijiuucua. Na nuhuaji, moo jaara pa- jaashiquiaari, pajaacaari jyanohua cajiquiaari cuno tiaacua. Naajaa, majaari na muecurujutano quiquiaari, maninia nujuatejosano na morijiuuca quishacari cumueca jiyajini. <sup>49</sup> Saniniuujia, cante na- juhuana cua niishitiojosano tojiyaquiuaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa

tiaquiaari sasaca jiyajinia. Na nuhuaji, moo pa-jaashishacari, pajaacaari jiyano-hua cajiquiaari cuno tiaacua. Cuno tia pojoretaquiaariiri. Pajaari cuno tia ni-yartaquiaari puetunujuanaa.

### Jesu naatanishacari Romano capitán seru

(Mt 8.5-13)

**7** Jesu jaara pueya niishitiojonu puecaquiaari, na pueyata quiaaree Capernaum tiacajiniaari. <sup>2</sup> Romano soldadohua capitánri quiniqui quijia quiquiaari. Jiyano-hua na panishano seruuri cusosu matariquiaa. Quera cusoriquiaari. <sup>3</sup> Capitán jaara tojiquiaari Jesujini-ji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. <sup>4</sup> Judiocuaca camarucuaari Jesu-ucua quiojoquiaari. Nojoriiri juhuacatecara Jesu seco-jonu coteequiaari jiyano-hua, nojoritia na quianura. Nojoriiri Jesu sequeeree:

—Cuno Romano capitánri canaa jiyaroreeni, ¡hojua-jaari jiyano-hua maninia pueyano! ¡Quenaaja quia miiri na panishano! <sup>5</sup> Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumaneecatajaaja!

<sup>6</sup> Naacuajitij, Jesuuri nojoritia quiaquiaari capitán tia-jiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyani-ijianaa, majaari cua taajetenu paniniu quiajaniya. Jani-yari maja maninia pueyanoni cucua quia tiuquiniuria cua tiajinia. <sup>7</sup> Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequare cua seru naatanura. Janiyari niishiyani, quiaa jaara naa sequare, cua seruuri naatanutani-uhua. <sup>8</sup> Janiyari niishiyajaaniuhua, cuno cusonuuri quia tojiniutianiya taa cua tojiquiaa cua jiyaniijianu-cuacuaani. Janiyari cua jiyaramiquishano soldadohua jiiitiaajuhua. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara ta-monu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishyanijia quiaari jiyano cumaacaracajuhua.”

<sup>9</sup> Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajiniaa pueya niquiniijoree. Nojori sequeereeri:

—Seetanujuanaa nia sequeyanijia, puetunu parta Is-rael pueyajiniujoanaani, ¡majaari quenaaja cua niqiniu quiquianu Pueyasoocua tiuujia pueyano juhua nio tahue!

<sup>10</sup> Capitán jiyaramiquishano pueya tiuquiiijosacari-uhua capitán tiajiniohua, nojoriiri Capitán seru niquishuhua tariucua naatanohua.

### Jesu samiitianishacarihua mashiquio niyanu

<sup>11</sup> Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quio-joriquiaajuhua, socua queraatia tamasa pueyano.

<sup>12</sup> Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macu-uri jiyacunojuanaa na nucua niyanu quiquiaari. Na nu-cuaari mashiquio quitiasuquiaari. Queraatia pueyari na nucuata macu nuhuaji sacuariquiaa, jamajiniara nojori quiojosacari. <sup>13</sup> Jesu niquishacari mashiquio, nocua taraajereeri. Na sequeereeri:

—Maja nujuquenu.

<sup>14</sup> Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesu-uri macu sequeeree:

—Mashajanaa, janiya quia sequeyani: “¡Quia sanere!”

<sup>15</sup> ¡Macuuri cajiquii! Juhuacatecara pocuareeri. Jesuuri na nucuacua na jaatucuree. <sup>16</sup> Puetunu pueyajanaa jaara naa Jesu miishano niquiquiaari, jiyano-hua puere-tureeri. Nojoriiri Pueyaso shuquiritiaree jiyano-hua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyano-hua cumaacaraca! Nojoriiri naa sequetureejuhua:

—¡Pueyasoori shusha quiarijia na saquiriojosano Is-rael pueya niishiriohuacu-hua, na cumaquiniuria pa-janiya!

<sup>17</sup> Jesujiniji pueya pahuatasanoori caminiu-jiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanao.

### Tiuquinijiona Juan jiyaramiquishano pueya neque-soresacari Jesu

(Mt 11.2-19)

<sup>18</sup> Tiuquinijiona Juan pueyari puetunu Jesu miishano-juanaa pahuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

<sup>19</sup> —Jesuucua nia quiaare. Niocua na sequeesee: “¿Quiaate seetanujuanaa Pueyaso Jiyarosano, tariu-cuacaanu sequesano niriqianotej, tamonute sashishiyajaara soj?”

<sup>20</sup> Naaratej, Tiuquinijiona Juan jiyarosano pueyari Je-suucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriqianotej, canaate tamonu sashiya-jaara soj?”

<sup>21</sup> Nojori tiuquiiijosacari Jesuucua, jiyacaritij, Jesuuri queraatia pueya naatanijoree nojori niqiiara; cusu-suhua, pueyaracaanu nootunejaca, samaruharaca pueyano. Mariyata queraatia cariyojuarujuri jiyatero-hua niqiiacaraari. <sup>22</sup> Na nuhuaji, Jesuuri naa Tiuquini-jiona Juan pueya sequeeree:

—Nia quiaarohua. Tiuquinijiona Juan nia pahuata-suhua taa nia niqiriicuajani, nia tojishanonio. Nia se-quesuhuanoj: “Cariyojuarujuriiri niqiiacara quirio-hua. Shipiiniuquiujiuniaari maninia rucoorohua. Lepra cusotajacaari cushiriitishaarohua juhua juhuanaraja nojori quiniuhua. Numueejunucuaari tojiiacara quiriohua. Macunucuaari samiitianijiosarohua. Casamiijiuniucua pueyari Pueyaso rupaa pahuatasaa-ree, Pueyaso pueyara nojori jiyatesaanura. <sup>23</sup> Shuquiri-

aatia quijia cutaraari nooj, cante cucua tiuuniu tariniti-aquiyani”.

<sup>24</sup> Tiuquinijiona Juan jiyarosano pueya jaara quiojo-quaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniuucua nia quiojocanu cariquia jiyajiniani? ¿Niaate noojia niquijoteja niquiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. <sup>25</sup> ¿Casaa niquiniuucua nia quiojocanunitioj? ¿Niaate maniniuqui toque cushijia niquiniuucua quiojocanu? Niaacuajaari niishiya, shanohua toqueya cushiyonuujuaaari saaja jiyaniijianucua tiajinia quiyano niquishano. Nojoriiri tama na panishanojuaaja miijia. <sup>26</sup> ¿Taateerinitioj? ¿Casaa niquiniuucua nia quiojocanuuri? ¿Pueyaso sequenu panishano caminiujiuniate quiquianu? Taaquiririni. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianaa. <sup>27</sup> Cuno Juanjinijicuaaari tariucuaaano Pueyaso Rupaajinia naajiotasano quiquiaari. Pueyaso sequesano nojuajiniiri naa naajiotasaaquiaritij:

“Cua sequenu panishano caminiujiuriquiano jiyaroyanijia, na puetanura quiajanija, nuu jeenucuariquiano quiocuajij”.

<sup>28</sup> Seetanujuanaa nia sequeyanijia, puetunu Pueyaso sequenu panishano caminiujiunijianijiojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiushacarini, Pueyasora, nojuajaari socua cutara pueyano Tiuquinijiona Juanjiniji.

<sup>29</sup> Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasinijiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

<sup>30</sup> Saniniuujia, Fariseocuaca, mariyata Moisés Rootasanojiniji niishitiojanaani, nojoriiri Tiuquinijiona Juan pohuatasano ruoretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhua. Nojoriiri Pueyaso miniu panishano nojoriria soocanu saaja. Naacuajitij, majaari nojori jiyanooshaanu quiquianu.

<sup>31</sup> Jesuuri socua sequeree:

—¿Quiarijia nio pa quishacari pueyarijataj? <sup>32</sup> Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucuaa curotasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniujuhuaj”. <sup>33</sup> Naajuhua pueyanaa, niaari Tiuquinijiona Juan tojiaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na

sequeja, “samaruraca”. <sup>34</sup> Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhua. Cunora niaari cua sequequiaa:

“Cunoori sacuaraatia miaquejoru, ratunu porocuanio, sesa miijiaa rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojitiaaquiyajaacuhua.

<sup>35</sup> Naajaa, pueya jaara canaa pohuatasano tojijiaa quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojijiaa jatasacari maninia quijiacara.

### Jesu miaquesacari Fariseo Simón tiajinia

<sup>36</sup> Tamonu Fariseo pueyanoori Jesu masuuquiaari na tiajinia na miaquenura. Jesuuri na tiajinia quiaaree. Mi- aquenuujua shuriuquiumia roshishiiri. <sup>37</sup> Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiarijuhua. Shiitaniyojua seesariquiaa pataconiyojua cacatariquiaari, cohuaa saajiajiniji quejasano. Mishaja quiriquiaari shanohua jaanutajata. <sup>38</sup> Maajiiri Jesu cashacuucuma mojuquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. <sup>39</sup> Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujiunia quiri, mariqui niishiri cante na coyani, taamueca maajitijianojoni”. <sup>40</sup> Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

<sup>41</sup> Jesuuri na sequeree:

—Caapiqui pueyanoori cumaneeca masequiaari rupaquijiaa tamonu cumaneeca niquitiojonajiniji.

Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua cincuenta juuca poonijiosanojiniji masesano.

<sup>42</sup> Na nuhuaji, nojori sequesano juuca jaara tari quiquiaari na camaru nojori niquitiohuara na cumaneeca, majaari nojori jitianu quiquiaari cumaneeca.

Naaratej, cumaneeca niquitiojonaari nojori sequeree:

“Naajaa, maja socua nia niishiriojonu nia niquitiohuara tarijia cua niquitiosano cumaneeca niajanija”. Cumaneeca niquitiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niquitiojona panijiaa quiniutianiyani?

<sup>43</sup> Simónri Jesu riucuaaree:

—Cunocuaajani, cante socua queraatia cumaneeca niquitiosaaquiaricuaajani.

Jesuuri na sequeree:

—Taaquiririni.

<sup>44</sup> Jiyacaritij, Jesuuri cuno maajicua tacateree. Simón sequereeri:

—¿Quiaate nio maaji niquiya? Cua tiuquishacari quia tajinia, majaari quenaaja quia niquitionu quirii mo-huaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na mucacataari. <sup>45</sup> Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. <sup>46</sup> Naajuhuj, majaari quia totanu quirii muesu nunacu cua nacaacua. Nio maaji cutaraari cua niohuacaacua totaree shanohua jaanutaja. <sup>47</sup> Naaratej cua tojiri. Nio maajiri jijanohua sesa miijia quiriquiaa. Naaratej, jijanohua cua paniyari puetunu sesa na miishanojinijianaa cua jiyanooniuucua nojuaja. Saniniuujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

<sup>48</sup> Na nuhuaji, Jesuuri cuno maaji sequereeri:

—Quiaacuajaari tari jiyanooshaaree sesa quia miishanojiniji.

<sup>49</sup> Narta masuusano pueya nata cajitiuanoori juhua-catecara tama sequetooreejaaja:

—¿Cantucuaa nio pueyanoni, sesa miijia jiyanooriquianoni?

<sup>50</sup> Jesuuri maaji sequereeri saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

#### Jesura pueraquena maajipohujiniji pohuatasano

**8** Na nuhuaji, Jesuuri rucuanajoquiaari queraatia tiacajinia, shiitianiyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jitianu paniya na muerasuni. Na doce saquiriojosano pueyari na cojiriquiaajaacuhuj. <sup>2</sup> Noojiaqueya maajipohuari na tarajariquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhaatej. Nojorijinijioori quiquiaari María Magdalena. Jesuuri cuno María-jiniji tohuatanijioquiaari siete samaruha. <sup>3</sup> Quiriquiaajaariuhua Juana, Cuza niquiocuani. Cuzaari jiyaniijia Herodes jiiitiasano casami cojuana quiquiaari. Susaanaari nojorijinijinio quiquiaarijuhuaj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jiiitiasano casaatajaaja. Nojoriiri nera pueraquenuunaa quiquiaarijuhuaj, tiqiyocua nojori rucuanijosacari Jesuta.

#### Jesu pohuatasano natoojona pueyanojiniji

(Mt 13.1-9; Mr 4.1-9)

<sup>4</sup> Queraatia cuno jiya tiacajinijinio pueyari nijioquiaari nojori niquiniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasanota. Nojori sequereeri:

<sup>5</sup> —Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari

totequiaari nucuaco. Tii rapijiosaaquiaariiri. Shuhuari na miojoquiaari. <sup>6</sup> Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. <sup>7</sup> Tajaacaari toteree riyocuaca tajinia. Riyocuacaari socua ritia maashiquiaari. Na natananoori tarinitiuucua quirii. <sup>8</sup> Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—Niaa jaara numaraca quiri, nia tojitiare cua pohuatasano!

#### Casaarate miriqui pohuatasanoni

(Mt 13.10-17; Mr 4.10-12)

<sup>9</sup> Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. <sup>10</sup> Jesuuri nojori riuucaree:

—Niaari saquiriojosaaquiaari nia niishiniuria taa Pueyaso poonijia pueya jiuujajiniani, na muerasura nojori quiniuria. Cunoori tariucuaaanu pueya niishishoo. Janiyari tamasa pueya niquiara pohuataquiaa miriqui cutarani. Naacuajitij, nojoriiri cua pohuatasano niishiyaquiquiaa na tojitasacari. Naajuhuj, cua cumaacata cua miishano cariyoshitiquiaari, nojori niquiara cua miishacari.

#### Jesu niishitiojosacari na pueya, miriqui na pohuatasano natoojonajiniji

(Mt 13.18-23; Mr 4.13-20)

<sup>11</sup> Nia niishitiojoreera miriqui cua pohuatasano natoojonajiniji. Pueyano natoojosano jajauri juhua Pueyaso rupaa. <sup>12</sup> Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojajinijiiri, maja nocua na tiuuniuria, nojuaja mariqui jiyanooshaareeri. <sup>13</sup> Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasoocua tiuquiaa shuquiriaatiaari. Naa miijiaacari juhua puera shiitianiyojua nujuacaraca. Naacuajitij, nojori jaara saniniu-jiushaare, nojoriiri ritia Pueyasoocujia rupatequiaa.

<sup>14</sup> Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhoo natau quiya, tarinitiuucua riyocuaca tariyoshitishano. <sup>15</sup> Maninia jiyajinia toteno jajauri saniniuujia juhua noo pueya, canapuate maninia tojitiareecuaja Pueyaso rupaani. Na racataa maninia noojajiniani. Pueyaracaanu na tojtiaquiaari. Majaari na pishiniu Pueyasoocujia. Naacuajitij, nojoriiri juhua queraatia muetujua natau.

**Pueyaso muerasuuri juhua samaritiu cuhuataja**

(Mr 4.21-25)

<sup>16</sup> Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquiti-asacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuataaaria puetunu pueya niquiarajanaa.

<sup>17</sup> Puetunu jamojosano casaajanaari riuriatasaanutaniya. Puetunu jiyasohuaja nia miijosanojuanaari niishishaanutaniyajuhuj. Cuhuataasaanutaniyari maninia niquishocoriquiano. <sup>18</sup> Cunora, cua sequesano tojitiajaca nia quiri maninia. Cante maninia jitiaa cua rupaani, nojuajaari socua na niishijara jiyatesaanutaniya. Saniniuujia, cante cua rupaa tojiyashijiani, secaja najuhuaana na niishishanoori jaariutiasaanutaniya, puetunu shaaquiriajanaa.

**Jesu tapueyocuaca tiuquijosacari Jesuucua nojori nu-cuata**

(Mt 12.46-50; Mr 3.31-35)

<sup>19</sup> Jiyacaritij, Jesu nucua Jesu tapueyocuacata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanojua queraatia pueyari nocuara ritiariquiaa saaja tia tohuateyaji. <sup>20</sup> Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niquitiuniu paniyaquinia.

<sup>21</sup> Jesuuri tii quiniaa niquiara sequeree saaja:

—Canapuate seetanujuanaa Pueyaso Rupaa tojitiajapani, nojoriiri cua nucua cutara, cua tarajanuhanio.

**Jesu pueyajetesacari paratu, mohuacanio**

(Mt 8.23-27; Mr 4.35-41)

<sup>22</sup> Tamonu juuca, Jesuuri botejina tacataquiaari na saquirojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. <sup>23</sup> Nojori niuti-asacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyanojua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. <sup>24</sup> Jiyacaritij, na pueyari Jesu niucuajasee ritia. Na sequetuseeri:

—Niishitiojonanaa! Niishitiojonanaa! Paa tari tiuquitiaani!

Jesuuri sanemaa. Paratu sequereeri, mohuacanio:

—Tariucuaja! Nia suraajere!

Paratu, mohuacaari ritia suraajee. Paratu piyarojonuuri tajimaa, caminia queyocuaanonio. <sup>25</sup> Jesuuri na pueya sequerohua:

—Niaacuaja juuca Pueyasocua tiuujia. ¿Casaa nia tojetareerini?

Nojoriiri Jesuucua jiuujiatecoree. Shiriiquitiuriquiaari Jesu miishano nojori niquishacari. Tama nojorijaarijia nequesoreetooriquiaa:

—¿Cantucuaanojoni? Paratu, mohuacaari na tojiriina sequesacari!

**Gerasa jiyajinijinio samaruhuaraca pueyanojiniji pohu-atasano**

(Mt 8.28-34; Mr 5.1-20)

<sup>26</sup> Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. <sup>27</sup> Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqi. <sup>28</sup> Na niquishacari Jesu, na cariquimijia mojoquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? Quia niishiyaniija! Quiaacuajaari Jiyajinijiaanaa Pueyaso Niyanu! Cua tarinitiare quenaaja! Maja naquiya cua miiniu!

<sup>29</sup> Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuaara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quiniuria. <sup>30</sup> Jiyacaritij, Jesuuri na nequesotaree:

—¿Taateja quia sesani?

Samaruuri na riuquaree:

—Cua sesa “Queraatia”.

Naa Jesu sequequiaariiri jiyanojua queraatia samaruhua na jitiasacari. <sup>31</sup> Samaruuri jiyanojua secojoree Jesu, maja nojori na jiyaronura puequeetuuju raama saniitosocoriquiano. <sup>32</sup> Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. <sup>33</sup> Cunora, samaruuri pueyanojiniji tohuareetaquee. Cushiyajinia tiuquitiaseeri. Puetunu cushiyajanaari cocuaterree. Tacobiniji totesee caminiajinaari. Tii shushiniuuriiri.

<sup>34</sup> Cushiya cojuanaa jaara niquiquiaari na miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariquiacajinijuhuj, tee pueya quiriquiaacuajani. <sup>35</sup> Puetunu pueyajanaari Jesuucua nijioquiaari na tiacajiniji, pueya pohuatanuusanoiniji nojori niquiniuria. Nojori tiuquijosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. <sup>36</sup> Jiyacaritij, Jesu miishano niquitianiari shusha nijiono pueya pohuataree taa samaruhuaraca pueyano naatanishaarohuani. <sup>37</sup> Cuno-ra, puetunu Gerasa jiyajinijinio pueyajanaari jiyanojua

puereturiquiaa. Naaratej, Jesu secojotureeri na quianura nojori jiyajiniij! Naaratej, Jesuuri botejiniatacatakaariuhua na pueyata na quianuhua.

<sup>38</sup> Cuno pueyano, canajiniij samaruhua tohuareeta-reecuajani, nojuajaari Jesu secojoree juucua nata na quianura. Jesuuri saaja naa na sequeree:

<sup>39</sup> —Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajiniajanaa pohuatasuhuari taa Jesu miiriucuaa maninia nojuajani.

### Jesu naatanishacari Jairo niyatu, Jesu toque quiana maajinio

(Mt 9.18-26; Mr 5.21-43)

<sup>40</sup> Jesu jaara niutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. <sup>41</sup> Jiyacariitij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojuquetaseeri na secojonura na tiajinia Jesu quianura. <sup>42</sup> Neyatuniyojaari quera cusoriquiaa jiyacari. Majaari socua niquiohuaraca na quiniu quijia. Doce mariijaari tari shocojoquiaari cuno neyatu.

Jesu quiasacari Jairota, jiyanoohua queraatia pueyari nata quiojoriquiaajuhua. Pueyari jiyanoohua na tanuujiquiaa, nata nojori quiojosacari nucuaco.

<sup>43</sup> Tamonu maaji cusosuuri cuno pueya tajinia quiriqiaajuhua. Doce mariijaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari. <sup>44</sup> Maaji cusosuuri Jesu nijiniij catecanoquiaari nocua. Na tucuaque toque casaca quiaasee jiyasohuari. Na nanacaari ritia curetaquee!

<sup>45</sup> Jiyacariitij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniani.

Pedroori Jesu sequeree:

—Niishitiojonanaa, ¿majateeri quia niquiniucuaaja?

Queraatia pueyacuajaari quia tanuujia.

<sup>46</sup> Jesuuri saaja sequeree:

—Maja. Cusos cua quiareeni. Niishiyaniijia cua cumaacaari tari na naatanirii.

<sup>47</sup> Maaji niishishacari na miishano jiyasohuaja tari niishishaaree, Jesuucua nimiaari. Na puereenta tete-cariquiaari. Jesu cariquimiaji mojuquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareerajuhua taa na naataquee ritiani, Jesu na quiasacari. <sup>48</sup> Jesuuri na sequeree:

—Sanaunaa, cucua quia tiuniucua, quiaari naatarohua. Quioojia quia cajitiriohuan. Juhuajaniani quia quiaarohua.

<sup>49</sup> Jesu pocoojosacariija cuno maajitia, tamonu pueyanoori tiuquiquiaari Jairo tiajinij. Jairo sequeeseeri:

—Quia niyatu tari cusoquee! Maja najuhuaana riniupaniniu Niishitiojona quia tiajinia.

<sup>50</sup> Jesu tojishacari cuno pueyano sequesano, Jairo sequereeri:

—Maja puereenu. Cucua quia tiuuri saaja. Quia niyatucuaaja naatanianuhua.

<sup>51</sup> Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuano.

<sup>52</sup> Puetunu tii quiniaa pueyajanaari maaji samiriucua nujuqueturiquiaa. Sapiyonuuriaaajaariuhua. Jesuuri nojori sequeree:

—Maja najuhuaana nia nujuquenu. Maaji samiriu maja najuhuaana, nareja maqueyano.

<sup>53</sup> Naa Jesu sequesacariitij, pueyari na saroojotaree saaja. Nojoricuajaari niishiriquiaa maaji samiriuri see-tanujanaa macu quiriqiaa. <sup>54</sup> Jiyacariitij, Jesuuri macuucua tiuquiquii. Na juaashiquiaajiniij na quiaaseeri. Jiyanoohua na sequereeri:

—Maaji samiriuniaa, Quia sanere!

<sup>55</sup> Na sohuanuuri nocua tacatemohua jiyacari. Samiitiamohuari. Ritia sanequeeri. Jesuuri na nucu sequeree na mianuutenura. <sup>56</sup> Na queyari jiyanoohua jiuujiateree. Jesuuri nojori sequeree, maja nojori pohuata-nura tamasaca niquiara na miishano.

### Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

**9** Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitio-re cumaacaari, puetunu tamaatia sesa samaruhua-janaa nojori tohuatejonura, cusosuhua nojori naatanijonurajuhua. <sup>2</sup> Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni pania nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijonura. <sup>3</sup> Jesuuri nojori sequeree:

—Maja nia panu nia rucuanajotajara nia panishano. Majaari nia miojotu nia panu, nia caashoque, nia coseyaca, nia cumaneecano. Saa nia cushishano toquetaja nia quiaare cutara. Maja socua toque nia panu nia cushishocoriquiano. <sup>4</sup> Naa jaara tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniij quiaareajatiija. <sup>5</sup> Naa jaara tamonu tiacajinia tojiniu paniaquishaare, cuno tiacajiniij nia quiaare. Nia nuhuajiria, cuno pueya niquiara niocua nia niocuajiniij cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanooyaquiniutianiya, nojori tojtianu paniaquiniucua Pueyaso rupaa pohuataanaa.

<sup>6</sup> Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuquiaari pueya jiyanooshaanura, Pueyaso pueya nojori quiniuria. Naajuhua, cusosuhua naatanijio-tuquiaariiri.



**Jiyaniijia Herodes niishiniu panishacari cante Jesuni**  
(Mt 14.1-12; Mr 6.14-29)

<sup>7</sup> Jiyaniijia Herodesri pahuatasaaquiaari puetunu Jesu miishanojinijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari se-queriquiaa: “Jesucuaajaari jiyaniijia Herodes nacatanishano Tiuquinijiona Juan samiitianohua”. <sup>8</sup> Tamasaca pueyari Jesujiniji sequeriquiaajuhua: “Supuetana Elías-cuaja tari tiuquiriohua”. Nojuacuajaari tariucuacaanu Pueyaso sequenu panishano caminiujunia quijia. Saniniuujia, tamasa pueyari sequeriquiaajuhua: “Jesucuaajaari tamonu tariucuacaanu Pueyaso sequenu panishano caminiujunia samiitianohua”. <sup>9</sup> Herodesri saniniuujia sequeree:

—Janiyacuaajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.

**Jesu mianuutesacari cinco mil pueya**  
(Mt 14.13-21; Mr 6.30-44; Jn 6.1-14)

<sup>10</sup> Jesu jiyaramiquishano pueya tacatesacariuhua, nojori Jesu pahuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. <sup>11</sup> Pueya niishishacari tee Jesu quiriquiaani, nojori saaja nocua quiojoquiaari. Naajaa, Jesuuri maninia nojori maseree saaja. Cuno pueya pahuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijoreehua.

<sup>12</sup> Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetujarajuhua. Nojori panishanoori shaaqui niya pa quishaquini.

<sup>13</sup> Jesuuri nojori sequeree saaja:

—Niaa mariqui nojori mianuutere saniya.

Nojori Jesu sequeturee:

—¿Canaateeri miaquesanoracajaarani? Canaa saaja cinco panniyojua jiidiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

<sup>14</sup> Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuara cajituriu cincuentera jatiqui, socua cincuenta tamaqui. Mianuutesocoriquiano puetunu pueyajanaa, cuara naa cajitiuuriatej.

<sup>15</sup> Nojori Jesu sequesano miirii. Puetunu pueyajanaari cajituriu. <sup>16</sup> Na nuhuaji, Jesuuri cuno cinco panpataree, caapiqui sapitiaajanio. Jiyocuacaanu maureeri na Que Pueyaso na seconura miaquesanoocuara. Na nuhuaji na necasereeri. Na pueya na niqitioreeri puetunu pueyajanaa nojori serotasocoriquiano.

<sup>17</sup> Puetunu pueyajanaari na miaquenuuree. Maninia

tooquioreeri. Na nuhuaji, doce canaasatuuri mishini-jiosaquiaari pan raacuata, sapitiaaja raquiquiatanio.

**Pedro sequesacari Jesuuri seetanujuanaa Cristo**  
(Mt 16.13-19; Mr 8.27-29)

<sup>18</sup> Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

<sup>19</sup> Nojori nojori na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhua, quiaana Elías, tariucuacaanu Pueyaso sequenu panishano caminiujunia. Tamasacaari saniniuujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujunia samiitianohua.

<sup>20</sup> Jesuuri saniniuujia nojori nequesotaree:

—¿Niajanियariuhua? ¿Taa nia sequeyani, cante janiyani?

Pedroori na sequeree:

—Quiajaniyacuajaari Cristo, Pueyaso Jiyarosano.

<sup>21</sup> Jesuuri jiyanohua nojori rootaree maja nojori pohuatanura tamasa niquiara cante nojuajani.

**Jesu numootesacari na pueya, nojuaja mosaanutaniya**  
(Mt 16.20-28; Mr 8.30-9.1)

<sup>22</sup> Jesuuri naa nojori sequerohuacuhua:

—Janiyani jiyanohua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhua, pa pueyacuara seconaa jiyaniujanucuaari cua niqiniu paniyaquiniutianiya, Moisés Rootasanojiniji niishitiojanaanio. Nojori cua monutaniya. Naajaa, jiuujianaraca juucajinia, janiyani samiitianutaniuhua.

<sup>23</sup> Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuara niyajetaara tama na miiniu panishanojuaja. Cuara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. <sup>24</sup> Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanohua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriatia na quiniuria. <sup>25</sup> Pueyano jaara puetunu nio jiya casamijianaa jiidiana quiri, cuno maara najuhuana quiri, nojuaja jaara na shaajesacari jatasaare mani quiquiojinia Pueyasooju. <sup>26</sup> Cante cua seera caririquiya mijiria quinia pueya niquiara sequenurani, janiyani nojori jiyaniijiani, naajuhua janiyani nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanohua niqueshano quiniutianiya cua tiuquishacariuhua cua Que shacantuca cumaacatani, na seya cumaacatajuhua. Naajuhua, cante cua rupaa pohuatanu caririquiya sesa miijaca pueya niquiarani, janiyani nojori seera caririquini-

tianiyajuhuj. <sup>27</sup> Seetanujuanaa nia sequeyanijia, noo-  
aqueya nijaniyajiniiniori maja nia cusonuunu  
quiniutianiya juhuanojuaja, niaa cuaara niquirijaatijia  
Pueyaso cumaaca tiuquiyano cucua, na muerasu ji-  
itariquianoni.

### Jesu jatasacari shacantuucara

(Mt 17.1-8; Mr 9.2-8)

<sup>28</sup> Naa Jesu sequenu nuhuajitij, ocho juuca nuhuaji,  
nojuajaari tuhuananuucua tacaquiaari na Que Pueya-  
so na secojonura. Nata quiaareeri Pedro, Santiago,  
Juannio. <sup>29</sup> Jesu secojosacari Pueyaso, na jiquiocoori  
tamaatiara jataquiaari. Na toqueeri jiyanojuaa cohua-  
jara jataquiaarijuhuaj, shacantuquera. <sup>30</sup> Jiyacaritij,  
caapiqui pueyari nocua muetaquiaari. Jesuta pocoo-  
joriquiaari. Nojoriiri quiriquiaa supuetana Moisés,  
supuetana Elíasnio. <sup>31</sup> Nojori nujuatusaquiiri shacantu-  
uca quiriquiaa puetunu nojori shocuajanaa. Nojoriiri  
pocoojoriquiaa taa Jesu mosaanutaniya Jerusalén tia-  
cainiani. <sup>32</sup> Jiyacaritij, Pedroori jiyanojuaa maquenu-  
juriquiaa, nata quiniaajuhuj. Naajaa, majaari nojori  
maquenu quiriquiaa. Naacujitij, nojoriiri Jesu shacan-  
tuuca niquiquiaari. Cuno caapiqui supuetanaa niq-  
uitiurijiaariuhuj, Jesuta pocoojiyano. <sup>33</sup> Cuno caapiqui  
pueya quiojonu panishacariuhua Jesu shuriucujaji, Pe-  
droori Jesu sequeree najuhanaj:

—Niishitiojonanaa, canaa namitia niya quiyani!  
Canaa suhuororeera jiuujianaraca suhuorotucua;  
quiara, Moisésra, Elíasranio!

Pedroori naa najuhuaa pocuariquiaa. Majaari na ni-  
ishiniu quiquiaari casaa na sequeriquiaani. <sup>34</sup> Pedro  
pocuasacarijia, cohujaja najacaari nojori  
mishiquioma. Nojoriiri puereturiquiaa cohujaja naja-  
cainiani nojori quishacari. <sup>35</sup> Na nuhuaji, nojoriiri Pueya-  
so tojirii pocuaano cuno cohujaja najacainijiji. Naa se-  
quereeri:

—Niioori cua Niyanu, cua saquiriojosano nia Jiyaniijia  
na quiniuria! Nojuaja nia tojitiare!

<sup>36</sup> Naa nojori tojinu nuhuaji cuno rupaatej, nojoriiri  
Jesu niquiriohua. Tari tamajaaja nujuariquiaari. Nojori-  
iri sanaa na niqitiariquiaa. Na nuhuaji, majaari que-  
naaja tamonu nojori pohuatanu quiquiaari nojori  
niquishano, Jesu jaara samiitiaquiaariuhujaatijaj.

### Caya samijiajiniji Jesu tohuatesacari samaru

(Mt 17.14-21; Mr 9.14-29)

<sup>37</sup> Tariqui, nojori jaara rosetaquiaariuhua tuhuananu-  
jiniji, queraatia pueyari Jesuucua nijioquiaari. <sup>38</sup> Cuno  
pueya tajiniji, tamonu pueyanoori naa nacaquiaari:

—Niishitiojonanaa, cucua quia taraajere quenaaja!  
Cua niyanuniyojua quia niquiri! Jiyanijuanaari quiya-  
nuniyojua! <sup>39</sup> Samaruuri na miiquiaa taraatia! Na  
sariyotequiaari! Na taquiriocuatequiaariuhuj! Na  
rupaamajiiri cushaaquiaa! Na cuaqueya miiquiaa mo-  
quitiuriiari! Majaari ritia na cartenu paniniu  
quiquiaa. <sup>40</sup> Janiyari juucua quia pueya sequereeni,  
cuno samaru nojori tohuatenura. Majaari nojori naata  
quiriquiaa na tohuatenura.

<sup>41</sup> Jesuuri sequeree:

—Pueyaso tojitiaashijiacanaa, niaaqui Pueyasooocua  
tiuyashijiacajuhuanajaj. Janyateeri pueyaracaanu re-  
jeretanutaniya nijaniyani? Miji quia niyanu quia jaatu-  
cure.

<sup>42</sup> Caya samijia catecanosacari Jesuucua, samaruuri  
na pojotequee. Na taquiriocuateereeri. Jesuuri samaru  
sequeree na tohuatanura. Caya samijia naataniriiri. Na  
niqitiorohua na queeri. <sup>43</sup> Puetunu pueyajanaari  
jiyanohua jiuujiatereeri nojori niquishacari Jesu miis-  
hano Pueyaso cumaacata.

### Jesu pacutesacari pohuatanu nojuaja mosaanutaniya

(Mt 17.22-23; Mr 9.30-32)

Pueya jiuujiatesacarijia puetunu Jesu miishanojiniji-  
janaa, Jesuuri na pueya sequeree:

<sup>44</sup> —Maninia nia tojiri casaa cua sequenutaniya nia-  
janiyani. Majaari na niyajetanu. Janiyari niqitiosaanu-  
taniyani pueya miiniuria janiya taa nojori paniyacua-  
jani.

<sup>45</sup> Majaari na pueya niishiniu quiriquiaa Jesu seque-  
sano. Juhua miriqui sequesanoori quiriquiaa nojoriria.  
Naacujitij, majaari nojori naata niishiniu quiquiaari.  
Nojoriiri Jesu nequesotanu puereturiquiaajuhuj,  
casaa nojori na pohuatasano sequenu paniriquiaani.

### Cante jiyaniijijanaa cutarani

(Mt 18.1-5; Mr 9.33-37)

<sup>46</sup> Jesu pueyari juhuacatecara juayonuutariquiaa  
teyano nojorijinijiniote jiyaniijijanaa quiniutianiyanu.  
<sup>47</sup> Jesuuri nojori niishiriojosano niishirii. Naaratej, Jesu-  
uri naatujua nujuatereeri na shuriucua. <sup>48</sup> Na pueya se-  
quereeri:

—Cante nio mueya rupueya na cumaquiniuria cucua  
tiuujia cuno mueya quiniucuaani, nojuajaari cua  
rupueyajuhuj. Cante cua rupueyani, cua Jiyarona  
rupueyajaariuhuj. Naacujitij, cante tama na cuaque-  
yajaaja jiyateya pueya shocoteyashijia na quiniuria  
juhua naatujuaani, nojuajaari jiyaniijijanaa quini-  
utianiya puetunu narta Pueyaso muerasujinijiojuanaa.

### Cante maja pa paracani, nojuajaari pa jiyano

(Mr 9.38-40)

<sup>49</sup> Juanri Jesu sequeree:

—Niishitiojonanaa, canaari pueyano niquiriucuaani  
samaruhua tohuatanijiyano quia cumaacata. Canaari  
na tenujurucuaani nojuaja quiaquiniucua pajaniya-  
jinijinio.

<sup>50</sup> Jesuuri na riucaaree:

—Casaara nia tenujurucuaarinioj? Jiaateeri ni-  
ishiyaquiya, cante pa paraca quiaquiyani, nojuajaari  
pa jiyano?

### Jesu nacasusacari Santiago, Juannio

<sup>51</sup> Quera Jesu tacanu panishacari jiyocuaaanu, no-  
juajaari juhuacatecara Jerusalén tiacajiniara quiaaree,  
juhua jiuujiaaju na puereyaquiniutia. <sup>52</sup> Jerusalén tia-

caacuara nuu cajiniocua Samaria jiyajinia Jesu quishacari na pueyata, noojiaqueya na pueyajiniinio puerateree tamonu tiacajinia nojori masenura tia nojoriicuaijiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. <sup>53</sup> Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. <sup>54</sup> Santiago, Juan niishishacari cuno Samaria pueyari nojori sooriquiaa, nojoriiri cuno-ra Jesu nequesotaree:

—Jiyaniijianaa, ¿quiaate paniya canaa tininiuria mani jiyocuaaanuji, cuno pojori na catijianura, taa tariucuaaanu Pueyaso sequenu panishano caminiujiunia Elías miiquiaaricuaani?

<sup>55</sup> Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua niniu quiquiaari mijiria cua puecoonura pueya. Saaja niiquiaari cutaranijia, pueyacuaji cua tacunura.

<sup>56</sup> Na nuhuaji, nojoriiri tamonu shiitianiyojua tiacajinia quiojijaree tii maquenura.

**Tamasaca pueya quiniu panishacari Jesu pueyara juucua**  
(Mt 8.19-22)

<sup>57</sup> Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiqiyocua quia rucanejosacarijianaa.

<sup>58</sup> Jesuuri na riucaaree:

—Quiojuapueeri na raaca jiitiaa cutara. Shuhuari na jesuhua jiitiaajuhuj. ¿Saniniuujia Pueyaso Niyanuurijijitaj? Majaari cua jiitianu tama cua maquejarajaaja.

<sup>59</sup> Jesuuri tamonu pueyano sequere:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijianaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiata rucanejore cutarani.

<sup>60</sup> Jesuuri na riucaaree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucanejore cutara Pueyaso rupaa quia pohuatanura.

<sup>61</sup> Na nuhuaji, tamonu pueyanoori Jesu sequere:

—Jiyaniijianaa, janiya cutara quiata quianu paniyani. Coteenu cua tiajinia quiquiooraj, cua pueya cua niqiniuria cua nuhuajiria.

<sup>62</sup> Jesuuri miriqui na riucaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na camaru jaara na nijiniara niquiri, sesa naaniutianiyari shuyorocotiuycuara. Naajuhuj, cua pueyano jaara na quiquiojinia

tacatenu panijiohua quiri, nojuajaari maja maninia Pueyasora poonijiona.

**Jesu jiyaramiquishacari setenta y dos na pueyajiniinio, Pueyaso rupaa nojori pohuatanura**

**10** Nio nuhuaji, Jesuuri socua setenta y dos pueya saquirojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuj. Puetunu nojorijianaa jiyaramiquiri-caapiqui, caapiqui. <sup>2</sup> Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoonari quiya. Cunora, cuhuariquia camaru nia secojore, socua senoonaa na jiyaramiquiniuria puetunujuanaa na senoosaanura. <sup>3</sup> Nia quiojijare pueyanaa. Nia niishiri, janiyari nia jiyaramiquiya juhua borrego niqiohuani puereeta sareya tajinia. Pueyaso paraari juhua puereeta sareya. <sup>4</sup> Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhu-atasacari. <sup>5</sup> Tamonu tiajinia nia tiuquishacari, coteenu nia saruhuatere na camaru nio sequesano: “Juhua-janiya nia quiri, nio tiajinia quiniaanaa”. <sup>6</sup> Cuno tiajinia quiniaa pueya jaara jiyanoojiaca quiri, naa nia sequesacari, Pueyasoori nojori miiniutianiya maninia. Nojori jaara juajia quiri saniniuujia, Pueyasoori nojori shuquirityaquiniutianiya. <sup>7</sup> Tee nia masesaareni, cuno tiajinia nia jiyojere. Nia miaquere, nia rature nojori niq-uitiosano nijaniya. Nia pohuatanuucua Pueyaso rupaa nojori niquiara, nijaniya cuaara niqitiosaaria nia panishano. Majaari tamasaca tiajinia nia pacunujunu tii nia miaquenura. <sup>8</sup> Nia tiuquijiosacari tamonu tiacajinia, pueyano jaara nia masuere na tiajinia nia quiniuria, niocua niaara nojori rupojosano miaquere. Majaari na soonu. <sup>9</sup> Cusosuhua nia naatanijiore cuno tiacajinia. Pueya niquiara nia sequere: “Pueyasoori quiaritia nia jiyatenu paniya na muerasu nia quiniuria”. <sup>10</sup> Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: <sup>11</sup> “Nia tiacajiniinio jaaquiani, canaari canaa niohuacaacuaji na majiriuutiaani. Cunoori nia niishiniuria, Pueyaso jaara nia saniitiore, majaari canaaca na tiutiasaanu quiniutianiya. Pueyasocuaajaari nia jiyanooni paniriquiaa juucua, na muerasu nia quiniuria”. <sup>12</sup> Seetanujanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutaniya Sodoma tiacajinia quiniaa pueyajini.

**Jesu piriyojosacari Pueyaso tojitiaashijiaca pueya**  
(Mt 11.20-24)

<sup>13</sup> ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanohua saniitiosaanutaniya! ¡Niaari socua Pueyaso tojiyashijiaca quiya cuno tariucuaaanu Tiro tiacajinia quiniaa pueyajini, Sidón tiacajinia quiniaa pueyajini-

jinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijiaca nojori quiniuucua. <sup>14</sup> Naa cutaraari cua cumaacata cua miiijosano niquijiaca. Naajaa, majaari nioojia nia tacatonu quiquianu Pueyasooocua. Naaratej, Pueyaso saniitionu juucajinia, [Niaari socua jiyanoehua saniitiosaanutaniya Tiro tiaca pueyajiniji, Sidón tiaca pueyajinijinio! <sup>15</sup> Niajanijarijijataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? [Maja! [Niaari puequeetuujj raama quejosaanutaniya saniya!

<sup>16</sup> Cua pueyanaa, cante nia tojtiajacani, nojoriiri cua tojtiajacajuhuj. Naajuhuj, cante nia ruuretaa cua rupaa nia pahuatasacari, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

### Jesu jiyaramiquishano setenta y dos pueya tiuquijiosacariuhua nocua

<sup>17</sup> Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jiyanoehua shuquiriatia quiriqiaa. Jesu sequetereeri:

—[Jiyaniijianaa, samaruhuari canaa tojtiaacanuni canaa tohuatanijiosacari nojori, canaa jiyaniquishacari quia sesa!

<sup>18</sup> Jesuuri nojori sequereeri:

—Taaquiriirinij. Janiyari Sesaaca niquiquianuni juhua niaco tiyano jiyocuacaanuj. <sup>19</sup> Janiyacuajaari cua cumaaca nia niquitocanuni, juhujaniya nia rucuanenura sacocua caco, turucuanini caconio. Cua cumaacata, niaari puetunu Sesaaca cumaacajanaa shocotanutaniya, juhujaniya panaatia nia rucuanenonura, cua rupaa nia pahuatanura. Majaari quenaaja tamonu casaa miiniu quiniutianiya naquiya nijaniya. <sup>20</sup> Naajaa, majaari saaja shuquiriatia nia quiniu samaruhua tojtianuucua nijaniya. Shuquiriatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

### Jesu shuquirishacari

(Mt 11.25-27; 13.16-17)

<sup>21</sup> Jiyacaritij, Pueyaso Sohuanuuri Jesu shuquiritirii jiyanoehua. Cunora, Jesuuri na Que Pueyaso sequereeri:

—[Quia shuquiritiaanijia cua Quena! [Quiaacuajaari Jiyaniijajanaa quia jiyocuacaanu, mijirianio! [Quiaari maninia miirii! Cua pueyari juhua naatujoori, maja puera niishijia. Naajaa, quiaari quarijia nojori niishitirii quia niishishano, quia jamosano mijiria niishijia-caacuaji. Jaa, cua Quena, quiaacuajaari naa nojori panitijaa.

<sup>22</sup> Cua Queeri tari cua niquitioquiaari puetunu na jiiiasanojuanaa, Jiyaniijiarano cua quishacari. Majaari

tamonu niishiniu quenaaja cante Pueyaso Niyani, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecujani.

<sup>23</sup> Na nuhuaji, Jesuuri na pueyacu tacateree. Saaja nojori sequereeri:

—Shuquiriatia quijiaca cutaraari nijaniya, nia niquiniuucua puetunu nia niquishanojuanaa nia ruenuucua janiya. <sup>24</sup> Seetanujuanaa nia sequenyanija, queraatia tariucacaanu Pueyaso sequesano caminiujunaa pueya, mariyata jiyaca jiyaniijianucuanio, nojoriiri nia niquishano niquiniuucua jiaati-aquiaari juucua. Majaari na niquitini quiquiaari. Nojoriiri cuata nia quishacari nia tojishano tojtianuucua jiaati-aquiaari juucujuhuj. Majaari na tojtianu quiquiaari.

### Samaria jiyajinijinio maninia miijajiniji pahuatasano

<sup>25</sup> Na nuhuaji, Moisés Rootasanojiniji niishitiojona pueyanoori Jesuucua niquiaari nata na pocoojonura. Jesu na pocuatenuura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaraanu rishijia cua quiniuriani?

<sup>26</sup> Jesuuri na riucaeree:

—¿Taate Moisés Rootasanojinia naajiotasano? ¿Taa quia niishiriojoquiaani, quiaa jaara na serojoquiaa?

<sup>27</sup> Moisés Rootasanojiniji niishitiojonaari Jesu riucaeree:

—Naa sequeyano:

“Quia Jiyaniijia Pueyaso quia paniri puetunu quioojitajanaa, puetunu quia sohanutajanaa, puetunu quia cumaacatajanaa, puetunu quia niishitijatajanaano. Naajuhuj, quarta pueyano quia paniri taa quia paniyacuua tama quia cuaqueyajaajani”.

<sup>28</sup> Jesuuri na sequereeri:

—Quiaacuajaari maninia riucaeree. Naa quia miishacari, quiaari pueyaraanu rishijia quiniutianiya.

<sup>29</sup> Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

<sup>30</sup> Jesuuri nio pahuatasano na pahuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajinijaa quariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiiiasanojuanaa na jaariuutiatereeri, na cushishano toquenio. Na piquituriiri. Quera macu na tiujiatuqueeri. <sup>31</sup> Na nuhuaji, pueyacuara secojonaari cuno nucuaco quariquiaajaacuahuaj. Na niquishacari piquishano narta Judio pueyano mataano nuu shuriuquiocora, na shocortamaa saajaari. <sup>32</sup> Na nuhuaji, Levita pueyanoori cuno nucuaco quariquiaajuhuj. Na niquishacari narta Judio piquishano pueyano, nojuajaari saaja na shocorta-

maajuhuaaj. <sup>33</sup> Na nuhuaji, Samaria jiyajinijinio tahueri cuno nuacu quiariquiaajuhuaaj. Na niquishacari parta Judio pueyano mataano, Samaria jiyajinijinio tahueri nocua taraajeree. <sup>34</sup> Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia. Ritia na jiyataaree rucoojuuca tiuquijiojua tiajiniaari. Cuniqiu na cojuatareeri. <sup>35</sup> Tariqiu, cuno tahue quianu panishacariuhua, nojuajaari caapiqiu cumaneeca pueraree. Rucoona tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niquitiorohuanijia cua tacatesacariuhua”.

<sup>36</sup> Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequyani? Cuno jiuujianaraca rucoona pueyajinijini, ¿teyano cuno pojorijinijiniote narta pueyanocua taraajeja cutarani?

<sup>37</sup> Moisés Rootasanojinijii niishitiojona pueyanoori Jesuuri cuaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiririnij. Quia quiaarohua. Naa pueyacua taraajeja quia quirijuhuaaj, taa cuno tahue taraajequiaaricuaani.

### Jesu quishacari Marta, María tiajinia

<sup>38</sup> Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari.

Naaratej, na tiajinia na tiuquinitiareeri. Cuno maaji sesa quiquiaari Marta. <sup>39</sup> Martaari tarajanu jiiitaja. Na sesaari quiquiaari María. Maríari Jesu niohuaca shiriquiumia cajiriquiaa, na tojinuria Jesu pohuatasano.

<sup>40</sup> Marta cutaraari poonijioriquiaa queraatia na miishocoriquiano na jiiitasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¿Quia sequere na naacutanura janiya!

<sup>41</sup> Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaatiaa. <sup>42</sup> Saaja niquiriyatu casaa cutaraari jiyanoohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojajinijii.

### Jesu niishitiojosacari na pueya nojori secojonura Pueyaso

(Mt 6.9-15; 7.7-11)

**11** Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinioori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojocuaari na pueyacuaani.

<sup>2</sup> Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiiria quiaari tojetaarucujanaa sesa miyashijia. Pueya cuaara seetanujanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuani.

<sup>3</sup> Canaa quia niquitioriquia canaa miaquesocoriquiano canaa panishano puetunu juucajanaa. <sup>4</sup> Canaa quia jiyanoori sesa canaa miishanojinijii, taa canaa jiyanoocuaacuua sesa canaa miiniaani. Naajuhuaaj, canaa quia cojuare, maja sesa canaa miitishaanura”.

<sup>5</sup> Jesuuri naa sequerejuhuaaj, socua nojori na niishitiojonura:

—Niaa jaara nia rupuenacuua quiaare shiyaqueya, casaa nia masenura nojuajinijii, ¿nojuajatucua taa quia sequereni?, quiaa jaara na sequere: “Cua rupuenanaa, cua niquitiore jiuujianaraca pan. <sup>6</sup> Tamonu cua cojiniaari shusha tiuquiriohua tucuaaanuui, miaajeyari.

Shaaquiiri cua sumatuu cua miaquetesocoriquiano nojuaja”. <sup>7</sup> ¿Quiaatucua taa miirini quia rupuenaa jaara na tiajiniaacumaji quia riucuaere? “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niquitionura quia panishano”.

<sup>8</sup> Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujanaa nia sequyani, nojuajaari sanenutaniya na niquitionura nijaniya puetunu nia panishanojuanaa. Majaari na sanenu quiniutianiya saaja nia rupuenaa na quiniuucua. Sanenutaniyari pueyaracaanu taajeta nia piquishacari na tia tiotiu. <sup>9</sup> Naajuhuaaj, maja nia tarinitianu Pueyaso nia secojonu. Nojuajaari nia panishano nia niquitionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riatasaanutaniyari. <sup>10</sup> Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

<sup>11</sup> ¿Niaatucua nia niyanu niquitiore saajia, necaruu na masacari nijaniya? Maja. ¿Niaatucua soconu niquitiore nia niyanu, sapitiaaja na masacari nijaniya? Maja. <sup>12</sup> ¿Niaatucua turucuaniniu niquitiore nia niyanu, caacaraja riuriuquiu na masacari nijaniya? Maja. <sup>13</sup> Puetunu nijaniyajanaari sesa miiniu niishijia-

ca. Naajaa, niaari maninia casaa niquitionu niishiya nia niquiohua. ¿Taatucua socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujanaa capora na quishacari, nojuacuajaari na Sohuanu niquitionu niishijia na muerasu, canapueete na masequiaacuajani.

### Pueya sequesacari Jesu, samaru cumacaracana

(Mt 12.22-30; Mr 3.20-27)

<sup>14</sup> Tamacari, Jesuuri samaru tohuataniriquiaa tamonu pueyanojinijii. Cuno pueyanoori tiquia quiquiaari

samaru na jiitiasacari. Samaru jaara tohuataquiaari cuno pueyanojiniji, pocuajara quiriohuari. Pueya niquishacari naatej, nocuaji jiuujiatereeri. <sup>15</sup> Tamasaca pueyari saa sequequiaarijia:

—Cuno pueyanoori samaruhua tohuatanijija samaruhua jiyaniijia Satanás cumaacata.

<sup>16</sup> Tamasaca pueyari Jesu saniniuujuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio. <sup>17</sup> Jesuuri nojori niishiriojosano niishiriquiaa. Nocuaji nojori sequeereeri:

—Tamonu jiyajinia, cuno pueya jaara miaquetoopiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhuj, niqiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqui quiniu. <sup>18</sup> Naajuhuj, niaari cua sequeriquiaa, janiyana samaruhua tohuatanijija Satanás cumaacatani. Jaara naa quirijitij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijija tama na cumaacatajaaja? <sup>19</sup> Naajuhuj, janiya jaara samaruhua tohuatanijija Satanás cumaacatani, taa nia sequeyacuajani, ¿nia niishiriojosano pueyariuhuj, cana cumaacata nojori tohuatanijioquiaa samaruhuanii? ¿Taa nia sequeyani? ¿Satanás cumaacataree? Majaruhua. Naacuajitij, tama nijaniyajaaja nia niishiri, niaari jiyajeneya. <sup>20</sup> Naa Pueyaso cumaacata cua tohuatanijosacari samaruhuatej, naacuajiti nia niishiri, Pueyasoori tari nia masuya seetanujuanaa na muerasu nia quiniuria.

<sup>21</sup> Niojinia nia niishiriojorejuhuaj: cumueeca pueyano jaara na tia cojuua queraatia na miaquejotaja casaata, majaari tamonu naata na jiitiasano casami jaariuutianu. <sup>22</sup> Saniniuujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanii. Na nuhuaji, na jaariuutiasano casami paari, na pueya na serotascoriquiano. Naajuhuj, janiyari Satanás jiitiasano jaariuutiajani.

<sup>23</sup> Cante cua jiyano quiaquiyani, nojuajaari cua paraca. Cante cua naacutaaquiya pueya rerecojonura Pueyasorani, nojoriiri saaja pueya cocuataa Pueyasooquaji. Naaratej, jacaria nia niishiriojore casaa nia niishiriojiya janiyajinijini.

#### Samaruhuari riujuujia na quiquojinohua

(Mt 12.43-45)

<sup>24</sup> Samaru jaara tohuatare pueyanojiniji, joojuashiquio rucuaneyari na samaatejara na pajenura. Jaara na riuriataaquiri, niishiriojori: “Cua quiquojinia riujuyarohuaraqui teje cua tohuatacanucujani”.

<sup>25</sup> Samaru tiuquishacariuhua cuno pueyanooocua, na riuriasuhuari shaaco, juhua maninia netoonujusano tia, maninia jeenucuasanojuhuaj. <sup>26</sup> Naaratej, cuno samaruuri socua sesa miijiacaa nojuajiniji siete narta samaruhua riquiohua nata na quiniuria. Puetunu no-

jojorijianaari cuno pueyanojinia tiuquitiashua. Naacuajitij, cuno pueyanoori socua sesara jiyacateja, tarijia na quiniujiniji.

#### Seetanujuanaa shuquiriaatia quiniu cutara

<sup>27</sup> Jesu pohuatasacari nio, tamonu maajiri jiyacari pueya tajiniji naa nacaree:

—Shuquiriaatia quijia cutaraari cuno maaji cante quia raquiaarini, cante quia canashitiquiaarini!

<sup>28</sup> Jesuuri saaja na riuuaree:

—Socua shuquiriaatia quijia saniya sajara cante Pueyaso rupaa tojjijiani, cante Pueyaso panishano miiquiaajaanihuaj.

#### Sesa pueyari saaja Pueyaso cumaacata miishano niqiniuu panijiacaa

(Mt 12.38-42; Mr 8.12)

<sup>29</sup> Socua queraatia pueyari Jesuucua rerejoriquiaa puetunu na shocuaqueyanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiacaa. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosononi. Seetanujuanaa majaari socua cua niqitiniuu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaquiaaricuaani. <sup>30</sup> Jonás miishaanuuri nocuaji jiuujatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajanihuaj, nio pa quishacari pueya niishiniuria janiyari Pueyaso Jiyarosononi. <sup>31</sup> Cua supuetana Salomón jaara Israel pueya jiyaniijia quiquiaari, jiyacari tamonu maajiri pananu shuucujia jiyajinia jiyaniijia quiquiaari. Nojuajaari jiyanohua tucuaaanu niqiuiaari narta jiyaniijia Salomón tojjiniucua, jiyanohua niishijia Salomón quishacari. Jiya puequesacari Pueyaso saniniuujishacari pueya, cuno maajiri jiyacari sanenutaniya nio pa quishacari pueyacuara na tonujunura, nojori ruuretanoocua socua Niishijajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. <sup>32</sup> Naajuhuj, cuno tariucuaaanu Nínive tiacajinia quiniaa pueyari saneecuutunutaniya Pueyaso nequesoresacari nio pa quishacari pueya. Nojoriiri nio pa quishacari pueyacuara tonujunutaniyajujuhuaj, nojori tacatoyaquiniucua nojori jiuujia sesa nojori miishanojiniji, Pueyaso rupaa nojori tojiyaquiniucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiuujunia Jonás jaara Pueyaso rupaa pohuataquiaari nojori niqiuara. Pueyaso sequenu panishano caminiuujunia quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

### Pueya jiuujia cuhuatanajiniji pohuatasano

(Mt 5.15; 6.22-23)

<sup>33</sup> Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. <sup>34</sup> Pa namijiaari juhua pa cuaqueya cuhuatanajuhua. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casa niquiniuucua jiaatiaja quiri, paari ninishiqui quiya puetunujuanaani. <sup>35</sup> Tama nia cuaqueyajaaja nia cojuare, niaa mariqui nioojia cuhuatana maquishajareeri. <sup>36</sup> Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijia quiri puetunujuanaa, juhua samaritiu cuhuatasacari niajanija. Naacuajitij, niocua niishijia quiri, maninia miiija nia quiniuria.

### Jesu nacasusacari Fariseocua, Moisés Rootasanojiniji niishitiojonaanio

(Mt 23.1-36; Mr 12.38-40; Lc 20.45-47)

<sup>37</sup> Jesu puecasacari pocuanu, tamonu Fariseo pueyanoori na masuquiaari na tijinia na miaquenu-ra. Jesuuri na tijinia quiaquiaari. Na tiuquishacari, mi-aquejajinia cajishijianaari. <sup>38</sup> Fariseo pueyanoori jiuuji-atequiaari na niquishacari Jesuuri shuquitioo tari cajiriquiaa miaquenura. Judiocuacaari jijanijia, nojori ru-cojosacari tamasaca pueya tijinia, tamasaca sesa mi-ishanoori na naata nojoriicua pacunu. Nocuaji nojoriiri shuquitianu niishijia, tijinia nojori tiuquishacariuhua. <sup>39</sup> Naa cuno Fariseo pueyano niishiriojosacaritij, Jesuuri saa na sequerejaa:

—Niajanija Fariseocuaanaa, niaari juhua noo pueya, canapute saaja na ratujua cuaqueya jeequejo-quiaacuajani, saaja na miacojua cuaqueyano. Majaari na jiniacuma na jeequenu. Niaari naajuhua. Niaari sa-puenu maninia pueya niquishano. Saniniuujia nioojia-caari jyanohua sesa quiya, casami nia masejonuucua nia nohuasejonuta, puetunu sesa nia miiniutijanaa-juhuaj. <sup>40</sup> Mosanucuaanaa, ¿niaateeri niishiyaquiya, pa cuaqueya Shipinijiaari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. <sup>41</sup> Naa jaara puetunu nioojiajinia nia jiiti-asanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

<sup>42</sup> 'Niaari taraatia miishaariquiano, Fariseocuaanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiojuanaa, Pueyasora nia niquitiosocoriquiano. Cuno jaamasucuaari culantro, menta, socua tamonu jaamasucuaniojuano. Niaari naa maninia miiiquiaa taa Moisés niishitiojoquiaaricujani. Naajaa, Moisésri niishitiojo-quiaarijuhua maninia pa miiniuria parta pueya, Pueyaso pa paniniurijuhua. Majaari cuno na sequesano nia miiniu quiquiaa. Puetunu na sequesanojuanaa tojjijaca nia quiri. Majaari saaja jaamasucua niquitiojuaca nia quiniu.

<sup>43</sup> 'Niaari taraatia miishaariquiano, Fariseocuaanaa! Niaari jyanijianucua shuriucua cajiniuucua jiaati-aquiaa, Pueyaso secojojua tijinia nia quishacari, juhua cutara pueya nia quiniuria pueya niquiara. Naa-juhuaj, niaari pueya paniquiaa nojori saruhuatanura niajanija juhua jyanijianucua, nia rucuanijosacari tia-cajinia.

<sup>44</sup> 'Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucoquiaa na niishiyaquishacari. Naajuhua, pueyari juhuajaniya nia rupuequiaa, nojori niishiyaquishacari nioojiaari jyanohua sesa, juhua pueyano mocua jama-jinia.

<sup>45</sup> Jiyacaritij, tamonu Moisés Rootasanojiniji niishitiojonaari Jesu sequeree:

—Niishitiojonaanaa, naa quia sequesacari Fariseocuatej, quiaari canaa sequeyajuhua!

<sup>46</sup> Jesuuri na riucaaree:

—Taaquiririni. 'Niaari taraatia miishaariquiano-juhuaj, Moisés Rootasanojiniji niishitiojonaanaa! Puetunu nia rootasanojuanaari juhua jyanohua niquia casa nitiasocoriquiano. Majaari nia tojjijaca pueya nia naacunu quiquiaa quenaaja nia juaashiquia sacasaruta, cuno niiquia casa nitiasaanura. Naacuajitij, pueyari maja na naata rejeretanu nia niishitiojosaano.

<sup>47</sup> 'Niaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujuninaa nucuahuacujani, teyano nia supuetanaa puecooquiaar-icujani. <sup>48</sup> Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuaha.

<sup>49</sup> 'Naacuajitij, Pueyasoori na niishiniutia sequesacari:

“Janijari cua sequenu panishano caminiujuninaa jiyaramiquiniutianiya Israel pueyacuaani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhua”.

<sup>50</sup> Cunora, Pueyasoori nio pa quishacari pueya naminiutianiya puetunu na sequenu panishano caminiujuninaa nanacaacuajanaa, canapute nio jiya coteejajiniji puecoosaaquiaaricujani. <sup>51</sup> Coteenujuanaa mosaaquiaari Abel. Na nuhuaji, queraatia Pueyaso sequesano caminiujuninaari puecoosaaquiaari. Na nuhuaji, Zacaríasri socua jaatesaaquiaari monujuhua. Nia supuetanaari na mo-quiaari Pueyaso Secojoua tijinia, Pueyaso Shuriucua Quiquo tacoji, Pueyasooacara catijiasaqui shuriucua. Seetanujuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

<sup>52</sup> 'Niaari taraatia miishaariquiano, Moisés Rootasanojiniji niishitiojonaanaa! Niaari najuhua nia Pueyaso Rupaa jiiitiaa. Majaari nia tojjiniu paniniu, Pueyaso jyanoooshano pueya nia quiniuria. Saniniuujia, tamasaca jaara Pueyaso Rupaa niishiniu paniri,

Pueyaso muerasu nojori quiniuria, majaari nojori nia niishitiojonu paniniu quiquiaa.

<sup>53</sup> Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jiyanoehua juaaquioree. Jiyanoehua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. <sup>54</sup> Nojoriiri nocuara tonujunu paniriquiaa juucua, jaara sesa quiri na sequesano.

### Jesu niishitiojosano, maja sapuenu maninia pueyano niquishano pa quiniuria

**12** Jiyacaritij, jiyanoehua jiyanoehua queraatia pueyari Jesuucua rerejoree. Tama nojoriijaarijia rapijotooriquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijia pueya niquishano tamasa niquiara. Saniniuujia, nojori jiuujiaari saa sesaja pueyaracaanu. <sup>2</sup> Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniya-juhuaj. <sup>3</sup> Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamaraajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

### Cante puereshiya cutarani

(Mt 10.26-31)

<sup>4</sup> Cua rupenaanaa, majaari nia puerenu canapute nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. <sup>5</sup> Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura nijaniya mani quiquojiniani, na cusojuanu nuhuaji nijaniya. Saaja nojuaja nia puerere cutara.

<sup>6</sup> Cinco shuhuari saaja caapiqui cumanecaniyojuata masesano. Pueyara, cunoori najuhuanaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. <sup>7</sup> Naajuhuj, nia muesuuri puetunu serojosanojuanaa. Pueyasoori na niishiya. Naaratej, maja nia puerenu. Nii-aari socua jiyanoehua Pueyaso panishano cutara queraatia na cojuasano shuhujiniji.

### Tamasaca niquiara pa sequere paari Jesucristo pueyani

(Mt 10.32-33; 12.32; 10.19-20)

<sup>8</sup> Cua tojitiare. Cante tamasa niquiara sequejani: "Janiya Jesucristo pueyanoni", naajuhuj, janiyari cua Que Pueyaso seya niquiara sequenutaniyani: "Nojuaja cua pueyano". <sup>9</sup> Cante saniniuujia tamasa pueya

niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhaaj.

<sup>10</sup> Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

<sup>11</sup> Cua muerasu nia quiniucua, niaari Pueyaso seco-jojua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari nijaniya, majaari nia niishitiojonu taa nia riucuanutaniyanoj, casaa nia sequenutaniya-jaaniuhuj. <sup>12</sup> Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

### Puereetaari casamiriaca pa quishacari

<sup>13</sup> Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequere na niquitionura janiya canaa shipininio jiiitasanojiniji, taa canaa shipininio sequequiaari canaacuajani, saminio na quishacarijia.

<sup>14</sup> Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura nijaniya nia shipininio casamini?

<sup>15</sup> Jesuuri naa nojori sequequiaarijuhuaj:

—Jiyanoehua nia cojuare tama nia cuaqueyajaaja, maja casamiicua jiaatijaca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

<sup>16</sup> Na nuhuaji, Jesuuri pueya niishitioree nio miriqui pohuatasanta. Naa sequereeri:

—Tamonu pueyanoori quiquiaari, jiyanoehua casamiriaca. Na cuhuariquiajinia na natoosanoori jiyanoehua muetuquiaari. Naacuajitij, queraatia mi-quesocoriquiano jiiitiquiaariiri na cuhuariquiajiniji na carojotasano. <sup>17</sup> Tama sequereeraj: "¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinijioj?"

<sup>18</sup> ¡Aj, niishiquiniijia! Coteenu cua tiajosano cua casamiicuaari niyaroorohuaraquij. Janiyari socua puereetucocua tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiojuanaani, puetunu cua jiiitasano casamijianaanio. <sup>19</sup> Na nuhuaji, janiyari tama cua cuaqueyajaaja sequenutaniyani: "Pueyanonaa, quiarijia cutara juhuajaniya quia quiri. Quiaari queraatia casamiriaca cuaja, queraatia marijara. Quiaari queraatia quia miaquesocoriquiano jiiitacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiririti". <sup>20</sup> Cuno niucuaaja, Pueyasoori na sequequiaari: "Mosecanaa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jiiitanutaniya quia nuhuajini? ¿Canra na quiniutianiyarini?" <sup>21</sup> Naa mi-



ishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamiiuniucua Pueyasora.

### Pueyasoori na muerasu cojuaja maninia

(Mt 6.25-34)

<sup>22</sup> Na nuhuaji, Jesuuri na saquirojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutaniyani. <sup>23</sup> Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhaaj. Naajaariuhaaj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhaaj. <sup>24</sup> Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuaaj, majaari nojori jiitiani na miojosano na racataja. Majaari tiaca nojori jiitiani na carojotasano nojori racatajarajuhaaj. Naajaa, Pueyasoori nojori miojotequiaa. Niaa cutaraari socua jyanohua Pueyaso panishano cuno riquiacuhajiniji. <sup>25</sup> Naajuhuaaj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jyanohua nia tacaaniu-tia? Maja nia naata. <sup>26</sup> Naaratej, nia tacaaniu jaara najuhuaa quia socua shiitianiyojua nia rishiniuria, ¿ni-aatucua casaara tacaari tamonu casaacuani?

<sup>27</sup> Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenuunujuhuaaj. Supuetana jiyaniijia Salomónri jyanohua shanohua toqueyaraca quiquiaari. Cuno jyanohua shanohua niquishano na cushishano toqueni, naajaa, majaari na shocotanu cuno natau shuucuaca. <sup>28</sup> Pueyasoori cuno natau shuucuaca shipiniquiaari rupaquijia nia shanohua niquishocoriquianotej. Jaara sorere, tariqui catijashiya saniniuurijia pan majeetetajara. Pueyaso jaara nia maniniushitiyacuaa shuucuacatej, ¿majateeri na naata cushitini niajanijajuhuaaj, jatarinitiaja Pueyasoori tiuujiacanaa?

<sup>29</sup> Naaratej, nia sequeyanijia, maja nia tacaaniu-tia nia pajenu casaa nia miaquenutaniyani, casaa nia ratunutaniyani. <sup>30</sup> Pueyaso niishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. <sup>31</sup> Naaratej, nia niishiriojore Pueyaso panishano nia miiniuria. Nojuajaari saniniujia nia niqutionutaniya puetunu nia panishanojuanaa.

### Nia casami nia racatare Pueyaso shuriucua

(Mt 6.19-21)

<sup>32</sup> Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, Inia niqutionutaniya puetunu na jiitiasanojuanaari! <sup>33</sup> Nia casami nia niqutiojore cumaneeca. Na nuhuaji, cuno cumaneeca nia niqutiojore

nareja casamiiuniucua pueya. Naa nia miishacaritij, niaari jiyocuacaanu racataa nia jiitiasano. Tee Pueyaso racataa nareja nera nia niqitiosanocujani, cuniqui, nia cumaneeca quiquioori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenu-ra. Naajuhuaaj, surequeyari maja na naata miaquenu nia casami tii. <sup>34</sup> Nia casami jaara nia racatasano quia jiyocuacaanu Pueyaso shuriucuatej, niaari saaja Pueyasoori niishiriojonutaniya, tee nia casami racatasano quiyacuani.

### Jeenucasano nia quiri nia Jiyaniijiaacuaji

<sup>35</sup> Juhuaata jeenucasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quia tari, na samaritiu noshitishanojuhaaj. <sup>36</sup> Naa jeenucasano nia quirijihuaaj, juhuaa cuno seyaja. Nojoriiri na jiyaniijia sashiya na caminiujiniji na tiuquishacarihua. Nojuaja jaara tohuataya piquishuhua, nojoriiri ritia nocuaji riatanutaniya tia tohuataya. <sup>37</sup> Shuquiriaatia quijia cutaraari cuno seya, canapuate na jiyaniijiaacuaji suteyajaani, na jiyaniijia cuaara tiuquirohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. <sup>38</sup> Nojori jiyaniijia jaara tiuquirohua shiyaqueya, juhuaquenu panishacari, naajaa, shuquiriaatia quijia quiniutaniyari cuno seya, nojori jaara suteyaja tia tohuataya riatariquiano nojori jiyaniijiaacuaji. <sup>39</sup> Nio nia niishirijuhuaaj, tia camaru jaara niishiri taacari nohuasejojua niniutaniyani, nojuaja maara sutere na tia cojuanura, maja nohuasejojua tiuquiniuria na casami na nohuasenu-ra. <sup>40</sup> Naajuhuaaj, jeenucasano nia quiri pueyanaa, juhuaa cuno sutejaca seyaja. Niaa jaara jiyaniya juhuanajuaja maja cua tiuquiniu quiniutianihua, janiyari jiyacari nia jiyajenetenutaniyani.

### Jesu pohuatasano maninia serujiniji, sesa serujinijio

(Mt 24.45-51)

<sup>41</sup> Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaara-ja, puetunu pueyarajanaa soj?

<sup>42</sup> Jiyaniijiaari na riuacuaree:

—Tamonu seru jaara maninia seru quiri, nocua tiuushano, niishijajuhuaaj, na jiyaniijiaari cuno na seru jiyatenutaniya narta seya jiitariquiano na niti na niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijajanaa mianuutequiaa nojoricuaani. <sup>43</sup> Cuno seruuri shuquiriaatia quiniutaniya na jiyaniijia jaara na riuriasuhua nia maninia miyanojua, taa na sequesaaquiaari na miiniuriacuajani. <sup>44</sup> Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. <sup>45</sup> Saniniujia, cuno seru jaara sesa miiniuria niishiriojore, na jyanishacari na jiyaniijiaari

jiyanohua tarishiniutianiya, nojuajaari niishiriojonutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuj nojuajaari saaja miaquejonutaniya. Pueyaracaanu rarujunutanitari. Mashaasequejonutanitaniyaariuhuj. <sup>46</sup> Na jiyaniishacari na jiyaniijia juhuanojuaja maja na tiuquiniu quiniutianihua, jiyacarij, cuno juucaja, na jiyaniijiaari tiuquiniutianihua canashiyaquiji. Naa cuno seru miiniuucua sesatej, na jiyaniijiaari jiyanojua na saniitionutaniya. Na jatanutanitari Pueyaso tojiyashijiaca pueyata na saniitosocoriquiano.

<sup>47</sup> Tamonu jiyaniijia jaara na seru rootare maninia, taa nojuaja miiniutianiya, cuno seru jaara jeenucuaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanojua majacusaanutaniya cutara. <sup>48</sup> Saniniuujia, tamonu seru jaara sesa miiri na niishiyaquiniucua na jiyaniijia panishano na miiniuria, nojuajaari saaja secaja majacusaanutaniya. Naajuhuj, cante queraatia niquitiosaareeni, cuno serujiniijiri queraatia masenu panishaanutaniya. Naajuhuj, cante jiyatesaaree queraatia jiiitiana na quiniuriani, na jiyaniijiaari nocua tiuuniutianiya socua jiyanojua maninia miijia na quiniuria.

### Jesuucua tiuujiaari narta pueya panishoo

(Mt 10.34-36)

<sup>49</sup> Mijiria niquiaarinijia, juhua mani cua noshitiniuria pueya tajinia. Seetanujuanaa na noshitiriquia tarinij! Cua rupaari juhua mani quiniutianiya. <sup>50</sup> Coteenu, janiyari jiyanojua saniniujiushaanutaniya juhua manitiani. Nocuaji coojiaari tacaya janiya jaara naa miishaarejaatijia. Seetanujuanaa na jiyateriquia tariucua tucateenonij. <sup>51</sup> ¿Niaateeri jiyaniya janiyari niquiaarini mijiria quiniaa quiniuria juhuajaniya? Maja! Seetanujuanaa nia sequeyanijia, janiyari niquiaarini pueya cua raquirojotanura. <sup>52</sup> Naaratej, pueyari quarijia juayonutani coteenutaniya. Pueyano jaara necocuata jiiitiare jiuujianaraca niquiohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijiacaari saniniuujia nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacaresetanutaniyaacuajua. Naacuajitij, tamonu tiajinia, querajaa pueyari caapiquiriyatu cucua tiuujiaa juaajiaa quiniutianiya. <sup>53</sup> Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojori na nucua paracaajia quiniutianiya na nucua tiuushacari cucua. Naajuhuj, maajipohuari necohua niquiocohua paracaajia quiniutianiya, necohua niquiocohua quiniucua cucua tiuujiaa. Naajuhuj, pueya niquiocohuari na quinia paracaajia quiniutianiya-juhuaj, cucua tiuujiaa na quinia quiniucua.

### Pueya cuaara niishiiria quarijia Pueyaso miishanojiniji, casaa na niishitiniu paniyani

(Mt 16.1-4; Mr 8.11-13)

<sup>54</sup> Jesuuri naa sequequiaari pueyajuhuj:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. <sup>55</sup> Naajuhuj, paratu jaara piyarojoquiaa pananu shuucuaaji, niaari sequequiaa: “Tacarejonuqui quiniutianiya”. Naa quiquiaari. <sup>56</sup> Pueyanaa, ¿niaateeri seetanujuanaa niishijiaca? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaca nijaniya.

### Niaacuara tonujunata nia jecatoore

(Mt 5.25-26)

<sup>57</sup> Niaacuajaari niishiya, sesa miijiaaari sanitiosaanutaniya. Naaratej, tama nijaniyajaaja nia niishiriojore, casaate maninia nia miiniuriani. <sup>58</sup> Tamonu pueyano jaara quicuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanooocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jecatoyaquiri nata, nojuajaari quicuara saquirojotanutaniya nequesoreena pueyano. Jaara quicuara saquirojotare nequesoreena pueyano, nequesoreenaari saniniuujia quia niquitionutaniya na pueya, quia nujuatesaanura nujuatejojuajinia. <sup>59</sup> Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niquitiorejaatijia niaacuara tonujuna pueyano.

### Nioojia nia tacatore sesa nia quiniujiniji

**13** Jiyacari, tamasaca pueyari Jesuucua tiuquijioquiaari. Cuno pueyari naa Jesu pohuataquiaari:

—Jiyaniijia Pilatoori Galilea jiyajinijinio pueya puecoorucuaa! Na nuhuaji, nojori nanaca cojitiriiri Pueyasooocuaa nojori puecoosano seya nanacata!

<sup>2</sup> Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanojua sesa miijiaa nojori quiniucua narta Galilea pueyajiniji? <sup>3</sup> Seetanujuanaa nia sequeya cutaranijia, nojoriiri maja socua sesa miijiaa quiquianu nijaniyajiniji. Nijaniyajuhuj, niaa jaara tama nioojiaaja tacatoyaquiri sesa nia miiniujiniji, niaari taraatia puecoosaariquianojuhuaj. <sup>4</sup> ¿Cuno dieciocho pueyariuhuj, canapuate cusonuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaa quiquianu narta Jerusalén tiacajinia quiniaa pueyajiniji? <sup>5</sup> Seetanujuanaa nia sequeyanijia, nojoriiri

maja socua sesa miijiaca quiquianu nijaniyajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhujaj.

### Miriqui Jesu niishitiojosano muetuhuo naanajiniji

<sup>6</sup> Jesuuri na nuhuaji pueya niishitiojoquiaari nio miriqui pohuatasanota:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. <sup>7</sup> Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhua niquiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. [Quia nure! Tamonu cuaara na nujuasaqui natasaaria, na muetunura cutara”. <sup>8</sup> Cuhuariquia cojuanaari na riucuaeree: “Jiyaniijianaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiyani. <sup>9</sup> Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhujaj pueyanaa, Pueyasoori sashiya, maninia miijiaca nia quiniuria.

### Jesu jecasacari porocuatucua samaatenu juuca

<sup>10</sup> Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. <sup>11</sup> Tamonu maaji cusosuuri tii quiriquiaajuhujaj. Dieciocho marijiaari na shoconujuquiaari porocuatua na quishacari. Samaruuri naa na jiyatequiaari. Majaari quenaaja na naata maninia nujuanu quijia. <sup>12</sup> Jesu jaara na niquiquiaari, na sequereeri:

—[Maajiniaa miji! [Quia nijiniacuaja tari jeequerohual

<sup>13</sup> Jesuuri na juaashiquia niaree maajicua. Jiyacaritij, maajiiri maninia jeequequee. Nojuajaari Pueyaso maninihuaqueetanu coteeree naa na miishaanuucuatej. <sup>14</sup> Pueyaso secojojua tiajinia jiyaniijiaari juarii naa Jesu miiniuucua samaatenu juuca. Naaratej, tii quiniaa pueya sequereeri Jesu niquiaraari:

—[Seis juucacuajaari quiya puetunu semaanajinijanaa pa poonijionura! [Niocua cuno juuca nijioriquia nia naatanijiosaanura, maja samaatenu juuca!

<sup>15</sup> Jiyaniijia Jesuuri sequereeri:

—[Sapuenu juhua maninia miijiaca niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucosocoriquiano mohuaca na raatenura! <sup>16</sup> [Nio maajiirihujaj? Nojuaja cutaraari supuetana Abraham niquiohuacuajinio supueno. [Majateeri maninijuhua samaatenu juuca pa samaacatanura Satanás morojosano? Dieciocho marijiaari tari nio maaji shoconujurucuaa pueyaracaanu porocuatua na quishacari.

<sup>17</sup> Naa Jesu sequesacaritij, puetunu na paraajanaari caririquituri. Saniniujia, puetunu pueyajanaari

shuquiriaatia quiriquiaa nojori niquishacari queraatia maninia Jesu miishano na cumaacata.

### Miriqui Jesu pohuatasano mostaza jajaujiniji

(Mt 13.31-32; Mr 4.30-32)

<sup>18</sup> Jesuuri sequequiaari:

—[Taate cua naata niishitiojonu nijaniyani, nia niishiniuria taa Pueyaso poonijia pueya jiuujiajinia na rupaatanij? <sup>19</sup> Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetuucara caneyari. Naacuajitij, shuhuari na cashacucuaacua jesuya. Naajuhujaj, Pueyaso rupaari caneya pueya jiuujiacajinia puetunu nio jiyajinijanaa maninia miijiaca nojori quiniuria.

### Miriqui Jesu pohuatasano pan poretajajiniji

(Mt 13.33)

<sup>20</sup> Jesuuri nio pohuataquiaari socua:

—[Casaa cua pohuatanutaniya nia niishiniuria taa Pueyaso poonijia mijiria na rupaatanij? <sup>21</sup> Pueyaso rupaari juhua pan poretaja maaji cojitishano trigo cashojuata, shanacusano jiuujianaraca shiitaniyojua tohuatashijinia. Pan poretajaari puetunu cuno cashojua miniquiootasanojuanaa poreteja. Pueyaso rupaari naa poonijiojuajuhujaj.

### Juhua shiitaniyojua tohuateyari quiya Pueyasocua pa quianura

(Mt 7.13-14, 21-23)

<sup>22</sup> Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajiniaari, shiitaniyojua tiacajinianio. <sup>23</sup> Jiyacaritij, tamonu pueyanoori na nequesotaree:

—[Jiyaniijianaa, [saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuaeree miriqui:

<sup>24</sup> —[Jyanohua nia saniniujiuri shiitaniyojua tohuateyaco nia tiuquiniuria, Pueyaso nia rupuenura. Juhucarjia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. <sup>25</sup> Cua tojitiare. Tia camaru jaara sanere, tohuateya tionutaniyani. Nijaniya, cante na tia carijiniacuma quiyajaani, niaari tohuateya piquiniuniutianiya najuhuanaj. Niaa jaara naa nacare: “[Jiyaniijianaa, canaacuaji quia riatare tohuateya!”, nojuajaari nia riucuanutaniya: “Maja cua niishiniu tejenote nijaniyani”. <sup>26</sup> Jiyacaritij, niaari juhuacatecara sequenutaniya: “[Majateeri canaa quia niishiniu? Canaacuajaari quiata miaquenujuani. Canaari quiata ratujua mariyatani. Quiaacuajaari canaa tiaca nuucucacajinia niishitiojojua”. <sup>27</sup> Tia camaruuri nia riucuanutaniya: “[Janiyacuajaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu nijaniyajanaa sesa miijiacanaa”. <sup>28</sup> Naa na taanuusacari nijaniyatej, niaari nujuquetunutaniya. Niaari nia quiaca miaquenutaniya jyanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujinuaa

Pueyaso shuriucua quiyanocuaa. <sup>29</sup> Queraatia tamasaca pueyapueeri nijionutaniya puetunu jiyacajinijiojuanaa Pueyaso shuriucua cajitiuniuria, nojori miaquenuunura nata. Nijionutaniyari pananu mue-tasamaji, pananu tiuquishacojinio, pananu shuucujaji jiyacajinijinio, pananu muetasamaji miaquetajara jiyacajinijiojuhuaj. <sup>30</sup> Quiarrijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojtiajaca nojori quiniuucua mijiria. Naajuhuj, quiarrijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriirijari najuhua quijia quiniutianiya Pueyasora, nojori tojtiaquiniuucua nojuaja.

**Jesu taraajesacari Jerusalén tiacajinia quiniaa puey-  
acua**  
(Mt 23.37-39)

<sup>31</sup> Jiyacari noojiaqueya Fariseocuacaari Jesuucua tiuquijioquiaari. Nojoriirijari Jesu numooteree:

—Niiquiji quia mashiri! Jiyaniijia Herodes quia monu paniya!

<sup>32</sup> Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaanihuaj. Janiyari naa miya quiarrijiani, tariquijiuhuaj. Janiyari tama tariqui tucatanutaniya puetunu cua miiniu panishanojuanaani”. Naa nia sequesuhua cuno pueyano. <sup>33</sup> Cuaara rupaquijia cua sashiiria. Janiya quiarrijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutaniya.

<sup>34</sup> Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecoojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojanura niajaniya. <sup>35</sup> Cuna, cua tojitiare! Nia quiqioori tojetaarucujanaa shaaqui quiniutianiya. Naajuhuj, majaari socua nia niqiniu quiniutianiya janiya, niaa jaara nia timitiasacari janiya sequerejaatija: “Cuaara shuquiriaatia quiiria pa Jiyaniijia, Pueyasojinijijiuquihuano!”

**Jesu naatanishacari cusosu poreno pueyano**

**14** Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuatano. Nojoriirijari Jesu shootiariquiaa nojori niishiniuria casaa na miiniutianiya samaatenu juucani. <sup>2</sup> Jiyacaritij, tamonu pueyanoori Jesu tacoji nujuariquiaa, poreno cuso-

taano. <sup>3</sup> Jesuuri Moisés Rootasanojinijijiuquihuano nequesotaree, Fariseocuacano:

—¿Taa nia serojoquiaa Moisés Rootasanojiniani? ¿Maniate cusosu pa naataniniu samaatenu juuca?

<sup>4</sup> Nojoriirijari saaja sanaa na tojtiaariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. <sup>5</sup> Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaanihuara nia seru?

<sup>6</sup> Majaari nojori riuucuanu quirii quenaaja.

**Taa pa miyani queranacunura masuusano pa  
quishacari, taamueca pueyate masuushiyajaanihuaj**

<sup>7</sup> Jesuuri shootiariquiaa taa masuusano pueya socua panishano cajitiucujinia nojori cajitiuniuria riuticonetariquiaani. Jesuuri cunora nojori niqiuara pohuataree nio pohuatasano. Naa sequereeri:

<sup>8</sup> —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijianijia.

<sup>9</sup> Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shiiquia. Quia sanere nio pueyanooquaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. <sup>10</sup> Nocujia nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niqiri quiajanija, nojuajaari quia sequenutaniya: “Cua rupenanaa, Jiyaniijia quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajanijaqui nia masuuna panishano pueyano. <sup>11</sup> Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

<sup>12</sup> Jesuuri na masuuna pueyano sequerejuhuaj:

—Quiaa jaara queranacunu paniya, majaari quia masuunu saaja quia rupenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriirijari quia masuunutaniya saniniuujia. Naacuajitij, quiaari tari namishaarohuacujia. Cunora, majaari socua quia masenu quiniutianiya Pueyasojinijijiuquihuano. <sup>13</sup> Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujuanucua pueya, cariyojuarujurinio. <sup>14</sup> Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniuujia. Naaratej, Pueyaso cutaraari maninia miiniutianiya

quiajaniya saniniuujia, na samiitianijosacariuhua maninia miijiaca pueya.

**Miriqui Jesu pohuatasano na queranacunujiniji**  
(Mt 22.1-10)

<sup>15</sup> Jesuta cajiyano pueyano tojishacari naa Jesu pohu-  
atasanotej, Jesu sequereeri:

—Ꞇshuquiriaatia quijia cutaraari cuno, cante Pueyaso  
shuriucua miaquenutaniya jiyocuacaanuni!

<sup>16</sup> Jesuuri na sequeree:

—Tamonu pueyanoori queraatia sumatuquiaari  
pueyata na queranacunura. Nojuajaari coteenu quer-  
aatia pueya masuquiaari. <sup>17</sup> Quera miaquenuusacari,  
na seru jiyaroreeri na masuusano pueya na sequenu-  
ra: “Miji, puetunujuanaa tari jeenucuasaaree niaacuaji.  
Nia miaquesee”.

<sup>18</sup> Puetunu masuusano pueyajanaari juhuacatecara  
sequequiaari maja na naata quianu miaquenuucua.  
Coteenu masuusano pueyanoori cuno seru sequeree:  
“Janiyari shusha maseree tamonu cuhuariquiani. Jani-  
yari nocua quiaa na niquiniuucuanu. Cua jiyanoori que-  
naaja. Maja cua naata quianu quiata queranacunuu-  
cua”. <sup>19</sup> Tamonu masuusano pueyanoori sequeree:  
“Janiyari diez poonijiojuaca juyaca masereeni. Na  
saniniuucua quiaanijia. Quiocua cua jiyanoori cua  
quiaaquishacari queranacunujinia”. <sup>20</sup> Tamonu masuu-  
sano pueyanoori sequereehuaj: “Shusha camiriinijia.  
Cunora, maja cua naata quianu”. <sup>21</sup> Seruuri tamajaaja  
tacateyarohua na camarnu tiajiniohua. Na jiyaniijia po-  
huatasuhua na masuusano pueya sequesanoori. Na  
jiyaniijiaari juaaquii. Na seru sequereeri: “Ritia quia  
quiaare tamasaca pueya masuunuucua tiaca nucuaa-  
caco. Miji quia rijiocoo casamijiuniucua pueya,  
sesaruneca pueya, sesacujua pueya, cariyojuarjuri  
pueyanu”. <sup>22</sup> Seru tiuquishacariuhua, na jiyaniijia se-  
quesuhuari: “Jiyaniijianaa, janiyari tari miiriini taa quia  
sequeree janiyacujani. Juhuanajuaja maja tia  
mishiniu”. <sup>23</sup> Na jiyaniijiaari na sequeree: “Socua pueya  
quia pajecoo tiaca nucuaacaco, tamasaca tiacajiniara  
nucuaacacano. Ꞇsocua pueya quia nenecojocoo nojori  
niniuria, cua tia mishiniuria! <sup>24</sup> Seetanujuanaa nia se-  
queyanijia, coteenu cua masuusano pueyajiniinioni,  
majaari quenaaja niquiriyatu nojorijinijinio saniniu  
quiniutianiya cua sumatusano”.

**Saaja tama na cuaqueya panitiajajaarijia na naata  
Cristo nuhuajiniu**  
(Mt 10.37-38)

<sup>25</sup> Jiyanhua queraatia pueyari Jesuta quiojoriquiaa.  
Jesuuri nojoriicua tacateree. Nojori sequereeri:

<sup>26</sup> —Cante cucua niya cua pueyano na quiniuriani,  
nojuaja cuara niishiiria nio. ꞆMaja nia naata cua  
pueyano nia quiniu nia paniyaquishacari janiya socua  
nia quejiniji, nia nucujiniinioni! Nia niquiocua, nia  
niquiohua, nia tapueyocua, nia rimiatuhajuhuj,  
nia panishacari nojori socua janiyajiniji, Ꞇmajaari nia  
naata cua pueyara nia quiniu! Naajuhuj, Ꞇmajaari que-  
naaja nia naata tama nia cuaqueyajaaja panijia nia

quiniu socua janiyajiniji! <sup>27</sup> Cante tama na cuaqueya-  
jaaja panitiaquijia cucuarani, majaari na naata cua  
pueyanora na quiniu. <sup>28</sup> Niaa jaara jiyaconaja tia tianu  
paniri, Ꞇmajate coteenu nia cajiniu nia niishiriojonura  
taa cumaneecate panishaanutaniyani, na tucuatunura  
puetunujuanaa? Naajuhuj, niaari niishiriojiya, queraa-  
tia quiyacuajate nia cumaneeca. <sup>29</sup> Niaa jaara coteenu  
naa miyaquiri, niaari najuhuaana morijiucua nujuate-  
jonutaniya, na nuhuaji majaari socua nia cumaneeca  
quiniu nia tucuatunura nia tia. Puetunu nia tia niquini-  
aajanaari juhuacatecara nia macatiniutianiya. <sup>30</sup> No-  
joriiri sequenutaniya: “Cuno pueyanoori tianu co-  
teecanu najuhuanaj. Majaari na naata na tucuatunu  
quiarijia”. <sup>31</sup> Naajuhuj, jiya jiyaniijia jaara quianu  
paniri narta jiyaniijata miaquetoona, Ꞇmajate co-  
teenu na cajiniu na niishiriojonura, na naatate diez mil  
na pueyata shocotanu cuno tamonu jiyaniijia, nocua  
niyano veinte mil na pueyati? <sup>32</sup> Cuno jiyaniijia jaara  
niishiri, maja na naata na shocotanu quiniutianiya nar-  
ta jiyaniijia nocua niyano, majaari na miaquetoonu  
quiniutianiya. Saniniuujia, tucuaaanu narta jiyaniijia  
quishacarijia, nocua jiyaramiquiniutianiya na pueyari,  
nata nojori pocoojonura maninia, nojori  
jiyanootoonura. <sup>33</sup> Naajuhuj, niaa jaara carteyaquiri  
puetunu nia jiitiasanojuanaa, majaari nia naata cua  
pueyanora nia quiniu.

**Miriqui Jesu pohuatasano shonijiniji**  
(Mt 5.13; Mr 9.50)

<sup>34</sup> Shoni jaara tiquiriiquia quiya, maniniaari, pa pan-  
ishano. Jaara shaacara quiquii, Ꞇtaate na naata tiquiri-  
iquiara na quiniuhuani? Maja na naata. <sup>35</sup> Najuhuaana  
quiyari. Majaari quenaaja maninia na quiniu  
cuhariquaijinia jatasocoriquiano maninia na mori-  
tianiuria nataacuaca. Majaari quenaaja maninia-  
juhaj, na paatishaanura na moquijianura, natau paja-  
ma nojosocoriquiano. Jaara naa maninia quiyacquiriti,  
nareja jatashiyari. Cante numaacani, cuara tojiti-  
aara miriqui cua pohuatasano. Cuara na niishiiria-  
juhaj. Seetanujuanaa cua tojitiajaca pueyani, nojoriiri  
juhua shoni mijiria.

**Jesu pohuatasano miriqui tashucano borregojiniji**  
(Mt 18.10-14)

**15** Roma tiacajinia quijia jiyaniijia cumaneeca  
masejona, mariyata sesa miijiaca pueyari Jesu-  
ucua nijjoriquiaa na pohuatasano nojori tojtianura.  
<sup>2</sup> Cuno pojoriiri Fariseocuaca soosano pueya  
quiriquiaa, Moisés Rootasanojiniji niishitiojona  
soosano pueyano. Cunora, Fariseocuacaari, mariyata  
Moisés Rootasanojiniji niishitiojonaari tama rimiaa-  
queturiquiaaja Jesuucua. Naa pocuaturiquiaa Je-  
suuri:

—Cuno pueyanoori sesa miijiaca pueya  
shanacuquiaa nocua nojori nijionura. Ꞇjuhajaniya no-  
joritia miaquequiaajaariuhuj!

<sup>3</sup> Naaratej, Jesuuri nojori niquiara pohuataree nio  
miriqui pohuatasano:

<sup>4</sup>—Niaa jaara cien borregohua jiitariquia, nojorijini-jinio niquiriyatuniyojua jaara tashucua, ¿taa nia mi-iquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquiajina, tashucuaano borrego nia pajenura, niaa cuaara na riuriatarohuaajaatijia? Taaquiriirinj. Niaacuajaari naa mi-iquiaaquij. <sup>5</sup> Niaa jaara na riuriatasee, niaari nia shuquiriniutia na paquiohua nia numueecuaji. <sup>6</sup> Niaa jaara na tiuquitarohua nia tiajiniohua, niaari nia rupueana, mariyata nia shuriucua quiniaa rerejotenu-taniya nia sequenura nojori: “Cuata nia shuquiriri quiarjia! Tari riuriatarohua cua borregoniyojua tashucuanonijia!” <sup>7</sup> Seetanujuanaa nia sequeyanijia, naajaarihuaj, jiyocuacaanu quiniaari jiyanohua shuquiri-tiuquiaa niquiriyatu sesa miiija jaara noojia tacatore sesa na miiniujiniji. Cuno pueyanoori socua jiyanohua shuquiritasano tamasa noventa y nueve pueyajiniji, canapuetucua tari maninia pueyacuani.

### Jesu pohuatasano miriqui juurequetesano cumanee-jiniji

<sup>8</sup>Naajuhuj, tamonu maaji jaara diez cumaneecaca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutiani-yari, na tia na netoonujunura. Pueyaracaanu jacaria na pajenutaniyari cuaara na riuriatareaatijia. <sup>9</sup> Na riuri-atasacari na juurequetesano cumanee, maajiiri na rupueana, mariyata na shuriucua quiniaa maajipohua rerejotenu-taniya na sequenura nojori: “Miji nia nimia! Cuata nia shuquiriri! Tari riuriatarohua cua juure-quetesano cumaneenijia!” <sup>10</sup> Seetanujuanaa nia se-queyanijia, jiyocuacaanu Pueyaso seyari naa shuquiriquiaajuhuj sesa miiija jaara noojia tacatore sesa na miiniujiniji.

### Jesu pohuatasano taa tamonu pueyano jiyanooquiaari neyanuni

<sup>11</sup> Na nuhuaji, Jesuuri nio pohuatareejuhuaj: —Tamonu pueyanoori caapiqui niyanuraca quiquiaari. <sup>12</sup> Socua naatujuaari na que sequeree: “Cua quena, quiarjia cua niqutiore quia jii-tiasanojiniji, quiria quiri-quiano quiaa jaara shaajeyare”. Naacuajitij, na queeri puetunu na jii-tiasanojuanaa niqutiojoree necohua. <sup>13</sup> Socua naatujuaari rupaquijia camueenu-juquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuujia tamasa na niqutiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqi, puetunu na cumaneecajanaa puecaquiaariiri sesa na miiniutia. <sup>14</sup> Nojuaja jaara puetunu na cumaneeca puecaquiaarijanaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. <sup>15</sup> Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajina na cushiya na cojuanura. <sup>16</sup> Mashajaari cushiya miaquesano miaquenu paniriquiaa juucua na miaajenuta.

Cunoori tamaatia puootu cocua quiquiaari. Majaari tamonu pueyano niqutionu quijia quenaaja na mi-aquesocoriquiano. <sup>17</sup> Na nuhuaji, tama sequereeaari-jia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhuj. ¿Janiyarijiatatj? Janiyari niya quera cusoya cua miaajenutani! <sup>18</sup> Cuata queecua tacateyarohuarajitij! Janiyacu na sequesuhuanu: ‘Cua quena, janiyari Pueyaso miiquianu sesani. Janiyari sesa miiquianu quiajanijuhuj. <sup>19</sup> Majaari socua cua sequenu quia niyanuta. Janiyari puera sesa miiijani. Cua jiyatere juhuari juhua quia seru cua quiniuria, nuhara cua poonijionura’”. <sup>20</sup> Naa na niishiriojonu nuhuajitij, mashajaari quiaquiaariuhua na queecua.

Tucuaaanu na quishacarijia na que tiajiniji, na queeri na niquiri. Nocua taraajereeri. Nocua neteyareeri na naacunura. Na cacaseeri. Na nujuunequereeaariuhuj. <sup>21</sup> Neyanuuri na que sequeree: “Cua quena, janiyari sesa miiquianu Pueyasoni, quiajanianio. Majaari cua sequenu quia niyanuta”. <sup>22</sup> Na queeri saaja na tiaco seya sequeree: “Ritia! Socua maniniuqui toque miji nia riquioo! Niocua quiyanu cushitirinioj! Jaaniisho nia cushitiri! Sapatu nia cushitirijuhuj! <sup>23</sup> Pa riutianishano juunu niqiojua nia quiaaco mosocoriquiano. Quiarjia pa queranacure. Pocua mi-aquenuureni, quiyanu pa shuquiritasacari. <sup>24</sup> Nio quiyanuniyojuaari juhua macu quiri-quiaa. Quiarjia samiitarohuari. Nojuajaari shaajequiaari. Tari pocua muetarohuari!” Naacuajitij, nojoriiri juhuacatecara queranacuquiaari.

<sup>25</sup> Jiyacaritij, jiyapueranuuri cuhuariquiajina quiri-quiaa. Na tacatesacariuhua tiajiniohuara, jaara tari cateca quiri-quiaa, saaja pueya tojirii jaaquenuyanoori, nianujuniuyanonio. <sup>26</sup> Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” <sup>27</sup> Seruuri na riucaaree: “Quia nuhuajishanacuaja tari tiuquiriohuano. Quia queeri shuquiriaatia quia maninia na tiuquishacariuhua, maa cusosu. Naaratej, canaa sequereeri querasapiquia juunu niqiojua canaa monura”. <sup>28</sup> Jiyacaritij, jiyapueranuuri jiyanohua juaaquii. Majaari tiajinia na tiuquiniu paniniu quiri-quiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. <sup>29</sup> Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijionu quiquiaa quia-janiya. Naa maninia tojjia cua quishacari quiajanijatej, Majaari quia niqutionu quiquiaari janiya quenaaja niquiriyatu cabranijiojua, cua queranacunura cua rupueanaata! <sup>30</sup> Quiarjia saniniuujia, quia niyanu sequere tiuquishacariuhua, quiaari querasapiquia juunu niqiojua moree nera! Nojuajaari quia cumaneeca puecacanua paanatu-juriicua!” <sup>31</sup> Na queeri na sequeree: “Sanajanaa, quiaari pueyaracaanu cuata quia. Puetunu cua jii-tiasanojuanaari quia casaa. <sup>32</sup> Naajaa, quiarjiani, maninia pa queranacure. Shuquiriaatia pa quiri. Quia tarajanuuri juhua macu quiri-quiaa tari. Quiarjia samiitarohua pajaniyaraari. Nojuajaari juhua

tashucuacanu pocuaji. Quiarijia pocua muetarohuari”.

**Miriqui Jesu pohuatasano pueyanojiniji, cante na jiyaniijia cumaneeca riutiocojuani**

**16** Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaaja. <sup>2</sup> Cunora, jiyaniijaari cuno na seru sequere: “¿Taa quia miiquiaa janiyani? ¿Quiaana sesa miiquiaa! Quiarijia cua niquitiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. <sup>3</sup> Cunora, cumaneeca cojuanaari niishiriojqee. Tama sequerejaarijia: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajania cua poonijionura. Naajuhuj, jiyanojua cararaatiaari quiria, pueyajiniji nareja cua mashiniquijionura cua panishano. <sup>4</sup> ¡Jaj! Tari niishiquiniijia taa cua miiniutianiyani tamasaca tarajenura cucua, nojori masuunura janiya nojori tijania cua quiniuria, janiya jaara nio poonijosanojiniji jataaareni”. <sup>5</sup> Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niquitiojqeaaari casamicuajani. Coteenu tiuquinia pueyano nequesotareeri: “¿Casaa cua jiyaniijia niquitiojocanu quiajaniyani?” <sup>6</sup> Pueyanoori na riucaare: “Cua niquitiojanu cien patacocua mishaja shiyocuan”. Cumaneeca cojuanaari na sequere: “Ritia quia cajiri. Niya quia quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. <sup>7</sup> Na nuhuaji, tamonu pueyano nequesotareeri: “¿Quiajanianiyahuaj? ¿Casaa cua jiyaniijia niquitiojocanu quiajaniyani?” Na riucaareeri: “Cua niquitiojanu cien canaasatu mishaja trigoni”. Cumaneeca cojuanaari na sequere: “Niya quia quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. <sup>8</sup> Na jiyaniijia jaara niishiquiaari sesa na seru miishano, na sequereeri: “¿Quiaaqui jiyanojua niishijia tama quia cuaqueyajaaja quia cojuanura!”

‘Seetanujuanaa pueyanaa, Pueyaso niishiyashijia pueyari socua jiyanojua niishijia cuhuashiqui quijia-ca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniujia nojori.

<sup>9</sup> Naarate nia nacasuyanijia, naa capora nia quirijiuhuaj, maninia nia miiniuria pueya. Maja nia casami nia jamuenu. Cunocuaajaari nareja Pueyaso niquitiosano niajaniya. Naacuajitij, capora nia quishacari mijiria jaara puequema, nia jiyaniijaari nia tiuquiniutianiya pueyaracaanu quishaqui jiyocuacaanu, jiyanojua na shuquiritiasacari niajaniya.

<sup>10</sup> ‘Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno

secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutianiya. Saniniujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaarihuaj. <sup>11</sup> Naajuhuj, niaa jaara maninia jiiitaaquiquiaa mijiria casami, Pueyasoori niaacua tiuyaquiniutianiya seetanujuanaa maninia jiyocua-caanuji casami nia jiiitanura. <sup>12</sup> Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niquitiore niaarano na riuriotacani? Maja cutaraari nia niquitiosaanu quiniutianiya.

<sup>13</sup> ‘Poonitijosano pueyanoori maja na naata caapiqui jiyaniijia poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijotesaanutianiya saaja. Naacuajitij, Pueyasoori maja na naata nia poonitijionu nera.

<sup>14</sup> Fariseocuaari jiyanojua cumaneeca panijia quijia. Naaratej, nojori tojjishacari Jesu sequesano, nojoriiri saaja na rerequetere. <sup>15</sup> Jesuuri nojori sequere:

—Niaacuajaari tama nia cuaqueyajaaja jiyatequiaa sapuenu pueyano maniniu nia niquishaanura. Pueyasocuaajaari nioojia niishiya. Niaari pueya jiyajenetequiaa nojori jyanishacari niaari Pueyaso panishano cutara, queraatia casami nia jiiitiasacari. Saniniujia, casaa pueya jiyatequiaa socua jiyanojua na panishanorani, Pueyasoori cuno soya cutara.

**Moisés Rootasanoori coteenu quiquiaari, quiarijia quia cutaraari quiarinio Pueyaso Rupaa**

<sup>16</sup> ‘Moisés Rootasano, mariyata puetunu tariucua-caanu Pueyaso sequenu panishano caminiujunaa pohuatasanojuanaari pueya tojjiasocoriquiano quiquiaari, Tiuquinijiona Juan pohuatasanojuhuaj. Quiarijia saniniujia, maninia rupaa Pueyasojinijiri pohuatasaaquiaa, taa Pueyaso jiyanooniu paniya pueyani, na muerasu nojori quiniuria. Quiarijiani, puetunu pueyajanaari jiyanojua saniniujia Pueyaso muerasu nojori quiniuria.

<sup>17</sup> ‘Nio jiyari shaajeriquiano, jia cajiniocuanio. Saniniujia, tariucuaaanu pueyara Pueyaso sequesano caminiujunaa pohuatasano cutaraari maja na shaajenu quiniutianiya quenaaja.

**Jesu niishitijosano, pueyano carteyaquiniuria necocua**

(Mt 19.1-12; Mr 10.1-12)

<sup>18</sup> ‘Pueyano jaara necocua cartere tamonu maajitia na caminiuria, cuno pueyanoori jiyanojua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

### Jesu pohuatasano casamiriaca pueyanojiniji, Lázaro-jinijinio

<sup>19</sup> Casamiriaca pueyanoori quiquiaari. Jiyanhua maniniuqui toqueya cushiyojojuuari, juhua jiyaniijianucua toqueya. Jiyanhua na shuquiriniutia, puetunu juucajanaa queranacujuuari. <sup>20</sup> Jiyacaritij, casamijiu pueyanoori quijiajuhuaj. Jiyanhua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázaro. <sup>21</sup> Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. <sup>22</sup> Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanhua quiquojinia. Cuno casamiriaca pueyanoori cusoquiaarijuhuaj. Jamosaquiaariiri. <sup>23</sup> Sesa miijiacarano quiquojinia na quishacari, naquiya na miishacari tii, nojuajaari mauquiaari. Cuniqiji tucuaaanu niqirii Lázaroori, shuquiriaatia quiyano supuetana Abrahamta. <sup>24</sup> Casamiriaca pueyanoori nacaree: “Cua supuetana Abrahamnaa, cucua quia taraajere quenaaja! Lázaro quia jiyarore cucua! Cuaara na juaashiquia nacatu shiiria mohuacajinia! Cua niti shiniajaquee quenaajacua! Janyari puera jiyanhua naquiya miya nio manijiniini!” <sup>25</sup> Abrahamri saaja na riuquaree: “Sanajanaa, quia niishiri taa jiyanhua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanhua taraatia quiquiaari pueyaracaanu, jiyocua na quishacari. Lázaroori quiarijia niya cumaniijashiya. Quiaari saniniuujia naquiya miishiyacujua. <sup>26</sup> Naajuhuj, jiyanhua tucuaa taaori pa tajinia quiya. Cunora, cante niqiji niuuniu paniya cuniqijiria quiocuani, majaari na naata. Naajuhuj, cante quia quiquojiniji niuuniu paniya niqijiriani, majaari na naatajuhuaj”. <sup>27</sup> Casamiriaca pueyanoori supuetana Abraham sequerohuacuahuaj: “Naa naasucuj cua supuetana Abrahamnaa. Naajaa, quia secujianijia, Lázaro quia jiyarorohua cua que tiajinia. <sup>28</sup> Tii quiyajaari cua tapueyocuaca. Cinco tarajanuhuaracanjia. Lázaro cuaara nojori numooteera, maja nojori quejoosanurajuhua nio saniitosaqui quiquojinia”. <sup>29</sup> Abrahamri na riuquaree: “Nojoricuajaari Moisés Rootasano jiiitiaa, puetunu Pueyaso sequesano caminiujunaa naajiotasanojuanaanio. Quia tapueyocuaca cuaara tojitiaara cuno”. <sup>30</sup> Casamiriaca pueyanoori riuquaree: “Naa naasucuatuhuj, cua supuetana Abrahamnaa. Naajaa, tamonu pueyano macunucujajinijinio jaara muetarohua nojoriicua, nojoriiri noojia tacatonutaniya sesa nojori miiniujiniji”. <sup>31</sup> Abrahamri saaja na riuquaree: “Nojori jaara Moisés Rootasano tojitianu paniyaquiquiaa, Pueyaso sequesano caminiujunaa naajionuutasanonio, majaari nojori tojitianu quiniutianiyajuhuj, macu pueyano jaara samiitiarohua”.

### Puereetaari quiniutianiya sesa miijiacara (Mt 18.6-7, 21-22; Mr 9.42)

**17** Na nuhuaji, Jesuuri na pueya sequequiaari: —Mijiria, pueyari pueyaracaanu sesa mitishaaquiaa. Jiyanhua taraatia quijiaari cuno, cante sesa miitirii tamonuni. <sup>2</sup> Jiyano pueyanoratej, maara socua maninia quiri nera, puereetuuca saaja jaara na riquiajiniji morotasaare, shoniniacu caminia jiuujajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niqiriyatu nio muerasuniyojuajinijinio. <sup>3</sup> Cunora, tama nia cuaqueyajaaja nia cojuare maja quenaaja sesa nia miitiniuria pueya.

Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jiyanoorinijio. <sup>4</sup> Nojuaja jaara sequeyarucua sesa miya quiajaniya niqiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

### Pueyasocua tiuujia pueyanoori jiyanhua cumaacarca

<sup>5</sup> Jesu saquiriojosano pueyari Jesu sequequiaari: —Jiyaniijanaa, socua jiyanhua canaa quia tiutiri Pueyasocua, socua cumaaca canaa jiiitanura.

<sup>6</sup> Jiyaniijia Jesuuri nojori riuquaree: —Pueyasocua nia tiuuniu jaara quiri quenaaja juhua mostaza jajauniyojua, jiyanhua shiitaniyojua, niaa jaara nio satuna jiyona sequere: “Niiqiji quia pacure. Moojinia quia nujuasee”, maara nia sequesano tojiri.

### Pueyasora poonijionatucua taa miijia quiriqianij

<sup>7</sup> Niaa jaara seruraca quiriqia, nojuaja jaara tiajinia tiuquiriohua quia cuhuariquajiniji tee na nami-tiariquiaacuajani, quia seya cojuanuujiniji soj, zniaatucua na sequere: “Miji, quia miaquesuhuaa”? <sup>8</sup> Majaaruhua. Niaari saaja na sequenutaniya: “Quiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuujia mi-aquerohua. Quiocua raturuhajuhuj”. <sup>9</sup> Na nuhuaji, nia seru jaara puetunu nia sequesanojuanaa miiri, zni-aateeri na sequequiaa “paacarasho”? Maja! <sup>10</sup> Naajuhuj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajajinijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

### Jesu naatanijosacari diez pueya, lepraraca cusosuhua

<sup>11</sup> Jesuuri Jerusalén tiacajiniara na pueyata quiariquiaacuahuaj. Jiyacari, Galilea jiya, Samaria jiya tajiniaaco quiariquiaari. <sup>12</sup> Quera na tiuquishacari shi-



itianiyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucujaji nujuatusee. <sup>13</sup> Nojoriiri Jesuucua nacaree:

—Niishitiojona Jesunaa, canaacua quia taraajere!

<sup>14</sup> Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricujani.

Nojori canujuucuatucacarijia, nojori cusonuuri shaa-jequee. <sup>15</sup> Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarahua. Nojuajaari na rupaa paaretariquiaa na maniniuhuaqueetasacari Pueyaso. <sup>16</sup> Jesu cariquimijaji mojuquetaseeri. Jiyocuara naniriiri. Jesu sequereeri: “IPaacarasho Jesunaa!” Cuno pueyanoori Samaria jiyajinijinio tahue quiquiaari. <sup>17</sup> Jesuuri na pueya niquiara naa sequereeri:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyani? <sup>18</sup> ¿Saaja nio tahuteeri tacaterohua Pueyaso na maniniuhuaqueetanura?

<sup>19</sup> Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniuucua.

### Taa na quiniutianiyani, Jiyaniijia Cristo tiuquishacari-uhua

(Mt 24.23-28, 36-41)

<sup>20</sup> Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijia na quiniuria mijiriani. Jesuuri nojori riucaaree saaja:

—Pueyaso Jiyarosano jitiiasacari na muerasu, majaanii namijiata niquishano. <sup>21</sup> Majaari na naata seque-saanu: “Niya quiya pa Jiyaniijia quiquio”, “Jati quiyaruhua”. Pueyasocuaajaari tari niya jitiiaa na muerasu nia tajinia.

<sup>22</sup> Na nuhuaji, Jesuuri tama na pueyajaaja sequerquiaari:

—Na nuhuaji, taraatia quishacariiri quiniutianiya. Naaari na niquiniuucua jiaatianutaniya niaata cua quiniuria rupaquijia, taa niaata cua quiya quiriijiacuaani. Majaari nia niquiniu quiniutianiya janiya.

<sup>23</sup> Tamasacaari nia sequenutaniya: “INiia quiyacuaja nia Jiyaniijia!” Tamasacaari saniniuuja sequenutaniyacujua: “INooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. <sup>24</sup> Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuani na nunujusacari. <sup>25</sup> Saniniuuja, mijiria cua quishacarijia, janiyari coteenu jiyanohua naquiya miishaanutaniyani. Nio pa quishacari pueyari cua paniyaquiniutianiya. <sup>26</sup> Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacari. <sup>27</sup> Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa

Noé jaara tiuquitiaquiaari na puereetuca buquejinia. Canashiyajijia, maruuri jiyanohua niquiaari. Puetunu mijiria quiniaajanaari cusonuquiaari pajaacajinia.

<sup>28</sup> Naa quiquiaarijuhua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niquitiojojuaari. Na cuhuariquiaa natoojuaari. Na tiacara tiajojuaariuhua. <sup>29</sup> Naa juhuajaniya nojori quishacari, Lotri tohuataquiaari Sodoma tiacajinijia. Jiyacari, maniiri asufreta cojitishano juhua maru niquiaari jiyocuacaanujia. Puetunu cuno sesa miijiacajanaari manijinia catequiaari. <sup>30</sup> Naa quiniutianiyajariuhua quera jiya puequesacari. Pueyari juhuajaniya quiniutianiya. Janiyari jiyacari canashiyajijia tiuquiniutianihuani.

<sup>31</sup> Cuno juuca, pueyano jaara na tia cacojiria quiya, cuaara roseyaquii na casamiicua tijajiniaaco. Naa-juhuaj, pueyano jaara na cuhuariquiajinia quiya, nojuaja cuaara tacateyaquihuara na tijajinia. <sup>32</sup> Nia niishiriquia supuetana Lot niquiocua. Na mashishacari, nojuajaari ritia cusocuaari na nijiniara na niquiniuucua, na casamiicua na taraajesacari. <sup>33</sup> Cante saaja shuquiriaatia mijiria na quiniuria niishiriojojuaari, nojuajaari na nuhuaji jiyanohua taraatia quiniutianiya Pueyasooju. Saniniuuja, cante tama na cuaqueyajaaja panitiaja cua tojijia na quiniuriani, nojuajaari pueyaracaanu shuquiriaatia quijia jiyatesaanutaniya.

<sup>34</sup> Cua tojiri. Cuno niucuajuhuaj, caapiqui pueya jiu-riatoosacari juucua na maquetujinia, niquiriyatujuaari rishaanutaniya jiyocuacaanura, Pueyaso pueyano na quiniuucua. Tamonuuri tiujiasaanutaniya saniitiosocoriquiano. <sup>35</sup> Cuno juucajuhuaj, caapiqui maajipohua riiquiniushacari jati quiquio juucua, cucua tiuujaari tarajanu shuriucujia rishaanutaniya. Tamonuuri tiujiasaanutaniya saniitiosocoriquiano. <sup>36</sup> Caapiqui pueya quishacari cuhuariquiajinia, cua pueyanoori rishaanutaniya. Tamonuuri tiujiasaanutaniya saniitiosocoriquiano.

<sup>37</sup> Jesu pueya tojishacari naa Jesu sequesantotej, nojoriiri na nequesotaree:

—¿Tee nio quia pohuatasano niquishaanutaniyarini? Jesuuri nojori riucaaree miriqui:

—Tee casaa moqueyani, mohuari tii rerejia.

Naajuhua, majaari quenaaja niquiriyatu Pueyaso tojiyashijia cureenu quiniutianiya saniitiosoo.

### Jesu pohuatasano mashiquojinijia, pueya nequesoreena pueyanojinijinio

**18** Jesuuri na pueya pohuataquiaari nio miriqui pohuatasano nojori na niishitiojonura, nojori cuaara Pueyaso secojora pueyaracaanu, nojori taacanuyaquiniutia. <sup>2</sup> Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejanio. <sup>3</sup> Cuno tiacajinijia tamonu mashiquoiori quiquiaarijuhuaj. Mashiquoiori cuno nequesoreenaacua rucanejojua pueyaracaanu. Na secojojuaari sesa na miinia pueyano cuaara na niqui-

tiohuara na casaa saniniuuja, sesa na miishanojiniji nojuaja. <sup>4</sup> Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucuanesacari, cuno nequesoreenaari socua tama sequequiaariijaaja: “Janiyari maja Pueyaso puerejani. Janiyari pueya tojiyashijia cutarani. <sup>5</sup> Naajaa, naa nio mashiquio taajetesacari janiya pueyaraanutej, janiyari quiarjia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

<sup>6</sup> Maninia na pueya niishiniuria na pohuatasano, Jiyaniijia Jesuuri naa nojori sequerohuacuhaj:

—Naa miiquiaariiri, cuno pueya nequesoreena seque. Jiyanhua pueya rerequeteja quiquiaariiri, naajaa, nojuajaari maninia miiquiaari cuno mashiquiora. <sup>7</sup> ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapue te na secojoquiaani juuca, niucuanio? ¿Pueyasoteeri nia sashitiniutianiyajaara? [Maja! <sup>8</sup> Nojuajaari maja na tarishini quiniutianiya. Ritia nia naacunutaniyari sesa nia miijia pueyacuaji. Sesa nia miijiaaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiujujia riuriatanutaniya naa pueyaracaanu secojonuujuacani?

#### Jesu pohuatasano miriqui Fariseo pueyanojiniji, Romano jiyaniijia cumaneeca masejojuajinijio

<sup>9</sup> Jesuuri socua nio miriqui pohuatasano pohuataquiaari noo pueya niqiuara, canapue te tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasaca pueya soojea, nojori jiyaniishacari cuno pueyari socua sesa miijia nojorijiniji. Cunora, Jesuuri nojori niqiuara naa pohuataquiaari:

<sup>10</sup> —Fariseo pueyanoori quiaquiaari Pueyaso Secojuja tiajinia na secojonura Pueyaso. Jiyacaritij, Romano jiyaniijia cumaneeca masejoju pueyanoori quiaquiaari Pueyaso na secojonura tiijuhuj. <sup>11</sup> Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijia, maaji porocujuhuj. Naajuhuj, shuquiriaatia quiyanijia, janiyari maja sesa miijiani juhua nio pueyanojua niya cuata secojiyani, cumaneeca masejona pueyanoni. <sup>12</sup> Janiyari caapiqui juuca miaqueyaquiquiaani puetunu semaanajanaa cua shuqiritiniuria quiajaniya. Naajuhuj, janiyari pueyaracaanu puetunu cua masanojinijianaa niquitioquiaa quiarani, taa Moisés rootaquiaaricujani”.

<sup>13</sup> Cumaneeca masejonaari saniniuuja tucuaaanu nijuasee. Na secojosacari, majaari quenaaja na maunu quiriqiaa jiyocuaaanu. Tama nojuajaari na jiriqia piquiriqiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. [Cua jiyanoori! [Sesa miijianijia!” Naa secojoquiaariiri. <sup>14</sup> Seetanujuanaa nia sequeyanijia, cumaneeca masejonaari Pueyaso jiyanooshano tacateyaro-

hua cutara. Fariseo pueyanoori saniniuuja jiyanooyaquishoo tacateyaroahuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuuja, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

#### Jesu niasacari na juaashiquia conaajaacua

(Mt 19.13-15; Mr 10.13-16)

<sup>15</sup> Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juarii. <sup>16</sup> Jesuuri saaja conaaja poonaa sequeere, conaaja cuara nocua poosaaria. Na nuhuaji, na pueya sequereeri:

—Naatujuori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujuoriria. <sup>17</sup> Seetanujuanaa nia sequeyanijia, cante tama na cuaqueyajaaja jiyateyaquiya juhua naatujuoriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

#### Casamiriaca pueyano pocojosacari Jesuta

(Mt 19.16-30; Mr 10.17-31)

<sup>18</sup> Tamonu Judiocuaca camarnuuri Jesu nequesotaquiaari:

—Maninia niishitiojonanaa, ztaa cua miiniutianiyan, jiya puequesacari cua samiitianishaanura, pueyaraanu quijia cua quiniuria Pueyasotani?

<sup>19</sup> Jesuuri na riucaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. <sup>20</sup> Pueyanonaa, quiaacuajaari Moisés Rootasano niishijia. Naa naajiotasanocuajaari quia: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sapojonuta. Quia que, quia nucua tojjia quia quiri”.

<sup>21</sup> Pueyanoori Jesu riucaaree:

—Janiyacuaajaari cua naatujuajiniji puetunu cuno tojiijajanaani.

<sup>22</sup> Naa na sequesacaritij, Jesuuri na sequereeri:

—Quiyajaari niquiriyatu casaa quia miishoojua. Nio quia miiri: puetunu quia jitiananojuanaa quia niquitiojore cumaneecara. Na nuhuaji, casamijiuniucua pueya cuno cumaneeca quia niquitiojore nareja. Naacuajitij, quiaari jiyanhua casamiriaca quiniutianiya cutara jiyocuaaanu. Na nuhuaji, quiocua nimiohua cutara, cua pueyano quia quiniuria.

<sup>23</sup> Na tojishacari Jesu sequesano, nojuajaari jiyanhua taraajequee, jiyanhua queraatia casamiriaca na quishacari. <sup>24</sup> Jesu niquishacari nojuaja taraajeyano, Jesuuri na pueya sequereeri:

—Casamiriaca pueyara, jiyanoehua jiyajenetaari Pueyaso muerasu nojori quiniuria. <sup>25</sup> ¿Camelloteeri na naata cusupuetaja cuhuoco tamajiria tajiniu? Maja na naata. Naajuhua, casamiriaca pueyanora, socua jiyanoehua jiyajenetaari Pueyaso muerasu na jatan-ishaanura.

<sup>26</sup> Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

<sup>27</sup> Jesuuri nojori riucaaree:

—Maja pueya na naata tama na cuaqueyajaaja jiy-atenu Pueyaso muerasu nojori quiniuria. Naajaa, Pueyaso cutaraari na naata.

<sup>28</sup> Pedroori Jesu sequere:

—Jiyaniijanaa, ¿canaarijataj? Canaari puetunu canaa jiiitasanojuanaa tiujiaquiaarini canaa nuhuajiniuria quiajaniya.

<sup>29</sup> Jesuuri na riucaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. <sup>30</sup> Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipin-ishocoriquiano quiarinio jiyajinia.

#### Jesu pacutesacari pohuatanu, nojuaja mosaanutaniya (Mt 20.17-19; Mr 10.32-34)

<sup>31</sup> Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuaaanu pueyara Pueyaso sequesano caminiujiunaa sequequiaaricuaaja janiyajiniini. <sup>32</sup> Naacuajitij, janiyari tahua niquitiosaanutaniyani. Nojoriiri cua macaatinutianiya. Taraatia cua miitiuniutianiyari. Cua riocojotunutaniyani. <sup>33</sup> Cua piquitiuniutianiyajaarihuaj. Na nuhuaji, cua motunutaniyani. Naajaa, jiuujianaraca juucajinia, janiyari samiitianianiuhuani.

<sup>34</sup> Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

#### Jesu jeecasacari cariojuaru pueyano Jericó tiacajinia (Mt 20.29-34; Mr 10.46-52)

<sup>35</sup> Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nuuaco. <sup>36</sup> Cariojuaru tojishacari queraatia pueya tajiyaano, pueya nequesotareeri:

—¿Casaatejanonjoni?

<sup>37</sup> Pueyari na sequere:

—Nazaret tiacajiniini Jesucuaaja tajiya.

<sup>38</sup> Cariojuaruuri nacaquee:

—¿Jesunaa! ¿Supuetana David niquiohuacuajinio supueno pueyanonaa! ¿Cucua quia taraajere quenaaja!

<sup>39</sup> Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¿Supuetana David niquiohuacuajinio supueno pueyanonaa! ¿Cucua quia taraajere!

<sup>40</sup> Jesu tojishacari nojuaja, nujuaseeri. Jesuuri pueya sequere cariojuaru cuara jaatucusaaria nocua. Cariojuaru tiuquishacari nocua, Jesuuri na nequesotaree:

<sup>41</sup> —¿Casaa quia paniya cua miiniuria quiajaniyani?

Cariojuaruuri Jesu riucaaree:

—¿Jiyaniijanaa, niquijia quini panihuanijia!

<sup>42</sup> Jesuuri na sequere:

—¿Niquijia quia quiriohua! Quia namijiacuaaja tari jeequerohua cucua quia tiuushacari.

<sup>43</sup> Jiyacaritij, cariojuaruuri maninia niquijia quiqui. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniuhuaqueetariquiaa.

#### Jesu pocoojosacari Zaqueota

**19** Jesuuri Jericó tiacajinia tiuquijioquiaari na puey-ata. Tiaca jiuujiaaco quiariquiaari. <sup>2</sup> Cuno tiacajinia quiquiaari casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijia cumaneeca masejona camarnu quiquiaari. <sup>3</sup> Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanoehua pueya quiniucua Jesu shocua. Naajuhua, Zaqueori puera posucuashi quijia. <sup>4</sup> Cunora, Zaqueori netequiaari Jesu tajoji. Nu shuucuaji sicómoro naanaacua macaseeri, maninia na niquiniuria tiji Jesu, jaara cunoco tajimia. <sup>5</sup> Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¿ritia quia rosemohua! Janiya quiarijia quia tiacajinia maquenutaniyani.

<sup>6</sup> Zaqueori ritia rosemohua. Jesu tiuquinitiaree na tiacajiniaari jiyanoehua na shuquiriniutia. <sup>7</sup> Tamasaca pueya jaara Jesu niquiquiaari Zaqueo tiacajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa mijia pueyano tiacajinia tiuquishii”. <sup>8</sup> Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijanaa, janiyari quiarijia quiocua tiuuriini. Naacuajitij, janiyari casamijiuniucua nareja niquitiojonutaniya puetunu cua jiiitasano cajiniocuajiniijianaani. Naajuhua, janiya jaara puera cumaneeca masecanu tamasaca pueyajini-ji cua sapojonutani, janiyari nojori niquitionutanihua socua jiyanoehua queraatia cumaneecani cua nohuas-esanojiniji nojori.

<sup>9</sup> Jesuuri na sequere pueya niquiara:

—¿Quiarijiani, nio tiacajinia quinia pueyari tari jiyanooshaaree! Nio pueyanocuaajaari supuetana Abraham niquiohuacuajinio supuenojuhuaj. Nojuajaari cu-  
cua tiuuri taa Abraham tiuquiaari Pueya-  
soocuacuaani. <sup>10</sup> Janiyacuajaari cunora mijiria niquiaarini, tashucuaano pueya cua pajenura, nojori cua jaariutianura Sesaaca.

## Miriqiu Jesu pohuatasano diez cumaneecajiniji

(Mt 25.14-30)

<sup>11</sup> Tii quiniaa pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jyaniiijara quiniutianiya tari, Pueyaso muerasu na jiitanura mijiria. Nocuaji, Jesuuri nojori pohuataree nio miriqui pohuatasano, nojori na niishitiojonura. <sup>12</sup> Naa nojori niquiara pohuatareeri:

—Tamonu jyaniiijia niyanuuri quiquiaari. Nojuajaari tucuaaanu tamonu jiyajinia quiaquiaari jyaniiijara na jiyatesaanura. Jyaniiijara na jiyatesaanu nuhuaji, nojuajaari tacateriquianohua quiriquiaa, narta pueya jyaniiijia na quiniuria. <sup>13</sup> Na nuhuajiria, nojuajaari diez na seya sequereee nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijiore, janiya cuaara tiuquiriohuajaatiinijaj”. <sup>14</sup> Na nuhuaji quiaqueeri. Na jiyajinijinio pueyari maja na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jyaniiijajanaa nojori sequenura: “Maja canaa paniniu cuno pueyano, canaa jyaniiijia na quiniuria”.

<sup>15</sup> Naajaa, nojuajaari saaja jiyatesaaree jyaniiijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca. <sup>16</sup> Coteenu seruuri nocua nimiaa. Na jyaniiijia sequeeseeri: “Cua jyaniiijianaa, cua poonitijosacari quia niqutiosano cumanee janiya, janiyari socua diez cumaneeca reratecanuni”. <sup>17</sup> Na jyaniiijiaari na sequereee: “¡Maniacuaja! ¡Quiaacuajaari maninia cua seru! Quiaari secaja cua niqutiosano quiajaniya poonitijosacari quia niqutiosano cumanee janiya, janiyari quia jiyatenutaniya diez tiaca jyaniiijara quia quiniuriani”.

<sup>18</sup> Na nuhuaji, tamonu na seruuri nocua nimiaajuhuj. Nojuajaari na jyaniiijia sequereee: “Cua jyaniiijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni”. <sup>19</sup> Na jyaniiijiaari na sequereejuhuj: “Quiaari cinco tiaca jyaniiijara quiniutianiya”.

<sup>20</sup> Na nuhuaji, tamonu na seruuri nocua nimiaajuhuj. Na jyaniiijia sequeeseeri: “Jyaniiijianaa, niya quia quia cumanee quia niqutiosano janiya. Janiyari na cojuacanu maniniani, toqueraujinia jiuniosano. <sup>21</sup> Janiyari naa miiquianuni cua pueresacari quiajaniya. Janiyari niishiyani, quiaari quarta pueyacuara tarajeyashijia. Quiaari tamasa racatasanojiniji poojua. Quiaari tamasa natoosanojiniji senoojuajuhuj”.

<sup>22</sup> Na jyaniiijiaari na juaarii: “Sesaacanaa, tama quia sequesantajaaja janiyari quia nequesoreenutaniyani. ¿Naate? ¿Quiaateeri niishiquianu janiyari pueyacuara tarajeyashijiani? ¿Janiyateeri tamasa racatasanojiniji poojuani? ¿Janiyateeri tamasa natoosanojiniji senoojuajuhuj? <sup>23</sup> Quiaa jaara jyaniquianu janiya naa

miiijiani, ¿casaara cua cumanee quia niqutioy-aquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhua, cua tiajinia cua tiuquishacariuhua”.

<sup>24</sup> Cunora, na jyaniiijiaari tii quiniaa pueya sequereee: “¡Cua cumanee nia jaariutiare cuno! Nia niqutiore cua maninia seru, cante diez cumaneeca jiitiaacuajani”. <sup>25</sup> Nojoriiri na sequereee: “Jyaniiijianaa, ¿casaarateni? Nojuacuaja tari diez cumaneeca jiitiaa”. <sup>26</sup> Jyaniiijiaari saaja nojori riucaaree: “Seetanujanaa nia sequeyanijia, cante tari jiitiaani, nojuajaari socua niqutiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiuyashijia na quiniuucua. <sup>27</sup> Quiarijia, cua paraa saniniuuja, cuno pojori canapueete cua paniyaquiquianu nojori jyaniiijia cua quiniuriani, miji nia jayore nojori. Niya cua niquiara nia puecoore cua ruuretajaca seque”.

## Jesu tiuquishacari Jerusalén tiacajinia

(Mt 21.1-11; Mr 11.1-11; Jn 12.12-19)

<sup>28</sup> Nio na pohuatanu nuhuaji, Jesuuri na pueya puetareecuhuj Jerusalén tiacajiniara. <sup>29</sup> Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhuj, Jesuuri caapiqui na pueya sequereee:

<sup>30</sup> —Cuno shiitaniyojua tiacajinia nia quiaare, pa tacoji niqutioshani. Naa jaara tiuquishii, niaari burro riuriatanutaniya morotasano, pueyano cajishoojua na nijinia. Naa jaara na niqutioshani, niocua na samaacartasee. Naaari na jaatucumohua miji. <sup>31</sup> Pueya jaara nequesotare niajaniya casaara nia samaacartaanoj, niocua na riucaare: “Jyaniiijia na paniya”.

<sup>32</sup> Jesu pueyari quiaaree. Nojoriiri na riuriatasee taa Jesu sequequiaaricujani. <sup>33</sup> Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

<sup>34</sup> Nojoriiri na riucaaree:

—Jyaniiijia na paniya.

<sup>35</sup> Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijia. Na nuhuaji, nojoriiri Jesu cajitirii na nijinia. <sup>36</sup> Na quiasacari Jerusalén tiacajiniara, pueyari na toqueya muevojiaari nucaaco Jesuucua. <sup>37</sup> Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu manihuaqueetariquiaa puetunu na cumacata na miishanojuanaa nojori niquiniuucua. Nojoriiri cunora jyanohua shuquiritariquiaa Pueyaso. <sup>38</sup> Nojoriiri naa nacooriaquiaa:

—¡Pueyaso cuaara shuquiritiaria pa Jyaniiijia, Pueyaso Jiyarosano na quiniuucua! Pueyaso pocua tarajero-huani. Pa jyanooriohuani. ¡Nojuajaari jyanohua maninia! ¡Pa shuquiritiarenoj!

<sup>39</sup> Cuniqiu pueya tajinia quiniaa Fariseocuaca tojishacari naa nojori sequesantotej, nojoriiri Jesu sequereee:

—Niishitiojonanaa, quia pueya quia sanaajare, maja naa nojori sequenura!

<sup>40</sup> Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ßairi saniniuujia nacoanutaniyacujua!

<sup>41</sup> Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quini-aacua nujuqueree. <sup>42</sup> Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari. <sup>43</sup> Cunora, na nuhuajiiri jiyanhua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quia-janiya quia mashiaquiniuucaaji. Naacuajitij, quia paraari quiocua juhuacunutaniya na miaquejonura quiajaniya. <sup>44</sup> Quiaari jiyareta sureesaanutaniya. Quia tiacajinia quiniaria pucoosaanutaniya. Quia tiacaari puetunu niyartasaanutaniyanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia ni-shiyaquiniuuca, Pueyasoori quiocua niqiaari na-juhuanaj, quiocuaji na tacunura juucua. Quiaari saaja na ruuretacanu.

### Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

<sup>45</sup> Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuete na seya niqutiojoriquiaacuajani Pueyasocuara pucoosocoriquiano.

<sup>46</sup> Jesuuri nojori sequeree:

—Tariucuaaanu Pueyaso Rupaajinia naa naajio-tasaaquiaariti Pueyaso sequesano: “Cua tiaari pueya secojonuujuaja janiya”. Niiaari saniniuujia na jiyatecanu nohuasenuujuaca quiqiora!

<sup>47</sup> Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocua-ca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocua-ca jiyaniijianucuanio, puetunu nojorijianaari tari rojotooriquiaa juucua taa na motunutaniya Jesuni.

<sup>48</sup> Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriqiaa Jesu.

### Pueya nequesotasacari Jesu, cante na jiyaronani

(Mt 21.23-27; Mr 11.27-33)

**20** Tamonu juuca, Jesuuri Pueyaso Secojoua tiajinia niishitiojoriquiaa. Pueya niqiaara pohu-atariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua niijomaa. Moisés Rootasanojiniji ni-

ishitiojonaari nojoritia niijomaajuhuaj, narta Judiocua-ca camarucuanio. <sup>2</sup> Nojoriiri Jesu nequesotaree:

—¿Cante quia jiyatecanu Pueyaso Secojoua tia jiyaniijia quia quiniuriani? ¿Canaa quia riucua? ¿Cante quia jiyaronani?

<sup>3</sup> Jesuuri nojori sequeree saniniuujia:

—Janiya nia nequesotanu panijahuaj. Cua riucua-ture. <sup>4</sup> ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

<sup>5</sup> Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?”

<sup>6</sup> Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na pucoonura pajaniya. Nojoricuaajaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

<sup>7</sup> Nojoriiri cunora Jesu riucuaaree:

—Johuj. Maja canaa niishiniu canaquitijia Juan jiyaroquiaari na tiuquinijionura pueyatej.

<sup>8</sup> Naaratej, Jesuuri nojori sequeree:

—Janiyajuhuj, majaari cua sequenu quiniutianiya ni-janiya, cante cua jiyaroquiaarini naa cua miiniuriatej.

### Miriqui Jesu pohuatasano sesa miijiaca poonijionaa-jiniji

(Mt 21.33-44; Mr 12.1-11)

<sup>9</sup> Na nuhuaji, Jesuuri pueya niishitiojonu coteero-huacuhuj nio miriqui pohuatasano. Sequereeri:

—Tamonu pueyanoori cuhuariquiajinia uva na-tooquiaari. Na nuhuaji, na niqutioquiaari tamasa-pueyari, nojori cojuanura nera. Na camaruuri tucua-caanu quiaaree, tii na shocotejonura marijia. <sup>10</sup> Uva quishacari noshuriujua, saniya cuhuariquia camarujanaari na seru jiyaroree cuhuariquia cojuanaa pueyacu. Jiyarosaareeri tiji na masenura na camarujanaa, uva carojotasanojiniji. Na camarujanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaruru seru tiuquishacari, ¿cuhuariquia cojuanaari na piquitiurii saaja! Na jiyaroturohua juhua-suuri. <sup>11</sup> Cunora, cuhuariquia camarujanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuriiri. Na jiyaroturohua juhuasujaariuhuj. <sup>12</sup> Cuhuariquia camarujanaari socua tamonu na seru jiyaroree nojoricua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

<sup>13</sup> Naaratej, cuhuariquia camaruuri tama sequereejajaaja: “¿Taa cua miiniutianiyarini? Quiyanuniyujua jiyaroreeraquij. Cuno pojori jaara cua panishano niyanu niqitiuri, maja naasucua nojori rerequetenu quiniutianiya nojuaja”. <sup>14</sup> Saniniuujia, cuhuariquia cojuanaa jaara cuhuariquia camaruru niyanujuanaa niquirii nojori-

icua niyano, tama nojorijiaarijia sequetooree: “No-juacuaja cuhuariquia camarura quiniutianiya na que niti, na que jaara shaajeyariquia. [Pa morej! Paari no cuhuariquia camarura quiniutianiya saniniunijia”.

<sup>15</sup> Naacuajitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. [Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? <sup>16</sup> Seetanujuanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasa pueyari, nera nojori cojuanura cutara.

Pueya tojshacari nio, nojoriiri sequequiaari:

—[Juhuej! [Pueyaso cuaara naa miyaquiiiriatej!

<sup>17</sup> Jesuuri nojori niqiniijiooree. Nojori sequereeri:

—¿Naatee? ¿Nio naajiotasanoorihuaj, tariucuaa canu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutaniya, nojori jiyanihacari cuno saajia sesarujajau. Na nuhuaji, cuno saajiaari socua panishano saajia jiy-atesaanutaniuhua”.

<sup>18</sup> Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

<sup>19</sup> Jiyacaritij, pueyacuara secojonaa jiyaniijianuucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquirojosano Israel pueya jiitianaa nojori quiniuucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijia pueya.

### Jiya jiyaniijia cuaara niqitiosaaria na sequesano cumaneeca

(Mt 22.15-22; Mr 12.13-17)

<sup>20</sup> Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riu-cuaquiaari sesa, maara Romano jiyaniijia niqitiosaaquiaari saniitiosocoriquiano. <sup>21</sup> Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhua, majaari rimajata quia niqiniu pueya. Quiaacuajaari seetanujuanaa niishitiojoquiaa, taa Pueyaso paniya canaa miiniuriacuajani. <sup>22</sup> Cunora, canaa quia seque taa canaa miiniutianiyan. Roma tiacajinia quijia jiyaniijiaari pa sequequiaari Judiocuaca cuaara cumaneeca niqutiojora nera, na jiitiasano pueya pa quishacari. Naaratej, ¿maniateeri pa miinuria na sequesano?

<sup>23</sup> Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori se-queereeri:

<sup>24</sup> —Cua niqitiri quia cumanee. ¿Nioorihuaj? ¿Cana naaquiti nocuani? ¿Cana sesate nocua naajiotasani? Jesu riuacuareeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhua.

<sup>25</sup> Jesuuri nojori sequereeri:

—Jiyaniijia César cuaara tama na casaajaaja niqitiosaaria. Nojuacuajaari na camaru. Saniniuujia, Pueyaso nia niqitioire cutara nerano tama na casaajaaja. Nojuajaari pa camarnu.

<sup>26</sup> Saaja maninia Jesu riuucasacari pueya niqiuara nojori, majaari nojori naata nocuara tonujunu quirii. Nojoriiri saniya jiuujiateere Jesu riuucasacari saaja maninia nojori. Naacuajitij, nojoriiri socua sanaajeta-ree.

### ¿Paate samiitiaconutaniuhuan?

(Mt 22.23-33; Mr 12.18-27)

<sup>27</sup> Na nuhuaji, noojiaqueya Saduceocuacajiniijioori Jesuucua niquiaari. Saduceocuacaari jiyaniijia macunucua pueya maja na samiitiaconu quiniutaniuhua. Naaratej, nojoriiri Jesu sequereeri:

<sup>28</sup> —Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. <sup>29</sup> Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoju. <sup>30</sup> Cunora, na nuhuajishanaari na mashiquio camirii. Nojuajaari muetuhuoju cusoquiaarijuhuaj. <sup>31</sup> Naaratej, neyaca tarajanuuri mashiquio camiquiaarijuhuaj. Nojuajaari muetuhuoju cusoquiaarijuhuaj. Puetunu cuno mashiquiorijianaari naa camiyoquiaari cuno maajitia. Puetunu nojorijianaari cusonuuquiaari muetuhuoju. <sup>32</sup> Na nuhuaji, pueya mashiquioori shaajequiaarijuhuaj. <sup>33</sup> Naacuajitij, macunucua jaara samiitacorohua, ¿teyano cuno siete neyacaajiniijioote seetanu neyacajanaa quiniutianiyan? Cuno mashiquiocuajaari puetunu cuno siete pueya niqiuocua quiquiaari.

<sup>34</sup> Jesuuri nojori riucaaree:

—Mijiria pa quishacarijia, canuu, maajipohuari camiyoquiaa. <sup>35</sup> Saniniuujia, majaari noo pojori camionu quiniutianiya canapue te samiitaniijiosaanutaniuhacuajani, maninia quijia nojori quiniuucua Pueyaso niqiuara mijiria. <sup>36</sup> Majaari nojori shaajenu quiniutianiuhua. Nojoriiri shaajeyashijia quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujuanaa quiniutianiya cutara. <sup>37</sup> Supuetana Moisés cuajaari pa niishitiquiaari, macunucuaari samiitaniijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

<sup>38</sup> Naacujatij, paari niishiyani, puetunu Pueyasooqua tiuujica shaajecono pueyajanaani, nojoricuajaari saminiucua quia Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quia nera cutara.

<sup>39</sup> Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequere:

—Maniniacuajaari quia sequesano, Niishitiojonanaa.

<sup>40</sup> Naa Jesu riuhanesacari saaja maninia nojoritij, majaari socua pueya nequesoreenu paniniu quiriquiaa nojuaja.

### ¿Cante Cristo supuetanani?

(Mt 22.41-46; Mr 12.35-37)

<sup>41</sup> Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanaari supuetana David niquiohuacuajinio supuenutaniya? <sup>42</sup> Supuetana Davidjanaacuajaari naa naajiotaqueaari na jaaquequejoneejinia:

“Jiyaniijia Pueyasoori cua Jiyaniijia Cristo sequesquiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia”.

<sup>44</sup> ¿Cristotucua taa David niquiohuacuajinio supuereni? Davidcuajaari na sequesya “cua Jiyaniijiaata”.

Cuno pueyari maja na naata na rucuanu quiriquiaa.

### Jesu numootesacari na pueya, Moisés Rootasanojiniji niishitiojonaa pueyacuaji

(Mt 23.1-36; Mr 12.38-40; Lc 11.37-54)

<sup>45</sup> Puetunu pueyajanaa tojitasacarijia Jesu, Jesuuri naa na saquiriojosano pueya sequere:

<sup>46</sup> —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuanura nojori juhua tojishano pueya, nojori rucuanesacari tiaca jiuujiajinia curotasano cajitiucuajinia. Nojoriiri socua panishano cajitiucuajinia cajiniu maniniucuaquiaa Pueyaso Secojojuatiajinia, tamasa tiajiniajuhuaj, nojori jaara masusaare queranacunura. <sup>47</sup> Naajuhuj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miini nuhujatij, pueya niquiara, nojoriiri najuhua tucaayocua secojoquiaa Pueyaso, pueya jyaniniuria nojori maninia pueya cutara. Naa nojori miiniucuatej, nojoriiri jyanohua saniitiosano quiniutianiya.

### Casamijiu mashiquio niqutiosacari na cumanee juurane Pueyasora

(Mr 12.41-44)

**21** Pueyaso Secojojuatiajinia, Jesuuri casamiriaca pueya shootariquiaa na cumaneeca niojiyano

cumaneeca racataja quiquiojinia, nojori niqutiosano Pueyasora. <sup>2</sup> Jesuuri tamonu casamijiu mashiquio niquiriijuhua caapiqui cumaneeniyocua niaano tiijiuhuaj. Na niasanoori nareja cobrejiniiji shipinishano cumaneeca quiquiaari. <sup>3</sup> Jesuuri na pueya sequere:

—Seetanujanaa nia sequeyanijia, cuno casamijiu mashiquioori socua queraatia niqutioree Pueyaso, cuno casamiriaca pueyajiniiji. <sup>4</sup> Puetunu cuno pojorijianaari saaja na cureeno cumaneecajiniiji niqutiojiya puetunu nojori panishanojuanaa nojori masejonu nuhuj. Cuno mashiquio cutaraari puetunu na miaajaara na masetajara cumaneecajanaa niqutioree.

### Jesu pahuatasacari, Pueyaso Secojojuatia niyartasaanutaniya

(Mt 24.1-2; Mr 13.1-2)

<sup>5</sup> Noojiaqueya tii quiniaa pueyari pocoojoriquiaa Pueyaso Secojojuatiajinia. Jyanohua shanohua saitia shipinishano quiriquiaari. Nojoriiri na shootariquiaa, naajuhuj taa na maniniushitishaaquiaari nareja pueya niqutiosano casamitiani. Jesuuri nojori sequere:

<sup>6</sup> —Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

### Taa nio jiya puequenu panishacari quiniutianiyan

(Mt 24.3-28; Mr 13.3-23)

<sup>7</sup> Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casa canaa niquiniutaniyarini, canaa niishinuria quia sequesanoori quera tohuataya?

<sup>8</sup> Jesuuri nojori rucuaare:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuenutaniya. Nojoriiri sequenutaniya: “¿Janiya Cristoni, Pueyaso Jiyarosano! [Nio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca. <sup>9</sup> Naajuhuj, majaari nia puerenu niaa jaara tojiri tamonu jiyajinijinio pueyari tamasa jiyacajiniiji pueyata miaquetoojiya, naajuhuj, pueya jaara juaatioquiaa tama nojori jyanijia nojori jatanurajaaja. Naa quiniutaniyari coteenu. Naa ja, juhuanojuaja maja nio jiya puequesacari.

<sup>10</sup> Jesuuri naa nojori pahuatariquiaa socua:

—Tamonu rupaa pocuajacaari miaquetoojonutaniya tamaatia rupaa pocuajacata. Naajuhuj, tamonu jiyajinijinio jyanijiaari miaquetoojonutaniya tamonu jiyajinijinio narta jyanijiaata. Naa queraatia miaquetoojonuuri quiniutianiya. <sup>11</sup> Rijiaari jyanohua jiuuquijutianutaniya queraatia jiyacajinia. Jyanohua miaajenuuri quiniutianiya queraatia tamonu jiyacajiniajuhuaj. Paaqueja cusonuuri quiniutianiya niya, tamaquicua juhuaj. Naajuhuj, jyanohua puereeta casaari niqutiosaanutaniya jiyocuaaanu, mijiria quiniaa niishinuria jiya puequenuraari tari catecanoya.

<sup>12</sup> Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuujua tiajiniaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyani-ijianucuaacua jaatucusaanutaniya nequesoreeso-coriquiano. Niaari naa miishaanutaniya nia pohu-atanuucua janiyajiniji pueya niquiara. <sup>13</sup> Naacuajitij, nia naata cuno jiyaniijianucua niquiara pohuatanu janiyajiniji. <sup>14</sup> Nioojiaca nia cajitiri, maja juhuacarijia nia ni-shiriojonura taa nia riu-cuanutaniya nojorini. <sup>15</sup> Jiyacuajaari jiyacari nia niishitiojonutaniyani taa nia riu-cuanutaniyanoj, mariyata casaa nia pohuatanutaniya jiyano-hua cua niishitiajatani. Niaari nojori sanaajanutaniya maninia nia rihuanesacari saaja. Nia paraari maja na naata nia sequesano rerequetenu quiniutianiya. <sup>16</sup> Jiyacarijuhuaj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajuhuaaj, nia jiyasoocujajinio supueno pueyajuhuaaj, nia rupuenaanio. Nojoriiri noojiaqueya niajanijajinijinio puecoonutaniya. <sup>17</sup> Puetunu mijiria quiniaa pueyajanaari nia niquiniu paniyaquiniutianiya cua pueya nia quishacari. <sup>18</sup> Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajanijani? <sup>19</sup> Naaratej, rejeretajaca nia quiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaa-tia nujuatare pueya miishacari sesa niajanija.

<sup>20</sup> Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. <sup>21</sup> Jiyacaritij, canapuete Judea jiyajinia quiyani, cuno pojori cuaara mashiiria tuhuananuhuaacua. Canapuete Jerusalén tiacajinia quiyani, nojori cuaara ritia mashiiria tiji. Canapuete na cuhuariquiajia quiyani, nojori cuaara tacateyaquiuhuaa Jerusalén tiacajiniohua. <sup>22</sup> Cuno quishacari, jiyano-hua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojua-naari tohuateenutaniya. <sup>23</sup> Jiyano-hua taraatia quiniutianiyari noo maajipohuara, canapuete manajaatohua quiya jiyacarini, mariyata canapuete conaaja supueja jiiitiaani. Jiyano-hua naquiya quiniutianiyari cuno quishacari nio jiyajinia. Nio jiya pueyari jiyano-hua saniitiosaanutaniya. <sup>24</sup> Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Taucuacaari Jerusalén tiaca jiiitanutaniya tama nojoririjaaja, Jerusalén tiaca nojori jiiitanu cuaara puequerejaatijia, taa Pueyaso sequequiaari tamajacuajani.

### Taa na quiniutianiyani Jesu tacatesacariuhua

(Mt 24.29-35, 42-44; Mr 13.24-37)

<sup>25</sup> Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaj. Shoniacu caminiaacuaji shiriiquitiuniutianiyajaariuhuaaj, jiyano-hua na quey-ocuasacari. Nojoriiri cushitiiniutianiya na pueretunuta-juhuaaj, jiyano-hua cojuata shoniacu caminia cajiniucuasacari. <sup>26</sup> Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso ship-inishano casaajanaari jiuuquiutiasaanutaniya jiyano-hua. <sup>27</sup> Jiyacaritij, mijiria quiniaari cua niquitiu-niutianiya cohuaaja najacajinia niyano, jiyano-hua shacantuuca cua cumaacata. <sup>28</sup> Naaratej, niaa jaara nio cua pohuatasano niquiri tari coteyano, niocua tama cumaquitiorejaaja. Niocua timiri! Niaacuajaari quera rijiosaanutaniya niquiji, pueyaracaanu cuata nia quiniuria!

<sup>29</sup> Jesuuri nojori pohuataree nio miriqui pohu-atasanojuhuaj:

—Higo naana nia niquiri, tamonu jaranacujua naananio. <sup>30</sup> Na jaamasucua jaara mueratuure, niaari niishiya, tacarejonuqui quera quiniutianiya. <sup>31</sup> Naajuhuaaj, niaa jaara puetunu cua pohuatasanojuanaa niquiri tari tohuateyano, niocua jiyacari niishiri, janijari quera tiuquihuani, Jiyaniijajanaa cua quiniuria. <sup>32</sup> Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojiti-aashijia pueya puequeyaquishacarijia. <sup>33</sup> Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

<sup>34</sup> Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuqiriiaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. <sup>35</sup> Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. <sup>36</sup> Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

<sup>37</sup> Jesuuri puetunu juucajanaa niishitiojojua Pueyaso Secojoua tiajinia. Saniniuujia, niucua quiojojuaari Oливо cuhuariquia tuhuananujinia tii na quiniuria.

<sup>38</sup> Puetunu pueyajanaari tariquicuaji quiojojua Pueyaso Secojoua tiajinia, nojori tojiniuria Jesu pohu-atasano.



### Judocuaca camarucua roojotoosacari Jesu nojori quia-nura

(Mt 26.1-5, 14-16; Mr 14.1-2, 10-11; Jn 11.45-53)

**22** Quera Pascuara queranacunuusacari quiquiaari, pueya miaquesacari pan na poreeta-jaaju shipinishano. <sup>2</sup>Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanoehua queraatia pueya paniniuucua Jesu.

<sup>3</sup>Jiyacaritij, Satanásri Jesu pueyano Judas Iscariote jiuujajinia tiuquiquiaari. <sup>4</sup>Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacujuhuj. Judasri cuno pojoritia pocoojoquiaari. Nojori sequereeri nojuaja na naata nojori quietenu Jesu. <sup>5</sup>Nojoriiri shuquiririi. Cunora, Judas sequetureeri taa cumaneeca nojori niquitionutaniya nojuajani. <sup>6</sup>Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quietenutaniya Jesu jiyasohujani.

### Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup>Poreetajaaju pan miaquenu juucaari tari quiquiaari. Cuno juucajuhuj, borregoori mosano quijia, Pueyaso niquiara miaquesocoriquiano Pascuara queranacuscacari. <sup>8</sup>Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara.

<sup>9</sup>Nojoriiri na nequesotaree:

—¿Tee quia paniya canaa majeetenurani?

<sup>10</sup>Jesuuri nojori riucuaare:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia.

<sup>11</sup>Cuno tiajinia na tiuquishacari, niocua cuno tia camaru sequeese: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’” <sup>12</sup>Nojuajaari nia niquitiniutianiya puereetuca sohuaca, nataco na tiajinia, tariucua jeenucuasano. Niocua cuniqui miishii puetunujanaa pa miaquesocoriquiano.

<sup>13</sup>Jesu pueyari quiaaree. Nojoriiri puetunujanaa riuriataquiaari taa Jesu sequequiaari nojoricuajani. Nojoriiri tii miishii puetunujanaa, Pascua niucua nojori miaquesocoriquiano.

<sup>14</sup>Jaara tari quiquiaari Pascuara miaquesacari niucua, Jesuuri na saquiriojosano pueyata cajitiushii mi-quejajinia. <sup>15</sup>Jesuuri nojori sequeree:

—Janiyari jiyanoehua niaata miaquenu paniriquiaa nio Pascua niucuan, pueya moyaquishacarijia janiya.

<sup>16</sup>Seetanujanaa nia sequeyanijia, majaari socua cua miaquenu quiniutianiya Pascuara, janiya jaara tiuquiri-

ohuajaatijia puetunu Pueyaso muerasuranotajanaa. Jiyacari cutara, paari jatiqumi miaquenutaniyani, Jiyaniijiajanaa cua quishacari.

<sup>17</sup>Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu nianianijajanaa. <sup>18</sup>Seetanujanaa nia sequeyanijia, majaari socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijiajanaa cua quiniuria puetunu Pueyaso muerasurajanaa.

<sup>19</sup>Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niquitiojoreeri. Nojori sequereeri:

—Niiori cua cuaqueya niaacuara mosocoriquiano. Niocua na miiriquia pueyaracaanutej, nia niishiriojonusa janiya.

<sup>20</sup>Nojori miaquenu nuhuaji, Jesuuri ratujua patareejuhuaj. Naa sequereeri:

—Cua nanacaari niaacuara shoonutaniya nia jiyanooshaanura seetanujanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

<sup>21</sup>‘Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya. <sup>22</sup>Janiyari naa miishaanutaniyani taa janiyajiniji juhuacarijia pohuatasaaquiaricujani tariucuaaanu Pueyaso Rupaajinia. Saniniuujia, cua tacartanaari jiyanoehua taraatia quiniutianiya naa na miiniuucua janiya.

<sup>23</sup>Jesu pueyari jiyacari juhuacatecara nequesoree-tooree tama nojorijiaaja:

—¿Canteeri na tacartanutaniyani?

### Cante seetanujanaa jiyaniijajanaani

<sup>24</sup>Jesu pueyari tama juayonuutariquiaaajacujua, teyano nojorijiniote jiyaniijajanaani. <sup>25</sup>Jesuuri nojori sequere saaja:

—Mijiria, jiya jiyaniijianucuaari jiyanoehua jiyaramiquini niishijia nojori jiitiasano pueya, juhua nojori poonitijosano pueya. Nojoriiri tama nojorijiniijiaaja sequeja: “Canaari maninia miiquiaa canaa pueyani”.

<sup>26</sup>Niajaniya saniniuujia, majaari naa nia quiniu juhua nojorijia. Cante socua tojishano pueyano quiya nianianijajinioni, nojuaja cuara tama na cuaqueyajaaja jiyateyaquiiria na cumaaca paaretaja pueyacu.

Cuara quiiria jacaria pocuaja. Naajuhuj, cante jiyaniijajanaa quiya nianianijajinioni, nojuaja cuara jiyateera tama na cuaqueyajaaja juhua nia serera. <sup>27</sup>¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? [Miaqueyano pueyanocuaaja! Naajaa, janiyari juhua nia seru quiquiaa niaarani, maninia cua miiniuria nianianiya. Naajuhuj, naa maninia miijiaa nia quiriqia.

<sup>28</sup>‘Niaacuajaari pueyaracaanu cua cojiriquiaa janiya jaara saniniuujishaariquiaani. <sup>29</sup>Naaratej, janiyari nia

jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria.<sup>30</sup> Naacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuaaj, Jiyaniijiajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreenaa nia quiniuria.

**Jesu sequesacari Pedro, nojuaja nocuaji seetanutaniya**  
(Mt 26.31-35; Mr 14.27-31; Jn 13.36-38)

<sup>31</sup> Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jyanohua na saniniuujuniuria niajaniya. Naacuajitij, niaari jyanohua saniniuujishaanutaniya, naatej, taa trigo quejooshiya jiyocuacaanucuaani, paratu panura na cocua.<sup>32</sup> Janiyari saniniuujia Pueyaso secojoree quiocuara cutarani Simónnaa, cucua tiuuniu quia tarinitiaaquiniucuaaji. Naacuajitij, quiaa jaara quioojia tacatorohua cucua, quioqua quiarta pueya cumaquiriohuajuhuaaj, nojori tiuuniuria seetanujuanaa pueyaracaanu cucua.

<sup>33</sup> Simónri Jesu sequeree:

—¿Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaaj! ¿Quiaa jaara mosaare, naajaa, janiya cuaara cojiriti-asaaria quiajanijajuhuaaj!

<sup>34</sup> Jesuuri na sequeree:

—Pedronaa, seetanujuanaa quia sequeyanijia, caacaraja niunijiaquishacarijia quiarijia, quiaari tari naa cucuaji seetanu caminiuujuniutianiya pueya niquiara: “¿Maja cua niishiniu Jesu!”

### Quera Jesu miishacari taraatia

<sup>35</sup> Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquiooju, sapatuujunio, ¿niaateeri nia panishano casaa niquitioyaquishaquaaari?

Nojoriiri Jesu riucaaree:

—Maja. Canaacuaajaari puetunu canaa panishanojuanaa niquitiojosaaquaaari.

<sup>36</sup> Jesuuri nojori sequeree:

—Quiarijia saniniuujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuaaj. Cante nijiniaquetucuaaja mueruu jiitiaaquiyani, cuno cuaara niquitioora na shiniquiaacuaji toque, nijiniaquetucuaaja mueruu na masenura na toque samitia.<sup>37</sup> Seetanujuanaa nia sequeyanijia, tariucuacaanu Pueyaso Rupaaajinia janiyajiniijii naajiotasanoori tohuateenutaniya. Janiyajiniijii naajiotasanoori naa sequeyatej: “Nojuajaari jyanishaaree sesa miijia, sesa miijiacata na teetesacari”. Puetunu janiyajiniijii naajiotasanojuanaari tari tohuateya taa na naajiotasaaquaaaricuaajani.

<sup>38</sup> Nojoriiri Jesu sequeree:

—Jiyaniijianaa, niya quia caapiqui nijiniaquetucuaaja mueruu.

Nojori riucaareeri:

—Tariucuaja.

**Jesu secijosacari Pueyaso, Getsemaní cuhuariquajinia**  
(Mt 26.36-46; Mr 14.32-42)

<sup>39</sup> Na nuhuaji, Jesuuri tohuataquiaari tiajinijii. Olivo cuhuariquia tuhuananujiniara quiaareeri. Nojuajaari cuniqui quianura jiitiquiaari. Na saquiriojosano pueyari na nuhuajiyaree.<sup>40</sup> Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniuujishaare.

<sup>41</sup> Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojuquetasee Pueyaso secojonuraari.<sup>42</sup> Naa secojoreeri:

—¿Cua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

<sup>43</sup> Jiyacaritij, Pueyaso seruuri jiyocuacaanuji nocua nimiaa na cumaquiniuria.<sup>44</sup> Jesuuri jyanohua naquiya miiriquiaa. Nojiaari quera jiaqueriquiaa na tacaaniutia. ¿Jyanohua, jyanohua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua.<sup>45</sup> Na secjonu nuhuaji, Jesuuri sanerohua. Na pueyacuatacateyaru-huari. Nojori niquishuhua maquetiuyano saajaari, puera nojori taraajenuucua.<sup>46</sup> Jesuuri nojori sequeree:

—¿Casaara nia maquetiuyani? Nia saneecuatere. Pueyaso nia secojore na cojuanura niajaniya, maja sesa nia miiniuria niaa jaara saniniuujishaare.

### Judiocuaca camarucua quiasacari Jesu

(Mt 26.47-56; Mr 14.43-50; Jn 18.2-11)

<sup>47</sup> Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajiniijinio quiquiaari. Judasri Jesuucua nimiaajanaa. Na saruhuataseeri na nujuunuta.<sup>48</sup> Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

<sup>49</sup> Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

<sup>50</sup> Tamonu nojorijiniijinioori pueyacuara secjonaa jiyaniijia seru pirii na mueruuta. Saaja na miaquetajara numoco jaatereeri.<sup>51</sup> Jesuuri na sequeree:

—¿Tariucuaja! Maja naa miiniu.

Jesuuri numoco ririi. Na rupuoruhuari.<sup>52</sup> Judasta quiriquiaari pueyacuara secjonaa jiyaniijianucua, Pueyaso Secojoua tia cojuanaa jiyaniijianucuaajuhuaaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucuaaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? <sup>53</sup> Pueyaracaanu cua quishacari niata Pueyaso

Secojoua tiajinia, majaari nia quianu quijia janiya. Naajaa, quiarjia cutaraari nijaniyara, nia panishano nia miiniuria janiya. Quiarjiani, Sesaacaari cumaacara-ca na panishano na miiniuria.

#### Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa. <sup>55</sup> Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishiijiuhuaj. <sup>56</sup> Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijia-juhuaj.

<sup>57</sup> Pedroori seetaree. Naa sequereeri:

—Niyacoona, ¡majaari quenaaja cua niishishano cuno pueyano!

<sup>58</sup> Na nuhuaji, tamonu pueyanoori Pedro niquiriijiuhuaj. Nojuajaari cuno jiyaniijia seru quiriquiaajuhuaj. Pedro sequereeri:

—¡Quiaaqui cuno pojorijinijinio pueyanojuhuaj!

Pedroori saa sequereejaa:

—¡Maja, pueyanonaa! ¡Janiya maja nojorijinijinioni!

<sup>59</sup> Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocuaajaari cuno pueyanota quijia. Nojuajaari Galilea jiyajinijiniojuhuaj.

<sup>60</sup> Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocusacarijia, jiyacaritij, caacarajaari niunijioree. <sup>61</sup> Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujuniutianiya janiyajiniji pueya niqiara, caacaraja niunijiyaquishacarijia”. <sup>62</sup> Pedroori cuniquiji tohuataquee. Jiyanohua nujuquereeri na taraajenuta, sacuaraatia na seetanuucua.

#### Pueya macatishacari Jesu

(Mt 26.67-68; Mr 14.65)

<sup>63</sup> Jesu cojuanaa pueyari Jesu macatiriquiaa. Nojoriiri na piquitiuriquiaa. <sup>64</sup> Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

<sup>65</sup> Nojoriiri socua queraatia sesa casaa sequeturiquiaa na macatiniuria Jesu.

#### Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

<sup>66</sup> Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucua, mariyata Moisés Rootasanojiniji niishitiojonaatajuhuaj.

Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tajoji, nojori nequesoreenura tii nojuaja. Nojoriiri naa Jesu nequesoreeree:

<sup>67</sup> —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiririniij”, niaari saaja cua sequenutaniya: “Quiaa sapojiya”. <sup>68</sup> Saniniujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya.

<sup>69</sup> Naajaa, quiarjiani, janiyari puetunu cumaacaraca Quijiajanaa miaquetajara cajiniutianiya jiyocuacaa-nuni.

<sup>70</sup> Naa Jesu sequesacaritij, puetunu nojorijianaari na sequereeri:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiririniij. Naacuaaquinatejaj, taa nia sequeyacuajani.

<sup>71</sup> Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquianoni? Paacuaajaari tari tama pa numaatajaaja sesa na sequesano tojitiareeni.

#### Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

**23** Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua.

<sup>2</sup> Cuniqui, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojiquiaajuhuaj, maja canaa Israel pueya niquitiojonura canaa cumaneeca pa jiyaniijiajanaa Césarra, taa César sequequiaaricuaajani. Naajuhuaj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

<sup>3</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Taaquiririniij. Naacuaaj, taa quia sequereecuajani.

<sup>4</sup> Jiyacaritij, Pilatoori pueyacuara secojonaa jiyaniijianucua sequereeri, pueya maanunio:

—Nio pueyano nequesoreeree tarinijia. Nojuajaari maja sesa miijia.

<sup>5</sup> Nojoriiri saaja socua jiyacaterree Jesuucuaa tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarjia, niya niishitiojijajaariuhua Judea jiyajiniani.

#### Jiyaniijia Herodes nequesoreesacari Jesu

<sup>6</sup> Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

<sup>7</sup> Nojoriiri na riucuaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. <sup>8</sup> Nojuajaari pueyaracaanu Jesu niquiniuucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niquiniu panijia juucua. Naacuajitij, na niquishacari Jesu, nojuajaari timirii. <sup>9</sup> Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja. <sup>10</sup> Pueyacuara secojonaa jiyaniijianucuaari tii quiriquiaa-juhuj, Moisés Rootasanojiniji niishitiojonaanio. Cuno pojoriiri jiyanhua Jesuucua saquiriojotariquiaa queraatia sesa casaa. <sup>11</sup> Herodesri na soldadohuata Jesu rerequeteriquiaa. Na macaatiiri. Na cushitirii jiyanhua shanhua toqueeri juhua jiyaniijia cushishano. Na nuhuaji, Herodesri pueya jiyarotarahua Jesu Pilatoocua. <sup>12</sup> Herodesri cuno juuca Pilato rupuenara quiquiaari. Coteenu, majaari nojori niquitioonu paniniu quiija. Nojoriiri saaja shocotetoojua.

**Puetunu pueyajanaa sequesacari Jesu cuara mosaaria**

(Mt 27.15-26; Mr 15.6-15; Jn 18.39-19.16)

<sup>13</sup> Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhuj, tii quiniaa pueyano. <sup>14</sup> Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojouquiaa. Janiyacuajaari na nequesoreeriquiaa nia niquiarani. Niaacuajaari cua tojitiariquiaa cua nequesoresacari nojuaja. Quiarijia niishiya cutaranijia, puetunu nocuara nia tonujusanojuanaari maja seetanujuanaa. <sup>15</sup> Jiyaniijia Herodesquiiri tari niishiya-juhuj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. <sup>16</sup> Janiyari na majacutenutaniya narejani, cartesaarohuari.

<sup>17</sup> Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miiquiaari pueyaracaanutej, pueya na shuquiritiniuria. <sup>18</sup> Jiyacaritij, puetunu pueyajanaari juhuacatecara jiyanhua nacaree jatiqui:

—¡Jesu quia more! ¡Barrabás quia cartere saniniujia!

<sup>19</sup> Tariija cuno Barrabásri narta nasojosano Judiucacata Romano pueya taanuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. <sup>20</sup> Pilatoori Jesu cartenu panijia juucua. Naaratej, Pilatoori pueyata pocoojorohua socua. <sup>21</sup> Pueyari saaja jiyacaterree jiyanhua nacoona ja-tiqui:

—¡Cuaara mosaaria niyacutesanojinia teetesano!  
¡Cuaara mosaaria!

<sup>22</sup> Pilatoori pueya sequenu pacuterohuacuahuaj:

—¿Maatucua casaara mosaarejaarani? ¿Sesa miiriitijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

<sup>23</sup> Pueyari saaja socua jiyanhua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanhua nacooriguiaa. Puera jiyanhua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. <sup>24</sup> Naaratej, Pilatoori socua tariniriohua. Pueya panishano miiriiri. <sup>25</sup> Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyano-juhuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

**Niyacutesanojinia Jesu teetesacari**

(Mt 27.32-44; Mr 15.21-32; Jn 19.17-27)

<sup>26</sup> Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

<sup>27</sup> Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiy-onuuriquiaari, nocua nojori taraajenuta. <sup>28</sup> Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuanio. <sup>29</sup> Na nuhuaji, jiyanhua taraatia quishacariiri quiniutianiya niaara, jiyanhua taraatia. Jiyacaritij, pueyari sequenutaniya: “Socua shuquiriaatia quiijiaa cutaraari noo maajipohua cante muestuyashijiani, cante manajeyashijianucuanio, mariyata cante mueya supueteyashijianucujaniuhuj”. Mueyaraca maajipohuari jiyacari jiyanhua taraajenutaniya, nojori niquishacari necohua miishacari naquiya. <sup>30</sup> Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” <sup>31</sup> Jiyacariiri jiyanhua naquiya miishacari quiniutianiya. Quiarijia, janiya jaara naa naquiya miishiyacuana, ¿taaquitijia Pueyaso tojitiaashijiaa miishaanutaniyatejaj?

<sup>32</sup> Caapiqui sesa miijiaacari jaatucunuusaariquiaa-juhuj, mariyata teetesocoriquiano Jesuta. <sup>33</sup> Nojoriiri puecoosaqui tiuquijioosee. Cuniqi pueya puecoosaquini, na sesa quiquiaari “Pueyano Nacaco”. Nojoriiri tii Jesu teetere maca niyacutesanojinia. Cuno caapiqui sesa miijiaacari teetesosaareejuhuj, niquiriyatu na miaquetajara, tamonu na muenecara. <sup>34</sup> Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijoree, nojori niishiniuria taa nojori seraatianutaniya Jesu toqueni. <sup>35</sup> Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama seque-tooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

<sup>36</sup> Soldadohuari Jesu macatiriquiaajuhua. Nojoriiri Jesu raateree piiquia vino juucua. <sup>37</sup> Jesu sequetureeri:

—Quiaa jaara Judiocuaca jiyaniijia quiri, hiyacutesanojiniji quia roserecarajaj!

<sup>38</sup> Jesu nacaacuma, suruhuatuneeri rupotasaquaaari naajiosano Griego rupaajinia, Romano pueya rupaa-jinia, Hebreo rupaajinianio. Tii naajiotasano quiri quiaari naa nocuara pueya saquiriojotasano: “Nio pueyanoori Judiocuaca jiyaniijia”.

<sup>39</sup> Tamonu cuno sesa miijiacajinijinio Jesu shuriucua teetesano quiri quiaani, nojuajaari Jesu rerequeteriquiaajuhua. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. Canaa quia roshiniijorejuhuaj!

<sup>40</sup> Narta sesa miijiaari na juarii:

—¿Quiaateeri Pueyaso puereyashijia? Quiaari mosaanutaniyajuhua. <sup>41</sup> Pajaniya cutaraari sesa pa miiniucua naquiya miishiyani. Paacuajaari maninia sanitioshiyani sesa pa miiniucua. Saniniujia, nio pueyano pa tajinia nujuataani, hajuajaari sesa miyashijia cutara!

<sup>42</sup> Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuujuua, Pueyaso jaara quia jiyatere Jiyaniijiajanaa quia quiniuria.

<sup>43</sup> Jesuuri na riuucuree:

—Seetanujuanaa quia sequeyanijia, quiarijiani, nio juucaja, quiaari cuata quiniutaniya shuquiriatia quishaqui cutara.

### Jesu cusosacari

(Mt 27.45-56; Mr 15.33-41; Jn 19.28-30)

<sup>44</sup> Panacari, jiyari ninishiquiria quiquiaari puetunujuanaa, juhua niucua! Pananu piriuushacari, cuhuate-mohuari. <sup>45</sup> Jiya quishacarijia ninishiqui, jiyacaritij, Jerusalén tiacajinia Pueyaso Secojojua tajinia, jiyanoohua shiquiquia toquejiniji sohuacaari noojiaa-coji sutequiaari puetunujuanaa querajaquera! <sup>46</sup> Jiyacarijijuhua, Jesuuri nacaree:

—Cua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

<sup>47</sup> Romano soldadohua jiyaniijia niquishacari puetunu niojuanaa, nojuajaari maninia sequeree:

—Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritiri.

<sup>48</sup> Puetunu pueyajanaa, canapuede Jesu shootiariquiaa cusoyanoni, nojoriiri taraatia na tajinia quiojoquiaariuhua. Nojoriiri tama na jiri quiaaja piquiniuuquiaariuhua, jyanohua nojori tacaaniutia naa nojori monuucua Jesu. <sup>49</sup> Saniniujia, puetunu Jesu niishishano pueyajanaari tii jijojetarohuaaja, maajipohuajuhua, canapuede Jesu nuhuajiquiaari Galilea jiyajiniicujani. Puetunu nojoriijianaari tucuaaanuji niquitiriquiaa Jesu.

### Jesu quete niasacari raaco

(Mt 27.57-61; Mr 15.42-47; Jn 19.38-42)

<sup>50</sup> Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajini-jinio. Cuno tiacaari Judea jiyajinijuhua. Cuno pueyano sesa quiquiaari José. Nojuajaari Judiocuaca jiyaniijianucujini quiquiaari. <sup>51</sup> Cuno Joseeri Pueyasocua tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. <sup>52</sup> Naacuajitij, Jesu cusosacari, Joseeri Pila-toocua quia quiaari, Jesu quete na masenura. <sup>53</sup> Na nuhuaji, Jesu quete roshinirii niyacutesanojinijiiri. Na jiuuicoreeri cohuaaque quenaaruque toquejinia. Jesu quete niaree tarijia na jiuutianishano saajajiniaari. Cuno raajinia, juhuanojuaja maja macu niasaanu quiquiaari. <sup>54</sup> Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoria.

<sup>55</sup> Cuno maajipohua, cante Jesuta nijioquiaari Galilea jiyajiniicujani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. <sup>56</sup> Nojori riujuushacariuhua na tajiniohua, nojoriiri juhuataja shanohua jaanutaja cojitijiosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricujani.

### Jesu samiitasacariuhua

(Mt 28.1-10; Mr 16.1-8; Jn 20.1-10)

**24** Coteenu semaana juucajinia, cuno maajipohuari tariquicuaji raajiniara quia quiaari. Nojori cojitijiosano shanohua jaanutaja patootaareeri. <sup>2</sup> Nojori tiuquijiosacari raajinia, saajajini quejasano raa tiotiu niquitiushiiri tariucua tamocora shuququitishano. <sup>3</sup> Naaratej, nojoriiri raaco tiuquitiamaa. Shaaqui quiri quiaari Jiyaniijia Jesu quete. <sup>4</sup> Nojoriiri shiriquirii. Majaari nojori niishiniu quiri quiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiri quiaa. <sup>5</sup> Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? <sup>6</sup> Maja tari niya na quiniu. Tari samiitiarohuano! ¿Niaateeri tari niyajetaree na sequesano nia-

janiya, Galilea jiyajinia na quishacarijia? <sup>7</sup> Nojuajaari tari nia sequecanucuaja, nojuaja sesa miijiaca niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

<sup>8</sup> Jiyacaritij, maajipohuari shusha niishiquii tarijia Jesu sequesano nojori. <sup>9</sup> Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuunia pueyajanaano. <sup>10</sup> Cuno maajipohua, Jesu saquiriojosano pueya pahuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasa maajipohua. <sup>11</sup> Jesu once pueyara, maajipohua pahuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pahuatanusano.

<sup>12</sup> Naajaa, Pedroori tijajiniji netequiaari raajiniara. Raaco na cuuquesacari, saaja Jesu jiuniocotaja cohua jaque toque niquiquiaari maanoori. Pedroori juhua jiuujiaaju tacateyarohua na shirriquinutia, na niquishanojiniji, maajipohua pahuatasanojininio.

**Jesu tojtianaa pueya niquishacari Jesu, nojori  
quiasacari Emaús tiacajiniara**

(Mr 16.12-13)

<sup>13</sup> Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, nioluacata quiasacari tiriara. <sup>14</sup> Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. <sup>15</sup> Naa nojori pocoojosacari nucuacotej, Jesujuanaari jiyacari nojori rupese. Juhujaniya nojoritia pacutaareeri. <sup>16</sup> Maajari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. <sup>17</sup> Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

<sup>18</sup> Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianuhuj. ¿Quiaacua casaara niishiyaquirini casaate miishaarucuaani?

<sup>19</sup> Jesuuri nojori nequesotaree:

—¿Casaate tii miishaarucuaajaarani?

Jesu sequeereeri:

—[Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. [Jiyanohua maninia quijiaari na cumaacata na miijosano, na niishitiojosanojuhuj! Pueyaso timitiasano quijiaari, puetunu pueya panishanojuanaano. <sup>20</sup> Pueyacuara secojonaa jiyaniijianucua, mariyata pa camarucuaari na niquitiorucuaa Romano jiyaniijia na motesocoriquiano. Niyacutesanojinia mosaarucuaari.

<sup>21</sup> Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji.

<sup>22</sup> Tamasaca maajipohua canaa maanujinijinoori canaa shioree nojori pahuatasano. Nojoriiri quiarijia tariquicuaji quiojomaa Jesu raajinia. <sup>23</sup> Nojoriiri maja na riuritanu quishii na quete. Nojori tacatesacariuhua, nojoriiri canaa pahuatasuhua, nojorinia Pueyaso seya niquirii juhua na maquenujinia. [Cuno Pueyaso seyanaari nojori sequeere, Jesu tari samiitiarohua!

<sup>24</sup> Na nuhuaji, tamasa canaajinijinoori raajinia quiojiyareejuhuj. Seetanujuanaa naa quiquiaari, taa maajipohua sequeere canaacuaani. Maja cutaraari nojori niquiniu quirii Jesu.

<sup>25</sup> Jiyacaritij, Jesuuri nojori sequeere:

—Pueyanaa, majaquiiri juhuanujuaja nia niishiniu.

Niaari taacanuyajaa puetunu tariucuaaanu Pueyaso sequesano caminiujiunia naajiotasanoocuaajanaa nia tiuuniuria. <sup>26</sup> ¿Majateeri naa na pahuatasaanu quiquiaaricuaaja: “Cristoori coteenu naa mosaanutaniyaquij. Na nuhuaji cutara, jiyanohua cumaacaracara quijara jiyatesaanutaniuhuari Jiyaniijiajanaa na quiniuria”?

<sup>27</sup> Jesuuri juhucatecara nojori niishitiojoree puetunu tariucuaaanu Pueyaso Rupaajinijianaa, tee nojuajiniji naajiotasano quiyacuajani. Moisés naajiotasanojiniji pahuatanu coteereeri, na nuhuaji, puetunu Pueyaso sequesano caminiujiunia naajiotasanojinijianaano.

<sup>28</sup> Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujoriquiaa. <sup>29</sup> Nojoriiri nojoritia na jiyojetenu paniriquiaa jiyanohua. Nojoriiri na sequeere:

—[Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. <sup>30</sup> Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. <sup>31</sup> Jiyacaritij, nojori namijiaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. <sup>32</sup> Nojoriiri sequetooree:

—[Jesucaajaquiiri quiriquiaa! [Cunora poojiaqui

jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanootej!

<sup>33</sup> Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuratasuhua tii tariucua rerejono, mariyata socua narta Jesu pueyata.

<sup>34</sup> Tariucua tijajinia quiniaari Emaús tiacajiniji tiuquijionaa sequeere:

—[Pa Jiyaniijiaqui seetanujuanaa samiitiarohua!

[Simónri na niquirii!

<sup>35</sup> Na nuhuaji, shusha tiuquijionaa nojori pahuatareejuhuj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

**Jesu muetasacariuhua na saquirojosano pueyacua**  
(Mt 28.16-20; Mr 16.14-18; Jn 20.19-23)

<sup>36</sup> Nojori pocoojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujuaquee. Naa nojori sequereeri:

—¿Niaate quiyajaa? Nioojia nia cajitiri.

<sup>37</sup> Nojoriiri shiriiquitiuquii. Jiyanoehua puere-turiquiaari. Nojoriiri Jesu jiyaniriquiaa naaqui. <sup>38</sup> Jesuuri nojori sequereeri:

—¿Casaara nia pueretiuyani? ¿Casaara nia jiyajenetaa janiyani? <sup>39</sup> Cua juaashiquia nia niquiri, cua niohuacanio, nia niishiniuria janiyacuaajaari quiyani. ☩Cua cootiuri! ☩Cua niqutiuri! Naaquiiri maja cuaqueyaraca, maja nucuhuaraca taa nia niquiyajaniyacujani.

<sup>40</sup> Naa nojori na sequesacaritij, Jesuuri nojori niqiti-jioree na juaashiquia, na niohuacanio. <sup>41</sup> Puera nojori jiuujiatesacari, puera nojori shuquirishacarijiuhuaaj, nojoriiri taacanuuriquiaajaa, maja naasucua Jesu. Cuno-ra, Jesuuri nojori sequereeri:

—¿Niaate miaquesocoriquiano jiitiaacuaa?

<sup>42</sup> Nojoriiri Jesu niqitioree sapitiaaja raqui caquis-hano. <sup>43</sup> Jesuuri na maseree. Nojori niquiara na mia-quereri. <sup>44</sup> Na nuhuaji, nojori sequereeri:

—Janiyari naa miishaarucuaani taa cua pohu-ataquiaari niajaniyacujani, pueyaracaanu niaata cua quishacari tarijia. Nia sequequiaaricujani, janiyari naa miishaanutaniyani, taa Moisés naajiotaquiaari janiyajinicujani. Puetunu Pueyaso sequesano caminiujiuniaajanaari janiyajiniji naajionuutaquiaariji-uhuaaj. Supuetana Davidri janiyajiniji naajiotaquiaariji-uhua na jaaquequejoneejinia. Quiarjia tari tohua-teerucuaari puetunu janiyajiniji cuno naajionuutasano-juanaa.

<sup>45</sup> Jiyacaritij, Jesuuri nojori niishitirii tariucuaaanu Pueyaso Rupaa naajiotasano. <sup>46</sup> Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. <sup>47</sup> Naa naajiotasaaquiaarijiuhuaaj, Jerusalén tiacajinia, janiyajinijiiri pohuatasaanutaniya pueya niquiara, na nuhuaji puetunu jiyacajiniajanaano. Pueya tiuushacari cucua, nojori jaara noojiaca tacatorohua sesa nojori miiniu-jiniji, sesa nojori miishanoori tuujusaanutaniya, Pueyaso jiyanooshacari nojori. <sup>48</sup> Niaacuaajaari puetunu cua miishanojuanaa niqijiaca. <sup>49</sup> Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuacaanuji niriqiano cumaaca maserejaatijia.

**Jiyocuacaanu Jesu tacasacariuhua**  
(Mr 16.19-20)

<sup>50</sup> Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqii nojori quishacarijia, Jesuuri na juaashiquia shiitioquiaari nojoriicuaara na secojosacari Pueyaso, Pueyaso jiitianura maninia pueyaracaanu nojori. <sup>51</sup> Nojoriicuaara na secojosacarijia, Jesuuri nojori shuriucuaaji tacanishaaquiaari jiyocuacaanu. <sup>52</sup> Nojoriiri na shuquiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoehua shuquiriaatia quiriquiaa. <sup>53</sup> Nojoriiri pueyaracaanu quijia Pueyaso Secojoua tiajinia. Tii Pueyaso maniniuhuaqueetatujua pueyaracaanuuri. Tariucuaaja.

# JUAN

## Pueyaso Rupaa jatasacari pueyanora

1 Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari "Pueyaso Rupaa". Nojuajaari tari pueyara-caanu quiija, jiya quiyaquishacariija. Na Que Pueyasota quiijaari. Pueyaso quiijaajaariuhuj. <sup>2</sup>Jiya coteesacari, nojuajaari na Que Pueyasota quiriquiaa. <sup>3</sup>Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipinia quiniu socua. <sup>4</sup>Nojuajaari quiijaahunajaj. Naaratej, nojuajaari na naata pueya jiuujia cuhuatanu, pueyara-caanu rishijia nojori quiniuriahuj. <sup>5</sup>Jesucristoori cuhuashiqui quiija. Naaratej, na rupaata poojia cuhuataari. Saniniuujia, Sesaacaari ninishiqui quiija. Naajaa, majaari na naata Pueyaso Rupaa na shocotanu. <sup>6</sup>Pueyasoori quiari naataja tamonu pueyano jiyarocuaari, Neyanujiniji pohuatariquiano. Na sesa quiquiaari Tiuquinijiona Juan. <sup>7</sup>Pueyasoori na jiyarocuaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. <sup>8</sup>Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishitiniuria cante saniya poojia cuhuatana cutarani. <sup>9</sup>"Pueyaso Rupaari" seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishitiniuria cante Pueyasoni.

<sup>10</sup>"Pueyaso Rupaari" mijiria rucanejojua quiquiaari. Pueyari tama nojori Shipinijajaaja niishiyaquiquiaari. <sup>11</sup>Tama na saquiriojosano Israel pueyacu niquiaariiri. Nojoriiri na tamacaquiaari saaja. <sup>12</sup>Saaja noojiaqueya pueyari nocua tiuquiquiaari. "Pueyaso Rupaari" cuno pueya jiyatequiaari Pueyaso muerasura nojori quiniuria. <sup>13</sup>Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

<sup>14</sup>"Pueyaso Rupaari" seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na mijiosano niquiquiaariiri. Jiyanoahua maninia quiquiaariiri. Na Que Pueyasoori na cumaquijia jiyanoahua maninia na miiniuria, Neyanuniyojua na quishacari.

Nojuajaari saaja seetanu rupaajanaa sequeja Pueyasojiniji. Jiyanoohua quijiaari. <sup>15</sup>Tiuquinijiona Juanri Jesucristojiniji pohuataquiaari pueya niquiara. Jiyanoahua na rupaa paaretaquiaariiri pueya tojtianura nojuaja. Naa sequejaari:

—Janiyacuaajaari nojuajiniji nia pohuatajani, janiya jaara nia sequejani: "Tamonu pueyano cua nuhuaji niniutianiya". Nojuajaari jiyaniijajanaa cutara janiyajiniji. Nojuajaari tari quiija cua quiyaquishacariija.

Juanri naa pohuataquiaari Jesucristojiniji.

<sup>16</sup>Jiyaniijajanaa Jesucristo quiniucua, puetunu panyajanaari na jiitiasanojiniji masequiaani. Jiyanoahua capora na quiniucua, nojuajaari pueyaracaanu pa cumaquiquiaa. <sup>17</sup>Pueyasoori supuetana Moisés naajiotequiaari na rootasano panyajanaa. Cunoori maja na cumaquiniu quiquiaari panyajanaa. Quiariija saniniuujia, pa panijia Pueyaso quiniucua, nojuajaari Neyanujanaa jiyarocuaari pocua, pa jiyanooshaanura, naajuhuj, seetanu rupaajanaa pa niishitiniuria nojuajiniji. <sup>18</sup>Majaari quenaaja tamonu pueyano niquiniu quiija Pueyaso. Neyanu, cante na Que shuriucua quijiacua-jani, nojuajaari na Que pa niishitocuaari.

## Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

<sup>19</sup>Jerusalén tiacajinijinio canaa Judiocuaca camaru-cuaari na pueya jiyaramiquiquiaari Tiuquinijiona Juan-cua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niquiohuacuajinio supueno pueya. Noojiaqueya cuno pojorijinijinooori quiquiaarijuhua pueyacuara secojonaa pueya. <sup>20</sup>Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

<sup>21</sup>Cuno pueyari socua na nequesotarohua:

—¿Canteeri quiajaniyani? ¿Quiaa jiyoteeri Pueyaso sequesano caminiujunua Elías soj? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuhuj:

—¿Quiaa jiyoteeri Pueyaso sequesano caminiujunua, noj tariucuaacaanu sequesaaquiaari niriqianotej?

Juanri saaja nojori riucuaaree:

—Maja.

<sup>22</sup>Cuno pueyari socua na sequere:



—Canaa quia pohuatareja, ¿cante quiajaniyani? Canaacua saniniuujia canaa camarucua pohuata-suhanijia.

<sup>23</sup> Juanri saaja naa nojori riuquaree:

—Janiyacuaajaari nooni, cariiquia jiyajinia nacajatej, taa supuetana Isafas juhuacarijia naajiotaquiaari janiyajiniicuaajani: “¿Jiyaniijiaacuaji nia nuunore maninia! ¡Maja shuutiuniu!”

<sup>24</sup> Jiyacaritij, Fariseocuaca camarucua jiyaramiquis-hano pueyari Tiuquinijiona Juan nequesotaree:

<sup>25</sup> —Quiaa jaara quiaquiri Cristo, Elíasjuhuaj, cuno tariucuacaanu sequesaaquiaari niriquiano Pueyaso sequenu panishano caminiujiuniatej, ¿casaara pueya quia tiuquinijiya moojiniacuaraarini?

<sup>26</sup> Juanri nojori riuquaree:

—Janiyari nareja moojinia tiuquinijiya pueyani. Saniniuujia, tamonuuri niya quiya, nia niishiyaquishoojua. <sup>27</sup> Nojuajaari cua nuhuaji niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

<sup>28</sup> Naa cuno pojori nequesoreesacari Tiuquinijiona Juantej, cunoori quiriquiaa Betania jyanishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

### Jesu juhua Pueyaso borregoniyojua pocuara mosaariquiano

<sup>29</sup> Tariqui saniniuujia, Tiuquinijiona Juanri Jesu niquiriri nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jyanoooshaanura!

<sup>30</sup> Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijiajanaa cutara. Nojuajaari tari rishijia cucuaji cua quiaquishacarijia”. <sup>31</sup> Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanaura, Pueyaso Jiyarosano nojori niishiniuria cutara.

<sup>32</sup> Tiuquinijiona Juanri pueya sequereehujuaj:

—Janiyari Pueyaso Sohanu niquiriucuaani jiyocua-caanuji roseyano nocua juhua mococoonu. Nocua tiu-ushiiri. <sup>33</sup> Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohanu niquiri pueyanoocua roseyano, nocua na tiuuniuria, quiocua niishiri, cunocuaajaari cua sequesano quiajaniya. Nojuajaari cua Sohanu tiuquinijionutaniya pueya jiuujiajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. <sup>34</sup> Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, ¡nojuajaari seetanujuanaa Cristo, Pueyaso Niyanu!

### Coteenujanaa Jesu pueyajiniji pohuatasano

<sup>35</sup> Tariqui, Tiuquinijiona Juanri tii quishiiquiuhua caapiqui na pueyata. Janiyari niquiriyatu cuno caapiqui pueyanojinijinio quiriquiaani. <sup>36</sup> Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niquiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia sequejeequesaanura.

<sup>37</sup> Naa canaa tojishacari Juan sequesantej, canaari Jesu nuhuajiquiaarini. <sup>38</sup> Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

<sup>39</sup> Jesuuri canaa riuquaree:

—Miji. Nia niquiquii.

Canaari nata quiaareeni. Canaari na quijia niqitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

<sup>40</sup> Tiuquinijiona Juan niqitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jiitiaja. Na sesaari quijia Simón Pedro. <sup>41</sup> Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajanunaa, canaari Cristo niquiriquiacuaani, tariucuacaanu Pueyaso sequesano na jiyaroso-coriquianotej!

<sup>42</sup> Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaaajinia, nioori sequeya Pedro. Pedroori saniniuujia pueyano rupaaajinia sequeya “Saajia”.

### Jesu saquiriojosacari Felipe, Natanaelno

<sup>43</sup> Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

<sup>44</sup> Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedrota cuno tiacajinijinio quiquiaarijuhuaj. <sup>45</sup> Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuacaanutej! Tariucuacaanu Pueyaso sequesano caminiujunaa pueyari nojuajiniji naajionuutaquiaarijuhuaj. ¡Nojuajaari Nazaret tiacajinijinio Jesu, José niyanu!

<sup>46</sup> Natanaelri saa riuquareeja:

—¡Jaj! ¿Na naatate maninia miijia pueyano supuenjuuara cuno sesa miijica Nazaret tiacajiniji?

Felipeeri na sequeree saaja:

—¡Miji! ¡Pa niquishii!

<sup>47</sup> Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niqiuohuacuajinio supuenojuanaa cutara. Majaari na niishiniu sapojonu.

<sup>48</sup> Natanaelri na sequeree:

—¿Taa quia niishiya janiyarini?

Jesuuri na riucuaaree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

<sup>49</sup> Natanaelri shiriiquirii. Jesu sequereeri:

—Niishitiojonanaa, ¿quiaacuajaqui Pueyaso Niyanu! ¿Quiaari parta Israel pueya jiyaniijiaranojuhuaj!

<sup>50</sup> Jesuuri na sequeree:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niqiniutianiya cutara.

<sup>51</sup> Jesuuri cuniqui quiniaa pueya sequereejuhuj:

—Seetanujuanaa nia sequeyanijia, niaari jiya cajinocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

**Jesu jatanishacari mohuaca vinora, pueyano camishacari**

**2** Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masu-usano pueyari queranacuriquiaa. Jesu nucuaari tii quiriqiaajuhuj. <sup>2</sup> Jesuuri na saquiriojosano pueyata masuusaaquiaarijuhuaj, camishacari queranacunura. Janiyari na saquiriojosano pueyano quiriqiaa jiyacari tarijuhuaj. <sup>3</sup> Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. <sup>4</sup> Jesuuri na nucua riucuaaree saaja:

—Maajiniaa, ¿casaara quia sequeya janiyani?

Juhuanujuaja maja cua poonijosacari Pueyaso cumaacata.

<sup>5</sup> Na nucuaari pueya raatojonaa sequeree:

—Niocua Jesu tojirijia! Jaara nia sequere, niocua puetunu na sequesanojuanaa miiri.

<sup>6</sup> Tii cajitiuriquiaari seis conatu, saajiajiniji quejasano. Canaa Judiocuacaari sequeyarucua shuquirioojua tiajinia nojori tiuquishacarihua, juhua jeequesano nojori quiniuria Pueyaso niqiara. Nojori mohuaca cajitiacojua quiquiaari cuno conaa. Jiyanohua puereetucocua quijiaari. Cuno conatuuri setenta tumococua mishaja mohuacata mishinishano quijia. <sup>7</sup> Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioree. Mohuacaari conaa rupaacuma puecacosee. <sup>8</sup> Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. <sup>9</sup> Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijioree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. <sup>10</sup> Na sequereeri:

—Pueyaruhuatijia coteenu raateja shocuanacu vinote. Puetunu masuusano pueya jaara tari raruure queraatia, na nuhuaji raatesano cutaraari shaarunacu vino. ¿Quiarijia saniniuujia, nio cua ratusanoni, cunoori socua maniniuniacu vino coteenu quia raatojotesanojiniji!

<sup>11</sup> Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

<sup>12</sup> Na nuhuaji, Jesuuri Capernaum tiacajinia quiaaree na nucuata, tapueyocucatajuhuaj, canaa na saquiriojosano pueyano. Canaari tii camueenujuquiaari pasajani.

**Jesu jaacasacari seya niqutiojonaa Pueyaso Secojoua tiajiniji**

(Mt 21.12-13; Mr 11.15-18; Lc 19.45-46)

<sup>13</sup> Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuaj. <sup>14</sup> Na tiuquishacari, Pueyaso Secojoua tiajinia quiaamaari. Tii niqishii pueyari juyaca niqutiojiyano Pueyasoocuara puecosocoriquiano, borregohua, noseyanio. Pueyari tii na juhuacutucujinia cajitiuriquiaajuhuj, pueya na tacatojonura taucuaa cumaneeca, Pueyaso Secojoua tiajinia niqutiojoso-coriquiano cumaneecara. <sup>15</sup> Naa na niqishacari pueya miyano Pueyaso Secojoua tiajiniatej, Jesuuri seya morojotaja jiyocua tatucuaaree. Na majacujara na shitiareeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaanio. Cumaneeca rerecojoree jiyocuara juhuacutucujinijiiri. Naajuhuj, cumaneeca juhuacutucua caponeetareeri. Pojotaariquiaacuaari. <sup>16</sup> Noseya niqutiojonaa pueya sequereeri:

—Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

<sup>17</sup> Jiyacaritij, canaa, Jesu saquiriojosano pueyani, canaari niishiquiini, seetanujuanaa tariucuaaanu Pueyaso Rupaajinia naa naajiotasanoori quiya: “Quia tiaacua juaatishaaree jiyanojuanijia, jiyanohua cua panishacari quia tia”.

<sup>18</sup> Naa Jesu miiniuucuatej, narta Judiocuaca camaru-cuaari Jesu nequesotaturee:

—¿Cante quia sequerucuaa naa quia miiniuriani? ¿Canaa quia niqitiricuaraja Pueyaso cumaacata quia

miishano, canaa niishiniuria quiaari seetanujuanaa Pueyaso Jiyarosano!

<sup>19</sup> Jesuuri nojori riucaaree miriqui:

—Pueyaso tia nia niyartare, janiyacua saaja jiuujia-naraca juucajinia na tucatarohua tianu tamajaajani.

<sup>20</sup> Narta Judiocuaca camarucuaari na riucaaree:

—[Cuarenta y seis mariijaari shoconujuquiaari pueya tucatanura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? [Maja quia naata!

<sup>21</sup> Jesuuri tama na cuaqueyajaaja pohuatariquiaa, Pueyaso tia na sequesacari. <sup>22</sup> Naacujitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajio-tasanoocua tiuuquiaarini, Jesu sequesanoocuanio.

### Jesu puetunu jiuujia niishijajanaa cutara

<sup>23</sup> Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miiijosano niquiquiaari. Naaratej, queraatia pueyari nocua tiuuquiaari. <sup>24</sup> Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. <sup>25</sup> Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

### Nicodemo pocoojosacari Jesuta

**3** Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijiniojuhuaj. Tojishano pueyano. <sup>2</sup> Jesuucua na tiuquishacari, naa na sequeseeeri:

—Niishitiojonanaa, quia cumaacata quia miiniucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyacquiri na cumaacata, nojuajaari maja na naata cusosuhua naatanijionu taa quia miiquiaacuaani.

<sup>3</sup> Jesuuri Nicodemo sequere:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

<sup>4</sup> Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua sara-cajinia tiuquiniuhua na rasaanuhua.

<sup>5</sup> Jesuuri na riucaaree:

—Seetanujuanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniuujia, cante quiarinio pueyanora jataniaquishano Pueyaso Sohuanutani, nojuajaari maja Pueyaso jiitiasanoniyojua na quiniu quiniutianiya. <sup>6</sup> Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na

quiniuriani, nojuajaari Pueyaso pueyano cutara, pueyaracaanu rishiriquiano. <sup>7</sup> Naaratej, majaari quia shiriquiniu puera, naa cua sequenuucua quiajaniatej, quiaa cuaara rasuhua, seetanujuanaa quiarinio pueyano quia quiniuria. <sup>8</sup> Mijiria, paratuuri piyarojo-quiaa taa na paniyacuajani. Paari nareja na coju-atunenu tojiquiaani. Majaari pa niishiniu teje na piyarojijani, tee cunocora na quiaajaanuhua. Naajaari-uhua, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

<sup>9</sup> Nicodemoori Jesu nequesotarohuacuahuaj:

—¿Pueyanotucua taa quiarinio pueyanora jatanishaaarejaarani?

<sup>10</sup> Jesuuri na riucaaree:

—¿Majateeri quia niishiniu cua sequesano quia-janiya? Quiaari Pueyaso Rupa niishitiojonacuaja Israel pueyara. <sup>11</sup> Canaari seetanujuanaa pohuataquiaa canaa niishishanoni, canaa niquishanohuhua. Niaari saniniuujia saaja na cuaracashitiquiaa, canaa pohu-atasacari niajaniya seetanu rupaajanaa. <sup>12</sup> Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? <sup>13</sup> Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinilo roseno cutara. Nojuacuajaari janiya. <sup>14</sup> Cariiquia jiyajinia pa supuetanaa Israel pueya rucuanesacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhua, janiyari macaacua nujuaretasocoriquianoni. <sup>15</sup> Naacujitij, puetunu cucua tiuuniaajanaari pueyaracaanu quijiaa quiniutianiya.

### Pueyasoori puetunu mijiria quiniaa pueyajanaa panijia

<sup>16</sup> Jiyanoehua cua Que Pueyaso paniniucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaa quiniutianiya Pueyaso shurucua. <sup>17</sup> Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

<sup>18</sup> Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitosocoriquiano jiyatesano quiya. <sup>19</sup> Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniucua. Sesa miijiaca nojori quiniucua, majaari nojori paniniu cuhuatasano nojori quiniuria. Naaratej, nojoriiri saniitiosaanutaniya. <sup>20</sup> Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. <sup>21</sup> Saniniuujia, cante maninia miiquiaani taa Pueyaso sequeya na Rupaajiniacuajani, nojoriiri cuhuashiqui quiniu panijiaa

cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacujani.

### Tiuquinijiona Juan pohuatasacari socua Jesujiniji

<sup>22</sup> Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. <sup>23</sup> Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. <sup>24</sup> Juanri jiyacari nujuatejojuajinia nujuatesoo quiriquiaajaa.

<sup>25</sup> Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani. <sup>26</sup> Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiquianu Jordán moo taquijiriatej, nojuajana pueya tiuquinijiyajuhua. Puetunu pueyajanaana nocua quiojiya tiuquinijosano nojori quiniuria.

<sup>27</sup> Tiuquinijiona Juanri nojori riuquaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. <sup>28</sup> Nijaniyacuaajaa cu tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. <sup>29</sup> Pueyano rupuena jaara camiya necocuara, quiarjia cutara necocuaari seetanujanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhua, janiyari cunora shuquiriaatia quiarjia quiyani pueya rupuesacari Jesucristo. <sup>30</sup> Janiyari cunora jiyarosaaquiaaricujani, pueya cua tojitiniuria nojuaja. Naaratej, pueya cuara carteera janiya, Cristoocua nojori pacunura saniniuuja, nojori tojiniuria nojuaja.

<sup>31</sup> Cante jiyocuacaanuji niquiaaricujani, nojuajaari Jiyaniijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuuja, nojuajaari jiyocuacaanuji ninio cutara. Nojuajaari Jiyaniijajanaa. <sup>32</sup> Naacuajitij, na pohuatasanoori tama na niquishanojuaja jiyocuaaanu, na tojishanonio. Pueyari na pohuatasano cuaracashitiquiaa saaja. <sup>33</sup> Canapuate Jesucristo pohuatasanoocua tiuujiacani, nojoriiri sequeya, seetanujanaaqui Pueyaso sequesano Neyanujiniji. <sup>34</sup> Pueyasoori jiyanohua queraatia na Sohanu niquitioquiaari na Jiyarosano. Naacuajitij, seetanu Pueyaso rupaajanaa pohuataari. <sup>35</sup> Pueyasoori jiyanohua panijia Neyanu. Naaratej, nojuajaari na jiyatequiaari puetunu casaa jitianarajanaa na quiniuria. <sup>36</sup> Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuuja, canapuate Neyanuucua tiuyashijiacani, nojoriiri tariucua

Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

### Jesu pocoojosacari Samaria jiyajinijinio maajitia

<sup>4</sup> Fariseocuacaari pohuatasaaquiaari, jiyanohua queraatia pueya Jesuucua quiojiya na tojtianaa nojori quiniuria. Nojoriiri pohuatasaaquiaarijuhuaj, Jesuuri socua queraatia pueya tiuquinijiya Tiuquinijiona Juanjiniji. <sup>2</sup> Seetanujanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquiaani. <sup>3</sup> Jesu jaara niishiquiaari Fariseocuaca naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

<sup>4</sup> Canaa quiasacari nucuaco, canaari Samaria jiyacuma tajiriquiano quiriquiaani. <sup>5</sup> Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niquitiosano nojuaja. <sup>6</sup> Cuno cuhuariquiajia quiriquiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nucua-maji, nojuajaari cuno cuari shuriucua cajishii na samareenuta. Panacariiri quiriquiaa. <sup>7</sup> Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

<sup>9</sup> Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacuajaari Judio.

Cuno maajiiri naa sequeree Jesutej, na niishiniucua Judioacuacuaajaa maja na niquiniu paniniu quijia Samaria jiyajinijinio pueya.

<sup>10</sup> Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

<sup>11</sup> Maajiiri na sequeree:

—Jiyaniijanaa, majaari quenaaja quia jitianu casaa, mohuaca quia taquiriatajara. Nio cuariiri jiyanohua tu-cuaa. ¿Quiaatucua teje taquitiare cuno mohuacani, pueya samiitianijiani? <sup>12</sup> ¿Quiaateeri jiyaniijajanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niqiji ratujua quiquiaari necohuata, na seesano seyanio.

<sup>13</sup> Jesuuri na riuquaree miriqui:

—Puetunu nio cuarjiniji ratujucajanaari saaja jiyamuecoquiaa. <sup>14</sup> Saniniuuja, cante cua mohuaca ratunutaniyani, majaari socua na jiyamuenu quiniutianuhua. Cua mohuacaari juhua samo naca pacartanutaniya pueyaracaanu noojajinia, shuquiriaatia na rishiniuria pueyaracaanu.

<sup>15</sup> Cuno maajiiri Jesu sequeree:

—Pueyanonaa, cuno mohuaca cua niquitiore cua ratusocoriquiano, maja socua cua jiyamuenura, naajuhuj, maja pueyaracaanu cua taquirioojonura nio cuarijiniji!

<sup>16</sup> Jesuuri na sequeree:

—Miji quia niyaca quia sequecoo coteenu.

<sup>17</sup> Maajiiri na riucaaree:

—¿Janiyate niyacaracajaarani, quiaa jaara naa cua sequere?

Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. <sup>18</sup> Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

<sup>19</sup> Naa cuno maaji tojishacari Jesu sequesantej, Jesu sequereeri:

—Jiyaniijianaa, ¶quiaaqui Pueyaso sequenu panishano caminiujunia! <sup>20</sup> Canaa supuetanaa pueyari niya nio tuhananuucua Pueyaso secojonuujua tarijia. Nijaniya saniniuuja, Judiocuacani, niaari sequequiaa Pueyaso cuara secojosaaria saaja Jerusalén tiacajinia.

<sup>21</sup> Jesuuri na riucaaree:

—Seetanujuanaa quia sequereera maajinia. Cua sequesanoocua quia tiuuri. Quera quiniutianiyari Pueyaso nia secojosacari puetunu tiqiyocua nia quishacarijiana. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhuj, taa quia sequereecujani. <sup>22</sup> Nijaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana cana secojoquiaani. Pueyasocuajaari cana Judiocuaca supuetanaa niishitioquiaari pueyacuaji Tacunaari supuentaniya tama cana Judiocuacajinijiojuaaja. <sup>23</sup> Quiarijia cutara, cante seetanujuanaa Pueyaso shuquiritajacani, nojoriiri na Que Pueyaso secojonutaniya puetunu nojiatajanaa, seetanujuanaa na tojijiaa nojori quishacari. Pueyasoori naa paniya pueya secojonura nojuaja, cante na secojonuujacacujani. <sup>24</sup> Pueyasoori sohuanu. Naaratej, cante Pueyaso shuquiritini panijiacani, nojori cuara secojora Pueyaso puetunu nojiatajanaa, Pueyaso Sohuanu tojijiaa nojori quishacari.

<sup>25</sup> Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyanaa.

<sup>26</sup> Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacuajani.

<sup>27</sup> Jiyacaritij, canaari Jesuucua tiuquijiorohuani.

Canaari jiuujiatequiaarini cana niquishacari Jesu pocoojiyano cuno maajitia. Majaari quenaaja cana nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. <sup>28</sup> Cuno maajiiri cuniquijia na pataco tiuquaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

<sup>29</sup> —¶Miji pueyanaa, nia niquiquii pueyano! ¶Nojuajaari cua sequeree puetunu cua miishanojuanaa! ¿Ma-

jate Cristoni, tariucuacaanu Pueyaso sequesano pocua na jiyarosocoriquianotej?

<sup>30</sup> Pueyari cuno tiacajiniji Jesuucua nijioquiaari.

<sup>31</sup> Cuno maaji quiasacari na tiacajinohua, jiyacaritij, canaari Jesu mianuutenu paniriquiaa juucuni.

Canaari na sequeriquiaani:

—¶Niishitiojonanaa, quia miaquere!

<sup>32</sup> Jesuuri saaja cana sequeree:

—Janiyacuaja miaquesanoracani, cuno miaquesanoori nia niishishoo.

<sup>33</sup> Cana, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

<sup>34</sup> Jesuuri miriqui cana sequeree:

—Cua miishacari cua Jiyarona panishano, cunoori cua miaquesano, naajuhuj, cua tucuatascari na panishano. <sup>35</sup> Niaari sequequiaa: “Cuaara shocoojoraara cuatro raza. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia ritare maninia nia niqiniuria. Nataacuacacuja tari noshiquia, carojotasocoriquiano. <sup>36</sup> Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. <sup>37</sup> Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuuja na carojotaja”. <sup>38</sup> Janiyari saniniuuja nia jiyaramiquiquianuni nataacuaca nia carojotanura quenaaja nia poonijiaquishoo cuhuariquiajinia. Cunoori tamasa poonijiosano quiquiaari. Niaari juhujaniya tamasa poonijiosanojiniji carojotaquiaa shuquiriaatia.

<sup>39</sup> Queraatia pueya cuno Samaria tiacajinijioori Jesuucua tiuquiaari, nojori tojishacari naa cuno maaji sequesantej: “Cua sequeree puetunu cua miishanojuanaani”. <sup>40</sup> Naaratej, cuno pueya jaara Jesuucua tiuquijioquiaari, nojoriiri na masuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani.

<sup>41</sup> Socua queraatia cuno pueyajinijioori Jesuucua tiuquiaari, nojorijianaa jaara Jesu tojiquiaari Pueyaso rupaa pohuataano. <sup>42</sup> Naaratej, nojoriiri cuno maaji sequeturee:

—Quiarijiani, majaari cana tiuuniu Jesuucua, saaja cana quia pohuatanuucua nojuajiniji. Quiarijia cutara, canaacujaari tama cana numaatajaaja tojirii na pohuatanononi. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano panijaniya, puetunu mijiria quiniaa pueyajanaano.

**Jesu naatanishacari jiyaniijia Herodes pueyano niyanu**

<sup>43</sup> Caapiqui juuca Jesu camueetanu nuhuaji cana, Samaria pueya tiacajinia, nojuajaari cuniquiji cana na pueya jiyataaree Galilea jiyajiniara. <sup>44</sup> Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujuniaari maja tojishano quijia tama

na jiyajiniajaaja".<sup>45</sup> Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiqiaari saaja. Nojoriiri naa maninia na tiuquitiqiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacusacari tii.

<sup>46</sup> Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa.<sup>47</sup> Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeeseeri:

—Jiyaniijianaa, cucua quia taraajere! [Cua niyanu quia naataniquii, quera cusoyano!

<sup>48</sup> Jesuuri na riuquaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

<sup>49</sup> Cuno camarnuuri saaja Jesu sequere:

—Jiyaniijianaa, mijijiaj, jati pa quiaare cua tiajinia, quiyanu cusoyaquishacarijia!

<sup>50</sup> Jesuuri na sequere:

—Quia quiaarohua. Quia niyanucuaa tari naatarohua.

Cuno camarnuuri Jesu sequesanoocua tiuuri. Quiaarohuari.<sup>51</sup> Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuteree saaja nuu cajiniocuaari. Nojoriiri na sequere:

—[Quia niyanu tari naatarohua!

<sup>52</sup> Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riuquaree:

—Naseca nocuaji tajimiohuacuaa shusha pananu mueecosacari nio niniriquiacuaani.

<sup>53</sup> Cusosu queeri niishiquii, Jesucuaajaari jiyacari na sequeriquiacuaa: "Quia niyanu tari naatarohua". Naaratej, camarnuuri necocuataja Jesuucua tiuuri, puetunu necohuatajanaanio.

<sup>54</sup> Judea jiyajiniji Jesu tiuquishacariuhua, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

**Jesu naatanishacari cumatacuruhuana cusosu Betzata cuari shuriucua**

**5** Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijiuhua.<sup>2</sup> Jerusalén tiacaari puetunujuanaa puereetuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari "Borregohua tiuquiti-aja". Na shuriucua quiyari cuari. Canaa Judiocuaca ru-

paajiniani, cuno cuariiri sesojosaaquiaari "Betzata". Cinco suhuorotucuaari quijia cuno cuari shuriuquioco.

<sup>3</sup> Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujiunaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria.<sup>4</sup> Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujiniji.<sup>5</sup> Tamonu cusosuuri tii narta cusosuhua tajinia matariquiaajuhua. Tari na shoconujuquiaariiri treinta y ocho marijia, pueyaracaanu na matasacari.<sup>6</sup> Jesuuri na niquiquiaari mataano. Noojiajinia niishirijiaariuhuaj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequere:

—¿Quiaate naatanu paniya?

<sup>7</sup> Cusosuuri na riuquaree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuanu, cuarta cusosuuri saaja cua shocotaquiaani.

<sup>8</sup> Jesuuri na sequere:

—[Quia sanere! Quia matu quia pataarohua.

<sup>9</sup> Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriqiaa, canaa Judiocuaca samaatenu juuca Pueyaso niquiara.

<sup>10</sup> Canaa Judiocuaca camarucua jaara cusosu niquiquiaari na matu pataano, na juaatiiriiri. Naa na sequetureeri:

—¿Majateeri quia niishiniu, quiarijiaari Sábado? [Maja quia matu quia patanujua!

<sup>11</sup> Cusosu naatanohuari nojori riuquaree:

—Cua naataniniacuaja cua sequereeno: "Quia matu quia pataarohua". Janiyari cunora na pataani.

<sup>12</sup> Narta Judiocuaca camarucuaari na nequesotaree:

—¿Cantejaara naa quia sequereeni?

<sup>13</sup> Nojori riuquareeri:

—Johua. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriqiaa. Naacuajitij, Jesuuri ritia tajiniocuaareequiaari pueya tajinia, na naatanishano pueyanooquaji.<sup>14</sup> Na nuhuaji, Jesuuri na riuriataquiaari cuno juucaja Pueyaso Secojoja tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhua socua, quiaa mariqui socua taraatia miiriiri.

<sup>15</sup> Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocuaa cua naataniriini.

<sup>16</sup> Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua.

<sup>17</sup> Jesuuri saaja nojori sequere:

—Cua Queeri pueyaracaanu poonijiya. Janiyari cunora poonijiyajaacuhuj.

<sup>18</sup> Naa Jesu sequesacari nojoritij, narta Judiocuaca camarucuaari jyanohua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jyanohua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jyaniquishacari na Queta.

### Jesuuri Jiyaniijajanaa, Pueyaso Niyanu na quishacari

<sup>19</sup> Nocuaji Jesuuri narta Judiocuaca camarucua sequeeree:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuani, janiyari naa miiquiaajaacuhuj. <sup>20</sup> Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriqutiuniutianiya. <sup>21</sup> Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacuajani. <sup>22</sup> Cua Queeri maja na nequesoreenu quiniutianiya pueya. Nojuacuajaari tari cua niqutiocanu na cumaaca, puetunu pueyajanaa cua nequesoreenura. <sup>23</sup> Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatuquiaacuani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

<sup>24</sup> Seetanujuanaa nia sequeyanijia, cante cua sequesano tojijiani, mariyata cante cua Jiyaronaacua tiuyajaniuhuj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. <sup>25</sup> Seetanujuanaa nia sequeyanijia, quera quiniutianiyari juhua macunucua quijiaa samiitiacosacari. Seetanujuanaa quiarijiaari, juhua macunucua quijiaaari cua rupaa tojitianutaniya. Cua rupaa tojitiajacaari samiitiaconutaniya, pueyaracaanu rishijiaa nojori quiniuria. <sup>26</sup> Cua Queeri quijiajuhuanajaj. Majaari na naata shaajenu. Nojuajaari naa quijiaa cua jiyatequiaarijuhuj, juhua nojuarajuhuj. Naacuajitij, cua naata pueya jiyatenu naa quijiarajuhuj. <sup>27</sup> Pueyanora cua quiniuucua, na cumaaca cua niqutioreeri cuarta pueya cua nequesoreenura, nojori cua saniitionurajuhuj. <sup>28</sup> Cua tojitiare. Majaari nio sequesanoocujani nia shiriqiniyu. Tamacari, puetunu macunucujanaari cua rupaa tojitiuniutianiya. <sup>29</sup> Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaa nojori quiniuria Pueyasota. Saniniuujia, cante sesa miijiaca quiquiaarini, puetunu

nojorijianaari quejoosaanutaniya pueyaracaanu sanitiesocoriquiano.

### Jiyaniijajanaa na quiniuucua, Jesu tama nojuajiniji pohuataajaaja

<sup>30</sup> Pueyaso Niyanu cua quishacari, naajaa, majaari cua miiniu tama cua panishanojuaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuaja miyashijia cua quiniuucua, janiyari namitijanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. <sup>31</sup> Pueyano jaara tama nojuajinijiaaja pohuataa narta pueyano, na pohuatasanoocua maja tiuushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaja maara najuhuana quiriquiaj. <sup>32</sup> Naajaa, quiarijia cutara nia naata niishiniu cua pohuatasanoori seetanujuanaa. Tamonucujaaari janiyajiniji pohuataa seetanujuanaa. Nojuajaari cua Que. Cunora, niishianijia na pohuatasano janiyajinijiiri maja na juhuanaj.

<sup>33</sup> Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiquianu janiyajiniji. <sup>34</sup> Nojuaja jaara seetacanu janiyajiniji nijaniya, quiria, naajaa. Janiyacuajaari niishiyani seetanujuanaari cua pohuatasano nijaniya tama janiyajinijiaaja. Tiuquinijiona Juanri seetanujuanaa pohuatacanu janiyajiniji nijaniya. Naa cuaara na pohuatasanoocua tiuuria, Pueyaso jiyanooniuria nijaniya. Janiyari saaja cunora nia pohuataa Tiuquinijiona Juanjinijini. <sup>35</sup> Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari nijaniya. Niaari najuhuana tojiquianu na pohuatasano. <sup>36</sup> Tiuquinijiona Juan pohuatasano janiyajinijiiri seetanujuanaa. Naa jaara na pohuatasanoocua tiuuniu paniyashijiaa quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. <sup>37</sup> Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojinu quiquiaari na pocuanu. Nojuajaari nia niquishoojuhuj. <sup>38</sup> Majaari quenaaja na rupaa quiniu nioojiajinia, nia tiuyaquishacari na Jiyarosanoocua. <sup>39</sup> Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaa quiri, niaari naa pueyaracaanu quijiaa quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. <sup>40</sup> Niaari saaja cucua ninu paniaquiquiaa cua jiyatenura nijaniya pueyaracaanu quijiaa cutara.

<sup>41</sup> Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. <sup>42</sup> Janiyari seetanujuanaa nia niishiyani. Niaari Pueyaso shuquiritiaashijiaa, nia paniaquishacari nojuaja. <sup>43</sup> Cua Quecuajaari cua ji-

yaroquiaari cua niishitiojonura niajaniya nojuajiniji. Quiarrijiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosanora na quiniuria, niaa maara cuno tojiri cutara, nojuaja jaara niaacua nimia na niishitiojonura niajaniya tama na niishishanojuaja.

<sup>44</sup> Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. <sup>45</sup> Majaari nia jiyaniyu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijica nia quiniuucua. Niaari jiyaniya niaa Pueyaso muerasu, juhua Moisés tojjijica nia quishacari. ¿Niaateeri seetanujuanaa Moisés tojjijica? [Maja! <sup>46</sup> Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. <sup>47</sup> Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarjia cua pohuatasanoocuan?

### Jesu mianuutesacari cinco mil canuu

(Mt 14.13-21; Mr 6.30-44; Lc 9.10-17)

**6** Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuhua Tiberias caminia. <sup>2</sup> Jiyanojua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquico. <sup>3</sup> Canaa shiitiasacari caminia taquijiria, Jesuuri canaa tacatamaa tuhuanuucua. Tii cajitiasee canaari. <sup>4</sup> Jiyacaritij, quera Pascuara queranacusacariiri quiriquiaa. <sup>5</sup> Jesu niquishacari jiyanojua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

<sup>6</sup> Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenu-taniya cuno pueyani. <sup>7</sup> Felipeeri na riucuaaree:

—[Paa jaara cumaneeca jitiare doscientos juuca pa poonijiosanojiniji pan pa masetajarani, cuno maara najuhuana secaja quiri puetunu nojoririjanaa!

<sup>8</sup> Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquirojosano pueyanojuhuaj. Jesu sequeseeri:

<sup>9</sup> —Jiyaniijianaa, caya samijia niya cinco pan jitiaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

<sup>10</sup> Jesuuri saaja canaa na saquirojosano pueya sequereeri:

—Puetunu pueyajanaa nia sequere cuaara cajituri-  
uria.

Cuniqui, canaa tii quiriquiaani, shanohua jiyasocuaari quiriquiaa, maninia cajituijia. Naaratej, pueyari cajituri. Puetunu cuno pueya maanujinijiniojuanaani, saaja canuuri quiquiaari cinco mil pueya.

<sup>11</sup> Jiyacaritij, Jesuuri cuno pan pataree. Pueyaso seco-

joree nocuaraari. Na nuhuaji, canaa na serotaniriiri. Canaari cajituyano pueya puetunu na panishanojuanaa niquitiojoreeni nojori miaquenuusocoriquiano. Jesuuri naa miirri sapitiaajajuhuj. <sup>12</sup> Puetunu pueyajanaa jaara tooquiquiaari, Jesuuri canaa na saquirojosano pueya sequereeri:

—Puetunu miaquesano raquiquiajanaa nia reraterohua, maja najuhuana na niitiasaanura.

<sup>13</sup> Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijoreeni. <sup>14</sup> Pueya niquishacari naa Jesu miishano na cumaacatatej, nojoriiri sequeturiquiaa:

—[Nio pueyanoqui seetanujuanaa Pueyaso sequenu panishano caminiujunia, nooj, tariucuacaanu sequesaaquiaari pocua niriquianotej!

<sup>15</sup> Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

### Jesu rucuanesacari mohuaca caco

(Mt 14.22-27; Mr 6.45-52)

<sup>16</sup> Tariucua pananu tiuquishacari, canaa, Jesu saquirojosano pueyani, canaari rosetaarohua caminia-jinariani. <sup>17</sup> Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua ninishiquiri quiriquiaa. Majaari Jesu tiuquiniu quiriquiohua juhuanojuaja canaacua. <sup>18</sup> Tari canaa niuutiasacari, paratuuri jiyanojua piyarojoriquiaa. Caminiaari cunora jiyanojua cajiniuucuariquiaa. <sup>19</sup> Canaari tari caminia jiuujajinia quiriquiaani, seis kilómetroruhua canaa rupare-tasaquiji. [Canaari jiyacari casaa niquirii canaacua catecanoyanonni! [Mohuaca caco canujuriquiaari! [Canaari nocuaji shiriqitiurii jiyanojuani! <sup>20</sup> Jiyacaritij Jesuuri canaa sequereeri:

—[Maja pueretunu! [janiyacujanijia!

<sup>21</sup> Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

### Jesu mianuutesano pueya pajesacari nojuaja

<sup>22</sup> Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niquiquiaari saaja niquiriyatu boteeri shiitariquiaa. Saaja canaa, Jesu saquirojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. <sup>23</sup> Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani.

<sup>24</sup> Cuno pojori niishishacari maja Jesu quiniu quiriquiaa tari tii, canaa na saquirojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.



### Jesucristo juhua poojia miaquesano

<sup>25</sup> Cuno pojori tiuquiiijosacari caminia taquijiria, Jesu riuriatatureeri. Na nequesotatureeri:

—Niishitiojonanaa, ¿taacari quia niyarohuacuaarini?

<sup>26</sup> Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquniuucua cua cumaacata cua miishano. Niaari cua pajenuya saaja cua mianuutenuucua niajaniya, taa nia tooquiorucuaacuajani, cua mi-anuutesacari niajaniya. <sup>27</sup> Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niquitioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

<sup>28</sup> Cuno pueyari Jesu nequesotaree:

—¿Casaa canaa miiniutianiya Pueyaso panishano canaa miiniuria, Pueyaso shuquiritasano canaa quiniuriajuhuaj?

<sup>29</sup> Jesuuri nojori riucaaree:

—Pueyaso Jiyarosanoocua nia tiuuri. Saaja naa nia miishacaritij, Pueyasoori nia shuquiritianutaniya.

<sup>30</sup> Cuno pueyari Jesu sequeturee:

—Canaa niquiara quia cumaacata casaa quia miir-icuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niquitiniutianiya canaa tiuuniuria quiocuani? <sup>31</sup> Canaa quia niquitiricuaraja quia cumaacata quia miishano, taa Moisés niquitiquiaari canaa supuetanaacuaani. Nojuajaari jiyocuacaanuji pan tiniquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuacaanu Pueyaso Ru-paajinia:

“Nojuajaari nojori mianuutequiaari jiyocuacaanuji tinio pan”.

Naacuajitij, canaari niishiyani Moisés cuajaari Pueyaso jiyarosano quiquiaari.

<sup>32</sup> Jesuuri nojori riucaaree:

—Seetanujuanaa nia sequyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaarijuhuaj. Quiarjia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. <sup>33</sup> Cuno, Pueyaso niquitiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

<sup>34</sup> Naaratej, cuno pueyari Jesu sequeree:

—¿Jiyaniijianaa, quiocua pueyaracaanu canaa niquitioriquia cuno pan!

<sup>35</sup> Jesuuri nojori sequeree:

—Janiyacuajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijaanihuaj, majaari na jiya-

muenu quiniutianiya juhuaj. <sup>36</sup> Taa cua sequeree tari ni-ajaniyacuajani, niaari juucua cua niquiya. Majaari que-naaja cucua nia tiuuniu. <sup>37</sup> Naajaa, puetunu cua Que niquitiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretano nojori. <sup>38</sup> Majaari jiyocuacaanuji cua rosenu quiquiaari cua miiniuria tama cua miiniu panishanojuaaja. Mijiria niquiaarinijia saaja cua Que panishano cua miiniuria, cante cua jiyaroquiaaricuaajani. <sup>39</sup> Majaari cua Jiyarona paniniu cua juurequetenura quenaaja niquiriyatujua na niquitiosanojiniji janiya. Nojuajaari paniya cutara, nojori cua samiitianijionura jiya puequesacari. <sup>40</sup> Cana-puete cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaa nojori quiniuria. Naacuajitij, janiyari nojori samiitianijionutaniya jiya puequesacari.

<sup>41</sup> Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. <sup>42</sup> Sequetureeri:

—¿Majate nio pueyano Jesucuaaja, José niyanutej? [Paacuajaari na queya niishiyani! ¿Casaara quiarjia na sequeyari: “Jiyocuacaanuji rosenonijia”?

<sup>43</sup> Jesuuri nojori sequeree:

—[Tariucuaja! [Maja nia juaaquiou! <sup>44</sup> Pueyanoori maja na naata tiuuniu cucua tamajaaja, cua Que jaara noojiajania poonijiaquiri. Janiyari puetunu cucua tiuuniaajanaa samiitianijionutaniya jiya puequesacari.

<sup>45</sup> Tariucuacaanu pueyara Pueyaso sequesano caminiujiunia naajiotasano cuajaari naa sequeya:

“Pueyasocuajaari puetunu nojorijianaa niishitiojonutaniya”.

Naacuajitij, cante cua Que niishitiojosano tojjia seetanujuanaani, nojuajaari cucua tiuya.

<sup>46</sup> Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricuaajani. <sup>47</sup> Seetanujuanaa nia sequyanijia, cante cucua tiuujiani, nojuajaari tari pueyaracaanu rishijara jatanishaaree. <sup>48</sup> Janiyacuajaari pueya samiitianijia panni. <sup>49</sup> Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. <sup>50</sup> Saniniuujia, cante quiarjia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. <sup>51</sup> Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niquitiotutaniya puetunu mijiria quiniaa pueyacuara-janaani, cunoori tama cua cuaqueyajaaja.

<sup>52</sup> Jiyacaritij, tii quiniaa narta Judiocuacaari naa sequetooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

<sup>53</sup> Jesuuri jiyacari nojori sequeree miriqui:

—Seetanujuanaa nia sequyanijia, nia jaara miaqueyaquiri cua shu, nia jaara ratuyaquiri cua nanacajuahuaj, majaari samiitianijiosano nia quiniu

quiniutianiya, pueyaracaanu quijiaca nia quiniuria.  
<sup>54</sup> Cante cua shu miaquereeni, cante cua nanaca ratureejaaniuhuj, nojuajaari tari naatarohua shuquiri-aatia na quiniuria pueyaracaanu. Jaara cusoyare, naajaa, janiyari na samiitianiniutianihua jiya puequesacarini. <sup>55</sup> Cua shuuri seetanujuanaa miaquesano cutara. Naajuhuj, cua nanacaari seetanujuanaa ratu-sano cutara. Cunoori maja juhua mijiria nia miaquesano. <sup>56</sup> Cante cua shu miaquenani, cante cua nanaca ratunajaniuhuj, nojuajaari coojia rupueja. Janiyari noojia rupuejajuhuj, pueyaracaanu rupuetootesano canaa quiniuria. <sup>57</sup> Cua Jiyarona cua Queeri seetanujuanaa quiija cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quiija quiniutianiyajuhuj, na rupuesacari janiya. <sup>58</sup> Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja casonuuquiaariiri. Janiyari seetanujuanaa jiyocuacaanuji roseno pan cutarani, nia miaqueso-coriqiano. Cante cua miaquejani, jaara cusoyare, naajaa, samiitianutaniuhuari pueyaracaanu quiija na quiniuria.

<sup>59</sup> Jesuuri puetunu niojuanaa pahuataquiaari pueya niqiara Pueyaso secojojua tiajinia Capernaum tiacajinia.

#### Queraatia Jesu nuhujinia pueya cartesacari nojuaja

<sup>60</sup> Naa pueya tojishacari Jesu niishitiojosanotej, queraatia na nuhujinia pueyari naa sequetooquiaari tamajaaja:

—Cuno na sequesanoori jiyanoehua jiyajeneta pa miiniuria puetunujuanaa. Maja pa naata. ¿Cantucua na tojiriijaaraaranijia?

<sup>61</sup> Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? <sup>62</sup> ¿Niaatucua taa sequere socuani, niaa jaara cua niquiri tacaano jiyocuacaanuhua, teje cua niqiaaricuajani? <sup>63</sup> Cua shu maja cumaacaraca pueya na samiitianiniuria. Saaja cua Sohuanu cutaraari pueya samiitianijia, pueyaracaanu rishijia nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria nijaniya. <sup>64</sup> Noojiaqueya nijaniyajiniiniori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

<sup>65</sup> Naa sequere socua cuno pojoriiri:

—Janiyacujaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

<sup>66</sup> Jiyacaritij, queraatia Jesu nuhujinia pueyari na cartequiaari. Nojoriiri maja tari Jesuta na rucojonu quiija. <sup>67</sup> Nocuaji, Jesuuri jiyacari canaa na saquiriojosano pueya nequesotaree:

—¿Nijaniyariuhuj, niaateeri cua cartenutaniyajacuhuj?

<sup>68</sup> Simón Pedroori Jesu riucaaree:

—[Maja Jiyaniijajanaa! ¿Canaatucua tamonu jiyaniijiaacua pacureni? Canaa quia pahuatanocujaari na naata canaa jataniniu pueyaracaanu rishijia canaa quiniuria. <sup>69</sup> Canaacujaari tari quiocua tiuquianuni, canaa niishishacari quiaari Pueyaso Nyanu, saa maninia miijiaja.

<sup>70</sup> Jesuuri canaa sequereeri:

—Niaacujaari tama cua saquiriojosano doce pueyajaaja. Saniniuujia, niquiriyatu nijaniyajiniiniori sesaaca.

<sup>71</sup> Naa Jesu sequesacari, Judasjini sequeriquiaari, Simón Iscariote niyanuni. Nojuajaari seetanujuanaa niquiriyatu canaajiniinio Jesu doce saquiriojosano pueyajiniinio quiquiaari. Naajaa, tama na Jiyaniijajaa tacartariquiano quiriqiaaquiiri.

#### Tama Jesu tapueyocujaja Jesuucua tiuyashijia quiquiaari

**7** Na nuhujia, Jesuuri Galilea jiyajinia rucuaneroriquiaa. Canaari na cojiriquiaani. Majaari na quiniu paniniu quiriqiaa Judea jiyajinia, tii quiniaa Judiocuaca monu panishacari nojuaja. <sup>2</sup> Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacari pueyari ocho juuca shocotejoquiaari suhuorotucujinia nojori quishacari. Naa miitiquiaariiri puetunu marijajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiquiaari, pueyaracaanu nojori camarucuneejotasacari cariiquia jiyajinia nojori quishacari. <sup>3</sup> Jiyacaritij, tama Jesu tapueyocujajaria naa Jesu sequeturee nojori macatiniuria nojuaja:

—[Majaari niyaja quia jateenu! Quiocua queranacunuucua Judea jiyajinia quiaarejuhuj. Quiocua tii miijiosee quia cumaacata, quia jiyopue niqiniuria puetunu quia miishanojuanaa. <sup>4</sup> Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohujia miijiore na cumaacatani? Naatej, taa niya quia miijioquia quia cumaacatacuaani, naa quia miijiosee puetunu pueya niqiarajanaa Jerusalén tiacajinijuhuj.

<sup>5</sup> Majaari quenaaja tapueyocua tiuuniu quiija Jesuucua. Cunora naa na sequetureeri. <sup>6</sup> Jesuuri saaja nojori riucaaree:

—Juhuanujuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhujaniya quiaaretej. <sup>7</sup> Niarta mijiria quijiaca pueyari maja na naata juaniu nijaniya. Janiya cutaraari nojori niqiniu paniyaquishooni. Cua niqitiuniu paniyaquiquiaari, nojori cua niishitishacari nojori miishanoori sesa. <sup>8</sup> Nia quiojiyare queranacunuucua. Janiya cutaraari maja cua quianu quiniutianiya juhuanujuaja. Quiarijiani, puera juhuacarijiaari cua miiniuria taa nia sequere janiyacujani.

<sup>9</sup> Naa nojori na sequenu nuhujitij, Jesuuri cuniquijia jiyojere Galilea jiyajinia.

### Jesu quishacari cuno queranacunuunujinia

<sup>10</sup> Na tapueyocua jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. <sup>11</sup> Queranacunuusacari, narta Judiocuaca camarucuaari Jesu pajuenueriquiaa. Nojoriiri naa sequeturiquiaa:

—¿Tee cuno pueyano quiyarini?

<sup>12</sup> Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—[Maja maninia pueyano! ¡Pueya sapojoua najuhuanaj!

<sup>13</sup> Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

<sup>14</sup> Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojoua tijinia. Tii coteeree pueya niishitiojonuuri. <sup>15</sup> Canaa Judiocuaca camarucuaari jiuujiatequiaari nojori tojishacari Jesu niishitiojosano. Naa sequetureeri:

—[Cuno pueyanoori maja quenaaja na serojonu quiquiaari! ¿Taa na niishiya pueraarini?

<sup>16</sup> Jesuuri nojori sequeree:

—Cua niishitiojosanoori maja tama cua niishishanojuaja. Cunoori cua Jiyarona niishitishano janiya.

<sup>17</sup> Cante Pueyaso panishano miiniu paniyani, nojuaja cuara miiria taa cua niishitiojiyacuaani. Naacujitij, nojuajaari jiyacari niishiniutianiya, cua niishitiojosanocuajaari Pueyasojiniji seetanujuanaa, maja tama cua niishishanojuaja. <sup>18</sup> Cante tama na niishiriojosanojuaja pahuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuara tojiyaquishaaria. Saniniuujia, cante na jiyarona niishitiojosano pahuataa pueyani, pueya tojiniuria na jiyarona, cuno pueyano pahuatasano cutaraari seetanujuanaa. Cuno pueyanoori maja pueya sapojoua.

<sup>19</sup> ¿Niaateeri seetanujuanaa supuetana Moisés Rootasano tojtiajaca? Majaruhua. Majaari quenaaja niquiriyatu nijaniyajinijinio na rootasano tojjia. ¿Casaara nia monu paniya janiyani? ¿Supuetana Moisés te nia niishitiojiya na naajioneejinia?

<sup>20</sup> Nojoriiri Jesu riuatuuree na juaaniutia:

—[Quiaaqui samaruraca! ¿Cante quia monu paniyani? [Canaa quia sequeretoj!

<sup>21</sup> Jesuuri nojori sequeree:

—Puetunu nijaniyajanaari shiriiquitiuquianu samaatenu juuca cua miishacari niquiriyatu casaaniyaja cua cumaacata. <sup>22</sup> Supuetana Moisés cuajaari nia rootaquiaari nia mueya cararaatiuuquia co nia miatenura, ocho juuca jaara na shocjore na rasaanujiniji. Seetanujuanaa, nio niishishanoori maja tama Moisés niishishanojuaja. Cunoori tariucuaaanu pa supuetanaa niishishano Moisés niyacarijia. Pueyari naa rootasaaquiaari naa nojori miiniuria necohua, see-

tanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa. <sup>23</sup> Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jecacannuni. <sup>24</sup> Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuaana pueya juariiri na miishano jaara sesa quiaquiri.

### Jesu pahuatasacari tama nojuajinijiaaja

<sup>25</sup> Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaja na mosocoriquianotej? <sup>26</sup> ¿Taateni? Noocujaruhua juhuajaniya pahuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuaaanu sequesano pocua jiyarosaariquianotej?

<sup>27</sup> Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

<sup>28</sup> Jesuuri jiyacari niishitiojoriquiaa Pueyaso Secojouajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuaj, tejenote janiyani? Naajaa, majaari cua niiniu quiquiaari tama cua panishacarijiaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. <sup>29</sup> Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

<sup>30</sup> Nojoriiri jiyacari Jesu quiatunu panirii. Naajaa, majaari quenaaja tamonu naata quiri quiaa na quianura. Majaari na naata quianu quishaaquiaari, juhuanojuaja na monu juuca quiaquishacarijia. <sup>31</sup> Saniniuujia, queraatia cuniqui quiniaa pueyari Jesuucua tiuuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatuca socua jiyajeneta casaa miiri na cumaacata nio pueyano miishanojiniji?

### Fariseocuaca quiatenu panishacari Jesu juucua

<sup>32</sup> Fariseocuacaari cuno pueya tojiqiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucuaa roojotooquiaari. Na nuhuaji, nojoriiri Pueyaso Secojoua tia cojuanaa pueya jiyaramiquiquiaari Pueyaso Secojoua tijiniara, tii nojori quianura Jesu. <sup>33</sup> Jesuuri jiyacari nojori sequeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianihuani. <sup>34</sup> Niaari cua pajenuunutaninya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

<sup>35</sup> Nocuaji, cuno Judiocuacaari tama sequetooreejaja:

—¿Tee na quianutaniyajanojoni naa pocuaaniquitij, na riuriataaquishaanurajuhuj? ¿Parta Judiocuacaacua quianutaniya soj, noo pojoriicua Griegohua tajinia niyaquejoquiaaritij? ¿Tii niishitiojonutaniya cuno taucuaca soj? <sup>36</sup> ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

### Jesu pohuatasano miriqui Pueyaso Sohuanujiniji

<sup>37</sup> Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niquiara. Jiyanohua na rupaa paaretareeri. Naa sequereeri:

—¿Cante jiyamueyani, nojuaja cuaara niiria cucua, na ratunura janiyajiniji! <sup>38</sup> Cucua na tiuushacari, nera quiniutianiyari taa na naajiotasaaquiaari tariucuaaanu Pueyaso Rupaaajiniacuajani. Naa sequeyari: “Cante cucua tiuyani, pueyano samiitianijiojua mohuacaari noojiajiniji jaatenutaniya”.

<sup>39</sup> Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanajuaja maja na quiniu quiriqiaa mijiria, Jesu tacaquishacarijia Jiyaniijajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

### Pueya juaatioosacari Jesuucua

<sup>40</sup> Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinoori sequeree:

—¿Nio pueyanoqui seetanujanaa Pueyaso sequenu panishano caminiujunua, nooj, tarijia sequesaaquiaari pocua niriqianotej!

<sup>41</sup> Tamasacaari saniniuujia naa sequeriquiaacuaja:

—¿Nojuacuajaari Cristo, Pueyaso Jiyarosano pocua! Tamasacaari saaja nojori riucaaree:

—¿Cristoteeri Galilea jiyajiniji supuenutaniya? [Maja! <sup>42</sup> Tariucuaaanu Pueyaso Rupaaajinia naajiotasanojiniji, paari niishiyani, Cristoori pa supuetanaa jiyaniijia David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

<sup>43</sup> Naacuajitij, puetunu pueyajanaari Jesuucua juayonuutaquiaari. <sup>44</sup> Tamasacaari saniniuujia Jesu quianu paniriquiaa juuca. Naajaa, majaari na quiatunu qiriiri.

### Judiocuaca camarucua tiuyaquishacari Jesuucua

<sup>45</sup> Pueyaso Secojoua tia cojuanaa pueyari Jesu tojitiariquiaa juhuajaniya. Na nuhuaji, socua quiojijiarohuari na jiyaramiquiniaa pueyacu. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

<sup>46</sup> Nojori jiyaramiquishano pueyari saaja nojori riucaaree:

—[Majaari quenaaja tamonu pueyano pocuanu juhua cuno pueyanojua, seetanu rupaaajanaa pohuataja cutara!

<sup>47</sup> Fariseocuacaari cunora nojori juarii:

—¿Niaateeri niaacua na shanacuree na sapojonura nijaniyajuhuj? <sup>48</sup> ¿Tamonu pa camarucujinijiniote nocua tiuuri, canaa Fariseocuacajinijiojuhuaj? [Maja! <sup>49</sup> [Cuno pojori Jesuucua tiuujiacani, nojoriiri Moisés Rootasano niishiyashijia! [Nojoriiri sesoriquia seque!

<sup>50</sup> Nicodemoori narta Fariseocuacata tii quiriqiaa. Nojuajaari noo Nicodemo quiriqiaa Jesuucua niquiaari niucuatej. Nojuajaari narta Fariseocuaca sequeree:

<sup>51</sup> —Pueyanaa, supuetana Moisés cuajaari pa rootaquiaari maja najuhua pa sesacanura pueyano, paa jaara coteenu na nequesoreyaquirini casaa na miiriini.

<sup>52</sup> Narta Fariseocuacaari Nicodemo juarii saaja:

—¿Quiaateeri narta Galilea jiyajinijinio pueyanojuhuaj? [Jacaria quia pajere tariucuaaanu Pueyaso Rupaaajinia! [Quiocua jiyacari niishiri majaari quenaaja niquiriyatu Pueyaso sequesano caminiujunua pueyano supueno quiniutianiya Galilea jiyajinia!

<sup>53</sup> Na nuhuaji, puetunu cuno pojorijianaari na tiajinia quiojijiarohua.

### Jesu jiyanooshacari maaji

**8** Jesuuri saniniuujia Olivo cuhuariquiajinia quiaaree. <sup>2</sup> Jesuuri tariquicuaji tiuquiriohua Pueyaso Secojoua tiajinia. Canaari nata quiriqiaajuhuj. Pueyari nocua rerejoquiaari. Nojuajaari cajirii pueya na niishitiojonura juuca.

<sup>3</sup> Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiaari numuetucushiyano. Nojoriiri cuno maaji nujuateree pueya taccoji. <sup>4</sup> Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. <sup>5</sup> Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijarijataj, taa quia sequeyanijia?

<sup>6</sup> Judiocuaca camarucuaari naa Jesu nequesotaree najuhuanaj, nojori tojinuria casaa na sequenutaniyani. Jesu jaara nojori sequere maja nojori miinuria Moisés Rootasano, nojori maara nocuara saquiri- ojtare nojori jiyaniijianucua. Jesu cutaraari maja que-

naaja nojori na riucuanu quirii. Nojuajaari saaja joree, jiyajinia na naajionura na juaashiquiata.

<sup>7</sup> Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajiniotiote sesa miyashijiani, nojuaja cuara na coteetaara janu.

<sup>8</sup> Jesuuri jojorohuacuhua socua na naajionura jiyacua. <sup>9</sup> Cuno pojori tojishacari naa Jesu sequesantej, puetunujuanaari sanaa quiojorohua. Juhuacatecara quiojonu coteequiaariiri socua saaquiapue, na nuhujaji, socua naatujoori nojorijiniiji. Nojoriiri naa quiojorohua puetunujuanaa. Saaja Jesuuri jateequee cuno maajitia. <sup>10</sup> Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate que-naaja tamonu cureenu quirii na jacunura quiajanija saitia?

<sup>11</sup> Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequereeri:

—Janiyari quia jiyanoa cutarani. Juhuajaniya quia quiaarohua. Majaari sesa quia miiniu socua.

#### Jesuuri pueya jiuujia cuhuatana

<sup>12</sup> Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

<sup>13</sup> Tii quiniaa Fariseocuacaari naa Jesu juaarii:

—¿Quiaacuajaari tama quia cuaqueyajini pihuataa! Puetunu quia pihuatasanojuanaari maja tojishano!

<sup>14</sup> Jesuuri nojori riucuaaree:

—Tama cua cuaqueyajiniijaaja cua pihuatasacari, cunoori maja najuhuana pihuatasano. Cua pihuatasanoori seetanujuanaa cutara. Janiyacuajaari niishiyani teje cua niquiaarini, tee cua quianutaniuhuani. Niaari saniniuujia niishiyacujua teje cua niquiaarini, tee cua quianutaniuhuani. <sup>15</sup> Niaari pueyacuara saquiriojotaquiaa saaja nia niquishanojiniji, nia tojishanojinijihuaj. Janiya cutaraari maja cua saquiriojotanu pueyacuara. <sup>16</sup> Janiya jaara juaari sesa miijia cutarani, cua sequesano cutaraari seetanujuanaa, niquiriyatujua cua quiaquishacari. Cua Jiyarona cua Quecuajaari cua cojiquiaa cuata na juaaniuria sesa miijia. <sup>17</sup> Niaacuajaari Moisés Rootasanojiniji niishitiojorohua: “Caapiqui pueyano pihuatasano jaara juhua tarajanu pihuatasano quiriijihuaj, cuno cutaraari seetanujuanaa”. <sup>18</sup> Naajuhua, canaari caapiquini. Tama cua cuaqueyajaaja cua pihuatasacari, cunoori seetanujuanaa, cua Jiyarona cojishacari janiya. Nojuajaari cua Que.

<sup>19</sup> Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijihuaj.

<sup>20</sup> Jesuuri puetunu nio pihuatariquiaajanaa Pueyaso- ra niquitiojosano cumaneeca racataja shuriucuaaji, Pueyaso Secojoua tiajinia. Naajaa, majaari pueya quianu quiriiquinioj, juhuanojuaja na monu juuca quiaquishacariija.

#### Jesuucua tiuyashijiaaari jiyanoa quishaanutaniya

<sup>21</sup> Jesuuri cuno Fariseocuaca sequerohuacuahuaj:

—Janiyari quianutaniyani. Niaari cua pajenu- unutaniya juucua. Niaari cusonuunutaniya sesa miijia- caja, jiyanooshoo nia quishacariija, cucua nia tiuyacuiniucua. Naaratej, majaari nia naata quianu quiniutianiya tee cua quianutaniyacuaani.

<sup>22</sup> Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequerecuaraarini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

<sup>23</sup> Jesuuri nojori sequereeri:

—Niaari ninishiqui quiquiojinijinio. Janiya cutaraari jiyocuacaanujinijiononi. Niaari saaja mijiria quijia. Janiya cutaraari maja niijinijiononi. <sup>24</sup> Janiyacuajaari cunora nia sequereeni, niaari jiyanooshoojua cusonu- unutaniya nia cuaracashitiniucua janiyari maja Pueyaso Niyanuni, taa cua sequequiaa niajaniyacuaja- jani. Cunora niaari jiyanooshoo quiniutianiya, pueyara- caanu saniitiosano nia quiniuria.

<sup>25</sup> Nojoriiri Jesu nequesotaree:

—¿Canteeri quiajanijiani?

Jesuuri nojori riucuaaree:

—Janiyari najuhuana niaata pocoojijiani. Majaari nia tojiniu janiya. Janiyacuajaari tari nia sequereeni cante janiyani. <sup>26</sup> Janiyari queraatia jiiitaaaja cua sequesocoriquiano niajanijiani. Niaa jaara nocua tiuyacuri, niaari pueyaracaanu saniitiosaanutaniya. Puetunu cua sequesanojuanaa niajanijiani, cunoori seetanujuanaa. Cua pihuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

<sup>27</sup> Majaari nojori niishiniu quiriquiaa Jesuuri na Que Pueyasojiniji pihuatariquiaa na sequesacari “cua Jiyarona”. <sup>28</sup> Jesuuri cunora nojori sequereeri:

—Niaa jaara cua teetere, niaari shusha jiyacari niishiniutianiya, janiyari Pueyaso Niyanuni. Niaari niishiniutianiyajuhua, majaari tama cua niishiriojosano- juaaja cua miiniu quijia. Janiyari saaja cua Que niishitiojosano pihuatajani. <sup>29</sup> Cua Jiyaronacuajaari cuata quia. Majaari cua Que cartenu janiya, pueyaracaanu cua miiniuucua na panishano.

<sup>30</sup> Naa Jesu pihuatasacari pueya niquiaratej, queraatia pueyari jiyacari nocua tiuuri.

### Pueyaso pueyajiniji pohuatasano, Sesaaca pueyajinijinio

<sup>31</sup> Jesuuri shusha nocua tiuuniaa narta Judiocuaca sequeeree:

—Niaa jaara seetanujuanaa cua pohuatasano tojjijia-ca quiri pueyaracaanu, niaari cua pueya quiniutianiya.

<sup>32</sup> Niaa jaara naa miiritij, niaari seetanu rupaajanaa niishijiaa quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijiaa nia quiniuria.

<sup>33</sup> Narta Judiocuacaari Jesu riucaaree:

—Canaacuajaruhua supuetana Abraham jiuhuacua-jinio supueno pueyani. Majaari quenaaja canaa quiniu quijia tamasaca poonijjotesano pueya. ¿Casaara naa quia sequeya canaarini, canaa quiniuria cartesano pueyani?

<sup>34</sup> Jesuuri nojori sequeeree:

—Seetanujuanaa nia sequeyanijia, cante sesa miijiacani, nojoriiri juhua poonijjotesano pueya quiya. Majaari na naata maninia miijia na quiniu. <sup>35</sup> Poonijjotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniucua. <sup>36</sup> Naajuhuj, janiya jaara nia jaariutiare nia poonijjotenajinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. <sup>37</sup> Janiyacua-jari niishiyani, niaari seetanujuanaa pa supuetana Abraham jiuhuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. <sup>38</sup> Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

<sup>39</sup> Nojoriiri Jesu sequeeree:

—Abrahamcuajaari canaa shipininio!

Jesuuri nojori riucaaree saaja:

—Abraham jaara seetanujuanaa nia shipininio quiri, niaa mariqui maninia miijiaa quiricuara, taa Abraham quiquiaaricuaani. <sup>40</sup> Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miini quijia cutara. <sup>41</sup> Niaari saaja sesa miijiaa taa nia que miiquiaacuaani.

Nojoriiri Jesu juaarii:

—¿Casa quia sequeyani? ¿Canaari maja saa maaji rasanujuani! ¿Pueyasocuajaari canaa Que, maja tamonu!

<sup>42</sup> Jesuuri nojori sequeeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuajaari cua jiyaroquiaari. <sup>43</sup> Cua rupaa nia tojiniu paniyaquishacari, niaari cunora cua pohuatasano niishiyaquiya. <sup>44</sup> Seetanujuanaa, nia quecuajaari Sesaaca, samaruhua jiyaniijia. Niaari cunora

miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanaj, mona. Nojuajaari maja na niishiniu sequenu seetanujuanaa. Pueyaracaanu sapojuuajari. Na sapojosacari, naa miyari sapojuua na quiniucua. Sapojonu niishiniuni, cunoori nojuajiniji supuequiaari. Niaari cunora nia que tojjijia. Nocuaji niaari naa sapojonuuuacajuhuj. <sup>45</sup> Saniniuujia, cua pohuatasacari seetanu rupaajanaa niajaniya, majaari cucua nia tiuuniu quiquiaa. <sup>46</sup> ¿Casa cua miiquianu sesani? Cante na niishiyani cuaara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari niajaniani? <sup>47</sup> Cante Pueyaso pueyani, nojoriiri Pueyaso rupaa tojiquiaa cutara. Niajaniya saniniuujia, niaari na rupaa tojiyaquiya, na muerasu nia quiyaquishacari.

### Jesucristoori tariucuacaanu quijiajuhanaja Abrahamjiniji

<sup>48</sup> Narta Judiocuacaari naa Jesu juaarii:

—¿Canaacuajaquiri maninia sequeriquiaa quiajanijinijini, quiaari Samaria jiyajinijinio tahue, samaruraca pueyanotuhuj!

<sup>49</sup> Jesuuri nojori riucaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. <sup>50</sup> Naajaa, majaari cua tacaani nia sesacasacari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. <sup>51</sup> Seetanujuanaa nia sequeyanijia, cante cua rupaa tojjijiani, nojoriiri maja na shaajenu quiniutianiya.

<sup>52</sup> Narta Judiocuacaari na sequeeree:

—¿Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujunaaajanaano. Quiaari saniniuujia quiarjia sequeyacuajua: “Cante cua rupaa tojjijiani, majaari na shaajenu quiniutianiya”. <sup>53</sup> ¿Quiaateeri jiyaniya quiaa socua cutara pueyano canaa supuetana Abrahamjiniji? ¿Maja! Nojuajaari shaajequiaari. Mariyata puetunu Pueyaso sequesano caminiujunaa pueyajaari shaajequiaarijuhuaj. ¿Canteeri quiajaniani naa quia sequenuratej?

<sup>54</sup> Jesuuri nojori riucaaree:

—Janiya jaara tama cua cuaqueyajaaja jiyatenu paniri juhua jiyaniijarani, cunoori najuhuanaj. Seetanujuanaa, cua Quecuajaari cua jiyatequiaari jiyaniijarajanaa. Nojuajaari nia sequesano nia Pueyasota. <sup>55</sup> Niaari seetanujuanaa na niishiyashijiaa. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojuua quirini taa nia quiyacuaani. Janiya cutaraari na niishiyani. Janiyari cunora na rupaa tojjijiani. <sup>56</sup> Nia supuetana Abrahamri timiquiaari na niishishacari janiya mijiria supuentaniyani. Nojuaja jaara cua niquiquiaari mijiria quiyano tari, jiyanohua timiquiaari.

<sup>57</sup> Narta Judiocuacaari Jesu juaarii. Naa na seque-  
tureeri:

—[Jaj! Majaruhua juhuanojuaja cincuenta marijia  
shocojonu quiajaniya. ¿Taa quia sequeyarini quiaa  
canaa supuetana Abraham niquiquiaari?

<sup>58</sup> Jesuuri nojori riucaaree:

—Janiya nia sequeya seetanujuanaani, Abraham  
raaquishacarijia, janiyari tari quijiani.

<sup>59</sup> Naa nojori tojishacari Jesu sequesantej, narta Ju-  
diocuacaari sai pajenuuree Jesu na jacutajara juucua.  
Jesuuri nojoriicuaaji jamaarii saaja. Pueyaso Secojoja  
tiajiniji tohuatamaari.

### Jesu jeecasacari cariyujuaru namijia, naa rasanohua- najak

**9** Tamacari Jesu rucuanesacari canaata, canaari  
cariyojuaru pueyano niquiriini, naa rasanohua-  
najak. <sup>2</sup> Canaari cunora Jesu nequesotareeni:

—Niishitiojonanaa, ¿casaara naa cuno pueyano  
rasaaquiaari cariyujuaruni, na queya miiniuucua  
sesatee, tama sesa na miiniuucuaajaaja soj?

<sup>3</sup> Jesuuri cana riucaaree:

—Maja. Maja cunora naa na rasaanu quiquiaari. Naa  
rasaaquiaariiri Pueyaso cumaaca niishishaanura, na  
namijia jaara jeecasaare niquijara na quiniuria. <sup>4</sup> Juuca  
quishacarijia, pa tucuatate miiniu cua Jiyarona seque-  
sano cua miiniuria. Paa quera niniyani. Jaara niniquii,  
majaari pa naata poonijonu quiniutianiya tari. <sup>5</sup> Mijiria  
cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa  
shaajenujiniji sequeriquiaa miriqui.

<sup>6</sup> Naa Jesu sequenu nuhuajitij, nojuajaari jiyocua rio-  
coree. Na riacauta coniquioreeri. Coriyacau mara ru-  
porohua cariyujuaru namijiaacuaari. <sup>7</sup> Cariyojuaru se-  
querohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Ji-  
yarosano cuari”. Cariyojuaruuri cuarimia quiaaree. Tii  
na namijia jeequeseeri. Tariucua niquijiaari na tiajinia  
tiuquiriohua. <sup>8</sup> Cariyojuaru na quishacarijia, nojuajaari  
na miajajau na masetajara cumaneeca mashiniquijio-  
jua quiquiaari. Puetunu pueyajanaari na niquitijua  
naa na mashiniquijiosacari. Naacuajitij, nojuaja jaara  
niquijara quiquiaari, tarijia na niquinia pueyari,  
mariyata na shuriucua quinia pueyano, nojoriiri  
tama sequetooquiaarijaaja:

—¿Cante cuno pueyanojaarani? ¿Majate noocuaja  
tarijia cumaneeca mashiniquijiojuatej?

<sup>9</sup> Noojiaqueya pueyari sequeree:

—[Taaquiririnij, nojuajacuaj!

Tamasacaari saniniuuja sequereecujua:

—Nojuajaquinio naasucua. Juhua nojuaja niquishiy-  
acuaj, majaari seetanujuanaa nojuaja.

Tarijia quijia cariyujuaruuri saa sequereejaa:

—Taaquiririnij, janiyacuaaquinatejaj.

<sup>10</sup> Naaratej, pueyari na nequesotaree:

—[Quiaacuaja cariyujuaru quijiaruhua! ¿Taa niqui-  
jara quia quiriouharini?

<sup>11</sup> Nojuajaari pueya riucaaree:

—Cuno, Jesu jiyanishano pueyanoni, nojuajaari mara  
coniquioree cucuara. Cua namijiaacua na ruporohuari.  
Na nuhuaji, cua jiyaroreeri Siloé cuarimia cua jee-  
quenura cua namijia. Janiyari quiaareeni. Cua namijia  
cua jeequesacari, [Janiyari niquijara quiquiini!

<sup>12</sup> Pueyari na nequesotaree:

—¿Teeteeri quia namijia jeecana pueyanoni?

Nojori riucaareeri:

—Johuaj. Maja cua niishiniu.

### Fariseocuaca nequesoreesacari na namijia jeecasano pueyano

<sup>13</sup> Pueyari Fariseocuacaacua jiyataaree Jesu  
jeecasano cariyujuaru pueyano. <sup>14</sup> Jesu jaara mara  
coniquioquiaari na jeecanura cuno pueyano namijia,  
cuno juucaari Judiocuaca samaatenu juuca quiquiaari.  
<sup>15</sup> Nocuaji Fariseocuacaari tarijia cariyujuaru quijia  
nequesotaree taa niquijara na quiriini. Nojuajaari no-  
jori riucaaree:

—Jesu cua namijiaacua rupojorucuaa marani. Na  
nuhuaji, janiyari cua namijia jeequeseeni. Naacuajitij,  
janiyari quiarjia niquijia quiyani.

<sup>16</sup> Noojiaqueya cuno Fariseocuacajiniiniori saa se-  
quereejaa:

—Cuno pueyano, nio pueyano namijia jeecaru-  
cuaani, nojuaja maja Pueyaso Jiyarosano. [Nojuajaari  
Moisés Rootasano tojiyashijia, naa na miiniuucua  
samatenu juuca!

Tamasacaari saniniuuja sequeriquiaacujua:

—Jaara sesa mijia quiri, ¿maatucua casaara pooni-  
jore Pueyaso cumacatacuaraarini?

Naa nojori juayonuutauucuatej, nojoriiri juhua  
raqitiiri. <sup>17</sup> Nocuaji tarijia quijia cariyujuaru nequeso-  
taturouhuarihuaj:

—Niquijia quia quishacari quiarjia, ¿taa quia se-  
queya Jesuni? ¿Maninia mijiatee?

Nojuajaari saaja Fariseocuaca riucaaree:

—Janiyara, nojuajaari Pueyaso sequesano caminiuji-  
unia.

<sup>18</sup> Tii quinia Judiocuacaari na cuaracashitirii saaja.  
Nojoriiri jiyaniquiaari maja naasucua seetanujuanaa  
cariyojuaru cuno pueyano quiniu quijia. Nocuaji nojori-  
iri na queya sequeturee nojoriicua na niniuria. <sup>19</sup> Nojori  
tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa  
nia niyanu, nia sequesano cariyujuaru rasanohua-  
nani? ¿Taa quiarjia niquijara na quiriouharini?

<sup>20</sup> Na queyari cuno pojori riucaaree:

—Taaquiririnij, nojuacuaaquinateja cana niyanu-  
juaj. Naa cariyujuaru rasaaquiaariiri. <sup>21</sup> Majaari cana  
niishiniu cutara taa na quiriouhua niquijiarani. Majaari  
canaa niishiniujuhuaj, cante na namijia jeecarucaani.  
Nojuaja nia nequesotare, tari cumantumacuaja. No-  
juajanaa cuara nia pohuataara cutara.

<sup>22</sup> Na queyari naa riucaquiaari narta Judiocuaca ca-  
marucuatej, na pueretusacari nojori. Judiocuaca ca-  
marucaari tari sequetiquiaari: “Cante Jesu sequeyani

nojuaja seetanujuanaa Pueyaso Jiyarosano, naa sequerajaca pueya cuara tenujusaaria maja Pueyaso secojotua tiajinia na tiuquiniuria socua".<sup>23</sup> Naaratej, na queyari naa narta Judiocuaca riucuquiaari: "Nojuaja nia nequesotare, cumantumacuaja".

<sup>24</sup> Cunora cuno Judiocuacaari socua piiriohua na namijia jeecasano pueyano. Nojoriicua na nishacari, na sequetureeri:

—Paacuajaari Pueyaso niquiara niya quiyani! Naaratej, Seetanujuanaa canaa quia pohuatate cuno pueyanoinijii! Canaa cutaraari niishiyani cuno pueyanoori sesa miijia!

<sup>25</sup> Na namijia jeecasano pueyanoori nojori riucuree:

—Naajaa, jaara sesa miijia quiri, jaara maninia miijia qurijiuhuaj, maja cua niishiniu cuno. Janiya cutaraari niishiyani, Janiyari tarijia niquiyashijia quiquiaarini! Janiyari saniniuujia quiarjia niquijia quiya cutarani!

<sup>26</sup> Nojoriiri na nequesotarohuacuahuaj:

—¿Taa na miirucuaa quiajanijaaarani, niquijia quia quiniuriani?

<sup>27</sup> Narta Judiocuaca camarucua sequeree saajaari:

—Janiyacuaaja tari nia pohuatareeni. Majaari nia tojinu paniniu janiya. ¿Casaara nia paniya socua cua pautenura sequenu nijaniyani? ¿Niaate na pueyara quiniu paniya soj?

<sup>28</sup> Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—Quiaari cuno pueyano tojijiacuaaja! Canaa cutaraari supuetana Moisés Rootasano tojtiajacani!

<sup>29</sup> Canaa cutaraari niishiyani Pueyasojuanaari Moisés-cua muetaquiaari na rootanura nojuaja! Saniniuujia cuno pueyanoorijiataj, majaari quenaaja pa niishiniu teje na supuequiaarini!

<sup>30</sup> Na namijia jeecasano pueyanoori nojori riucuree:

—Niaaquiiri mosanucua seetanujuanaa! ¿Majateeri nia niishiniu teje na supuequiaarini? Nojuajaari cua namijia jeecarucuaa!<sup>31</sup> Paacuajaari niishiyani Pueyaso maja na tojinu quijia sesa miijiacu secojosano! Saaja na timitiajaca secojosano tojiya cutaraari, cante na panishano miiquiaacuajani!<sup>32</sup> Majaari quenaaja pa tojinu quijia tamonu pueyanoinijii, cante cariojuaru namijia jeecajani, naa cariojuaru rasanujuhuanaj!

<sup>33</sup> Cuno pueyano jaara Pueyaso Jiyarosano quiyaquiri, ¿taa cua namijia na jeecarucuaacuaraarini?

<sup>34</sup> Cuno pojoriiri na juaaniutia na sequeturee:

—Quiaari sesa miijia rasaaquiaari! ¿Quiaateeri jiyanojuaa canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojotua tiajinia. Naacuajitij, cuno pueyanoori juhua taanuu-sano pueyano quiquiaari narta Pueyaso timitiajaca pueyajinijii.

### Jesu tojtiaashijiacu pueya juhua cariojuaru

<sup>35</sup> Jesuuri niishiquiaari cuno pueyanoori tenujusaarucuaa. Jaara na riurataquiaari, Jesuuri na sequeree:

—¿Quiaate Pueyaso Niyanucua tiuujia?

<sup>36</sup> Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

<sup>37</sup> Jesuuri na sequeree:

—Quiaacuaja na niquiyaruhua. Nojuajaari cunocua-ja, quiata pocoojijani.

<sup>38</sup> Jiyacaritij, pueyanoori Jesu cariquimiaji mojuqueta-ree. Na sequereeri:

—Quiocua tiuyanijia, cua Jiyaniijianaa!

<sup>39</sup> Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotatura mijiria quiniaa. Naacuajitij, cante niishiyani nojuaja juhua cariojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariojuarura tari jiyatesaaree, cucua na tiuyaquiniucua.

<sup>40</sup> Tii quiniaa Fariseocuaca jaara tojiquiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariojuarujurijiuhuaj?

<sup>41</sup> Jesuuri nojori riucuree:

—Niaa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarjiani, tama nia sequenucuajaaja, "Canaa niquijia cutarani", niaari jiyanooshoojua nioojia nia tacatoyaquiniucua.

### Jesu pohuatasano miriqui borrego cojuanajinijii

**10** Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyajijiani, nojuaja jaara tamocoji tiuquimia, cunoori nohuasejojua.<sup>2</sup> Saniniuujia, cante tohuateyaco tiuquijia cutarani, cunoori borregohua camarujanaa cutara.<sup>3</sup> Tohuateya cojuanaari tiotiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuanijiojua puetunujuanaa na matacainijii.<sup>4</sup> Puetunu na borregohujanaa jaara tohuareetama, na camaruuri na puetaja. Na seyari na nuhuaji sacuaaja, na camaru rupaa nojori niishishacari.<sup>5</sup> Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

<sup>6</sup> Jesuuri naa pohuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

### Jesucristo, maninia pa cojuana

<sup>7</sup> Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua.<sup>8</sup> Cante cua niyacarijia nijioquiaari coteenuni, nojoriiri sesa miijiacu quiquiaari, nohuasenuujua. Cua borregohuari namitia nojori numee-



jushiquiaari. <sup>9</sup> Janiyari juhua tohuatayani. Cante janiyajini tiuquiya cua Queecuani, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

<sup>10</sup> Nohuasejojaari saaja tiuquijia borregohuacua na nohuasenura, na puecoonurajuhuj. Naa na shaajaaja puetunujuanaari. Janiyari saniniuujia niquiaarini cua borregohua cua jiyatenura pueyaracaanu quijiacara, seetanujuanaa jiyanoehua shuquiriaatia quijiacara nojori quiniuria. <sup>11</sup> Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari.

<sup>12</sup> Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua tiujiaqueeri. Naa miijiaari cuno borregohua quiyaquiniucua na seyajanaa. Naacujitij, sareeri borregohua soojua. Naa na cocuatajaari. <sup>13</sup> Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niquitiosaanura.

<sup>14</sup> Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. <sup>15</sup> Nojoriiri cua niishiyajuhuj, taa cua Que niishiya janiyacuaani, mariyata taa cua niishiya cua Quejaniuhuj. Janiyari tama cua cuaqueyajaaja panitiaja cua borregohuacuarani. <sup>16</sup> Janiyari socua borregohua jiiitiani. Nojoriiri maja nio cua borregohua maanujinijinio. Janiyari nojori rijionutaniya niyarajuhuj. Nojoriiri cua tojitiariquiano. Naacujitij, puetunu cua borregohuajanaari jatiqui quiriquiano, niquiriyatu cojuanaracajuhuj.

<sup>17</sup> Cua Queeri cua paniya naa cua panitiasacari tama cua cuaqueyajaaja cuno borregohuacuarani. Janiyari tama cua panishacarijaaja mosaanutaniyani, na nuhuaji cua samiitianuhua, pueyaracaanu quijia cua quiniuhua. <sup>18</sup> Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuj cua samiitianuhua. Cua Quecuajaari naa cua miiniuria cua jiyaroquiaari mijiria.

<sup>19</sup> Narta Judiocuaca jaara tojiquiaari naa Jesu seque-sanotej, nojoriiri socua tama juayonuutaquiaarijaaja Jesuucua. <sup>20</sup> Queraatia pueyari jiyacari sequeree:

—Cuno pueyanoori samaruraca! Maja na tojiniu, pueyanaa! Najuhaana pocuaano!

<sup>21</sup> Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? Maja! ¿Pueyanoteeri na naata samaru cumaacata jecanu cariyojuaru namijijaara? Maja na naata!

## Judiocuaca camarucua niquiniu paniyaquishacari Jesu

<sup>22</sup> Tamacari, Jerusalén tiacajiniaari querana-cusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujuanaa juhua Pueyaso quiquiora na quiniuhua. Jiyacariiri shuniya quiriquiaa. <sup>23</sup> Jesuuri tii quiriquiaajuhuj. Pueyaso Secojoua tijinia quiriquiaari. Nojuajaari pueya jiyaniquishano tariucua caanu jiyaniijia Salomón canujuucojojuajinia riujiuuni-quoiojoriquiaa. <sup>24</sup> Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? Quiaa jaara seetanujuanaa Pueyaso Jiyarosano quiri, quarijia canaa quia sequere!

<sup>25</sup> Jesuuri nojori riucaaree:

—Janiyacuaaja tari nia sequecanuni. Niaari saaja na cuaracashitiquiano. Niaa cuara niishiiria cante janiyani, nia niquishacari cua miishano cua Que sequesano janiya. <sup>26</sup> Niaari saaja cucua tiuyaquiquiaa cua borregohua maanujinijinio nia quiyaquishacari. <sup>27</sup> Cua borregohuari cua rupaa tojijia cutara. Janiyari nojori niishiyajaniuhuj. Nojoriiri cunora cua nuhuajiquiaa. <sup>28</sup> Janiyari pueyaracaanu quijiaara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajini. <sup>29</sup> Cua Queeri cua borregohua cua niquitioquiaari. Nojuajaari socua jiyanoehua cumaacaraca tamasaca cumaacaraca quijiacajini. Naacujitij, maja quenaaja tamonu naata cua borregohua jaariutianu cua Quejini. <sup>30</sup> Janiya cua Queta, canaari juhua niquiriyatuni.

<sup>31</sup> Jiyacaritij, canaa Judiocuaca camarucuaari sai rijiorohuacuhuj, Jesu na jacutajara juucua. <sup>32</sup> Jesuuri saaja nojori sequeree:

—Janiyari queraatia maninia casaa miiquiano saaja cua Que cumaacata nia niquiarani. ¿Teyanoocua nia jacunu paniya janiyani?

<sup>33</sup> Nojoriiri Jesu riucaaree:

—Majaari canaa jacunu quiniutianiya quiajaniya maninia quia miiniucua. Cuaari quia jacunutaniyani sacuraatia quia pocuanuucua Pueyaso niquiara! Quiaari tama quia cuaqueyajaaja jiyateya juhua Pueyasora! Cunoori jiyanoehua sesa! Quiaacuajaari pueyano, juhua canaajuhuj!

<sup>34</sup> Jesuuri nojori sequeree:

—Niaacuajaari tariucua caanu naajiosano Pueyaso Rupaa jiiitaa. Pueyaso sequesanoori naa naajiotasano quia tii:

“Janiyacuaajaari nia sequequiaarini, niaari pueyasohua”.

<sup>35</sup> Paacuajaari niishiyani, Pueyaso Rupajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaracuajani. <sup>36</sup> Naajuhuj, Pueyasocuaajaari cua saquiriojoquiaari mijiria na jiyarosocoriquiano. Naa Pueyasojuaanaa Jiyarosano cua quishacaritij, ¿niaatu-

cua casaara sequereni janiya Pueyaso niqiara pocua-ree sesani, cua sequesacari janiya Pueyaso Niyanuni? <sup>37</sup> Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. <sup>38</sup> Niaacuajaari cua Que cumaacata cua miishano niqiquiaa. Naa jaara cua pohu-atasanooocua tiuuniu paniyaquiri, naajaa, cua Que cumaacata cua miishanoocua nia tiuri quenaaja. Naa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaa-niuhuj.

<sup>39</sup> Jiyacaritij, nojoriiri socua Jesu quiatunu panirio-huacuhuj. Jesuuri saaja nojoriicujaji mashiquii.

<sup>40</sup> Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. <sup>41</sup> Queraatia pueyari Jesuucua nijioquiaari tee canaa quiriqiaacuajani. Nojoriiri tama sequesquiaarijiaa Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

<sup>42</sup> Naacuajitij, queraatia pueyari Jesuucua tiuquuaari tii, tee canaa quiriqiaacuajani.

### Lázaro shaajenujiniji pohuatasano

**11** Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijio quiquiaarijuhuaj. <sup>2</sup> Lázaro rimiatu Maríani, nojuajaari noo maajicujaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. <sup>3</sup> Lázaro matasacari cusosu, na rimiatuhuari pueyano jiyarotuhuaari Jesu numootenuucua. Naaratej, cuno pueyano tiuquishacari Jesuucua, nojuajaari na caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

<sup>4</sup> Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jiiatianojinijini, pueyari Pueyaso cumaacata miishano niqiniutianiya. Pueyari cunora Pueyaso Niyanu maniniuhuaqueetanutianiya, cua Que Pueyasojuhuj.

<sup>5</sup> Marta, María, Lázaronio, nojoriiri Jesu panishano pueya quijia. <sup>6</sup> Naajaa, Jesu jaara numootesaaquiaari Lázaronijiji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriqiaacuajani. <sup>7</sup> Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

<sup>8</sup> Canaari Jesu sequereeni:

—Niishitiojonanaa, cuniquijinio Judiocuacacuaajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

<sup>9</sup> Jesuuri canaa riucaaree miriqui:

—Janiyara, juuca juhuanojuaja. Juucaari maninia seetanujuanaa pa rucuanenonura. Paa jaara pananu tiuquiyaquishacarijia rucuanenonura, paari maninia niqiya pocujini. Majaari pa tiuriiniu. <sup>10</sup> Paa jaara niishiqui rucuanenonura saniniunijia, paari tiuriijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriqiaa Judiocuaca niqiara na rucuanenonura, na mosaanu juuca quiyaquishacarijia. <sup>11</sup> Na nuhuaji, Jesuuri naa canaa sequereeri socua:

—Pa rupuena Lázaronio tari maquequee. Janiyari na niucujajuanaa quianutaniyani.

<sup>12</sup> Canaari Jesu sequereeni:

—Jiyaniijianaa, nojuaja jaara maqueya, maniniacuajiqui. Naacuajiti paari niishiyani naatanutaniuhuaacuajiqui. ¿Paatucua casaara najuhuana nocua quiaareni?

<sup>13</sup> Naa Jesu pohuatasacari canaa Lázaronijitij, canaa sequeriquiaa juucaari Lázaro tari macu quiriqiaa. Canaari saniniuuja jiyaniiriquiaani Jesu naasucuaari canaa pohuatariquiaa Lázaro nareja maqueriquiaa.

<sup>14</sup> Nocujaji Jesuuri maatia canaa sequereeri:

—Lázaro tari cusoyarucuaa. <sup>15</sup> Janiyari timiyani tii cua quiyaquiniuucua Lázaro quishacarijia saminio. Naa quiarijia macu na quishacaritij, niaari socua jiyajeneta casaa cua miishano niqiniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

<sup>16</sup> Jiyacaritij, Tomásri canaa narta saquiriojosano pueya sequereeri:

—Pa Jiyaniijiaata pa quiaarejuhuaj, nata pa cojiriti-asaanura puecoonu.

Cuno Tomásri pueya sesojosano quiquiaari “Caa-pueya muetusano”.

### Jesu, macunucua samiitianijioja

<sup>17</sup> Canaa jaara tiuquijioseequiaarini, Jesuuri pohuatasaaquiaari Lázaro tari cuatro juuca shocotejoriquiaa raaco na niasaanujiniji. <sup>18</sup> Betania tiacaari catecaja Jerusalén tiacajiniji. (Nareja media hora paa jaara ritia rucuaneyareni). <sup>19</sup> Naaratej, queraatia narta Judiocuacaari quiojoquiaari Marta, María tiajinia, nojori na cumanijanura na nanu nuhuaji. <sup>20</sup> Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María ninu quiriqiaa cutara. Tiajinia quiriiri. <sup>21</sup> Canaacua Marta tiuquishacari, nojuajaari Jesu sequereeri:

—Jiyaniijianaa, quiaa jaara niya quiquianu, cua nanu maara shaajeyaquiquianu! <sup>22</sup> Naajaa, janiyari niishiyani quiaa jaara Pueyaso secojore, Pueyasoori quia secosano tojiniutianiya.

<sup>23</sup> Jesuuri Marta sequereeri:

—Quia nanucujaja samiitianutaniuhua.

<sup>24</sup> Martaari na riucaaree:

—Taaquiriirinij, janiyacuaaja niishiyani nojuajaari samiitianutaniuhua macunucua samiitiacosacariuhua jiya puequesacari.

<sup>25</sup> Jesuuri na sequereee:

—Janiyacuaajaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. <sup>26</sup> Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

<sup>27</sup> Nojuajaari Jesu riuucaree:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriqianotej.

<sup>28</sup> Naa Marta riuucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

<sup>29</sup> Naa María tojishacari Marta sequesanootej, ritia sanequeeri. Jesuucua nimiaari tee canaa quiriquiaacuajani. <sup>30</sup> Jesuuri juhuanojuaja maja na tiuquitianu quiquiaari canaa cuno tiacajinia. Canaari tiaca shuriucua quiriquiaajaani tee Marta naacuquiaari canacuajani, Jesuucua na nishacari. <sup>31</sup> Nojori cumaniijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

<sup>32</sup> María tiuquishacari canaacua, Jesu cariquimiaji mojuquetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

<sup>33</sup> Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaaree. <sup>34</sup> Jesuuri pueya nequesotaree:

—¿Tee na niasaarucuaani?

Pueyari Jesu sequereee:

—Miji, Jiyaniijianaa. Quia niquiquii. Niya niasaarucuaano.

<sup>35</sup> Jesuuri nujuquesee. <sup>36</sup> Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanoehua Lázaro panijiaquiiri.

<sup>37</sup> Noojiaqueya cuno pojorijiniiniori sequeriquiaajuhuj:

—Jesu jaara cariyojuaru namijia jeecacanucuaa, maara Lázaro naataniquianujuhuaj maja na shaajenu-ra.

### Jesu samiitianishacari Lázaro

<sup>38</sup> Jesuuri jiyanoehua na taraajenuta raa jiyajiria catecanoquiaari, canaajuhuj. Raari puereetuuca saajiata mishiquiosano quiriquiaa. <sup>39</sup> Jesuuri pueya sequereee:

—¡Saajia nia ruutiniri tamocora!

Martaari Jesu sequereee:

—¡Jiyaniijianaa, cuatro juuca tari na shoconujija! ¡Tari mocuaatia jaaniyu naasucua!

<sup>40</sup> Jesuuri Marta sequereee:

—Janiyacuaaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

<sup>41</sup> Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacuaja. <sup>42</sup> Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

<sup>43</sup> Naa Jesu sequenu nuhuajitij, jiyanoehua na rupaa paaretareeri. Naa sequereeri:

—¡Lázaronaa, quia tohuatama!

<sup>44</sup> Macuuri tariucua saminio tohuatamaa. Na juaashiquiaca, na niohuacaari jiuniosano quiriquiaajaa. Na nacaari puetunu na jiquiocotajanaa mishiquiosano quiriquiaajuhuj, toquerauta morosano. Jesuuri pueya sequereee:

—Nia saacatare, cuara rucuaneeera.

### Judiocuaca camarucua rojotoosacari na monura Jesu (Mt 26.1-5; Mr 14.1-2; Lc 22.1-2)

<sup>45</sup> Naa Jesu samiitianishacari Lázarotej, queraatia narta Judiocuacaari nocua tiuquiaari, noo pojori canapete Maríacua nijioquiaari na cumanijianuracuaajani. <sup>46</sup> Noojiaqueya cuno Judiocuacajiniiniori Fariseocuacaacua quiojoquiaari nojori pohuatanura Jesu miishano. <sup>47</sup> Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuiquiaari:

—¿Taa pa miiniutianiya? Cuno pueyanoori queraatia casaa miiquiaa na cumaacata pueya niquiara. <sup>48</sup> Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijia socua na jiyatenutaniya. Naaratej, pa jitianaa Romano pueyari pocua nijionutaniya Pueyaso Secojoja tia nojori niyartanura, pa pueya na puecoonurajuhuj.

<sup>49</sup> Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijia. Jiyacaritij, nojuajaari narta camarucua sequereee:

—¡Niaaquiiri niishiyashijia seetanujuanaa! <sup>50</sup> ¿Majateeri nia niishiniu? Maninia cutaraari niquiriyatu pueyano cusionura pa niti, maja najuhua puetunu pa pueyajanaa puecoosanura.

<sup>51</sup> Caifás sequesanoori maja tama na sequesanojuaja quiquiaari. Pueyacuara secojonaa jiyaniijiajanaa na quishacari, Pueyasoari naa na pohuaterree taa Jesu cusionutaniya puetunu Judiocuacaacuarajanaani. <sup>52</sup> Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuj, tee tiquiyocua niaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na qitiuniuria juhua niquiriyatu maanu.

<sup>53</sup> Naacuajitij, cuno juucajiniji, cuno Judiocuaca ca-

marucuaari roojotooriquiaa taa nojori monutaniya Jesuni.

<sup>54</sup> Nocuaji, Jesuuri maja tari na rucuanenon quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariquia jiya shurucua tamonu tiacajiniyani. Cuno tiaca sesa quiquiaari Efraín.

<sup>55</sup> Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajiniijiaaja. Nojoriiri quiojoquiaari juhuacaribia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricujani. Nojoriiri naa miiquiaari juhujaniya nojori queranacunura Pueyaso niquiara Pascua juuca. <sup>56</sup> Pueyari tii Jesu pajenuuriquiaa. Pueyaso Secojua tijinia nojori quishacari, nojoriiri tama neque-reetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

<sup>57</sup> Pueyacuara secojonaa jiyaniijianucua, Fariseocuanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

**María totasacari na shanhua jaanutaja Jesuucua**  
(Mt 26.6-13; Mr 14.3-9)

**12** Seis juuca jaara cureeriquiaaja Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitianiquiaaricujani. <sup>2</sup> Cuno tiacajiniinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatano. <sup>3</sup> Jiyacaritij, Maríari Jesuucua pataree na shanhua jaanutaja. Cunoori “nardo” jiyaniishano nataujiniji shipinishano quiquiaari. Jiyanhua queraatia cumaneecata masesano. Puereetuua motiiquo cajiniocua puecariquiaari cuno shanhua jaanutaja. Maríari Jesu nioluacaacua na totaree. Na nuhuaji, na sacuanijiarohua na muecacaari. Puetunu tiacojua-naari shanhua jaanuriquiaa. <sup>4</sup> Naa María miishacari-tij, niquiriyatu canaajiniinio Jesu saquiriojosano pueyanoori juaarii. Nojuajaari Judas Iscariote quiriqiaa, na nuhuaji Jesu quiatequiaari na paraani. Nojuajaari naa sequeree:

<sup>5</sup> —¿Casaara cuno shanhua jaanutaja niqitioy-aquishaaree queraatia cumaneecarani, casamiijiunucua pueya niqitiojosocoriquianoni? ¿Jaara masenu panishaare, maara niqitiosaare juhua niquiriyatu marijara pueyano poonijionu sami!

<sup>6</sup> Naa Judas sequesacari-tij, majaari seetanujanaa na taraajenu quiriqiaa casamiijiunucua pueyacu. Naa sequereeri saaja cumaneecaacua jiaatiaja na quiniucua, nohuasejojua na quishacari. Judasri cumaneeca quiquio cojuatana quijia puetunu canaarajanaa.

Naacuajitij, nojuajaari tiji nohuasejojua, pueya niqitiojosanojiniji canaara. <sup>7</sup> Jesuuri saaja Judas sequeree:

—Nareja quia niqiri. Nojuajaari nio shanhua jaanutaja cojuatata pueyaracaanu, juhuacaribia na jeenucujatajara cua cuaqueya, pueya niaaquishacarija janiya raajinia, janiya jaara mosaareni. <sup>8</sup> Casamiijiunucua pueyari pueyaracaanu niaata quiriqiano cutara. Saniniuujia, janiyari maja pueyaracaanu niaata quiriqianoni.

**Pueyacuara secojonaa jiyaniijianucua roojotoosacari Lázaroocua**

<sup>9</sup> Queraatia canaa Judiocuacaari niishiquiaari Jesu Betania tiacajinia quiriqiaa. Cunora, nojoriiri nocua quiojoquiaari na niqiniucua, Lázaro niqiniucua-juhuj, teyano Jesu samiitianiquiaaricujani. <sup>10</sup> Jesu samiitianiniucua Lázaro, queraatia canaa Judiocuacaari Jesuucua tiuquiaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajuhuj.

**Juhua Jiyaniijajanaa Jesu tiuquishacari Jerusalén tiacajinia**

(Mt 21.1-11; Mr 11.1-11; Lc 19.28-40)

<sup>12</sup> Cuno queraatia pueya, tari Jerusalén tiacajinia quiriqiaacua Pascua juucara queranacunurani, nojoriiri niishiquiaari Jesu tariqui tiuquiniutianiyajuhuj.

<sup>13</sup> Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanutariquiaari. Naa nacooriquiaajaariuhua nojori shuquiri-tiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiri-aatia quiiria pa Jiyaniijia, teyano Pueyaso jiyaroquiaari pocuacujani! ¡Nojuacuajaari Israel pueya Jiyaniijajanaa!

<sup>14</sup> Jesuquiiri jiyacari burro niqiojua riuriatamaa. Tari na nijinia cajiriquiaari, taa tariucuacaanu Pueyaso Rupaajinia naajiotasano quiyacujani. <sup>15</sup> Naa sequeyari: “¡Sión tuhananuucua quiniaa pueyanaa, maja puerenu! ¡Nia niqiri! ¡Nia Jiyaniijia cumaji niya ni-aacua! ¡Burro niqiojua nijinia cajiyari!”

<sup>16</sup> Jiyacaritij, majaari canaa niishiniu quiriqiaa naa canaa tiuquitishacari canaa Jiyaniijia Jesutej, canaari nio tariucuacaanu Pueyaso Rupaajinia naajiotasano tohateeriquiaani. Pueyaso jaara Jesu samiitianiquiaariuhua, canaari jiyacari shusha niishiquiaarini cuno naajiotasanoquiiri Jesujiniji quiquiaari.

<sup>17</sup> Cuno pueya, Jesu samiitianishacari Lázaro niqiquiaarini, nojoriiri pueya pohuatariquiaa taa Jesu jiiquiooquiaari Lázaro na raacaji na tohuatanurani.

<sup>18</sup> Queraatia pueya niishishacari naa Jesu miishano na cumaacataj, nojoriiri Jesu naacunuucua nijiyaree.

<sup>19</sup> Nocuaji, Fariseocuaari tama sequetooriquiaajaaja:

—¿Canaacuajaari cuno nia sequequiaani pa more-janaa? ¿Niaate na niquiya? ¡Puetunu pueyajanaari cuno pueyanoocua pacuree, na pueya nojori quiniuria!

### Grecia jiyajiniinio taucuaca pocoojonu panishacari Jesuta

<sup>20</sup> Grecia jiyajiniinio taucuacaari Jerusalén tiacajiniara nijioquiaarijuhuaj Pueyaso niquiara nojori queranacunuunura Pascuara. <sup>21</sup> Cuno pojoriiri canaa cojinia Felipecua catecanoquiaari. Felipeeri Betsaida tiacajiniinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

<sup>22</sup> Jiyacaritij, Felipeeri Andrés sequeese cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuj.

<sup>23</sup> Jesuuri naa nojori riucaaree:

—Quiarijiani, tama janiyajaarijia mosaanutaniya pueya nitini. <sup>24</sup> Seetanujuanaa nia sequeyanijia, sohujajau jaara raama jataaquishaare, pueyaracaanu niquijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. <sup>25</sup> Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitaja na tojiniuria janiya mijiriani, nojuajaari pueyaracaanu shuquiriaatia rishijia jiyatesaanutaniya. <sup>26</sup> Cante quiria poonijionu paniyani, cuara seetanujuanaa cua tojjia quiiria. Tee cua quiniutianiyacuaani, cua tojitiacaari tii quiniutianiyajuhuj. Cua Queeri cua tojijia timitianutaniya. Jiyanoohua maninia nojori miiniutianiyajaarijuhuaj!

### Jesu pohuatasacari nojuaja mosaanutaniya

<sup>27</sup> Quiarijiani, janiyari jiyanoohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaari mijiriani. <sup>28</sup> [Cua Quenaa, janiya cuara miishiiriaqui taa quia paniyacuajani, pueya niishiniuria quiaari jiyanoohua maninia!

Jiyacaritij, Pueyasoori tojishaaree pocuaano jiyocuaanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuaa mosaare.

<sup>29</sup> Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—[Miacanacuaa cuno tojishaareeni!

Tamasacaari saniniuujia sequereecujua:

—[Pueyaso serucuaa nocua pocuareeno!

<sup>30</sup> Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. <sup>31</sup> Quiarijiani, mijiria quinia miishacari naquiya janiya, nojoriiri saniniuujia sanitiesocoriquiano jiyatesaaree tari. Naajuhuj, mijiria

jiyaniijia Sesaacaari jatasaanutaniyajuhuj, maja cumaacaraca na quiniuria socua. <sup>32</sup> Janiya jaara nujuaretasaareni, janiyari puetunu pueyapuejanaa ni-jiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanura janiya soj.

<sup>33</sup> Naa Jesu sequesacaritij, canaa niishitiriiri taa pueya monutaniya nojuajani. <sup>34</sup> Tii quiniaa pueyari na riucaaree:

—Canaacuaajaari tariucuaaanu Pueyaso Rupajiniijii niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajanijarijataj, ¿casaara quia sequeyariniijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanoori?

<sup>35</sup> Jesuuri nojori sequere saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajojuani, nojuajaari maja na niishiniu tee na quiaani. <sup>36</sup> Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijia nia quiniuria.

Naa Jesu sequenu nuhuaji cuno pojoritij, quiacuhuari. Nojoriicuaaji jamaashiiri.

### Judiocuaca tiuyaquishacari Jesuucua

<sup>37</sup> Jesuuri jiyanoohua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. <sup>38</sup> Naacuajitij, tariucuaaanu Pueyaso sequenu panishano caminiujiunia Isaías pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? [Shaaqui! ¿Cante niishiriijaaniuhuj, jiyajeneta casaa nojori niquishanoori seetanujuanaa quia cumaacata miishano quiriquiaa? [Shaaqui!”

<sup>39</sup> Naacuajitij, majaari nojori naata tiuuniu quiquiaari Jesuucua. Isaíasri naa naajiotaquiaarijuhuaj:

<sup>40</sup> “Pueyasoori nojori jiyateree juhua nimishituriia, maja nojori niquiniuria na namijata. Nojori niishitija cushitireejaarijuhuaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojoriujuhuaj”.

<sup>41</sup> Supuetana Isaíasri naa caminiujuquiaari Pueyaso niishitishano nojuajatej, Jesu na niquiniucua na shacantuca cumaacajinia quiyano. Naa na pohuatasacaritij, nojuajaari juhuacarijia Jesujiniijii pohuatariquiaa.

<sup>42</sup> Naajaa, queraatia narta Judiocuacaari Jesuucua tiuquiquiaari. Queraatia canaa jiyaniijianucuaari nocua tiuquiquiaarijuhuaj. Cuno jiyaniijianucuaari maja na pohuatanu quijia pueya niquiara, Jesuucua tiuujia nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureri maja socua nojori tiuquitianura Pueyaso secojuua tiacajinia. <sup>43</sup> Nojoriiri saaja narta pueya shuquiriti-

asano pueya quiniu panijia, maja Pueyaso shuquiriti-asano cutara.

**Pueya tojitiaaquiniucua Jesu sequesano, nojoriiri saniitiosaariquiano**

<sup>44</sup> Jesuuri jiyanohua na rupaa paaretaree. Naa sequereeri:

—[Cante cucua tiuuriini, majaari saaja na tiuuniu cucua! [Cua Queecua tiuuriijaariuhuj, cante cua jiyaro- quiaaricujani! <sup>45</sup> [Cante cua niquiriini, nojuajaari cua Jiyarona niquiriijuhuj! <sup>46</sup> Janiyari mijiria niquiaarini cua cuhuatanura nijaniya. Naacujitij, cante cucua tiuuriini, majaari tari na quiniu ninishiqui. <sup>47</sup> Pueyano jaara cua rupaa tojiri quia najuhanaj, janiyajanaari maja nocuara cua saquirojotanu quiniutianiya na saniitiosaanura. Majaari cua ninu quiquiaari mijiria, pueya cua saniitionura. Janiya cutaraari niquiaarini nojoriicujaji cua tacunura. <sup>48</sup> Cante cua ruuretaja saajani, cua sequesano tojiyaquiyajaariuhuj, nojuajaari tari nocuara saquirojotana jitiaa na saniitiosaanura. Nojoriria cua sequesano cutaraari tama nojoriicua saquirojotariquianojuaja nio jiya puequesacari. <sup>49</sup> Cua pohuatasanoori maja tama cua niishishanojuaja. Cua Jiyarona cua Quecuaajaari cua niishitiquiaa casaa cua sequenutaniyani, mariyata casaa cua niishitiojonutaniyani. <sup>50</sup> Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

**Jesu jeequejosacari na saquirojosano pueya niohuaca**

**13** Jesuuri canaa na saquirojosano pueyata rerejo- quiaari Pascuaacuara juucajinia. Jesuuri jiyacari niishiquiaari tari quiquiaari quera na tiujiasacari canaa mijiria, na Queecua na tacanuhua. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

<sup>2</sup> Cuno niucuaaja, Jesuuri canaa na saquirojosano pueyata miaqueriquiaa. Sesaacaari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jyanishano pueyano niyanu quiquiaari. <sup>3</sup> Jesuuri niishijia nojuaja seetanujuanaa Pueyasojiniji niquiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. <sup>4</sup> Jiyaniijijanaa na quishacari, naajaa, nojuajaari miaquejajiniji sanequiaari. Na tucuaque toque jocuareeri. Na nuhuaji na cajiniocua camarucuteree cuaqueya tuujutajaari. <sup>5</sup> Na nuhuaji, mohuaca shuuri tohuatashijiniari. Canaa niohuaca jeequejori quiaari juhua tiaco seru. Na nuhuaji, na sacuanijiariquiaajaariuhuj na cajiniocua na camarucutesano cuaqueya tuujutajata.

<sup>6</sup> Na jeequenu panishacari Simón Pedro niohuaca, Pedroori saaja Jesu sequereeri:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

<sup>7</sup> Jesuuri Pedro riucuaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

<sup>8</sup> Pedroori Jesu sequereeri:

—[Cua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuaaree:

—Janiya jaara quia niohuaca jeequejiyaquirini, majaari cua pueyano quia quiniu quiniutianiya.

<sup>9</sup> Simón Pedroori na sequereeri:

—[Jaara naa qiritij Jiyaniijianaa, maja saaja cua niohuaca jeequenucuarajaj! [Quia jeequerejuhua cua juaashiquiaa, cua nacanio!

<sup>10</sup> Jesuuri na sequereeri:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quia. Puetunu nijaniyajanaari tari jeequeso quiyacuaja. Saa niquiriyatujaari jeequesoo quia saniniuuja.

<sup>11</sup> Jesuuri tari niishiquiaari cante na quiatenutaniya na paraani. Nocujaji sequeriquiaari: “Niquiriyatu pueyanoori jeequesoo quia cutara”.

<sup>12</sup> Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? <sup>13</sup> Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacujani, taa nia jyaniquiquiaa janiyacujani. <sup>14</sup> Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miriquia niarta Pueyaso muerasujuhuj. <sup>15</sup> Janiyari naa miiriini, cua niishitiojonura nijaniya, naa nia mitoonurajuhuj taa cua miirii nijaniyacuaani. <sup>16</sup> Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. <sup>17</sup> Naa jaara cua rootasano niishiri, niaari shuquiriaatia quijia quiniutianiya niaa jaara na tojijiaa quiri.

<sup>18</sup> Shusha cua sequesano nijaniyani, cunoori maja puetunu nijaniyaranojuanaa. Janiyacuajaari niishiyani canapue cua saquirojoquiaarini, taamueca pueyate nijaniyani. Naacujitij, tariucuaanu Pueyaso Rupaa- jinia janiyajiniji naajiotasanoori tohuatenutaniya. Naa sequeyari:

“Tama cuata miaquenajaarijia cua paracara quirii”.

<sup>19</sup> Janiyari juhuacarijia nia toyani. Naacujitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. <sup>20</sup> Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhuj. Cante cua tojijia quiriini, nojuajaari cua Jiyarona tojijia quiriijuhuj.

### Jesu pohuatasacari, Judascuajaari na paraa na quia-teriquiano

(Mt 26.20-25; Mr 14.17-21; Lc 22.21-23)

<sup>21</sup> Naa Jesu sequenu nuhuaji canaatej, jiyano hua na taraajenuta naa canaa sequereeri:

—Seetanujuanaa nia sequeyanijia, niquiriyatu nia-janiyajiniinooori cua paraa cua quiatenutaniya.

<sup>22</sup> Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. <sup>23</sup> Jiyacaritij, janiyari na shuriucuaaji ca-jiriquiaa miaquenuujuajiniani, na panishano pueyano cua quiniucua. <sup>24</sup> Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. <sup>25</sup> Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

<sup>26</sup> Jesuuri cua riucuaaree:

—Janiyari pan rau piquiojonutaniya caacajiniani. Cana cua niqutionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niqutioereeri. Nojuajaari tamonu Simón jiyaniishano niyanu. <sup>27</sup> Judas masesacari cuno pan rau, Satanásri noojiajinia tiuquiquii. Jesuuri jiyacari Judas sequereeri:

—Cuno, quiaa na niishiriojija miiniuni, quiocua ritia miirinioj.

<sup>28</sup> Canaa na saquiriojosano pueya nata miaquenu-uriquiaani, majaari quenaaja canaa niishiniu quiriquiaa casaara naa Jesu sequeree Judasni. <sup>29</sup> Judasri canaa cumaneeca cojuatana quijia. Naaratej, noojiaqueya canaajiniinooori jiyaniriquiaani Jesu naasucua na jiyaroriquiaa socua casaa na masenura canaa queranacunuutajara, casamiijiuniucua na niqutiojonura cumaneeca soj. <sup>30</sup> Judas jaara masequiaari Jesu niqutiosano pan, jiyacari tohuataqueeri. Tariucua niucuaari quiriquiaa.

### Jesu rootasano quiarinio

<sup>31</sup> Judas tohuatanu nuhuaji, Jesuuri canaa sequereeri:

—Quiarijia cua miishanojiniji, janiyari maniniuhuaqueetasanutaniyani. Pueyasoori jiyano hua maniniuhuaqueetasanutaniyajuhuj, naa cua miishanojiniji. <sup>32</sup> Pueyaso jaara maniniuhuaqueetasaree naa maninia cua miiniucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. <sup>33</sup> Quiquihuaniy-juanaa, janiya rupaquijia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaaniuhuj. Niaari cua pajenu-unutaniya juucua. Majaari nia naata quianu quiniutianiya cucua, tee cua quianutaniyacuaani. <sup>34</sup> Quiarijia nia niishitiriiria nio quiarinio rootasano. Nia tojiri. [Panitiojuaca nia quiri! Naatej, taa cua paniquiaacuaa nia-janiyani, naa nia panitioorejuhuaj. <sup>35</sup> Naa jaara naa panitiojuaca quiri, puetunu Pueyaso niishiyashijaca pueyajanaari naacuaji niishiniutianiya, niaari cua tojiti-ajaca pueya.

### Jesu pohuatasacari Pedro nocuaji seetanutaniya

(Mt 26.31-35; Mr 14.27-31; Lc 22.31-34)

<sup>36</sup> Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajini janiya. Naajaa, quiaari na nuhuaji quiariquiano.

<sup>37</sup> Pedroori na sequereeri:

—Jiyaniijianaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijiootaaree quiocuarani.

<sup>38</sup> Jesuuri na riucuaaree:

—¿Naatee? ¿Quiaate tama quia cuaqueyajaaja tarinijiootaaree cucuara? Janiyari seetanujuanaa quia sequeyani: juhuaquenu panishacari caacaraja niuni-jiyaquishacarijia, quiaari jiyacari cucuaji seetanu pacutejonutaniya tari.

### Jesuuri juhua nuu Pueyasocua

**14** Jesuuri naa canaa sequereeri socua:

—Maja nia tacaaniu, pueyanaa. Nioojia nia cajitiri. Saaja Pueyasocua nia tiuuri. Cucua nia tiuuri-juhuaj. <sup>2</sup> Cua Que tiaari puereetuuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijia. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. <sup>3</sup> Cua jeenucuanu nuhuaji nia quiquiora, janiyari niaacua tacatenutaniuhuanu, cua riji-juhuara niajaniya, cuata nia quiniurijuhuj tee cua quiniutianiyacuuaani. <sup>4</sup> Niaacuajaari cua quiquiojinia neta nua niishiya, tee cua quianutaniyacuaani.

<sup>5</sup> Tomásri Jesu sequereeri:

—Jiyaniijianaa, [maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

<sup>6</sup> Jesuuri na riucuaaree:

—Janiyacuaajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupeeta Pueyasoni, nojori tiuushacari cucua.

<sup>7</sup> Naa jaara seetanujuanaa cua niishiquiaaricuaa, niaa maara cua Que niishirijuhuj. Seetanujuanaa, niaari tari na niishiyacuaja. Niaari na niquiquiaajuhuj.

<sup>8</sup> Felipeeri na sequereeri:

—Jiyaniijianaa, quiaa jaara canaa niqutiri quia Que Pueyaso, canaacua panaatia quiriuhuanu.

<sup>9</sup> Jesuuri Felipe riucuaaree:

—Felipena, janiyacujaru hua pueyaracaanu niaata quiquiaa juucua. ¿Majateeri juhuanujuaja quia niishiniu janiya? Cante cua niquiquiaani, cua Que niquiquiaajaariuhuj. ¿Casaara quia sequeya cua niqutiniuria cua Que niajaniyarini? <sup>10</sup> ¿Majateeri quia tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuuja coojiajinia

quiyacujua? Canaari maja rimiajatani. Nio, cua sequesano niajaniani, cunoori maja tama cua niishishanojuaaja. Cua Que, coojiajinia quiyani, nojuajaari na panishano miitiquiaa janiya. <sup>11</sup> Cucua nia tiuuri cua sequesacari niajaninya, janiyari cua Que jiuujiajinia quiyani, cua Queeri saniniuujia coojiajinia quiyacujua. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. <sup>12</sup> Seetanujuanaa nia sequeyanijia, cante cua tiuujiani, nojuajaari puetunu cua miishanojuanaa miiniutianiyajuhuaaj. Cua tacasacariuhua cua Que shuriucua cua quiniuhua, cucua tiuujiaaari cua cumaacata seetanujuanaa socua jiyajeneta casaa miiniutianiya cua miishanojiniji. <sup>13</sup> Seetanujuanaa nioojiajinia cua quishacari, janiyari niaara miiniutianiyani puetunu nia masanojuanaa nia secojosacari cua Que. Naacujitij, pueyari cua Que timitianutaniya, nojori niishishacari cua Queeri jiyanohua maninia mijia. <sup>14</sup> Nioojia rupetoosacari coojiata, janiyari puetunu nia masanojuanaa miiniutianiya niaarani.

### Jesu sequesacari, nojuaja Pueyaso Sohuanu jiyaronutaniya mijiria

<sup>15</sup> Niaa jaara seetanujuanaa cua panijiaa quiri, ni-aari cua rootasano tojitiajaca quiniutianiya. <sup>16</sup> Naajuhuaaj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiri-quiano. <sup>17</sup> Nojuajaari Pueyaso Sohuanu, seetanu rupaa jitianajanaa. Pueyaso tojiyashijia pueyari maja na naata cuno Sohuanu na jitianu, nojori niquiyaquiniucua nojuaja, na niishitiyaquiniucua nojuajuhuaaj. Niaa cutaraari na niishijia. Nojuajaari niaata quiyacujua. [Pueyaracaanu nioojiajinia quiri-quianojaariuhuaaj]

<sup>18</sup> Majaari seetanujuanaa cua tiujianu quiniutianiya niajaninya juhua japueyojuaca nia quiniuria. Janiyacujaaari tacatenutaniuhuaani niaata cua quiniuhua. <sup>19</sup> Pueyaso tojitiaashijia pueyari quiari naataja cua niquiyaquiniutianiya socua. Niaa cutaraari cua niquijia-ca quiniutianiya. Samiitianiiojua cua quiniucua, niaari pueyaracaanu quijiaa quiniutianiyajuhuaaj. <sup>20</sup> Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhuaaj. Janiyari saniniuujia nioojiajinia quijiani. <sup>21</sup> Cante cua rootasano niishijiani, nojuaja jaara na tojjia quirijuhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyani, seetanujuanaa na niishiniuria janiyari nata quiyani.

<sup>22</sup> Canaa cojinia Judasni, nooj, Judas Iscariote sesaanucatej, nojuajaari Jesu nequesotaree:

—Jiyaniijanaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

<sup>23</sup> Jesuuri na riucaaree:

—Cante cua panijiani, cua rootasano tojjiajaariuhuaaj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja.

<sup>24</sup> Saniniuujia, cante cua paniyaquijiani, jiyano pueyari cua rootasano tojiyashijiacajuhuaaj. Puetunu cua rootasanojuanaa, niaa na tojiquiaani, cunoori maja tama cua niishishanojuaaja. Cunoori cua Que niishitishano janiya, cante mijiria cua jiyaroquiaaricujani.

<sup>25</sup> Janiyari puetunu niojuanaa nia pohuataani, niaata cua quishacarijia mijiria. <sup>26</sup> Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitiojonu panishanojuanaa niajaninya. Naajuhuaaj, nojuajaari nia niishitiniutianiyuhua puetunu tari cua pohuatasano niajanijanaa.

<sup>27</sup> Janiyari nioojia cajitiniutianiyani. Janiyari coojia nianutianiya nioojiajiniani, juhuajaniya quijiaa nia quiniuria taa cua quiyacuaani. Naacujitij, niaari seetanujuanaa juhuajaniya quiniutianiya. Mijiria quiniaa pueyari maja na niishiniu cumanijanu juhua janiya. Naaratej, maja nia tacaani. Majaari puerenujuhuaaj.

<sup>28</sup> Tari nia sequereecujianijia: “Janiya quera quiohuani. Janiyari na nuhuaji tacatenutaniuhuaani niaata cua quiniuria”. Niaa jaara seetanujuanaa cua panijiaa quiri-quia, niaa maara shuquiriri nia niishishacari janiyari cua Queecua quiohuani. Nojuajaari seetanu jiyaniijiajanaa cutara janiyajiniji. <sup>29</sup> Janiyacujaaari juhuacarijia nio nia sequeyani. Naacujitij, niaa jaara niquiri tohuateyano cua sequesano niajaninya, niaari niishiniutianiya puetunu cua pohuatasanojuanaari seetanujanaa.

<sup>30</sup> Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacujani. Nojuajaari Pueyaso tojitiaashijia jiyaniijia. Pueyaracaanu cua Que Pueyaso tojjia cua quiniucua, cua Paraca maara naquiya cua miyaquiri janiya jaara cucua na shanacuyquirini. Na cumaacari maja na shocotanu cua cumaaca cutara. <sup>31</sup> Naajaa, na miishanojiniji janiya, puetunu pueyanaari niishiniutianiya, janiyari puetunu cua Que sequesanojuanaa tojjiani, na panijia cua quiniucua.

‘Nia sanetare. Niiquiji pa quiaare.

### Jesu pueyari juhua Jesu cashacucua, Jesu quishacari juhua neyona

**15** Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. <sup>2</sup> Cua pueyari juhua cua cashacucua. Tamonu cua cashacucujinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. <sup>3</sup> Nia tojiniucua cua rootasano, niaari tari juhua nacareetasano quiya. <sup>4</sup> Pueyaracaanu coojia nia rupere, taa cua rupueya nioojiaacuaani, niaa mariqui juhua uva cashacucua piyotasaareeri. Jaara neyonaacujia piyotasaare, majaari na naata muetunu



tari. Naajuhuaaj, majaari nia naata muetujua quiniu, niaa jaara coojia rupueyashijiaca quiri.

<sup>5</sup> 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya nijaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. <sup>6</sup> Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucuasaarohuari manijinia quejoosocoriquiano. Tii cateyari.

<sup>7</sup> 'Niaa jaara coojia rupuejaca quiri, niaa jaara cua rootasano tojjijaca quirijihuhuaaj, puetunu nia panishanoocarajanaa nia secojore Pueyaso. Nojuacuajaari nia masasano miiniutianiya. <sup>8</sup> Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanoehua timitiasaanutaniya. Naacuajitij, niishishaanutaniyajaariuhua niaari cua tojjitajaca pueyaniojua. <sup>9</sup> Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. <sup>10</sup> Janiyari cua Que panishanoni, pueyaracaanu cua miiniuucua na panishano. Naajuhuaaj, niaa jaara cua rootasano tojjijaca quiriquia, niaari pueyaracaanu cua panishano pueya quiniutianiyajuhuaaj.

<sup>11</sup> 'Janiyari naa nia sequeyani, shuquiriaatia qijijaca nia quiniuria, taa shuquiriaatia qijia cua qiyacuani. Naacuajitij, niaari tojetaarucuajanaa shuquiriaatia qijijaca quiniutianiya. <sup>12</sup> Cua tojiri. Nioori cua sequesano niaara: "¡Pueyaracaanu panitiojuaca nia quiriquia, taa cua paniya nijaniyacuaani!" <sup>13</sup> Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyanoehua narta pueya panijia. <sup>14</sup> Niaa jaara cua sequesano miijijaca quiri, niaari cua rupuenaa. <sup>15</sup> Naacuajitij, majaari cua sequenu quiniutianiya tari nijaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiarijia nia sequeya cua rupuenaatani, cua niishitiniuucua nijaniya puetunu cua Que sequesanojuanaa janiya. <sup>16</sup> Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria nijaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuaaj. Naaratej, cua Queeri puetunu nia masasanojuanaa nia niquitionutaniya seetanujuanaa coojia rupuejaca nioojia quishacari. <sup>17</sup> Janiyari cunora nia sequeyani: "Pueyaracaanu panitiojuaca nia quiri".

#### Pueyaso niishiyashijiaca pueyari Pueyaso muerasu niqiniu paniyashijiaca

<sup>18</sup> 'Pueyaso niishiyashijiaca jaara nia niqiniu paniaquiriquia, majaari nia tacaani. Cuno pojoricuajaari nia niquitiuniu paniaquijiacacuaa. <sup>19</sup> Niaa jaara Pueyaso muerasu quiaquiriquia, Pueyaso ni-

ishiyashijiaca maara nia panijia quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiaca quiquiaarijuhuaaj. Naajaa, janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiacaari nia niqiniu paniaquiriquiaa, maja tari nia quishacari juhua nojori. <sup>20</sup> Majaari nio cua sequesano nia niyaje-tanu: "Seruuri maja socua tojishano na camarnujiniji". Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuhuaaj. Naajuhuaaj, nojori jaara cua rootasano tojjijacacuaa, nojoriiri nia rootasano tojjijaca quiniutianiyajuhuaaj. <sup>21</sup> Nojoriiri naa naquiya miiniutianiya nijaniyatej, cua pueya nia quiniuucua, nojori niishiyaquishacari cua Jiyarona.

<sup>22</sup> 'Janiya jaara niyaquiquiaari nojori cua pohuatanura Pueyaso rupaani, nojoriicuaa maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". <sup>23</sup> Cante cua niqiniu paniyashijiani, nojoriiri cua Que niqiniu paniyashijajuhuaaj. <sup>24</sup> Sesa nojori miishano maara nojoriicuaa saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniaquijijaca, cua Que niquitiuniu paniaquijijacariuhuaaj. <sup>25</sup> Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajinijiiri tari tohua-teeree. Naa sequeyari:

"Janiyari najuhuaa niqiniu paniaquishiyani".

<sup>26</sup> 'Janiya jaara cua Que shuriucua quishuhuaani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniji niishitiniutianiya pueya. <sup>27</sup> Niaari janiyajiniji pohuatanutaniya pueyajuhuaaj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

**16** 'Janiyari naa nia numooteyani maja nia tarinitianura cucua tiuuniu niaa jaara naquiya miishaare. <sup>2</sup> Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuaaj cua tojjitajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. <sup>3</sup> Nojoriiri naa miiniutianiya nijaniyatej, nojori niishiyaquiniuucua janiya, cua Quejuhuaaj. <sup>4</sup> Janiyacuajaari juhuacarijia nia nia sequeyani. Naacuajitij, niaa jaara naquiya miishaare, niocua jiyacari niishiri janiyacuaajaari tari naa nia sequequiaarini. Majaari quenaaja nio cua sequenu quijia nijaniya, pueyaracaanu ni-aata cua quiniuucua.

### Pueyaso Sohuanu miishanojiniji pohuatasano

<sup>5</sup> Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajiniinio nequesotanu janiya: “¿Tee quia quiohuarini?” <sup>6</sup> Janiya jaara nia sequereeni janiya quianutaniuhuanu, niaari saaja taraajequee. <sup>7</sup> Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyaarohuani, majaari Pueyaso Sohuanu ninu quiniutianiya niaacua, na cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. <sup>8</sup> Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijaca. Nojori niishitiniutianiyajaariuhua nojoriiri na naata sesa miyashijiacara jiyatesaanu. Naajuhuj, nojori niishitiniutianiyari Pueyasoori na naata jiyanoonu nojori, maja Sesaacata nojori cojiritiasaanu ra mani quiquojinia quejoonu. <sup>9</sup> Seetanujuanaa, Pueyasora, nojoriiri sesa miijaca nojori tiuyaquiniucua cucua. <sup>10</sup> Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacuajitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. <sup>11</sup> Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacuajitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniucua.

<sup>12</sup> Janiyari queraatia jiitiaajaa cua pohuatanura niajaniyani. Naajaa, majaari cua pohuatanu quiniutianiya quiarijia niajaniya. Juhuanujuaja maja nia naata na niishiniu. Pueraruhua. <sup>13</sup> Pueyaso Sohuanu tiuquishacari niaacua, nojuajaari nia niishitiniutianiya puetunujanaa cutara. Nojuajaari seetanu rupaaajanaa jiitiaja. Nojuajaari maja tama na niishishanojuaaja na niishitiniu quiniutianiya niajaniya. Puetunu na tojishanojuaanaa janiyajiniini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. <sup>14</sup> Niaari cua shuquiritianutaniya, nojuaja niishitiniucua niajaniya janiyajiniini. <sup>15</sup> Puetunu cua Que jiitiasanojuaanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniini masenutaniya cua jiitiasano niaara, na caminiujiuniuria niajanijarajuhuj.

<sup>16</sup> Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj.

**Nia taraajenuuri jatanutaniya shuquiriaatia nia quiniuria**

<sup>17</sup> Jiyacaritij, noojiaqueya canaa na saquiriojosano pueyajiniiniioori tama nequesoreetooreejaaja:

—¿Casaa na sequenu paniyarini, nojuaja jaara sequere: “Niaari saaja quiarijia cua niquiya. Na nuhuaji

cutara, majaari socua nia niquiniu quiniutianiya janiya”? ¿Casaa na sequenu paniyajaaraniuhua na sequesacari: “Pasa naataja na nuhuaji niaari cua niquiniutianihuacuhuj”, na sequesacarijuhuaj: “Cua Queecua quianutaniuhuanijia”? <sup>18</sup> Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? [Majaari pa niishiniu casaaraqui na sequeyatejaj!]

<sup>19</sup> Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj”. ¿Niaatejaara niojiniji nequesoreetoya tama niajanijajaaja? <sup>20</sup> Seetanujuanaa nia sequeyanijia, niaari nujuquenutaniya. Niaari taraajconutaniyajuhuj. Jiyacaritij, Pueyaso niishiyashijia-caari taquiya shuquiriaatia quiniutianiyacuaa niajanijajiniini. Naajaa, cuno nia taraajenuuri jatanutaniya shuquiriaatia nia quiniuria. <sup>21</sup> Naajaariuhuj, maaji ranu panishacari na mueya, jiyanoohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. <sup>22</sup> Quiarijiani, niaari naa taraatia quiyajuhuj. Naajaa, niaacua tacatenutaniuhuanijia. Niaari jiyanoohua shuquiriniutianiya nia niquishacari janiya. Majaari quenaaja tamasaca pueya naata quiniutianiya cuno nia shuquiriniu jaariutianu.

<sup>23</sup> Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niqutionutaniya puetunu nia masesanojuaanaa nojuaja, seetanujuanaa coojia rupuejaca nioojia quishacari. <sup>24</sup> Majaari juhuanujuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niqutiosaare, seetanujuanaa shuquiriaatia nia quiniuria.

### Jiyaniijia Jesuuri Sesaaca shocotana

<sup>25</sup> Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujanaa cua Quejiniji cutarani. <sup>26</sup> Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojiniuria niajaniya. <sup>27</sup> Cua Quejanaacuajaari nia panijia, nia paniniucua janiya, nia niishiniucujuhuj janiyari na jiyarosanoni. <sup>28</sup> Niaacuajaari niishiya, janiyari cua Que shuriucujaj niquiaarini pueyanora cua quiniuria mijiria. Quiarijia saniniucujaj, janiyari nio jiya tiujianutaniyani, cua Queecua cua quianuhua.

<sup>29</sup> Naa Jesu sequesacari canaatej, canaari na sequereeni:

—Quiarijia cutara, quiaari maatiajanaa sequere, maja miriqui. <sup>30</sup> Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya.

Naacuajitij, canaari niishiyani, quiaacuajaqui Pueyaso Jiyarosano.

<sup>31</sup> Jesuuri canaa sequeree:

—¿Naatee? ¿Niaate shusha cucua tiuyaruhua? <sup>32</sup> Tari quenaacoyari naquiya cua miishaanura. Seetanujua-naa quiariijaari. Niaari cucuaji cocuataasanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani. <sup>33</sup> Janiyari puetunu niojuanaa nia sequeyani, nioojia nia cajitiniuria nio cua pohu-atasanooocua nia tiuushacari. Mijiria nia quishacari, niaari seetanujuanaa naquiya miiniutaniya. Naajaa, janiyacuaaari mijiria jiyaniija shocotareeni. Naacuajitij, nioojia nia cumaquiri tamajaaja.

### Jesu secojosacari na pueyacuara

**17** Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quenaa, janiya nio juuca naquiya miishaanutaniyani taa quia sequequiaaricuaajani. Cua tojiniucua quiajaniya, quia Jiyarosano quia jiyatere pueya timitiasano cua quiniuria. Naacuajitij, janiyacua saniniuujia quia jiyatere pueya timitiasano quia quiniuriani, tojetaarucuaajanaa maninia miijia quia quiniucua.

<sup>2</sup> Quiaacuajaari quia cumaaca cua niquitioquiaari puetunu pueyajanaa cua jitianura. Naacuajitij, janiyari saniniuujia nojori jiyatenutaniya pueyaracaanu quijiacanojori quiniuriani, teyano pojori quia niquitioquiaari janiyacuaajani. <sup>3</sup> Nojori niishishacari saaja quiajaniyari seetanujuanaa Pueyasocuaaja, naajuhuaaj, nojori niishishacari janiyari quia jiyarosanonni, naacuajitij, nojori pueyaracaanu quijiaara quiniutaniya shuquiriaatia.

<sup>4</sup> Janiyari tari tucuatere quia sequesano cua miiniuria mijiriani. Naa cua miiniucua puetunu quia panishanojuanaatej, pueyari quia timitiaa. <sup>5</sup> Jiy shipiniyaquishacariija, janiyari jiyanohua shuquiriaatia quijia quiquiaari quia shuriucuaani, jiyaniijaajanaa cua quishacari. Cua Quenaa, naa quijiaara cua jiyaterohua quiariijiani, quia shuriucua cua quiniuhuaa.

<sup>6</sup> Quia niquitiosano pueya janiya, quia saquiriosano pueya quia niishiyashijiaca pueyajiniinioni, quiariija cutara, nojoriiri niishiya cante quiajaniyani. Nojoriiri quia niishiya, nojori niquiniucua cua miijosano quia cumaacata, cua pohuatasano quiajaniyajini nojori tojiniucuaajuhuaaj. Nojoriiri quia pueya quijia. Quiaari saniniuujia nojori cua niquitioquiaari. Nojoriiri quiariija quia rupaa tojitiaajaca cutara. <sup>7</sup> Nojoriiri niishiya puetunu cua jitiananojuanaani, cunoori quia niquitiosano janiya. <sup>8</sup> Janiyari quia rupaa rootacanu nojorini, quia niishitishano janiyani. Nojoriiri seetanujua-naa nocua tiuurii. Nojoriiri seetanujuanaa niishiya, janiyari quia shuriucuaaji niquiaarini. Niishituyajaariuhuaaj, janiyari seetanujuanaa quia jiyarosanonni.

<sup>9</sup> Janiyari cunora nojoriicuara quia secojiyani, seetanujuanaa quia pueya nojori quiniucua. Majaari cua secojonu quia niishiyashijiaca pueyacuara. Saaja noo pojoriicuara quia secojiyanijia, quiaa na niquitioquiaari

janiyatej. <sup>10</sup> Naaratej, puetunu cua jitianano pueyajanaari quia pueyajuhuaaj. Mariyata puetunu quia jitianano pueyajanaari cua pueyajuhuaaj. Nojori tiuuniucua cua cucua, nojoriiri jatanishano pueya quiniutaniya. Naacuajitij, queraatia pueyari cua timitianutaniyajuhuaaj, naa nojori niquishacari cua cumaaca.

<sup>11</sup> Majaari puera cua tarishiniu quiniutaniya mijiria. Cua pueya cutaraari mijiria quiniutaniyajaara, janiya jaara quiaarohua quiocuani. Jiyanohua maninia cua Quenaa, nojori quia cojuare quia cumaacata, teyano pojori quia niquitioquiaari janiyacuaajani. Naa quia jitiare nojori, jatiqui nojori quiniuria juhua niquiriyatu jiuujiaraca, taa pa quiyacuaani. <sup>12</sup> Mijiria cua quishacari nojoritia, janiyari nojori cojuajani quia cumaacata, quia rupaacua tiuujiaa nojori quishacari. Majaari quenaaja niquiriyatu nojoriniinini cua juurequetenu quiquiaari. Saa nojuuari juurequecanu cutara, tariucua juurequeriuo quijiacuaatej. Naacuajitij, tariucuaacaanu quia rupaajinia naajiotasanoori tohuatecanu.

<sup>13</sup> Quiariijiani, janiyari quiocua quianutaniyani, tee quia quiyacuaani. Niya cua quishacariija, janiyari nio sequeya nojori niquiarani, nojori jitianura cua shuquiriniujuhuaaj, tojetaarucuaajanaa shuquiriaatia quijiaa nojori quiniuriajuhuaaj. <sup>14</sup> Janiyari nojori niishitocanu quia rupaani. Naa nojori tojishacari quia rupaatej, quia niishiyashijiaca pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quijiaa na quiniu tari, taa janiyacuaani. Naaratej, mijiria quijiaa pueyari nojori niquiniu paniyaquiquiaa. <sup>15</sup> Naa cua secojosacari quiariija nojoriicuaratej, majaari cua sequenu quiajaniya nojori quia rionura niiquiji. Saaja quia secojiya cutaraniija, nojori quia cojuanura Sesaacaacuaaji. <sup>16</sup> Nojoriiri maja mijiria quijiaa na quiniu tari cua pueya nojori quishacari, taa nio jiyajiniinini cua quiyacuacuaani.

<sup>17</sup> Quia rupaa quia poonijiotere nojori jiuujiajini, tojetaarucuaajanaa quia tojijiaa nojori quiniuria. Quia rupaari seetanu rupaajanaa cutara. <sup>18</sup> Quiaacuajaari cua jiyaroquiaari mijiria quiniaa pueya niquiara cua pohuatanura quia rupaa. Naajuhuaaj, janiyari cua pueya jiyaramiquiyani mijiria quiniaa pueyacuajuhuaaj. <sup>19</sup> Quia tojijiaa nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacuajitij, nojori niishishacari seetanu rupaajanaa janiyajini, nojoriiri tojetaarucuaajanaa maninia miijiacara jatanishaanutaniya.

<sup>20</sup> Majaari saaja cua secojonu nio pojoriicuara, tariucua quia tojitiajacacuaani. Janiyari secojiyajuhuaaj na nuhuaji cucua tiuuriquiano pueyacuara, noo pojoriicuara cante cucua tiuuniutaniya na nuhuajini, nojori tojishacari nio pojori pohuatasano janiyajini. <sup>21</sup> Cucua tiuuriquiano pueyacuara secojiyanijia puetunu cucua tiuuniaajanaa cuaara quiiria jatiqui, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniacuaani, quiaari saniniuujia coojiajini quiyacua. Nojori jiuujia cuaara juhua rupuetootesano quiiria poojiatajuhuaaj, mijiria quiniaa

pueya niishiniuria, quiaari cua jiyaroquiaari mijiria. <sup>22</sup> Janiyari nojori cumaquia quia Sohuanutani, quia niquitiosano janiyacuaa, juhua niquiriyatu jiuujiaraca nojori quiniuria, naatej, taa niquiriyatu jiuujiaraca pa quiyacuaani. <sup>23</sup> Quiaari coojiajinia quiya. Naajuhuj, janiyari nojori jiuujiajinia quiyajaacuhuj. Naacujitij, paari nojoritia juhua niquiriyatu quiniutianiyani. Naacujitij, mijiria quijiaaari niishiniutianiya, quiaari seetanujuanaa mijiria cua jiyaroquiaari. Nojoriiri niishiniutianiyajuhuj, quiaari jiyanohua cua pueya panijia, taa quia panija janiyacuaani.

<sup>24</sup> Cua Quenaa, cuno pueya quia niquitiosano janiyani, janiyari paniyani nojori quiniuria cuata quia shuriucua, nojori niquiniuria cua shacantuca cumaa-ca. Quiaari cuno cumaa cua niquitioquiaari pueyara-caanu quia paniniucua janiya, jiya ship-iniyaquishacarijia. <sup>25</sup> Tojetaarucujanaa sesa miyashijia cua Quenaa, mijiria quijiaa pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanujuanaa quia jiyarosanoni. <sup>26</sup> Janiyari nojori niishitioanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanujuanaa nojori niishiniuria quiajaniya. Naacujitij, taa quia panija janiyacuaani, nojori cuara cuno paniniu jiitaaara nojori jiuujiajiniajuhuaj. Naa nojori niishishacari quiajaniyatej, janiyari nojori jiuujiajinia quiniutianiyajuhuj.

### Na paraa quiasacari Jesu

(Mt 26.47-56; Mr 14.43-50; Lc 22.47-53)

**18** Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura. <sup>2</sup> Jesuuri tii jiitiquiaari canaata na rerejonura. Naacujitij, na paraa na quiateriquiano Judasri cuno cuhuariquia niishiquiaarijuhuj. <sup>3</sup> Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. <sup>4</sup> Jesuuri tari puetunujanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacainijii tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

<sup>5</sup> Na paraari na riucaaree:

—Canaa Nazaret tiacajinijinio Jesu pajeyani.

Jesuuri nojori riucaaree:

—Janiyacujaja nojuajani.

Jesu tacartana Judasri cuno pojoritia quiriquiaa tii.

<sup>6</sup> Jesu sequesacari, “Janiyacujaja nojuajani”, na paraari na nijiniara pojotuquee. <sup>7</sup> Jesuuri socua nojori nequesotarahua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

<sup>8</sup> Jesuuri nojori riucaaree:

—Janiyacujaja tari nia sequereeni, janiyacujaja nojuajani. Naa jaara cua pajeya, nareja nia niquiri nio, cua cojiniaani.

<sup>9</sup> Naacujitij, tama Jesu sequesanojuaarjia tohuatee-quiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”.

<sup>10</sup> Jiyacaritij, Simón Pedroori tama na mueruujuaaja shitiaree na shuucujaja shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco.

<sup>11</sup> Jesuuri Pedro sequeree:

—Na co jiniacuma quia shiiriohua quia mueruu. Cua Que jaara panija naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? [Taaquiri-irini!]

### Anás nequesoreesacari Jesu

(Mt 26.57-58; Mr 14.53-54; Lc 22.54)

<sup>12</sup> Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojoua tiaco cojuanaa pueyano. Nojoriiri Jesu morojoturee. <sup>13</sup> Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijara, Caifásri pueyacuara secojonaa jiyaniijiajanaa quiriquiaa. <sup>14</sup> Cuno Caifáscujajaari tari naa sequequiaari narta Judiocuaca camarucua: “Maniniacujajaari niquiriyatu pueyano mosaanura puetunu pueya niti-jianaa, maja najuhuaana puetunu pueyajanaa puecoosaanura”.

### Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

<sup>15</sup> Simón Pedroori cuata Jesu nuhuajiriquiaa tucua-caanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacujitij, janiyari tiuquinishaaree cutara Jesutani, jiyaniijia tia shocua mataca jiniacuma. <sup>16</sup> Saaja Pedro cutaraari tohuateyaji jateese. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiurajuhuj. <sup>17</sup> Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj? Pedroori na riucaaree:

—[Maja janiya!]

<sup>18</sup> Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojoua tijinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuj. Mani jitiuriquiaari.

**Pueyacuara secojonaa jiyaniijia nequesoreesacari Jesu**  
(Mt 26.59-66; Mr 14.55-64; Lc 22.66-71)

<sup>19</sup> Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreerejaarihuaj. <sup>20</sup> Jesuuri na sequeree:

—Janiyacuaajaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajinaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojojua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. <sup>21</sup> ¿Casaara quia nequesoreya janiyani? Quia nequesoreere juhuari cuno pojori, canapuee cua pohuatasano tojiquianuni. Nojoricuaajaari quia sequenutaniya casaa cua rootaquiaa nojorini.

<sup>22</sup> Jiyacaritij, Pueyaso Secojojua tiaco cojuana pueyanoori Jesu shuriucua nujuariquiaa. Naa Jesu riu-cuasacari jiyaniijia Anástej, Secojonuujuaca tiaco cojuana pueyanoori Jesu jiquioco maseteree. Naa Jesu sequereeri:

—¿Naa riu-cuasanote pueyacuara secojonaa jiyaniijia?

<sup>23</sup> Jesuuri na riu-cuaree:

—Janiya jaara sesa riu-cuareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquioco-cuaraarini?

<sup>24</sup> Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

**Pedro pacutesacari seetanu Jesujiniji**

(Mt 26.71-75; Mr 14.69-72; Lc 22.58-62)

<sup>25</sup> Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—[Maja janiya!

<sup>26</sup> Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—[Janiyacuajaruhua quia niquirii cuno pueyanota quia quishacari olivo cuhuariquiajiniani!

<sup>27</sup> Pedroori na seetarohuacuhuj. Caacarajaari jiyacari niunijioquee.

**Jiya jiyaniijia Pilato nequesoreesacari Jesu**

(Mt 27.1-2, 11-14; Mr 15.1-5; Lc 23.1-5)

<sup>28</sup> Caifás tiajiniji, Jesuuri jaatucusaaquiaari Romano jiyaniijia tiajiniara. Cuno tiaari jiyanhua puereetuuca quiriqiuase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano

quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquiiioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curu-ushiriiri Pueyaso niquiara, nojori tiuquitianuucua tahue tiajinia. Nojori jaara juhua curuutuucua quiri Pueyaso niquiara, naacuajitij, nojori maara Pascuara miaquesano borrego miaqueyaquirij. <sup>29</sup> Naaratej, Pilatoori nojoriicua tohuataquiaari. Nojori nequesotareeri: —¿Casaa nio pueyano miiriucuaani, miji nia nitianura cucuani?

<sup>30</sup> Nojoriiri saaja riu-cuaree:

—Jaara sesa miyashijia quiriqiuia, ¿canaatucua casaara quiocua na nitiamani?

<sup>31</sup> Pilatoori nojori sequeree:

—[Niiquiji nia jiyataarohua! [Tama nia nequesoresuhuaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riu-cuaree:

—[Niajaniya Romano pueyani, niaacuajaari canaa sequecanu maja canaa monura pueyano!

<sup>32</sup> Naacuajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia.

<sup>33</sup> Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

<sup>34</sup> Jesuuri Pilato sequeree:

—¿Cunote tama quia niishishanojuaja naa quia nequesotanura janiyatej? ¿Tamonu soj quia pohuatacanu janiyajiniji?

<sup>35</sup> Pilatoori Jesu juaarii. Na sequereeri:

—[Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? [Tama quiarta Judiocuacacuajaari cucua nitiamaa quiajaniya, nia pueyacuara secojonaa jiyaniijianucua! [Cua sequere casaa quia miiriucuaani!

<sup>36</sup> Jesuuri na riu-cuaree:

—Janiyacuaajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiuani, cua pueya maara cua quiatunaa cuarta Judiocuacata miaque-toore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

<sup>37</sup> Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riu-cuaree:

—Jaa. Janiyacuaja Jiyaniijiani. Janiyacuajaari cunora rasaanuarini. Janiyari mijiria niquiaarini seetanu rupaajanaa cua niishitiniuria pueya. Cante seetanu rupaajanaa panijiani, nojoriiri cua sequesano tojitiajaca.

<sup>38</sup> Pilatoori najuhuana na nequesotaree:

—¿Casaateeri cuno seetanu rupaajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacua.

### Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecuajaniija. Nojuajaqui maja sesa na miiniu quiquianu. <sup>39</sup> Niajaniya Judiocuacani, niari puetunu Pascua juucarajanaa cua nenecojoquiaa cua cartenura nujuatejojuajini nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

<sup>40</sup> Puetunu pueyajanaari naa jiyanohua nacooro-huacuhuj:

—[Maja cuno cartenu! [Barrabás quia cartere cutara! Cuno Barrabásri nohuasejojuaj quijia.

**19** Jiyacaritij, Pilatoori na soldadohua majacuteree Jesu, coqueeca casaata. <sup>2</sup> Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiuria, shaaruque toque cushitishaarohuari, juhua jiyaniijia toque. <sup>3</sup> Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—[Judiocuaca jiyaniijianaa! [Quia timiri, Judiocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

<sup>4</sup> Pilatoori socua tohuataquiaari canaa Judiocuaca. Nojori sequereeri:

—[Nia niquiri! Janiya na tohuateya niaacuani, nia nishiniuria janiyacuaa tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriucuaa.

<sup>5</sup> Jesu muetasacari nojoriicua, juhuacontucujini nacaque cushiriquiaari, shaaruque toqueno. Pilatoori Judiocuaca sequeree:

—Nia niquiri niarta pueyano.

<sup>6</sup> Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niquiquiaari, naa nacoonu coteetureeri:

—[Niyacutesanojinia quia teetere tii na cusonura! [Niyacutesanojinia quia teetere!

Pilatoori nacoyano riucaaree saaja:

—[Maja! [Janiyacuaaari niishiyani, nio pueyano maja sesa na miiniu quiquianu! [Niaa jaara na monu paniri, nia teetere tama nijaniyajaaja!

<sup>7</sup> Canaa Judiocuacaari Pilato riucaaree:

—[Canaari Pueyaso Rootasano naajionee jitiiani! [Canaari cunojini niishiyani, nio pueyano cuaara mosaaria tama na cuaqueyajaaja na jiyatenucua Pueyaso Niyanura!

<sup>8</sup> Pilato tojishacari naa canaa Judiocuaca sequesantej, nojuajaari socua puerequiaari. <sup>9</sup> Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniyani?

Jesuuri maja na riucaanu quirii. <sup>10</sup> Pilatoori na sequeree:

—[Cua riucaarejaj! ¿Quiaate niishiyaquiya, janiya jiyaniijiani? [Janiya jaara panirini, cua naata cua pueya

sequenu na teetenura quiajaniya! [Janiya jaara paniyaquirijuhuj, cua naata quia cartenujuhuj!

<sup>11</sup> Jesuuri saaja na riucaaree:

—[Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaquiri cucuaj. Naaratej, cante niyara cua nitia-maa quiocuani, nojuajaari socua jiyanohua sesa miirii quiajaniyajini.

<sup>12</sup> Naa Pilato tojishacari Jesu sequesantej, nojuajaari socua shiriquiquiaari. Nocuaji, Jesu cartenu saniniuquiriquiaa juucuaari. Judiocuacaari saa nacooreejaa. Naa Pilato sequetureeri:

—[Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! [Naaratej, quiaa jaara cuno pueyano cartere, majaari socua pa jiyaniijijanaa César rupuna quia quiniu quiniutianiya!

<sup>13</sup> Naa Pilato tojishacari pueya sequesano nojuatej, nojuajaari na soldado sequeree na tohuatenuhuara Jesu pueya niquiaari. Pilatoori jiyacari cajirii pueya na nequesoreesaquiji cajitijinia. Pilato tii cajiriquiaani, na tajoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupajinia saniniuujia, cunoori quiquiaari “Gábata”. <sup>14</sup> Jiyacariiri panacari quiriquiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quinia Judiocuaca sequeree:

—[Nia niquiri nia jiyaniijia!

<sup>15</sup> Pueyari saa nacooreejaa:

—[Cunoori maja canaa panishano canaa jiyaniijia na quiniuria! [Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? [Maja!

Pueyacuara secojonaa jiyaniijianucuaari Pilato sequeree:

—[Jiyaniijia Césarcuajaari canaa jiyaniijijanaa! [Maja socua tamonu jiyaniijia canaa jitiianu!

<sup>16</sup> Pilatoori socua Judiocuaca niquitioree Jesu, nojori teetesocoriquiano. Naaratej, nojoriiri na jiyataquiaari na teetenucua.

### Jesu teetesacari

(Mt 27.32-44; Mr 15.21-32; Lc 23.26-43)

<sup>17</sup> Jesuuri tama na teejaranojuaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupajinia saniniuujia, “Gólgota”. <sup>18</sup> Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree. <sup>19</sup> Pilatoori naa naajotequiarijuhuj Jesu nacaacuma rupotasocoriquiano: “Nazaret tiacajinijio Jesu, Judiocuaca jiyaniijia”. <sup>20</sup> Naajiosano quiriquiaari canaa Judiocuaca rupajinia, Romano pueya rupajinijuhuj, Griego rupajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. <sup>21</sup> Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judocuaca jiyaniijianijia”.

<sup>22</sup> Pilatoori nojori riucaaree saaja:

—Janiyacuajaari naa naajiotereeni. [Cuaara naa qui-riatej!

<sup>23</sup> Cuno cuatrosoldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajinijiyocuara. Maja cusupuesano.

<sup>24</sup> Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano qui-yari:

“Cua toqueeri seraatiasaaree. Cua tucuaque toqueecua tacuarishiyonuureeri, na paso-coriqiano”.

Seetanujuanaa, naa miitiquiaariirino cuno soldadohua.

<sup>25</sup> Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Mariájuhuj, María Magdalenanio.

<sup>26</sup> Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaajaari janiya. Jesu niquishacari canaa, na nucua sequereeri:

—Maajinia, cua panishano pueyano cuaara quiiria juhua quia mueya cua niti.

<sup>27</sup> Na nuhuaji, cua sequereeariuhuj:

—Juannaa, cua nucua cuaara quiiria juhua quia nucua.

Naaratej, janiyari María riquiaari cua tiajinianani, tii na quiniuria canaata.

### Jesu cusosacari

(Mt 27.45-56; Mr 15.33-41; Lc 23.44-49)

<sup>28</sup> Na nuhuaji, Jesuuri niishiquiaari puetunu nojuajini-ji naajiotasanojuanaari tari tohuateeree. Naajuhuj, tariucuacaanu Pueyaso Rupaajinia naajiotasano tohuateenurajuhuj, Jesuuri sequequiaari:

—[Jiyamueyanijia!

<sup>29</sup> Cuniqiu, vino jerecaari patacojinia mishaja caji-tiariquiaa. Jiyacaritij, namasu casaari jereca vinojinia shishaaree. Naajuaacua na morotatureeri. Na nuhuaji, Jesu rupaama shitiasaareeri. <sup>30</sup> Jesu ratunu nuhuaji cuno jereca vino, naa sequerohuari:

—[Tari tucuatere puetunujuanaacuajaniijia!

Naa na sequenu nuhuajitij, naniquiiri. Cusoqueeri.

### Soldado jitiasacari Jesu shuucuaji na cashanata

<sup>31</sup> Cuno juucaari canaa Judocuaca jeenucuasacari quiriquiaa Pascuaacuara juucajinia. Cuno marijiaara, Pascua juucaari Sábado juucajinia quiriquiaajuhuj, samaatenu juuca. Naaratej, canaa Judocuaca camarucuaari maja na paniniu quiquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequereee cuno teetejosano pueya cashacucua na shuniitianiuria, ritia nojori cu-

sonuunura, na roshinijosaanura cuno juucaja.

<sup>32</sup> Naaratej, Pilatoori na soldadohua jiyaramiquirii.

Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatereeariuhuj. <sup>33</sup> Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitaaquirii.

<sup>34</sup> Naajaa, tamonu soldadoori Jesu shuucuaji jitiaree na cashanata najuhanaj. Ritia shooqueeri nanaca, mohuacanio. <sup>35</sup> Cuno pueyano, na naajiojinia naa nia pohuataani, cunocuaajaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaaritia niishiyani cua sequesanoori seetanujuanaa, nocua nia tiuuniuria. <sup>36</sup> Jesuuri naa miishaaquiaritij, tariucuacaanu nojuajinijiyocuara tohuateenura. Naa sequeyacuajaari juhuacari-ji nojuajinijiyocuara:

“Majaari quenaaja na nucu shuniitiasaanu quiniutianiya”.

<sup>37</sup> Tamaquiiri nojuajinijiyocuara quiyajuhuj:

“Cashanata na shuucuaji na jitiatusano niqitiuniutianiya”.

### Jesu quete niasacari raaco

(Mt 27.57-61; Mr 15.42-47; Lc 23.50-56)

<sup>38</sup> Na nuhuaji, Arimatea tiacajinijinio Joseeri Pilato sequese:

—Cua niqitiore Jesu quete raaco cua niaso-coriqiano.

Nio Joseeri jiyasohuaja Jesuucua tiuujia quiquiaari, na pueresacari narta Judocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. <sup>39</sup> Nicodemojuhuaj, noo pueyano Jesuucua niquiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriqiano. Na niiquiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijiosano. <sup>40</sup> Joseeri Nicodemota Jesu jiu-niocoree toqueneecajinia. Nojori jiu-niocosacari, nojori-iri nocua niojoriquiaa cuno shanohua jaanutaja. Canaa Judocuacaari naa miitijujiaca quiquiaari, na macu na niatunura raaco. <sup>41</sup> Tee Jesu teetesaaquiaricuajani, cuniqiuja na shuriucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojuuara. Cuno raaconi, juhuanojuaja maja macu niasaanu quiquiaari. <sup>42</sup> Macu-urino cuno raaco niasaaquiaari, cateca na quiniucua. Naajuhuj, quera puequeriquiaari canaa Judocuaca jeenucuacuara juuca. Cunoori, Pascuaacuara juuca.

### Jesu samiitiasacariuhua

(Mt 28.1-10; Mr 16.1-8; Lc 24.1-12)

**20** Domingo, coteenujuanaa semaana juucani, María Magdalenaari tariquicuaji quiaquiaari Jesu raajiniara. Ninishiquiiri quiriquiaajaa. Na tiuquishacari, cuno puereetuca saajia niquishiiri tariucua tamocora ruutinishano, teyanota raa

tiosaaquiaaricuajani. <sup>2</sup> Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—Pueyanaa, pa Jiyaniijiaqui na raajiniji pasaaree!  
 [Majaari canaa niishiniu teeriquitijia na niasaaretejaj!

<sup>3</sup> Naaratej, janiyari Pedrota netequiaari raajiniara-juhuaj. <sup>4</sup> Canaari mariyata netecaturiquiaa coteenuni. Janiya cutaraari socua ritia netequiaari Pedrojinijini. Naacujitij, janiyari coteenu tiuquishii raajiniani. <sup>5</sup> Janiyari raaco cuuqueseeni. Janiyari saaja Jesu jiunocotaja toque niquirii maanoni tee Jesu quete niasaarucuaacuajani. Majaari cua tiuquiniu quimiasa raaco.

<sup>6</sup> Simón Pedroori cua nuhuaji tiuquishii. Cami tiuquimaaajanaa cutaraari. Nojuajaari Jesu jiunocotaja toque niquishii tii maanojuhuaj. <sup>7</sup> Jesu naca jiunocotaja niquiriiiaarihuaj tamoco maano, maninia mariquiosano. Majaari na manu quiriquiaa Jesu cuaqueya jiunocotaja toqueta. <sup>8</sup> Pedro tiuquiniu nuhuaji raaco, janiyari shusha jiyacari tiuquimiaajaanihuaj. Cua niquishacari Jesu jiunocotaja toque, janiyari niishiquiini Jesuqui tari samiitiarohua. <sup>9</sup> Canaari juhuanojuaja maja canaa niishiniu quiriquiaa tariucuaa canu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutianuhua macujiniji. <sup>10</sup> Na nuhuaji, canaari tajinia quiaarohuani.

#### Jesu muetasacari María Magdalenaacua (Mr 16.9-11)

<sup>11</sup> Canaa quiojosacariuhua raajiniji, María Magdale-naari tiijia jateequiaari. Raa shuriucua nujuqueriquiaari. Na nujuquenuta, raaco cuuquereeri.

<sup>12</sup> Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. <sup>13</sup> Pueyaso seyari María Magdale-na sequereeri:

—Maajiniaa, ¿casaara quia nujuqueyani?  
 Nojuajaari Pueyaso seya riucuaaree:

—Cua jiyaniijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

<sup>14</sup> Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuanoori. Maja cutaraari na niishiniu quiriquiaa nojuaja Jesu.

<sup>15</sup> Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

<sup>16</sup> Jesuuri na sequereeri:

—[Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—[Rabuni!

Cunoori sequeya, “Cua Niishitiojonanaa”. <sup>17</sup> Jesuuri María sequereeri:

—Maja cua quianu. Juhuanajuaja maja cua tacanu quiquioo cua Queecua. Quia quiaarohua. Cua tapuey-ocua quia sequesuhua: “Janiya cua Que Pueyasoocua tacanutaniuhuani. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequereeri na tapueyocuaata, na Que Pueyaso na jiyatesacari nojori Quejuhuaj. <sup>18</sup> Jiyacaritij, María Magdalenaari nimiohua canaacua, Jesu saquiriojosano pueyacuani. Nojuajaari canaa pohuatasuhua taa Jesu na niquiriini. Naajuahuaj, Jesu sequesano caminiujurii canaaraari.

#### Jesu muetasacari na saquiriojosano pueyacua (Mt 28.16-20; Mr 16.14-18; Lc 24.36-49)

<sup>19</sup> Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojo-quaari cumatiani, canaa pueresacari Jesu motenaa Judiocua. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

<sup>20</sup> Naa canaa na sequenu nuhuajitij, canaa niquitijoree na juaashiquiaari, na shuucuaa cashana jyanio. Canaari jyanohua timiriini canaa niquishacari canaa Jiyaniijia. <sup>21</sup> Jesuuri socua pacuterohua sequenu:

—[Juhujaniya nia quiri! Naatej, taa cua Que jiyar-quaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuahuaj.

<sup>22</sup> Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. <sup>23</sup> Naa jaara pueyano jyanoori sesa na miishanojiniji, seetanujuanaa jyanoooshano quiniutianiyari. Saniniuujia, niaa jaara pueyano jyanoyaquiri sesa na miishanojiniji, Pueyasora, jyanoooshoo quiniutianiyajaarihuaj.

#### Tomás niquishacari Jesu, saminio seetanujuanaa

<sup>24</sup> Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua.

<sup>25</sup> Naaratej, canaari Tomás sequequiaari na nuhuajini:

—[Caapueyanonaa, canaa pa Jiyaniijia niquiriicuaani!  
 Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajinia niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucuaajijihuaj, janiyari nia cuaracashitiniutianiyani.

<sup>26</sup> Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaari-uhuani. Tomásri jiyacari canaata quiriquiaa cutara. Tia tiotiuuri maninia mishiquiojosano quiriquiaa. Naajaa, Jesuuri saaja canaacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

<sup>27</sup> Jiyacari Tomás sequereeri:



—Miji, Tomásnaa. Cua juaashiquia quia niqiri. Quia juaashiquia quia shiri clavo jiyama. Cashana jiyama cua shuucujaji quia puerarejuhuaj. ¿Casaara cucujaji quia taacanuyajaani? Cucua quia tiuuri.

<sup>28</sup> Tomásri jiyacari Jesu sequeree:

—[Cua Jiyaniijanaa! [Cua Pueyasonaa!

<sup>29</sup> Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapuate cucua tiuuniutianiya saaja nojori tojishacari janiyajiniini, nojori niqiyaquishacari janiya.

### Casaara Juan naajioquiaari nio naajioneeni

<sup>30</sup> Jesuuri jiyanoahua socua queraatia casaa miiquiaari na cumaacata canaa na saquirojosano pueya niqiuara. Cunoori nio nequesoreetuneejini naajiotasoo. <sup>31</sup> Janiyari secaja saquirojoree niya cua naajiotasocoriquianoni, nia niishiniuria Jesuuri seetanujuaanaa Pueyaso Jiyarosano, Pueyaso Niyanutuhuj. Janiyari nio naajiooreni nocua nia tiuuniuria, Pueyaso muerasura nia jiyatesaanura, pueyaracaanu rishijiaa nia quiniuria.

### Tiberias caminiajini Jesu muetasacari na saquirojosano pueyacua

**21** Na nuhuaji, Jesuuri canaa na saquirojosano pueyacua muetaquiaariuhua Tiberias caminiajini. Naa quiquiaariti na muetasacari canaacua. <sup>2</sup> Nio pojoriiri jiyacari mariyata quiriqiaa: Simón Pedro, Tomás (Caapueyano jiyaniishano), Natanaeljuhuaj. Nojuajaari Caná tiacajiniini quiquiaari, Galilea jiyajiniini. Janiyari cua tarajanuta tii quiriqiaajaaniuhuj. Canaari Zebedeo niqiuohuani. Socua caapiqui Jesu saquirojosano pueyajiniinioori tii quiriqiaajuhuj.

<sup>3</sup> Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareni:

—Canaa quiata quiaajuhuj.

Naacuajitij, canaari quiojiyareeni. Canaari botejiniacataseeni. Canaari puetunu cuno niucujanaa shiyaru quejootariqiaa sapitiaajara juucuaani. Canaari shaa juhuaquetumaani. <sup>4</sup> Jiyacaritij, Jesuuri caminia casaqueyaji jaaquiajini njuariqiaa. Majaari canaa niishini quiquiaari cante nojuajani. <sup>5</sup> Jesuuri canaa jiquiooree. Canaa nequesotareeri:

—[Sanajooriniaa! ¿Niaate na quiaree?

Canaari na riucuaareni:

—[Maja! [Shaaqui sacaj!

<sup>6</sup> Jesuuri canaa sequeree:

—[Nia shiyaru nia jartare nia miaquetajara bote tamajiria! [Niaari cuniqui na quianutaniya cutara!

Canaari naa miiriini taa na sequeree canaacujani. Na nuhuaji, majaari canaa naata canaa shiyaru jaatianu quiriqiaa, queraatia sapitiaaja canaa ritiasacari.

<sup>7</sup> Jiyacaritij, janiyari Pedro sequereeni:

—[Pa Jiyaniijaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriqiaa. Na toque na cushiniu nuhuaji, caminiajini jaataareeri Jesuucua na quianura. Jiritiuri quiriqiaa. <sup>8</sup> Canaari na nuhuaji jaatariqiaa shiyaru botejiniini. Jaaquiaari namitia maja tucuacaanu na quiniu quiriqiaa, saaja cien metroruhua. <sup>9</sup> Canaa rosetasacari botejiniini, canaari na mani niquishiini. Sapitiaajaari tii majeeriquiaa, pannio. <sup>10</sup> Jesuuri canaa sequeree:

—Nia sapitiaajiniini miji nia riri rarishocoriquiano.

<sup>11</sup> Simón Pedroori ritia botejiniacatamaa. Shiyaru tacanitiaree jaaquiajiniiaari. Queraatia sapitiaajaari quiriqiaa. Ciento cincuenta y tres sapitiaaja, saa puereetunucua. Naa queraatia sapitiaaja quishacari-tij, naajaa, majaari shiyaru turejetanu quirii quenaaja. <sup>12</sup> Jesuuri canaa sequeree:

—Pueyanaa, miji. Nia miaquesee.

Majaari quenaaja niqiriyaatu canaajiniini nequesotanu quiriqiaa, cantejaaranoni. Canaacuaajaari niishiriquiaani nojuacuajaari canaa Jiyaniija Jesu. <sup>13</sup> Jiyacaritij, Jesuuri pan rishii manijiniini. Canaa na serotareeri. Sapitiaaja rariquia canaa niqitiojoreejaariuhuj.

<sup>14</sup> Jiyacari Jesu muetasacari canaa na saquirojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

### Jesu pocoojosacari Simón Pedrot

<sup>15</sup> Canaa miaquenuunu nuhuaji, Jesuuri Simón Pedrot pocoojoriqiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquirojosano pueyajiniini?

Pedroori na riucuaaree:

—Jaa, Jiyaniijanaa, quiaacuajaari niishiya janiyari quia paniyani.

Jesuuri na sequeree:

—Cua borregohua niqiuohuaniyojua cojuanara quia quiriqii.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu. <sup>16</sup> Jesuuri Pedro nequesotarohuacuahuaj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijanaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqii.

<sup>17</sup> Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujanaa Jesu riucuaareeri:

—[Jiyaniijanaa, quiaacuajaari puetunujuanaa niishi-jia! [Quiaari niishiya janiyari quia paniyani!

Jesuuri na sequeree:

—Cua borregohuaniyojua cojuanara quia quiriqii.

<sup>18</sup> Seetanujanaa quia sequeyanijia, mashaja quia quishacari, tama quiajanijia quia toque cushijia, quia quianura quia panishaqui. Saniniuujia, quiaa

jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

<sup>19</sup> Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutianiya na mosaanuucua. Na nuhuaji, Jesuuri na sequeree:

—Pueyaracaanu cua tojjia quia quiri! Pa quiaarej.

### Juanjiniji pohuatasano

<sup>20</sup> Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuaajaari janiya. Janiyari noo pueyanocujani, canaa mi-aquenuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenutaniyani?” <sup>21</sup> Quiarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuani, ¿nojuajaarijataj, taa na miishaanutaniyarini?

<sup>22</sup> Jesuuri Pedro riucaaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojjia quia quiri.

<sup>23</sup> Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohuajaatijia, quiajanijara naajaa”.

<sup>24</sup> Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

<sup>25</sup> Jesuuri jiyanohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua nio jiyajinia maara quiquio quiyaquiri puetunu cuno nequesoreetuneecaacuajijianaa.

# MIISHANO

## “Pueyaso Sohuanu niaacua jiyarosaanutaniya”

**1** Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pahuataquiaarini taa Jesu na poonijosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuaaanu na Queta na quiniuhua. <sup>2</sup> Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. <sup>3</sup> Jesu cusonu nuhuaji, nojuajaari muetaquiaariuhua na saquiriojosano pueyacu. Nojoriicua mueranacujuquiaariiri. Cuarenta juuca nuhuaji tacaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa samini quiya. Nojoritia pocoojuquiaariiri taa Pueyaso jitianutaniya na muera-suni.

<sup>4</sup> Nojoritia na pocoojosacari tamonu juuca, Jesuuri nojori numootequiaari maja ritia nojori quianuhua Jerusalén tiacajiniji. Nojori sequequiaariiri:

—Nia sashirijiaara cua Que cuara niquitioorajaara na Sohuanu nijaniya. Nojuajaari cua sequequiaari na niquitionutaniya nijaniyana, taa cua caminiujuquiaari tari niaaracuajani. <sup>5</sup> Naa sequequiaari nijaniyacuajani: “Tiuquinijona Juanri nia tiuquinijioquiaari moojinia, Pueyaso tojjijara nia jatasacari. Pueyasoori saniniuujia na Sohuanu nioojajinia tiuquinijionutaniya, seetanujuanaa Pueyaso tojjijara nia quiniuria”. Quera niaacua tiuquinutianiyacuajaari. Naaratej, nia sashiri.

### Jesu tacasacariuhua jiyocuaaanu

<sup>6</sup> Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijia jiyatesaanutaniya quiarijia Israel pueyara, maninia pa quiniuhua tama pa jiyaniijiatajaaja, taa pa supuetanaa quiquiaaricuaani?

<sup>7</sup> Jesuuri nojori riucaaree:

—Nio cutaraari maja nia niishishocoriquiano, taacari Israel pueya jiyaniijia cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. <sup>8</sup> Naajaa, niaari Pueyaso cumaaca masenutaniyacuaja, Pueyaso Sohuanu jaara nioojajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaanio, Samaria jiyajinia-

juhuaj. Naa pohuataasaanutaniyajaariuhua puetunu jiyacajiniajanaa, socua tucuaaanu jiya puequeetujiniano.

<sup>9</sup> Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniucuaaji nojuaja.

<sup>10</sup> Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nju-atuquiaari. Nojori toqueeri jiyanohua cohuaque quiriqiaa. Nojoriiri jiyocuaaanujinio Pueyaso seya quiquiaari. <sup>11</sup> Nojoriiri Jesu pueya sequeree:

—Galilea jiyajinijinio pueyanaa, ¿casaara nia mautaa jiyocuaaanuni? Taa nia niquirii tacaanocuajani, niaari naa na niquiniutianiya tacatehuanohuahuhaj.

<sup>12</sup> Nojoriiri jiyacari Olivo nacuhua tuhananuucua quiriqiaa. Pueyaso seya nuhuaji, Jesu pueyari Jerusalén tiacajinohua tacatequiaari. Cuniqiji, cateca naataja quiquiaari Jerusalén tiaca. Moisés Naajiotasanojiniji, Judiocuaacari naa rootasaaquiaari maja socua tucuaaanu nojori rucuanenura samaatenu juuca. <sup>13</sup> Nojori tiuquijiosacari Jerusalén tiacajinia, nojoriiri nojori quijia tijinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucuajani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricuajani. Quiquiaarijiaariuhua Simón, cante tari quiquiaari Romano pueya jatanu panijiacuajani. Mariyata quiriqiaari Judas, Santiago tarajanu. <sup>14</sup> Nojoriiri jiyacari pueyaracaanu Pueyaso secojonuuriqiaa tii maajipohuata, mariyata Jesu nu-cua Maríata, Jesu tapueyocuaatanio.

### Pueya saquiriojosacari Matías Judas niti

<sup>15</sup> Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriqiaa puetunujuanaa. Naa nojori sequereeri:

<sup>16</sup> —Cua tapueyocuaanaa, Pueyaso Sohuanu sequesanoori maja na naata naajaa tajiniu. Seetanujuanaa tari tohuateerucuaari Judasjiniji na pohuatanishano pa supuetanaa jiyaniijia David. Naacuajitij, Judasri Jesu monaarano niishitiquianu tee Jesu quiriqiaani, nojori na quietenura. Judasri cunora niquitiosaacanu cumaneeca, naa nojori na niishitiniucua Jesu quiasaanura.

<sup>17</sup> Nojuacuajaari parta Jesu saquiriojosano pueyano quiquiaarijuhuaj. Nojuajaari mariyata Jesu ji-

yaramiquishano quiriquiaa juhua pajaniyajuhua. <sup>18</sup> Tamonu cuhuariquiaari masesaacanu sesa na miishano samitia. Na nuhuaji, tama cusoyareejaarijia. Jiyocua-caanuji tiqianu na nacaraari. Na saracaari cocuaretasee. <sup>19</sup> Jerusalén tiacajinia quiniaa jaara na ni-ishi-quianu, nojoriiri cuno cuhuariquia sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. <sup>20</sup> Judasjinijiri naa naajiotasaaquiaarijuhua tariucuacaanu supuetana David jaaquequejojuajinia. Naa sequeyari: “Na quiquio cuaara quiiria shaaco. Cuaara quiiria sanaaca, camaruuju”.

Sequeyajaariuhua:

“Tamonu pueyano cuaara jiyatesaaria na poonijiosano miiriquiano na niti”.

<sup>21</sup> Cuarta Jesu saquiriojosano pueyanaa, niya quiyacuaja pueya, canapuetucuaaja pa tarajaquiaarini pueyaracaanu pa Jiyaniijia Jesu quishacari pata. <sup>22</sup> Nojoriiri Juan niquiquiaarijuhua Jesu tiuquiniyano moojinia, Jesu tacasacarihua jiyocuaacaanunio. Canapuetucuaaja puetunu nio niquiquiaarijianaani, niquiriyatu nojorijiniijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuata-narajuhua.

<sup>23</sup> Naaratej, pueyari caapiqui pueya saquiriojoquiaari. Cuniqui quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhua, Matías. <sup>24</sup> Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijiajanaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. <sup>25</sup> Judasri quia niquitiosano poonijosanojiniji catecanu sesa na miini-uucua, naquiya miishaqui na quianura, sesa miijia na quiniuucua.

<sup>26</sup> Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhua. Naacuajitij Jesu saquiriojosano pueyari juhua juhuanoraja quiquiaariuhua doce.

### Pueyaso Sohuanu tiuquishacari

**2** Pentecostés juuca jaara quiquiaari, puetunu Jesu-ucua tiuuniaajanaari rerejono quiquiaari tamonu tiajinia Jerusalén tiacajinia. <sup>2</sup> Canashiyaquiji, paratuuri tojishaaquiaari jiyocuaaanuji, juhua paratu pocuaano jiyanoohua cojuata! Jiyanoohua tojishaareeri cuno tiajinia tee Jesu pueya cajitiuriquiaacuajani. <sup>3</sup> Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. <sup>4</sup> Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacate-cara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

<sup>5</sup> Cuno quishacari, queraatia Judiocuaca puetunu jiy-acajiniijiojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia querana-cunuuriquiaa Pentecostés juuca. Nojoriiri Pueyaso tojitiajaca quiquiaari. <sup>6</sup> Nojori tojishacari cuno coju-atunenu, nojoriiri cuqueree tee Jesu pueya pocooriquiaa tamaatia rupaacuajani. Nojori tojishacari naatej, nojoriiri jiyanoohua cushitiirii. Naatej, puetunu rucoonaajanaari tama na jiyajiniijinio rupaa-cajaaja tojitiariquiaa, cuno pojori pocooacari. Nojoriiri maja na niishiniu quiquiaari casaara naa nojori miiriini. <sup>7</sup> Nojoriiri jiyanoohua jiuujiatecoree. Tama sequetooree-jaarijia:

—Juhuej! ¿Cuno pojoriti maja Galilea jiyajiniijinio pueyacuaja naa pocoyaniquitij? <sup>8</sup> ¿Taa nojori pocuaa puetunu coteenu pa rupaacajanaani? Pajaniyacuaajaari queraatia tamaatia jiyacajiniijinioni, puetunu tamaatia rupaaca pocuajacajanaa.

<sup>9</sup> Seetanujanaari. Cuno pojoriiri Partiya jiyajiniijinio nijiono quiquiaari, Media jiyajiniijinio, Elam jiyajiniijinio, Mesopotamia jiyajiniijinio, Judea jiyajiniijinio, Capadocia jiyajiniijinio, Ponto jiyajiniijinio, Asia jiyajiniijinionio.

<sup>10</sup> Quiquiaarijaariuhua Frigia jiyajiniijinio, Panfilia jiyajiniijinio, Egipto jiyajiniijinio, África jiyajiniijinionio. Cuno Africa jiyajiniijinio pueyari quera Cirene tiaca shuriucuaaji quiquiaari. Roma tiacajiniijinio pueyari tii quiquiaarijuhua, canapute Jerusalén tiacajinia pacu-naa quiquiaaricuajani. Puetunu cuno pojorijianaari Judiocuaca quiquiaari. Noojiaqueyari rasaaquiaari Judiocuacajanaa. Tamasacaari na cararaatiuquia co mi-atejosaaquiaari Judiocuacara na quiniuria, Pueyaso tojijiacara nojori quiniu panishacari. <sup>11</sup> Creta jiyajiniijinio pueyari tii quiriquiaajuhua, Arabia jiyajiniijinionio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetooriaari:

—¿Taateni? [Puetunu pajaniyajanaari cuno Galilea pueya tojitiaani Pueyaso cutara miishano pohuataano, tama pa coteenu rupaajiniajaaja!

<sup>12</sup> Puetunu nojorijianaari jiuujiatecariquiaa nojori jiyajenuta. Tama nojorijiaarijia nequesoreetooquiaari nojori tacaaniutia:

—¿Casaa na miitiuyajaanonjoni?

<sup>13</sup> Tamasaca nojorijiniijinioori saaja Jesu pueya macaatirii. Tama nojorijiaarijia tama sequetooree-jaacujua:

—Cuno pojoriqui mashaasequenuya shocuanacuhu-ata.

### Pedro pohuatasano pueya niqiuara

<sup>14</sup> Jiyacaritij, Pedroori juhuacatecara pocuaree cuno pojori niqiuara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya nijaniyani. Puetunu Jerusalén tiacajinia quiniaajanaa cuaara niishiiria cua pohuatasano. <sup>15</sup> Niaari canaa jiyaniya mashaasequenuyano. Pananu-

cuajaari shusha taqueejiya. Maja canaa mashaase-quenuunu. <sup>16</sup> Niaari canaa tojitiaa tamaatia rupaaca pocuaano. Niocuajaari tariucuacaanu Pueyaso sequesano caminiujiunia Joel pohuatasano. Cuno niaa na niquiyani, cunocuajaari na sequesano, shusha tohuatayani. Nojuajaari naa sequequiaaritij:

<sup>17</sup> “Pueyasoori naa sequeyaquij: ‘Quera jiya puequesacari, janiyari cua Sohuanu niqutionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacojorinio. Cua Sohuanuuri cua niishishano niqitiniutianiya mashiquiori juhua na maquenujinia. Cua niishishano niishitiojonutaniya saaquiapue na maquenujiniajaariuhuj. <sup>18</sup> Cuno quishacari, janiyacua cua Sohuanu niqutiore puetunu cua tojtianaajanaani, canuu, maajipohuanio. Nojoriiri janiyajiniji pohuatanutaniya pueya niquiara. <sup>19</sup> Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuj, pueya na numootenura. Nanacaari niquishaanutaniya, mani, jiyanhua najacanio. <sup>20</sup> Pananuuri ninishiquiria quiniutianiya. Racaari juhua nanacara quiniutianiya-juhuj. Naa coteenutaniyari jiya puequenura. Na nuhuaji, Jiyaniijajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutiani-yari, puereetajuhuj. Jiyanhua shanhua quiniutiani-yari na rosesacari. <sup>21</sup> Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria”.

‘Supuetana Joelri naa naajiotaquiaari Pueyaso sequesano tarijiatej. <sup>22</sup> Naaratej, socua cua tojitiare cuarta Israel pueyanaa. Jesujiniji nia pohuatanutaniyanijia, Nazaret tiacajinijinio pueyano. Pueyasocuaajaari pa niishitiquiaari, Jesuuri na jiyarosano pueyano quiquiaari. Naacuajitij, Pueyasoori na poonitijioquiaari pa niquiara jiyanhua jiyajeneta casaa na miiniuria. Paacuajaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajaniyacuaajaari maninia niishiya puetunu maninia na miishanojuanaa. <sup>23</sup> Saniniuujia, Jesu jaara niqitiosaarucuaa niajanija, niaari na quiarucuaa juhua sesa miiijia. Na nuhuaji, niaari Pueyaso tojiyashijia pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocuaajaari niishiquiaari naa mosaanutani-yari Jesu. <sup>24</sup> Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura.

<sup>25</sup> Pueyaso Sohuanu jaara pohuatequiaari pa supuetanaa jiyaniijia David, nojuajaari juhuacarijia naa pohuataquiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. <sup>26</sup> Naaratej, coojaari timirii. Cua niti taquiriocraterecua shuquiriniutianijia.

<sup>27</sup> Naajuhuj, cua cusosacari, cua queteeri juhuajaniya

quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miiijaja cua quishacari quia niquiara. <sup>28</sup> Quiaari cua niishitiojoree maninia cua miiniuria, pueyaracaanu quijiaara cua quiniuria. Quiaari jiyanhua cua shuquiriniutianiya quiata cua quishacari pueyaracaanu”.

<sup>29</sup> ‘Cua pueyanaa, paacuajaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. <sup>30</sup> Nojuajaari niishiquiaari Pueyasoori tari na sequesquiaaricuaaja:

“Davidnaa, tamonu pueyanoori supuenutaniya quia-janiyajiniji, jiyanhua quia nuhuaji. Cuno pueyanoori Jiyaniijiaara cua jiyatesano quiniutianiya quia niti. Nojuajaari cua jiyarosocoriquiano Cristo. Seetanujuanaa naa quiniutianiari Davidnaa. Maja cua sapojonu”.

‘Pueyanaa, paacuajaari niishiyani Davidri Pueyaso sequesano caminiujiunia quiquiaari. <sup>31</sup> Naacuajitij, Davidri Cristojiniji pohuatariquiaa jiyanhua tariucua-caanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutiani-yari”. <sup>32</sup> Pueyasoori nio Jesu samiitianiriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. <sup>33</sup> Cutara na cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequesquiaari tarijiacuajani. Jesuuri saniniuujia quiarijia canaa na niqutioree. Naaratej, niaari canaa niquirii tamaatia rupaaca pocuaano. <sup>34</sup> Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari:

<sup>35</sup> ‘Cua miaquetajara quia cajishijiaara, janiya cuara quia paraa shocotarejaatijia”.

<sup>36</sup> Cunora, puetunu niajanijajanaa Israel pueyanaa, niaa cumaati niishiya, Pueyasocuaajaari nio Jesu jiyatecanu Jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanuunu pueyanaa.

<sup>37</sup> Pueya tojishacari naa Pedro pohuatasanojetej, nojoriiri tetecatquiaari. Pueyari saniniuujia Pedro nequesotaquiaari, na cojiniaanio:

—Canaa pueyanaa, ¿taa canaa miiniutianiyarinijia?

<sup>38</sup> Pedroori nojori riucuaquiaari:

—Nioojia nia tacatore sesa nia miiniujiniji. Niajanija cuara moojinia tiuquinijiosaaria Jesucristoocua nia tiushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu. <sup>39</sup> Pueyaso sequesacari nojuaja na Sohuanu niqutionutaniya pueya, cunoori niaaranocuaaja, nia

niquiohwaranonio, tucuacaanu quijiacarajuhuj. Pueyaso Sohuanucuaajaari puetunu pueyajanaa niquitiosaanutaniya, cana pa Jiyaniijia Pueyaso sequeya na muerasura na quiniuriacuajani.

<sup>40</sup> Pedroori jiyacari pueya pahuataree queraatia socua Jesujiniji na niishishano. Jiyanoehua nojori nacasureeri. Naa nojori sequereeri:

—Nioojia nia tacatorohua Pueyasoocua, maja Jesu ruuretajaca nia kojiritiasaanura quejoonu mani quiquojinia.

<sup>41</sup> Pedro pahuatasanoocua tiuuniaari tiuquini-jiosaaquiaari. Cuno juuca, tres mil pueya naasucuaari coteenu Jesu tojtianaa rupuenara quiquiaari. Pueyaso pueyari naa canequiaaritij. <sup>42</sup> Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quiija maninia. Majaari nojori juayonuujutanu quiija. Nojoriiri pueyaracaanu rerejojua neecaruu serotanura Jesu cusunu niishiniuria. Mariyata Pueyaso secojonuujuua pueyaracaanuuri.

### Panitoojuaca Jesu tojtianaa quishacari juhua tapuey- ocucata

<sup>43</sup> Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacujitij, puetunu pueyajanaari puereturiquiaa. Pueyari shiriiquitiarii.

<sup>44</sup> Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niquitiojoquiaari nareja casamiijuniucua pueya.

<sup>45</sup> Tamasacaari na jiiitiasano casami niquitioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niquitioquiaarijuhuaj, casamiijuniucua jiiitianura puetunu nojori panishanojuanaajuhuj. Tamasaca pueyari na cuhuariquia niquitioquiaari nojori jiiitianura na cumaneeca, tamasaca na naacunurajuhuj. <sup>46</sup> Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniaaja nojoriiri rerejojua, neecaruu neecasenura Jiyaniijia Jesu cusunu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujjaraca quiquiaari. Nojoriiri maja tamonu pueya shocotanu panijiaa quiquiaari. <sup>47</sup> Nojoriiri pueyaracaanu Pueyaso maniniuhuaqueetariquiaa nojori shuquiriniutia. Puetunu Jesuucua tiuyashijiaa pueyajanaari nojori paniquiaari. Puetunu juucajanaa, Jiyaniijia Jesuuri nojori canijariquiaa, socua pueya tiuushacari nocua.

### Sesarunocua pueyano jeeacasacari

**3** Tamonu juuca, Pedroori Juanta tacatariquiaa Pueyaso Secojoua tiajinia. Tari quiquiaariiri pananu piriushacari. Nojoriiri jiyacari quiojonu jiiitiquiaari Pueyaso secojonura Secojoua tiajinia. <sup>2</sup> Jiyacaritij, tamonu sesarunocua pueyanoori tii cajitariiquiaa Secojoua tia tohuatayaji. Nojuajaari naa

rasanojuhuanaja quiquiaari. Pueyaracaanu patoojotasaquiaariiri Pueyaso Secojouajiniara, pueya na mashiniquiniuria cumaneeca nojori tiuquitasacari. Na cajitiasaqui tohuataya sesa quiquiaari “Tohuataya Maniniu”. <sup>3</sup> Sesarunocua pueyano jaara niquiquiaari Pedro, Juannio, nojori tiuquitianu panishacari Secojoua tiajinia, nojori maseree juucua na cumaneecaari.

<sup>4</sup> Pedroori Juanta na shootiaree tacuriitia. Jiyacaritij, Pedroori na sequereeri:

—Canaa quia niquiri.

<sup>5</sup> Sesarunocuaari juucua shootiariquiaa nojori. Cumaneeca niquitiosariquiano jiyaniriquiaa juucuaari. <sup>6</sup> Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiiitiasanota quia naacureera quiaritia. Quia sequeya Jesucristo sesajinianijia: “Quia sanere. Quia rucanerejuhuaj”.

<sup>7</sup> Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sari maniniujiaacara quiquijiuhuaj.

<sup>8</sup> Sesarunocuaari juhuacatecara rucanequiaari. Nojoritia tiuquiquiaari Pueyaso Secojoua tiajiniaari. Maninia rucaneriquiaari. Jaacuatariquiaari. Pueyaso maniniuhuaqueetariquiaajaariuhuj. <sup>9</sup> Puetunu pueyajanaari na niquiquiaari rucaneyano, Pueyaso maniniuhuaqueetaanojuhuaj. <sup>10</sup> Puetunu pueyajanaari na niishiquiaari nojuajaari sesarunocuaaja, Secojoua tiajinia tohuataya Maniniujinia cumaneeca mashiniquijiojuatej. Pueyari cunora jiuujiatequiaari. Jiyanoehua shiri-  
quitiquiaariiri.

### Pedro pahuatasacari Pueyaso rupaa pueya niquiara

<sup>11</sup> Sesarunocuaari Pedro juaashiquia carteyaquiaari, Juan juaashiquiano. Nojoriiri Pueyaso Secojouajinia nujuaturiquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. <sup>12</sup> Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocujini? ¿Casaara nia niquitiaa canaani? ¿Niaate jiyaniya cana na niohuaca jeecareeni? Maja cana. Majaari cana cumaacata na jeequenu quirii. Niaa naasucuaari jiyaniya canaari nio miiriini socua maninia miijia cana quiniucua Pueyaso niquiara tamasaca pueyajiniji. [Maja! <sup>13</sup> ]Jesuucuaari na jeeocarohua! Nojuacuajaari na Que Pueyaso jiyatesano Jiyaniijajanaa na quiniuria. Jiyaniijajanaara na jiyatenacuajaari Pueyaso, cante nio pojori pa supuetanaa jiyaniijia quiquiaaricuajani: Abraham Jiyaniijia, Isaac Jiyaniijiano, Jacobo Jiyaniijajuhuj. Tama pa supuetanaa Jiyaniijia Pueyasocuaajaari Neyanu Jesu jiyatequiaari Jiyaniijajanaa na quiniuria. Niaa cutaraari Pueyaso Niyanu niquitocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. <sup>14</sup> Niaa maara maninia pueyanoocuaaji tacucanu saniya cutara, niari

pueyano puecoojuaacua shiriqitiurii saaja Pilato cartenura jiyano sesoriquia pueyano seque. <sup>15</sup> Niaari naa motecanu pueyano samiitianijiacuajatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pohuataani. <sup>16</sup> Nio sesarunocua pueyanoori Jesuucua tiuurii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuajanoj. Jesuucua na tiuushacari, na cuaqueya cumaquiriiri. Na cuaqueyari seetanujuanaa jeequerohua maninia, taa nia niquiyacuajanoj. <sup>17</sup> Cuarta Israel pueyanaa, quiarjia niishiyaniija, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Niaari Pueyaso Jiyarosano mocanu nia niishyaquishacari cante nojuaja quiquianuni. <sup>18</sup> Naacuajitij, Pueyasoori na sequesano tohuatecanu, tarijia na niishitishano na rupaa caminiujiunaa. Seetanujuanaa, puetunu Pueyaso sequesano caminiujiuniaajanaari pa supuetanaa niquiara poojotaquiaari: "Pueyaso Jiyarosanoori naquiya miishaanutaniya". Jesuuri naa miishaacanu taritij. <sup>19</sup> Naaratej, nioojia nia tacaterohua sesa nia miishanojiniji. Pueyasocua nia tacaterohua sesa nia miiniu tuujusaanura. <sup>20</sup> Naacuajitij, pa Jiyaniija Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhara mijiria na jiyarosacariuhua Jesu. Pueyasoori tarijia na sequequiaari pa Jiyaniijara na quiniuria. <sup>21</sup> Nojuajaari jiyocuacaanu quiniutianiya na Que shuriucua, Pueyaso cuara tucuatatarejatijia puetunu tariucuacaanu na pohuatanishanojuanaa na sequenu panishano caminiujiunaa. <sup>22</sup> Moisés cuajaari naa sequequiaari pa supuetanaatej:

"Jiyaniija Pueyasocuaajaari niaacua jiyaronutaniya nojuajiniji pohuatana tama nia niquiohuacuajinio supuenojuaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. <sup>23</sup> Canapuate cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa".

<sup>24</sup> Pueyanaa, puetunu Pueyaso sequesano caminiujiuniaajanaari Moisés nuhuaji naa Jesujiniji pohuatanuquiarijiuhuj. Naacuajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohuatanuquiarijiuhuj.

<sup>25</sup> Puetunu Pueyaso sequesano Jesujinijianaani, cunoori quiarjia pajaniyara, taa Pueyaso pohuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham:

"Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniajanaacuajani".

<sup>26</sup> Pueyaso jaara na tojjia Nyanu samiitianiquianu, coo-teenu na jiyaroree pocuaari poojia tacatoriquiano,

sesa pa miiniu pa cartenura, shuquiriaatia quijara pa quiniuria.

Pedroori naa pohuataquiaari pueya niquiaratej.

#### Judiocuaca camarucua nequesoreesacari Pedro, Juanio

<sup>4</sup> Pedro pohuatasacarijia pueya niquiara, nocua niojioquiaariiri pueyacuara secojonaa, Pueyaso Secojua tia cojuanaata, Saduceocuatano. <sup>2</sup> Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari saneecuatumutaniuhua na jamacajiniji, naatej taa Jesu samiitiarohuacuaani. Cuno jiyaniijanucua jaara naa tojiquiaari sequeshyanotej, nocuaji jiyanohua juaaquoquiaariiri, na ruuretasacari Pedro sequesano. <sup>3</sup> Cuno juaaquojanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. <sup>4</sup> Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiuuniaa quiquiaari. Maajipohuari serojosoo quiquiaari.

<sup>5</sup> Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatano. Nojoriiri Jerusalén tiacajinia rerejoquiaari Jesujiniji pohuataanaa nojori nequesoreenura. <sup>6</sup> Anásri tii quiriqiaajuhuj. Nojuajaari pueyacuara secojonaa jiyaniija quiquiaari. Caifásri tii quiriqiaajuhuj, tamonu Juannio, Alejandronio, mariyata puetunu secojonaa jiyaniija tapueyocuaanio. <sup>7</sup> Pedro, Juannio, nojoriiri nujuatejojuajiniji tohuatejosaaquiaari. Nujuatejosaaaree jiyaniijanucua tajiniaari. Pedro shocua, Juan shocua cajitiuniaari nojori nequesoreere:

—¿Taa nia miiriucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miiniuriani?

<sup>8</sup> Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitiajata na pocuanura. Naacuajitij, Pedroori naa nojori riucuaquiaari:

<sup>9</sup> —Canaa camarucuaanaa, nia pohuatareera sesarunocujiniji, taa na jeequerohuacuaani. <sup>10</sup> Niaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniuriajuhuaj. Nio pueyano niya nujuajani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanuhua macujiniji, pueyaracaanu na quiniuhara. <sup>11</sup> Niajanijari juhua saitia tiajonaa Pueyasora. Nia tiasacari, niaari maniniujiajau saajia jataquiaari, nia jiyaniishacari sesarujajau naasucua. Na camaruuri saniniujia sequeya:

"Cuno nia jatasano saajiani, cunoori saniya cua maniniujiajau saajia".

Niaari naa Jesu jataquiaari juhua saajia sesarujajau. Naajaa, Pueyasoori na niaquiaariuhua socua maniniushiqui. <sup>12</sup> Majaari tamonu quiniu pocuaji tacu-

na. Puetunu pueya tajinijiniojuanaani, maja Pueyaso tamonu pueyano sesa jiyaniquiniu quiquiaari cante pocuaji tacuriquianoni. Saaja Jesu cutaraari seque-saaquiaari pocuaji tacuriquianora.

<sup>13</sup> Judiocuaca camarucuaari jiyanohera na namijiaa ri-unitiquioquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojori Pedro, Juan niishiquiaari nojori seetanujuanaa maja puera naajionuujuaca quiquiaari. Nareja poonijionuujuaca pueyajinijinio quiquiaari. Naa nojori niishishacaritij, nojori seetanujuanaa niishirii nojori Jesu cojiniaa quiquiaari. <sup>14</sup> Sesarunocua jeequenohuari cuniqui nojori shuriucua nujuariquiaa-jaacuhuj. Naaratej, jiyaniijianucuaari socua sanaajetaquiaari. Saaja niishiriojonuuriquiaari. <sup>15</sup> Camarucuaari Pedro, Juan tohuatanijioquiaari tamocora nojori tajiniji. Jiyareta camarucuaari tama pocoojoquiaariiaaja. <sup>16</sup> Naa sequetiquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jeeCASOO. Nojoricuaajaari tari maninia na niishitiyu.

<sup>17</sup> Nio pojori pa piriyojore juhuaari, maja socua quiarijia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

<sup>18</sup> Camarucuaari socua piiquiaariuhua Pedro, Juanio. Nojori nacasuree jiyanohera, maja socua quenaaja nojori pohuatanura Jesujiniji pueya niquiara.

<sup>19</sup> Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequeyani jiyaniijianucuaana? <sup>20</sup> Maja cutaraari canaa naata tarinitianu pohuatanu canaa niquishano, canaa tojishanonio.

<sup>21</sup> Camarucuaari nojori piriyojoquiaari juucuohuj. Puetunu pueyajanaari saaja maniniuhuaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. <sup>22</sup> Pedro jeeCASANOhua sesarunocua pueyanoni, nojuajaari cuarenta marijia shocotejoquiaari tari na quishacari.

### Jesu pueya secojosacari Pueyaso, na cumaquiniuria nojori

<sup>23</sup> Pedro, Juan jaara cartesaaquiaari, nojori narta Pueyaso pueyacu quiojoquiaariuhua. Nojori pohu-atatureeri Judiocuaca camarucua sequesano nojori, camarucua nacasuna sequesanojuhuj. <sup>24</sup> Na tojishacari camarucua piriyojosano, puetunu nojori-jianaari Pueyaso secojonu coteequiaari. Naa sequetiquiaariiri:

—Canaa Jiyaniijianaa, quiaari jiya cajiniocua shipinini, jiyano. Shoniacu caminiaari quia shipinishano. Quiaari jiyanohera maninia. <sup>25</sup> Canaa supuetanaa jiyani-jia Davidri quia seru quiquiaari. Naacuajitij, quia Sohuanuuri na pohuatequiaari quia sequesano Jesujiniji

juhua tariucua miishano. Quiaari naa na pohuate-quiaaritij:

“¿Casaara jiyacu quiniaa pueya juayani? Pueyari najuhuaana sesa niishiriojoriquiaa juucua. <sup>26</sup> Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueyasooacara rojotooree, na jiyarosano Cristooacuaranio”.

<sup>27</sup> 'Pueyasonaa, naacuaaquinatejaj. Jiyaniijia Herodes, Poncio Pilatonio, nojori nio tiacajinia rere-jocanu narta taucacata, Israel pueyatano. Quia Niyanuucua rojotoocanuuri, tama quia Jiyarosanoocuarajaaja. <sup>28</sup> Naa nojori miiniucuatej, nio pueyari tari quia miini panishano miiriucuaa, taa quia sequequiaari tariucuaanucuaari: “Cua Niyanu cuara mosaaria puetunu pueyacuarajanaa”. <sup>29</sup> Canaa Pueyasonaa, quia tojishuriucuaraj. Nojori quiarijia canaa miananojiya saniniujia. Canacuajaari quia seyani. Canaa jiuujia quia cumaquiri quiarijia, canaa pohuatanura socua quia rupaa canaa puereyaquiniutia. <sup>30</sup> Cusosuhua cuara naatanijiosaaria quia cumaacata. Canaa jiyaniquishacari quia Niyanu sesa, jiyajenta casaa cuara miijiosaaria quia cumaacata pueya niquishocoriquiano. Nojuacuajaari saa maninija.

<sup>31</sup> Nojori puecasacari secojonu, nojori quishaqui tiari canashiyaquiji jiuuquiutiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohuataquiaari Pueyaso rupaa pueya niquiara. Majaari na pueretunu quiquiaari.

### Jamueyashijia Jesu tojtianaa quishacari

<sup>32</sup> Jesuucua tiuuniaari maninia juhua rupuetootesano quiquiaari puetunujuanaa. Nojori juhua seetanujanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniujia puetunu narta Jesuucua tiuuniaarajanaa quiquiaarijuhuj. <sup>33</sup> Jesu saquiriojosano pueyari Jesu samiitanujiniji poojotaquiaari jiyanohera cumaacata. Naajuhuj, Pueyasoori puetunu Jesuucua tiuuniaajanaa naacuriquiaa jiyanohera, shuquiriaatia nojori quiniuria. <sup>34</sup> Puetunu Pueyaso pueyajanaari na panishano jiiitiaquiaari puetunujuanaa. Nojori jiiinijinio jaara cuhuariquia jiiitaquiaari, tiano, nojori nio niquitioquiaari cumaneecara. <sup>35</sup> Jaara cumaneeca masequiaari na casaa sami, nojori nareja na niquitioquiaari Jesu saquiriojosano pueya. Nojori saniniujia casamiijiu Pueyaso pueya na serotaquiaari, nojori jiiitanura na panishanojuhuj. <sup>36</sup> Nojori jiiinijinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Nioori sequeya “Cumanijiana”. Chipre jiyajinia na raja. <sup>37</sup> Bernabeeri cuhuariquia jiiitiaquiaari. Na cuhuariquia niquitioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niquitioquiaari Jesu jiyaramiquishano pueya, casamiijiu narta Pueyaso pueya niquitiojosaanura saniniujia.



### Ananías, Safira sesa miishanojiniji pohuatasano

**5** Tamonu pueyanoori quiquiaari. Na sesaari Ananías quiija. Necocua sesa quiquiaari Safira. Nojoriiri na cuhuariquia niquitioquiaari cumaneecarajuhuj. <sup>2</sup> Ananíasri na cuhuariquia samijiniji quey-ataquiaari nera. Na cureeno pataquiaari Jesu saquiriojosano pueyacuaari. Juhua papatasoo niquitioquiaari na sapojonutaari. Necocuaari na miishano ni-ishi-quiiaarijuhuaj. Majaari neyacata na quiniu quiriquiaa Ananías niquitiosacari nareja na cumaneeca. <sup>3</sup> Ananías niquitiosacari na cumaneeca, Pedroori na sequere:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuanii? [Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! [Quiaacuajaari tiji queyataree! <sup>4</sup> Quia cuhuariquia quia niquitioyaquishacariija cumaneecara, cuno cuhuariquiaari quia casaa quiri-quiiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiri-quiiaajuhuj. ¿Casaara naa sesa quia niishiriojoreerini? Naa sacuaaraatia quia miishacariitij, majaari quia sapojonu quirii parta pueyano. [Quiaa cutaraari Pueyaso sapojoree juucua!

<sup>5</sup> Ananías tojishacari naa Pedro sequesantej, [macuuri pojoquee! Puetunu pueyajanaa jaara tojinuuquiaari nocuaji, jiyano- hua shiriitiquitiquiaariiri. <sup>6</sup> Mashiquioriiri na jiunio- coquiaari toquejinia. Na nuhuaji, na patuquiaari na jamonuraari.

<sup>7</sup> Jiuujianaraca hora nuhuaji, necocuaari juhuajaniya tiuqui- quiaari Pedroocujuhuj. <sup>8</sup> Pedroori na nequesotaree:

—Cua sequere, ¿niojuanaate nia cuhuariquia sami quiriucuaa?

Na riucuaareeri:

—Jaa, niojuanaacuaaquinatejaj.

<sup>9</sup> Pedroori na sequere:

—¿Casaara naa nia roojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquiijiohua. Nojoriiri quiarijia quia panutaniyajuhuj.

<sup>10</sup> Jiyacaritij, maajiiri macu pojoquee Pedro shuricuajuhuj. Mashiquiori tiuquiijosacariuhua, nojoriiri Safira niquishuhua pojianojuhuaj, tariucua macu. Nojoriiri na patuquiaarijuhuaj. Neyaca shuricua na jamotuquiaariiri. <sup>11</sup> Puetunu Pueyaso pueyajanaa, tamasa pueyano, nojori jaara tojinuuquiaari puetunu nio miishanojinijianaa, jiyano- hua puere- tuquiaariiri.

### Queraatia miijosacari Pueyaso cumacata pueya niquiara

<sup>12</sup> Jesu jiyaramiquishano pueyari jiyano- hua cutara casaa miijioquiaari Pueyaso cumacata. Queraatia pueya naatanijioquiaariiri. Puetunu Pueyaso pueya-

janaari pueyaracaanu rerejoquiaari pueya jiyaniquis- hano tariucuaaanu jiyaniija Salomón canujuucojojuajinia, Pueyaso Secojojuajia. <sup>13</sup> Tamasaca pueyari nojori puerequiaari. Majaari nojori rupesaanu quiija. Na puere- tujuacaari nojoriijiniji sequetujua:

—Cuno pojoriiri maninia pueya.

<sup>14</sup> Queraatia pueyari Jiyaniija Pueyasoocua tiu- quiaari, canuu, maajipohuanio. <sup>15</sup> Naajuhuj, cusu- suhuari patootasaaquiaari na maquetucujinia nuu- jiniara. Pueyari naa niishiriojoquiaari, Pedro jaara cusosuhua shuriuquioco tajimia, cusosuhuari naata- conutaniuhua Pedro naaqui jaara nojori caco netema. <sup>16</sup> Queraatia Jerusalén tiaca shocua quiniaa pueyari na cusosuhua patoota- quiaarijuhuaj, Jerusalén tiaca- jiniara. Samaruhua sesosano pueyari jaatu- cunuusaaquiaarijuhuaj. Puetunu pueyajanaari naatanijosaaquiaari.

### Pedro, Juan nujuatejosacari nujuatejojuajinia

<sup>17</sup> Naaratej, pueyacuara secojonaa jiyaniija, nata quiniaa narta Saduceocua- canio, nojoriiri juaa- quio- quiaari shocotasano nojori quishacari. <sup>18</sup> Secojonaa jiyaniijaari na pueya jiyaroquiaari Jesu jiyaramiquis- hano pueya nojori quioonura. Jaara na quiootuquiaari, nujuatejosaaquiaariiri Judiocuaca nujuatejojuajinia. <sup>19</sup> Pueyaso seruuri niucua jiyocua- aanuji nojoriicua rosequiaari. Nujuatejojuajia tohuateya riataseeri. Na tohuatejosacari Pedro, Juannio, nojori sequereeri:

<sup>20</sup> —Juhujaniya nia quiaarohua. Pueyaso Secojojuajia puetunu Jesujiniijianaa nia pohuatate pueya niquiara. Nia pohuatatejuhuaj taa jatanishano pueya nia quia quiarijiani.

<sup>21</sup> Nojoriiri Pueyaso seru sequesano tojiquiaari. Nojoriiri tariquicuaji quiojoquiaari Pueyaso Secojojuajia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijaari na- ta quiniaata saniniuujia quiojoquiaari pueya nequesoreesaqui. Puetunu Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijianaa jaara tari rerejoquiaari, na pueya sequequiaariiri nojori tohuate- jonura Jesu jiyaramiquishano pueya nujuatejojuajiniji, nequesoreesocoriquiano. <sup>22</sup> Na pueya jaara tiuquiti- aquiaari nujuatejojuajinia, majaari nujuatejosano na riuriatatanu quishii nujuatejojuajinia. Nojoriiri tacare- tacuhua na shaacanu nuhuaji. <sup>23</sup> Naa pohuatanu- usuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishiquionucua na riuriataseeni. Tii cojuanaari maninia cojuariquiaa na tiotiu. Canaa ri- atasacari tohuateya, [shaacoori quiriquiaa!

<sup>24</sup> Secojojuajia tia cojuanaa camarnu, mariyata puey- acuara secojonaa jiyaniijanucuaari tama seque- tooquiaariijaaja nojori shiri- quiniutia:

—¿Taateerini? ¿Taariquitijia socua na nuhuaji quiniu- tianiyatej?

<sup>25</sup> Jiyacaritij, tamonu pueyanoori camarucuaacua tiuquishii. Naa nojori sequesereeri:

—[Noo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojojuajiajinia!

<sup>26</sup> Tari nojori niishishacari tee Jesu jiyaramiquishano pueya quiriquiaani, Secojojuajia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojojuajia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuurijia. Nojoriiri cunopuerequiaari. Nocuaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. <sup>27</sup> Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrincuaca tajiniatuhuj. Pueyacuara secojonaa jiyaniijiaari nojori sequequiaari:

<sup>28</sup> —[Majaquiiri nia niishiniu tojiniu! Canacuajaari tari nia tenujucanu juucuanu maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, [puetunu Jerusalén tiacajinia quiniaajanaari canacua tiutianutaniya Jesu mosaanu! Canaa seque-tunutaniyari: “Cuno pojoriiri Jesu motucanu”.

<sup>29</sup> Pedroori narta Jesu saquiriojosano pueyata nojori riucuaquiaari:

—Seetanujanaari, pueya cuara Pueyaso sequesano miiria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyaniijanucua sequesano cuara miishaaria. <sup>30</sup> Pueyasoori tariucuaaanu pa supuetanaa Jiyaniijia quiquiaarijuhuaj. Cuno Pueyasojanaacua-jaari niyacutesanojinia nia cusojuasano samiitianiquianuhua. <sup>31</sup> Pueyasoori na tacaniquianu jiyocuaaanu. Na miaquetajara na cajitiquianuuri Jiyaniijiajanaa na quiniucua, pocuaji Tacuna na quiniucua-juhuaj. Naa miiquianuuri Israel pueya tacatonuhuaa noojia Pueyasocua, Pueyaso jiyanooniuria pajaniya sesa pa miishanojiniji. <sup>32</sup> Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa niishitiojoquiaa maninia canaa pohuatanura pueya niquiara. Pueyasocuajaari na tojtianaa niquitioquiaa na Sohuanu.

<sup>33</sup> Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. <sup>34</sup> Jiyacaritij, tamonu pueyanoori narta camarucua tajiniji nujuajiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuaaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojojuajia tiamonua camarnu sequequiaari Jesu jiyaramiquishano pueya na tohuatanijonura rupaquijia. <sup>35</sup> Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. <sup>36</sup> ¿Majateeri nia niishiniu taa Teudas miiquiaari quiari naatajani? Noju-

jaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. <sup>37</sup> Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niaquejoquiaariuhujuhuj. <sup>38</sup> Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaaja quiri, shaa-jenutaniyari. <sup>39</sup> Saniniuurijia, nojori miishano jaara seetanujanaa Pueyasojiniji quiri, majaari nia naata nojori tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetojonuruhua, naa nojori nia miishacaritij.

<sup>40</sup> Puetunu camarucujanaari Gamaliel sequesano tojiquiaari. Na nuhuaji, Jesu jiyaramiquishano pueyari tiuquinitiasaahua. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesaaquiaariuhua. <sup>41</sup> Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji.

<sup>42</sup> Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucujanaa, Pueyaso Secojojuajiajinia, mariyata puetunu Jerusalén tiacajiniaqueyajanaanio.

### Mashiquiopue mianuutenaara saquiriojosacari

**6** Jiyacaritij, Jesuucua tiuunaa pueyari socua canequiaari. Puetunu nio pojorijinijiojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquioquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioy-aquiquiaa miaquesanonijia?

<sup>2</sup> Nocuaji, Jesu jiyaramiquishano doce pueyari puetunu Jesuucua tiuunaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. <sup>3</sup> Cuno-ra canaa tapueyocuaanaa, tama niajanijinijinio nia saquiriojore siete maninia miijiaa pueya, niishijiaa, Pueyaso Sohuanuraca cutara. Nojori nia seeratare nio poonijiosano, maninia nojori mianuutenura pa mashiquiopue. <sup>4</sup> Canacua saniniuurijia saa Pueyaso

secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

<sup>5</sup> Puetunu pueyajanaari na shuquiriniutia naa riu-cuaquiaari:

—Taaquiriirinij, naacuaaquinateja maniniajaj.

Jiyacaritij, pueyari Esteban saquiriojoquiaari. Nojuajaari jiyanoehua Pueyasooeua tiuujia pueyano quiquiaari. Nojuajaari Pueyaso Sohuano cumaacaraca quiquiaarijihuaj. Nio pojoriiri Estebanta saquiriojosaaquiaarijihuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquiya tiacajinijinio. Tii rasaaniaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. <sup>6</sup> Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacu. Jesu saquiriojosano pueyari cuno siete canuu nacaacua niaquiaari na juaashiquiaca. Pueyaso secojoturee nojoriicuaaraari Pueyaso Sohuano cumaquiniuria nojori, miaquesano niqutiojonaa nojori quiniuria.

<sup>7</sup> Jiyacariti Pueyaso rupaari socua tojishano quiquiaari. Jesuucua tiunuaari socua canequiaarijihuaj. Queraatia Judiocuacaacua secojonaa pueyari Jesuucua tiuuquiaarijihuaj.

### Jesu ruuretajaca quiasacari Esteban

<sup>8</sup> Estebanri Pueyaso cumaacaraca quiquiaari jiyanoehua. Pueyasoori maninia na jiitiaquiaari. Naacuajitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pahuatasanoori seetanujuanaa Pueyasojiniji quiquiaari, nojori niquishacari jiyajeneta na miishano Pueyaso cumaacata. <sup>9</sup> Jiyacariti, tamasaca Judiocuacaari Jerusalén tiacajinia quiriquiaa. Nojori maanuuri sesojosaaquiaari “Quioosanojiniji cartequesano pueya”. Quiquiaarijiaariuhua Cirene tiacajinijinio pueya, Alejandría tiacajinijinio pueya, Cilicia jiyajinijinio pueyajuhuj, Asia jiyajinijinio pueyano. Puetunu nojorijianaari Estebancua rerejoquiaari nata juayonuutana. <sup>10</sup> Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuano niishitiojosanota saa maninia pahuataquiaarijia nojori niquiara. <sup>11</sup> Maja socua nojori rejeretasacari Esteban pahuatasano, nojoriiri tamasaca pueya niqutioquiaari cumaneeca, najuhua nojori cuaracashiniuria camarucua niquiara Estebancua. Cuno pueya, cumaneeca niqutiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—Taaquiriirinij, canaacuaajaari cuno pueyano tojiquianu Moisés sesacaanoni, Pueyaso sesacaanojuhuaj!

<sup>12</sup> Naa nojori sequesacariitij, puetunu pueyajanaari juaaquioree, Judiocuaca camarucujahuaj, Moisés Rootasano niishitiojonaano. Puetunu nojorijianaari Estebancua catecanoquiaari. Na quiatureeri. Na

nuhuaji, na jaatucutuquiaari pueya neque-soreesaquiriaari, Israel pueya camarucua neque-soreesocoriquiano tii nojuaja. <sup>13</sup> Socua pajesaaquiaariiri tamasaca, Estebancua tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojua tia. Moisés Rootasano sesacaariquihuaj. <sup>14</sup> Canaari socua naa na sequesano tojiquiaa-jaaniuhuj: “Nazaret tiacajinijinio Jesuni, nojuajaari Pueyaso Secojua tia niyartanutaniya”. Naajuhuj, tariucuaanu Moisés niishitiojosano pajaniya pa cartetenutaniyaquiaari.

<sup>15</sup> Puetunu camarucujanaari na cajitiushaquiiji niqutiariquiaa Esteban. Nojoriiri na jiquioco niquiquiaari shacantuca, juhua Pueyaso seru jiquioco.

### Esteban pahuatasano

**7** Pueyacuara secojonaa jiyaniijaari Esteban nequesotaquiaari:

—¿Seetanutejanaa taa nio pojori sequerecujani?

<sup>2</sup> Nojuajaari na riucaaree:

—Cua panishano pueyanaa, cua camarucua, cua tojitiare. Pueyasoori jiyanoehua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia. <sup>3</sup> Pueyasoori jiyacari naa na sequequiaari:

“Quia tiujiaare quia jiya, quia pueyano. Niqiji quia quiaare, janiya cuara quia sequerejaatijia, niya quia quishii. Quiocua tii jiyojese cutara”.

<sup>4</sup> Abrahamri Pueyaso sequesano tojiquiaari.

Quiaquiaariiri Caldeo pueya jiyajiniji. Harán tiacajinia quishiiri. Tii shaajaquiaari na shipininoori. Na nuhuaji, niyara pacuquiaariiri, paa tii quiyani. <sup>5</sup> Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja que-naaja jiya na jiitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niquihuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niquihuaju quiquiaari.

<sup>6</sup> Pueyasoori naa pacutequiaari sequenu Abrahamtej:

“Puetunu quia jiniuanucujinio supueno pueyajanaani, nojoriiri na niishishoo pueya jiyajinia quiniutianiya. Cuno jiya pueyari nojori poonijiotenutaniya jiyanoehua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

<sup>7</sup> Pueyasoori Abraham sequerejuhuaj:

“Janiyari saniniujia cuno taucua naminiutianiya quioquajinio supueno pueyacuani. Janiyari nojori sanitionutaniya saniniunijia nojori poonijiotenuucua quioquajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaca quiniutianiya niya”.

<sup>8</sup> Pueyasoori naa Abraham rootaquiaarijihuaj:

“Niocua nia cararaatiuuquia co miatejore. Cunoori juhua naajosano nia cuaqueyajinia quiniutianiya, pueyaracaanu nia niishiniuria cua sequesano nia-janiya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhuj. Pueyasoori Jacobo sesojoquiaari “Israel”. Jacoboori naa miiquiaari necohuari quiquiaari doce canuu. Cuno doce canuu, Jacobo niquiohuani, nojoriiri puetunu pa doce Israel pueyapue supuetanaajanaa.

<sup>9</sup> Pa supuetana Jacobo niquiohuajiniinioni, tamonuri sesojosaaquiaari José. Tapueyocuaacari José juaajiacar quiquiaari jiyanhua, puera na que panishano José quishacari. Majaari nojori niquitiuniu paniniu quijia nojuaja. Na queeri socua jiyanhua José panijia quiquiaari na pueranaajini. Tapueyocuaacari cunora casami niquitiojonaa pueya niquitiojonaari cumaneecara tarajano José. Casami niquitiojonaari José jiyataquiaari Egipto jiyajinia, saniniuuja tii na niquitiosocoriquiano serura. Naajaa, Pueyasoori Joseeta quiriqiaa. <sup>10</sup> Pueyasoori na naacuquiaari naquiya na miishacari. Pueyasoori na jiyatequiaari niishijara. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhuj.

<sup>11</sup> Na nuhuaji, miaajenuuri quiquiaari puetunu Egipto jiyajiniajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacocquiaari na miajajara. Seetanujanaa shaaqui quiquiaariiri nojori miasano. <sup>12</sup> Jiyacaritij, Jacoboori caminiujushaaquiaari: “Egipto jiyajinia quiaquinia trigo”. Naaratej, necohua jiyaroreeri trigo masenura. Jiyacari nojori quiojosacari, cunoori shushajanaa nojori quianu quiquiaari Egipto jiyajinia. Cuno Jacobo niquiohuani, nojoriiri pa supuetanaacuaja. <sup>13</sup> Coteenu nojori masano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaacari sequequiaari: “Janiya nia tarajanuni”. Joseeri Faraón niishitiquiaari tapueyocuaacajuhuj. Naaratej, Faraónri shusha niishitiquiaari tejeno pueyanote José quiquiaarini. <sup>14</sup> Joseeri tapueyocuaacari sequequiaari: “Pa que Jacobo nia riquioo niyara, puetunu necohuatajanaa”. Puetunu nojori-jianaari quiquiaari setenta y cinco pueya. <sup>15</sup> Jacoboori naa pacuquiaari Egipto jiyajiniaratej. Na nuhuaji, saaquianoori tii shaajesequiaari. Necohuari tii puequesequiaarijuhuaj, tariucua saaquiapue. <sup>16</sup> Na nuhuaji, Egipto jiyajini pacusaaquiaariiri nojori nuchua. Siquem tiacajinia niojosaaquiaariiri na supuetana Abraham raaco. Cuno raari cuhuariquia-jinia quijia. Abrahamri cuno cuhuariquia masequiaari tariucuaacanu pueyajini raa na jitianura necocua na nijara jaara cusoyare. Cuno cuhuariquia masequiaari-

iri cumaneecata Hamor niquiohuajini, Siquem tiacajinia.

<sup>17</sup> Pueyasocuaajaari tariucuaacanu Abraham sequequiaari nojuajaari nio jiya na niquitionutaniya. Quera na niquitionu panishacari, Israel pueyari jiyanhua canequiaari Egipto jiyajinia. <sup>18</sup> Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanhua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. <sup>19</sup> Cuno jiyaniijiaari taraatia miiquiaari shusha roosano pa supuetanaa niquiohua. Pa supuetanaa sequequiaariiri shusha roosano cuaara quejoosaaria moojinia. Pa supuetanaari taraatia miiquioquiaari naacuatej. <sup>20</sup> Moisésri jiyacari rasaaquiaari. Pueyasoori na maniniucuaquiaari. Na queyari na jitiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. <sup>21</sup> Faraón niyatuuri na paquiaari saniniuuja. Na canashitiquiaari juhua na mueyari. <sup>22</sup> Egipto pueyari Moisés niishitiojonaari puetunu nojori niishishanojuanaa. Puetunu Moisés sequesanojuanaari jiyanhua tojishano quiquiaari cutara. Puetunu na miishanojuanaari maninia quiquiaarijuhuaj.

<sup>23</sup> Cuarenta marijia jaara shocojoquiaari Moisés, mashaja na quishacarijia, narta Israel pueyacu rucuanenu paniquiaariiri, nojori na niquiniuria. Judiucuaacuaajaari cuno pojori, naa sesojoshiya Israel pueyatani, maja tamonu. <sup>24</sup> Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuuja cuno Egipcio pueyanoori. <sup>25</sup> Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajini. Majaari nojori niishiniu quiquiaari saaja. <sup>26</sup> Moisésri socua tariqui quiaquiaari narta Israel pueya niquiniuuquiohuaj. Nojuajaari saaja riuriatasee tama nojori piyotanojuaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa mitioyaniquitij? ¿Casaara naa nia nootujutoyani?” <sup>27</sup> Cuno narta pueyano piquiriqiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canaatej? ¿Cante quia jiyatecanu canaa nequesoreenarani?” <sup>28</sup> ¿Quiaateeri cua monu panijajuhuj, naatej taa quia morucua cuno Egipto pueyanocuaani?” <sup>29</sup> Moisés tojishacari naa cuno pueyano sequesanootej, ritia mashiquiaari Egipto jiyajiniiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

<sup>30</sup> Cuniqi na quishacari, na shocojoquiaariiri cuarenta marijia socua. Tamonu juuca, Moisésri rucuaneriquiaa cariquia jiyajinia, pueya sesojosano Sinaí tuhananu shuriucua. Pueyaso seruuri tii nocua muetaquiaari nequeru casaja noshiyanojini. <sup>31</sup> Moisés niquishacari mani noshiyano, nojuajaari shiri-

iquiquiaari. Jaara nocua catecanoquiaari na niquiniuria maninia, saaja Jiyaniijia Pueyaso tojirii manijiniji pocuaanoori. <sup>32</sup> Pueyasoori naa na sequequiaaritiij:

“Janiyacuajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuj, Jacobo Jiyaniijiano”.

Moisés jaara naa tojiquiaaritiij, tetecareeri. Majaari mani noshiyano na niquiniu paniniu quiquiaari na puerenuta. <sup>33</sup> Pueyasoori na sequequiaari:

“Cuniquijia quia jocojore quia sapatu. Niya, quiaa tii nujuuani, nioori cua quishaqui. <sup>34</sup> Janiyacuajaari cua pueya niquiquiaa Egipto jiyajinia quiyanoni. Egipto pueyari nojori miitaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquiniuria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaaritiij.

<sup>35</sup> Israel pueyari tarijia Moisés juaaquiaaricuaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhuj?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanonijiji. Na jiyaroquiaariiri puetunu nojori tohuatanijioriquianojuanaa Egipto jiyajiniji.

<sup>36</sup> Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niutiasacari Naatunacu jyanishano caminijuhuj. Naa miiquiaari pueyaracaanu cariiquia jiyajiniajaariuhuj. Cuarenta marijiaari nojori shocojoquiaari pueyaracaanu nojori rucuanesacari tii. <sup>37</sup> Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquiohuacuajiniojuaja supuenutaniyari. Niocua saa nojuaja tojiri cutara”.

<sup>38</sup> Nio Moisésri narta Israel pueyata quiquiaari cariiquia jiyajinia. Nojuajaari Pueyaso seruta pocoojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

<sup>39</sup> Pa supuetanaari saa na ruuretaquiaarijia. Majaari nojori tojinu paniniu quiquiaari Moisés. Egipto jiyajinia tacatenu paniquiaariuhua saajaari. <sup>40</sup> Naacuajitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanaj, mariqui tiuquiriohua. Nojuajaari najuhua na mashiquiquianu Egipto jiyajiniji”. <sup>41</sup> Naacuajitij, nojoriiri na pueyasora shipiniquiaari juhua seru juunu niyanu-

jua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasooacara. Nojoriiri jiyacari sacuaaratia timiquioriquiaa. <sup>42</sup> Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori pueyasohuarajaaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujuniaa naajioneejinia. Naa sequeyari:

“Israel pueyanaa, ¿canaacuara nia puecooquiaari pueyaracaanu nia seyani cariiquia jiyajinia nia camarucuneetasacari cuarenta marijia cuaara nia shocojoquiaarijiaatijia? ¿Cucuaratee? [Maja! ¿Canaacuara nia catijiaquiaari nia seyani? ¿Cucuaratee? [Maja! Niaari puetunu cuno miiquiaarijianaa tama nia jiyatesano pueyasohuarajaaja. <sup>43</sup> Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataquiaarijuhuj, juhua rijia niquishano shipinishano. Niaari puetunu nio shipinijioquiaarijianaa nia pueyasohuara, nojori cariquimijia nia mojoquetaconura, nia shuquiritasacari nojori. Nocuaaji, janiyari nia jiyaronutaniya tucuaaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniucua sesa.

<sup>44</sup> Estebanri socua pohuataquiaari naatej:

—Pa supuetanaari Pueyaso secojojua suhuorotu jiitiquiaarijuhuj, cariiquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacua. Cuno suhuorotuuiri shipinishaaquiaari taa Moisés niquitishaaquiaaricuajani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajanuyacuajani”. <sup>45</sup> Na nuhuaji, pa supuetanaa, canapueete naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetojosacari taucuacata, nojoriiri Pueyaso secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuiri pa supuetanaata quiquiaarijia, David jaara jiyaniijia quiquiaari. <sup>46</sup> Jacoboori pa supuetanaa jiyaniijia David supuetana quiquiaarijuhuj. Davidri Pueyaso tojjia quiquiaarijuhuj. Pueyasoori na shuquiritiaquiaari. Naaratej, Davidri Pueyaso Secojua tiara tianu paniquiaari juucua. <sup>47</sup> David niyanu Salomón cutaraari Pueyasora tiaquiaari. <sup>48</sup> Naajaa, jiyocuacaanu Quijiaari maja na quiniu pueyano tiasanoiniaaco. Tariucuacaanu Pueyaso sequesano caminiujuniaari naa naajiotaquiaari Pueyaso sequesano nojuaja:

<sup>49</sup> “Jiyocuacaanuuri cua quiquio. Jiyari saniniuujia cua niuhuaca cua niaja. ¿Taamueca tia nia tianutaniya quirijaarani? Jiyaniijiaari naa sequeyaquij. ¿Taa nia

sequeyani: na mueecujuara pa miiri, shuquiriaatia na quijiaara? Maja. <sup>50</sup> ¿Majateeri puetunu nio jiyajinia niquishanojuanaa cua juaashiquiata cua miishanocua-ja, jiyocuacaanujuhujaj?”

<sup>51</sup> Estebanri socua nojori sequequiaari:

—[Niaari tojitiaashijianucua! [Niaari Pueyaso sequesano ruuretaquiaa juhua nia supuetanaa! Nioojaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaraanu tojiyaquia Pueyaso Sohuanu niishitiojosano. Niaari Pueyaso tojiyashijianucua juhua nia supuetanaajuhujaj. <sup>52</sup> Nia niishiritioj, ¿nia supuetanaate quena niquiryatujua Pueyaso sequesano caminiujunia miitiaaquiquiaari? Nia supuetanaari puetunu Pueyaso sequesano caminiujuniaajanaa miiquiquiaari naquiya. ¿Quenaaja niquiryatu nojorijinijiniote miitiasoo cureequiaari? Maja. Nojoriiri tari puecoquiaari noo pueya, canapueete maninia miijia mijiria niriqianojiniji pahuatanuuquiaaricuaajani. Cuno maninia miijia jaara tiuquiquiaari, niaari sesa miijia pueya na niquitocanu nojori mosocoriquiano. [Niaari naa mocanu Pueyaso Jiyarosanotej! [Niaari pueyaraanu Pueyaso ruuretaquiaa! <sup>53</sup> Naacujitij jiyocuacaanuji Pueyaso seya pahuatasano Pueyaso rootasano niaarani, majaari cuno nia tojiniu quiquiaajuhujaj.

#### Jesu ruuretajaca mosacari Esteban

<sup>54</sup> Pueya jaara naa tojitiuquiaari Esteban sequesantej, nojoriiri jiyanojua juaaquioree. Na juaaniutia miacquenuuree na quiaacari. <sup>55</sup> Jiyanojua Pueyaso Sohuanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuuca niquiriiri. Jesu niquiriiaariuhua na Que Pueyaso miacquetajara nujuaano. <sup>56</sup> Naa na niquishacari, nojori sequeree juucuaari:

—[Nia niquishuriniaja! Jiyocuacaanu niquiya ri-atenonijia. [Pueyaso Niyanu niquiyaniija na Que miacquetajara nujuaano!

<sup>57</sup> Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanojua sariyocuatuuquiaari na juaaniutiaari. Na nuhuaji, Esteban cuatequiaariiri. <sup>58</sup> Na caponeetuquiaari Jerusalén tiacajiniiri. Tiacajiniji tohuatesaaree tamaari. Na tohuatesaanu nuhuaji, tii na jacutuquiaari saitiaari. Na jacuturiquianoori na toqueya cojuatequiaari tamonu mashaja. Nojori toqueya cojuana sesa quiquiaari Saulo. <sup>59</sup> Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuricuara.

<sup>60</sup> Na nuhuaji, mojuquetareeri. Jiyanojua nacaquiaari na nuhuajiaari:

—[Jiyaniijianaa, majaari nio pojori saniitonu na nojori miiniucua janiyatej!

Naa na sequenu nuhuajitij, cusoqueeri.

#### Saulo miishacari naquiya Jesuucua tiuunaa

**8** Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocujia, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niyaquejoquiaari puetunu Judea jiyajiniajanaa, Samaria jiyajiniaranio. <sup>3</sup> Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajaari Jerusalén tiacajinia. Na riuriasacari, na jayocquiaari tiacojiiri, na nujuatejosocoriquiano nujuatejorujajinia, maajipohua, canuunio.

#### Jesujiniji pahuatasacari Samaria jiyajinia

<sup>4</sup> Mashiyocuatuno pueyari puetunu na quiasacojuanaa Jesujiniji pahuatanuuquiaari pueya niquiara. <sup>5</sup> Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniara Samaria jiyajinia. Cuno tiacajinia juhuacatecara pahuataquiaari Jesucristojinijiaariuhuj. <sup>6</sup> Puetunu pueyajanaari Felipe pahuatasano tojiniuucua rerejoquiaari. Pueyari sanaa na tojitiaquiaari. Nojoriiri Felipe shootiaquiaari tacuritia, na miishacari jiyajeneta casaa Pueyaso cumaacata. <sup>7</sup> Samaruhua tohuatanijioriquiaa pueyajiniiri. Samaruhua tohuareetasacari pueyajiniji, sariyocua- maquiaari. Queraatia cumatacuruhua cusosuhuari naatanijiosaaquiaarijuhuaj, sesacujanucuanio. <sup>8</sup> Naaratej, puetunu cuno tiacajinia quiniaa pueyajaari jiyanojua shuquiriquiaari.

<sup>9</sup> Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na pueretujua. Puetunu pueyajanaa sapojoujaari jiyajeneta na miijosanota. Naa sequeja tama na cuaqueyajaariija: “Janiya cutaraari tojishano pueyanoni”.

<sup>10</sup> Puetunu pueyajanaari na tojijia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanojua Pueyaso cumaaca jiiitia”.

<sup>11</sup> Puereeta Simón miishacari pueyaraanu, pueyari sapojosaaquiaari. Naaratej, pueyari na sequesanoocua tiuuquiaari. <sup>12</sup> Na nuhuaji, nojori jaara tojiquiaari Felipe pahuatasacari Pueyaso rupaa, Jesucristojinijiaariuhuj, cuno Samaria pueyari Jesuucua tiuuquiaari cutara. Canuu, maajipohujuhuj, nojoriiri tiuquini- jiosaaquiaari mojinia. <sup>13</sup> Simónri Jesuucua tiuuquiaari- juhuaj. Tiuquinishaaquiaarijuhuaj. Na tiuquin- ishaanu nuhuaji Felipecua sacuaquiaariiri. Felipe shootiaquiaari tacuritiaari Felipe miijosacari jiyajeneta casaa Pueyaso cumaacata.

<sup>14</sup> Jerusalén tiacajinia Jesu saquiriojosano pueya jaara tojiquiaari taa Samaria pueya tiuuri Pueyasocuanu, nojoriiri cuniquiji jiyarotuuquiaari Pedro, Juannio. <sup>15</sup> Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujajinia

Pueyaso tiuquitiniuria na Sohuanujuhuaj. <sup>16</sup> Majaari Pueyaso Sohuanu tiuquiniu quiquiaari juhuanujuaja nojori jiuujiajania. Nojoriiri nareja moojina tiuquini-jiosano quiquiaari Jesuucua nojori tiuushacari. <sup>17</sup> Pedro, Juan, cunora na juaashiquia niojoquiaari puey-acua, nojoriicuara na secjotusacari Pueyaso. Naa nojori miishacaritij, Pueyaso Sohuanuuri cuno pueya jiuujiajania tiuquiquiaari cutara.

<sup>18</sup> Simónri niquiriquiaa taa Pueyaso Sohuanu tiuquiquiaari pueya jiuujiajania Jesu saquiriojosano pueya niasacari na juaashiquia nojoriicuani. Naaratej nojuajaari Jesu saquiriojosano pueya niqutionu paniquiaari cumaneeca juucua, cuno cumaaca na jiitia-nurajuhuj. <sup>19</sup> Simónri naa sequequiaari nojori:

—Cua niqitiotureja cuno cumaaca. Janiyacua Pueyaso Sohuanu panijiaacua niare cua juaashiquianijia, Pueyaso Sohuanu nojori masenurajuhuj, taa nia miy-acuaani.

<sup>20</sup> Pedroori na sequequiaari saaja:

—[Quia cumaneeca cuara shaajeera quiatajuhuaj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqitioquiaa nareja na tojitiajaca pueya.

<sup>21</sup> [Pueyaso Sohuanu cumaacaari maja quiarano! Quioojaari jiyanojua sesa quiya Pueyaso niqiara, nocuaji maja na cumaaca niqitiosaanu quiniutianiya quiajaniya. <sup>22</sup> Jiyanojua sesa quia niishiriojosanojiniji quia pishiriohua. Pueyaso quia secjore na jiyanoon-uria quiajaniya naa quia niishiriojosanojiniji quiooja-jiniatej. <sup>23</sup> Niishiyacuajaniija, quiaari juhua cartesoo quiyajaa, sesa miiniucuaa jiiitnio quia quishacariija. Quioojaari puera najiqaqitishano quiyajaa jiyanoj-ashijia quia quiniucuaajuahuaj.

<sup>24</sup> Simónri na riucaquiaari:

—[Pueyaso nia secjorequi cucuara, mariqui cua saniitioreeri taa nia sequeyacuajani!

<sup>25</sup> Na nuhuaji, Pedroori Juanta socua pohuataquiaari Jiyaniija Pueyaso rupaa cuno pueya niqiara. Pueya niqiara pohuatareeri socua Samaria jiya tiacajinia, cuniqui quiniaa tiuniuria Jesuucuaajuahuaj. Maninia ru-paari Pueyasojiniji pohuatasaaquiaari queraatia tiacajinia, Samaria jiyajinia. Na nuhuaji, Pedroori tacate-quiaariuhua Juanta Jerusalén tiacajiniohua.

### Jesujiniji Felipe pohuatasacari Etíope pueyano

<sup>26</sup> Cuno nuhuaji, Pueyaso seruuri Felipeecua rose-quaari. Na sequeseeri:

—Quia sanere Felipeana. Pananu shuucuaajiria nu-cuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariquia jiyacuma neteya.

<sup>27</sup> Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia na-cuneetooquiaari saaja Etiopía jiyajinijinio pueyano-taari. Cuno pueyanoori riyacajajaaju quiquiaari Etiopía jiya jiyaniija naacutana na quiniucua, maaji na jiyani-ija quiniucua. Na jiyaniija sesa quiquiaari Candace. Cuno maajiiri cuno pueyano jiyatequiaari Etiopía jiya

casami jiiitanara, na cumaneeca cojuariquiano nera. Nio Etíope pueyanoori Jerusalén tiacajinia quiaquiaari Pueyaso secjonoocua. Cuniquiji tacateyanoori Felipeeta naacuneetooquiaari nuujinia. <sup>28</sup> Nucuacoji na tacatesacariuhua na jiyajiniohuara, caballoori na jaa-tiariquiohua, rucuanejotajarujinia cajiyano. Pueyaso rupaa serojoriquiohuari, tariucuaaanu Pueyaso se-quesano caminiujiunia Isaías naajioneejiniji. <sup>29</sup> Pueyaso Sohuanuuri jiyacari Felipe sequequiaari:

—[Ritia nocua quia catecanore! Quiocua nata quiaare.

<sup>30</sup> Jaara nocua catecanoquiaari, Felipeeri Etíope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na se-queyani?

<sup>31</sup> Etíope pueyanoori na riucaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

<sup>32</sup> Etíope pueyanoori nio serojoriquiaa tariucuaaanu Pueyaso Rupajinia:

“Juhua borrego jaatucusaquiaariiri mosocoriquiano. Naatej, taa borregocuaani sanaa niqiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. <sup>33</sup> Naquiya miishaaquiaari cararaatiaari. Nocua namiyaquishaaquiaariiri. Mashaja na quishacariija, nojuajaari shaajasaaquiaari nio jiyajiniji. Cunora, majaari na muetunu quiquiaari. Niqiohuaju-uri mosaaquiaari”.

Etíope pueyanoori nio serojoriquiaa Pueyaso rupajini-ji.

<sup>34</sup> Na nuhuaji, Etíope pueyanoori Felipe nequesota-ree:

—Cua sequere pueyanonaa, ¿canajiniji Isaías pohu-ataa niya na naajiosanojiniani? ¿Tama nojuajiniji pohu-ataate? ¿Tamonujiniji soj?

<sup>35</sup> Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesu-jiniji pohuataquiaari, taa quiarijia Jesu miishaacuanu taraatiacuajani.

Felipeeri socua na pohuataquiaari Jesu miishanojiniji. <sup>36</sup> Nojori quiasacari nucuaco, caminiaco shuriuquio-co tajitariquiaari. Etíope pueyano jaara caminiaco niqiquiaari, Felipe sequereeri:

—¿Majate maninia cua tiuquinishaanura niya?

<sup>37</sup> Felipeeri na sequeree:

—Quiaa jaara seetanujuaanaa tiuuri Jesuucua, quia naata tiuquinishaanu.

Cuno pueyanoori na riucaaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishianijia.

<sup>38</sup> Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniiaari. Felipeeri tii na tiuquiniquiaari Jesuucua na tiuushacari. <sup>39</sup> Nojori tacat-asacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etiope pueyano shuriucuaaji. Nojuajaari juucua tacareecuaquiaari na tiuquiniaacua. Majaari socua na niquiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajinihua. <sup>40</sup> Pueyaso Sohuanuuri Felipe jataquiaari Azoto tiacajinia. Nojuajaari cuniquiji puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

### Saulo jatasacari Jesu tojiniara na quiniuria

**9** Sauloori jiyacari pueyaracaanu Jesuucua tiuunaa miananajoriquiase. Nojori puecoonu paniquiaari puetunujuanaari. Naaratej, Sauloori pueyacuara secojona jiyaniijiaacua quiaquiaari. <sup>2</sup> Naa na sequeeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rerejojuacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaniya niyara Jerusalén tiajinarani, canuu, maajipohuanio.

<sup>3</sup> Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, [Shacantuucaari canashiyaquiji nunuquiaari jiyocuacaanuji!

<sup>4</sup> Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—[Saulonaa, Saulonaa, cua tojiri! ¿Casaara quia miitiaa puera janiyani?

<sup>5</sup> Sauloori na riucuaaree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari: —Janiya Jesuni. Quiaari puera cua miitiaajanaajataj, cucua tiuunaa quia miitiasacari puera. Naa quia miishacari puera quia juaaniutatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijia.

<sup>6</sup> Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani? Jiyaniijiaari na sequeere:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

<sup>7</sup> Saulota quiojonaari shiriiquitiquiaari nojori jaara tojitiuquiaari jiyocuacaanuji pocuanu. Nojoriiri juucua na niquiniu paniquiaari. Saaja shaaquiiri quiriqiaa.

<sup>8</sup> Na nuhuaji, Sauloori na pojosaquiji sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara.

<sup>9</sup> Nojuajaari tii camueenujuquiaari jiuujianaraca juuca, cariyujuaru na quishacari. Majaari na miaquenu quiquiaari pueyaracaanu cariyujuaru na quishacari. Ratuyaquiquiaariuhuj.

<sup>10</sup> Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujinia:

—[Ananíasnaa!

Nojuajaari na riucuaquiaari:

—¿Casaate cua Jiyaniijianaa?

<sup>11</sup> Jiyaniijiaari na sequeere:

—Quiarijia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajinia quiya. Judas tiari jati tamonu nuujinia quiya. Cuno nuu sesa, Nu Maniniu. Sauloori cuno tiajinia secojiya Pueyaso. <sup>12</sup> Nojuajaari juhua na maquenujinia tari niquirii quiajaniya nocua tiuquiyano. Tari quia sesa niishiyajaariuhuj. Sauloori tari quia niquirii na maquenujinia. Quiaari quia juaashiquia niariquiaa nocua, na namijia jeequenuhuara, maninia na niquiniuhua.

<sup>13</sup> Ananías jaara naa tojiquiaari Jiyaniijia sequeyanotej, nojuajaari sequeere:

—[Cua Jiyaniijianaa, queraatia pueyari cuno pueyanojiniji cua pohuatacanuni! [Quiocua tiuunaa pueya miitiaquiaa taraatia Jerusalén tiacajiniaari!

<sup>14</sup> Pueyacuara secojona jiyaniijia jiyarosanonaari cunohuj, quiarijia niya tiuquiriini. [Nojuajanaari quia secojona pueya quioonutaniya, morojonucuacanaa na jiyatasocoriquiano Jerusalén tiacajiniara!

<sup>15</sup> Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarjia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijiaariuhuj, Israel pueyano. <sup>16</sup> Janiyacuajaari Saulo niishitiojonutaniyani taa jiyanohua naquiya pueya mitianutaniya nojuajani, janiyajiniji na pohuatasacari.

<sup>17</sup> Naaratej, Ananíasri quiaquiaari. Judas tiajinia tiuquishiiri, tee Saulo quiriqiaacuajani. Na tiuquishacari, Sauloocua niasee na juaashiquiaari. Na sequeereeri:

—Cua tarajanunaa, pa Jiyaniijia Jesu, quiocua muetarucuaa nio tiaca nucuamaji niyara quia nishacari, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioojajinijuhuj.

<sup>18</sup> Jiyacari ritia totequiaariiri juhua sapitiaaja cocua Saulo namijajiniji. Maninia niquiquiaariuhua na nuhuajiiri. Na nuhuaji, Sauloori ritia tiuquinishaaquiaari moojinia Jesuucua na tiuushacari. <sup>19</sup> Na nuhuaji, miaquereeri, raturohuajaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuunaa pueyata.

### Jesujiniji Saulo pohuatasacari Damasco tiacajinia

<sup>20</sup> Sauloori juhuacatecara coteequiaari Jesujiniji pohuatano narta Judiocuaca secojojuaa tiajinia Damasco tiacajinia. Nojuajaari pueya niquiara na pohuatasacari sequeja:

—[Jesuuri seetanujanaa Pueyaso Niyanu!



<sup>21</sup> Naa nojori tojishacari Saulo pocuaanotej, pueyari shiriiquiquiaari. Na shiriiquitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuuniaa pueya Jerusalén tiacajinatej? Niyara niyareejaarihuaj, Jesuucua tiuuniaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niquitiojosocoriquiano, nojori nujuatejosaanura.

<sup>22</sup> Sauloori socua noojia cumaquiquiaari Pueyaso Sohuanuta, jiyanhua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujuanaa maatia pueya niishiniuria Jesuuri Pueyaso Jiyarosano pocuaji tacuriquiano.

### Saulo mashishacari narta Judiocuacaacuaji

<sup>23</sup> Quiniqui Saulo camueenujusacarijia pueyaraanu, narta Judiocuacaari nocuara rojotooquiaari na motunura juucua. <sup>24</sup> Tamonuuri Sauloocua jiyanooquiaari. Naa na sequequiaariiri:

—[Quiaa monu panishiya sacaj!

Judiocuacaari na sashiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. <sup>25</sup> Damasco tiacaari puereetuuca sohuacaraca quiquiaari puetunu na shocuajanaa. Jesuucua tiuuniaa pueyari saaja Saulo mashiquiquiaari niucua. Sohuacajiniji roshinitiasaaquiaari jiyocuacaanuj puereetuuca canaasatujiniaari. Sauloori naa mashiquiaaritij.

### Saulo quishacarihua Jerusalén tiacajinia

<sup>26</sup> Na tiuquishacarihua Jerusalén tiacajinia, Sauloori Jesuucua tiuuniaa pueya rupuenu paniquiaari juucua. Nojoriiri saaja na puerequiaari. Na puerenuta sequetiquiaariiri:

—Pueyasocua tiuujaquinio naasucua jiyanotej.

<sup>27</sup> Bernabé cutaraari maja na puereenu quiquiaari Saulo. Nojuajaari Jesu saquiriojosano pueyacu na jiyataquiaari, Saulo niishiniuria puetunu nojorijianaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucuamaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

<sup>28</sup> Sauloori narta Jesuucua tiuuniaa pueyata jiyojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pohuataja juhuajaniyari. <sup>29</sup> Saulo pocuasacari, nojuajaari seetanujuanaa cumaacata pocuaquiaari Jiyaniijia Jesuucua na tiuushacari. Griego rupaa pocuanaa Judiocuacata pocoojiquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. <sup>30</sup> Jesuucua tiuuniaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaaquiaari na raja Tarso tiacajiniaari.

<sup>31</sup> Na nuhuaji, puetunu Judea jiyajinia Jesuucua tiuuniaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

### Pedro naatanishacari Eneas

<sup>32</sup> Pedroori pueyaracaanu rucanejojua Jesuucua tiuuniaa pueyacu, nojori na niishitiojonura socua Jesujiniji. Tamonu juuca nojuajaari Pueyaso pueya niquiniuucua quiaquiaari Lida tiacajinijuhuj. <sup>33</sup> Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuana cusosu quijia. Tari na shocojoquiaari ocho marijia pootia na matasacari na matujinia. <sup>34</sup> Pedroori cuno cusosu sequequiaari:

—Eneasna, [Jesu Cristo tari quia naatanirii! [Quia sanere! Quia matu quia jecare.

Eneasri ritia sanequiaari. <sup>35</sup> Puetunu pueyajanaa Lida tiacajinia quiniaa, mariyata Sarón tiacajinijinio pueyajuhuj, puetunu nojorijianaari nio miishano niquiquiaari. Nojoriiri cunora tama na supuetanaa niishitishano casaajaaja cartequiaari. Puetunu nojorijianaari Jesuucua tiuquiaari.

### Dorcac samiiianishaanujiniji pohuatasano

<sup>36</sup> Jiyacarijuhuaj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupajinia sequesano "Dorcac". Dorcasri saniniuujia pueyano rupajinia sequesiyacuajua "nequeru". Cuno maajiiri Jesuucua tiuuja quiquiaari. Nojuajaari maninia miiijia maaji quiquiaari. Casamiiijuniucua pueya niquitiojojua nareja na jiitiasanojinijiiri. <sup>37</sup> Na nuhuaji, Pedro quishacari Lida tiacajinia, Dorcasri cusoquiaari. Na cusonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. <sup>38</sup> Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: "Quia quiaarena ritia Jope tiacajinia. Majaari tarishiniu".

<sup>39</sup> Pedroori nojoritia tacatequiaarihua Jope tiacajiniahua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejojuaari na nujuquetunuta. Nojoriiri Pedro niquitiojiquiaari Dorcas cusupuenuusano toqueya, cacojojuiyano. Cunoori quiquiaari na cusupuenuusano saminiio na quishacarijia. <sup>40</sup> Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojoquetaquiaari

Pueyaso na secojonura. Na secojonu nuhuaji, macuucua tacatereeri. Na sequereeri:

—Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. <sup>41</sup> Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiQUIOP-uenio:

—Miji pueyanaa, ñia nimia!

Nojori tiuquitasacari, saaja maaji niquitiushii nujuanoori, tariucua saminio. <sup>42</sup> Pedro miishanoori puetunu Jope tiacajinijanaa niishishaaquiaari. Queraatia pueyari cunora Jesuucua tiuquiaari. <sup>43</sup> Pedroori na nuhuaji janiya camueenujuquiaari Jope tiacajinia. Nojuajaari Simón tiajinia quiriquiaa cuniqui na camueenusacari. Nio Simónri piiquia casaata shoqueya majeetejojua quiquiaari, casaara shipinshocoriquiano shoquejiniji.

### Pedro quiasacari Cornelio niquiniucua

**10** Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. <sup>2</sup> Cornelioori Pueyaso secojojua pueyano quiquiaari, mariyata puetunu na tiajinia quiniaatajanaano. Nojuajaari seetanujanaa Pueyaso shuquiritini panijia quiquiaari. Cornelioori queraatia na cumaneecajiniji niquitiojojua quiquiaari nareyajuhuj, casamiiuniucua Judiocuaca niquitiosocoriquiano. Pueyaso secojojua pueyaracaanuuri. <sup>3</sup> Tamonu juuca, tariucua pananu piriushacari, Cornelioori Pueyaso seru niquiquiaari juhua na maquenujinia nocua niyano na tiajinia. Na sequeseri:

—Cornelionaa.

<sup>4</sup> Cornelioori saaja Pueyaso seru shootiaquiaari na shiriqiniutia. Na nuhuaji na riuquareeri:

—¿Casaate jiyaniijanaa?

Pueyaso seruuri na sequere:

—Pueyasoori quia secojosano tojiquiaa. Quia timitaari capora quia quiniucua, quia jiiitasanojiniji quia niquitiosacari nareja casamiiuniucua pueyara. <sup>5</sup> Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuaj. <sup>6</sup> Nojuajaari na sesaanucua pueyano tiajinia quia. Tia camaruuri shoque majeetejojua piiquiajinia. Cunoori na poonijosano. Na tiaari shoniacu caminia casaqueyaji naniya. Simón Pedroori quia sequenutaniya casa quia miiniutianiyani Pueyaso jiyanooniuria quiajaniya.

<sup>7</sup> Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaarijaariuhuj. <sup>8</sup> Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniari.

<sup>9</sup> Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. <sup>10</sup> Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niquitiquiaari juhua na maquenujinia, na quishacari tia cacojiria. <sup>11</sup> Pedro niquishacari jiyocuacaanu, saaja jiya cajiniocua niquirii riateyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. <sup>12</sup> Sonaque jiniacuma quiriquiaari puetunu casaajanaa: sacocua, jiyacua rucojuacanio, jiyocuacaanu jaacuatujuaacajuhuj. Cuno casamiiri quiquiaari Judiocuaca pueresano casaa puetunujanaa. Maja nojori miaquesano. <sup>13</sup> Jiyacaritij, Pedroori rupa tojirii jiyocuacaanuji na sequeyano. Naa sequequiaari:

—Pedronaa, nocua quia sanere! Quia puecoore quia miaquesocoriquiano.

<sup>14</sup> Pedroori na riuquaree:

—Maja cua jiyaniijanaa! ¿Janiyatucua taa miaquere sacuraatia cua miaquesooni? ¿Cunocujaari tarijia quia sequesano canaa pueresocoriquiano!

<sup>15</sup> Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

<sup>16</sup> Pueyasoori naa pacutejojuaari sequenu Pedrotej. Na nuhuaji, sonaqueeri tacanitiasaaquiaariuhua jiyocuacaanu. <sup>17</sup> Pedro tacaashacari naa na niquiniucua juhua na maquenujinatej, jiyacari Cornelio jiyaramiquishano pueyari tia tohuatayaji tiuquiijoquiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tiajinia. <sup>18</sup> Nojoriiri tohuatayaji nacaquiaari:

—¿Niya quiyate Simón jiyaniishano pueyano? Na sesaari Pedrojuhuaj.

<sup>19</sup> Pedroori juhuanojuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequere:

—Pedronaa, jiuujanaraca pueya quia pajeya. <sup>20</sup> Tariucua. Quia sanerohua. Nojoriicua quia roseyarohua. Quiocua nojoritia quiaarohujuhuj. Majaari taacanuunu. Janiyacuajaari nojori jiyaramiquiriucuaa quiocuani.

<sup>21</sup> Pedroori Cornelio jiyarosano pueyacu rosequiaari. Nojori sequeseri:

—Janiyacua nia pajesano pueyanoni. ¿Casaacua nia niyareecuarani?

<sup>22</sup> Nojoriiri na riuquaree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuani. Maninia miiija pueyanoori. Jiyaniijia Pueyaso tojijiaariuhuj. Puetunu Judiocuacajanaari maninia na miiniucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

<sup>23</sup> Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maquesejaara. Pocua tariqui quiaariquiani.

Jaara juhuaquequiaari, Pedroori nojoritia quiaquiaari. Nata quiojoquiaarijiaariuhua Jope tiacajinijinio Jesuucua tiuunaa pueya.

<sup>24</sup> Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenatanio. Cornelioori puetunu nio pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. <sup>25</sup> Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasooacara. <sup>26</sup> Pedroori saaja na sanaquiaari. Na sequereeri:

—Quia nujuare! Janiyari cayajuhuj, juhua quiajaniya.

<sup>27</sup> Tiaco na tiuquitasacari, pocojoriquiaa Pedrotaari. Pedro tiuquishacari, saaja queraatia pueya niquishiiri.

<sup>28</sup> Pedroori nojori sequereeri:

—Taucuacanaa, niaacuajaari niishiya canaari Judiocuacani. Judiocuacaari rootasaaquiaari maja canaa rupenura taucua, maja quenaaja tahue tiajinia canaa tiuquiniurajuhuj. Saniniuujia, Pueyasoori quiarijia cua niishitorucuaa cutara maja cua soonura tamasa. Taucuacaari maja sacuaatia quiarijia quiria. <sup>29</sup> Naaratej, cua niishishacari niaari cua masuurucuaa niyara, janiyari ritia canujyarucuaani cua taacanuyaquiniutia. Cua totureja, ¿casaara nia masuurucuaa janiyani?

<sup>30</sup> Cornelioori na riucaaree:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucaaa. Jiyacaricuaaari quiriqiaa, tee pananu tiuyanijia. Cuno pueyano toqueeri shacantuque quiriqiaa.

<sup>31</sup> Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquitiojoquiaa quia casami casamijuniucuaani. <sup>32</sup> Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuj. Nojuajaari na sesaanucua tiajinia quiya, shoniacu caminia casaqueyaji. Tia camaruuri piiquajinia shoqueya majeetjonu poonijiojua. Simón Pedro jaara nimia quia tiajinia, quiata pocojonutaniyari”. Pueyaso seruuri naa cua sequerucuaaqui Simónnaa. <sup>33</sup> Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajanaari niya Pueyaso niquiara quiyani. Naa quia pohuatatare canaa tojishocoriquiano quiarijia, taa Pueyaso niishitiojorucuaa quiajaniya canaa quia pohuatanuracuajani.

### Pedro pohuatasacari Cornelio tiajinia

<sup>34</sup> Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiajata na niquiniu pajaniya. Majaari nia jiyaniinu Pueyasoori saaja Judiocuacaacia jiaataa, Israel pueya nojori quiniucua. Maja. Nojuajaari tamasaacia jiaataajuhuj. <sup>35</sup> Tiquiyocua jiyacajinia Pueyaso secojoja pueya quishacari, nojoriiri Pueyaso jiyanooshano pueya quiyajuhuj, maninia mijia nojori quishacari. <sup>36</sup> Pueyasoori na rupaa pohuataniquiaari puetunu canaa Israel pueyarajanaa, jiyanooshano canaa quiniuria Jesucristoocua canaa tiuushacari. Nio Jesucristoori puetunu mijiria quiniaa Camarnujuanaa. <sup>37</sup> Tiuquiniujia Juanri Pueyaso rupaa pohuataquiaari pueya tiuquiniujosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajinijanaano. <sup>38</sup> Niaari niishiyajuhuj, Pueyasoori na Sohuanu niquitioquiaari Jesu, na cumaaca na jitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaariuhuj. Puetunu naa mijia maninijanaari na Que Pueyaso quiniucua nata. <sup>39</sup> Canaari puetunu na miishanojuanaa niquiquiaarini, puetunu canaa Judiocuaca jiyajinijanaa, Jerusalén tiacajinijuhuj. Janiyari seetanujanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojutatuquiaariiri. <sup>40</sup> Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacu na mueratereeri. <sup>41</sup> Majaari na muetanu quiquiaari puetunu pueyacuajanaa. Saaja canaacia muetaquiaariiri, teyano Pueyaso saquiriojoquiaari cootenu tariucuaaanucuaajani, Jesujiniji pohuatanuriquiano. Na samiitiasacariuhua, canaari nata miacquenuquiaari mariyatani. Canaari nata raruquiaarijiiuhuj. <sup>42</sup> Jesu jaara canaa jiyaramiquiquiaari, nojuajaari canaa sequequiaari: “Naa nia pohuatatare pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuj’”. <sup>43</sup> Tariucuaaanu pueyara Pueyaso sequesano caminiujuniuaari naa juhuacarijia sequetuquiaari Jesujinijiiuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

### Pueyaso Sohuanu tiuquishacari taucuaa jiuujajiniajuhuj

<sup>44</sup> Pedro pohuatasacarijia taucuaa niquiara, Pueyaso Sohuanuuri Pedro tojtianaa taucuaacia niquiaari, nojori jiuujajinia na tiuquiniuria. <sup>45</sup> Pueyasooocua tiuunaa Judiocuacani, Pedrota nijioquiaari Jope tiacajinijini, nojoriiri shiriquiquiaari Pueyaso niquitiosacari cuno taucuaa na Sohuanu. <sup>46</sup> Cuno taucuaaari nojori niquiara pocooriquiaa tamaatia rupaacajinia. Pueyaso

maniniuhuaqueetaturiquiaari. <sup>47</sup> Naaratej, Pedroori sequequiaari:

—Nio pueyari tari jitiaa Pueyaso Sohuanu noojia-jinia, taa pa jitiaacuaani. Naaratej, nojori cuara tiuquinijiosaaria quiarijia. ¿Cantucua nojori tenujura maja na tiuquinijiosaanurani?

<sup>48</sup> Pedroori na nuhuaji sequequiaari cuno taucuaca tiuquinijiosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.

### Taucuacajiniji Pedro pahuatasacari Jerusalén tiacajinia

**11** Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pahuatasaaquiaritij: “Taucuacanaari Pueyaso rupaacua tiuuriucuaajuhua”. <sup>2</sup> Nocuaji, Pedro jaara tacatequiaariuhua Jerusalén tiacajiniuhua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatejonu panijiaa quiquiaari, taucuaca quiniuria seetanujanaa Pueyaso pueya nojoriiri. <sup>3</sup> Nojoriiri naa juaaquiaari Pedro:

—¿Casaara quia quiaarucuaa cuno taucuacaacuaani? Nojoriiri maja Judiocuaca juhua pajaniya. [Quiaanaari nojoritia miaquejocanujuhua! Quia miishanoori maja maninia taa Pueyaso rootaquiaari tariucuaaanucua-jani.

<sup>4</sup> Pedroori suraatiaja nojori pahuataquiaari puetunujuanaa tahuajiniji. Coteenu pahuataree na niquishano juhua na maquenujiniaari. Naa sequereeri:

<sup>5</sup> —Jope tiacajinia cua quishacari, janiyari panacari secojoriquiaani. Janiyari jiyacari juhua cua maquenujinia sonaque na nacatucuaajiniji morojotasano niquiriini. Jiyareta cucujanaa roshinitiasaareeri. <sup>6</sup> Cua niquishacari sonaquejinia cua niishiniuria casaate mii quiriquiaani, janiyari saa puereeta casami niquiriijiaani. Janiyari niquiriini jiyacua rucojuaca, sacocua-juhua, jiyocuaaanu jaacuatujucanio. Puetunujuaanaari pa miaquesocoriquiano pa pueresano casaa quiriquiaa. <sup>7</sup> Janiyari jiyacari jiyocuaaanuji rupaa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. <sup>8</sup> Janiyari saaja na riucuaareni: “[Maja cua Jiyaniijianaa! ¿Janiyatucua taa miaquere sacuraatia cua miaquesooni?”

<sup>9</sup> Jiyocuaaanuji rupaari socua cua sequerohuani: “Pedronaa, majaari miaquesocoriquiano Pueyaso jiyatesano soonu”. <sup>10</sup> Pueyasoori naa pacutejocanu sequenujuucua janiyatej. Na nuhuaji, sonaque tacanitarohua jiyocuaaanuuri. <sup>11</sup> Jiyacaritij, jiuujianaraca canuuri cua quijia tiacajinia tiuquishii. Nojoriiri Cesareya tiacajiniji jiyaramiquishano quiquianu, na pajenuunura janiya.

<sup>12</sup> Nojori tiuquiyaquishacarijia, Pueyaso Sohuanuuri cua sequereeri: “Quiocua nojoritia quiaare. Majaari taacuanunu. Majaari tahua soonu nojori quia rupesacari”. Naa cua tojiniuucuatej, janiyari cunora juhujaniya nojoritia quiaarucuaani. Nio seis parta Jesuucua tiuuniaa pueyari cuata quiojyarucuaajuhua.

Canaari mariyata cuno tahua tiacajinia tiuquishiini. <sup>13</sup> Tia camaruuri canaa pahuatarucuaa taa na niquiquianu Pueyaso seru na tiacajinia nocua nujuaanoni. Pueyaso serunaari na sequereeri: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. <sup>14</sup> Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiacajinia quini-aajuhua”. <sup>15</sup> Saaja cua coteesacari Pueyaso rupaa pohuatano nojori niquiara, Pueyaso Sohuanuuri nojoricua niquianu, taa pocua coteenujanaa na niquianucua-jani. <sup>16</sup> Janiyari jiyacari niishiquii pa Jiyaniijia sequesanonni. Naa na sequesantej: “Juanri moojinia tiuquinijia pueya. Pueyaso cutaraari na Sohuanu jiyaronutaniya niaacua, nioojiajinia na tiuquiniuria”.

<sup>17</sup> Naacuajitij, taucuaca tiuushacari pa Jiyaniijiaacua, Pueyasoori na Sohuanu niquitorucuaa nojoriijuhua, taa na niquitocanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequeruhuarini: “Maja cuno nojori niquitionu quia Sohuanu”?

<sup>18</sup> Jerusalén tiacajinia quiniaa Pueyaso pueya jaara tojiquiaari naa Pedro sequesantej, nojoriiri sanaajetaquiaari. Tama nojoriijiaarijia Pueyaso maniniuhuaqueetaquiaari. Naa sequetuquiaariiri:

—[Pueyasojuhuanaja jiyanoohua maninia! Nojuajaari taucuaca panijuhua nojori tacatonura noojia sesa nojori miishanojiniji, jiyanooshano nojori quiniurijuhua, pueyaracaanu nojori rishiniuria Pueyasota.

### Antioquiya tiacajinia Jesu pueyajiniji pahuatasano

<sup>19</sup> Esteban jaara mosaaquiarucuaa, Judiocuacaari juhucatecara Jesuucua tiuuniaa miiquiaari naquijuhua. Queraatia Jesuucua tiuuniaa pueyari nocuaji mashiyocuatucuaari. Nojoriiri tiquiyocua niyaquejoquiaari. Noojiaqueyari na mashiyocuatucuaari tiuquijioquiaari Fenicia jiyajinia. Tamasacaari tiuquijioquiaari Chipre jiyajinia. Noojiaqueyari Antioquiya tiacajinia tiuquijioquiaarijuhua. Nojoriiri tii pahuatanucuaari Pueyaso rupaa Jesujiniji saa Judiocuacaraja, maja taucuacaa. <sup>20</sup> Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhua. Nio pueya jaara tiuquijioquiaari Antioquiya tiacajinia, nojoriiri Jesujiniji pahuataquiaari Griegohua niquiarajuhua. <sup>21</sup> Jiyaniijia Jesu cumaacaari nojoritia quiquiaarijuhua. Naacuajitij, queraatia Griegohuari tariucuaaanu tama nojori niishishanojuaaja cartequiaari, Jiyaniijia Jesu tojijiaa nojori quiniuria.

<sup>22</sup> Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotucuaari Antioquiya tiacajinia. <sup>23</sup> Bernabé jaara tiuquiquiaari nojoricua, nojuajaari jiyanoohua shuquiriquiaari na niquishacari taa Pueyaso miirucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojjiara nia quiri.

<sup>24</sup> Bernabeeri jiyanoehua maninia pueyano quiquiaari. Pueyaso Sohuanuuri noojia cumaquiquiaari jiyanoehua. Naacuaajitij, na pahuatasacari Jesujiniji, queraatia pueyari Jiyaniijiaacua tiuquuaari.

<sup>25</sup> Na nuhuaji, Bernabeeri Tarso tiacajinia quiaquuaari Saulo pajenuucua. Jaara na riuriataquuaari, na jiy-ataquuaari Antioquiya tiacajiniaari. <sup>26</sup> Nojori quishacari Pueyaso pueyata cuno tiacajinia, nojoriiri tii shocotequuaari niquiriyatu marijia. Nojoriiri queraatia Pueyaso pueya niishitiojonuquuaari. Tii Antioquiya tiacajiniani, Jesuucua tiuunaa pueyari coteenu sesojosaquuaari “Cristiano”. Nioori pueyano rupaajinia sequeshiya “Cristo tojiniaa pueya”.

<sup>27</sup> Cuno quishacari, Jerusalén tiacajiniji Pueyaso sequenu panishano caminiujunaa pueyari tiuquijioquuaari Antioquiya tiacajinia. <sup>28</sup> Tamonu nojorijinijini, na sesa quiquaari Ágabo. Nojuajaari Jesuucua tiuunaa pueya rerejonaajini nujuaquuaari pocunura. Naa caminiujiquuaari Pueyaso Sohuanu niishitiosano nojuajaari:

—[Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequuaariiri Ágabo. Cuno miaajenuuri quiquaari Claudio quishacari jiyaniijajanaa, Césartuhuj. Nojuajaari Roma tiacajiniji jiitiaquuaari puetunu jiyacajanaa. <sup>29</sup> Antioquiya tiacajinia quiniaa Pueyaso pueya tojishacari naa Ágabo sequesantej, nojoriiri sequequuaari:

—[Judea jiyajinia quiniaa parta Pueyaso pueya pa naacure!

Nojoriiri naa miiquuaari. Naaratej, cante queraatia cumaneeca jiitiaquuaarini, nojoriiri queraatia niquitioquuaari. Saniniuujia, cante maja puera cumaneecaraca quiquuaarini, nojoriiri secaja niquitioquuaari na jiitiasanojiniji. <sup>30</sup> Na nuhuaji, nojoriiri nareja na niquitiojosano cumaneeca jiyarotaquuaari Bernabeeta, Saulotanio. Nojoriiri Pueyaso pueya jiitianaa niquitioquuaari saniniuujia Judea jiyajinia.

### Jacobo nacatasaanujiniji pahuatasano, Pedro nujuatesaanujinijinio

**12** Jiyacaritij, Herodesri jiyaniijia quiquaari Judea jiyajinia. Nojuajaari Jesuucua tiuunaa miiquuaari naquiya. Noojiaqueya quiootequuaari na saniitiosocoriquiano nujuatejojuajiniaari. <sup>2</sup> Naa Juan tarajanu Santiago motequuaaricuaajaari nijiniaquetucua mueruuta. <sup>3</sup> Judiocuacaari shuquiriquaari naa nojori jiyaniijia motesacari Santiagotej. Naaratej, Herodesri Pedro quiatequuaari na soldadohuajuhuj, Judiocuaca timitianura socua nojuaja. Pedroori quiasaaquuaari Judiocuaca queranacunuusacari, nojori sasacari pan na poreetajaaju majeetesano. <sup>4</sup> Pedro quiasaanu nuhuaji, Herodesri na nujuatequuaari nujuatejojuajinia. Na tohuatenu paniriquiohua juucua Pascua nuhuajiiri, na nequesoresocoriquiano puetunu quiniquiquiaa Ju-

diocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootoquuaariiri; coteenu cuatro, na nuhuaji socua cuatro. Nojoriiri naa sanitijiootoquuaaritij. <sup>5</sup> Pedroori maninia cojuasaaquuaari nujuatejojuajinia. Jiyacaritij, Jesuucua tiuunaa pueyari saniniuujia nocuara secojonuuriquiaa jiyanoehua, Pueyaso naacunura Pedro.

### Pueyaso mashiquishacari Pedro nujuatejojuajiniji

<sup>6</sup> Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na nequesoresocoriquiano puetunu pueya niquiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojuateyaji cojuariquiaacujua. <sup>7</sup> Jiyacaritij, Pueyaso seruuri canashyaquiji coretaquuaari jiyareta Pedro shuriucujanaa nujuatejojuateyaji. Na shacantuucaari jiyanoehua cuhuataquuaari nujuatejojuateyaji. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—[Ritia quia sanere!

Cumayocuuaari tamajaaja saacarejetaquuaari Pedro numatucuaacujaji. <sup>8</sup> Pueyaso seruuri na sequereehujuhuj:

—[Quia cajiniocua camarucujua quia saatiri socua!

[Quia sapatu quia cushirijuhuj!

Pedro jaara naa miiquuaari puetunu na sequesanojuanaa, Pueyaso seruuri socua na sequerohua:

—[Quia toque quia cushiri ritia! Majaari tarishiniu.

[Quiocua cua nuhuaji rupaashijia!

<sup>9</sup> Pedroori ritia Pueyaso seru nuhuaji sacuariquiaajaa. Jiyanoehua jiyajeneriquaari. Majaari na niishiniu quiriquiaa puetunu na niquishanojuanaa. Nojuajaari jiyaniriquiaa na maquenujia niquiya naasucua. <sup>10</sup> Nojoriiri coteenu shocoma na tacoji cojuanaa soldadohua. Socua na tacoji cojuanaa tajitiumiaajaariuhuj. Naa quenaacoturee nujuatejojuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujaara tiaca jiuujiaaco. Na nuhuaji, na shuriucujaji shaajequeeri. <sup>11</sup> Pedroori jiyacari shusha niishiquii. Naa sequereeri:

—[Seetanujuanaaqui quiriquiaa! [Cua Jiyaniijiaquiiri na seru jiyaroree cucua, na mashiquiniuria janiya Herodescuaji, cuarta Judiocuacaacujajijuhuj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

<sup>12</sup> Nojuajaari naa na niishiriojonuta María tiajinia quiaquuaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tiajinia, queraatia Pueyaso pueyari Pedroocua tii secojonuuriquiaa jiyacari. <sup>13</sup> Pedroori jiyacari piquiquaari carijiniacuma mataca tohuateyaji. Tiaco seruuri na tojiquaari piquiyano. Nio seru sesaari quiquaari Rode, niyaco. Nojuajaari juucua catecanoquuaari tohuateyaji, na

niquiniuria cante quiriquiaani. <sup>14</sup> Nojuajaari saaja Pedro tojishii tia camaru jiyaniquiyano, na tootiu na riatanura nocuaji. Niyacoo tojishacari seetanujuanaa Pedro rupaa, majaari tootiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—[Pedrocuajaqui nooj, tohuateyaji nujuaatej!

<sup>15</sup> Pueyari saa niyacoo riucaquiaarijia:

—¿Quiaate paateya? Teyano Pedrote nujuatesaarucuaacuajani.

Niyacoori nojori sequenu pacutequiaariuhua:

—[Taaquiriiriniij! [Pedrocuaaquiniatejaj, nooj nujuatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaaja.

<sup>16</sup> Nojori nacoosacari tiaco, Pedroori tohuateyaji piquijiriquiaajaa. Tootiu jaara socua riatasaaquiaari, nojuacuajaari quiriquiaa. Pueyari na niquishacari shiri-iqitiuquiaari. <sup>17</sup> Pedroori nojori sanaajaree jiyacari na juaashiquiata. Cuniqiu quiniaa pohuatereeri taa Pueyaso tohuaterohua nojuaja nujuatejojuajini. Pedroori naa sequequiaari nojoritij:

—Niocua naa pohuatate Santiagojuhuaj, parta Jesucua tiuuniaano.

Na nuhuaji, Pedroori tiji tohuatacuhua. Tamaqui quiaareeri.

<sup>18</sup> Jaara juhuaquequiaari, nujuatejojuajinia cojuanaa soldadohuari jiyanohua shiriqitiuquiaari. Majaari nojori niishiniu quiquiaari taa Pedro miirii nujuatejojuajini nojori tajinijini. Tama nojorijiaarijia naa sequetuquiaari na puerenuta:

—[Pa jiyaniijia Herodesri quiarijia pa puecoonutaniya, maninia pa cojuaaquiniuucua Pedro!

<sup>19</sup> Herodes niishishacari, na shuriucua nujuatunaa soldadohua jiyaroquiaariiri nujuatejojuajinia nojori pajenura Pedro. Nojori jaara na riurataaquiquiaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequeree nojori shuriucujini. Na nuhuaji, Herodesri jiyanohua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniuucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

### Herodes shaajenujiniji pohuatasano

<sup>20</sup> Jiyacaritij, Herodesri jiyanohua juaariquiaa Tiro tiacajinia quiniaa pueyata, Sidón tiacajinia quiniaatano. Nio caapiqui tiacajinijinio pueyari jiyaniijia Herodes tiacajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequeree:

—Quiocua quia jiyaniijia sequere, canaa nata jiyanoootoonu paniani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia

maqueja cojuana quiquiaarijiaariuhua. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiitiasano pueyajiniji. Nojoriiri jiyamitia jeecatoonu paniriquiaa cuno jiyaniijia, maninia nojori quiniuhua nata, Herodes niqitiojotenuhuara na jiitiasano pueya na miajajaura Sidón tiacajinijinio pueya, Tiro tiacajinijinio pueyano. <sup>21</sup> Herodes seruuri nojori sequequiaariuhua:

—Niocuaana tamonu juuca nimia, jiyaniijia nia pocoojonura.

Na nuhuaji, cuno pueyari na sequesano juucajinia niquiaariuhua. Jiyaniijia Herodesri nojoriicujia maniniushiquiaari. Na maniniuqui toque cushiquiaari. Jiyaniijiaacuajinio shipinishano cajitiujinia cajiriohuari. Tiji pocuaquiaari cuno pueyacuari. <sup>22</sup> Puetunu cuniqiu quiniaa pueya tojishacari naa maninia Herodes pocuaano nojori niquiaratej, nojoriiri naacoonu coteequiaari. Naa sequetuquiaari na na-coosacariiri:

—[Nio pueyano pocuaani, majaari nareja pueyano! [Nojuajaqui Pueyaso!

<sup>23</sup> Pueya sequesacari naa Herodestej, nojuajaari juhua shuquiuriosaaquiaari saajaruhua. Majaari quenaa cuno pueya na sequenu quirii: "Maja naa cua sequetunutej. Janiya maja Pueyasoni". Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

<sup>24</sup> Pueyaso rupaari saniniuujia socua niyacasaaquiaari, tiquiyocua pohuatasacari puetunu pueya niquiarajanaa. Naacuajitij, Pueyasocua tiuuniaa pueyari socua queraatiara canequiaarijuhuaj. <sup>25</sup> Bernabé, Saulonio, nojori jaara niqitioquiaari cumaneeca Jerusalén tiacajinia Pueyaso pueya jiitianaa, nojoriiri ritia quiojoquiaariuhua Antioquiya tiacajiniahua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijuhuaj Marco.

### Saulo Bernabeeta rucanejonu coteesacari Jesujiniji pohuatanura tiquiyocua

**13** Antioquiya tiacajinia Jesucua tiuuniaa pueyajinijinioni, noojiaqueyari quiquiaari Pueyaso sequenu panishano Pueyaso pueyara caminiujunaa. Quiquiaarijiaariuhua Pueyaso Rupaa niishitiojona. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijiaariuhua Saulo. <sup>2</sup> Tamonu juuca, puetunu nojorijianaari Pueyaso secojonuuriquiaa. Cuno juucajuahuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miiriquiano, taa cua sequequiaari tariucuacaanu-cuajani.

<sup>3</sup>Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanoahuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanoahua Pueyaso Sohuanu cumaacata.

### Jesujiniji pohuatasacari Chipre jiyajinia

<sup>4</sup>Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nu-cuaco Seleucia tiacajiniara, shoniacu caminia casaqueyaji. Nojoriiri cuniquiji quiaquiaari puereetuuca buquejinia Chipre jiyanihano jiyajiniara. Chipre jiyari jiya tucuaatija, shoniacu caminia jiuujajinia.

<sup>5</sup>Nojori tiuquijiosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajiniaqueyajaanaari. Juanri nojoritia quiriquiaajuhuj, nojori naacuriquiano. <sup>6</sup>Naa nojori rucojosacari Pueyaso rupaa pohuatanura Chipre jiya tucuaatijaacuatej, socua tiuquijioseequiaari Pafos tiacajiniara Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacuaja Pueyaso sequenu panishano caminiujunia pajaniyarani”.

<sup>7</sup>Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanoahua niishijia quiquiaari. Nojuajaari Bernabé masuuquiaari Saulonio, nojori pohuatanura Pueyaso rupaa nojuaja.

<sup>8</sup>Cuno shimiacu sesaari Griego rupaajinia seque-saaquiaari Elimas. Nojuajaari saaja cuno jiyaniijia niquiara cuaracashitiquiaari Pueyaso rupaa. Naa se-queere cuno jiyaniijiaari:

—Maja cuno pojori tojiniu. Jiyanoahua sesaari nojori pohuatasano. Quia sapojotiuyano.

<sup>9</sup>Saulo sesaari Pablo quiquiaarijuhuaj. Jiyacari, Pueyaso Sohuanu cumaquishacari nojuaja, Pabloori jiyanoahua shitimia shimiacu jiquioco shootiaree naa na sequesacari nojuaja:

<sup>10</sup>—[Sesaaca niyanu sequenaa! [Maninia miijiaa paracaajianaa! ¿Casaara pueya quia tenujiya Pueyasoocuaajini? <sup>11</sup>[Cua Jiyaniijiaari quiarjia quia saniitionutaniya! [Quiaari cariojuarura quiniutianiya seetanujuaanaa! [Quiaari pasaja tarishiniutianiya cariojuaru quia quishacari!

Jiyacaritij, juhua niniquiaari na namijiajinia cajimiaa. Cariojuarura quiquiiri. Juhua ninishiqui quiaquejoquiaari puetunu cunocojuanaari, na juaashiquiajiniji na jaatucusaanura juucua. <sup>12</sup>Cuno jiyaniijia jaara naa niquiquiaaritij, Pueyasoocua tiuriiri na niquiara nojori pohuatasacari shanohua Jiyaniijia Jesujiniji.

### Pablo, Bernabé quishacari Antioquiya tiacajinia, Pisidia jiyajinia

<sup>13</sup>Pabloori na cojiniaata Pafos tiacajiniji quiaquiaari buquejinia Perge tiacajiniara, Panfilia jiyajinia. Juanri Perge tiacajinia cateseequiaari nojoriicuaaji. Tiji riujuuquiaariuhua Jerusalén tiacajiniohuari. <sup>14</sup>Na nuhuaji, Pabloori Bernabeeta Perge tiacajiniji quiaquiaari Antioquiya tiacajinia. Antioquiya tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca secojonuujua tiajinia. Na tiuquishacari, cajitiushiiri. <sup>15</sup>Jiyacaritij, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujunia naajiotasanoori serojosaaquiaarijuhuaj. Na nuhuaji, rerejojua tia camarnuuri naa sequequiaari Pablo, Bernabeeno:

—Cuarta Judiocuacanaa, niaa jaara Pueyasojiniji nia niishishano casaa sequenu paniri, nia niishitiojore quiarjia niya quiniaa niquiara.

<sup>16</sup>Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, niajaniyajujuaj, canapuate Pueyaso tojitiajacacuajani tamasaca pueyapuejinijinio. <sup>17</sup>Paari sequequiaani: “Pueyasoori pa Jiyaniijia, Israel pueya pa quiniuucua”. Seetanujuaanaa, paacuajaari Pueyaso saquiriojosano pueyacuajinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriquiano. Na nuhuaji, jiyanoahua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiquiaari cuno jiyajiniji na cumaacata. <sup>18</sup>Cuarenta marijaari pa supuetanaa shoconujuquiaari pueyaracaanu nojori rucojosacari najuhua-na cariiquia jiyajinia. Pueyasoori jiyacari nojori rejere-taquiaari na tojitiaaquishacari nojuaja. <sup>19</sup>Na nuhuaji, Pueyaso cumaacata, siete tamaatiuucua rupaa pocuajaca taucuacaari puecoosaaquiaari Canaán jiyajiniji, saniniuujia cuno jiya na niquitosocoriquiano pa supuetanaa. <sup>20</sup>Pa supuetanaa jaara Canaán jiya camaruhua quiquiaari tari, socua cuatrociento cincuenta marijaari nojori shoconujuquiaari saaja nequesoreenaa jitiiasacari nojori. Na nuhuaji Samuelri nojori nequesoreenara jiyatesaaquiaarijuhuaj. Nojuajaari Pueyaso sequesano caminiujunia quiquiaarijuhuaj. <sup>21</sup>Samuel quishacarijia, pa supuetanaari Pueyaso secojonuuquiaari na panitiushacari jiyaniijia, nojori jitiariquiano nequesoreenaa niti. Naacuajitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niquiohuacuajinio supueno pueyano. Saúlri nareja cuarenta marija shocotejoquiaari pa supuetanaa jiyaniijia na quishacari. <sup>22</sup>Na nuhuaji, Pueyasoori Saúl sojotaquiaariuhua Saúl tojiyaquiniuucua nojuaja. Saúl niti David jiyatequiaariuhua Israel pueya jiyaniijia saniniuurijia. Pueyasoori naa sequequiaari Davidjiniji, na timitiasacari nojuaja: “Isaí niyanu Davidcuajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

<sup>23</sup> Quiari naataja, Pueyasoori na sequesano tohuatee-  
quiaari na mueratesacari pocuaji Tacuna. Nojuajaari  
Jesu, David niquiohuacuajinio supuenoni. Pueyasoori  
na seerataquiaari Israel pueyacuaji Tacuna  
quiriquiano, taa na sequequiaari tariucuacaanucua-  
jani. <sup>24</sup> Jesu coteyaquishacarijia rucuanenu na Quejiniji  
pohuatanura, Tiuquinijiona Juanri coteenu nocuaji po-  
huataquiaari Pueyasojiniji puetunu Israel pueya  
niquiarajanaa. Tiuquinijiona Juanri nojori sequequiaari  
noojia nojori tacatonuhua Pueyasocua, naajuhua,  
mojinia nojori tiuquinijiosaana, Pueyaso tojjijara  
nojori quiniuria. <sup>25</sup> Quera Tiuquinijiona Juan shaaje-  
sacari, nojuajaari naa sequequiaari: “Janiyari maja  
Pueyaso Jiyarosanoni taa nia jiyaniquiaa najuhua  
janiyacujani. Na Jiyarosano cutaraari cua nuhuaji  
niniutianiya. Nojuajaari seetanujuanaa Jiyaniijajanaa  
cutara. Janiya maara jiyanoohua shuquiriaatia quirini,  
nojuaja jaara cua sequere na serura cua quiniuria que-  
naaja na sapatu cua a jocuanura nera. Nojuaja cutaraari  
saaja maninia miijia”.

<sup>26</sup> Cuarta pueyanaa, niajaniya cante Abraham niquio-  
huacuajinio pueyacuajani, cua tojitiare, niajaniyajuhaaj  
taucuacanaa, canapuate Pueyaso tojjiacacuajani. Ni-  
aaranoori nio maninia rupaa Pueyasojiniji, nia  
jiyanooshaanura sesa nia miishanojiniji. <sup>27</sup> Jerusalén  
tiacajinia quiniaa, mariyata na camarucuanio, nojoriiri  
maja na niishiniu quijia cante Jesu quiquiaarini. Ma-  
jaari nojori niishitiuniu quiquiaarijuhuaj Pueyaso se-  
quesano caminiujiuniaa naajiotasano tariucuacaanu.  
Cunoori najuhua nojori serojonuusano puetunu  
samaatenu juucajanaa. Naacuajitij, nojori jaara mo-  
quiaari Jesu, maninia tohuateequiaariri Pueyaso se-  
quesano caminiujiuniaa naajiotasano, taa Jesujiniji se-  
quesaaquiaari tariucuacaanucujani. <sup>28</sup> Jesuuri see-  
tanujuanaa maja na miiniu quiquiaari sesa. Tama no-  
jorijiaarijia juhua sesa miijia na jiyatequiaari cutara.  
Naacuajitij, Pilato sequetuquiaariri cuaara na moteer-  
anoj. <sup>29</sup> Nojori jaara tari miiquiaari taa nojuajiniji naa-  
jiotasano quiya tariucuacaanu Pueyaso Rupaajiniacua-  
jani, na roshintiuquiaari niyacutesanojinijiiri. Raaco na  
niatureeri. <sup>30</sup> Naajaa, macu na quishacari, Pueyasoori  
saaja na samiitianiquiaariuhua. <sup>31</sup> Na samiitianu  
nuhuaji, Jesuuri sequerarucua na pueyacuacia muer-  
anacujuquiaari, noo pojoriicua canapuate na tara-  
jaquiaari na quiasacari Galilea jiyajiniji Jerusalén tiaca-  
jiniaracuajani. Nojoricuajaari quiarijia nojuajiniji poo-  
jotaniuhua puetunu pueya niquiarajanaa.

<sup>32</sup> Canaari timiyani canaa pohuatasacari niajaniya,  
Pueyaso pohuatasano pa supuetanaari tari tohua-  
teecanu! Pocuaji Tacunacuajaari tari miiquianu  
puetunu pa jiyanooshaanurajanaa! <sup>33</sup> Seetanujuanaa,  
Pueyaso sequesano pa supuetanaa Israel pueyarani,  
cunoori shusha pajaniyara tohuateecanu, pa  
supuetanaa Israel pueyacuajinio pa quiniuucua.  
Pueyasoori tari tohuateecanu na sequesano pajani-  
yara, na samiitianishacariuhua Jesu, naatej, taa David  
jaaquequejonee Salmojinia na sequesano quiyacu-  
jani. Naa naajiotasano quiyari segundo Salmojinia:

“Quiaari cua Niyanucujaja. Janiyari quiarijia quia sami-  
itianiriini”.

<sup>34</sup> Pueyasocujajaari sequequiaari, nojuacuajaari na  
samiitianiniutianiuhua na moqueyaquiniuucujia na  
raaco. Nioori naajiotasano quiyajuhaaj tariucuacaanu  
Pueyaso Rupaajinia. Naa sequeyari:

“Janiyari maninia niaara miiniutianiyanini taa cua se-  
quequiaari Davidcujani”.

<sup>35</sup> Naa naajiotasanoori Jesujiniji quiyajuhua David  
jaaquequejonee Salmojinia:

“Majaari quia panishano seru cuaqueya quia shana-  
cunu quiniutianiya na moquenura”.

<sup>36</sup> Pueyanaa, paari seetanujuanaa niishiyani Davidri  
puetunu Pueyaso panishano na miiniu nuhuajijanaa  
shaajequiaari. Nojuajaari na supuetanaa rupuequiaari  
macunucua quiquiojinia. Na cuaqueyari seetanujua-  
naa moquequiaari cutara. <sup>37</sup> Noo Jesu saniniuuja,  
Pueyaso cutaraari na samiitianiquiaariuhua. Majaari  
na moquenu quiquiaari cutara. <sup>38</sup> Cuarta Israel  
pueyanaa, nia cumaati canaa pohuatasano niishiya.  
Canaari Jesujiniji nia pohuataani. Naa jaara nocua tiu-  
uri, niaari sesa nia miishanojiniji jiyanooshaanutaniya.

<sup>39</sup> Moisés Rootasanojinia, paari tariucuacaanu niishitio-  
josaaquiaarini pa seya pa puecoonura Pueyasora,  
Pueyaso jiyanooniuria pajaniya sesa pa miishanojiniji,  
maja pa mosaanura saniniuuja. Majaari seetanujua-  
naa pa jiyanooshaanu quiquiaari naa pa miishacarijij.  
Quiarijia cutara, canapuate Jesuucua tiuya saniniunijia,  
nojoriiri puetunu sesa na miishanojinijijianaa  
jiyanooshiya. <sup>40</sup> Naa cutaraari cocuaatia miiniutianiya  
pueyanaa, nia jaara cua pohuatasano ruuretare.  
Pueyasoori na tojiyashijiaca saniitionutaniya taa tariu-  
cuacaanu Pueyaso sequesano caminiujiuniaa seque-  
quiaaricujani. Naa sequetuquiaariiri:

<sup>41</sup> “Nia tojitiare, rerequetejacanaa. Niaari jiuujiatenu-  
taniya najuhuanaj. Na nuhuaji, niaari shaajasaanu-  
taniyajuhaaj. Janiyari Pueyasoni. Janiyari tarijia nia  
niquishoo casaa miiniutianiyanini. Tamasaca jaara nia  
pohuatate, niaari saaja na cuaracashitiniutianiya”.

<sup>42</sup> Na nuhuaji, Pabloori narta Judiocuaca rerejojua tia-  
jiniji tohuareetaquiaariuhua na cojiniaata. Taucuacaari  
tii quiriquiaajuhuaaj. Nio taucuacaari Judiocuacaacua  
pacunaa quiquiaari, Judiocuaca nojori quiniuriajuhuaj,  
Pueyaso sequesano tojitianaara na quiniuria. Nojoriiri  
Pablo sequequiaari, Bernabeenio:

—Niocua tamonu sábadu canaa pohuatareeruhuaaj,  
socua canaa tojiniuria Jesujiniji.

<sup>43</sup> Nojori quiojosacariuhua Judiocuaca rerejojua tia-  
jiniji, queraatia narta Judiocuacaari nojori nuhua-  
jiquiaari, queraatia taucuacajinijinio Judiocuacaacua  
pacunaanio. Cuno pojoriiri maninia Moisés niishitio-  
josano tojitianaa quiquiaari. Nojoriiri Pablo, Bernabé  
nuhuaji sacuariquiaa. Naaratej, Pabloori Bernabeeta  
naa rootaquiaari nojori:

—Saaja Pueyasocua tiuujiaca nia quiri. Majaari  
nocuaji taacanuunu. Nojuacuajaari pa cumaquijia.

<sup>44</sup> Cuno nuhuaji, Sábado juuca jaara tari quiquiaari,  
quera puetunu cuno tiacajiniji pueyajanaari Pueyaso



rupaa tojiniuucua rerejoquiaari. <sup>45</sup> Judiocuaca secojo-  
jua tia camarucua jaara niquiquiaari queraatia pueya  
na rerejojuajinia mishiyano, Pablo pahuatasano na to-  
jitianura, nojoriiri juaaquioquiaari. Nojoriiri tama se-  
quetooquiaarijiaaja:

—Puetunu pueyajanaari cuno pojori tojitiajacara  
quiniutianiya. Pa tojiyaquiniutianiya saniniuuriija.

Naa sequeturiquiaa pueya niquiara Pablojinijiaari-  
uhuj:

—[Pabloori maja maninia na niishiniu Pueyaso ru-  
paa! [Najuhuaana sesa pahuataano! [Nojuajaari ni-  
shiyashijia!

<sup>46</sup> Pabloori saaja Bernabeeta sequequiaari na  
puereyaquiniutia:

—Maniniacuajaqui, cuarta Judiocuacanaa. Canaacua-  
jaari naa panitaja nijaniyatej, Pueyaso rupaa canaa  
coteetanura pahuatanu nijaniya, Pueyaso saquirio-  
josano Judiocuaca nia quiniuucua. Niaacuajaari saa na  
ruuretarejaa. [Majaquiiri nia rishiniu paniniu,  
pueyaracaanu nia quiniuria Pueyasota! Quiarijiani,  
canaari saniniuujia taucuacaacia quianutaniyani,  
Pueyaso rupaa canaa pahuatanura nojori niquiara.

<sup>47</sup> Canaa Jiyaniija jaara canaa jiyaramiquiquiaari, no-  
juajaari naa canaa sequequiaaritij: “Quia jiyatequiaari  
mijiria cuhuatariquianonijia. Quia pahuatasano janiya-  
jinijiri caminiujiushaanutaniya taucuaca niquiara  
puetunu jiya puequeetujiniajanaa, Pueyaso jiyanooni-  
uria nojoriijuhuj”.

<sup>48</sup> Cuniqi quiniaa taucuaca jaara naa tojiqiaari se-  
queshiyanotej, nojoriiri shuquiriquiaari. Pueyaso ru-  
paa maniuhuaqueetareeri. Sequetureeri:

—[Jyanohua maninia pa Jiyaniija Pueyaso rupaa!

Teyano pueya Pueyaso saquiriojoquiaari tariucua-  
caanu na pueyara quiriquianocujani, pueyaracaanu  
nata rishiniuriacuajani, jiyacaritij, nojoriiri Jesuucua tiu-  
uquiaari. <sup>49</sup> Jiyaniija rupaari pahuatasaaquiaari  
puetunu cuno jiyajiniajanaa. <sup>50</sup> Judiocuacaari na juaa-  
niutia Pueyaso panijiaa maajipohua shiniujuquiaari  
na cojitiuniuria nojori, nojori miiniuria naquiya Pablo,  
Bernabeenio. Naa rootatuquiaari cuno tiacajiniji ca-  
marucuajaariuhuj, mariyata cuno jiyajiniji nojori  
taanunura Pablo, Bernabeenio. <sup>51</sup> Naaratej, na  
nuhuajiria, Pablo, Bernabeenio, nojoriiri na nihuaca-  
jiniji seseeca rapijionuutaquiaari. Naacuajitij, Antio-  
quiya tiacajinia quiniaa pueyari niishiquiaari, Pueyaso  
saniitosacari nojori, majaari nojori Pabloori, Berna-  
beecua na tiutianu quiniutianiya Pueyaso jiyano-  
yacuquishacari nojori. Na nuhuaji, Pabloori Bernabeeta  
cuno tiacajiniji quiaquiaari Iconio tiacajinia. <sup>52</sup> Jesuucua  
tiunuaa pueyari saniniuujia shuquiriaatia jateequiaari  
Antioquiya tiacajinia, nojori jiiatasacari Pueyaso So-  
huanu.

#### Pablo, Bernabé quishacari Iconio tiacajinia

**14** Pablo, Bernabeeta naa miiquiaarijuhua Iconio  
tiacajinia. Nojoriiri narta Judiocuaca rerejoju-  
tiajinia tiuquitiaquiaari. Nojoriiri tii pahuataquiaari Je-  
sujiniji puetunu nojori niquiarajanaa. Queraatia

pueyari Jesuucua tiuquiaari, Judiocuaca, taucuacanio.  
<sup>2</sup> Noojiaqueya Judiocuacajinijinoori maja na tojiniu  
paniniu quiquiaari Jesujiniji pahuatasano. Cuno pojori-  
iri taucuaca shiniujuquiaari nojori juaaniuria Jesuucua  
tiunuaa pueya. <sup>3</sup> Pabloori, Bernabeeta cunora socua  
jiyojequiaari pueyaracaanu cuniqi, Jesuucua tiunuaa  
nojori cumaquiniuria. Nojoriiri maja na puerenu  
quiquiaari Jiyaniijaajiniji nojori pahuatasacari. Seetanu-  
juanaa, Jiyaniijaari nojori naacuquiaari jyanohua cu-  
tara maninia miishano nojori miiniuria, pueya naatani-  
jionurajuhuj. Jiyaniijaari nojori naacuquiaari cuno  
pueya niishiniuria, seetanujuanaari quiquiaari Pablo,  
Bernabé pahuatasano. <sup>4</sup> Cuno tiacajinia quiniaa  
pueyari raquitiquiaari. Noojiaqueyari tama narta Ju-  
diocuaca tojiquiaarijiaaja. Saniniuujia, tamasaari Je-  
su jiyaramiquishano pueya tojijara quiquiaari. Nojori-  
iri naa quiquiaari cuno tiacajinia. <sup>5</sup> Naa nojori  
quishacaritij, Judiocuacaari taucuacata rojotooquiaari  
cuno tiacajinia jiyaniijanucua. Naa rojotooquiaariiri  
nojori sesacanura Pablo, Bernabeenio, na jacutunura  
saitiajuhuj. <sup>6</sup> Pablo, Bernabé jaara niishiquiaari naa  
cuno pueya miiniuria panishacari nojoritij, tiji mashiyocu-  
atuquiaariiri Licaonia jiyajiniara. Nojoriiri Litra tiaca-  
jinia quiojoquiaari, Derbe tiacajiniaranio, cuno  
caapiqi tiaca shocua quijiaa tiacajinjuhuj. <sup>7</sup> Nojori-  
iri tii poojotaquiaari Jesujiniji nojori niishishano.

#### Litra tiacajinia pueya jacutusacari Pablo saitia

<sup>8</sup> Litra tiacajinia quiquiaariiri sesarunocua pueyano.  
Majaari na rucuanenu quijia. Nojuajaari naa  
rasaaquiaarijuhuanajaj. Majaari na pooniniu quijia na  
cajtijiniji. <sup>9</sup> Cuno pueyanoori Pablo tojiriquiaa na po-  
huatasacari Jesujiniji. Pablo jaara na niquiquiaari, na  
niishiriiri nojuajaari seetanujuanaa tiuuriquiaa na po-  
huatasanoocua. Naa Jesuucua na tiuuniuucuatej,  
Pabloori niishirii cuno pueyano na naata na cashacu  
jeequenuhua. <sup>10</sup> Pabloori jiyamitia jyanohua na se-  
quere:

—[Maninia quia nujuare! [Maja porequetanu!

Cuno pueyanoori ritia sanequee. Rucuanenu saniri-  
iri. <sup>11</sup> Cuno Licaonia pueya jaara niquitiuquiaari naa  
Pablo miishanotej, nojoriiri tama na rupaajiniaaja se-  
quetuquiaari:

—[Cumaacaraca quijiaaari juhua pueyasohua pocua  
rosetareeni, juhua pueya niquishano!

<sup>12</sup> Naa nojori sequesacaritij, majaari Pablo, Bernabé  
niishiniu quiquiaari nojori sequesano tama nojori ru-  
paajiniaaja. Cuno pueyari Bernabé sesojoree Júpiter-  
ta, juhua nojori pueyaso sesa. Pabloori sesojosaa-  
reecujua Mercurio, jyanohua pocuanu niishijia na  
quiniuucua, juhua nojori pueyaso Mercurio. Nio  
sesacaari Licaonia pueyapue pueyasohua sesaca  
quiquiaari, nojori jiiatasano juhua na pueyasohuara  
cuno jiyajinia. <sup>13</sup> Júpiter secojojua tiaari Litra tiaca to-  
huateya shuriucua quiquiaari. Jiyacaritij, Júpiter secojo-  
jua tia cojuanaari juyaca jaatucunuuquiaari,  
Pablooruara nojori puecoosocoriquiano Berna-  
beecuaranio, juhua nojori pueyasohuacuara.

Maniniushitiajara naana shuucuaca shiyosano pa-tootaquiaariijaariuhua. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecoosacari nojori-icuaa juhua Pueyasooocua. <sup>14</sup> Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

<sup>15</sup> —[Pueyanaa! ¿Casaara naa nia miya canaani?

[Canaari nareja pueyani taa nijaniyacuaani! [Canaari naacua niyarucuaa niaacuatej canaa sequenura nijaniya, puetunu nio najuhua nia miishanojuanaa nia cartenura! [Saaja nia shuquiritiare cutara pueyara-caanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. <sup>16</sup> Pueyasoori tarijia puetunu pueyanaa tarinitiaquiaari nojori miiniuria tama nojori panishanojuaja. <sup>17</sup> Naajaa, nojuajaari pa supuetanaa ni-shitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

<sup>18</sup> Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojori-icuaa na puecoonu panishano juyaca.

<sup>19</sup> Jiyacaritij, Antioquiya tiacajinijinio Judiocuacaari tii tiuquijioseequiaari, Iconio tiacajinijinionio. Nojoriiri cuniqui quiniaa naso Josee Pabloocua, Bernabeecuaranio. Cuniqui jacuturee saitia Pabloori. Nojori jaara jyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari.

<sup>20</sup> Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

<sup>21</sup> Jaara Jesujiniji pahuataquiaari tii, queraatia pueyari Jesuucua tiuquiquiaari. Na nuhuaji, nojoriiri Derbe tiacajiniji riujuuutiaquiaariuhua. Tiuquijioquiaariuhuari Lистра tiacajinia, Iconio tiacajinia, Antioquiya tiacajinianio. <sup>22</sup> Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuate Pueyaso shuriucua quiriqianoni, nojoriiri naquiya miiniutianiya mijiria.

<sup>23</sup> Nojoriiri maninia Pueyaso tojjijaca pueya saquiriojotuquiaari, nojori jiyatesocoriquiano Pueyaso pueya jitiariquiano. Naa miitiuquiaari puetunu cuno tiacajiniajanaari, Pueyaso pueya jiitianura tama nojori nacasunaajaaja. Jesu saquiriojosano pueyari maja na miacquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jitiariquianoocua:

—Canaa Jyanijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiitianura maninia.

### Pablo tacatesacariuhua Bernabeeta Siria jiyajinia Antioquiya tiacajiniara

<sup>24</sup> Nojori riujuuuniuhua Antioquiya tiacajiniohuara, Pisidia jiya shocotumohuari. Na nuhuaji, tiuquijioquiaariuhua Panfilia jiyajiniaari. <sup>25</sup> Tii Pueyaso rupaa pahuatatuquiaari Perge tiacajiniaari cuno pueya niquiara. Nojori pahuatanu nuhuaji, Atalia tiacajinia quiojoquiaariijaariuhua. <sup>26</sup> Cuniquiji, buquejina jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuaaanu nojori quiojonura Pueyaso rupaa nojori pahuatanura tucuaa. Cunoori quiquiaari shushajanaa nojori coteenu panishacari rucuanenonu tamaquicua. Naacuajitij, nojori tohuatenunu nuhuaji puetunu Pueyaso panishanojuanaa, jiyacari shusha tiuquijioriquiohuari. <sup>27</sup> Antioquiya tiacajinia nojori quishacari tari, nojoriiri puetunu Jesuucua tiuunia pueya masuunujuquiaarijanaa. Cuniqui pahuataturee puetunu nojori niquiarajanaari, taa Pueyaso naacucanu maninia nojori pahuatasacari Jesujinijini. Pahuatanuuquiaariijaariuhua taa Pueyaso taraajetequiaari tucuaa jiuujani, Jesuucua nojori tiuuniuriajuhuaj. <sup>28</sup> Pabloori, Bernabeeta cuniqui tarishiquiaariijaara narta Jesuucua tiuuniaata.

### Jesuucua tiuuniaa jiitianaa nacoosacari Jerusalén tiacajinia

<sup>15</sup> Jiyacaritij, Judea jiyajinijinio pueyari Antioquiya tiacajinia quiojoquiaari. Nojoriiri tii sesa niishitiojonu coteequiaari cuniqui quiniaa Jesuucua tiuuniaa pueya. Nojoriiri naa sequeriquiaa Antioquiya tiacajinia quiniaa narta Pueyaso pueyatej:

—[Pueyanaa, Jesuucua tiuuniaa pueya cuara na cararaatiuuquia co miatejoteera, taa Moisés niishitiojoquiaaricuajani! [Jaara mialesoo quiri, majaari Pueyaso jiyanoonu quiniutianiya jyanotej, na pueya nojori quiniuria!

<sup>2</sup> Pablo, Bernabeenio, nojori jaara tojiquiaari naa cuno pojori niishitiojosanotej, nojoriiri cuno pojoritia nacojoquiaari jyanohua. Naacuajitij, Antioquiya tiacajinia quiniaa Pueyaso pueyari Pablo, Bernabé sequequiaari nojori quianura noojiaqueya cuniquijinio pueyata Jerusalén tiacajinia. Nojori jiyaroreeri na nequesotanura Jesu jiyaramiquishano pueya Jerusalén tiacajinia, mariyata Jesuucua tiuuniaa pueya jiitianaanio. Nojoriiri jiyaramiquishaaree cuno pojori nequesotasaanura, ¿setanutejanaa naa miishiyatena, taa cuno Judea jiyajinijinio nijiono pueya niishitiojiya canaacuajani?

<sup>3</sup> Naacuajitij, Pabloori Bernabeeta jiyarosaaquiaari Jerusalén tiacajiniara. Nojori quiasacari Jerusalén tiaca-

jiniara, Fenicia jiyacuma quiojomaquiaariiri, Samaria jiyacumano. Nojoriiri cuno jiyacajinia Pueyaso pueya pohuatanuumaquiaari taa taucuaca cartequiaari tama sesa nojori miishanojuajani, Pueyaso tojjijara nojori quiniuria. Jesuucua tiuunaa pueya jaara naa tojiquiaaritij, nojoriiri jiyanohua shuquiriquiaari.

<sup>4</sup>Nojori tiuquiiijosacari Jerusalén tiacajinia, puetunu Jesuucua tiuunaa pueyajanaari nojori rerejotaquiaari, mariyata puetunu Jesu jiyaramiquishano pueyajanaano. Pablo, Bernabeeri jiyacari nojori pohuataquiaari puetunujuanaa, naajuhuj, taa Pueyaso naacuquiaari maninia nojorini, nojori pohuatasacari taucuaca Jesujiniji. <sup>5</sup>Cuniqui quiriqiaajaariuhua Fariseocuaca, tariucua Jesuucua tiujujaca. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniani, na cararaatiuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjijara quiiria, taa Moisés rootaquiaari tariucuacaanucujani.

<sup>6</sup>Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuunaa narta pueya jiitianaata. Nojoriiri maninia niishiriojonuquiaari taa na miiniutianiyani. <sup>7</sup>Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijaari cua saquiriojoquiaari na rupaa pohuatariquiano taucuaca tojishocoriquiano, nojori tiuunuria Pueyasocujuhuj. <sup>8</sup>Pueyasocujajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuj, na Sohuanu na niquitiosacari nojori, taa na niquitioquiaari pajaniyacuaani. <sup>9</sup>Majaari nia jiyaniinu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya paniyajanaa. Cuno taucuaca jaara nocua tiuquiaari, nojuajaari nojori jiuujia jeequerejuhuaj saaja Jesuucua nojori tiushacari. <sup>10</sup>Naa nia tamacasacari taucacajinijinio parta Pueyaso pueyatej, niaari Pueyaso miishano sojotaaruhua. ¿Casaara nia tamacaa Pueyaso miishanoni? Niaari quiarjia Moisés niishitiojosano tojitiniu paniya Jesuucua tiuunaa pueya, juhua pa tojishanocuaa. Saniniuuujia, majaari quenaaja pa supuetanaa na naata na mininiu quiquiaari puetunujuanaa, taa Moisés niishitiojoquiaaricujani. <sup>11</sup>Paari niishiyani pa Jiyaniija Jesuuri pa jiyanoojia. Naaratej, pa jiyanoojiaari, na pueya pa quiniuria. Mariyata naa miiquianu cuno taucacajaariuhuj. Majaari seetanujuanaa maninia pa miiniu quiquiaari pa jiyanooshaanura.

<sup>12</sup>Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohuataquiaari taa Pueyaso na cumacata miitiquiaari maninia taucuaca niquiarani, naajuhuj, taa nojori naatanijioquiaari cusosuhujaniuhuj. <sup>13</sup>Naa nojori pohuatanu nuhuajitij, Santiagoori sequequiaarijuhuaj:

—Cuarta Pueyaso muerasunaa, cua tojitiare.

<sup>14</sup>Simón Pedrocuajaari tari pa pohuataree taa Pueyaso

cotecanu shusha na Sohuanuta poonijionura cuno taucuaca jiuujajiniani. Pueyasocujajaari nojorijinijinio jiyateya seetanujuanaa na pueyara, nojori maniniuhuaqueetanura nojuaja. <sup>15</sup>Seetanujuanaari nio. Naa-juhuj, tariucuacaanu Pueyaso sequenu panishano caminiujuuniaacuajaari naa naajionuutaquiaari Pueyaso sequesantej:

<sup>16</sup>“Janiyari David niquiohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijaanaa quiriqiano puetunu pueyapuerajanaa, taa David quiquiaari Israel pueya jiyaniijaacuaani. <sup>17</sup>Naacuajitij, puetunu taucacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijara janiya’.” <sup>18</sup>Jiyaniijaari naa sequeyquij. Nojuajaari tariucuacaanu pueya toquiaari nio.”

<sup>19</sup>‘Naaratej pueyanaa, janiyari nia sequeyani, nareja nia niquiri cuno taucuaca, Jiyaniija Jesuucua tiuuniani. Majaari nojori najiquitiniu Pueyasocujaji, nia tojitiinu panishacari nojori tariucuacaanu Moisés niishitiojosano. <sup>20</sup>Nareja nojoriicua pa naajiore. Pocua pa naajioneejinia sequere nojorini, maja tari nojori miacquenuunura shipinishano pueyasocujara na puecootusano casaa, juunu, borregonio. Cuaara qutiuria saa necocuatata, maja tamonu na numuetucunura socua. Jaara shu miaquetunu paniri, cuaara na miacquera puetunu na nanaca caatinijiasanojuanaa, naajuhuj, maja na miacquenuunura casami nanaca.

<sup>21</sup>Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiqiyocua tiacajinijanaa.

<sup>22</sup>Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuunaa pueyajanaano, nojori jiitianaajuhuj, puetunu nojorijianaari mariyata niishiriojonuquiaari. Naacuajitij, nojoriiri narta Pueyaso pueya saquiriojotuchiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijuhuaj. Cuno pojoriiri Jesuucua tiuunaa pueya tojishano quijia cutara, cuniqui Jerusalén tiacajiniani. <sup>23</sup>Nojoritia jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuunaa jiitianaano, Jerusalén tiacajinia niarta Jesuucua tiunaa pueyajuhuj. Canaari nia saruhuataani pueyanaa. Taucuaca nia quishacari, naajaa. Jesuucua tiuunaa nia quishacari, niaari canaa tapueyocujuhuj, tiqiyocua Antioquiya tiacajinia quijia, Siria jiyajinia quiniaano, Cilicia jiyajinia quini-aajuhuj. <sup>24</sup>Canaari niajanijiniji pohuataaarucuaani, niijiqui pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajaniya. Naajuhuj, nia cushitocanu-

uri nojori sequesacari nia cararaatiuuquia co nia mi-atejonura taa Moisés niishitiojoquiaaricujani. Nojoriniaari nia shiniujuquianu nia tojitanura socua Moisés Rootasanojuhuaj. Quiarijia maja naate pueyanaa. <sup>25</sup> Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. <sup>26</sup> Canaa panishano pueya Pablo, Bernabeenio, nojoriiri tama na cuaqueya panitiaquiaarijaa Jesujiniji nojori pohu-atasacari tiqiyocua. <sup>27</sup> Quiarijiani, canaari niaacua jiyaroya canaajiniinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutaniyani, naatej, taa canaa pocoojoree canaa rerejosacaricujani. <sup>28</sup> Canaa niishiriojosanoori maninia quiya Pueyaso Sohuanura. Canaari na shuquiritiaajuhuj. Majaari canaa cushionu paniniu nijaniya puera canaa supuetanaa niishitiojosanota najuhanaj. <sup>29</sup> Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijiosano pueyasohuacuara puecoosano casaa. Majaari nanaca miaquenu. Naajuhuj, niaa jaara shu miaquenu paniri, nia miaquere maninia na nanaca caatinijiasano. Naajuhuj, saaja nia niquiocohuata nia quiriqia. Majaari socua tamonu numuetucunu. Niaa jaara nio tojijia quiri, niaari maninia miyacuaja. Tariucujaja pueyanaa”.

<sup>30</sup> Naacuajitij, cuno cuatro pueyari jiyarosaaquiaari Jerusalén tiacajiniji. Jaara tiuquijioquiaari Antioquiya tiacajinia, nojoriiri puetunu Jesuucua tiuunaa pueyajanaa numootejoquiaari na rerejonura. Puetunu nojorijianaa jaara tari rerejoquiaari, jiyacari niquitiosaaquiaariiriri cuno naajionee puetunu nojori niquiarajanaa serojosocoriquiano. <sup>31</sup> Naajionee jaara serojosaaquiaari, puetunu Jesuucua tiuunaa taucacajanaari shuquiriquiaari jiyano. Naacuajitij, nojoriiri noojia cajitiquiaariuhua tacaquioyano juucua. <sup>32</sup> Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiiitiaquiaari, Pueyaso sequenu panishano nojori caminiujuuniuria. Naacuajitij, nojoriiri Jesuucua tiuunaa pueya cumanjiaquiaari jiyano. Na rootatuquiaariiri maja nojori tarinitianura Jesuucua tiuuni. <sup>33</sup> Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhujaniya nia quiaarohuaqui.

<sup>34</sup> Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniuhua. <sup>35</sup> Pablo, Bernabeeri Antioquiya tiacajinia camueenujuquiaarijuhuaj. Nojoriiri cuniqui Jesuucua tiuunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhuj. Puetunu nojori-

jianaari Jiyaniijia Jesujiniji pohuataquiaari tamasa niquiarajuhuj.

#### Pablo pacutenu panishacariuhua quianu Pueyaso pueya na niquiniuhua

<sup>36</sup> Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niquiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuunaa pueya quiyani.

<sup>37</sup> Bernabeeri na riuuaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijuhuaj. <sup>38</sup> Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco saaja-

jaaraniuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohu-atasacari pa tarajacanu maniniatucua? Naacuajaa.

<sup>39</sup> Saa nojorijiaari socua juayonuutaquiaari Juan Marcocua. Nocuaji Bernabeeri jiyacari Pabloocuaji rupatequiaari. Na rupatesacari na rupena Pablojiniji, nojuajaari Juan riquiaari cutara na tarajariquiano. Jiyacariitij, tama nojorijiaarijia buquejinia quiaquiaari Chipre jiyajiniara. <sup>40</sup> Pabloori saniniuujia Silas saquiriojoquiaari na tarajariquiano. Nojori quiaaquishacarijia, Jesuucua tiuunaa pueyari nocuara Pueyaso secojotujuquiaari. Naa na miituniu nuhuajitij, Pablo, Silasnio, nojoriiri panaatia quiaquiaari cutara Pueyaso rupaa pohuatanura. <sup>41</sup> Nojori quiasacari Jesuucua tiuunaa pueya shiniujuuniucua, Siria jiyacuma tajitiumiaquiaariiri, Cilicia jiyacumano. Pabloori cuno jiyaca tiacajinia socua poojotaquiaari Jesujiniji. Naa cumaquiquiaari Jesuucua tiuunaa pueyari.

#### Timoteo cojishacari Pablo, Silasnio

**16** Pabloori Silasta tiuquijioquiaari Derbe tiacajinia, Litra tiacajinianio. Tii riuriatatuquiaari Timoteo jyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunajuhuj. Timoteo queeri tahue quiquiaari cutara. <sup>2</sup> Litra tiacajinia Jesuucua tiuunaa pueyari Timoteo maniniucuatujua. Naa sequetujuaari nojori: “Timoteori jyanohua maninia pueyano”. Iconio tiacajinijinio Jesuucua tiuunaa pueyari naa sequetujajuhuj. <sup>3</sup> Naaratej, Pabloori Timoteo riniu paniquiaari na tarajariquiano. Cunora, coteenu Timoteo cararaatiuuquia co miatetequiaariiri, cuno jiyajinia quiniaa Judiocuaca sojotanuucujaj nojuaja. Puetunu pueyajanaari na niishijia, na queeri seetanujanaa tahue quijia. Nocuaji naa miishaareeri. Na nuhuaji, Timoteo cutaraari Pablo cojiquiaari. <sup>4</sup> Pabloori Jesuucua tiuunaa taucua niquiquiaari puetunu tiacajinijianaa. Nojori niquiara caminiujuquiaari Jerusalén tiacajiniji Jesu jiyaramiquishano pueya sequesano nojoririaari, mariyata Jesuucua tiuunaa

pueya jiiitanaa sequesanojuhuaj. <sup>5</sup> Naa Pablo caminiujiushacaritij, puetunu Jesuucua tiuuniaa pueyajanaari socua noojia cumaquiuaari jiyanohua. Tamasacaari socua Jesuucua tiuquuaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

#### Pueyaso Sohuanu tosacari Pablo, Macedonia jiyajiniara na quianura

<sup>6</sup> Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galicia jiyacumanio. <sup>7</sup> Naa tiuquiiioseequiaari Misia jiyajinia shuriucuaari. Nojoriiri cuniquiji quianu paniquiaari Bitinia jiyajinia juucua. Naajuhuaaj, majaari Pueyaso Sohuanu paniniu quiquiaari tii nojori quianura. <sup>8</sup> Cunora, Pabloori na cojiniaata cuaniquiaari Misia jiyacuma. Troas tiacajinia tiuquiiioseeri. Nio Troas tiacaari shoniniacu caminia casaqueyaji quiya. Tiiri buque tiuutiacojua. <sup>9</sup> Pabloori cuno niucua juhua na maquenujinia niquiquiaari Macedonia jiyajiniinio pueyano nocua nujuuaano. Cuno pueyanoori Pablo sequesquiaari: “Miji! Canaa quia naacutaquee Macedonia jiyajinia”. Cuno Macedonia jiyari quiquiaari shoniniacu caminia taquijiria. <sup>10</sup> Naa Pablo niquiniu nuhuaji juhua na maquenujiniatej, canaari jiyacari ritia pajequiaarini taa canaa quianutaniya cuniquijini. Canaari sequereeni:

—Pa quiaarequij! Pueyasocuaajaari pa panitiaa Jesujiniji pa pohuatanura cuno pueya niquiarajuhuaaj.

#### Pablo quishacari Filipino tiacajinia Silasta

<sup>11</sup> Canaari Troas tiacajiniji quiaquiaari buquejiniani. Canaari Samotracia jiyajinia tucuaatiajaacua tiuquishiini. Canaari cuniquiji sanequiaari tariquiniuhuaaj, tiuquishiiri Neápolis tiacajinia. <sup>12</sup> Canaari cuniquiji quiamaa Filipino tiacajiniani. Filipino tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajiniinio pueyari tii pacuquiaari tarijia. Nojoriiri cuno Filipino tiaca jiyatequiaari nojori quiquiora. Canaari tii camueenujuquiaari rupaquijiani. <sup>13</sup> Cuniqui canaa quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jitiquiaari Pueyaso secojonura. Canaari tii narejashiquijia cajitiquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiara pohuataree Jesujinijini. <sup>14</sup> Cuniqui maajipohua rerejosaquini, nojori tajinia quiquiaarijaariuhua tamonu maaji. Na sesa quiquiaari Lidia. Nojuajaari Tiyatira tiacajiniinio quiquiaari. Shanohua quenaaruqueya naatuque toqueya niquitiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pohuatasano tojiriquiaari. Pueyasoori jiyacari na tojeteree. Juhua noojia riatareeri seetanujuanaa Pablo pohuatasano na tojiniuria maninia. Jesuucua tiuuriiri. <sup>15</sup> Na nuhuaji, Lidiaari puetunu na

tiajinia quiniaatajanaa tiuquinijosaaquiaari moojinia. Canaa tiuquinijionu nuhuaji puetunu nojorijianaa, Lidiaari canaa sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojijiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

<sup>16</sup> Tamonu juuca, socua canaa pacutesacari quianu pueya secojonuujajiniara, canaari samaruraca niyaco niquiquiaarini. Cuno niyacoori camaruharaca quiquiaari. Niyacoori “niishijia samaru” jiiitaja. Naaratej, cuno niyacoori puetunu pueya niishiniu panishanojuanaa pohuataja nojoriiria. Naa na miishacaritij, na camaruhara maseja queraatia cumaneecaari.

<sup>17</sup> Cuno niyacoori canaa nuhuaji sacuriquiaa. Naa nacariquiaa canaa na nuhuajishacariiri:

—Nio canuu cutaraari jiyocuaaanuji Jiyaniijajiniji pohuataanaa! Nia niishitiojijari Pueyaso jiyanooshano nia quiniuria, pueyaracaanu nia rishiniuria nata.

<sup>18</sup> Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—Janiyari Jesucristo sesajinia quia jiyaroyani! Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiri.

<sup>19</sup> Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujajinia curotasano pueya cajitucujajiniaraari. Tiaca jiyaniijianucuaari tii quijiaa pueyaracaanu, nojori jiiitanura pueya. <sup>20</sup> Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesaanura. Jiyaniijianucua sequetureeri:

—Nio canuuri Judiocuaca! Nojoriiri niya pa tiacajinia quiniaa pueya juaatijiose. <sup>21</sup> Nojoriiri tamaatia niishishano niishitiojonuya. Maja cumaati pa tojiniunioj. Paari Romano pueyani!

<sup>22</sup> Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojoriiniji. Na nuhuaji, tamasaari seerataaaree nojori na mojoonura macata. <sup>23</sup> Jiyanohua na mojoosaanu nuhuaji, nojoriiri socua na tiuquinijioquiaari nujuatejojuaajinia. Na nuhuaji, nujuatejojua tia camarnu seerataaareeri maninia na cojuatenura nojori nujuatejojuaajinia. <sup>24</sup> Naacuajitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqui nujuatejosaaquiaariiri tii na cojuasaanura maninia, na mashiyocuatunuucuaaji. Nojori cashacucuaari suruhuatuneeca quejasano tajiniocoma saatijosaaquiaarijuhuaj.

<sup>25</sup> Cuno niucua shiyaqueya, Pabloori Silasta Pueyaso secojonuuriquiaajaa. Pueyaso maniniuhuaqueeta-

turiquiaari na jaaquequejosanota. Cuniqni nujuatejosano pueyari nojori tojtariquiaa. <sup>26</sup> Jiyacaritij, rijaari canashyaquiji jiuuquiutiaquiaari jiyanohua cuno nujuatejojua tia. Puetunu na tootihuajanaari riatequequiaari. Puetunu pueya numatucuaacua morojotasano casaajanaari tamajaaja saacarejetaquiaari. <sup>27</sup> Nujuatejojua camarnuuri ritia niucuaquiaari. Saaja niquirii puetunu tohuateya riatequenojuanaari. Cunora, na nijinaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jyanishacari puetunu nujuatejosano pueyajanaa naa-sucuaari tari mashiyocuatere. <sup>28</sup> Pablo jaara na niqiquiaari, nocua nacareeri:

—Maja najuhuana naa miiniutij! Ccanaacuaajaari puetunujuanaa niya quiyani!

<sup>29</sup> Nujuatejojua camarnuuri na shiriqiniutia tetcariquiaa. Tamonu sequereeri ritia samaritiu na pata-nura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaji mojq-quetaseeri. <sup>30</sup> Jiyacari nojori tohuatejoree carijini-acumaari. Nojori nequesotareeri:

—Pueyanaa! ¿Taa cua miyarinjia, Pueyaso jiyanooshano cua quiniuriajuhuaj?

<sup>31</sup> Nojoriiri na riucaree:

—Jiyaniija Jesucristoocua quia tiuuri jiyanooshano quia quiniuria, puetunu quia tiajina quinia quiniuria jiyanooshanojuhuaj.

<sup>32</sup> Naaratej, Pabloori Silasta na niqiara pohuataree Pueyaso rupaa Jesujiniji, mariyata puetunu na tiajina quiniajanaa niqiaranio. <sup>33</sup> Jiyacaritij, nujuatejojua camarnuuri cuno niucuaaja Pabloocua jyanooquiaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijosaaquiaari moojinia Jesuucua nojori tiuushacari. <sup>34</sup> Jiyacari na tiajina nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jyanohua shuquiriaatia quiriquiaa puetunu na tiajina quiniaatajanaa, Pueyasocua tiuuniaa nojori quishacari.

<sup>35</sup> Cuno tariqui, Filipino tiaca jiyaniijianucuaari na seya jiyaroquiaari nujuatejojua tia camarnuucua, na sequenura nojuaja cuaara Pablo, Silas tohuatanijioora tari. <sup>36</sup> Nujuatejojua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarjia niajaniya. Uuhujaniya nia quiaarohuaqui!

<sup>37</sup> Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhua? Canaa mojqooturiquiaacuaa puetunu pueya niqiarajanaari. Majaari coteenu canaa nequesoreesaanu quiriucuaa. Canaari jiyanojuuaa nujuatejosaarucuaani. ¿Taa na miituniu paniya quiarjia canaarini, jiyasohuaja tohuatejonu paniniu? ¿Jiyasohuaja mojqooturiquiaacuaa canaatucuaa? Cnojojijanaa cuaara niiria quiarjia, niqiqui nojori tohuatejonura canaa!

<sup>38</sup> Jiyaniijianucua seya jaara tacatequiaariuhua, puetunu Pablo sequesanojuanaa pohuataquiaari Fil-

ipo tiaca jiyaniijianucua niqiararaari. Nocuaji jiyaniijianucuaari pueretuquiaari nojori niishishacari Pablo, Silas Romano pueya quiquiaarijuhuaj. <sup>39</sup> Naaratej, cuno jiyaniijianucuaari ritia quiaquiaari nujuatejojua-jinia Pabloocua, Silascuanio, nojori jyanootioonura. Jiyaniijianucuaari nojori tohuatejosee. Nojori sequereeri cuaara quiojora quenaaja nojori tiacajiniji. <sup>40</sup> Naacuajitij, Pablo, Silas jaara tohuareetaquiaari nujuatejojuaajiniji, Lidia tiajina quiojoquiaariiri. Tii rootatuquiaari socua Jesuucua tiuuniaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

### Tesalónica pueya juaashacari Pueyaso pueya

**17** Pablo rucanejosacari Silasta Jesujiniji nojori pohuatasacari, nojoriiri jiyacari shoconuju-tuquiaari Anfópolis tiaca, Apolonia tiacanio. Naa tiuquijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojua tia. <sup>2</sup> Taate Pablo quijiacuajani, nojuajaari narta Judiocuaca rerejojua tiajina quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijanaa, samaatenu juuca, cuno pueya niqiara pohuataquiaari Pueyaso rupaari. <sup>3</sup> Pabloori nojori niishitiojquiaari taa tariucuaaanu Pueyaso sequesano caminiujiuniaa naajiotaquiaari Pueyaso Jiyarosocoriquianojinijicujani. Niishitiojquiaariiri cuno naajiotasanoori tari tohuateequiaari Jesu jaara naquiya miishaaquiaari, naajuhua, Jesu jaara na cusonu nuhuaji samiitiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari Pueyaso Jiyarosano pocua.

<sup>4</sup> Jiyacaritij, noojiaqueya Judiocuacaari Jesuucua tiuquiaari. Queraatia taucuaacari Jesuucua tiuquiaarijuhuaj, canapuate tari Moisés niishitiojosano tojjiaca quiquiaaricujani. Queraatia cuno tiacajinia quiniaa pueya tojishano maajipohuari Jesuucua tiuquiaarijuhuaj. <sup>5</sup> Pueyasocua tiuyashijia Judiocuacatej, nojoriiri juaaquiocuaari juhua shocotasano nojori quiniucua. Nocuaji, nojoriiri sesa miijiaa taajecori masu-unujuquiaari. Nooj, nareja rucojuaca tiacaacacotej. Cuno pojoriiri masuusaquiaari nojori na cojiniuria, tamasaca nojori nasojonura. Na nuhuaji, puetunu cuno pojorijianaa jaara tonujutooquiaari taa na miituniutianiyani, nojoriiri puetunu cuno tiacajinia quiniajanaa juaatiquiaari Pueyaso pueyacuara. Nocuaji, puetunu cuno pojorijianaari Jasón tiaco tiuquiti-aquiaari, Pablo, Silas nojori quioonura juucua, juaaquioyano pueya nojori niqitiosocoriquiano. <sup>6</sup> Nojori jaara na riurataaquiocuaari, noojiaqueya Jesuucua tiuuniaa pueyari Jasón ta cojiritiasaaquiaari quioonu. Cuno tiacajinia jiyaniijiacuacua na jayotuquiaariiri. Naa nacatureeri:

—Nio canuuri puetunu jiyacajinia pueya sesojijajanaa! Niyatiuquijioreejaariuhua naa na miiniuriajuhuaj! <sup>7</sup> Jasónri nojori masecanu maninia na tiajina! Puetunu nojorijianaari pa jiyaniija César sequesano

tojtiaashijiaca! [Nojoriiri saaja sequequiaa socua tamonu jiyaniijianaari quiya! [Na sesanaari "Jesu"! Naa sequetuquiaaqui nio pojori.

<sup>8</sup> Puetunu pueyajanaa, mariyata tiaca jiyaniijianucuanio, nojori jaara naa tojiquiaari sequeshiyanotej, nojoriiri juaaquoquiaari. <sup>9</sup> Jiyacaritij, tiaca jiyaniijianucuaari queraatia cumaneeca masequiaari Jasónjiniji, narta Jesuucua tiuuniaa pueyajinijinio. Naa sequeturee nojoriiri:

—[Pablo jaara niqiuji quiaaquiri, majaari canaa niq-uitionu quiniutianihua nia cumaneeca!

Naa na miishaanu nuhuajitij, Jasónri nata quioosano pueyata carteqesaaquiaariuhua.

### Berea tiacajinia Pablo quishacari Silasta

<sup>10</sup> Cuno niucuaja, cuno tiacajinia quiniaa Jesuucua tiuuniaa pueyari Berea tiacajiniara mashiquiquiaari Pablo, Silasnio. Berea tiacajinia na tiuquijiosacari, cuniqui quiniaa Judiocuaca rerejojua tiajinia quiojoquiaariiri. <sup>11</sup> Cuniqui quijia Judiocuaca cutaraari maninia pueya quiquiaari, maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niqiuara, nojoriiri maninia tojtiaquiaari na pohuatasano. Na nuhuaji, puetunu juucajanaa, tama nojoriijaarijia tariucuacaanu Pueyaso Rupaajinia naajiotasano pajenuuquiaari, nojori niishiniuria seetanujanaa quiriqiaate Pablo niishitiojosano.

<sup>12</sup> Naacuajitij, queraatia Judiocuacaari Jesuucua tiu-ucuaari, queraatia taucuacanio, canuu, mariyata queraatia tojishano maajipohuanio. <sup>13</sup> Tesalónica tiacajinia quiniaa Judiocuaca jaara niishiquiaari Ploori Berea tiacajinia Pueyaso rupaa pohuataseeecuahuaj, nojoriiri nocua quiojoquiaari nojori taanuunura nojuaja cuniquijijiuhuaj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria.

<sup>14</sup> Nocuaji, Jesuucua tiuuniaa pueyari cuniquiji ritia mashiquiquiaari Pablo shoniacu caminiajiniara. Silasri Timoteota Berea tiacajinia jateequiaari saaja.

<sup>15</sup> Berea tiacajinijinio pueyari Pablo mashitiquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajinihuara, Ploori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coqese.

### Pablo quishacari Atenas tiacajinia

<sup>16</sup> Ploori Silas, Timoteo sashiquiaari Atenas tiacajinia. Cuno tiacajinia na rucuanijosacari pueya na sashishacari, Ploori niqiuquiaari tama cuno pueya shipinijosanojuaja na pueyasohuara. Nojori shipinijosanoori puetunu cuno tiacajinijanaa quiriqiaa. Ploori cunora jiyanohua tacaquiaari. <sup>17</sup> Ploori Jesujiniji Judiocuaca poojotaquiaari nojori rerejonuujua tiajinia, noo pojori taucuacajuahuaj, canapute Pueyaso tojtiajaca quiquiaaricujani. Naajuhuj, Ploori cuno tiaca jiuujajinia pueya cajitiucuaa curotasanojinia po-

huataquiaari Jesujiniji cuniqui quiniaa niqiuara.

<sup>18</sup> Tamasaca niishijiacaari Pablo pohuatasacari Jesujiniji tojtiaariquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari "Epicurehua", Epicuro jyanishano niishijia niishitiojosano tojtiajaca nojori quiniucua. Tamonu maanuuri sanini-uuja sesojosaaquiaari "Rejeretajaca". Naa sesojosaaquiaariiri Zenón jyanishano niishijia niishitiojosano nojori tojiniucua. Pablo pohuatasacari nojori niqiuara, nojoriiri maja na niishituniu quiquiaari casaa na pohuatariquaani. Nocuaji tama nojoriijaarijia sequetooquiaari:

—¿Casaarquitijia cuno paateca pohuataa pajaniyatejaj? Najuhua pocuaa pueyaracaanuuri.

Tamasacaari saniniuuja sequetuquiaari:

—Tamasaca pueyasohuajiniji poojotana juhuanaruha.

Nojoriiri naa sequeriquiaa Pablo pohuatanuucua Pueyaso rupaa Jesujiniji, mariyata taa cusonuuno samitiiconutaniuhua. <sup>19</sup> Na nuhuaji, nojoriiri Pablo jiyataquiaari tuhuananujiniji, tee nojori jitiqiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pohuataqueeruhuj. Canaari quia pohuatasanojiniji socua maninia niishiniu paniyani. <sup>20</sup> Quiaari jiyajeneta sequeriquiaa canaa niqiuara quia pohuatasacari. Quiarjia canaa quia tore maninia.

<sup>21</sup> Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhuj, nojoriiri maja socua tamonu casaa na miituniu quijia. Saaja quiarinio sequesanojiniji niishituniu panijiaari.

<sup>22</sup> Jiyacaritij, Ploori Areópagojiniji nujaquiaari na pohuatanura na tojtianu panijiaa niqiuara. Naa co-teereeri:

—Atenas tiacajinia quiniaa pueyanaa, janiyari quiarjia niishiyani, niaaqui pueyasohuacua jiaatiajaca jyanohua. <sup>23</sup> Janiyari naa nia sequeyani pueyanaa, cua niqiniucua queraatia nia shipinijosano pueyasohua, cua rucuanijosacari nia tiacajinia. Naajuhuj, janiyari saajijiniji nia shipinishano juhua juhuacutura niqiriucuaajuhuj. Nocua naajioori sequeya, "Niishishoo Pueyasora". Cuno Pueyaso niaa na tojtiaquiaa na niishiyaquiniutiani, nojuajaari nio Pueyasocujaja janiya nia pohuataani.

<sup>24</sup> Cuno Pueyasoori nio jiya shipiniquiaaricujaja, puetunu pa niqishanojuanaano. Nojuajaari jiyocua- caanu camarnujuhuaj. Nojuajaari puetunu tiqiyocua- janaa Quijia. Majaari pueya tiajosano secojojua tiajinia na quiniu. <sup>25</sup> ¿Taa nia jiyaniyani pueyanaa, cutara Pueyasojuaate pa jitiyasano casamijiniji panijia- juhuaj? Maja. Nojuacuajaari puetunu pa jitiyasanoju- naa shipiniquiaari puera. Pa rishiniuria, na Sohanu- jiniji pa niqitioquiaariuhuj, pa rijiosocoriquiano paratunio.

<sup>26</sup> Pueyasoori niqiriyatu pueyano shipiniquiaari juhuacatecara. Paari cuniquiji canequiaarini, puetunu jiyacajinijanaa pa quiniuria. Pueyasoori tarijia seque-

quiaari tee pueya quiniutianiyani. Sequequiaariijaari-uhuj taacari tii pa quiniutianiyani. <sup>27</sup> Pueyasoori naa panitiaquiaaricuaaja puetunu jiyacajinia quiniaa pueyajanaa pajenura nojuaja. Pueyasoori pa saniya, na ni-ishiniuria, ¿pueyate na pajenutaniyani pa riuriatanura nojuaja? Pueyasocuaajaari maja na quiniu tucuacaanu pajaniyajiniji. <sup>28</sup> Pueyasoori pa samiitianiya. Pa cumaquiaaariuhua pa poonijionura. Pa rishitiquiaaariuhuj. Naatej, taa nia pahuatajaca sequequiaaricuaajani: “Paari Pueyaso muerasuni”. <sup>29</sup> Paa jaara seetanujanaa Pueyaso muerasu quirini, majaari socua pa jiyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajiajiniji shipinishanonio. Pueyaso cutaraari maja na niquishaanu juhua tama pa ni-ishiriojosanojuaja. Majaari na niquishaanu taa pueya shipinijioquiaacuajani, nojori jiyanishacari Pueyaso naasucuaari naa niquishanotej. <sup>30</sup> Pueyasocuaajaari pueya miiniu sesa rejeretariquiaa pueyaracaanu. Saniniujia, nojuajaari quiaritia puetunu tiqiyocua quijiaa pueyajanaa sequeya, nojori cartenura puetunu sesa na miqiosanojuanaa, saaja nojuaja nojori tojtianura. <sup>31</sup> Pueyasocuaajaari tari saquiriojocuaari tamonu juuca taacari na nequesoreenutaniya mijiria quiniaani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiiitia pa nequesoreeriquianojuhuaj. Na samiitanishacari cuno pueyano macujiniji, nojuajaari naa pa niishitiquiaari, cunocuaajaari na saquiriojosano pueyano.

<sup>32</sup> Nojori jaara tojiquiaari Pablo pahuatasacari taa macunucua samiitaconutaniuhuaani, cuno niishijia-caari na saroojotaquiaari na rerequetenuta. Tamasacaari saniniujia Pablo sequequiaari:

—Canaacua tamacari quia tojiriirianiuhuj.

<sup>33</sup> Na nuhuaji, Pabloori cuno pueya tajiniji quiacuhua. <sup>34</sup> Noojiaqueya cuno pueyajinijioori Jesuucua tiuquuaari, Pablo pahuatasano nojori tojtiasacari. Nojorijinijioori quiquiaari Dionisio jiyanishano pueyano. Nojuajaari Areópago niishijiaa pueya maanujinijio quiquiaari. Jesuucua tiuquuaariijaariuhua tamonu maaji. Dámaris na sesa. Socua tamasaca pueyari Jesuucua tiuquuaarijuhuaj.

### Pablo quishacari Corinto tiacajinia

**18** Na nuhuaji, Pabloori Atenas tiacajiniji quiaquiaari Corinto tiacajinia. <sup>2</sup> Cuniqiu riuri-ataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaaquiaari. Aquilaari necocua Priscilata shusha Italia jiyajiniji tiuquijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujanaa quiquiaari puetunu jiyacajinijanaa. Nojori jiiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanunura Roma tiacajiniji. Naaratej, Aquilaari necocuaata

quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocoojonura. <sup>3</sup> Aquilaari necocuaata suhuoronuutaja toqueya cusupuenuujua quiquiaari juhua Pablojuhuaj. Naaratej, Pabloori nojoritia quishii, mariyata na poonijionunura tii. <sup>4</sup> Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuanajoja. Tii nojori pahuataquiaari Jesujinijiiri, taucua niquiaranio, noo pojori canapueete Judiocuacaa jiyatesaaquiaaricuaajani, tariucuaanu Moisés niishitiojosano nojori tojishacari.

<sup>5</sup> Silas jaara Timoteota Pabloocua tiuquijioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pahuatanura Judiocuaca niqiuara. Nojori sequequiaariiri:

—Jesuucuaari nia sashishano, Pueyaso Jiyarosano seetanujanaa pocua!

<sup>6</sup> Judiocuaca jaara tojiquiaari naa Pablo sequesantej, na tojtiaaquiriiri saajaari nojori cuaracashitiniutia Pablo sequesano. Saaja juuacuioreeri. Sesa pocooreejaariuhuj. Naaratej, Pabloori nojori niqiuara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiaritia taucuaacua quiaa cutarantia, nojori cua pahuatanura Pueyaso rupaa Jesucristojiniji.

<sup>7</sup> Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase.

<sup>8</sup> Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquuaari. Naajuhuj, queraatia Corinto pueyari Jesuucua tiuquuaari Pueyaso rupaa nojori tojishacari. Naaratej, puetunu Jesuucua tiuniaajanaari moojinia tiuquinijosaaquiaari. <sup>9</sup> Jiyacari tamonu niucua, Jiyaniijia Jesuuri Pablo sequequiaari na maquenujia:

—Maja quia puerenu Pablonaa. Socua quia pahuatare cuno pueya tojishocoriquiano. Majaari sanaajenu. <sup>10</sup> Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiiitia cucua tiuuriquianoni.

<sup>11</sup> Naaratej, Pabloori Corinto tiacajinia jiyajequiaari. Tii na quishacari, quera shocojotequiaari caapiqui marijaari. Cuniqiu na quishacari, Pueyaso rupaa niishitiojoriquiaa cuno pueyari.

<sup>12</sup> Jiyacaritij, Galión jiyanishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuaa rojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. <sup>13</sup> Naa sequetusee camarnuuri:



—Canaa camarnunaa, nio pueyanoori pueya shiniujiyia Pueyaso nojori shuquiritianura tamaatia canaa supuetana Moisés Rootasanojiniji!

<sup>14</sup> Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cuca jaatucure cutara, sesa miijiaca sequenio, janiya maara jiyano pueyanoocuara nia tonujusacari tojiri cutarani. <sup>15</sup> Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. Tama nia jeeca-toorejaaja!

<sup>16</sup> Na nuhuaji, cuno camarnuuri nojori juaarii. Na shuriucuaji na jiyaramiquiriohuari. <sup>17</sup> Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitiirii camarnu Galión niquiara cuniquijiaari. Majaari Galión tenujunu quirii nojori. Nareja na niquiriquiaari.

#### **Pablo riuujiushacariuhua Antioquiya tiacajinihua. Na nuhuaji jiuujianaraca pacutequiaariuhua quianuuri**

<sup>18</sup> Pabloori cuniqui queraatia camueenujuquiaarijiaara Corinto tiacajinia. Tari na riuujiushacariuhua cuniquiji, na nuhuajiria saruhuataarohua narta Jesuucua tiuuniasa pueyari. Buquejinia quiaarohua Siria jiyajinihuari. Na cojiriquiaajaari Priscila, neyaca Aquilano. Nojori tacataaquishacarijia buquejiniaacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequenciaari tari, maja na naca na riuujiutini quiniutianiya nojuaja jaara na sequesano Pueyaso tucataaquiri.

Cunora, naa quiarjia riuujiutirii na nacaari. <sup>19</sup> Nojori tiuquijiosacari Éfeso tiacajinia, Pabloori tii jamaquiaari Priscila, Aquilano. Nojuajaari tajimiasa Judiocuaca rerejojua tiacajinia. Cuniqui rerejono Judiocuaca pohuatasee Jesujiniiri. <sup>20</sup> Nojoriiri Pablo nenecojuquiaari juucua cuniqui na camueenujunurajara nojoritia. Majaari Pablo paniniu quiquiaari. <sup>21</sup> Cuniqui quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniasa pueyatani. Pueyaso jaara paniri, janiyacua nia niquiniuria tacatemohuaraniuhuj.

Cuniquiji tacaquiaariuhua buquejiniaari. Éfeso tiacajiniji quiaarohuari. <sup>22</sup> Pablo tiuquishacariuhua Cesareya tiacajinihua, cuniquiji quiamaa Jerusalén tiacajiniaari, puetunu Jesuucua tiuuniasa na saruhuatanurajanaa. Na nuhuaji, quiaarohua Antioquiya tiacajiniaari. <sup>23</sup> Cuniqui tarishiquiaari pasajaari. Na nuhuaji, socua quiaquiaariuhua cuniquijiri puetunu jiyacajiniarajanaa.

Quiariquiaari na niquiniuhua Jesuucua tiuuniasa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaaajiniji.

Jesuucua tiuuniasa nacasuquiaariiri maja nojori tariniantura Jesuucua tiuunio.

#### **Éfeso tiacajinia Apolo pohuatasacari Pueyaso rupaa**

<sup>24</sup> Jiyacaritij, tamonu Judio pueyanoori Éfeso tiacajinia tiuquiquiaari. Alejandría tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuataa quiriquiase. Tariucuacaanu Pueyaso Rupaa naajosano niishijia quiquiaarijiaariuhuj. <sup>25</sup> Nojuajaari maninia niishitiojosaaquiaari Jiyaniijia Jesu niishitiojosanojiniji. Shitimia pohuataja pueya niquiaraari. Maninia niishitiojua Jesujiniji na pohuatasacarijiaariuhuj. Seetanujanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. <sup>26</sup> Apoloori na puerenu jataquiaari tii na pohuatasacari Pueyaso rupaa narta Judiocuaca rerejojua tiacajinia. Aquilaari Priscilata tii quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. <sup>27</sup> Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniasa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniasa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujia cumaquiquiaari jyanohua, nojori na niishitiojosacari. <sup>28</sup> Apoloori nojori niquiara niishitiojoquiaari tariucuacaanu Pueyaso Rupaaajiniji naajio-tasano. Jyanohua maninia na niishitiojosacari Jesuuri seetanujanaa nojori sashishano quiquiaari, naacuajitij Judiocuaca niishishano pataquiaariiri.

#### **Pablo quishacari Éfeso tiacajinia**

**19** Apolo quishacari Corinto tiacajinia, Pabloori saniniuujia Antioquiya tiacajiniji quiaquiaari nucauco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniaari. Tii riurataquiaari Pueyaso pueya maanuuri.

<sup>2</sup> Pabloori jiyacari nojori nequesotaquiaari:

—¿Niaate Pueyaso Sohuanu tiuquiniqianu nioojiajinia, Pueyaso rupaacua nia tiuushacari?

Pablo riuucatureeri:

—Majaari quenaaja canaa niishiniu quijia Pueyaso Sohuanute quiyajuhuj.

<sup>3</sup> Pabloori nojori sequequiaari:

—¿Casaara nia tiuquinijiosaacanucuaaraarini?

Nojoriiri na riuucaquiaari:

—Canaari tiuquinijiosaquiaarini taa Tiuquinijiona Juan niishitiojoquiaaricuaajani.

<sup>4</sup> Pabloori nojori riuucaree:

—Taaquiriirinij. Tiuquinijiona Juancuaaquiniateja pueya tiuquinijioquiaarijiaj, nojori jaara noojia tacato-

quiaari sesa na miitiushanojiniji. Nojori sequequiaarijiaariuhua: “Cua nuhuaji Niriquianoocua nia tiuuri”. Naa Tiuquinijiona Juan sequesaciritij, nojuajaari Jesucristojiniji sequeriquiaa.

<sup>5</sup> Cuno pojori jaara Pablo pahuatasano Jesucristojiniji tojiquiaari, nojoriiri socua tiuquinijosaaquiaariuhua Jesuucua nojori tiuushacari seetanujuanaa. <sup>6</sup> Naacuajitij, Pablo niasacari na juaashiquia nojori nacaacua Pueyaso na secojosacari, Pueyaso Sohanuuri cuno pojori jiuujajinia tiuquiquiaari. Naacuajitij, nojoriiri niishishoo rupaacajinia pocooree. Naajuhua, Pueyaso Sohanu niishitiojosano Pueyasojiniji pahuatanuuquiaariiri.

<sup>7</sup> Cuno pojoriiri doce canuu quiquiaari.

<sup>8</sup> Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejojua tiajiniaari. Tii pahuataja Pueyaso rupaa pueya niquiaraari. Naajuhua, nojori niishitiojuuara taa Pueyaso jiitanutaniya pueyaracaanu Jesuucua tiuunia pueyani. Pueyari na tojtiaquiaari maninia, na puereyaquiniutia na niishitiojosacari. <sup>9</sup> Noojiaqueya cuno pueyajiniiniori saaja ruuretaquiaari Pueyaso rupaa. Na rerequetequiaari saajaari. Sacuaraatia pocoquiaari Jesu rupaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujua tiajiniaara. Tirano jiyanihano pueyanoori cuno serojonuujua tia camaru quiquiaari. Pabloori cuniqui puetunu juucajanaa niishitiojojua Pueyaso rupaa Jesuucua tiuuniaa pueya.

<sup>10</sup> Caapiqui marijaari socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacuajitij, puetunu Asia jiyajinia quiniaa pueyajanaari Pueyaso rupaajiniji caminiujushaaquiaari, Judiocuaca, taucuacajuhua. <sup>11</sup> Pueyasoori jiyacari Pablo cumaquiquiaari jiyajeneta casaa na miiniuria Pueyaso cumaacata. <sup>12</sup> Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, cusosuhuari naatacoquiaariuhua! Naajuhua, samaruhuari tohuareetaquiaarijuhuaj, samaruhua jiiitaja pueyacuaji.

<sup>13</sup> Tamasaca Judiocuacajiniiniori quiriquiaajuhua, pueyajiniji samaruhua tohuatanijiojua. Nojoriiri puetunu tiacajiniajanaa rucoojuuaca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua na sequetuquiaari samaruhuari:

—Pablo pahuatasano Jesu sesajinia nia sequeyanijia: “Nio pueyanojiniji nia tohuareetare!”

<sup>14</sup> Naa miijiaacari siete canuu quijia. Nojoriiri Esceva jiyanihano pueyano niquiohua quiriquiaa. Escevaari pueyacuara secojona camarnu quiriquiasejuhuaj, Judio pueyanotuhua. <sup>15</sup> Cuno pojori jaara saniquiaari juucua Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanijia. Janiyari Pablo niishiyajaniuhua. ¿Canteerini nijaniyanijia, naa nia sequenura janiyatej?

<sup>16</sup> Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj.

<sup>17</sup> Puetunu Éfeso tiacajinia quiniaa Judiocuacajanaa, mariyata tii quiniaa taucuacanio, nojori jaara niishiquiaari naa miishanojinijitij, jiyanohua puere-tuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—Jesuqui seetanujuanaa Jiyaniijajanaa cutara!

<sup>18</sup> Naajuhua, queraatia Jesuucua tiuuniaa pueyari nijioquiaari, tarijia sesa na miitiushano pahuatanura puetunu pueya niquiarajanaa. <sup>19</sup> Naajuhua, queraatia pueyari juhua shimiacuri miiijiojuaca quiquiaari. Nojoriiri na nequesoreetuneece mueratejotaquiaari. Cuno nequesoreetuneeceajiniaari serojosano quijia taate pueyano cumueeca shimiacara quiniuni. Na camaruhuari jiyacari puetunu cuno nequesoreetuneecejanaa patootaquiaari. Na catijiaquiaari puetunu pueya niquiarajanaari. Puetunu cuno nequesoreetuneecejanaa catijiasaaquiaarini, cunoori cincuenta mil platajiniji shipinijosano cumaneecata masano quiquiaari.

<sup>20</sup> Naacuajitij, Pueyaso rupaari socua cuno jiyajinia paaquequiaari, na cumaaca poonijosacari pueya jiuujajinia.

<sup>21</sup> Na nuhuaji, Pabloori cuniquiji naquerejoquiaari Macedonia jiyajiniarajuhua, Acaya jiyajiniaranio. Cuniquiji riujuuniu paniriquiohua Jerusalén tiacajiniohuaraari. Sequequiaarijiaariuhua:

—Janija jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

<sup>22</sup> Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jijequiaarijiaara.

### Éfeso pueya cushitiishacari na juaaquionuta najuhua-naj

<sup>23</sup> Pablo quishacari Éfeso tiacajiniaja, Éfeso tiacajinia quiniaa pueyari jiyanohua juaaquioquiaari Pablo niishitiojonuucua Jesucristojiniji. <sup>24</sup> Naa quiquiaariiri. Demetrio jiyanihano pueyanocujaari juhuacatecara narta pueya nasojoquiaari. Cuno pueyano, Demetroni, nojuajaari shiirijiaa tia platajiniji shipinijiojua quiquiaari. Cuno shiirijiaa tiacaari juhua nojori jiyanihano pueyaso secojojua tia niquishano quiquiaari. Nojori pueyasoori maaji sesaanucua quijia, “Artemisa”. Na shipinijosano niquitiojojua na cumaneecaraari.

Naacuajitij, Demetrioora nata poonijionaa pueyata queraatia cumaneecaraca quijia. <sup>25</sup> Demetrioora jiyacari nata poonijionaa rerejotequiaari nojori nacoontanura Pablo miishanojiniji nojori tiacajinia. Nojoritia rerejoquiaariiri tamasa pueya, casaa shipinijionaa platajiniji juhua nojori juhuaj. Puetunu cuno pueyajanaa jaara tari rerejoquiaari, Demetrioora nojori sequequiaari:

—Pueyanaa, niaacuajaari niishiya, paari puetunu panishanojuanaa jiitiaani pa niquitiojosacari pa cuma-

neecara pa shipinijosano. <sup>26</sup> Quiarijia cuno Pablo jyanishano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohuajanaa. Niaari na niquiriquiaacuaja naa na niishitiojosacari. Niaari na tojiriquiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. <sup>27</sup> Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajinia, tii nojori secojonura, naa cuno Pablo niishitiojonuucua pueyaracaanu pueyatej. [Naacuajitij, puetunu pa Asia jiyajiniinio pueya, mariyata puetunu jiyacajiniinio pueyapuejanaari pa pueyaso Artemisa rerequetenutaniyajaariuhuj! Puetunu pueyapuejanaari naa nijajetanutaniya socua pa pueyaso Artemisatej!

<sup>28</sup> Cuniqum quiniaa pueya jaara tojiquiaari naa Demetrio sequesantej, nojoriiri jyanohua juaaquiocuaari. Naa nacoocuaariiri:

—[Pa timitiasano Artemisa cuaara pueyaracaanu quiria Éfeso tiacajinia quiniaa pueyaso!

<sup>29</sup> Naa nojori juaaquiocuaari. Nojoriiri jiyacari quiooturee caapiqui Pablo cojiniaa pueya, Macedonia jiyajiniinio pueya. Nojoriiri quiquiaari Gayo, Aristarcenio. Na jayoturee Éfeso tiacajiniinio pueya rerejojua tiajiniaari. <sup>30</sup> Pabloori cuno pueya nacoosaqui tiajinia tiuquiniu paniquiaari juucaajuhuj. Quera na pocuasee cuno pueya tajiniani. Jesuucua tiuuniaa pueyari saa na cosequiaarijia na tiuquiyacuajia.

<sup>31</sup> Asia jiya camarucuaari na seya jiyaroquiaari Pabloocuaajuhuj. Camarucuaari coteenu na sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojoosaqui, mariqui mosaareeri.

Cuno camarucua na seya jiyaroquiaari nocuani, nojoriiri Pablo rupuenaa quijia. <sup>32</sup> Cuno nasojosano rerejono pueyari saaja cushitiquiaari na juaaquiocuaari. Jyanohua nacooreeri. Tamasacaari saniniuujia tamaatia nacoocuaarijuhuaj. Jiyacaritij, tama cuno nojorijiniinio pueyari maja na niishiniu quiquiaari casaajiniji na nacoocuaari. Secaja nojorijiniinioori na niishiquiaari cutara. <sup>33</sup> Jiyacaritij, Judiocuacaari Alejandro jyanishano pueyano caponeequiaari pueya nacoyano tajoji na nujuatesocoriquiano. Cuniqum pueyajaari tii toquiaari Alejandro casaara pueya nacoyani. Alejandro Judio pueyano quiquiaarijuhuaj. Naaratej, Judiocuacuajia tacunu paniriquiaa juucaari. Alejandro jaara nujuaquiaari pocuajajiniji, na juaashiquia shiitioquiaariiri pueya sanaajetanura. <sup>34</sup> Saniniuujia, cuno pueya jaara niishiquiaari Alejandro Judio pueyano, puetunu pueyajaari socua jiyacatequiaari nacoonu-

ra. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—[Pa timitiasano Artemisa cuaara pueyaracaanu quiria Éfeso tiacajinia quiniaa pueyaso!

Naa pueyaracaanu nacoocuaari. <sup>35</sup> Cuno tiaca camarucua naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishituyajaariuhuj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaari tinio pa riuratasanonni. <sup>36</sup> [Canteeri nio niishiyaquiyani! Shaaqui. Cunora tariucuaaja. [Nia sanaajetarohua! Majaari najuhuaana sesa nia miituniu, maninia nia niishiriojiyaquishacari. <sup>37</sup> Nio canuu niaa niyara na jayoreeni, nojoriiri maja na nohuasenu quiri casa pa pueyaso secojojua tiajiniji. Majaari na sesacatunu quiquiaa pa pueyasojuhuaj. <sup>38</sup> Demetrio jaara nata poonijonaata cuno pueyacuara tonujunu paniri, ¿casaara na quiaaquiya pa nequesoreena niqiaari tonujunuraari? ¿Casaara na jiitiaa nequesoreena pa tiacajiniaari? ¿Najuhuanaj? Pa nequesoreenaari pa paraa tacujua pocuaji. <sup>39</sup> Niaa jaara tamonu casaacua juaaquioreja, pocua tamonu juuca na rerejotariquiani pa jyanijianucuaata pa jeecanura puetunu nia sequesanojuanaa. <sup>40</sup> Pueyanaa, ¿majate nia puerenu, Roma tiacajinia quijia pa jyanijiajanaa jaara pocuara tosaare pa nacoocuaari? Paa jaara sequesore nocua quiojonurani, ¿paatucua taa pocuaji tacureni jaara pa nequesoreere pa nacoocuaari?

<sup>41</sup> Tiaca camarucua naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacuajitij, puetunu pueyajaari cuniqum niyaquejoquiaariuhua.

**Pablo rucanejosacariuhua Macedonia jiyajinia, Grecia jiyajinianio**

**20** Pueya jaara na juaaniutia na nacoocuaari nuhuaji sanaajetaquiaariuhua, Pabloori jiyacari Jesuucua tiuuniaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniqum, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. <sup>2</sup> Nojuajaari puetunu cuno jiyajinia rucanequiaarijanaa. Jesuucua tiuuniaa pueya cumashitiquiaari socuani, maja nojori tarinitianura Jesuucua tiuuniu. Naa na rucanesacari cuno jiyajiniatej, socua tiuquishiquiaari Grecia jiyajiniaari. <sup>3</sup> Pabloori tii na quishacari shocotejoquiaari jiuujianaraca raca. Juuca cuniqum quianu paniriquiaa buquejinia Siria jiyajinianaari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacari, nojuajaari nocuaji Macedonia jiyajiniana neteja nucuacohua tacatequiaariuhua saaja. <sup>4</sup> Nucuaco na quiasacariuhua, na tarajaquiaariiri Sópater jyanishano

pueyano Berea tiacajinjini, Pirro niyanu. Na tarajaquiaariuhua Aristarco, Segundonio. Nojoriiri Tesalónica tiacajinjini pueya quiquiaari. Nata quiaquiaariuhua Gayo, Derbe tiacajinjini. Timoteori nojoritia quiriqiaaajacuhuj, Tíquiconio, Trófi-mojuhuj. Nojoriiri Asia jiyajinjini quiquiaari.

<sup>5</sup> Puetunu nio canaa tapueyocucajanaari canaa puetaquiaari. Canacuaji tiuquijioseequiaari coteenu Troas tiacajiniaari. Cuniqii sashitiuquiaari canaari.

<sup>6</sup> Jiyacariiri queranacunuusacari quiquiaari, poreetajaju shipinijosano pan miaquesacari. Queranacunuunu nuhuaji, canaari Filipo tiacajiniji jaquetaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

### Pablo niishitijosacari Troas tiacajinia

<sup>7</sup> Shusha semaana coteejajinia domingo juuca, canaari rerejoquiaarini pan neecasenua pa Jiyaniijia cusosacari niishiriojonura. Pabloori jiyacari Jesuucua tiuuniaa pueya rootariquiaa niucua. Nojuajaari cuno tariqui quiariquiano quiriqiaa cuniqii. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. <sup>8</sup> Cuno tiajinia canaa tii quiriqiaani, canaari jiyocucacuanu tercero na natacójinia rerejoriquiaani. Queraatia samariiri canaa caaniuji noshiquoriquiaa. Pabloori shitimia pohuatariquiaa pueya niquiara. <sup>9</sup> Jiyacaritij, tamonu mashajaari tia shuucujai tacuhajiniji cajiriquiaa. Na sesaari Eutico quijia. Pablo pohuatasacari pueyaracaanu, socua maquequiaari na cajishaquiiri. Jiyano hua na maquesacari, jiyocua tiquii socuaari. Cusoseejanaari. <sup>10</sup> Pabloori nata quiniaata ritia nocua netecuatiquiaari jiyocua. Pabloori nocua jacamasee na catanura. Narta Jesuucua tiuuniaa pueya sequereeri: —Maja najuhuaana shiriquitiuniu. Saminiocujaja.

<sup>11</sup> Na nuhuaji, puetunu nojorijianaari tiniota shuquiriatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemajaa socuaari. Tariucua juuca quiaqueeri. Nojuajaari nucuaco quianu paniquiaari cuniqii Asón tiacajiniara. <sup>12</sup> Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

### Pablo quiasacari Mileto tiacajiniara

<sup>13</sup> Pabloori na quiaaquishacarijia tari canaa sequenciaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

<sup>14</sup> Naacuajitij, canaari coquetooquiaari Asón tiacajiniani. Canaari cuniqii Pablo tacanimaquiaarini. Canaari mariyata tiji quiaaree Mitilene tiacajiniani.

<sup>15</sup> Canaari tariqui shocoma Quío jiya tucuaatijani.

Canaari tama tariqui tiuquishii Samos tiaca tacatajajinjini. Canaari rupaquijia samaatemaacuara Trogilio tiacajiniani. Canaari cuniqii sanetaaree tariquiniuhuj. Canaari Mileto tiacajinia tiuquishiini. <sup>16</sup> Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej, majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaariuhua Jerusalén tiacajiniaari. Pentecostés juucara quiniu paniriquiaa tiiri.

### Pablo cumashitishacari Éfeso tiacajinjini Jesuucua tiuuniaa jiiatanaa pueya

<sup>17</sup> Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiiatanaa. <sup>18</sup> Nojori jaara canaacua tiuquijioquiaari, Pabloori nojori sequereeri:

—Niaacuajaari maninia niishiya taa cua quishiquiaari niaatani, cua tiuquishacari Asia jiyajinia niaacua. <sup>19</sup> Niaata cua quishacari, janiyari pueyaracaanu nia niishitiojuani, pueyaracaanu pa Jiyaniijia cua poonijosacari. Naa cua miishacaritij, majaari cua quiniu paniniu quijia juhua nia jiyaniijia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. <sup>20</sup> Naajaa, majaari cua pishiniu quijia nia niquiara cua pohuatanura Pueyaso rupaa. Janiyari nia niishitiojuani puetunujuanaa maninia nia quiniuria, maninia mijia nia quiniurajuhuj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojuani, tama nia tiacajiniaqueyajaajanio. <sup>21</sup> Janiyari Judiocuaca sequejani taucucacano, nojori tacatonuhua noojia Pueyasoocua, sesa nojori miishanoiniji, pa Jiyaniijiaacua nojori tiuuniuria cutara. <sup>22</sup> Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. <sup>23</sup> Janiyari saaja niishiya cutarani, puetunu tiacajinijanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. <sup>24</sup> Janiya jaara naa niishirini, majaari cua tacaani quiquiaa. Cuaara cua motuuraqui jaara monu panitiuri. Janiyari saaja pa Jiyaniijia sequesano tucatanu paniya cutarani. Pa Jiyaniijia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

<sup>25</sup> Janiyari seetanujanaa nia sequyani pueyanaa. Puetunu nijaniyajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutianiya mijiria janiya. <sup>26</sup> Naaratej, janiyari nia sequyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. <sup>27</sup> Janiyacuajaari tari nia pohuataquiaari puetunu Pueyaso sequesanojuanaa pajaniyarani. <sup>28</sup> Quiarijiani, tama nia cuaqueyajaaja nia cojuare. Maninia nia cojuare Jesuucua tiuuniaa pueyajuhuj. Pueyaso Sohuanucujajaari nia jiyatequiaari Jesuucua tiuuniaa pueya jiiatanaa nia quiniuria. Nojuajaari nojori masequiaari na nanacata tama nerajaaja, pocuara na

cusosacari. <sup>29</sup> Janiyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuunaa pueya sesonutaniyari, sacuaraatia nojori niishitiojosanota. Nojoriiri juhua marucuatuque sareya tiuquitianutaniya Jesuucua tiuunaa pueya tajinia. Taa marucuatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. <sup>30</sup> Naajuhuj, tama niajanijajiniujuaarijia najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuunaa pueyari, pueya tojiniuria nojori saniniuuja. <sup>31</sup> Janiyacuajaari nia sequeyani, jiyanojua nia cojuare tama nia cuaqueyajaaja. Nia niishirijuhuj, jiuujanaraca marijiaari tari cua shocojoree pueyaracaanu cua niishitiojosacari niajanija. Majaari cua tarinitianu quijia rootanu niajanija, juuca, niucuanio. Janiyari naajaa cua namijiaacatenuta niishitiojua puetunu niajanijajanaani. Majaari naa cua miishano nia niyajetanu pueyanaa.

<sup>32</sup> Nia tiujianutaniya tarinjia. Janiyacuajaari pa Jiyaniija juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumuecara. Nia jaara naa miiritij, Pueyasoori nia rijionutaniya na shuriucua, na saquiriojosano pueyanta nia quiniuria. <sup>33</sup> Niaata cua quishacari, majaari tama quiriijaaja cua paniniu quijia cumaneeca, toquenio. <sup>34</sup> Niaari naa quiyano cua niqijijuhuj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarahuj. <sup>35</sup> Janiyari nia niishitiojojuani, naa poonijiosanotej casamijiuuniucua pa naacunura pa jiiitiasanota. Majaari pa Jiyaniija Jesu sequesano nia niyajetanujuhuj. Naa sequequiaariiri: "Maninia pueyano jaara na jiiitiasanojiniji niqitiojore nareja tamonu pueyano, na niqitiosacari tamonu, nojuajaari socua shuquiriaatia quiya, niqitiosano masejajiniiji".

<sup>36</sup> Naa nojori na sequenu nuhuajitij, Pabloori mojuquetaree. Puetunu nojoritijajanaa secojoreeri.

<sup>37</sup> Puetunu pueyajanaari nujuqueturee. Pablo cacanuuturi. Na nujuunequetureejaariuhuj. <sup>38</sup> Pueyari jiyanojua taraajeriquiaa Pablo sequenuucua nojori, maja tari socua na niqitiuuni quiniutianiya nojuaja. Nojoriiri caminijaniara rosetaquiarijihuuj, Pablo na niqitiuuniuria buquejinia na tacasacari.

#### Pablo quiasacari Jerusalén tiacajiniara

**21** Éfeso tiacajiniiji canaa ruparetasacari, canaari shoniniacu caminia jiuujiaaco quiaareeni. Canaari Cos tiacajinia tiuquishiini. Cuniqiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniiji, canaari Pátara tiacajinia tiuquishiini. <sup>2</sup> Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. <sup>3</sup> Canaa jaaretasacari, canaari canaa muenecara niqimiohua Chipre jiya tucuaatijani.

Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniiji tiuutiaseeni, casami jatanura tii. <sup>4</sup> Jesuucua tiuunaa pueyari tii quijijuhuj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuuanuuri cuniquijini Jesuucua tiuunaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. <sup>5</sup> Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacaritij, puetunu Jesuucua tiuunaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiari tiacajiniiji tacatajajiniijiriani, Pueyaso canaa secojonura jaaquajinia. Puetunu canaajanaari mojuquetacoquiaarini shoniniacu caminia casaqueyaji. <sup>6</sup> Na nuhuaji, canaari nojori cacanuuree canaa nuhuajiriani. Canaari buquejinia tacataqueeni. Nojoriiri tacatajajiniiji quiojoquiaariuhua na tijajiohua.

<sup>7</sup> Canaari Tiro tiacajiniiji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuanaani. Canaari tii quijia Jesuucua tiuunaa pueya saruhuataseeni. Canaari nojoritia quishii niqiriyatu juucani. <sup>8</sup> Tariqui saniniuuja, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriqiaa. Canaari na tijajinia quishiini. Felipeeri Jesujiniiji pohuatana quijia. Nojuacuajaari Jerusalén tiacajinia coteenujuanaa tamasaacata jiyatesaaquiaari mashiquiopue mianuuteriquiano. <sup>9</sup> Felipeeri necojori jiiitaja, saa caqueetacaneja, niyacoojori. Cuno niyacoojoriiri Pueyaso Sohuanu jiiitajaca. Naacuajitij, Pueyaso Sohuanu niishitiojosano nojori jiuujajinia Pueyasojiniji pohuatanuujuaari. <sup>10</sup> Canaa camueenujusacari cuniqui, jiyacari tiuquishiiquiaariiri Judea jiyajiniini pueyano. Nojuajaari Pueyaso sequenu panishano caminiujunua quijijuhuj. Ágabo jiyaniishano pueyano. <sup>11</sup> Nojuajaari canaacua niqiaari Felipe tijajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucua jaarijia, na numatucuanio. Na nuhuaji sequerohuari: —Jerusalén tiacajinia parta Judiocuaari naa morojonutaniya nio cajiniocuaque camarutej. Na nuhuaji, taucuaa niqitiosaanutaniyari. Pueyaso Sohuuanuuri naa cua sequereequij.

<sup>12</sup> Naa Cesareya tiacajinia quiniaa Jesuucua tiuunaa pueya tojishacaritij, canaajuhuj, puetunu canaajanaari juucua Pablo nenecojoquiaarini maja na quianura Jerusalén tiacajinia. <sup>13</sup> Saa canaa sequerejaari: —¿Casaara nia nujuquetiyajaarani? ¿Niaateeri cua taraajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniija Jesujiniiji.

<sup>14</sup> Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacujani.

<sup>15</sup> Naa canaa sequenu nuhuaji nojuaja juucuatej, canaari canaa jiitiasano casaa jeenucuareeni. Canaari Jerusalén tiacajinia quiaareejaaniuhua. <sup>16</sup> Canaata quiojoquiaariiri Cesareya tiacajiniji Jesuucua tiuuniaa pueyajuhua. Canaata quiariquiaajaariuhua Mnasón jiyanihano pueyano. Nojuajaari Chipre jiya tucuaatia-jajiniinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tijania quishii cuata.

### Pablo pocojosacari Santiagota

<sup>17</sup> Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. <sup>18</sup> Pabloori tariqui canaata quiaquiaari Santiago niqiniuucua. Tii quiriquiaajaariuhua puetunujuanaa Jesuucua tiuuniaa jiitianaa pueya.

<sup>19</sup> Canaa tiuquishacari, canaari nojori saruhu-ataquiaarini. Na nuhuaji, Pabloori nojori pohu-ataquiaari puetunu Pueyaso miishanojuanaa na pohu-atanuucua Jesujiniji, na rucuanajosacari tucuaaanu taucuaa quijia jiyacajinia. <sup>20</sup> Pueya jaara naa to-jiquiaari Pablo pohuatasantej, puetunu tii quiniaa-janaari Pueyaso maniniuhuaqueetaquiaari nojori shuquiritasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niqiquiaacuajani, jiyanohua queraatia parta Judiocuacaari Jesuucua tiuya. Puetunu nojorijianaari tariucuaaanu Moisés niishitiojosano tojitiacajuhua, nocua nojori jiaatianuta jiyanohua. <sup>21</sup> Nio Jerusalén tiacajinia quiniaa Jesuucua tiuuniaa pueyari quiocuaji tojiqianuhua. Quiaanaari tamonu jiyacajinia quijia parta Judiocua-niishitiojoquiaa maja nojori miiniuria tari tariucuaaanu Moisés niishitiojosano. Quiaanaari niishitiojoquiaajuhua maja nojori necohua cararaatiuquia co nojori miatejonura, taa pa supuetanaa niishitiojosaaquiaaricuaani. <sup>22</sup> Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? <sup>23</sup> Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. <sup>24</sup> Nojori quia jiyataare Pueyaso Secojoua tijania. Niocua nia cuaqueya jee-quejosee taa pa supuetanaa sequequiaaricujani. Naajuhua, quiocua nojoriria cumaneeca niqitiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujuanaa quiquianu pueya sequesano quiajanijajini-ji. Niishitiniutianiyajaariuhua, quiaaqui tariucuaaanu Moisés niishitiojosano miyajaa. <sup>25</sup> Majaari Jesuucua tiuunio taucuaacua quia tacaani. Canaacua-jaari tari nojori nacasuquiaari canaa naajioneejiniani, nojoriicua canaa naajiosacari. Canaari nojori seque-

quiaari cutarani maja tari nojori tojiniuria Moisés niishitiojosano. Canaari nojori sequequiaarijuhua, maja na miaquenuunura shipinishano pueyasohuacuara puecoosano casaa, naajuhua, maja na miaquenuunura nanaca. Canaari nojori sequequiaarijuhua maja na miaquenuunura shu na nanacataja, naajuhua, maja na numuetucunura na camishoo maaji. Puetunu pa supuetanaa rootasanojinijianaani, saa niojuuari taucuaa tojishocoriquiano rootasano.

### Na cojiniaata Pablo quioosacari Pueyaso Secojoua tijania

<sup>26</sup> Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari taa Moisés niishitiojoquiaaricujani. Naa na miiniu nuhuajitij, Pueyaso Secojoua tijania tiuquitiaquiaariiri pueyacuara secojonaacua. Na sequetuquiaariiri casaa juuca na tucuatatunutaniya na cuaqueya na jeequejonuununi, naajuhua, casaa juuca nojori panutaniya Pueyasora na niqitiosocoriquianoni.

<sup>27</sup> Quera nojori tucuatasaacari puetunu cuno semaana juucajanaa, Asia jiyajiniinio narta Judiocuacaari Pablo niqiquiaari Pueyaso Secojoua tijania. Nojoriiri puetunu pueyajanaa nasajoquiaari ritia. Jiyacari Pablo quiatuereeri. <sup>28</sup> Na quiatuereeri Pablo, pueya na jiquioonuutareeri:

—Israel pueyanaa, miji! [Canaa nia naacuseeja! Nioori noo pueyanocuaa tiqiyocua na rucuanesaqui pueya niishitiojoquiaa sacuaratia pocuaratej, nio Pueyaso Secojoua tiaacuarajuhua. Naajuhua, tariucuaaanu Moisés Rootasano sesacatequiaa pueyajaariuhua. [Quiarijiani, pa Secojoua tijania sacuaratia tiuquinitiaree taucuaacari!

<sup>29</sup> Cuno Judiocuacaari naa sequetuquiaari Pablotej, Trófimo jiyanihano pueyanota nojori niqiniuucua nojuaja tarijia na rucuanajosacari cuno tiacajiniaya. Trófimoori Jesuucua tiuunia tahue quijia, Éfeso tiacajiniinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tijania.

<sup>30</sup> Puetunu Jerusalén tiacajinia quiniaa pueyajanaari juaaquoquiaari. Pabloori netecuatuquiaariiri. Na quiatuereeri. Pueyaso Secojoua tiacaji na jaatiuquiaari carijiniacumaari. Pueyaso Secojoua tia tohuateyari ritia tionujusaaquiaari na nuhuaji. <sup>31</sup> Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “Judiocua na juaniutia nacoya!” Cuno comandanteni, nojuajaari soldadohua capitáncuaa jiyaniijia. <sup>32</sup> Jiyacaritij, comandanteeri na soldadohua rerejotequiaari ritia, na capitáncuaanio. Tee pueya nacooriaquiani, nocua netecuatuquiaariiri. Judiocuaa jaara niqiquiaari comandante na soldadohua nere-taano nojoriicua, jiyacari shusha cartetuquiaari Pablo piquitiuniuuri. <sup>33</sup> Comandante tiuquishacari nojoriicua, Pablo quiaaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

<sup>34</sup> Pueyari saaja jiyajeneta nacooriguaa. Niiori tamaatia nacooriguaacujua. Tamasacaari socua tamaatia nacooriguaajanaajataj. Comandanteeri cunora maja na niishiniu quiquiaari casaa Pablo miirijjaarani, puera nojori cojuatunenuucua na na-coosacari. Cunora na soldadohua sequereeri:

—Pa quijia tijinia nia jaatucuyarohua!

<sup>35</sup> Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaniutia socua shiiniuquiti- aquiaari Pabloocua, na monu paniniuria juucua. Soldadohuari nojoriicujaji Pablo shiitioquiaari jiyocua- caanu. <sup>36</sup> Pueyari soldadohua nuhuaji na cocuatesacari jiiquionuuriquiaa:

—Nia more cuno sesaaca! Nna more!

### Tama nocuaji Pablo tacusacarijiaaja

<sup>37</sup> Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucuaeree:

—¿Quiaaquiiri Griego rupaa pocuaja? Janiya juucua quia jiyaniriquiaa Egipto jiyajinijinio pueyanoni. <sup>38</sup> ¿Majateeri noo quiajaniya quiqianucujaja, cariiquia jiyajinia jiyatacanu cuatro mil puecojuaca pueyatej?

<sup>39</sup> Pabloori saaja na sequereeri:

—Janiyari Judio pueyanoni, Tarso tiacajinia rasanotuhua. Naacuajitij, janiyari Tarso tiacajinijinio pueyanoni, teyano tiacatucujaja socua panishano tiaca Cilicia jiyajiniani. Quenaaja rupaquijia cua tarishitir- icuarajaj. Cuno pueya sequenu paniya niquiriyatu rupaa quenaajanijia.

<sup>40</sup> Comandanteeri socua na sequereeri:

—Quia pocuare.

Pabloori jiyacari tacatujiniji nujaquiaari. Na juashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicuaa pocuaree tama nojori Hebreo rupaajiniaari. Naa nojori sequereeri:

**22** —Cua tapueyocuaacanaa, cua jiyaniijianucuaanaa, nia tojitiare cua sequesano niajaniya tama cua tacusacarijiaaja cucuaji.

<sup>2</sup> Cuno pueya jaara tojiquiaari Pablo pocuasacari nojoriicuaa Hebreo rupaajinia, pueyari maninia sanaajetaquiaarijianaa. Pabloori nojori sequereeri:

<sup>3</sup> —Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia maashiquiaarini. Gamalielri cua niishitiojona quijia. Jiyanohua rootasaaquiaari pa supuetanaa niishitio- josanonijia. Janiyari pueyaracaanu Pueyaso panishano miiniuucua jiaatiaquiaani, taa quiarjia nia miiniu paniyanijia. <sup>4</sup> Janiyari tarijia Jesuucua tiuuniaa pajejani naquiya cua miitiasocoriquiano. Janiyari na

mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. <sup>5</sup> Pueyacuara secojonaa camarnuuri cua miijosano niishiyajuhua, puetunu pa jiyaniijianu- cuajanaano. Nojoricuajaari cua niqutioquiaari nojori naajione Damasco tiacajinia quiniaa parta Judiocua- caacuara. Janiyari juucua quiariquiaa Jesuucua tiuuni- aa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajini- ani, saniitiojosocoriquiano.

### Pablo pohuatasacari Jesuucua na tiuuniujiniji

<sup>6</sup> Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyajitij jiyanohua shacantuuca juhua miacanaari cua nunuquiaari. <sup>7</sup> Janiyari juhua jataasaareni. Jiyacaritij, janiyari rupaa tojirii cua se- queyanoni: “Saulo, Saulonaa, ¿casaara quia miitiaa puera janiyani?” <sup>8</sup> Janiyari na nequesotareeni: “¿Cante- quia Jiyaniijianaa?” Cua sequereeri: “Janiyacujajaari Je- suni, Nazaret tiacajinijinio pueyano. Cunocujajaari quiaa na miitiaani”. <sup>9</sup> Cua cojiniaa pueyari cuno sha- cantuuca na niquishacari shiriitiquitiquiaari. Majaari na tojitiuniu quiquiaari cutara jiyocuaaanuji rupaa cu- cua pocuaano. <sup>10</sup> Janiyari socua na sequereeni: “¿Casaa cua miyarini Jiyaniijianaa?” Jiyaniijiaari cua sequereeni: “Quia sanerohua. Naajaa quia quiaare Damasco tiaca- jinia. Quiaari tii sequesaanutaniya puetunu cua panis- hanojuanaa quia miiniuria”. <sup>11</sup> Cuno shacantuuca cua nunuquiaari jiyocuaaanujini, cua namijia sesoquiaari- iri. Janiyari cariojuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

<sup>12</sup> Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari see- tanujuanaa tariucuaaanu Moisés niishitiojosano toji- jia cutara. Puetunu Damasco tiacajinia quiniaa Ju- diocuaacari na panijia. Nojoriiri na sequetujaja: “Ananías cutaraari maninia pueyano”. <sup>13</sup> Ananíasri jiy- acari cua niqiniuuca niquiaari. Jaara tiuquiquiaari cucua, cua sequeeseeri: “Cua tarajanu Saulonaa, maninia niqijiara quia quiriouhua”. Jiyacaritij, cua namijiaari ritia jeequequee. Janiyari maninia niqiquii Ananíasni. <sup>14</sup> Cua sequereerjiaariuhua: “Pa supuetanaa Jiyaniijia Pueyasocujajaari quia saquiriojoquiaari tariu- cuacaanujiniji, na niishitionura quiajaniya na panis- hano quia miiniuria. Quia saquiriojoquiaarijiaariuhua quia niqiniuria taquiya pocujinijo sesa miyashijia cu- tara, tama na camaru rupaajiniji quia tojinuria na se- quesanojuhuaj. Nojuacuajaari pa Jiyaniijia Jesucristo. <sup>15</sup> Quiaari puetunu pueyapue niquiarajanaa pohu- atanutaniya nojuajiniji quia niquishano, quia tojis- hanonio”.

<sup>16</sup> Ananíasri socua cua sequequiaari: “¿Casaara quia tarishiyarini? Quiarjiani, quiaa cuara tiuquinishaaria. Jiyaniijia Jesu quia sequere: ‘Cua jiyanoori sesa cua mi- ishanojiniji’. Nocua quia tiuushacari, quia sesa miis- hanoori jeequesaanutaniya”.

### Pablo pohuatasano taa Jesu jiyaroquiaari nojuaja taucaacuani

<sup>17</sup> Janiya jaara riujuuquiaariuhua Jerusalén tiacajiniohuani, janiyari Pueyaso Secojonuujua tiajinia secoriquiaani. <sup>18</sup> Cua secijosacari, janiyari Jesu niqiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojtianu quiniutianiya quiajaniya, nojori quia pohuatasacari janiyajiniji”. <sup>19</sup> Janiyari saaja na sequereeni: “Cua Jiyaniijiana, nojoricuajaruhua niishiya janiyari quiocua tiunuaa pueya quioojuani puetunu rerejua tiajinijiana cua nujuatejosocoriquiano nojori. Janiyari nojori mojuuajuahuj. <sup>20</sup> Naajuhuj, quia rupaa pohuata Esteban jaara mosaaquiaritij, janiyari catecaji saitia na jacusacari shootiaquiarini. Janiyari na jacuna toqueya cojuariquiaaaniuhuj, nojori mosacari Esteban. Janiyari jaarajaaja sequequiaarini: ‘Cuaara mosaaria’. <sup>21</sup> Naa cua sequesacaritij, Jiyaniijaari saaja cua sequereeni: “Niiquiji quia quiaarejaj! Janiyacuajaari tucuacaanu quia jiyaronutaniya taucaacuani”.

### Comandante jitiiasacari Pablo

<sup>22</sup> Pueyari sanaa tojitiariquiaa Pablo pohuatasacari. Saniniuujia, Pablo jaara jiyaniquiquiaari taucaacu, pueyari jiyacari coteequiaari nacoonu, taucaacu soojeaca nojori quiniucua:

—Cuaara mosaaria cuno pueyano! Majaari maninia jiyano pueyano rishiniuria socuatej!

Cuno pueyari naa nacooriquiaa.

<sup>23</sup> Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa quejootuquiaari jiyajuajaariuhuj. <sup>24</sup> Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuara sequeera casaara naa pueya nacoyani.

<sup>25</sup> Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniija César rootasanotee, naa nequesoreesoojua nia majacunura narta Romano pueyanotej?

<sup>26</sup> Capitán jaara tojiquiaari naa Pablo sequesantej, ritia netequiaariiri. Na comandante sequeseeeri:

—Quiaa cocuaatia miya! Cuno pueyanona Romano!

<sup>27</sup> Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucaaree:

—Taaquiririnij.

<sup>28</sup> Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequereeri:

—Janiyari Romano cutarani, nojori tiacajinia cua rasaanuucua.

<sup>29</sup> Cuno pojori, Pablo majacunura seeratasaaquiaari juucua, naa nojori tojtiasacaritij, Pablo shuriucua jiritia shiriquitiaquiaariiri. Comandante niishishacari Pablo seetanujuanaa Romano quiquiaari, puererejaariuhuj, Pablo na morojotenuucua.

### Tama nocuaji Pablo tacusacarijiaa Judiocuaca jiyaniijianucua niqiuara

<sup>30</sup> Tariqui saniniuujia, comandanteeri maninia niishiniu paniquiaari casaara Judiocuaca nacootariquiaacuaa naa Pabloni. Naaratej, comandanteeri Judiocuacaacuara secjonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa rerejotequiaariuhuj. Nojoricuajaari Sanedrín maanu. Jiyacari Pablo numatucujiniji rupareetaquiaari cumayocua saatijio-tasanoori. Puetunu nojorijiana jaara tari rerejotequiaari, jiyacari Pablo tohuatequiaariiri. Nojori tajoji na nujuatereeri.

**23** Pabloori juhuacatecara pohuatanu coteequiaari camarucua niqiuara. Nojori sequereeri:

—Cua tapueyocuaana, janiyari pueyaracaanu juhuajaniya quiquiaani, Pueyaso tojijia cua quishacari pueyaracaanu.

<sup>2</sup> Naa Pablo sequesacaritij, pueyacuara secjonaa jiyaniijajanaari juaarii. Ananías na sesa. Nojuajaari Pablo jiyaniquiaari najuhuaa pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—Na rupaaajinia nia piri naa pocuaaniquitij!

Pablo shuriucua nujuanaari jaarajaaja na piquii.

<sup>3</sup> Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—Pueyasoori saniniuujia cucua quia naminiutianiyacujua, Moisés Rootasano tojiyashijiana! Nia jyanishacari janiyari Moisés Rootasano tojiyashijiani, niaari coteenu cua nequesoreya maninia taa Moisés rootaquiaaricujani. Quiaa sajara Moisés Rootasano tojiyashijia cutara, quia sequesacari cua pishaanura nia nequesoreyaquishacarijia maninia janiya!

<sup>4</sup> Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secjonaa jiyaniijiaruhua?

<sup>5</sup> Pabloori nojori riucaaree:

—Cua tapueyocuaana, cua jyanoori. Paacuajaari naa rootasaaquiaari Moisés nequesoreetuneejiniani: “Majaari sacuaatia rimiaaquenu nia camarnuucua”.

Cua pueyanaa, maja cutaraari cua niishiniu quiriquiaa nojuajate pueyacuara secjonaa jiyaniija.

<sup>6</sup> Pabloori niishiquii cuno Judiocuaca camarucua nacasunaa cuniqui quiriquiaani, nojiaqueya nojorijinijinoori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jyanohua na rupaa paaretaquiaari naa na sequenura nojori:



—Cua tapueyocuacanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitiani-jionutaniuhua taa puetunu cuarta Fariseocuaca niya quiniaa tiuyanijia. **¶**Niaaquiiri jiyamitia cua nequesoreya!

<sup>7</sup> Pablo jaara naa sequequiaaritij, Fariseocuacaari Sadsuceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquitiiquiaari. <sup>8</sup> Sadsuceocuacaari jiyaniya maja macunucua samiitiaconu quiniutianiuhua. Nojoriiri sequeyajuhua: “Maja Pueyaso seya quiniu”. Pueyapuenaaari sohuanuujuhua. Fariseocuaca cutaraari nojori cuaracashitishanoocua tiuya. <sup>9</sup> Naacuajitij, puetunu pueyajanaari nacooriguiaa na juayonuu-tasacari. Jiyacaritij, tariucuacaanu Moisés Naajio-tasanoinijiji niishitiojonaa pueyari sanetaquiaari. Nojoriiri Fariseocuaca quijiajuhuaj. Nojoriiri naa sequetuquiaari Pablojiniji:

—**¶**Nio pueyanoori maja sesa na miiniu quiquianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujue Pueyaso panishano na miishacarini?

<sup>10</sup> Pueyari socua jiyacatequiaari nacoonu. Comandanteeri puerequiaari, na jyanishacari Pablo naasucua socua suresaanutaniyaquij. Naa jyaniquiaariiri, puerajanaa pueya juaaquiiosacari. Nocuaaji, comandanteeri ritia na soldadohua jiyaramiquiquiaari, na tiajinia nojori tiuquininiuuhua Pablo pueya tajiniji. Naa mitiuquiaariiri.

<sup>11</sup> Cuno niucujani, Jyanijia Jesuuri Pabloocua muetaquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajini-acuaani, quiaari naa pohuatanutaniya janiyajiniji Roma tiacajinia quiniaajuhua, Césarjanaa niquiarajuhua.

### Judiocuaca rojotoosacari Pablo na motunura juucua

<sup>12</sup> Tariqui saniniuujia, noojiaqueya Judiocuacajinijioori Pabloocua rojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirinijianuhua.

<sup>13</sup> Nojoriiri cuarenta canuu quiquiaari, naa sequetuquiaarini. <sup>14</sup> Na nuhuaji, cuno pojoriiri pueyacuara secojonaa jyanijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuaraa more Pablojaatijia. <sup>15</sup> Niajaniya, pueyacuara secojonaa jyanijianucuaanaa, puetunu Sanedrín maanujuaanaano, nia sequere comandante cuara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacia jiyacari niaacua na tiuquiyaquishacari nua cajiniocua na moreni.

<sup>16</sup> Tamonu pueyanoori Pablo raaquia caminiuujiquiaari naa cuno pojori sequesano camarucuatej. Pablo raaquiaari nocuaaji ritia soldadohua quijia tiajinia quiaquiaari na cama Pablo na pohuatanura. <sup>17</sup> Jaara tari na pohuataquiaari, Pabloori jiyacari cuniqui cojua-naajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

<sup>18</sup> Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

<sup>19</sup> Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

<sup>20</sup> Caya samijiaari na sequereeri:

—Noojiaqueya Judiocuacajinijioori Pabloocua rojotoorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuaanaa niquiara nequesoreesocoriquiano.

<sup>21</sup> Quiaa jaara sequesaa, majaari nojori tojinuu. Cuarenta canuuri tari nuu cajiniocua nocuaaji jamaatiuya. Cuno pojoriniaari maja na miaquenuunu quiniutianiya, majanaari na raruunu quiniutianiya-juhua, cuaraa moture Pablojaatijia.

<sup>22</sup> Comandanteeri caya samijia sequequiaari:

—Maniniacuaja. Majaari tamasa pohuatanu quia sequesano janiya. Tariucuaja. Quia quiaarohua.

### Soldadohua jiyatasacari Pablo camarnu Félixua

<sup>23</sup> Comandanteeri caapiqui capitán piiquiaari. Nojori sequereeri na numootetonura dosciento soldadohua, Cesareya tiacajinia quiojoriquiano cuno niucuaaja. Mariyata cuaraa quiojora setenta soldadohua caballohua nijinia cajitijiajuhuaj, socua dosciento soldadohua saa cashiriacaano. <sup>24</sup> Comandanteeri na capitáncuaca sequequiaarijuhuaj, nojori niojotanura cajitiucua tamasa caballohua nijinia Pablo cajijia. Nojori sequequiaarijuhuaj:

—Niocua maninia cojuaare Pablo, cuaraa tiuquiiria camarnu Félix nequesoreesocoriquiano.

<sup>25</sup> Comandanteeri na naajione niqutioquiaari Pablo jiyatanaa. Naa naajiosanoori quiquiaari camarnu Félix-cuara:

<sup>26</sup> “Camarnu Félixnaa. Nio Claudio Lisias naajione. ¿Taa quia quiyani cua panishano camarnunaa? <sup>27</sup> Cua jiyarotano pueyanoinijiji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuaji nia quiare ritia cuno pueyano, mariqui na motureeri’. <sup>28</sup> Maninia cua niishiniuria casaara naa pueya nacootariquiaa Pablóni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pablóni, nojori neque-

soreenura nojuajanaa cua tojishocoriquiano. Janiya-janaa jaara Pablo tojiquianuni, casaara pueya monu paniriquiaanoj, janiyari jiyacari shusha niishiriini. <sup>29</sup> Nojoriqiiiri na nacootacanu Pablo tojijaquiniucua tariucuaaanu tama nojori supuetanaa rootasanojuaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. <sup>30</sup> Janiyari sequesaarucuaajuhuaaj, noji-aqueya Judiocuacajiniinionaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuaaj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaaja”.

<sup>31</sup> Soldadohuari naa miiquiaari taa comandante sequequiaari nojoricuajani. Nojoriiri cuno niucuaaja Pablo jiyataquiaari. Antípatris tiacajinia tiuquiiioseeri. <sup>32</sup> Na nioluacata quiojonaa soldadohuari Antípatris tiacajini-ji tariquicuaji riujuuatiaquiaariuhua Jerusalén tiacajini-ohua. Caballohua nijinia cajitiuniaa soldadohua cutaraari Pablo jiyataquiaari. <sup>33</sup> Pablo jiyatanaa jaara tiuquiiioseequiaari Cesareya tiacajinia, nojoriiri comandante naajione niquitiosee camarnu Félix. Pablo na niquitiotureejaariuhuaaj. <sup>34</sup> Camarnu serojonu nuhuaji comandante naajione, Pablo nequesotaquiaariiri:

—¿Tee quia rasaaquiaarini?

Pabloori na riucaare:

—Cilicia jiyajinia rasanonijia.

<sup>35</sup> Camarnuuri na sequeree:

—Janiyacua quia nequesoreeriquiani quiocuara saquiriojotanaa jaara tiuquiiiojore.

Jiyacaritij, camarnuuri na soldadohua sequequiaari cuaara maninia cojuatuura Pablo tariucuaaanu jiyani-ijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiara.

**Tama Pablo tacusacari nocuajijiaaja camarnu Félix niquiara**

**24** Pabloori cinco juuca camueequiaari tari Cesareya tiacajinia. Jiyacari tiuquiiioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniijia Ananías, mariyata secaja Judiocuaca camarucuanio. Nojoritia tiuquiquiaariiri Tértulo jiyaniishano pueyanohuaaj. Jiyanohua pocuanu niishijia. Puetunu nio pojorijianaari camarnu Félixqua tiuquitiaquiaari Pabloocuara na saquiriojotanura. <sup>2</sup> Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jiyanohua niishijia. Naa niishijia quia quishacaritij, quiaari maninia quia pueya jiiitiaa. Canaari naacua juhuajaniya quiyani, maninia canaa quia jiiitasacari. <sup>3</sup> Canaari cunora quia timitiaani camarnunaa, maninia quia jiiitanuucua canaa pueyaracaanu, puetunu canaa jiyajiniajanaa. <sup>4</sup> Maja puera cua tarishitini paniniu quiajaniya. Que-

naaja rupaquijia canaa quia tojiricuara. <sup>5</sup> Nio pueyanoori tariucuaaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhuaaj. Naa sesa na niishitiojonuucua pueyatej, tamasacaari maja tari na rupueni paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuaajaari cuno pojori jiyaniijia. <sup>6</sup> Juucua Pueyaso juaatini paniquianuajaariuhuaaj, tahue na tiuquinini panishacari Pueyaso Secojoua tiajinia. Canaari jiyamitia na quiarucuaani, canaa nequesoresocoriquiano taa tariucuaaanu canaa supuetanaa rootasaaquiaaricuajani. <sup>7</sup> Comandante Lisiasri canaa na jaariutiurucuaa saajani. <sup>8</sup> Canaa sequerucuaajaariuhuaaj: “Cante nio pueyanocuaara saquiriojotanu paniyani, cuaara quiaara camarnu Félixqua”. Naa canaa sequerucuaari. Nio pueyano quia nequesotasure, quia niishiniuria maninia. Seetanujua-naacuaaj, canaari cunora nocuara quia saquiriojotaani.

<sup>9</sup> Cuniqi quiniaa Judiocuacaari jaarajaaja seque-  
turee:

—Taaquiriirini, camarnu Félixnaa. Naacuaaquinatejaj, taa Tértulo sequeyacuajani.

<sup>10</sup> Camarnuuri na juaashiquia shiitioquiaari Pablo pocuanura saniniujia. Pabloori jiyacari coteeree. Naa sequereeri:

—Taaquiriirini, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejia cuarta Judiocuaca nequesoreena quia quishacari. Naaratej, janiyari juhuajaniya quia niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. <sup>11</sup> Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuuja tiajinia. Janiyari shusha camueesuhua doce juucani. Cucuara saquiriojotanaa quia nequesoresureeraj. <sup>12</sup> Nojoriiri maja quenaaja na riuritanu quiquianu janiya tamonu pueyanta juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojoua tiajinia. Majaari quenaaja nojori riuritanu quiquianu janiya canaa Secojoua tiajinia juayonuutaano pueyata. Majaari quenaaja naa cua miiniu quiquiaari puetunu tiacajiniajanaa cua rucuanesacari. <sup>13</sup> Nio pojori cucuara quia saquiriojotaani, nojoriiri maja na naata sequenu seetanujanaa janiya sesa miijiani. <sup>14</sup> Nojori sequesacari janiyanaari Pueyaso tojijia tamaatia nojorijinijini, cua tojinuucua cuno Nazareno pueyano, taaquiriirini. Saaja cuno nojori sequesano cutaraari seetanujanaa. Janiyari Nazareno tojijiani seetanujanaa cua tiuushacari puetunu Moisés naajiotasanoocujanaa, naajuhuaaj, cua tiuushacari puetunu canaa supuetanaa caminiujiushano Pueyasojinijia naajionuutasanoocujanaano. <sup>15</sup> Janiyari juhua cucuara saquiriojotanaa pueya tiuya Pueyasoocuaajuhuaaj, taa Pueyaso samiitianijionutaniuhua macunucuanu; maninia miijiaa, sesa miijiacano. <sup>16</sup> Naaratej, janiyari pueyaracaanu sesa miyaquiniu

saniniujuquiaani, maninia cua quiniuria Pueyaso niquiara, pueya niquiaranio. Naacujitij, janiya jaara samiitiarohuani, majaari cua macuhajenu quiniutianiya.

<sup>17</sup> Queraatia marijia cua shocotejonu nuhuaji cua ru-cuanejosacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiuuniasa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhua Jerusalén tiacajinia, Jesuucua tiuuniasa casamiiuniucua niqutiojosocoriquiano, mariyata cua jiiitiasanojiniji cua niqutionuhua Pueyasora. <sup>18</sup> Naa cua miiniu nuhuaji Pueyaso Secojojua tiajiniatej, Asia jiyajinijinio Judiocuacaari cua naacutucanu tohuataano juucua Pueyaso Secojojua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaaquiaaricujani. Cuno juuca, majaari queraatia pueya quiniu quiriqiaa Pueyaso Secojonuuajinia. Majaari quenaaja pueyata cua juayonuutano quiriqiaajuhuj. <sup>19</sup> ¿Teete cuno pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni. <sup>20</sup> Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijuhuaj. Nojori cuara sequeera, ¿cuno camarucate cua sequecanu janiya sesa miiquianuni? <sup>21</sup> ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarjia, cua niishishacari macunucuaari samitianijiosaanutaniuhua”? Janiyacuajaari naa nacacanu camarucua nequesoreesacari janiyani.

<sup>22</sup> Camarnu Félix jaara naa tojiqiaari Pablo seque-sanotej, nojuajaari pueya sequequiaari:

—Comandante Lisias cuara tiuquiiirajaara, janiyacu Pablo nequesoreeriquiani.

Camarnu Félixri Jesujiniji pahuatasano tari maninia niishiquiaari. Naaratej, nojuajaari Pabloocua saquiriojotanaa pueya tarinitiaquiaarijaara. <sup>23</sup> Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupueana, tapueyocuanio, nojori jaara Pabloocua nimiaquia, majaari nocuaji na tenujunuj. Nojori cuara na niqutiojuura na panishano.

<sup>24</sup> Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—Pablo nia tohuatere! Janiyari cua niquiuocua na tojinu paniyani. Cuara canaa niquiara pahuataara taate Jesuucua tiushanojuaarani.

<sup>25</sup> Naacujitij, Pabloori Félix pahuataquiaari nojori niquiara taate pa naata maninia miijia pa quiniuni. Pahuataquiaarijuhuaj taate pa naata tama pa cuaqueyajaaja pa cojuanu maniniani, sesa pa miyaquiniucujia. Naajuhuj, Pabloori na numootequiaari Pueyasoori sesa miijia saniitionutaniya.

Camarnu Félix jaara naa tojiqiaaritij, jiyanohua shiriiquiquiaariiri. Pablo sequeereri:

—Tariucuja! Quia quiaarohuacuarajaara. Janiya jaara jeya quiriqiani, janiyacu quia sequeereraniuhuj.

<sup>26</sup> Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura. Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. <sup>27</sup> Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacari-tij, Porcio Festoori saniniuujia camarnura jiyate-saaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

### Pablo pahuatasacari Festo niquiara Jesujiniji

**25** Jiyacari-tij, Festoori tiuquiquiaari Cesareya tiacajinia, Judea jiya camarnu na quiniuria. Jiuujianaraca juuca nuhuaji, Cesareya tiacajiniji quiaquiaari Jerusalén tiacajiniaari. <sup>2</sup> Jerusalén tiacajinia na quishacari, pueyacuara secojonaa jiyaniijianucuaari tii Judiocuacajinijinio socua tojishano camarucua Pabloocua saquiriojotaquiaari camarnu Festo. <sup>3</sup> Nojoriiri camarnu Festo sequequiaari cuara na soldadohua jiyarooro, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. <sup>4</sup> Camarnu Festoori saaja nojori riucuaquiaari:

—Nujuatesano quiya Cesareya tiacajiniacuajaruhua. ¿Maatucua casaara niyara rishaareni? Janiyacuajaari nocua tacatenutaniuhua.

<sup>5</sup> Camarnuuri nojori sequequiaarijuhuaj:

—Niajanijinijinio socua tojishano pueya cuara quiojohua cuata Cesareya tiacajinia. Nojoriiri na naata Pabloocua saquiriojotanu cua niquiara tii, cua niishiniuria maninia, Pablote seetanujanaa sesa miiquianujuuara.

<sup>6</sup> Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquiniu nuhuaji, saniniuujia tariqui cajiquiaari nequesoresaqui camarnu cajitijinijiaari, camarnu na quishacari. Jiyacari na soldado sequequiaariiri camarnu Pablo tohuateera na nequesoresocoriquiano. <sup>7</sup> Judiocuacaari tari tiuquiiioquiaari Jerusalén tiacajinijijiuhuaj, Pabloocua na saquiriojotanuunura. Pablo jaara nujuatesaaquiaari camarnu tajoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocua saquiriojotanuquiaari najuhua queraatia casa. <sup>8</sup> Jiyacari-tij, Pabloori tama nocuaji na tacusacarijaaja naa sequequiaari:

—Maja sesa cua miiniu quiquianu. Janiyari tariucuaanuu Moisés Rootasano tojiqiaaajaniuhua. Majaari sesa cua miiniu quiquianu Pueyaso Secojojua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

<sup>9</sup> Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

<sup>10</sup> Pabloori na riucaquiaari:

—¿Majateeri Roma tiacajiniji pa jiyaniijajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuj, majaari sesa cua miiniu quiquianu Judiocuaca. <sup>11</sup> Janiya jaara sesa miirii seetanujuanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niquitionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyan camarnunaa: jiyaniijia Césarjanaa cuaara cua nequesoreeraqui.

<sup>12</sup> Camarnu Festo pocoojonu nuhuaji na nacasunaa-ta, Pablo sequequiaariiri:

—Quiaacuajaari cua sequeere cua jiyaronura quia-janiya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

### Jiyaniijia Herodes Agripa niquiara Pablo pohuatasacari Jesujiniji

<sup>13</sup> Naa Pablo sequesaaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhutanura nojuaja. Agripaari tiuquiquiaari na rimiatu Bereniceta. <sup>14</sup> Nojori camueenujusacari camarnu Festo tiajinia, Festoori socua jiyaniijia Agripa pohuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. <sup>15</sup> Jerusalén tiacajinia cua quishacari, Judiocuacaacuara secojonaa jiyaniijianucuaari nocuara cua saquiriojotacanu, Judiocuaca camarucua. Nojoriiri cua sequetucanu Pablo cua motenura. <sup>16</sup> Janiyari saaja nojori riucaacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijjoma niya nocuara saquiriojotanuunurajaati-jia. Monu panishano cuaara rihuaneera tamajaaja quenaaja nocuaji, jaara seetanujuanaa quiaquiri nocuara saquiriojotasano”. <sup>17</sup> Naacuajitij, Jerusalén tiacajinijinio pueya nocuara saquiriojotanuuriquiano jaara cucua tiuquijiocanu, majaari socua cua tarishiniu quiquianu. Janiyari tariquicuaji nequesoreeja cajitijinia cajiqianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano. <sup>18</sup> Cuno pojori Pablooru saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano. <sup>19</sup> Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyaniishano pueyanonaari

mosaaquiaari. Pablonaari saaja pueya niishitiojiyacujua, cuno Jesu jiyaniishanonaari samiitiaquiaariuhua. Saminionaari quiari quiyajaa. <sup>20</sup> Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?” <sup>21</sup> Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiani, janiya cuaara na jiyarore jiyaniijia César Augustoocuaatijia.

<sup>22</sup> Jiyaniijia Agripaari camarnu Festo sequequiaari:

—Janiyari cuno pueyano tojinu panijajaacuhuj.

Festoori na riucaquiaari:

—Quiaacuajaari tariqui na tojinutianiya.

<sup>23</sup> Tariqui, jiyaniijia Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohuacajinia, shanohua jacaria na rucuanenuta, shanohua na toqueya maniniuquiyatajuhuaj. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajinijinio camarucuaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano. <sup>24</sup> Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquiriojotanuquiaa, Jerusalén tiacajinia cua quishacari, niya Cesareya tiacajinijuhuj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”.

<sup>25</sup> Janiyacuajaari tari niishiyani, nio pueyanoori maja sesa na miiniu quiquianu. Naacuajitij, janiyari niishiriojiyari, ¿pueyanotucua casaara najuhuaana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijajanaa nequesoreenura nojuaja. Janiyari cunora na jiyaronutaniyani. <sup>26</sup> Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua casaara nio pueyano cua jiyarore nocuani. <sup>27</sup> Majaari cua naata naajaa jiyaronu quiasano pueyano, maninia nequesoreyaquishoojua.

### Pablo rihuanesacari jiyaniijia Agripa

<sup>26</sup> Jiyacaritij, Jiyaniijia Agripaari Pablo sequequiaari:

—Quiocuaji quia rihuaneereja, jaara seetanujuanaa quiaquiri quicuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

<sup>2</sup> —Timianijia jiyaniijia Agripanaa, quia sequesacari cua pocuanura quia niquiara, tama cua tacunura cu-

cuajijiaaja, Judiocuaca saquiriojotasanojiniji cucuara.  
<sup>3</sup> Quiaari puetunu cuarta Judiocuaca miijosanojuanaa niishijajuhuj, puetunu canaa nacojotasanojuanaano. Janiyari cunora quia sequeyani, nareja cua tojiri cua pohuatasacari quiajaniya.

**Pablo pohuatasacari taa na quiquiaari Jesuucua na tiuyaquishacarijiani**

<sup>4</sup> Puetunu Judiocuacajanaari niishiyajuhuj taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajiniano.  
<sup>5</sup> Cuno Judiocuaca quia nequesotasureeraj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojtiaja cutara, socua tamasaca cuarta Judiocuacajiniji. <sup>6</sup> Nojorijiaari cucuara saquiriojotacanu cua tiuushacari Pueyasooqua, taa na samitianijionutaniuhua macunucua. Pueyasoori nojori samitianijionutaniuhua taa na sequequiaari tariucua caanu canaa supuetanaacuajani. <sup>7</sup> Quiarijiani, canaa supuetana Israel doce niquiohuacuajinio caneno pueyari naa seetanujuanaa Pueyaso sequesano niquiniuria sashiyajaa. Naaratej, nojori pueyacaanu Pueyaso secojonuquiaa, juuca, niucuanio, Pueyaso na tojtiasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. <sup>8</sup> ¿Niaateeri jiyaniya Pueyasoori maja na naata macunucua samitianijionuhua?

**Taa Pablo miitiaquiaari Jesuucua tiuuniaa tarijiani**

<sup>9</sup> Janiyari tarijia sequequiaari tamajaajani sesa cua niishiriojosacari Jesujiniji: “Nazaret tiacajinijinio pueyanooqua tiuuniaa pueya paracaariirijaj”. <sup>10</sup> Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojonaa jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniaa riuniujuquiaari nujuatejojuajiniani. Nojori jaara puecoosaaquiarijihuhuj, janiyari jaarajaaja sequequiaarini: “Maniniacuaaja, cuara puecoosaaia”. <sup>11</sup> Janiyari sequeyarucua naa miitiaquiaari Jesuucua tiuuniaa pueyani, nojori cua pishojonura Jesuucua nojori tiuuniu.  
 Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanohua nojori juaajia quiquiaarini. Majaari quenaaja nojori cua niquiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

**Pablo pohuatasacari taa Jesuucua tiujujara na quiquiaarini**

<sup>12</sup> Naacuajitij, janiyari juucua quiariquiaa Damasco tiacajiniani, pueyacuara secojonaa jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniaa pueya cua miitiasocoriquiano.

<sup>13</sup> Nucuaco cua quiasacari jiyaniijia Agripanaa, janiyari jiyocuacaanuji nunusaaquiaarini, cuata quiojonaa juhuaj. Cuno shacantuucaari socua jiyanohua shacantuuca quiquiaari pananujiniji. Panacariiri jiyacari quiriqiaa. <sup>14</sup> Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: “Saulo, Saulonaa! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari”. <sup>15</sup> Janiyari na sequereeni: “¿Cantequia Jiyaniijianaa?” Cua riuucareeri: “Janiyacuajaari Jesuni, quiaa na miitiaquiaani. <sup>16</sup> Quia sanerohua. Janiyacuajaari quiocua muetareeni puetunu cua panishanojuanaa miijiaara cua jiyatenura quiajaniya, quiarijia janiyajiniji quia niquishano quia pohuatanurajuhuj. Naajuhuj, na nuhuaji janiyari quiocua muetanutaniuhua janiyajiniji quia niquishanorano pohuataa quia quiniuria. <sup>17</sup> Cua jiyarosacari quiajaniya, janiyari quarta Judiocuacaacuajia quia cojuanutanijacuajani, tamonu jiyacajinijinio taucuaacuajinio, tiquiyocua quia rucuanesacari janiyajiniji quia poojotasacari. <sup>18</sup> Nojoriicua quia jiyaroyanijia, janiyajiniji nojori quia pohuatanura, maja juhua nimishituu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiuushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiuushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiidiasanojinijijianaa nojori jiidianurajuhuj”.

**Pablo pohuatasano Jesu tojijara na jatanujiniji**

<sup>19</sup> Naacuajitij jiyaniijia Agripanaa, janiya jaara naa tojiquiaari sequeshiyano jiyocuacaanujini, majaari cua tarijionu quiquiaarinioj. <sup>20</sup> Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajinijianaano. Maja saaja cuarta Judiocuaca cua pohuatanu quiquiaari Jesujiniji, janiyari taucua pohuataquiaarijuhuaj. Nojori nacasuquiaarinijia cuara sesa nojori miishano car-teera, Pueyasooqua nojori tacatonuhua nojori jiuujia. Janiyari nojori sequequiaarijuhuaj, cuara saaja maninia miijiaa quiiria, na niishishaanura Pueyasoori seetanujuanaa nojori jataniquiano. <sup>21</sup> Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujua tijajinia. Cua motunu paniquianuuri. <sup>22</sup> Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuaja cua pohuatanu quiquiaa. Janiyari pueya niishitiojuquiaani taa tariucuaaanu Pueyaso sequesano caminiujujia naa-

jionuutaquiaaricuajani, naajuhuj, taa Moisés naajio-tasano quiya tariucuacaanu Pueyaso Rupaajiniacuajani. Nojori naajionuutasanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na cusonu nuhuaji, nojuajaari coteenu samitiariquianohua. Jaara samiitiarohua, nojuajiniji pohu-atasanoori puetunu pueyapuejanaa cuhuatanutaniya. Naacujitij, nojoriiri niishiniutianiya nojori jaara nocua tiuuri, nojoriiri samiitiaconutaniuhujuhuj; Judiocuaca, taucucacano”.

### Pablo tiutiniu panishacari jiyaniijia Agripa Jesuucua juucua

<sup>24</sup> Pablo jaara naa sequequiaari tama nocuaji na tacusacaritij, camarnu Festoori nacaquiaari:

—¿Taa quia miyani Pablonaa? [Quia mueyocuaquiqui seseree puera quia niishiniuucua!

<sup>25</sup> Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujuanaa, maja cuaracashiniu. <sup>26</sup> Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaja Jesujiniji, Jesuucua tiuuniaa pueya miishanojinijijuhuj. Puetunu canaa miishanojuanaari maja jiyasohuaja na miishaanu quiquiaa. <sup>27</sup> Jiyaniijia Agripanaa, ¿quiaate tariucuacaanu Pueyaso sequesano caminiujunaa naajionuutasanoocua tiuyajuhuj? Quiaacuajaari nocua tiuya. ¿Naatejaaratej?

<sup>28</sup> Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

<sup>29</sup> Pabloori na riucuaquiaari:

—Naajaa, ritia, na nuhuaji soj, taa quia paniyacuajani. Pueyaso maara seetanujuanaa naara quia jiyatere taa quia sequeyacuajani; maja saaja quiajaniya, mariyata puetunu pueyajanaa niya cua tojitiaani, juhujaniya nia quiniurajuhuj. Maja naatej, taa cumayocuatata moronucua cua nujuatashuyanijia.

<sup>30</sup> Jiyacaritij, jiyaniijia Agripaari sanequee, camarnu Festojuhuj, Bereniceno, puetunu cuniqui nojoritia cajitiuniaa pueyano. <sup>31</sup> Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri sequetooquiaari:

—Cuno pueyanoqui seetanujuanaa maja sesa na miini quiquianu na mosaanura, maja quenaaja na nujuatesaanurajuhuj.

<sup>32</sup> Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

**Roma tiacajiniara Pablo jiyarosaanujiniji pohuatasano. Nio naajiona Lucasri nata quiriqiaa na cojiriquiano**

<sup>27</sup> Camarucua jaara sequequiaari canaa buquejinia jiyarosaanutaniya Italia jiyajiniani, Pabloori

jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. <sup>2</sup> Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiniuquitiariquiano. Canaari cuno buquejinia jaaretaquiaarini. Canaata quiriqiaaajaariuhua Aristarco. Nojuajaari Macedonia jiyajinia Tesalónica tiacajinijino pueyano quijia. <sup>3</sup> Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitaquiaari cuara tacaara na rupuenaa pueyacu, nojori na saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaano. <sup>4</sup> Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatijani. Paratuuri buque nacaacoji piyaroriquiaa saaja. <sup>5</sup> Canaari Sidón tiacajiniji niutiaquiaari Cilicia jiyacuani, Panfilia jiyacuano. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

<sup>6</sup> Capitánri cuniqui riuriataquiaari Alejandría tiacajinijino buque. Italia jiyajinia quiariquiaari. Naaratej, canaa tacantiaquiaari cuno buquejinaari, tii canaa quianura saniniuujia. <sup>7</sup> Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacujitij, canaari Salmón jiya tucuaatijaniyojua shuriucuaratamaani. Canaari Creta jiya tucuaatijaa camarucutamaajaaniuhuj. <sup>8</sup> Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

<sup>9</sup> Canaari puera tarishiquiaari tarini. Judiocuaca miacuenyacuquiniu juucaari tari shocoquiaari. Jiyacaritij, shoniacu caminijaniaari puereeta quijia tari buqueta jaaretanura. Pabloori juucua sequequiaari:

<sup>10</sup> —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya. Paa naasucuaari cusunuutaniyajuhuj. ¿Casaatejaj pa toyani?

<sup>11</sup> Pablo jaara naa sequequiaaritij, majaari buque jiyatana capitán tojinu quiquiaarinioj. Saaja buque camarujuanaa tojiquiaariiri, buque capitánio. <sup>12</sup> Cuno tacatajajiniji canaa tii tiutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari sequetuquiaari:

—[Niiquiji pa quiaarej! Fenice tiacajinia pa quishii shuniyacuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatijaacuaja.

**Shoniniacu caminiajinia paratu piyarojosacari  
jiyanohua nojori**

<sup>13</sup> Jiyacaritij, paratuuri jacaria piyarojonu coteequiaari pananu shuucuaji, canaa muenecarajiniji. Naaratej, nojoriiri sequetuquiaari:

—[Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. <sup>14</sup> Na jaaretasacari shiitianiyojua, paratuuri canashiyaquiji jiyanohua piyarojoquiaari buque. Cuno paratu sesaari quijia “Noreste”. <sup>15</sup> Paratuuri buque capotariquiaa na shuucujiria saaja. Naaratej, majaari canaa naata jaaretanu quiriquiaa paratu piyarojosacaji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuaara na capotaara tamajaa-ja. <sup>16</sup> Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiriquiaa tii. Canaa rishano boteniyojuaari buque pajamaji jaasutariquiaa. Canaari jiyanohua poonijioquiaari cuniquini, canaa tacaniniuhua buque cacojiria cuno boteniyojua. <sup>17</sup> Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucuaji. Pueyari na puerenuta sequetuquiaari:

—[Paratuuri pa capotanutaniya jaaquiajiniara! [Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratuuri saaja capotaquiaari buque. <sup>18</sup> Jaara juhuaquequiaari, paratuuri saaja jiyanohua piyarojoriquiaajaa. Naaratej, nojoriiri buque pasano casami quejooonu coteequiaari moojinia. <sup>19</sup> Canaa camueenujusacari jiuujianaraca juuca naquiya canaa miishacari, canaari buque casamijianaa quejooquiaari socuani, buque namuenura quenaaja. <sup>20</sup> Tari canaa shocojoquiaari queraatia juuca. Majaari quenaaja canaa niqiniu quiquiaari pananu, ryanio. Paratu piyarojosacari canaacua, mohuacaari socua jiyanohua cajiniuucuquiaari canaacua. Nocuaji, canaari niishiriojoriquiaani canaari quiarijia cusonuunutaniyani.

<sup>21</sup> Majaari tojetaarucujanaa quenaaja canaa miacquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuaanaa, niaa jaara tojiquianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. <sup>22</sup> Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. <sup>23</sup> Janiyari quiarijia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjiani. Janiyacuajaari na pueyanoni. <sup>24</sup> Pueyaso seruuri cua sequeree: “Majaari puerenu Pablonaa. Quiaacua-jaari jiyaniijajanaa Augustoocua tiuquiniutianiya Roma tiacajinia. Quiaari na tacoji nujuanutaniya quia

pocuanura. Naajuhuaaj, Pueyasoori quia secojosano tojiriucuaa. Naaratej, puetunu quiata quiniaajanaari quiata rishiniutianiyaajuhuaaj”.

<sup>25</sup> ‘Naacuajitij camarucuaanaa, nioojia nia cumaquiri. Janiyacuajaari seetanujuanaa niishiyani, naa quiniutianiyaari taa Pueyaso seru sequeree janiyacuaajani.

<sup>26</sup> Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumaniijiaquiaari.

<sup>27</sup> Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriaajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani.

<sup>28</sup> Buque jiniacuma poonijionaari jiya shanacuquiaari, na niishiniuria queroniti quiriquiaajaa. Na shanacutusacari, saaja treinta y seis metro queroni quiriquiaari. Jaara socua na tacoji shanacutuquiaari-uhua, saaja veintisiete metro queroni quiriquiaari.

<sup>29</sup> Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohuaneyocuata mo- rojotasano cuatro niajaaca casaa quejootuquiaariiri, buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. <sup>30</sup> Jiyacari- tij, buquejinia poonijionaa pueyari juucua cuno niucuaa jiyasohuaja mashiyocuatunu paniriquiaa buque- jiniji. Naaratej, nojoriiri buque nacaacaji sapojonu tini- jiotariquiaa niajaaca casaa moojinia. Jiyasohuaja roshinitiariquiaa jiyocuacaanu tacanishano boteeri, tii na mashiyocuatunura. <sup>31</sup> Pabloori jiyacari na jiyatana capitán toquiaari, na soldadohuanio. Naa nojori se- quequiaariiri:

—Cuno pojori jaara niya juhuaqueyaquimia pata, ni- aari cusonuuriquiano.

<sup>32</sup> Soldadohuari ritia jiyocuacaanu tunusano bote neyocua jiyatajotaquiaari. Moojinia na tinitiuiri. Paratuuri na piyarojoquiaari tamoco nojorijiniji.

<sup>33</sup> Juhuaquenu panishacari, Pabloori puetunu buque- jinia quiniaajanaa sequequiaari cuaara quenaaja mi- aquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuaaj.

<sup>34</sup> Quiarijia nia miaquerecuara, nia cuaqueya nia cumaquitiajara quenaaja. Majaari quenaaja niquiriyatu nijaniyajinijinio cusonu quiniutianiya quiarijia.

<sup>35</sup> Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji mia- querohuari. <sup>36</sup> Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuaaj. <sup>37</sup> Cuno buquejinia, puetunu canaajanaari quiquiaarini dosciento setenta y seis pueya. <sup>38</sup> Puetunu pueyajanaa jaara tooquioquiaari, na

nuhuaji trigo quejootuquiaari moojiniaari, buque namuenura quenaaja.

### Buque coquesacari caminiajinia

<sup>39</sup> Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatijatejaara cunoni, nojori na niquiriquiaani. Nojori cuno jiya tucuaatijaacua niquiriquiaari puereetuuca surocohua. Jaaquiaari puetunu na shocujanaa quiriquiaa. Naacuajitij, nojori sequetuquiaari:

—Buque pa saniri shiitaniniu cuno surocohua.

<sup>40</sup> Buquejinia poonijionaa pueyari nijaaca sohuaneyocua jiyatajotaquiaari. Cuno nijaacaari caminia jiuujijinia jateequiaari cuniquijia. Nojori buque niquinijitotetajaa roshinitiaquiaarijuhuaj, buque tacutajara. Buque nacaacuj teeja toque tacanitiatureejaarijuhuaj. Buqueeri canujutaaree jaaquiajiniara, paratu piyarojosano. <sup>41</sup> Buqueeri saacariji jaaquiajinia riitiaseequiaari, caminia cajiniucuasacari mohuaca paatihano jaaquiajinia. Buque nacaari jiyanoehua tiuquishii cumaatia jaaquiajinia. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniucuasacari jiyanoehua nocua.

<sup>42</sup> Soldadohuari nojori jiyatasano quioosano pueya puecoonu paniquiaari cuniquijia, nojori jiyanihacari cuaconutaniya naasucua, mashiyocuatumaari.

<sup>43</sup> Capitán cutaraari Pablo tiuquitiniu paniquiaari jiyanijia Augustoocua. Naaratej, na soldadohua sequequiaariiri:

—Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajinia rupaatiushiicuaari.

<sup>44</sup> Cuaashijanucua saniniuujia cuaara buque jiniacumaji suruhuatuneeaacua jacamatuura na cuatajara. Tamasaca cuaara buque neecaacua jacamatuura juhuaj.

Naa miitiquiaariiri. Puetunu pueyajanaari jaaquiajinia rupaatiushiicuaari.

### Pablo quishacari Malta jiya tucuaatijaajinia

**28** Puereeta canaa cuaconu nuhuaji shoniacu caminiajinia, canaari namitia puetunujuanaa maninia tacataseequiaari cuno jiya tucuaatijaacuani. Canaari jiyacari shusha niishiquiaarini, cuno jiya tucuaatija sesaari quiquiaari Malta. <sup>2</sup> Cuno jiya tucuaatijaacua quijia taucuaacari maninia canaacua jiyanoocuaari. Shiniquiaari quiriquiaa. Maruuri niriquiaajuhuj. Naa canaa shiniquiosacaritij, taucuaacari canaara noshitiquiaari puereetuuca mani. Na nuhuaji canaa sequetureeri:

—Miji. Nia jitiushii.

<sup>3</sup> Pabloori naanacucua reratejoriquiaajuhuj. Manijinia na quejoriquiaari. Jiyacaritij, soconuquiiiri manicuaji mashiriquiaa juucua. Pablo juaashiquia saariiri.

<sup>4</sup> Cuno jiya tucuaatijaacua quijia pueyari soconu niquiriquiaari Pablo juaashiquiaacuaji sohuataano. Jaara

naa niquitiquiaaritij, tama nojorijiaarijia seque-tooquiaari:

—Nio pueyano naasucuaari pueyano moju!

Cocuaatia miirii juucua shoniacu caminiajinia na cuasacari buquejinijiri. Pueyasoari quiarijia saniniuujia cunora soconu na sajitirii na cusonura.

<sup>5</sup> Pabloori saaja manijinia majiataree soconu. Majaari quenaaja na sajiyashi noonu quirii. <sup>6</sup> Puetunu pueyajanaari na sashiriquiaa, taacari na porenutaniyani. Na sashituriquiaaarijuhuaj na jiyantiushacari canashiyaquiji cusonutaniya naasucua. Naa pueyaracaanu na sashitushacari juucuatej, nojoriiri socua tamaatia niishiriojonuquiaari. Nojoriiri Pablorijini seque-tooquiaari:

—Cuno pueyano naasucuaari pueyasojuhuanaj!

<sup>7</sup> Cuniqui canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatija camarnu quiquiaari. Na sesaari Publio quijia, maninia pueyano. Nojuajaari canaa masuquiaari na tiacora. Canaa mi-anutequiaari maninia tiiri. Canaari jiuujianaraca juuca na tijajinia camueequiaarini. <sup>8</sup> Cuno camarnu queeri jiyacari cusosu matariquiaa. Jiyanoehua naseecaari quiriquiaa. Coriyacau rurequeriquiaaarijuhuaj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaari. Na secojosacari, nocua niaquiaari na juaashiquiaari.

Pueyanoori naatarohua. <sup>9</sup> Cuno jiya tucuaatijaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijuhuaj. Pabloori puetunujuanaa na naatanioquiaari.

<sup>10</sup> Naa Pablo miiniuucuatej, cuno pueyari na jitiiasano casamijinijia canaa niquitiojoquiaari nareja. Na nuhuaji, canaa jaara quiaquiaari cuniquijia tamonu buquejiniani, nojoriiri canaa jiyatajara canaa panishano niquitiojotiquiaari narejajuhuj.

### Pablo tiuquishacari Roma tiacajinia

<sup>11</sup> Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatijaacua canaa quishacari. Alejandría tiacajinijinio buqueeri tii nuuatariquiaajuhuj. Shuniyacuaji tiuti-aquiaari tiikiiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. <sup>12</sup> Canaari Siracusa tiaca tacatajajini tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatijaacua. <sup>13</sup> Cuniquijia canaa quiasacari, canaari cuno jiya tucuaatija shuriucuaataareeni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijinijia. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. <sup>14</sup> Puteoli tiacajinia Jesuucua tiuunaa pueyari canaa masuquiaari na tijajinara. Canaa sequetuquiaariiri:

—Maja canaa shoconu pueyanaa! Canaa tijajinia nia camueenujumajaara.



Naaratej, canaari siete juuca nojoritia camueenu-juquiaarini. Na nuhuaji, canaari cuniquiji Roma tiacajiniara neteja nucuaco quiaquiaarini. <sup>15</sup> Roma tiacajini-jinio Jesuucua tiuunaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jiyanihano tiacajinia. Pablo jaara narta Jesuucua tiuunaa niqiquiaari, noojia cumaquiquiaariiri. Naaratej, Pueyaso sequequiaariiri:

—Paacarasho cua Pueyasonaa!

<sup>16</sup> Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niq-uitioquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldado-ta na cojuariquiano.

### Pablo pohuatasacari Jesujiniji Roma tiacajinia

<sup>17</sup> Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocuaanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niqitiotucanu Romano pueyari, cua morosaanura. <sup>18</sup> Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. <sup>19</sup> Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijajanaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicua, cuarta Judiocuaca nojori quiniucua. <sup>20</sup> Janiyari cunora nia niqiniu paniriquiaani, cua pohuatanura nijaniya taa puetunujuanaa parta Israel pueya niishiyacuajani, nijaniyajujuaj; macunucuaari samiitianijiosaanutaniuhua. Janiyari cunora cumayocuata moronucua niya quiyani.

<sup>21</sup> Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuatasaanura quiajanijini. Cuniquijinio parta Judiocuacaari niya tiuquijio-canujuhuaj. Naajaa, nojoriiri maja quenaaja sesa na pohuatanuunu quiquianu canaa quiajanijiniji.

<sup>22</sup> Canaari saaja niishiyani, puetunu tiquiyocujanaa sesacasaaquiaaquiniaari Jesujiniji pohuatasano. Quiaa

mariqui cunojiniji canaa pohuatare, canaa niishiniuria socua.

<sup>23</sup> Jiyacaritij, Judiocuacaari Pablo sequetuquiaari:

—Canaacua tamonu juuca quia tojiquiuiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitioquiaariiri. Pabloori nojori niqiuara pohuatanu coteequiaari tariquicuaji. Naa niniyareejaari. Juucua nojori niishitiojoquiaariiri, Jesuuri seetanujanaa Pueyaso Jiyarosano quiquiaari. Nojori sequequiaariiaariuhuj taa Pueyaso jiitiaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujunaa naajionuutasanonio. <sup>24</sup> Noojiaqueya nojorijinijinoori Pablo sequesano tojiquiaari cutara. Tamasacaari saaja na cuaracashitiquiaari saniniuujia. <sup>25</sup> Nojorijinijinio jaara Pablo niishitiojosano tojiquiaari cutara, tamasaari nojoritia juayonutano coteequiaari. Naa na juayonutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiri seetanujanaa tariucuaaanu Pueyaso sequenu panishano caminiujunaa Isaías pohuataniquiaari parta Israel pueya niqiuara, jaara na sequequiaari:

<sup>26</sup> “Quia quiaare cuno pueyacu. Quiocua nojori sequesee: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niqiniutianiyajuhuj. Majaari quenaaja nia niishiniu quiniutianiya’.” <sup>27</sup> Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuaj, na niqitaaquiniucuaaji, maja na numaata na tojitianura, noojiata na niishituiyacuiniurianio. Naa jiyatecanu nojorinjia, maja na niishituiuria janiya, mariqui cucua tacateturohuari, nojori cua naarajonura”.

<sup>28</sup> Pueyanaa, nia niishiri. Niaa jaara ruuretare cua pohuatasano Jesujiniji, taucuacaari saniniuujia pohuataaanutaniyacujua, taa Pueyaso jiyanooni paniya pueyani, maninia na jiitianura nojori. Taucuacaari na tojitianutaniya cutara.

<sup>29</sup> Pablo jaara naa sequequiaari nojoritij, Judiocuacaari quiojiyarohua. Tama nojorijiaarija juayonutaarohua na quiojosacariuhua.

<sup>30</sup> Caapiqui marijaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niqiuara na niqiniuria, nojuajaari maninia na masequiaari na quijia tiajinia. <sup>31</sup> Majaari jiyasohuaja na pohuatanu quijia taa Pueyaso jiitiaa na jiyanooshano pueyani. Jiyaniijia Jesujiniji niishitiojojuajaariuhuj. Majaari na sanaajasaanu quijia.

# ROMA

## Pablo saruhuatasacari Pueyaso pueya

**1** Janiyari Pablóni, Jesucristo seru. Nojuajaari cua saquirojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

<sup>2</sup> Pueyasocujaari tariucuacaanu na sequenu panishano caminiujiunaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. <sup>3</sup> Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. <sup>4</sup> Jesu sohuanuuri saniniuujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujuanaa Pueyaso Niyanu. Paari quiarjia na niishiya seetanujuanaa cutarani, Pueyaso Sohuanu samiitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jitianurajuhujaj. Nojuajaari pa Jiyaniijia Jesucristo.

<sup>5</sup> Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiuutiniuria Neyanuucua, na tojtijajaca nojori quiniuria. <sup>6</sup> Niajanijajuhujaj, Roma tiacajinia quiniaa Pueyaso pueyanaa, Pueyasoori nia saquirojoquiaari Jesucristo pueya nia quiniurijuhujaj. <sup>7</sup> Puetunu Pueyaso panishano pueyajanaa, canapue Pueyaso saquirojoquiaari saa maninijaja nojori quiniuracuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhujaj, nojori cuara cumaquiiria niajanijia, maninia na tojijiacua nia quiniuria. Naajuhujaj, nojori cuara nioojiacua cajitiiria shuquiriaatia nia quiniuria pueyaracaanu.

## Pablo naquerejosacari Roma tiacajiniara

<sup>8</sup> Coteenu nia sequenu panijaniijia, janiyari nia timitiacquiaani, maninia niajanijajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujiacua pa Jiyaniijia Jesucristoocua. Naa Jesucristo miiniuucua niajanijatej, janiyari cua Pueyaso sequequiaani: "Paacarasho! Quiaari jiyanoohua maninia". <sup>9</sup> Janiyari pueyaracaanu cua Pueyasora poonijioquiaani puetunu cua cumaacajanaa, Neyanujiniji cua pohuatanura. Pueyasocujaari

niishiya, pueyaracaanu cua secojosacari nojuaja, janiyari niaacuara secojoquiaajuhujaj. <sup>10</sup> Naa cua secojosacari nojuajatej, janiyari na sequequiaani cuara cua tiuquitiiria niaacua, rupaquijia cua quiniuria niaata, nojuaja jaara naa paniri. <sup>11</sup> Janiyari nia niqiniuucua jiaatiaani, cua cumaquiniuria socua niajanijia na Sohuanu cumaacata, socua jiyanoohua Pueyasocua tiuujiacua nia quiniuria. <sup>12</sup> Majaari cua cumaquiniu paniniu saa niajanijaja. Janiyari panijani nia cumaquiniuria janiyajuhujaj. Naacuajitij, mariyata pa tiuushacari Jesucristoocua, paari mariyata cumaquitiojonutaniyani.

<sup>13</sup> Cuarta Pueyaso muerasunaa, janiyari nia sequenu panijani nia niishiniuria, janiyari sequeyarucua niaacua naquerejoquiaa juucuanu. Majaari juhuanujuaja cua naata quianu niaacua. Janiyari Jesucristojiniji pohuatanu panijia tii Roma tiacajiniani, tee nia quiyacuajani, cuno taucuaca tiuuniuria Jesuucuajuhujaj. Tamonu jiyacajinia taucuacaari tari Jesucristoocua tiuujiacua quiyacuua, cua pohuatanuucua Jesucristojiniji nojori niquiara. Janiyari naa miiniu panijia nia tajinijuhujaj. <sup>14</sup> Cua Jiyaniijiaari cua jiyatequiaari na rupaa pohuataana. Janiyari cunora na rupaa pohuataquiaani. Majaari na tojijashijia cua quiniu paniniu. Naaratej, janiya cuara pohuataara na rupaa puereetuua tiacajinia pueya niquiara, mariyata tiquiyocua quijiacua pueya niqiarajuhujaj. Janiya cuara na rupaa pohuataara niishijiacua pueya, niishiyashijiacua pueyano. <sup>15</sup> Janiyari cunora quianu panijia Roma tiacajiniani, cua pohuatanura Jesucristojiniji niajanijia.

## Pueyaso Rupaari cumaacaraca na jataniniuria pajaniya

<sup>16</sup> Maja cutaraari cua cariquiniu Jesucristojiniji cua pohuatanura. Jesucristo rupaacujaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuunijia pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracuuaani. <sup>17</sup> Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajajari tariucuacaanu Pueyaso Rupaajinia:

"Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasocua na tiuushacari".

### Pueyasora, puetunu pueyajanaari sesa miijiaca

<sup>18</sup> Pueyasoori jiyocuacaanuji na tojiyashijiaca pueya saniitioquiaa. Naa nojori na saniitosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa saniitionutaniya jiyanoehua na juaaniutia. Naa saniitiosaanutaniyajaariuhuj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. <sup>19</sup> Nojori jaara Pueyaso niishiniucua jiaatariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuaajaari tari maninia nojuajiniji niishiya. <sup>20</sup> Majaari pa naata Pueyaso niqiniu pa namijata, pa niishiniuria taamuecate nojuajani. Naajaa, Pueyaso shipininiucua jiya, maatia niishishiyacuaajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuj, majaari na cumaaca puequenu quiniutianiya. Pueyaraaanu quiriqianoori. Naacuajitij, Pueyaso saniitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: "Maja canaa niishiniu quijia quiajanijajiniji". <sup>21</sup> Nojoricuaajaari Pueyaso niishijia najuhanaj. Na niishijia nojori quishacari, nojoriiri saaja na rerequetaja. Nojoriiri na tojitaquiquiaajuhuj. Pueyaso miiniucua maninia pueyaracaanu nojori, nojoriiri maja quenaaja na sequetunu quijia: "Paacarasho Pueyasonaa". Tama nojoriijaarijia jiyanoehua cushitiquiaa sesa nojori niishiriojonuusacari najuhanaj. Naa mosanucua nojori quishacaritij, nojori jiuujiaari juhua ninishiquiria quiquiaa. <sup>22</sup> Nojori jiyanihacari nojori cutaraari seetanujuanaa niishijia, naacuajitij nojoriiri socua niishiyashijiacara quiquiaa. <sup>23</sup> Nojoriiri Pueyaso shuquiritiaquiquiaa tama nojori shipinishano casaajaaja nojori shuquiritianura. Pa shipinia Pueyaso cutaraari jiyanoehua cumaacaraca, pueyaracaanu quijiajuhanaaj. Nojoriiri Pueyaso niti shuquiritiaquiquiaa tama nojori shipinijosanojuaja. Cuno, nojori shipinijosano Pueyaso niti na shuquiritiasocoriquianoni, cunoori quiquiaa juhua shaajaja pueya niquishano, juhua jacuatujuaca niquishanojuhaj, juhua nacujiniaaco canujuucuatujuaca niquishanojuhaj, juhua roshiyocuatujuaca niquishanonio.

<sup>24</sup> Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitiosacari narta pueyanota. <sup>25</sup> Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojinuria saniniujia. Naaratej, pueyari Pueyaso shipinijosano casami shuquiritiaquiaa, saniya na Shipininia niti. Nojuajaari pa Pueyasojuanaa cutara. Nojuaja cuara shuquiritiasaaria pueyaracaanu cutara.

<sup>26</sup> Pueya jaara Pueyaso cartequiaa, Pueyasoori nojori tarinitiaquiaajuhuj, cararaatia casaa nojori miiniuria,

taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. <sup>27</sup> Naajuhuj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanoehua cararaatia miitioquiaa. Naa nojori miiniucuatej, nojoriiri tama na cuaqueyajaaja miitiquiaa naquiya na miishaanura.

<sup>28</sup> Nojori niishiniu paniyaquiniucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuaajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniucua. <sup>29</sup> Naacuajitij, nojoriiri puetunu tamaatia sesa miishanojuanaa miiniu niishijia. Jaara sesa miiri, timiquioyari. Nojoriiri nio miijiaca: puera casamiriaca quiniucua jiaatiajaca. Sesa miiquiaari na panishano nojori jiitianura. Nojoriiri tamasaca pueya jiitiasano casamiicua jiaatiajaca. Nojoriiri pueya puecoojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijia. Rimiaacatujujiaariuhuj. <sup>30</sup> Nojoriiri sacuaraatia sequejua narta pueya. Nojoriiri Pueyaso niqiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhua sequeja: "Janiya maninia miijiani". Nojoriiri jiyanoehua niishijia, niishishoo sesa casaa na miiniuria. Nojoriiri na queya tojiyashijiaca. <sup>31</sup> Nojoriiri seetanujuanaa mosanucua Pueyaso na tojitaquiniucua. Nojoriiri saaja tama na rupaajaaja jataja. Majaari na sequesano na miiniu. Nojoriiri narta pueya paniyashijiaca. Majaari nojori niishiniu jyanooniu. Majaari nojori niishiniu taraajenu narta pueyacua. <sup>32</sup> Nojoricuaajaari tariucuaaanu naa Pueyaso sequesano niishiya: "Cante naa sesa miijiacani, cuara puecoosaaria". Naajaa, nojoriiri saaja sesa miiquiaa juhuajaniya. Majaari nojori quiniu shuquiritia saaja tama nojori miishacarijaaja sesa, nojoriiri shuquiritiaajuhuj tamasaca jaara sesa miiri juhua nojori.

### Pueyasoori sesa miijiaca saniitionutaniya sesa nojori miiniucua

**2** Naacuajitij pueyanaa, niaa jaara tamonuucuaa tonujua quiriquia, majaari nia jyaniniu niaari sesa miyashijia cutara. Niaa jaara tamonuucuaa tonujure sesa na miishano, niaari tama niaacuarajaaja tonujia naa sesa miiniu niishijia nia quishacarijuhaj. <sup>2</sup> Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miijosano. <sup>3</sup> Quiajanija saniniujia, quarta pueyacuara tonujuanaa, majaari quenaaja quia jyaniniu quiaa saniitioyacuishaanutaniya. Quiaari saniitiosaanutaniyajuhuj. Quiaacuajaari juhua nojori, sesa miijiajuhaj. <sup>4</sup> ¿Majateeri quia niishiniu, Pueyasocuaajaari pueyaracaanu quia sashiquiaa juucua, quioojia quia tacatonuhua nocua? Naaratej, no-

juajaari pueyaracaanu maninia quia miiquiaa. Quia re-jeretaquiaajaariuhuj. ¿Quiaateeri jiyaniquiaa Pueya-soori naa maninia quia miiquiaa, maninia quia quiniucua na niquiara? [Maja! <sup>5</sup> Quiaari quioojia tacatonu paniyaquiquiaa, sesa quia miishanojiniji quia tarajaquishacari. Cunora, quiaari puetunu sesa quia miishanojinijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujuanaa maninia saniitiojua. <sup>6</sup> Pueyasoori puetunu pueyajanaa miiniutianiya taa nojori miishano quiquiaari mijiriacuajani. <sup>7</sup> Naacuajitij, Pueyasoori maninia mijiaca jiyatenutaniya pueyaracaanu rishijiacara. Nojoriiri pueyaracaanu maninia mijiaca quiquiaari mijiria, Pueyaso timitiasano nojori quiniuria, shaajeyashijia nojori quiniurajuhuj. <sup>8</sup> Saniniujia, Pueyasoori na tojiyashijia saniitionutaniya jiyanohua na juaaniutia. Naa saniitiosaanutaniyajaariuhua noo pojori, canapuate saaja sesa miiniu panijia quiquiaarini. <sup>9</sup> Puetunu sesa mijiaca pueyapuejanaari naquiya miishaanutaniya, taa Pueyaso tojiyashijia cuarta Judiocuaca miishaanutaniyacuaani. <sup>10</sup> Saniniujia, Pueyasoori puetunu maninia mijiaca pueyapuejanaa miiniutianiya maninia, taa maninia mijiaca Judiocuaca miishaanutaniyacuaani. Pueyaso timitiasano pueya nojori quiniucua, nojoriiri jiyanohua shuquiriaatia quijia quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

<sup>11</sup> Pueyasoori maja rimiajata na miiniu quiniutianiya taucua, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. <sup>12</sup> Naacuajitij, pueya jaara Pueyaso rootasano Moisés niishiyashijia quiriquia, naajaa, nojori jaara sesa mijiaca quiri, nojoriiri saniitiosocoriquiano. Naajuhuj, pueya jaara Pueyaso rootasano Moisés niishijia quiriquia, nojori jaara na tojiyashijia quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojtiaaquiniucua.

<sup>13</sup> Majaari nia jyaniniu niaari jyanooshaanutaniya sesa nia miishanojiniji nareja najuhua nia tojishacari Moisés Rootasano. Niaari jyanoyaquishaanutaniya maja seetanujuanaa na tojijia nia quiniucua. Noo pojori cutaraari jyanooshaanutaniya, canapuate seetanujuanaa na tojijiacuajani. <sup>14</sup> Moisés Rootasano jitiashijia pueya jaara tamajaaja maninia miiniu niishijia quiriquia, naacuajitij, niishishiyari, nojoriiri tamajaaja maninia miiniu niishijia cutara. <sup>15</sup> Naa maninia miiniu niishijia nojori quiniucuatej, niishishiyari, Pueyaso rootasano Moisésri juhua nojori jiuujajinia naajiotasano quiya. Naaratej, nojori jaara sesa miiri, tama nojori jiuujajaarija nojori niishitiya: "Sesa miiriinijia". Naajuhuj, nojori jaara maninia miiri, tama nojori jiuujajaarija nojori niishitiya: "Maninia miiriinijia". <sup>16</sup> Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quinaa pueyajanaani, jiyacaritij, tama pueya jiuujajaari nojoriicuara tonujunutaniya sesa nojori miishanojiniji jiyasohua. Naaratej, janiyari pueyaracaanu pueya nu-

mootequiaacuajani cua pohuatasacari Pueyaso rupaa Jesucristojiniji.

#### Pablo nacasusacari Judiocuaca nojori tojtiaaquiniucua Moisés Rootasano

<sup>17</sup> Cuarta Judio pueyanonaa, quiaari jiyaniya quiaa Pueyaso pueyano cutara, na saquirojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: "Janiya cutaraari Pueyaso pueyanoni. <sup>18</sup> Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria". <sup>19</sup> Quiaari sequequiaajuhuj: "Janiyacuaajaari seetanu rupaajanaa niishiyashijia pueya niishitiojonani. Janiyari juhua ninishiqui quijia pueya cuhuatanani. <sup>20</sup> Janiyari niishiyashijia niishitiojuani, naatujoorinio, maninia cua niishishacari seetanu rupaajanaa Moisés Naajioneejiniji". <sup>21</sup> Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia mijiaca quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? <sup>22</sup> Quia rootasacari tamasaca, maja nojori numuetucunura niyacaraca maaji, ¿casaara saniniujia naa quia miiquiaacuaraarini? Quiaacuajaari sequeja: "Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni". Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinijicuaaraarini? <sup>23</sup> Quiaari sequequiaajuhuj: "Moisés Rootasanoori jyanohua maninia. Na timitiaanijia". Naajaa, quiaari Pueyaso rerequetequiaa quia tojiyaquishacari Moisés Rootasano. <sup>24</sup> Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

"Pueyaso niishiyashijia taucuaari Pueyasocuara rimiaaquequiaa sacuraatia, Pueyaso tojiyashijia nia quiniucua nojori niquiara".

<sup>25</sup> Cuarta Judiocuacanaa, Pueyasocuajaari pa supuetanaa rootaquiaari pa cararaatiuuquia co cuara miatesano quiiria, na saquirojosano pueya pa quiniucua. Naacuajitij, nia cararaatiuuquia co jaara miatesano quiri, cunoori maniniacuaja, nia jaara seetanujuanaa Moisés Rootasano tojijia quiri. Saniniujia, nia jaara Moisés Rootasano tojiyashijia quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhua miatesano quiya.

<sup>26</sup> Saniniujia, taucua jaara maninia mijiaca quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. <sup>27</sup> Naacuajitij, na cararaatiuuquia co miatesoo tahue jaara maninia mijiaca quiri, taa Moisés Rootasano sequeyacuajani, nojuajaari jyanooshaanutaniya, Pueyaso muerasu na quiniuria. Quiajaniya saniniujia Judio pueyanonaa, quiaari Moisés Rootasano niishiji-

acuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniuucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. <sup>28</sup> Pueyasocuaajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. <sup>29</sup> Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojjia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyo pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

**3** Naa cua sequesacari nijaniyatej, niaa naasucuaari sequeya: "Taucuaca jaara naa maninia miishaanutaniya nojori quiaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaricuaaraari? ¿Paateeri najuhuaana Pueyaso saquiriojosano Judiocuacani?" <sup>2</sup> Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacia tiuuquiaari nojori jitianura na rupaa. <sup>3</sup> Noojiaqueya Judiocuacajinijinio jaara Pueyaso Rupaacua tiuyashijia quia, ¿Pueyasoteeri cunora na rupaa jatanutaniyajuahuaj? [Maja] <sup>4</sup> Puetunu pueyanaa jaara sapojonuucuaa quiri quia, naajaa, Pueyaso cutaraari tojetaarucujanaa sapojiyashijia. Naaratej, nojuajiniiri naa naajiotasano quia tariucuacaanu na Rupaajinia:

"Puetunu pueyanaari niishiniutianiya puetunu quia sequesanojuanaari seetanujuanaa cutara. Naajuhua, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu".

<sup>5</sup> Pa supuetanaa tiuyaquiniuucua seetanu Pueyaso rupaacujanaa, naacuajitij, mijiria quiniaa pueyari niishiya, Pueyasoori socua jiyano hua maninia pueyajiniji. Sesa pa miiniujiniji, paari niishiyani Pueyaso cutaraari jiyano hua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? [Uaj] Juhua niishiyashijia pocuareenijia. <sup>6</sup> Seetanujuanaa, Pueyasoori sesa miyashijia! Nojuaja jaara sesa miijia quiri quiajuhuaj, ¿maatucua taa mijiria quiniaa neque-soreereni?

<sup>7</sup> Tamasaca naasucuaari sequequiaa: "Sapojoua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiiatija. Naaratej, ¿Pueyasotucua casaara cua saniitioreni?" <sup>8</sup> Teyano pueyanote naa sequejani, nojuaja naasucuaari naa sequejajuahuaj: "Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa

jiyanoori". Tamasacaari canaacuara tonujuquiaa najuhuanaj, canaanaari naa niishitiojoquiaani. Cana-puete naa sapojonuucuaa canaacuarani, nojoriiri saniitiosaanutaniya, nojori sesacanuucua canaa.

### Pueyasora, puetunu pajaniyajanaari sesa miijiacani

<sup>9</sup> Quiarijia, jaara naa quiritij cuarta Judiocuacanaa, ¿paateeri socua maninia miijia taucuacajiniji Pueyasorani? Maja. Janiyacuajaari shusha nia pohu-atariquiaani, puetunu mijiria quiniaa pueyajanaari sesa miijia; Judiocuaca, taucuacanio. <sup>10</sup> Tariucuacaanu Pueyaso Rupaajiniacuajaari naa naajiotasano quia:

"Majaari quenaaja niquiriyatu maninia miijia quiniu. Shaaqui tojetaarucujanaa. <sup>11</sup> Majaari quenaaja maninia niishiriojua pueyano quiniu. Majaari quenaaja Pueyasocua jiaatija pueyano quiniujuhuaj. <sup>12</sup> Puetunu pueyajanaari Pueyasocua tashuquoorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. <sup>13</sup> Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiiatja na rupaama, rimiaacatujuri nojori quiniuucua. <sup>14</sup> Nojori jaara pocuare, saaja tamasa sesacaquiaari, puera juaajia nojori quishacari. <sup>15</sup> Nojoriiri puecojuaca. Puereeta nanaca shootejaca. <sup>16</sup> Puetunu mijiria nojori miishanojuanaari casaa sesojua, narta pueya tarajetejajuahuaj. <sup>17</sup> Majaari nojori niishiniu jiyanooni. <sup>18</sup> Nojoriiri juhuajaniya miiquiaa sesa saaja. Majaari na pueretunu Pueyaso".

<sup>19</sup> Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacaa quiquiaari, nojori niishiniuria, puetunu pueyajanaari sesa miijia. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijia; Judiocuaca, taucuacanio. <sup>20</sup> Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijia. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

### Paari Pueyaso jiyanooshano cutarani, Jesuucua pa tiushacari

<sup>21</sup> Pueyasoori quiari naataja pa niishitiquianu cutara, taate pa naata maninia miijia pa jatanishaanuni. Moisés Rootasanojinia, tariucuacaanu Pueyaso sequenu panishano caminiujunaa naajionutasanojiniaari naa sequeyajuahuaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijia quiri. <sup>22</sup> Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiushacari. Judiocuaca, taucuajuhua, Pueyasoori puetunujuanaa jiyanooquiaa Neyanuucua nojori tiushacari. Majaari rimiajata na jiyanooni. <sup>23</sup> Puetunu pueyajanaari sesa miijia; Ju-

diocuaca, taucuaanio. Naacuajitij, nojoriiri juhua tu-  
cuacaanu quiya Pueyasojiniji. Sesa miijiacu pueya  
quiniuucua, nojoriiri soosano pueyara jataquiaari.  
Naacuajitij, pueyari Pueyaso timitiasoo quiquiaari.  
<sup>24</sup> Naajaa, jiyanoohua panijia Pueyaso quiniuucua, no-  
juajaari pa jiyanooquiaari Jesucristo cusonuucua  
pocuaa. Naacuajitij, Pueyasoori pa jiyatequiaari juhua  
sesa miyashijiara. <sup>25</sup> Pueyasoori Neyanu Jesucristo jiy-  
atequiaari pueyacuaji Tacuna na quiniuria, Neyanu  
nanaca shoonuucua niyacutesanojinia. Naacuajitij,  
pueya jaara niishiriquia Jesucristo nojori niti cuso-  
quiaari, saaja naa nojori tiuushacari nocuatej, nojua-  
jaari na Que Pueyaso jiyanootiquiaa pueya. Naajuhuj,  
Pueyaso saniitioyaquishacari tariucuacaanu nocua tiu-  
ujiaca pueya Jesu cusoyaquishacarijia, majaari na-  
juhuana puera jiuujiaajia na quiniu quiquiaari.  
<sup>26</sup> Pueyasoori niishiquiaari Neyanu Jesucristoori nojori-  
icua ne mosocoriquiano, sesa nojori miijiosano tuu-  
jusaanura seetanujanaa. Naaratej, nojuajaari  
pueyaracaanu sesa nojori miijiosano rejeretaquiaari  
saaja. Jesucristo cusonuucua quiari naataja pocuaa,  
paari niishiyani, Pueyasoori seetanujanaa maninia  
miijia. Nojuajaari maja najuhuana na jiyanooni pa-  
janiya. [Neyanu motequiaari pocuaaari!]

<sup>27</sup> ¿Teyano nijaniyajinijiniote tojetaarucujanaa saaja  
maninia miijiani? Shaaqui. Naacuajitij, maninia  
miyashijiaca pa quishacari, puetunu pueyajanaari  
sanaajasaanutaniya Pueyaso nequesoreesacari pueya.  
Saniniuujia, paa jaara puetunu Moisés Rootasanojua-  
naa tojtiajaca quiriquia maniniani, paa maara tama pa  
cuaqueyajaaja shuquiritiajaca quiriquia cutarani.  
Saniniuujia, Pueyasoori pa jiyanooquiaa saaja pa tiu-  
ushacari Jesucristoocua. Naacuajitij, majaari pa jitianu  
tama pa miishanojuaaja pa shuquiritasocoriquiano.  
<sup>28</sup> Naacuajiti paari niishiyani, Pueyasoori pa jiyanoojia  
puetunu sesa pa miishanojinijianaa saaja Jesu-  
cristoocua pa tiuushacari. Majaari na jiyanooni pa-  
janiya, Moisés Rootasano pa tojishacari.

<sup>29</sup> ¿Niaateeri jiyaniya, Pueyasoori saaja Judiocuaca  
Jiyano? [Maja! Pueyasocuajaari puetunu mijiria quiniaa  
pueyapuejanaa Jiyano. <sup>30</sup> Pueyasoori maja caapiqui.  
Nojuajaari saaja niquiriyatu. Naacuajitij, majaari  
niquiriyatu Pueyaso quiniu Judiocuacaa, socua ta-  
monu Pueyaso taucuaaca. Naaratej, puetunu pueya-  
puejanaari jiyanooshaaquiaa saaja Jesucristoocua no-  
jori tiuushacari; tariucuacaanu na saquiriojosano Ju-  
diocuaca, taucuaanio. <sup>31</sup> Pueyaso muerasu pa  
quishacari saaja Jesuucua pa tiuushacari, ¿paateeri  
Moisés Rootasano shocoteyani? Maja. Paacuajaari  
Moisés Rootasanojiniji niishiyani, paari sesa miijiacani.  
Naacuajitij, Moisés Rootasanoori panishiya, pa ni-  
ishiniuria paa cuara Jesucristoocua tiuria,  
jiyanooshano pa quiniuria.

**Pueyaso jiyatesacari Abraham juhua sesa miyashijiara**

**4** Naaratej cuarta Judiocuacanaa, ¿taa nia sequeya  
pa supuetana Abrahamjinijini? <sup>2</sup> ¿Casaara Pueyaso  
jiyatequiaari nojuaja juhua sesa miyashijiarani? Abra-

hamri maja na jiyanooshaanu quiquiaari maninia na  
miiniuucua. Pueyaso jaara nojuaja jiyanooquiaari  
maninia na miiniuucua, nojuaja maara tama na  
cuaqueyajaaja timitiaja quiquiaari. <sup>3</sup> Saniniuujia, tariu-  
cuacaanu Pueyaso Rupaajinia naa naajiotasano quiyari  
Abrahamjiniji:

“Abrahamri Pueyasooocua tiuquiaari. Naaratej,  
Pueyasoori na jiyatequiaari juhua sesa miyashijiara”.  
<sup>4</sup> Cua tojiri pueyanaa. Pueyano jaara poonijiore ta-  
monura, na poonijiotenaari na poonijionujiniji na  
cumaneece niquitiojua. Jaara niquitiosaare, cuno  
cumaneeceari maja nareja niquitiosano. Cunoori see-  
tanujanaa na poonijosanojiniji. <sup>5</sup> Saniniuujia, maninia  
miyashiji jaara Pueyasooocua tiuuri, Pueyasoori na jiy-  
atenutaniya juhua sesa miyashijiara saaja nocua na  
tiuuniuucua. <sup>6</sup> Pa supuetanaa jiyaniijia Davidcuajaari  
naa pohuataquiaari taa shuquiriaatia pa quiyani,  
Pueyaso jaara pa jiyatere juhua sesa miyashijiaca pa  
quiniuria na niquiara, maninia miyashiji pa  
quishacarijia. Naa naajiotasaaquiaariiri David seque-  
sano:

<sup>7</sup> “Shuquiriaatia quiijaca cutaraari noo pueya, cana-  
pue Pueyaso jiyanooya sesa na miijiosanojinijicujani,  
Pueyaso jaara tuujure sesa nojori miijiosanojuhuaj.  
<sup>8</sup> Shuquiriaatia quiijacaari noo pueyajuhuj, puetunu  
sesa nojori miishanojunaana Pueyaso  
saneyaquishootej”.

<sup>9</sup> Janyacuajaari tari sequereeni, Pueyasoori Abraham  
jiyatequiaari juhua sesa miyashiji na quiniuria, saaja  
nocua na tiuushacari. Pueyaso jaara naa  
jiyanooquiaaricuaa Abrahamtej, ¿Pueyasote saaja Ju-  
diocuaca jiyanooni panijia, noo pojori canapueete na  
cararaatiuuquia co miatesano jitianani, taa nojori  
supuetana Abrahamcuani? ¿Taa nia sequeyani? ¿Tau-  
cuacaarijataj? ¿Nojoriti jiyanooshiyajuhuj? [Taaquiri-  
irinij! <sup>10</sup> ¿Taa nia sequeyanijia? ¿Abrahamte tari na  
cararaatiuuquia co miatesano quiquiaari Pueyaso  
jiyanooshacari nojuaja? Maja. Pueyasocuajaari na  
jiyanooquiaari miatesoojua na quishacari. <sup>11</sup> Na tiu-  
niu nuhuaji Pueyasooocua, Pueyasoori shusha jiyacari  
na niishitiquiaari na cararaatiuuquia co na miatenura.  
Cunoori quiquiaari na nijayetaaquishaanura, saaja  
Pueyasooocua na tiuushacari, Pueyasoori na jiyate-  
quiaari juhua sesa miyashijiara, miatesoojua na  
quishacari. Naacuajitij, miatesoo taucua tiuushacari  
Jesucristoocua, taa Abraham tiuquiaaricuaani, Pueya-  
soori nojori jiyateya juhua sesa miyashijiaca nojori  
quiniuriajuhuaj, mariyata juhua Abraham niquiohua  
nojori quiniuria. Naacuajitij, puetunu Pueyaso seque-  
sano Abrahamjanaani, cunoori nojoririjuhuj. <sup>12</sup> Naa-  
juhuaj, pueya jaara na cararaatiuuquia co miatesano  
quiri Judiocuaca nojori quiniuria, naajaa. Nojori jaara  
Jesucristoocua tiuuri taa Abraham tiuquiaaricuaani  
miatesoo na quishacarijia, Pueyasoori nojori jiyateya  
juhua Abraham niquiohua nojori quiniuriajuhuaj.

### Pueyaso sequesano Abrahamni, cunoori Jesu- cristoocua tiuujicarajuhuaaj

<sup>13</sup> Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamteaj, saaja nocua na tiuushacari. Majaari naa Abraham sequesaanu quiquiaari Moisés Rootasano tojjia na quiniucua. Jiyacaritij, Moisés Rootasanoori maja na quiniu quiquiaari juhuanajuaja. <sup>14</sup> Pueyaso sequesano Abraham jaara saaja Moisés Rootasano tojjiacara quiriquia, na sequesano maara najuhuaana quiri Pueyasocua tiuujica pueyara. Naajuhuaaj, pueya maara najuhuaana Pueyasocua tiuujica quiriquiajuhuaaj. Seetanujuanaa Pueyaso sequesano Abrahamni, cunoori puetunu Pueyasocua tiuujicarajanaa. <sup>15</sup> Cunoori maja saaja Moisés Rootasano tojjiacara. Pueyasocuaajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojtiaaquiniucua cuno rootasano. Saniniujia, Moisés Rootasano jaara quiaquiriquia, pueya maara sequeyaquishaare: "Niaari sesa miijica".

<sup>16</sup> Pueyasoori tariucuaaanu na sequesano Abraham nareja niquitionu paniquiaari, puetunu necohuatajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niquitionutaniya nocua tiuujica. Naacuajitij, Pueyaso sequesanoori maja saaja Moisés Rootasano tojjiacara. Cuno sequesanoori puetunu pueyapuerajanaa, canapuate Pueyasocua tiuujica quiyani, taa Abraham quiquiaari Pueyasocua tiuujicaaani. Naa Pueyasocua tiuujica pa quishacari taa Abraham tiuquuaari Pueyasocuaaani, paari Abraham niquiohuani. Naaratej, Pueyasora, Abrahamri pa que. <sup>17</sup> Pueyasocuaajaari naa sequequiaari Abrahamteaj nojuajaari queraatia niquiohuaraca quiriquiano. Naacuajitij, Pueyaso sequesanoori naa naajiotasano quiya:

"Abrahamnaa, janiyari quiarjia quia jiyateree queraatia tamaatia rupaaca pocuajaca que quia quiniuriani". Abrahamri Pueyaso sequesanoocua tiuquuaari. Nojuajaari niishiquiaari Pueyasoori macunucua samiitianiija. Niishiquiaarijuhuaaj, Pueyasoori cumaacaraca na panishano na shipiniuria shaaquijiniiji.

<sup>18</sup> Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquuaari. Naacuajitij, nojuajaari seetanujuanaa queraatia tamaatia rupaaca pocuajaca pueyapue que, taa Pueyaso sequequiaari nojuacuaani. Pueyasoori naa na sequequiaari:

"Quia niquiohuari tojetaarucuajanaa queraatia quiriquiano".

<sup>19</sup> Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuaaj, naajaa, majaari na tarinitianu quiquiaari Pueyaso sequesanoocua tiuuniu.

<sup>20</sup> Saaja Pueyaso sequesanoocua na tiuushacari, nojuajaari maja noojia na niquijiotenu quiquiaari. Majaari Pueyaso sequesanojiniji na taacanuunu quiquiaarijuhuaaj. Saaja Pueyasocua na tiuushacari, nojuajaari noojia cumaquiquiaari socua. Naacuajitij, nojuajaari naa maniniuuaqueetaquiaari Pueyaso: "Paacarasho cua Pueyasonaa. Niishiyaniija quiaari canaa muetutenutaniya taa quia sequecanu janiyacuaani.

<sup>21</sup> Quiaacuajaari cumaacaraca quia miiniuria puetunu quia sequesanojuanaa". <sup>22</sup> Naa Abraham tiuuniucua Pueyasocuatej, Pueyasoori na jiyatequiaari juhua sesa miyashijia pueyanora.

<sup>23</sup> Jaara naa naajiotasaaquiaari Abrahamjiniji: "Pueyasoori na jiyatequiaari juhua sesa miyashijiaara", cunoori maja saaja Abrahamra sequesano. <sup>24</sup> Cunoori pajaniyara sequesanojuhuaaj. Cunora, Pueyasoori pa jiyateya juhua sesa miyashijiarajuhuaaj, nocua pa tiuushacari, pa niishishacarijuhuaaj nojuacuajaari pa Jiyanijia Jesucristo samiitianiquiaariuhua macujiniiji. <sup>25</sup> Pueyasocuaajaari mijiria na jiyaroquiaari sesa pa miishanoocua mosocoriqiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijiaa.

### Jesuucua tiuuniaa pueyari jiyanooshano

**5** Naacuajitij, paa jaara tari jiyanooshano quiyani Jesucristoocua pa tiuushacari, paari juhujaniya quiya Pueyaso niquiarani. Jesucristoori na Que pa jyanootiquiaari, pocuara na cusosacari. <sup>2</sup> Jesucristoocua tiuujica pa quishacari, Pueyasoori pa timitiaquiaa. Pa cumaquiquiaajaariuhuaaj maninia necohua pa quiniuria. Paari shuquiriyajaacuhuaaj, pa niishishacari paari jatanishaanutaniyani, shacantuuca quijica pa quiniuria juhua nojuajuhuaaj. <sup>3</sup> Majaari saa cunojua. Paari shuquiriquiaajuhuaaj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhujaniya rejeretajaca quiniutianiya. <sup>4</sup> Naa rejeretajaca pa quishacaritij, paari cumueeca Pueyaso muerasu quiniutianiya. Naa cumueeca Pueyaso muerasu pa quishacaritij, paari juhujaniya sashijica quiniutianiya, pa niishishacari Pueyasoori seetanujuanaa maninia miiniutianiya pajaniya, taa na sequequiaaricuaani. <sup>5</sup> Naa pa niishishacaritij, majaari sapojosano pa quiniu quiniutianiya. Pueyasocuaajaari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jitianura poojiajinia.

<sup>6</sup> Pueyaso tojiyashijica pa quishacariija, majaari pa naata quiquiaari Pueyaso jyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jyanootiniuria pajaniya. <sup>7</sup> Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: "Janiya cuaara mosaaria juhuaari cuno pueyano niti"? Majaruhua. Monu panishano pueyano jaara seetanujuanaa maninia pueyano quiri, na rupeua pueyano jaara jyanohua na panijia quiri, nojuaja maara sequere: "Janiya cuaara na niti mosaaria juhuaari".

<sup>8</sup> Saniniuujia, sesa miijiaca pa quishacarijia, Jesu-cristoori pa niti cusoquiaari cutara. Naacuajitij, paari niishiyani, Pueyasoori jiyanoohua pa panijia. <sup>9</sup> Quiarjia, paari sesa miyashijiaca quiya Pueyaso niqiarani, Jesu-cristo cusonuucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniucua. <sup>10</sup> Na paraa pa quishacarijia, Pueyasocuajaari pa jiyanooquiaari, Neyanu cusonuucua pocuara. Quiarjia, nata jeeca-toono pa quishacari, Neyanuuri saminio quiya pueyaracaanu pocuaji na tacunura. <sup>11</sup> Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

### Pa supuetana Adánri maja juhua pa Jiyano Cristo

<sup>12</sup> ¿Casaara pa cusonuquiaani? Juhucatecara pa supuetana Adán miiniucua sesa, naaratej puetunu pueyajanaari sesa miijiacajuhua. Pueyasocuajaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiaca pa quiniucua. <sup>13</sup> Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuara saquiriojotasaanu quijia sesa nojori miishacari. <sup>14</sup> Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cuuani. Naajaa, puetunu nojorijianaari cusonuquiaarijuhua sesa miijiaca nojori quiniucua, sesa miijia Adán cuajinio nojori supuenucua. Quiarjia saniniuujia, nia pohuatareera Adán miishanojiniji, Jesucristo miishanojininio.

<sup>15</sup> Adán miishanoori jiyanoohua tamaatia Jesu miishanojiniji. Coteenu shipinishano pueyano miiniucua sesa, puetunu pueyajanaari shaajenu niishiya. Saniniuujia, Jesucristo miiniucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara. <sup>16</sup> Pueyaso miishano maninia pajaniyarani, cunoori sesa Adán miishano shocotaa jiyanoohua cutara. Naa niquiriyatu sesa casaa Adán miiniucuatej, puetunu pueyajanaari saniitiosocoriquiano. Saniniuujia, maninia Jesucristo miiniucua pajaniyarani, Pueyasoori pa jiyanooquiaa puetunu sesa pa miishanojinijianaa. <sup>17</sup> Niquiriyatu pueyano miiniucua sesa, puetunu pueyajanaari cusonuujacara quiquiaari. Saniniuujia, niquiriyatu pueyano miiniucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiushacari. Majaari saaja cuno, naajuhua, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

<sup>18</sup> Naa Adán miiniucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhua, Jesucristo miiniucua maninia, puetunu pueyajanaari na

naata jiyanooshaanu, nojori saniitioyaquishaanuucua, pueyaracaanu quijiaca nojori quiniuria. <sup>19</sup> Adán tojiyaquiniucua Pueyaso sequesano, puetunu pueyajanaari sesa miijiacara jiyatesaaquiarijuhua. Saniniuujia, Jesucristo tojiniucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

<sup>20</sup> Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacaritij, naajuhua, Pueyasoori socua jiyacatequiaari pocua taraajenujuhua. <sup>21</sup> Sesa miiniu tarinitianu niishiyashijia pa quiniucua, puetunu pueyajanaari cusonuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samiitianijioquiaariuhua, pueyaracaanu rishijiaca pa quiniuria pa jiyaniijia Jesucristota.

### Pablo niishitiojosano moojinia tiuquinijionujiniji

**6** Pueyaso jaara naa pa jiyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiyan, pueyaracaanu Pueyaso jiyanooniuria pajaniya, pueya niishiniuria, Pueyasocuajaqui jiyanoohua maninia na jiyanooniuria pajaniya? <sup>2</sup> [Maja pueyanaa! [Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupetesacari pajaniya, ¿paatucua casaara socua sesa miijia quirini? Pueyasora, paacuajaari tari cusonuquiaari Jesutani. <sup>3</sup> ¿Niaateeri cuno niishiyaquiyajaa? Naajuhua, paa jaara moojinia tiuquinishaare Jesucristoocua pa tiushacarini, Pueyaso niqiarara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. <sup>4</sup> Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhua. Naa juhua macu pa quishacaritij, paari samiitianijiosanohuani, taa Jesucristo samiitianishaaquiaariuhua macujiniji jiyanoohua Pueyaso cumaacatacuani. Naa samiitianijiosanohua pa quishacaritij, maninia miijiaca pa quiri juhua quiarinio pueya.

<sup>5</sup> Paa jaara Jesucristo rupetesaaquiaari sesa pa miishanoocuara na cusosacarini, naajuhua, paa cutaraari tari samiitianijiosanohua juhua nojuajani, maninia quijiaca pa quiniuria. <sup>6</sup> Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiushacari, maja socua cumaaca na jitianura, sesa na miitiniuria pajaniya. <sup>7</sup> Naacuajitij, sesoriquia poojia seque jaara tari jatanishano quiya, majaari tari sesa miijiaca pa quiniu. <sup>8</sup> Paa jaara tari naa cojiritiasaaquiaari monu Jesuta nocua pa tiushacarini, paari quiarjia niishiya cutarani, paari pueyaracaanu nata quiriquiano saminioni. <sup>9</sup> Cristocua jaari samiitiaquiaariuhua. Paari niishiyajuhua, majaari socua na pacutenu quiniutianihua cusonu. Nojuacuajaari tari cusoquiaari puetunu sesa pa miis-



hanoocuarajanaa. Naaratej, nojuajaari maja na naata socua cusojuasaanuhua. <sup>10</sup> Majaari socua Jesucristo pacutenu quiniutianihua cusunu, sesa pa miishanoocua. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. <sup>11</sup> Naajuhuj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuj, niaacuajaari Jesucristota samiiticonohua, Pueyaso tojjijaca nia quiniuria.

<sup>12</sup> Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyaretare tama nia cuaqueya panishanojuaja nia miyaquiniuria. <sup>13</sup> Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacujitij, nia cuaqueya nia jiyatere saa maninia miijia na quiniurija.

<sup>14</sup> Naa jaara nioojajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari najaniya. Nia niishiri, niaari quiarijia Pueyaso tojtijajaca cutara, maja tari Moisés Rootasano tojjijaca.

#### Pueyaso tojjiyashijaca pueyani, nojoriiri Sesaaca pueya

<sup>15</sup> Cua sequesacari najaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jiyanoojia? [Maja naa nia miiniu pueyanaa! <sup>16</sup> Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacujitij, paari pueyaracaanu na tojjia quiniutianiya. Naajuhuj, niaa jaara sesa miijiac quiriuhua, niaari Sesaaca tojjijaca. Naa sesa miijiac nia quishacaritij, niaari cusunutaniya. Saniniuujia, niaa jaara Pueyaso tojjiacara quiri, niaari sesa miyashijaca quiniutianiya. <sup>17</sup> Tarijia, niaari Sesaaca tojjijaca quijia, juhua na seya, sesa miijiac nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojatajanaa, taa nia niishitiojosaquiaaricujani. <sup>18</sup> Jesucristo rupaa nia tojjishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacujitij, niaari Pueyaso tojjiacara jatanishano, saaja maninia miijiac nia quiniuria. <sup>19</sup> Janiyari naa pohuataa serujiniji najaniyani, maatia nia tojiniuria cua niishitiojosano. Majaari juhuanujuaja nia naata puera jiyajeneta niishitiojosano niishiniu, cumueeca Pueyaso muerasu nia quiaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacujitij, niaari jyanohua sesa miijiacara jiyacatequiaari. Naajuhuj, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa jaara naa miiri, niaari tojetaarucujanaa maninia miijiac quiniutianiya Pueyasora.

<sup>20</sup> Naa jaara sesa miijiac quiquiaarijia Sesaaca tojjiac nia quishacarijia, niaari juhujaniya Pueyaso tojjiyashijaca quiquiaari. <sup>21</sup> ¿Sesaacate maninia nia miiquiaari sesa nia miiniucua nera? [Maja! Naa cutaraari saaja caririquiaa sacuaraatia casaa nia miiniucua tarijia. Naaari quiarijia niishiyajuhuj, cante sesa miijiac quiquiaani, nojoriiri shaajasaariquiano. <sup>22</sup> Naa sesa miyashijaca nia quishacari quiarijia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjiac nia quishacaritij, nojuajaari nia jiyatenutaniya seetanujuanaa maninia miijiac nia quiniuria. Naacujitij, niaari pueyaracaanu shuquiriaatia rishijaca quiniutianiyajuhuj. <sup>23</sup> Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuujiac pa quishacari, Pueyasoori saa cunoraja pa jiyatequiaa pueyaracaanu rishijiac pa quiniuria, pa Jiyaniijia Jesucristo rupuejaca pa quishacari.

#### Paari juhua camishanoni

**7** Pueyanaa, niaacuajaari Moisés Rootasano niishijiac. Naaari niishiyajuhuj, paa jaara shaajequeeni, paari jiyacari Moisés Rootasano cartequa shushani.

<sup>2</sup> Naajuhuj, paacuajaari rootasaaquiaarini, maaji jaara camishano quiri, cuaara tamonu cayata quiaquiriia, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojjishocoriquiano. <sup>3</sup> Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojjiyashijia na quiniu cunora. Nojuajaari maja paanatu, naa na miishacari.

<sup>4</sup> Naaari naajuhuj pueyanaa. Jesucristo cusunucua pa niti, niaari juhua cusunuuquiaarijuhuaj, maja Moisés Rootasano tojjijaca nia quiniuria socua. Naacujitij, niaari tamonu tojjijaca quia cutara. Nojuajaari pa Jiyaniijia Jesucristo, nooj, macujiniji samiiticoquiaariuhuatej. Naacujitij, quiarijia pa Jiyaniijia Jesucristo tojjijaca pa quishacari, paari maninia miijiac Pueyasorani. <sup>5</sup> Tarijia, Pueyaso tojjiyashijiac pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacujitij, tama sesa pa miishacarijiaaja, paari tama pa cuaqueyajaaja jiyateriquiaa saniitosano pa quiniuria maquesaashijia mani quiquiojiniani. <sup>6</sup> Tarijia, paari juhua quioosano pueya Moisés Rootasano tojjitishaaquiaarini. Saniniuujia, Jesucristota pa cusunucua, nojuaja jaara pocuara cusoquiaari, paari tari Moisés Rootasano tojini cartequiaarini. Moisés Rootasano pa tojiaquishacari quiarijia, naacujiti pa naata Pueyasojanaa tojini shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojiti-

ajaca quiquiaari maniniani, pa puerenuta paa mariqui saniitiosaareeri pa tojijaquiniucua niquiriyatu quer-  
aatia na rootasanojiniji.

### Poojiaari saa sesa miiniu niishijaja

<sup>7</sup>Tamasaca naasucuaari jiyaniya janiyari Moisés Rootasano soojeani. Maja. Quiria, jyanohua manini-  
acuajaari Moisés Rootasano. Moisés Rootasanojiniji,  
paacuajaari niishiyani paari sesa miijiacani. Moisés  
Rootasano jaara quiaquiriquia, janiya maara ni-  
ishiyaquiiaarini, cua jiaatiasacari tamasaca jittiasano  
casamiicua, cunoori sesa Pueyasora. <sup>8</sup>Saniniuujia,  
Moisés Rootasanojiniji cua niishishacari maja  
tamasaca casamiicua cua jiaatianura, janiyari saaja  
juhua shiniujiushaaquiarini casamiicua jiaatija cua  
quiniuria socuani. Naacujitij, Moisés Rootasano cua  
niishiyaquishacarijia, coojiaari juhujaniya quiquiaari  
juhua maqueja. Saniniuujia, janiya jaara Moisés  
Rootasano niishiquiaarini, coojia sequeeri juhua niu-  
cuquiaari, puetunu sesa casaajanaa na miiniu panini-  
uria. <sup>9</sup>Moisés Rootasano cua niishiyaquishacarijia,  
janiyari juhujaniya quijia quiquiaarini. Saniniuujia,  
Moisés Rootasano cua niishishacari, janiyari jyanohua  
taraajequiaarini, cua niishishacari janiyari jyanohua  
sesa miijia Pueyaso niquiarani. <sup>10</sup>Naa sesa miijia cua  
quishacaritij, janiyari niishiquiaarini, janiyari quera  
jatashiya saniitiosocoriquianoni. Janiya jaara Moisés  
Rootasano tojiquiaari shushajanaani, janiyari  
jiyaniquiaarini, janiya jaara cuno rootasano tojirini,  
janiya naasucuaari pueyaracaanu rishijia quiniu-  
tianiyan. Saniniuujia, Moisés Rootasanoori saaja cu-  
cuara tonujuquiaari puetunu sesa cua miishanojiniji-  
janaa. <sup>11</sup>Naacujitij, janiyari jyanohua jiyajenequiaari-  
ni, cua jyanishacari cua naatacuaja Moisés Rootasano  
tojiniu maninia, Pueyaso jyanooniuria janiya. Jaara  
maja cua naata quiquiaari Moisés Rootasano cua to-  
jiniuria maninia, janiyari niishiquiaarini Pueyasoori cua  
jiyanoyaquiniutianiya.

<sup>12</sup>Seetanujuanaa nia sequeyanijia pueyanaa, Moisés  
Rootasanoori jyanohua maninia. Tojetaarucujanaa  
maninia rootasano. Cunoori seetanujuanaa rupaa  
maniniu Pueyasojiniji. <sup>13</sup>Moisés Rootasano jaara naa  
maninia quiri, ¿janiyateeri nia sequeyani cuno na  
rootasanoori pa cusojuaja? Maja. Janiyari nia se-  
queyani, Moisés Rootasanojiniji, paari niishiyani sesa  
pa miishano cutaraari jyanohua sesa Pueyasora.  
Naacujitij, paari Moisés Rootasanojiniji niishijiani,  
paari puetunujuanaa jatasocoriquiano quijia juucua,  
seetanujuanaa sesa miijiacua pa quiniucua.

<sup>14</sup>Paacuajaari niishiyani, Moisés Rootasano,  
cunoori maja nareja pueyano niishitiojosano. Pueyaso  
niishitiojosanocuajaari pa tojishocoriquiano puetunu  
poojatajanaa. Saniniuujia, coojiaari Pueyaso to-  
jiyashijia. Janiyari tamajaaja juhua coojia seruni, na  
panishano cua miiniuria. Naa sesa jiuujjaraca cua  
quishacaritij, majaari cua naata Moisés Rootasano to-  
jiniu. <sup>15</sup>¿Casaara naa sesa cua miiquiaani? Janiyari saa-  
ja cua niishishano sesa casaa miiquiaani. Majaari

maninia cua miiniu quiquiaa, taa cua paniyacujani.  
<sup>16</sup>Janiya jaara cua panishoo sesa casaa miirini, naacua-  
jitij, janiyari sequequiaani, Moisés Rootasanoori see-  
tanujuanaa maninia. <sup>17</sup>Naa cua panishoo sesa casaa  
cua miishacaritij, cunoori maja tama cua miishano-  
juaaja. Cuno sesa cua miishanoori coojiajiniji supueno  
tamajaaja. <sup>18</sup>Quiarijia niishiya cutaranijia, coojiaari to-  
jetaarucujanaa sesa miiniu niishijia. Naacujitij, jani-  
yari juucua maninia miiniucua jiaatiaquiaani. Naajaa,  
majaari cua naata quiquiaa maninia cua miiniuria  
tamajaaja. <sup>19</sup>Naacujitij, cua miishanoori maja  
maninia, taa cua miiniu paniquiaa juucucujani. Cua  
miishanoori saaja cua miiniu paniyaquishoo quiquiaa.  
<sup>20</sup>Naacujitij, janiya jaara cua panishoo sesa casaa mi-  
irini, janiyari niishiyani, cunoori tama coojiajiniji  
supuenojuaaja, majaari tama cua miiniu panishano-  
juaaja.

<sup>21</sup>Quiarijia niishiya cutaranijia, janiyari naa sesa mi-  
ijiani: janiya jaara maninia casaa miiniu paniyani, jani-  
yari saaja sesa miiquiaani. <sup>22</sup>Janiya cutaraari niishiyani  
Pueyaso rootasano Moisésri seetanujuanaa maninia  
cua tojishocoriquiano. Na tojiniuucua jiaatiaquiaa juu-  
cuanijia. <sup>23</sup>Janiyari niishiyajaanihuaaj, coojiaari juhua  
cua niishitiaja paraca quiya. Naacujitij, cua niishirio-  
josacari, "Maninia miiniutianiyanijia", coojiaari saaja  
sesa cua miitiquiaa. Naacujitij, tama janiyajaarijia  
juhua coojia seruni, cua miishacari puetunu sesa na  
panishanojuanaa.

<sup>24</sup>¿Taa cua miiniutianiya socuaarini? [Tojetaarucua-  
janaa taraatia quijianijia! Pueyaracaanu sesa miijiani-  
jia. Majaari cua naata tamajaaja maninia miijia cua  
quiniu. Naa sesa miijia cua quishacaritij, cua cuaque-  
yari macu quiriqiano. ¿Cante na naata cua jataniniu-  
ni, naa sesa miijia cua quishacaritij? <sup>25</sup>[Pueyaso  
shuquiritiaanijia cua niishishacari, nojuacuajaari cua  
Jiyaniijia Jesucristota cua jataniniutianiya tojetaarucua-  
janaa maninia miijia cua quiniuria! Naacujitij, mijiria  
cua quishacarijia, janiyari Pueyaso tojijia quiniu  
paniyani. Saniniuujia, naa coojia quiniucua sesatej,  
saaja sesa cua miitiniu paniquiaari.

### Pueyaso Sohuanu pa tojishacari, paari maninia miijia quiniutianiyan

**8** Pa rupuesacari Jesucristo, nocua pa tiuushacari,  
Pueyasoori pa jyanooquiaa. Naacujitij, paari to-  
jetaarucujanaa jyanoooshano quiyani. <sup>2</sup>Puetunu  
pueyajanaari cusonuuriqiano quijia, sesa miijiacua no-  
jori quishacari. Saniniuujia, Jesucristo pa rupuesacari,  
Pueyaso Sohuanuuri pa jiyatequiaa saaja maninia mi-  
ijiacua pa quiniuria. Naacujitij, majaari tari sesa miijia-  
ca pa quiniu pa saniitiosaanura. <sup>3</sup>Moisés Rootasano  
pa tojishacari juucua, majaari pa naata quiniu  
jiyanooshano. Cunoori saaja sesa miijiacua pa quiniuu-  
cua. Naaratej, Pueyasoori Neyanujuanaa jiyaroquiaari  
mijiria, pueyano na quiniuria juhua pajaniya, pa niti na  
mosaanura. Naacujitij, Jesucristo jittiasacari juhua pa  
cuaqueyajuhaaj, Pueyasoori juhua sesa miijiaara na jiy-  
atequiaari, pa niti na saniitiosocoriquiano. <sup>4</sup>Naacujia-

tij, Pueyaso Sohuanu pa jiiatasacari quiarijia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojjijaca pa quishacari, majaanari tari pa quiniu sesa miijiaca, taa pa quiquiaari tarijiacuajani.

<sup>5</sup> Canapuate tama na panishanojuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniuuja, canapuate Pueyaso Sohuanu tojjijaca cutarani, nojoriiri saaja Pueyaso shuquiritiniuria jiaatiaquiaa. <sup>6</sup> Tama na cuaqueyajaaja shuquiritiniuria jiaatiajacaari saaja shaajecoriquiano cutara. Saniniuuja, Pueyaso shuquiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuquiriaatia quijiacajuhuj. <sup>7</sup> Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojjijaca na quiniu paniniu. Seetanujuanaa majaanari na naata Pueyaso tojjijaca na quiniu juhuuj. <sup>8</sup> Naacujitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniuria.

<sup>9</sup> Niajaniya cutaraari maja nia quiniu juhua cuno pojoriija, tama na cuaqueyajaaja shuquiritiniuria jiaatiajacaari. Niaa cutaraari Pueyaso shuquiritijaca, Pueyaso Sohuanu cumaquishacari niajaniya, nojuaja jaara seetanujuanaa nioojiajinia quiya. Cante Pueyaso Sohuanu jiiitiaaquiyani, nojuajaari maja Pueyaso pueyano.

<sup>10</sup> Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijaca pa quiniurijuhuj. Pa cuaqueya cutaraari shaajasocoriquiano, sesa miijiaca pa quiniuucua. <sup>11</sup> Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitianiquiaariuhua macujiniji Jesucuaani.

<sup>12</sup> Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacuajani. <sup>13</sup> Cante naa miijiaca quijaani, nojoriiri shaajasaariquiano. Saniniuuja, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyaracaanu shuquiriaatia quijiaca quiniutianiya.

<sup>14</sup> Canapuate Pueyaso Sohuanu tojjitajacani, nojoriiri Pueyaso niqiohua cutara. <sup>15</sup> Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacujitij, cuno pa jiiitasano Sohuanuuri Pueyaso pa sequetequiaa, "cua Quenaa". Naa Pueyaso muerasuniyojua pa quishacaritij, majaanari tari pa puerenu paari saniitiosaanutaniyani, Moisés Rootasano pa tojiyaquiniuucua. <sup>16</sup> Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. <sup>17</sup> Naa Pueyaso muerasu pa quishacaritij, puetunu Pueyaso jiiitasanojuanaari pa jiiitasano quiniutianiyajuhuj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini,

Jesucristoocua tiujujaca pa quiniuucua. Paa jaara naquiya miishaare nocuara mijiriani, paari jiyanojua maninia quijiacara jiyatesaanutaniyani juhua nojuajuhuj.

#### Pueyasoori maninia miiniutianiya na muerasu

<sup>18</sup> Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanojua maninia miishaanutaniyani, pueyaracaanu shuquiriaatia pa quiniuria. <sup>19</sup> Quiarijiani, puetunu Pueyaso shipinishano casaajanaari pa niqiniuucua jiaatiaa paa jaara quiariniora jatanishaareni. Na niishiniuni paniyari taa mueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuaano na muerasu pa quiniuria. <sup>20</sup> Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuuj. Majaari na sesenu quiquiaari tama na panishacarijaaja. Pueyasocuaajaari naa paniquiaari sesa na quiniuria, na shipinishano pueya sesenucujuhuj. Naajaa, majaanari pueyaracaanu sesa na quiniu quiniutianiya. <sup>21</sup> Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhuj. Naacujitij, puetunu Pueyaso shipinijosano casaajanaari maninara quiniutianihua, maja na sesenura socua. <sup>22</sup> Quiarijiani, puetunu Pueyaso shipinijosano juanaari jiyanojua noojia niojiya taraatia na quishacari. Quiatojiyari juhua maaji noyano, cuaara quiariniora jatanishaarejaatijia. <sup>23</sup> Majaanari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuj, na panishacari tojetaarucujanaa jatanishano quijiaca pa quiniuria. Paacuaajaari tari jiiitiaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. <sup>24</sup> Paacuaajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyaajaani. Pa cuaqueya jaara tari jatanishano quiriquia, paa maara na jataniniucua jiaatiaaquirini. Paa jaara tari jiiitariquia pa panishanoni, ¿paatucua casaara nocua jiiatiare socuani? Pa cuaqueya cutaraari juhuanojua jatanishoojua. <sup>25</sup> Naajaa, paacuaajaari niishiyani pa cuaqueyari jatanishaanutaniya, jiyocuaaanu pa rupenura pa Jiyaniija. Cunora, paari mijiria taraatia pa quishacari juhuajaniya rejeretaquiaani pueyaracaanu pa sashishacari.

<sup>26</sup> Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueca pa quiyaquishacari. Naacujitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanojua na secojosacari pocuara, jiyasohua quiato-

jiya poojjajiniaari. <sup>27</sup> Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuajaari maninia secojojua cutara, taa Pueyaso miiniu paniya na muerasuracuajani.

### Jesucristo pa shocotanjia cutara

<sup>28</sup> Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquirojoquiaari na muerasuniyojua pa quiniuria. <sup>29</sup> Naajuhuj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriirihua Jehuana Jesucristo quiriqianojuhuaj. Naa sequequiaariirihua Jesucristo quiniuria pa puerana, queraatia tapuey-ocucaraca na quiniuria. <sup>30</sup> Naacuajitij, canapue Pueyaso saquirojoquiaari na muerasu nojori quiniuriacuajani, juhua Jesucristo nojori quiniuriahuj, Pueyasoori cuno pojori niishitiquiaa nojori tiuuniuria Jehuanuucua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niq-uitioquiaa na Sohuanu, na Sohuanu jataniniuria nojori shacantuua quijiaca nojori quiniuria juhua Jehuanu.

<sup>31</sup> Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? [Maja! <sup>32</sup> Pueyasoori jiyanoohua pa panijia. Nojuajaari Jehanuniyojua jiyaroquiaari pocuara mosocoriquiano. Nojuaja jaara Jehanu jamueyaquiquiaaricuaa, ¿maatucua casaara quiarijia niqutioyaquiri puetunu pa panishanojuanaani? <sup>33</sup> ¿Cantucua Pueyaso saquirojosano pueyacuara saquirojotare sesa nojori miishanoni? Pueyasojuanaacuajaari pa jiyatequiaari juhua sesa miyashijiacara pa quiniuria. <sup>34</sup> Jesucristocuajaari tari cusoquiaari pa niti. ¿Cantucua saniniuuja quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitiaquiaariuhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. <sup>35</sup> Nojuajaari jiyanoohua pa panijia. ¿Tamonu casaate na naata Cristo tarinitiniuhua maja na paniniuria pajaniya? [Majaari quenaaja casaa quiniuhua na tarinitiniuria nojuaja! Naaratej, majaari nia jiyaniuhua Cristo pa paniyaquiya, paa jaara taraatia miishiyani, paa jaara casaacua tacayani, tamasa jaara naquiya miya pajaniyani. Naajuhuj, paa jaara quera titiacoya pa miaajenutani, majaari nia jiyaniuhua Cristo pa paniyaquiya, naajuhuj, paa jaara toqueejuhua quiyani, paa jaara cocuaatia miyani, paa jaara mi-ananajoshiya monurajaniuhua. Puetunu niojuanaari maja na tarinitiniuhua Jesucristo, na paniyaquiniuria pajaniya. <sup>36</sup> Paacuajaari taraatia miishocoriquianoni, naatej, taa tariucuacaanu Pueyaso Rupaajinia naajio-tasano quiyacuajani. Naa sequeyari:

“Canaa Pueyasonaa, canaari puecooshiya pueyaraanuni, quia tojtijajaca cana quiniuuca. Nojoriirihua

juhua miaquesocoriquiano borregohua cana puecooquiaa juhuajaniya”.

<sup>37</sup> Paari naa miishaaquiaaaniuhua. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jeecanura pajaniya, juhua nojuaja pa quiniuria socua. <sup>38</sup> Seetanujuanaa niishiyani, Pueyaso panishacari jiyanoohua pajaniya, majaari quenaaja tamonu casaa na naata rupatanu pajaniya Nojuajinihi. Paa jaara quiri saminiujuani, macu soj, naajaa, pa panijia Pueyasocuajaari pata quiyaja. Naajuhuj, Pueyaso seya, samaruhanio, puetunu cunojuanaari maja na naata pa rupatanu Pueyasocua. Naajuhuj, majaari quenaaja tamonu cumaacaraca quijiaca na naata pa rupatanu Pueyasocua. Pueyaso paniniuhua pajaniyani, cunoori maja na puequenu quiniutianiya quiarijia, tamacarinio. <sup>39</sup> Naajariuhua, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacuajitij, pa Jiyanihi Jesucristota rupeutootesano pa quishacari, puetunu Pueyaso ship-inijiosano casaajanaari maja na naata pa rupatanu Pueyasojinihi.

### Pueyasojuanaari pueya saquirojojua na pueyara

**9** Naa Pueyaso pueyano cua quishacaritij, janiyari jiyanoohua cuarta Israel pueyacuara taraajequiaani, nojori tiyaquiniuuca pa Jiyanihi Jesucristoocua. Janiyari pueyaracaanu nojoriicua taraajequiaa jiyanoohua, maja cua naata quishacari cuarta Israel pueya tiuutiniuhua Jesucristoocua. Seetanujuanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniacuajaari naa cua miishaanura. Nojori jaara na naata quiri Jesucristoocua rupeutesaanu cua niti, janiya maara Pueyaso sequereni: “Cua rupatare cutara Jesucristojinihi, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniatej, janiyari coojajinia niishiyani, seetanujuanaari cua sequesano. Pueyaso Sohuanuuri cua niishitijuhua majaari cua sapojonu. <sup>4</sup> Cuarta Judocuacaari pa supuetana Israel niqiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niqutiquiaari shacantuua na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuj, Pueyasoori Moisés niqutiquiaari caapiqui saajianeecua na naajiosano, saniniuuja Moisés nishitiojonura tiji nojori. Pueyasoori nojori nishitiquiaarijuhuaj taa nojori miiniutianiya, tariucua jiyanooshano nojori rerejonura na niqiuara. Pueyasoori nojori sequequiaarijuhuaj, nojuajaari puetunujuanaa na sequesano Abraham tohuateenutaniya nojori. <sup>5</sup> Israel pueya supuetanaari quiquiaari Abra-

ham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijijanaa na quiniuria, puetunu casamijianaa jiitiana na quiniuriajuhuaj. Nojuajaari Pueyasojuhuanajaj, juhua na Quejuhuaj. [Nojuaja cuara pueyaracaanu maniniuuaqueetasano quiiria! [Cuaara na quiiria pueyaracaanutej!

<sup>6</sup> Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari nijaniyatej, majaari nia jyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuja. Jaara na quiritij, ¿casaara puetunu Israel pueyajanaa maseyaquiniutianiya Pueyaso sequesano nojoririaari-ni? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujanaa Israel pueya Pueyasora. <sup>7</sup> Naajaariuhua Abraham niquiohua. Puetunu Abraham niquiohuajanaari maja seetanujanaa Abraham niquiohua na quiniu quiquiaari Pueyasora. Pueyasocuaajaari naa sequequiaari Abraham:

“Cua sequesano quiajanijari saaja quia niyanu Isaac cuajinio supueno pueyarano quiniutianiya cutara”.

<sup>8</sup> Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujanaa Pueyaso muerasu. Saniniuujia, seetanujanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. <sup>9</sup> Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuritanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

<sup>10</sup> Naa quiquiaarijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. <sup>11</sup> Cuno caapueya royaquishacarijia, juhuanajuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijjarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno roy-aquishoojua caapueyajinijiiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaja na tohuateenu-ra. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

<sup>14</sup> Naa Pueyaso miishacari tama na panishanojuajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja.

<sup>15</sup> Pueyasocuaajaari naa Moisés sequequiaari:

“Janiyari pueya jyanooniutianiyani teyano pueyano cua jyanooniu paniyacuajani. Naajuhuj, janiyari pueyanoocua taraajenutaniyani, teyano pueyanoocua cua taraajenu paniyacuajani”.

<sup>16</sup> Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaaja cana na jyanooniu paniyani. <sup>17</sup> Naajuhuj, tariucua-caanu Pueyaso sequesano Egipto jiyaniijiaari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miijiosano cua niquitiniuria quiajanija. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojanaa cutarani”.

<sup>18</sup> Naacuajitij, paari niishiyani, Pueyasoori taraajeja teyanoocua na taraajenu paniyani. Naajaariuhuj, nojuajaari na tojyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

<sup>19</sup> Naa cua sequesacari nijaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitireni? ¿Canteeri na naata Pueyaso tarinitiniu na miiniu panishanojinijini?” <sup>20</sup> Majaari naa sequenu pueyanonaa. ¿Canteeri quiajanijani, naa quia juaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?” <sup>21</sup> Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia caji-tiariquiano conatunio.

<sup>22</sup> Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na sanitiosacari sesa miijiaca? Naajaa, Pueyasoori jyanohua rejeretaquiaa sesa miijiaca, cante tari saniitiosocoriquiano quiyacuajani. <sup>23</sup> Pueyasoori naa tarishiyajaara na saniitionura na tojitiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jyanoooshano pueya, cante tari saquiriojosano quiya na shuriucua quiriquianocujani. <sup>24</sup> Paacuajaari cuno jyanoooshano pueyani, canapue tari Pueyaso saquiriojoquiaaricujani Judiocuacajinijinio, taucuacajinijinio. <sup>25</sup> Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiaquiquiaarini, janiyari nojori sequenutaniyani: ‘Niaari cua quiquiohuaniyojua’. Naajuhuj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

<sup>26</sup> Naa naajiotasanoori quiyajuhuj:

“Tee cuniqui naa pueya sequesaaquiaaricujani: ‘Ni-aari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’”.

<sup>27</sup> Saniniuujia, supuetana Isafasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. <sup>28</sup> Pueyasoori mijiriara na sequesano tohuateenutaniya. Majaari na tarishiniu quiniutianiya”.

<sup>29</sup> Supuetana Isafascuajaari naa sequequiaari tarijia-juhuaj:

“Pa Jiyaniijia Pueyaso jaara Israel pueya niquiohua jiyanoaquiuaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

### Judiocuacaari Pueyaso rupaacua tiuyashijica saaja

<sup>30</sup> Naa cua pohuatasacari nijaniya tariucuacaanu Pueyaso Rupaajinijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. <sup>31</sup> Israel pueyari saniniuujia jiyanoohua Moisés Rootasano tojijica juucua, nojori jiyanihacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. <sup>32</sup> ¿Niaate niishiya casaara Pueyaso jiyanoaquiuaari nojorini? Pueyasoori nojori jiyanoaquiuaari nojori tiuyaquiniucua nocua. Nojoriiri jiyaniquiaari tama nojorijiaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuni quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. <sup>33</sup> Jesucristojiniji miriqui Pueyaso sequesano cuajaari naa naajiotasaaquiaari tariucuacaanu, Jesucristo niyacarijia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

**10** Cuarta Pueyaso muerasunaa, janiyari jiyanoohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuaj. Janiyari jiyanoohua nojoriicua tacayani. <sup>2</sup> Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijica juucua, na muerasu nojori quiniuria. Nojoriiri naa miiquiaa najuhanaj, nojori niishiyaquishacari maninia. <sup>3</sup> Nojoriiri saaja sequequiaa, majana Pueyaso naata pueya jiyanooni saaja nojori tiuushacari nocua. Naaratej, nojoriiri jiyanoohua saniniujuquiaa maninia

nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiuaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano.

<sup>4</sup> Naacuajitij, Cristo jaara mosaaquiaari, nojuajaari Moisés Rootasano tojiniu tohuatequiaari cutara. Naacuajitij, Pueyasoori puetunu nocua tiuuniaajanaa jiyatequiaa juhua sesa miyashijiacara. <sup>5</sup> Moisés cuajaari naajioquiaari taa na rootasano tojijica miiniu-tianiyani, juhua sesa miyashijica nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijara jiyatesaanutaniya”.

<sup>6</sup> Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyacaanu rishijica pa quiniuria. Naacuajitij, majaari naa nia niishiriojonu nioojiajinia nia taacanusacari:

“¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” <sup>7</sup> Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” Pueyanaa, majaari quenaaja naa nia niishiriojonutej! <sup>8</sup> Pueyaso Rupaacuaari tari naa naajiotasaaquiaari pajaniyara:

“Niaacuajaari cua rupaa jitiia. Niaari na niishiya-juhuaj. Nioojiajinia quiyacuajaari”.

Cuno rupaa canaa na pohuataquiaa nijaniyani, cunocuajaari Jesucristoocua nia tiuuniuria. <sup>9</sup> Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niquiara pohuatare: “Jesucristoori seetanujuanaa Jiyaniijajanaa cutara”, noojiajinia na niishishacarijuhuaj Pueyasoori Jesu samiitiani quiaariuhua macujiniji. <sup>10</sup> Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuj, pa rupaata pa pohuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

<sup>11</sup> Tariucuacaanu Neyanujiniji Pueyaso sequesanoori naa naajiotasano quiyajuhuj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

<sup>12</sup> Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijaari maja rimiajata na jiyanooni nocua tiuujica pueya. Nojuajaari jiyanoohua capora. Jiyaniijajanaa cutaraari. <sup>13</sup> Tariucuacaanu Pueyaso Rupaajiniaari naa naajiotasano quiyajuhuj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’”.

<sup>14</sup> Jaara naa quiriritij, ¿pueyatucua taa Jiyaniijia secojonu-ureni, nojori jaara nocua tiuyaquiyajaa? Naajuhuj, ¿pueyatucua taa nocua tiuurini, nojori jaara nojuajiniji pohuataaquishoo quiyajaa? ¿Nojoriucua taa nojuajiniji niishijia quirini, tamasa jaara quenaaja nojori pohuataaquiri? <sup>15</sup> ¿Pueyaso Rupaa pohuataatucua taa cuno pojoriicua quiaareni, nojori jaara ji-

yaramiquiyaquishaare? ¿Pueyaso rupaa pohuatanaate jiyaramiquiyaquishaaquiari? [Maja! Ji-

yaramiquishaaquiari cuaja. Naaratej, naa naajio-  
tasano quiyari tariucuacaanu Pueyaso Rupaajinia:

“Jiyanohua timitiasano pueya cutaraari, noo pojori canapue te tamasaacua quiajani, nojori na pohuata-  
nura Pueyaso rupaa”.

<sup>16</sup> Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niquiara pohu-  
atasaare. Naacuajitij, supuetana Isaíasri naa seque-  
quiaari na taraajenuta:

“Jiyaniijianaa, majaari pueya tojiniu paniniu canaa po-  
huatasano quiajanijajini”.

<sup>17</sup> Naacuajitij pueyanaa, paa jaara Jesucristo rupaa po-  
huatasaareni, paari pa numaata na tojiyani. Paa jaara pa  
tojishanoocua tiuurini, Pueyasoori pa jiyatenu-  
taniya na pueya pa quiniuria.

<sup>18</sup> Pa jaara Pueyaso pueyara jiyatesaaquiaa saaja pa  
tiuushacari Pueyaso rupaa cuaja, jaara naa quiritij,  
¿casaara puetunu Israel pueyajanaa Pueyaso pueyara  
jiyateyaquishaaquiariirini? ¿Cristo rupaateeri nojori  
niquiara pohuataaquiashaquaaquiari? Maja. Nojori  
niquiaracuajaari pohuatasaaquiari. Naa naajiotasano  
quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajinijanaa po-  
huatasaaquiari. Na rupaari tojishaaquiari puetunu  
tiquiyocuajanaa, jiya puequetujinia”.

<sup>19</sup> Jaara naa pohuatasaaquiariitij, ¿Israel pueyateeri  
Pueyaso rupaa niishiyaaquiari nojori tojishacari?  
Maja. Nojoricuajaari na niishijaca quiquiaari. Nojoriiri  
saaja na ruuretajaca quiquiaari. Supuetana Moisés-  
cuajaari naa naajiotaaquiari Pueyaso sequesano Israel  
pueyara, tariucua na tojiyashijaca nojori quishacari:

“Maninia cua miishacari tiquiyocua quijiacu taucuaca  
nia niti, janiyari nia juaatiniutianiyani. Niaari jiyanoohua  
juaaniutianiya cua jiyanooshacari mosanucua taucua-  
ca”.

<sup>20</sup> Na nuhuaji, supuetana Isaíasri naa maatia seque-  
quiaari Pueyaso niishitiosano nojuaja:

“Cucua jiaatiaashijiacu taucuaca cutaraari cua riuri-  
ataquiaa, cua tojijiacu nojori quiniuria cutara. Naa-  
juhuaj, janiyari cua pajeyashijiacu taucuacaacua mue-  
taquiaani”.

<sup>21</sup> Saniniuujia, Isaíasri naa Pueyaso sequesano Israel  
pueyajini naajiotaaquiari:

“Janiyari puetunu juucajanaa Israel pueyacuaji mase-  
quiaa juucuan, maninia cua miiniu panishacari nojori.  
Nojoriiri saaja cua shocotequiaa, cua tojiyashijiacu  
pueya nojori quishacari”.

**Israel pueyajini curenoori Pueyaso saquiriojosano**

**11** Israel pueya jaara naa Pueyaso tojiyashijiacu  
quia, ¿Pueyasote seetanujuanaa nojori tarinitia-  
canu, na tojiyashijiacu nojori quiniucua? [Maja  
pueyanaa! Janiyacuajaari Israel pueyanojanihuaj.  
Abrahamri cua supuetana. Janiyari na jianu Jacobo  
niyanu Benjamíncuajini supuenoni. <sup>2</sup> Naacuajitij, jani-  
yari niishiyani, Pueyasoori maja na cartenu quiquianu

puetunu tariucuacaanu na saquiriojosano Israel  
pueyajanaa. ¿Niaateeri supuetana Elíasjini naajio-  
tasano niishiyaaquiari? Tariucuacaanu Pueyaso Rupa-  
ajinia naa naajiotasano quiyacuajaari Elías sequesano  
Pueyaso, na tacaashacari Israel pueya quiniucua  
sesa:

<sup>3</sup> “[Cua Jiyaniijianaa, cuarta Israel pueyari puetunu  
quia sequesano caminiujiunaa pueyajanaa puecooru-  
cuaa! [Saa janiyajaari cureyani! Naajuhuj, nojoriiri  
puetunu juhuacutucuajanaa niyarequetarucuaa, tee  
quia tojitiyacua pueya catijiaquiaa na seya  
quiocuaracuajani. [Nojoriiri quiarijia cua pajenuya-  
juhuaj, na motunura janiya!”

<sup>4</sup> Pueyasoori naa Elías riucuaquiari saaja:

“Janiyari siete mil pueya jitiiajaani. Nojoriiri cua tojiti-  
ajaca. Nojoriiri maja na mojoquetaconu quiquiaa cuno  
sacuaraatia shipinishano Baalcuara cua niti, taa narta  
Israel pueya miquiaacuani”.

<sup>5</sup> Quiarijiaari naajuhuj, Pueyasoori secuja na saquirio-  
josano Israel pueyajini jini jitiiaa, jiyanootio na quini-  
ucua. <sup>6</sup> Naa Pueyaso muerasu nojori quishacari saaja  
Pueyaso jiyanooniucua nojori, naacuajiti paari ni-  
ishiyani, majaari Pueyaso saquiriojonu quiquiaari no-  
jori, maninia nojori quiniucua. Nojori jaara maninia  
mijiacu quiquia, nojori maara paniyaquiri na  
jiyanooshaanura.

<sup>7</sup> Naacuajitij, paari niishiyani, Pueyasoori saaja na  
saquiriojosano pueya jiyatequiaa na muerasura. Israel  
pueya saniniuujia, nojoriiri saaja maninia quiniuria  
saniniuujia juucua. Naajaa, majaari nojori naata tama  
na cuaqueyajaaja jiyatenu quiquiaari Pueyaso muera-  
su nojori quiniuria. Cuno pojori jiuujiaari saaja cumaji-  
uujiaacara quiquiaari, tojetaarucuajanaa niishiyashijia-  
ca nojori quiniuria. <sup>8</sup> Tariucuacaanu Pueyaso Rupaajini-  
acuajaari naa naajiotasano quiya:

“Pueyasoori nojori jiyatequiaari niishiyashijiacu,  
maja nojori niishiniuria nojuaja. Naaratej, majaari no-  
jori niishini quijia, nojori niquishacari Pueyaso miis-  
hano. Majaari nojori niishini quijiajuhuaj, nojori to-  
jishacari na rupaa. Israel pueyari naa Pueyaso to-  
jiyashijiacu quiyajaa quiarijiani”.

<sup>9</sup> Supuetana David sequesanoori nojorijini naa naajio-  
tasano quiyajuhuj:

“Pueyasonaa, Israel pueyari puetunu nojori panis-  
hanojuanaa jitiiaa, maninia quia miishacari nojori.  
Saniniuujia, nojori tojiyaquiniucua quiajanija, nojori  
shuquiritasano casaa cuara quiri juhua norijia  
tama nojoririjaaja, nojori saniitiosaanura. <sup>10</sup> Nojori jiu-  
ujia cuara jataara juhua cariyujuaruriria, maja no-  
jori niishiniuria seetanu Pueyaso rupaajanaa. Nojori  
cuara porequetacoora socua, pueyaracaanu taraatia  
nojori miishacari”.

**Pueyaso jiyanooshacari taucuaca, Israel pueya niti**

<sup>11</sup> ¿Niaateeri jiyaniya Pueyasoori Israel pueya carte-  
quiaarijianaa, tojiyashijiacu nojori quiniucua? Maja.  
Pueyaso tojiyashijiacu nojori quiniucua, taucuacaari  
saniniuujia Pueyaso muerasura quiquiaa, nojori tiu-

ushacari Jesucristoocua. Cunoori Israel pueya jiaatian-iquiaa taucuacaacua, Pueyaso muerasu nojori quini-uriahuhaj. <sup>12</sup> Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiu-ushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajinijanaa.

<sup>13</sup> Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujuanaa jiyaramiquishaaquiaari Jesucristo rupaa cua pohuata-nura taucuaca niqiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niqiarani, nojori quiniuria Pueyaso muerasu-juhuaj. <sup>14</sup> Janiyari seetanujuanaa naa miiquiaani cuarta Israel pueya jiaatianura niaacua, nojori tiuniuria Jesucristoocuahuhaj, nojorijianijinio Pueyaso jiyatenura na pueyara. <sup>15</sup> Pueyasoori juhua taanu-iquiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaaruhua, jiyacaritij, jiyanoohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojori juhua macujiniji samiitiaconutaniuhua. <sup>16</sup> Seetanujuanaa maninia nia niishiniuria nio miriqui cua pohu-atanoni, maatia nia pohuatareeraj. Nia tojiri. Co-teenujuanaa pa jiuicotasano neecaru jaara maninia quiri Pueyasora pa niqitiosocoriquiano, tariquiaari puetunujuanaa maniniahuhua Pueyasora. Naajuhuj, naana nujuaca jaara maninia quiri puetunujuanaa, na cashacucuaari maniniuquiucua-juhuaj. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquiaaricuaa nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhuj, nojori jaara tiu-uriquia Jesucristoocua.

<sup>17</sup> Supuetana Abrahamri juhua Pueyaso panishano olivo naana nujuaca. Saniniuujia, na jiniuanuucujinio supueno Israel pueyari juhua na cashacucua. Cuno na cashacucujinijinio jaara Jesucristoocua tiuyaquiquiaari, Pueyasoori na piyotaquiaari. Niajaniya saniniuujia taucuacanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianu-ura. Naa Pueyaso panishano naanaacua nia moriti-asacaritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesano-juanaa supuetana Abrahamra masequiaa tari. <sup>18</sup> Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuqiritianu. Majaari nia jyaniniu niaa cutaraari socua maninia pueya, Pueyaso cartesano Israel pueya-

jiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishiti-ja. Nia nujuaca cutaraari nia rishitiya.

<sup>19</sup> Naa naasucuaari sequeya: "Taaquiririnij. Cuno olivo cashacucuaari canaacuaji piyotasaquiaari, saniniuujia canaa rupotasaanura nocua nojori niti".

<sup>20</sup> Taaquiririnij, seetanujuanaacuaaquinateja nia sequesanojuaj. Saniniuujia nia niishiri, nojori Pueyaso panishano naanajiniji piyotasaquiaari, nojori tiuyaquiniuucua Jesucristoocua. Naaari saniniuujia cuno naanaacua rupotasano quiya, saaja Jesucristoocua nia tiuuniuucua. Naacuajitij, maja tama nia cuaqueyajaaja nia shuqiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucuacanaa, niaa mariqui piyotasaaruhuuri, niaa jaara Pueyaso tojiyashijiacara quiriohua. <sup>21</sup> Pueyaso jaara jiyanoyaquiquiaari na saquiriojosano pueyacuaa, nojori tiuyaquiniuucua nocua, ¿maatucua casaara jiyanoori niajanianijia? Naaacuajaari taucuaca. Naaacuajaari maja na saquiriojosano Israel pueyacujinijio. <sup>22</sup> Naacuajiti pueyanaa, nia niishiri. Pueyasoori jyanohua maninia. Naajuhuj, nojuajaari sanitionu niishijia cutara. Naaratej, nojuajaari na tojtiaashijiacara Israel pueya jiyanoyaquiquiaari. Saniniuujia, nojuajaari jyanohua maninia miiquiaa niajaniya na jiyanooshano pueya nia quishacari, niaa jaara pueyaracaanu nocua tiuujica quiriquia. Niajaniya taucuacanaa, niaa jaara nocua tiuyashijiacara quiriohua, niaari nocuaji rupotananutaniuhua. <sup>23</sup> Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jyanohua cumaacaracacuaja na rupotanutuhua na panishano naanaacua. <sup>24</sup> Niajaniya taucuacanaa, niaari maja seetanujuanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacuajanaa. Naaratej, majaari jiyajeneta Pueyasora, na piyotasano olivo cashacucua na rupotanutuhua tama neyonaacuajaaja, nojori jaara Jesucristoocua tiuujiacara quiriohua.

#### **Pueyaso jatanishacari puetunu Israel pueyajanaa na pueyara**

<sup>25</sup> Taucuacajinijinio cuarta Pueyaso pueyanaa, tariucuaanu pueyari niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jyaniniuria Pueyasoori nia paniya socua Israel pueyajiniji. Naarate cua tojtitiare. Quera puetunu Israel pueyajanaari Pueyaso tojiyashijiacara quiya. Nojori nia quiniutianiya, puetunu Pueyaso saquiriojosano taucuacajinijio pueyajanaa cuara Jesucristoocua tiuurijiaatijia.

<sup>26</sup> Jiyacaritij, puetunu Israel pueyajanaari jiyatesaanutaniya Pueyaso pueyarajuhuj, taa tariucuaanu Pueyaso Rupaajinia naajiotasaquiaaricujani. Naa sequeyari:



“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinio supueno pueya jiuujiajiniji. <sup>27</sup> Naa cua jiyanooshacari puetunu sesa nojori miishanojuanaatej, janiyari jiyacari tohua-teenutaniya tariucuacaanu cua sequesano nojori supuetanaani”.

<sup>28</sup> Quiarjia Israel pueya tiuyaquishacari Jesucristo ru-paacua saniniuujia, nojoriirihuhua Pueyaso paraa, Pueyaso jiyanooniuria niajaniya saniniuujia, taucua-canaa. Naajaa, Pueyasoori cuno Israel pueya paniya-jaa, nojori supuetanaa quiniucua na saquiriojosano pueya. <sup>29</sup> Pueyasoori maja na jaariutianu quijia na niq-uitiosano. Na saquiriojosano pueya jiyanoojaari. Majaari nojori na ruuretano. Pueyasocuaajari Israel pueya saquiriojoquiaari na pueya nojori quiniuria, maninia na miiniuria nojori. <sup>30</sup> Maniniushiquiari, niajaniya taucua-canaa, niaari Pueyaso tojiyashijiaca quijia. Israel pueya tojiyaquiniucua Pueyaso quiarjia saniniuujia, Pueyasoori niaacua taraajequiaa. <sup>31</sup> Nojoriirihuhua Pueyaso tojiyashijiaca quiya quiarjia, Pueyaso taraajenura nojoriicua taa na taraajeya niaacuacaani. <sup>32</sup> Naacuajitij, Pueyasora, puetunu pueyajanaari na tojiyashijiaca quiya, Israel pueya, taucua-canio. Naacuajitij, Pueyasoori na naata jiyanooni nojoriijuhuaaj, nojori tiu-ushacari Jesucristoocua. Pueyasoori maja rimiajata na jiyanooni.

<sup>33</sup> [Pa Pueyasoori jiyanoohua niishijia, maninia na miiniuria! [Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiya? Na miishanoori jiyanoohua jiyajeneta. ¿Cante na naata na niishiniuni? Shaaqui. <sup>34</sup> Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? [Maja! <sup>35</sup> ¿Pueyasoteeri na panishano jiti-aaquiquiaari tamonu niqutionura nojuaja na panishano, na nuhuaji na niqutionuhua? [Maja!”.

<sup>36</sup> Seetanujuanaa puetunu casaajanaacuajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. [Pueyara-caanu pa shuquiritiare pa Que Pueyaso! [Nojuajaari jiyanoohua maninia! [Cuaara naa quiiriatej!

### Saaja Pueyasora pa quirij

**12** Cuarta Pueyaso niquiohuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucuajanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojijiaca nia quishacari. <sup>2</sup> Majaari socua nia quiniu taa Pueyaso tojiyashijiaca quiquiaacuani. Saniya Pueyaso Sohuanu tojijiaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitajaa jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari

Pueyaso panishanotej, niaari niishiniutianiya, cunoori tojetaarucuajanaa jiyanoohua maninia.

<sup>3</sup> Jiyanoojia Pueyaso quiniucua, nojuajaari cua jiy-atequiaari Neyanujiniji pohuatana cua quiniuria. Naaratej, puetunu niajanijajanaa cua tojitiare quiarjia. Naa jaara Pueyaso cumaaca masequiaari nocua nia tiuushacari, nojuajaari puetunu niajanijajanaa jiy-atequiaari tamaatia poonijosano miijiaca nia quini-uria. Naaratej, majaari tama nia cuaqueyajaaja nia jiy-atenu paniniu socua maninia quijia nia quiniuria tamasaajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuriacuajani. <sup>4</sup> Pa cuaqueya-jiniacuma, paari queraatia tamaatia casaa jitiiaani. Puetunu cunojuanaari tamaatia miiniu niishijia, maninia pa quiniuria. <sup>5</sup> Paari naajuhuaaj, taa pa jini-acuma casaacuani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa mi-itioonura.

<sup>6</sup> Naatej, taa pa cuaqueyajiniacuma casaa tamaatia poonijosano miiniu niishiyacuani, naajuhuaaj, Pueyasoori puetunu na muerasujanaa na cumaaca niq-uitioquiaa, tamaatia miiniu niishijia pa quiniuria. Naaratej, cante Pueyaso cumaaca jitiiaani, Pueyaso niishitishano nojuaja na pohuatanurani, nojuaja cuara seetanujuanaa pueya niquiara pohuataara na taacanyaquiniutia. <sup>7</sup> Naajuhuaaj, cante Pueyaso cumaaca jitiiaa pueya na naacunurani, nojuaja cuara maninia naacuura pueya. Naajuhuaaj, cante Pueyaso cumaaca jitiiaa Pueyaso rupaa niishitiojona na quiniuriani, nojuaja cuara maninia niishitiojoora Pueyaso rupaa pueya niquiara. <sup>8</sup> Cante Pueyaso cumaaca jitiiaa pueya na shiniujuniuriani, nojuaja cuara pueya shiniujiu-uria, maja pueya cartenura Pueyaso rupaa. Cante na jiti-asanojiniji nareja niqutionojua casamijiuniucua pueyani, nojuaja cuara juhujaniya niqutionoora nareja, nojori na paniniutia. Naajuhuaaj, cante Pueyaso pueya jitianani, nojuaja cuara jitiiaa Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuara shuquiriaatia na naacuuranj.

### Pueyaso tojijiaca nia quiri, taa Pablo rootacuajani

<sup>9</sup> Seetanujuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniuria nia tarinitianu cutara. <sup>10</sup> Jiyanoohua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

<sup>11</sup> Tama nia cuaqueyajaaja nia cumaquiri maninia nia poonijionura pa Jiyaniijara. Majaari taajecori nia quiniu.

<sup>12</sup> Shuquiriaatia nia quiri pueyaracaanu, nia niishishacari taa Pueyaso miiniutianiya jiyanoohua maninia na muerasuni. Saaja juhujaniya nia re-jeretare niaa jaara naquiya miishaare. Pueyaracaanu

Pueyaso nia secojore. Majaari quenaaja nia tarinitianu na secojonu.

<sup>13</sup> Niarta Pueyaso pueya jaara na panishano jiitiaaquri, nareja nia niqutiore nojori nia jiitiasanojiniji. Naacujitij, nojori jaara rucoonaa quiri, nojori nia ma-suure nia tiacora.

<sup>14</sup> Naa jaara naquiya miishaariquia, majaari nia mitianaa nia sesacanu. Saaja nia secojore Pueyaso nojoriicuara, Pueyaso taraajenura nojoriicuara.

<sup>15</sup> Cante shuquiriaatia quiyacuaani, nojoritia nia shuquiririjihuaj. Saniniuujia, cante nujuqueyacuani, nojoritia nia nujuquerejuhuaj.

<sup>16</sup> Jiyanoootiojuaca nia quiriquia, jatiqui nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuaj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

<sup>17</sup> Naa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuaara quiria maninia puetunu pueya niquiarajanaa.

<sup>18</sup> Maninia nia quiri puetunu pueyatajanaa, majaari nojori ruutaquenu niaacuara. <sup>19</sup> Socua cua tojitiare cua panishano cuarta Pueyaso pueyanaa. Naa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajaari niaacua naminiutianiya nojori. Pueyaso sequesanojuajaari naa naajiotasano quiya na rupaajinia:

“Quiria nia tarinitiare puetunu sesa nojori miishanojuanaa nijaniya. Janiyacuajaari nojori naminiutianiya niaacuani”.

Cua tojiri. Pueyasojuaacuajaari naa sequequiaari.

<sup>20</sup> Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaricuajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaj, quia raatorenoj. Quiaa jaara naa na miiritij, tama nojuajaarijia jiyanojua caririquiniutianiya noojiajinia”.

<sup>21</sup> Naacujitij, naa jaara sesa miishaariquia, majaari nia juaaniu, naa mariqui sesa miijiara quirijaariuhuaj. Saaja maninia nia miiriquia nia paraca. Naacujitij, ni-aari Sesaaca shocotanutaniya.

### Pa jiya jiyaniijianucua tojijiaca pa quirij

**13** Pueyanaa, mijiria nia jiyaniijianucua tojtiajaca nia quiri. Nojoricuajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri. <sup>2</sup> Naacujitij, cante mijiria jiyaniijianucua tojiyashijiani, nojuajaari jiyaniijiaara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. <sup>3</sup> Paa jaara maninia miijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja

na pueretenu maninia miijiaca. Sesa miijiaca cuaara na puerera cutara, sesa miijiaca nojori quiniucua. Saaja maninia miijiaca nia quiri. Naacujitij, nia jiyaniijianucuaari maninia poojotanutaniya nijaniyajiniji. <sup>4</sup> Nojoricuajaari Pueyasora poonijionaa, maninia nojori jitianura nijaniya. Saniniuujia, naa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa miijiaca nojori saniitionura. <sup>5</sup> Naacujitij, nia jiyaniijianucua tojijiaca nia quiri maja nia saniitiosaanura, naajuhuaj, maja Pueyaso tojiyashijia nia quiniuria. <sup>6</sup> Naajuhuaj, nia cumaneecajiniji nia niqutiore nia jiyaniijianucua, taa nojori sequequiaa nia niqutionuracuajani. Nojoricuajaari Pueyasora poonijioquiaa pueyaracaanu, maninia nojori jitianura nijaniya. Naaratej, nojoriiri cumaneeca masequiaa nijaniyajiniji.

<sup>7</sup> Naaratej, puetunu nojorijianaa nia niqutiore, taa nojori sequequiaa nia niqutionuracuajani. Naacujitij, naa jaara sequesaa nia cumaneecajiniji nia niqutionura nia jiya jiyaniijiaara, nareja nia niqutiore. Naajuhuaj, cumaneeca jaara jiya jiyaniijiaara masenu cojiritiasaa, casami nia masesacari, majaari nia juaaniu. Naajuhuaj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuaj, nia jiyaniijianucua tojijiaca nia quiri, nojori quiniucua Pueyaso jiyatesano nia jiyaniijianucua.

<sup>8</sup> Pueyanaa, majaari najuhuaana casami nia poonu, naa jaara cumaneecaaju quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijia nia quiri cutara. Naacujitij, cante narta pueya panijiani, nojuajaari Moisés Rootasano tojijia cutara. <sup>9</sup> Supuetana Moisés-cuajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jiitiasano casamiicua jiaatiaja nia quiniu”.

Socua queraatia na rootasanoori quiya. Niocuajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojijia quirini, paari tari puetunu na rootasanojuanaa tojijia quiyani.

<sup>10</sup> Cante seetanujuanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojijia cutarani.

<sup>11</sup> Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiarjia socua cateca quiya paa jaara nocua tiuuquiaarini. Naaratej, cante juhua maqueyajaani, nojuaja cuaara niucuaara, pa Jiyaniijiaara na poonijionura. <sup>12</sup> Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquiuhua. Nojuaja cutaraari na cumaacata pa cuhatanutaniya. Naaratej, puetunu

sesa pa miiniujiana pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuaj. <sup>13</sup> Seetanujuanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhuashiqui quijiaca. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jiidiniu. Majaari juayonuujutajaca nia quiniujuhuaj. Naajuhuj, majaari tamonu pueyano jiidiasano casaacua nia jiaatiano. Naajuhuj, majaari nia juaaniu tamonu jaara nia shocotare. <sup>14</sup> Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jiidianura, na cumaicano. Naa nia miishacaritij, niaari juhua soldadohua miaquetoojotaja toque cushiojua, maja Sesaaca miitiniuria sesa niajaniya.

#### Maja quarta Pueyaso pueyacuara nia rimiaaquenu sacuaraatia

**14** Pueyaso pueyajiniinio pueyano jaara Pueyaso rootasanojiniji taacanuuju quiri quia pueyaraaanu, naajaa, na rupuejaca nia quiri. Majaari nata nia juayonuujutano tamaatia na niishiriojosacari Pueyaso rootasanojiniji. <sup>2</sup> Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. <sup>3</sup> Cante puetunu casaajanaa miaqueja cutarani, nojuaja cuaara soyaquiiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaaquiiiria puetunu casaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuaj. <sup>4</sup> ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuajaari cumaacaraca, na muerasu na jiyatenura maninia quijiaca nojori quiniuria.

<sup>5</sup> Cua tojiri pueyanaa, noojiaqueya Pueyaso muerasujiniinooi niquiriyatu juuca semaanajiniiji jiyatequiaa nojori maninuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maninuhuaqueetanura. Puetunu nijaniyajanaa cuaara taacanuyaquiiiria tama nia miishanojinijiaaja, maja nia macuhujetenura nioojia.

<sup>6</sup> Cante niquiriyatu juuca semaanajinia jiyatequiaa samaatenu juucara Pueyaso na maninuhuaqueetanu-

rani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

<sup>7</sup> Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. <sup>8</sup> Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiidiasanoni. <sup>9</sup> Jesucristocuajaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuaj. Naacuajitij, nojuajaari pa Jiyaniijiajanaa cutara.

<sup>10</sup> Naaratej, saaja niquiriyatu Jiyaniijia pa jiidiasacari, ¿paatucua casaara parta Pueyaso muerasu soojeaca quirini, nojori miaqueyaquiniuucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujatejosaanutaniya Pueyaso tacojini, Pueyaso nequesoreenura pajaniya. <sup>11</sup> Tariucuaaanu pa Jiyaniijia sequesanoori naa naajiotasano quiya na rupajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijanaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’”.

<sup>12</sup> Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoresacari pajaniya.

#### Maja sesa pa miitiniu parta Pueyaso pueya

<sup>13</sup> Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijia quiri parta Pueyaso pueyajiniiji saniniunijia. Tama nia cuaqueyajaaja nia cojuare maja niarta Pueyaso pueya niqiiara nia miiniuria nojori jiyaniishano sesa casaa. Nojori jaara saniri miiniu nia miishanocuaa, naacuajitij, niaari tari sesa miitirii nojori Pueyaso niqiiara. <sup>14</sup> Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niqiiara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquiiirianoj. Jaara na pueresano saniri miaquenu, nojuajaari tama noojiaaja macuhujanutaniya. <sup>15</sup> Naacuajitij, paa jaara parta Pueyaso pueyano macuhujetere pa miacquenuucua na miaqueyaquishoo casaani, majaari seetanujuanaa parta Pueyaso pueyano panijia pa

quiniu. Jesucristocuaajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? <sup>16</sup> Naacuajitij, majaari nia shanacunu Pueyaso tojiyashijiaca pueya sesacanura Pueyaso rupaa, nia miaquesano casaacua nia juayonu-ujutanuucua niarta Pueyaso pueyata. <sup>17</sup> Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquiniuucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiaca pa quiniuria, jatiqiu pa quiniuria juhujaniya. Pa panitiaajaariuhua shuquiri-aatia quijiaca pa quiniuria. Paacuajaari na Sohuanu jitiiani, naa maninia pa quiniuria. <sup>18</sup> Paa jaara naa quijiacu quiriqiuani Cristora pa poonijosacari, Pueyasoori pa shuquiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

<sup>19</sup> Naarate cuarta Pueyaso pueyanaa, jiyanoohua nia saniniujiuri taate nia naata maninia rupuetosano quiniu puetunu niarta Pueyaso pueyatajanaani. Naacuajiti nia naata tama cumaquitioonuuaaja maninia Pueyaso muerasu nia quiniuria. <sup>20</sup> Majaari nia sesonu Pueyaso miishano niarta Pueyaso pueya jiuujijiniya, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaqueso-coriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetosano quiniu niaa jaara nia miishano-ta taraajoriquia niarta Pueyaso pueya. <sup>21</sup> Naacuajitij, socua maninia juhujari maja pa miaquenura parta Pueyaso pueya pueresano casaa. Naajuhujaj, majaari pa ratunu jereeca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhujaj, pa cartere puetunu parta Pueyaso pueya jiyanihano sesa miiniu casaajanaa, maja nojori pa taraajonura nojori ruparetanura pocuaji. <sup>22</sup> Naacuajitij, Pueyaso Rupaacua nia tiushacari seetanujuanaa, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyanani na miishocoriquiano casaari maninia Pueyasora, maja noojia na macuhajetenura na miiniu nuhujaji. <sup>23</sup> Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacujani. Paa jaara casaa miaquere seetanujuanaa pa tiuyaquiniutia Pueyasooocuanu, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojaari macuhajenutaniya.

### Parta Pueyaso pueya pa shuqiritiri, maja tama pa cuaqueyajaaja

**15** Noojiaqueya parta Pueyaso muerasuuri juhuanujuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjia-cacuaani, pajaniya cuaara nojori rejeretaara juhujaniya. Paa jaara socua Pueyaso Rupaa niishijia-cacuaani, nojori pa cumaquiri. Majaari pa niishiriojonu tama pa cuaqueyajaaja pa shuqiritiniuria tamajaaja.

<sup>2</sup> Puetunu pajaniyajanaa cuaara niishiriojora taate pa naata parta Pueyaso pueyano cumaquiniuni, shuquiri-aatia na quiniuria, maninia Pueyaso tojjia na quiniurijuhujaj. <sup>3</sup> Paacuajaari niishiyanani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuqiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacuajitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quenaa, cuno pojori, canapuate quia sesacajacani, nojoriiri cua sesacaajuhujaj, cua miiniuucua quia panishano”.

<sup>4</sup> Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaariuhujaj. Naacuajitij, paari juhujaniya sashiya pa Jiyaniijiani. <sup>5</sup> Pueyasocuaajaari pa cumaquinia, maninia rejeretajaca pa quiniuria, cumanijiasano pa quiniurijuhujaj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. <sup>6</sup> Naacuajitij nia naata pa Que Pueyaso, mariyata pa Jiyaniijia Jesucristo maninihuaqueetanu, juhua niquiriyatu pueyano, maninia rupuetoojuaca nia quishacari.

### Pueyaso rupaari maja saaja Judiocuacara

<sup>7</sup> Pueyanaa, jyanootioojuaca nia quiriqiu, taa Jesucristo jyanooquiaa pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucuacata Pueyaso maninihuaqueetaano jatiqiu.

<sup>8</sup> Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. <sup>9</sup> Judiocuacara Cristo miishanoori taucuacara quiquiaarijuhuaj, nojori maninihuaqueetanura Pueyaso, na jyanoonuucua nojorijuhujaj. Tariucuacaanu Pueyaso Rupaajinia supuetana David naajiotasanoori naa quiyajuhujaj:

“Maninia quia miiniuucua janiya Pueyasonaa, janiyari quiajaniyajiniji poojotanutaniya maniniani taucuaca

jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

<sup>10</sup> Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucucanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

<sup>11</sup> Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maniniuhuaqueetare, puetunu niajanijajanaa, tamaatia rupaaca pocuajaca taucucanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

<sup>12</sup> Supuetana Isafas naajiotasanojinijijuhuj, paari niishiyani Pueyasoori taucuaca jiitianu panijia pueyaraanu, maja saaja Judiocuaca. Naaratej, Isafasri naa naajiotajiaari:

“Supuetana Isaí niyanujiniji supuenutaniyari pueya Jitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucucajanaari nocua tiujujaca quiniutianiya”.

<sup>13</sup> Pueyasocujaaari poojiajinia poonijiojua, juhujaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiria jiyanojua. Naajuhuj, nojuaja cuara nia jitiaara juhujaniya, canapueete nocua tiujujacacuajani. Naacuajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari niajaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

<sup>14</sup> Cua panishano Pueyaso niquiohuanaa, naa cua naajiojinia cua nacasusacari jiyanojua niajanijatej, majaari nia jiyaniini janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijia. Niaacuajaari Pueyaso rupaa niishijiacajuhuj. Naacuajitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niquiara. <sup>15</sup> Naajaa, quiarjia janiyari niaacuara naajiyani cua niishitiniuhua niajanijatej tarijia nia niishishano. Cua jyanootiuri, nio cua naajiojinia jiyanojua cua nacasunuucua niajanijatej. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucuaca cua pohuatanura na rupaa. <sup>16</sup> Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucucani. Naacuajitij, Pueyaso Sohuanu poonijionuucua nojori jiuujajinia, nojoriiri Pueyaso shuquiritasano muerasu quiniutianijuhuj.

<sup>17</sup> Pueyasora cua poonijiosacari, janiyari jiyanojua timitiaa Jesucristoni, cua niquishacari taa taucuaca tiuquiaa na rupaacuanu. <sup>18</sup> Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiuutiquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara.

<sup>19</sup> Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniji tari pohuataquiaari puetunu tiquiyocuajanaani, Jerusalén tiacajiniji, puetunu Iliria jiyajinijajanaano. <sup>20</sup> Naa cua pohuatasacari pa Jiyano Jesucristojiniji puetunu cunora jiyacajinijatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiaari juhuanujuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojinijini. <sup>21</sup> Naa cua pohuatasacari Jesucristojiniji cunora pueya niquiaratej, janiyari nio tariucuacaanu Pueyaso Rupaajinia naajiotasano tohuateeriquiaani. Naa sequeya Jesucristojinijiri:

“Nojuajiniji pohuatasoojua pueyari nojuajiniji pohuatasanutaniya. Nojoriiri jiyacari niishiniutianiya cante nojuajani”.

#### Pablo naquerejosacari Roma tiacajiniara

<sup>22</sup> Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuucua cua quianura. <sup>23</sup> Quiarjia cutara, janiyari Jesucristojiniji pohuatanu tucutarucuaa tarini, tee Jesucristo rupaa tojiyaquishaaquiaari juhuanujuajacuajani. Janiyari Espania jiyajinia pohuatanu panijia Jesucristojinijijuhuj. Queraatia marijiaari tari cua shocojocanu pueyaracaanu cua naquerejosacari niaacua cua quianura. <sup>24</sup> Naacuajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiya nia naacunura janiya, cua quianura Espania jiyajiniara. <sup>25</sup> Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niquitionuhuaa cumaneecani, niya quiniaa parta Pueyaso pueya niquitiojosano nojoriiri. <sup>26</sup> Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanojua maninia miya. Nojoriiri tama niishirionuucuanujuaaja nareja na cumaneeca niquitiojonura Jerusalén tiacajinia quiniaa casamijuniucua Pueyaso pueyara. Cunora, nojoriiri quiarjia na rerateya cuata na jiyarosocoriquiano. <sup>27</sup> Nojoriiri naa miya nojori niishiriojosacari, maniacuajaari nojori naacunura narta Pueyaso pueya. Seetanujuanaa maniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasanoori taucuaca niquiara. Naaratej, taucuaca cuara saniniuujia quiarjia naacuura casamijuniucua Judiocuaca, nojori jitiyasano cumaneecata. <sup>28</sup> Naacuajitij pueyanaa, janiyari nojori jiyarosocoriquiano cumaneeca niquitionutaniya Jerusalén tiacajinia parta Pueyaso pueya jitiianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutianiya cua niquiniuria niajanijatej. <sup>29</sup> Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

<sup>30</sup> Cuarta Pueyaso pueyanaa, cua Jiyaniijia Jesucristo nia jiitianuucujuhua, mariyata Pueyaso Sohuanu panitiootesacari pajaniya, janiyari jyanohua paniyani nia cojiniuria janiya, Pueyaso nia secojonuta cucuara.

<sup>31</sup> Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhua, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. <sup>32</sup> Naajuhua, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuani. <sup>33</sup> Pa jyanoojia Pueyaso cuaara maninia jiitiaara puetunu niajaniyanaa. Cuaara naa quiiriatej.

### Nata quiniaata Pablo saruhuatasacari nojori niishishano pueya

**16** Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cenrea tiacajinia Pueyaso pueya maanu naacujua maninia. <sup>2</sup> Pa Jiyaniijia panijia nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiiti aquiaacuaa parta Pueyaso muerasuni, maninia na quiniuria na camueenuusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuaa. Cua naacujuaariuhua.

<sup>3</sup> Quiria nia sarhuatatare Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura. <sup>4</sup> Nojoriiri tama nojori cuaqueyajaaja panitiquiaari cucuara, nojori tacunura cucuaji cua moyaquishaanura. Janiyari cunora jyanohua nojori timitiaani, naa nojori jyanootiuniuucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajiniujuaanaari nojori timitiaajuhua, naa nojori miiniuucua. <sup>5</sup> Quiria nia sarhuatatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia sarhuatatarejuhua cua rupuena Epéneto. Nojuajaari coteenujuanaa Jesucristoocua tiuquiaari Asia jiyajinia. <sup>6</sup> María nia sarhuatatare quiriujuhua. Nojuajaari jyanohua poonijioquiaari niaara. <sup>7</sup> Quiria nia sarhuatatarejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhua. Andrónico, Junias, nojoriiri socua coteenu janiyajiniji tiuquiaari Jesucristoocua.

<sup>8</sup> Nia sarhuatatarejuhua Ampliato. Nojuajaari cua panishano pueyano, Jesucristoocua na tiuuniuucua. <sup>9</sup> Naajuhua, quiria nia sarhuatatare Urbano. Nojuajaari pa Jiyaniijia Cristora poonijionajuhua. Cua rupuena Estaquis nia sarhuatatarejuhua. <sup>10</sup> Apeles nia sarhu-

atatare quiriujuhua. Nojuajaari puetunu casaajanaa rejeretaja cutara, Jesucristoocua tiuujia na quiniuucua. Aristóbulo tiajinia quiniaa pueya nia sarhuatatare quiriujuhua. <sup>11</sup> Naajuhua, quiria nia sarhuatatare Herodión, parta Judio pueyano. Naajuhua, Narciso tiajinia quiniaa pueya nia sarhuatatare quiria, noo pojori pa Jiyaniijia aacua tiuujia pueyatej. <sup>12</sup> Trifena nia sarhuatatare quiria, Trifosajuhua. Cuno maajipohuari pa Jiyaniijia poonijionuujua. Naajuhua, pa panishano maaji Pérsida nia sarhuatatare quiria. Nojuajaari jyanohua poonijiojua pa Jiyaniijia. <sup>13</sup> Rufo nia sarhuatatarejuhua. Nojuajaari maninia tojjia pa Jiyaniijia. Na nua nia sarhuatatarejuhua. Nojuajaari juhua cua nua quiquiaari quiria. <sup>14</sup> Nio pojori quiria nia sarhuatatarejuhua, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. <sup>15</sup> Naajuhua, nio pojori nia sarhuatatare quiria, Filólogo, necocua Julianio, Nereo, na rimiatunio, Olimpasjuhua, mariyata nojoritia quiniaa parta Pueyaso muerasunio.

<sup>16</sup> Niarta Pueyaso pueya nia sarhuatatare seetanujuaana nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua sarhuatanura niajaniya.

<sup>17</sup> Cuarta Pueyaso pueyanaa, nia numooteyanijia, jyanohua nia cojuare tama nia cuaqueyajaaja najuhua tamaatia niishitiojonuujuaa pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacuajitij, Pueyaso pueyari juaatioquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupajanaa cutarani. Naa sesa niishitiojonuujuaacuaji nia rupatere. <sup>18</sup> Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhua shanohua nojori pohuatasanota, nojoriiri niishiyashijia pueya sapojoquiaa. <sup>19</sup> Puetunu tamonu jiyacajiniujua parta Pueyaso pueyajanaari niishiya, niaari seetanujuanaa Jesucristo rupaa tojitiacajia cutara. Naaratej, janiyari jyanohua nia timitiaani. Naajuhua, janiyari paniyani niishijia nia quiniuria, saaja seetanu rupajanaa tojjia nia quiniuria, maninia miijia nia quiniurijuhua. Saniniuujia, sesa niishitiojosano niishiyashijia nia quitiriquiani, maja sesa miijia nia quiniuria. <sup>20</sup> Naacuajitij, poojia cajitijia Pueyaso nia cumaquiniutianiya, Satanás nia shocotanura na sapojosacari niajaniya juucua. Niaari juhua na tana-cunutaniya jiyocuara, Pueyaso tojjia nia quiniuucua. Pa Jiyaniijia Jesu cuaara nia cumaquiiria, shuquiriaatia nia quiniuria.

<sup>21</sup> Timoteo, cuata poonijiona Jesucristorani, nojuajaari cua sequeya nera cua sarhuatanura niajaniya. Cuarta Judiocuaca Lucio, Jasón, Sosípater, nojoriiri nia sarhuataajuhua.

<sup>22</sup> Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia sarhuataajaniuhua Cristoocua tiujia cua quishacarijuhua. Niojuanaa, pueyanaa.

<sup>23</sup> Parta Pueyaso pueyano Gayoori nia saruhuataajuhuj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquijiosacari nio tiacajinia. Parta Pueyaso pueyano Erastoora nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoora nia saruhuataajuhuj.

<sup>24</sup> Pa Jiyaniijia Jesucristo cuaara cumaquiiria puetunu nijaniyajanaa.

**Pablo maniniuhuaqueetasacari Pueyaso, quera na tu-  
cuatasacari na naajio**

<sup>25</sup> ¡Pueyanaa, jyanohua pa maniniuhuaqueetare pa Pueyaso! Nojuajaari na naata cumaquiniu nijaniya, seetanujanaa na muerasu nia quiniuria na rupaacua nia tiuushacari. Janiyari naa rootaquiaa nijaniyacua-jani, cua pohuatasacari Jesucristojiniji. Pueyasojua-naacuajaari tarijia cua niishitiquiaari Neyanu Jesu-

cristojiniji cua pohuatanura. Jiya shipiniyaquishaacari-jijojua, Pueyasoori jiyasohua tamajaaja na niishishano jiitiaja Neyanu Jesucristojiniji. <sup>26</sup> Saniniuujia, quiari naataja, paari niishiquiaarini, Jesucristocuaajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujuniaa naajionuutasanojiniji paari quiarijia seetanujanaa na niishiya cutarani. Pueyaracaanu Quijia Pueyasocuaajaari naa paniquiaari quiarijia pa niishinuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiara-janaa, Neyanuucua nojori tiuuniuria. Naa na pohuataniquiaariiri Neyanu Jesu tojjijaca nojori quiniuria, Judiocuaca, taucuacanio.

<sup>27</sup> Pa Pueyasoori jyanohua niishijia cutara. ¡Pueyara-caanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyara-caanutej.

# 1 CORINTO

## Pablo saruhuatasacari Corinto pueya

**1** Corinto tiacajinia quiniaa Pueyaso muerasunaa, ¿niaate quiyajaa? Janiya, pa tarajanu Sósternesjuhuaj, canaari nia saruhuataani. Janiya Pablóni, Jesucristo jiyarosano na rupaa cua pohuatanura taa Pueyaso paniquiaaricuajani. Canaa niaacuara naajiyani, socua canaa niishitiojonura niajaniya, Pueyaso saquiriojosano pueya nia quiniuucua. Niaari maninia quiya Pueyaso niquiara, Jesucristo nia rupuesacari. Niaari seetanujuanaa Pueyaso muerasu, puetunu jiyacajinia pueyatajanaa, canapuede Jesucristoocua tiuujiacacuajani. Jesucristocuajaari nojori Jiyaniijia, pa Jiyaniijajuhua. <sup>3</sup> Pa Que Pueyaso, pa Jiyaniijia Jesucristo cuara cumaquiiria niajaniya, juhuajaniya nia quiniuria.

## Paari maninia miishaaquiaani Cristo pa rupuesacari

<sup>4</sup> Maninia nia quiniuucua, janiyari pueyaracaanu Pueyaso sequequiaani "Paacarasho". Pueyasocuajaari jyanohua maninia miiquiaari niajaniya, nia rupuesacari Jesucristo. <sup>5</sup> Nia rupuesacari Jesucristo, Pueyasoori puetunu cumaquiiaarijianaa niajaniya na cumaacata, nia poojotanura puetunu na rupaa-janaa, puetunu na rupaajanaa nia niishiniuriajuhuaj. <sup>6</sup> Maninia nia tojitiasacari Cristojiniji pohuatasano, niaari maninia miishaaquiaari taa canaa sequequiaari niajanuacuajani. <sup>7</sup> Naacuajitij, niaari tari masequiaari puetunu Pueyaso niqutionu panishanojuanaa, maninia na muerasu nia quiniuria, nocua nia jiaatianuta nia sashishacari pa Jiyaniijia Jesucristo tiuquishacariuhua. <sup>8</sup> Pueyasoori nia cumaquiniutianiya pueyara-caanu, maja quenaaja niaacua casaa tiuutiasoo quiniuria, sesa nia miishanojiniji. Naacuajitij, pa Jiyaniijia Jesucristo jaara tiuquiriohua na ruuretajaca na sanitionura, niaa cutaraari juhuajaniya quiniutianiya. <sup>9</sup> Pueyasocuajaari maninia tohuateequiaa na sequesano. Nojuacuajaari pa sequequiaari pa cojiniuria Neyanu, maninia pa miishaanura Neyanutajuhua. Cuno Neyanuni, nojuacuajaari pa Jiyaniijia Jesucristo.

## Pueyaso muerasu juhua tamasa niquitioquiaari

<sup>10</sup> Cuarta Jesuucua tiuuniaanaa, cua tojitiare. Pa Jiyaniijia Jesucristoori cua sequeteya nio. Maninia nia niishiriojore. Maja juhua tamasa nia niquitioonu. Maja tamasa niajaniya. Maninia nia niishiriojore, maja tamaatia. Nia jiuujiaatioorejuhua. <sup>11</sup> Naa nia sequeyanijia cuarta Jesuucua tiuuniaanaa, Cloe niquio-

hua pohuatanuucua janiya niajanuajiniji. Nojoriiri cua sequerucuaa niaana juayonuujutaquiaa. <sup>12</sup> Naa pohu-atasaarucuaa niajanuajinijinia: puetunu pueyajanaana tama sequequiaajaaja: "Canaari Pablo pueyani". Tamasacanaari saniniuujia sequequiaacuaja: "Canaari Apolo pueyani". Tamasacanaari sequequiaajaacuaja: "Canaari Pedro pueyani". Tamasacanaari sequequiaajuaja: "Canaari Cristo pueyani". ¿Naatee pueyanaa? ¿Casaara tamajaaja naa nia raquitiiquia-nuni? <sup>13</sup> ¿Majateeri nia niishiniu? Paari Jesucristo cuaqueyani. ¿Pa Jiyaniijia cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari moojiniajuhuaj? [Maja, cuarta Pueyaso pueyanaa! <sup>14</sup> Janiyaquiiri namitia nia tiuquinijiaquiaari moojiniani. Naacuajitij, majaari nia naata sequenu niaa cua sesajinia tiuquini-jiosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. <sup>15</sup> Naacuajitij, majaari quenaaja tamonu na naata sequenu janiyari na tiuquiniquiaarini. <sup>16</sup> Quera niyajetaanijia. Janiyari Estéfanas tiuquinijioquiaarijuhua necohuatajani. Majaaruha socua pueya cua tiuquinijionu quiquiaari.

<sup>17</sup> Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyarokuvaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaari. Cuara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

## Cristoori Pueyaso cumaaca jiitaa, Pueyaso niishitiajuhuaj

<sup>18</sup> Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohu-atasano shaajecoriquiano pueyara. Naajaa, Jesucristo rupaari Pueyaso cumaacaracacuaja na tojitianaara, Pueyaso muerasura na jataniniuria pajaniya. <sup>19</sup> Pueyaso sequesanoocua nia naajiotasaaquiaaritia: "Janiyari niishijaca niishishano cushionutaniyani. Mijiria pueya niishishano jiyatenutaniya najuhuanaranijia". Naacuajitij, cante mijiria pueya niishishanoocua tiuyani, nojuajaari maja na jiyanooshaanu quiniutianiya.



<sup>20</sup> ¿Pueyanoteeri jiyanoohua niishitiajaraca Pueyaso muerasura na jataniniuria pajaniya? [Maja! Niishijia-janaa jaara jiyanoohua niishiriojore, ¿pa naatate na sequesanoocua tiuuniu, Pueyaso na jyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiu-ushacari? Maja. Naacujitij, puetunu mijiria niishishanojuanaari najuhuana quiya Pueyasora. <sup>21</sup> Pueyari maja na naata Pueyaso niishiniu quiquiaari tama nojori niishitijatajaaja. Pueyasoori tama sequequiaarijaaja na niishitijata cutara:

“Jaaja. Maninia naatej. Pueya jiyanooriiri saaja nojori tiushacari cua Niyanuucua”.

Pueyari saniniuujia jiyaniya Jesucristo rupaari nareja sequesanojuhanajaj, tojishoo. <sup>22</sup> Naaratej, cuarta Judocuacari maja Jesucristoocua tiuuniaara na quiniuritia. Nojoriiri Pueyaso cumaacata miishano niquini paniquiaa coteenu saaja. Cunora, nojoriiri canaa tojitiaaquiuaa canaa pahuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijiaranotucua casaara naa cararaatia mosaareni?” Griego pueyari naajuhujaj. Majaari ritia nojori quini paniniu Jesucristoocua tiuuniaara. Nojoriiri saaja niishiniuucua jiaatijaca. Nojoriiri jiyaniya Jesucristoori najuhuana cusoquiaari juhua moseeca. Naacujitij, canaa pahuatasacari Jesucristo niyacutesanojinia mosaaquiaari, Judocuacaari jiyaniya Jesucristoori cumaacaju quiquiaari. Nojoriiri jiyaniyajuhaaj Pueyaso Jiyarosocoriquianoori ritia Judocuaca jiyaniijara quiniutianiya cutara. Majaari na niishitiniuni quijia Cristo cuara coteenu miishaaria naquiya, jiyanooshano nojori quiniuria sesa nojori miijiosanojiniji. Griego pueyari canaa pahuatasano tojiaquiuaajuhujaj. Nojoriiri jiyaniya Pueyasoori niishiyashijia quiquiaari Neyanu na motenura. <sup>24</sup> Paa cutaraari niishiyani Cristoori pocuara cusoquiaari. Naacujitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judocuaca, Griegohuanio. [Pueyasoori jiyanoohua niishijia cutara! <sup>25</sup> Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacujiti Pueyasoori pa jyanooquiaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhaaj, Pueyasoori cumuecaaju quiquiaari Cristo cusosacari niyacutesanojinia. Naajaa, naacujitij, [Cristoori Sesaaca shocotaquiaaricuaaja! Pueyasoori jiyanoohua socua cumueca pajaniyajiniji.

<sup>26</sup> Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquiarani, Pueyaso sequesacari najaniya na muerasu nia quiniuria. Saaja secaja najaniyajinijinoori niishijiaa quiriquiaa. Saaja secaja najaniyajinijinoori tojishano pueya quiriquiaajuhujaj. Saaja secaja najaniyajinijinoori jiyaniijianucua niquiohuacuajinio supueno quiriquiaa. <sup>27</sup> Mijiria quiniaa pueyara, Pueyasoori socua niishiyashijia pueya saquiriojoquiaari, na muerasu nojori quiniuria. Naacujitij, mijiria niishijiaari tama-

jaaja caririquiniutianiya nojori jaara saquiriojijiaquishaare. Pueyasoori tojishoo pueya saquiriojoquiaarijuhuaj, na muerasu nojori quiniuria, mijiria tojishano pueya caririquiniuria nojori jaara saquiriojijiaquishaare. <sup>28</sup> Pueyasoori soosano pueya saquiriojoquiaarijuhuaj, tojishoo pueyano. Pueyasoori naa saquiriojoquiaari najuhuana quijiaa. Canapuate tama na cuaqueyajaaja jiyaniya cutara pueyanoni, cuno nojoriiri saniniuujia quejoosaanutaniya. <sup>29</sup> Naacujitij, majaari quenaaja jiyanoohua pocuaja cureenu quiniutianiya Pueyaso niquiara. Tojetaarucujanaa shaaquiiri pocuajaca quiniutianiya. <sup>30</sup> Pueyasojuaanaacuajaari nia rupetequiaari Jesucristo. Naacujitij, niaari Pueyaso niishitijia jitiaa. Nia rupesacari Jesucristo, niaari maninia miijia quiya Pueyasora. Pueyasoori nia jatania saa na tojijiacaraja nia quiniuria, juhua Neyanu nia quiniurijuhujaj. Najaniyari puetunu jeecasaanutaniyajanaa. Paari naa miishiyani Jesucristo pa rupesacari. <sup>31</sup> Seetanujuaanaari nio sequesano tariucuaanu Pueyaso Rupajiniji:

“Cante shuquiriaatia quini paniyani, nojuaja cuara shuquiritiaara pa Jiyaniijia”.

#### Jesucristo mosaanujiniji pahuatasano

**2** Cuarta Jesuucua tiuuniaa pueyanaa, janiya jaara niaacua tiuquiuaarini, niaacuajaari niishiya taa cua pahuataquiaari Pueyasojiniji Jesucristo rupaa najaniyani. Majaari jiyajeneta cua pahuatanu quiquiaari niishijiaa niishishano rupaacata. Cua pahuatasanoori niishishaatia quiquiaarija, maja juhua cutara pueyano pahuatasano. Janiyari jacaria pahuataquiaari Pueyaso rupaa najaniyani. <sup>2</sup> Janiyari tari tama sequequiaarijaanijia: “Janiyari saaja Jesucristojiniji pahuatanu paniya Corinto pueya niquiarani, naajuhujaj, taa na cusoquiaari pocuara niyacutesanojiniani”. <sup>3</sup> Cua pahuatasacari Jesucristo rupaa nia niquiara, janiyari sasaca quiriquiaa cua puerenutani. Janiyari tetecariquiaani. <sup>4</sup> Majaari cua paniniu quiquiaari cua tiuutiniuria najaniya Jesucristoocua tama cua niishitijatajaaja. Naaratej, majaari cua pahuatasano quiniu quiquiaari juhua shanohua pahuataja sequesano. Naacujitij, cua pahuatasacari Jesucristo rupaa nia niquiara, Pueyaso Sohuanu cutaraari nioojiacajinia poonijioquiaari Pueyaso cumaacata cutara. <sup>5</sup> Naacujitij, niaari Jesucristoocua tiuquiaari Pueyaso cumaaca miishacari maninia nioojiajinia. Maja cutaraari nia tiuuniu quiquiaari saaja pueya niishishanoocua.

#### Pueyaso Sohuanucujaari pa niishitiya Pueyaso

<sup>6</sup> Naajaa, canapuate Pueyasooocua tiuujia seetanujuaanaa cutarani, nojoriiri niishiya canaa pahuatasano Jesucristojinijiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiaari shaajeconutaniya. Nojori niishishanoori najuhuana quiniutianiya. <sup>7</sup> Canaa pahuatasano cutaraari Pueyaso niishishano tarijia, jiya shipinishaacarijiyojua. Pueya-

soori jiyacari niishiriojoquiaari jiyano hua maninia na miiniuria pajaniya, shuquiriaatia pa quiniuria pueyara caanu pa Jiyaniijia Jesucristo shuriucua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. <sup>8</sup> Mijiria jiyaniijianu cuaari nio niishiyaquiquiaari. Nojori jaara na niishiquiaari tarijia, nojori maara pa Jiyaniijia moyaquiquiaari niyacutesanojinia. [Na Shipininia motuquiaarijiaari, pueyaracaanu shacantuuca quijia! <sup>9</sup> Naa naajiotasano quiyacuajaari tariucuaaanu Pueyasoo Rupaajinia:

“Pueyasoori jiyasohuaja casaa jeenucuasano jiidiaa na panijia pueyara. Cunoori maja pueya niquishano quenaaja. Majaari cunojiniji nojori tojishano quenaajajuhaaj. Majaari quenaaja pueya niishiriojonu quiquiaari jiyano casaate na naata quiniu nojoriria”. Quiarijiani, canaari saniniuuja pueya niquira na pohuataani. <sup>10</sup> Pueyasocuaajaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohanuuta. Na Sohanuuri puetunu Pueyasoo niishiriojosanojuanaa noojiajinia niishiya. <sup>11</sup> ¿Cante pueyano niishiriojosano noojiajinia niishiyani? ¿Majate saa na camaru sohanuujua niishiniu? Taaquiririnij. Naajuhuaaj, saaja Pueyasoo Sohanuuri Pueyasoo niishiriojosano noojiajinia niishiya. <sup>12</sup> Naaratej, Pueyasoori na Sohanu niqitioquiaari pajaniya, pa niishiniuria Pueyasoo niishishano. Naacuajitij, majaari pa jiidianu saaja tama pa sohanuujuaaja Pueyasoo niishishano pa niishiniuria. Paa cutaraari Pueyasoo Sohanuracajaniuhuaaj. Naacuajitij, Pueyasoo Sohanu cumaquishacari pajaniya, pa naata puetunu Pueyasoo niqitiosano pajaniyarajanaa niishiniu. [Jiyano hua capora Pueyasoo! <sup>13</sup> Naacuajitij, canaa pohuatasanoori maja saaja mijiria pueya niishishano. Pueyasoo Sohanuujuaari canaa niishitiojoquiaari Pueyasoo rupaa canaa niishiniuria canaa jiuujiajinia. Naacuajitij, canaa naata Pueyasoo Sohanu jiidiana niishitiojonu seetanu Pueyasoo rupaajanaa, mariyata taa Pueyasoo Sohanu niishitiojoquiaa canaacuaani.

<sup>14</sup> Mijiria quiniaa pueyari Pueyasoo Sohanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaja na jiyatequiaa. Seetanujuanaa, nojoriiri maja na naata na niishiniu. Saa Pueyasoo Sohanutaja pa naata Pueyasoo Sohanu niishitiojosano niishiniu. <sup>15</sup> Cante Pueyasoo Sohanu jiidiaani, nojuajaari na naata puetunu niishishanojuanaa saniniujuuniu. Saniniuuja, tamasa pueyari maja na naata Pueyasoo Sohanu jiidiana miishano niishiniu nocuara na rimiaaquenura. <sup>16</sup> Tariucuaaanu Pueyasoo Rupaajinia naa naajiotasaaquiarijuhuaaj:

“¿Cante pa Jiyaniijia jiuujiajinia na niishiriojosano niishiyani, socua na niishitiojonura nojuajani? Shaaqui”. Paa cutaraari Jesucristo niishishano niishiyani Pueyasoo Sohanuraca pa quishacari. Naacuajitij, majaari pa niishiniu saa mijiria pueya niishishanoju.

### Pueyasora poonijionaa pueya cuaara poonijionu-uriquia nojori panitioonuta

**3** Cuarta Jesuucua tiuuniaanaa, cua quishacari ni-aata, majaari cua naata jiyajeneta Pueyasoo niishishano cua niishitiojonu quiquiaari nijaniya. Niaari quera juhua Pueyasoo Sohanuujua quiriqiaajaa. Niaari juhua Cristo conaaja quiriqiaajaa, maja Pueyasoo tojjijaca seetanujuanaa. Nocuaji, janiyari nia niishitiojoriquiaa jacariani, juhua Pueyasoo niishiyashijia pueya nia quishacarijia. <sup>2</sup> Cua niishitiojosano nijaniyari niishishaatia quiquiaarijia, maja jiyajeneta. Majaari cua naata Pueyasoo cutara niishishano cua pohuatanu quiquiaari nijaniya. Cuno niishishanoori cumueeca Pueyasoo pueyara, naatej, taa shu quiya tariucua pueretuuca pueyaracuaani. Juhua naatujoori nia quishacarijia, majaari nia naata na tojinu quiquiaari. Juhuanuujuaari maja nia naata na tojinu quiarijiani. <sup>3</sup> Niaari juhua Pueyasoo Sohanuujua quiyajaa, juhua Pueyasoo niishiyashijia pueya. ¿Naatejaaratej? Niaana niarta Pueyasoo muerasu shocotanu paniquiaa juucua. Niaanaari juayonuujutaquiaa. Naa nia quishacarij, niaari juhua Pueyasoo Sohanuujua quiyajaa pueyara caanu, juhua Pueyasoo niishiyashijia pueya. <sup>4</sup> Niaana sequequiaa: “Canaari Pablo pueyani”. Tamasacanaari sequequiaajuhuaaj: “Canaari Apolo pueyani”. Naacuajitij, puetunu nijaniyajanaari saaja juhua Pueyasoo niishiyashijia pueya quiyajaa.

<sup>5</sup> Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaa juhuanani. Canaari saa Pueyasoo panishano miiquiaajaani, Jesucristo rupaa nia tojitanura. Canaari Jesucristo panishano miiquiaarini taa na sequequiaari canaa miiniuracuajani. <sup>6</sup> Naacuajitij, janiyari Pueyasoo rupaa nia pohuataquiaarini, naatej, taa casaa jajau pueyano natojoquiaacuaani. Apoloori saniniuuja socua Pueyasoo rupaa nia niishitiojoquiaari na cumaquiniuria nijaniya, naatej, taa pueyano na natau shiijioya mohuacatacuaani, maninia na maashiniuria. Pueyasoo cutaraari na rupaa maashitiquiaari nioojiajinia, na muerasu nia quiniuria cutara. <sup>7</sup> Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasooju cutaraari cumaacacara. Saaja nojuaja cutara na naata pa tojitiniu na rupaa, seetanujuanaa na muerasu pa quiniuria. <sup>8</sup> Naacuajitij, paari niishiyani, cante natojonani, cante mohuaca shiijiotanani, canaari mariyata saaja Pueyasoo poonitijosanoni. Pueyasocuaajaari canaa niqitiojutaniya na jiidiasano, nera canaa poonijionuucua. Cante socua poonijiooreeni, Pueyasoori socua na jiidiasanojiniji na niqitiojutaniya taajecori pueyajiniji. <sup>9</sup> Canaari mariyata Pueyasora poonijionaani. Niaari juhua Pueyasoo nataacuaca nera. Niaari na muerasu cutara, maja canaa muerasu. Naajuhuaaj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. <sup>10</sup> Pueyasoo jaara jiyaroquiaari janiya, janiyari Jesucristo rupaa pohuatanu coteequiaari maninia nijaniyani,

Pueyaso muerasu nia quiniuria nia tiuushacari cua pohuatasanoocua. Naacujitij, janiyari juhua Pueyaso tiara shipiniu coteequiaarini. Cua niishitiojosano nia-janiyani, cunoori juhua morijiu nujuatejosano quiquiaari. Cua nuhuaji, tamasaari nia niishitio-joriquiaa socua Jesucristo rupaa, juhua Pueyaso tia tucuatasaanura. Nojori cuara niishiiria maninia, maninia nojori niishitiojonura niajaniya, juhua maninia tiasano nia quiniuria.

<sup>11</sup> Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jataniija Pueyaso pueya pa quiniuria. Janiyacuajaari na rupaa pohuataquiaari niajaniyani. Saa na rupaacuaja nia tiuushacari, niocua maninia quiri, juhua maninia morijiuacuaa tiasano tia, maja na matanura. <sup>12</sup> Cante socua Jesucristo rupaa niishitiojiya niajaniyani, cuno cuara niishitiojoora jiyanoohua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniuuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitanio, maniiri maja na naata na catijianu. Cante saniniuujia tiaree macacatani, tucurutajuhuj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasanote seetanujua-naa maninia? <sup>14</sup> Tamonu jaara maninia miijia quiquiaari Pueyaso cumaacata, na miishanoori maja najuhua quiniutianiya Pueyasora. Pueyasoori cuno pueyano niuitionutaniya na jiiatanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. <sup>15</sup> Cante saniniuujia tiaquiaari cateja casaatani, na tiasanoori catenutaniya. Puetunu na jiiatanojuanaari juurequenutaniya. Saaja nojuajaari Sesaaca jaariutiasaanutaniya juhua manijini jaashano. Naa miishaanutaniyari Jesuucua tiuuni-aa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijini jaashano.

<sup>16</sup> ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojia-cajinia quijia. <sup>17</sup> Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuaanaari juhua na tia quiya. Pueyaso quiquio cuara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

<sup>18</sup> Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijia niquiara. Cuno pueyano cuara jataara cuno na niishishano juhua niishiyashijia na quiniuria narta pueya niquiara. Na nuhuaji, cuara maseera Pueyaso niishitija, seetanu niishijia na quini-

urijanaa. <sup>19</sup> Mijiria pueya niishishanoori juhua paateca sequesano Pueyasora. Tariucuaaanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquitianiniu-tianiya, tama nojori niishitiushanoocuaajaaja nojori tiuushacari najuhuanaj”.

<sup>20</sup> Naa naajiotasanoori quiyajuhuj:

“Pueyasocuajaari mijiria niishijia niishiriojosano niishiya. Naa sequeyari: ‘Najuhuaanaari cuno pojori niishiriojonuusano’”.

<sup>21</sup> Naaratej, maja shuquiriaatia nia quiniu saaja niquiriyatu Pueyaso rupaa pohuatana nia tojishacari. Pueyasoori tamasa pueya jiyaramiquiquiaa nia cumaquiniurijuhuj, maja saa niquiriyatu niishitiojon-aja. Puetunu casaajanaari niaara, maninia nia quiniuria. Naaratej, majaari saa niquiriyatu pueyanooocuaaja nia jiaatiano. <sup>22</sup> Pueyasoori canaa jiyaramiquiquiaari canaa cumaquiniuria niajaniya. Naacujitij, janiya, Apolo, Pedro, canaari niaara quiyani, maninia canaa miiniuria niajaniya Pueyaso rupaata. Nio jiyari niaara quiyajuhuj. Pueyaso shipinishanocuaajaari niaara. Naajuhuj, mijiria nia quishacari, cunoori niaara quiya, socua maninia quijia nia quiniuhua. Taa nia miishiya quiarijacuajani, taa nia miishaanutaniyani, puetunu cunajuanaari niaara, cumueeca Pueyaso muerasu nia quiniuria. Naa shaajesacariiri maninia quiniutianiya niaarajuhuj. Pueyasoori nia shaajeteya na shuriucua nia quianura. Naacujitij, puetunu casaajanaari niaara quiya. <sup>23</sup> Niajaniyari Cristora quiya saniniuujia. Cristoori saniniuujia Pueyasora quiyacujua.

#### Jesucristo jiyaramiquishano poonijosano

**4** Naaratej pueyanaa, niajaniya cuara niishiiria canaari saaja Jesucristo seyani. Canaari maja cutara pueyani. Pueyasoori canaa jiyatequiaari na rupaa canaa niishitiojonura niajaniya, Pueyaso niishitiojosano canaa. Cunoori tarijia pa niishishoo. <sup>2</sup> Cante Pueyaso niishitija jiiatiani, cuno cuara quiiria seetanujuaanaa Pueyaso miiniu panishano panijia, na rupaa na pohuatanura puetunu maniajanaa. <sup>3</sup> Niajaniya, tamasa pueyajuhuj jaara sequenu paniya taamueca pohuatanate janiyani, quiria, naajaa. Mijiria nequesoreena jaara cua nequesoreere cua niishitiojonujini, naajaa. ¿Janiyate sesa niishitiojoquiaani? Johuj. Maja cua niishiniu. <sup>4</sup> Janiya jaara sesa miiriquiaa cua Jiyaniijia nia poonijosacarini, majaari cua niishiniu. Majaari coojia macuhujenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijia nia naata sequenu taa cua quiquiaari. <sup>5</sup> Naaratej, maja nia rimiaaquenu tamonuucua, Jesucristo tiuquiyaquishacariuhua pocua. Naa sashiri. Pa Jiyaniijia jaara tiuquiriohuj, puetunu jiyasohua pa miishanojuanaari niishishaanutaniya. Niishishaanutaniyajariuhuj casaara pa miiquiaari puetunu pa miishanojuanaani. Cuno quishacari, pa Jiyaniijiaari maninia pohuatanu-

taniya cante maninia miijia quiriquiaa mijiria na quishacarini.

<sup>6</sup> Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajinijii-uhuj, maninia nia niishiniuria casaa cua niishitiojiya nijaniyani. Naacuajitij, nia niishitiojoriquiaanijia saa Pueyaso rupaa nia tojtianura suraatiaja. Majaari socua tamonu niishitiojosano nia tojiniu. Naajuhuj, maja nia sequenu tamonu niishitiojonajiniji: "Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriirij, na shuquiritiniucua janiya". Maja naate pueyanaa. Mariyata nia tojitiare puetunu Pueyaso jiyaramiquishano pueyajanaa, seetanujuanaa nojori pohuatasacari Pueyaso rupaa.

<sup>7</sup> ¿Niajanijariuhuj? ¿Taa nia sequeya tama nia cuaqueyajinijiaajani? ¿Niaateeri socua maninia pueya tamasaajiniji, socua niishijiacajuhuj? Majaruhua. Naajaa, nia jaara seetanujuanaa socua niishijiacacuri tamonujiniji, ¿taa jiyanhua niishijiacara nia quiqianuni? ¿Tamajaate? [Maja tamajaaja! Ni-aacuajaari Pueyaso niishitijia jiiitia. Naaratej, maja nia jyaniniu nia socua maninia pueya tamasa pueyajiniji, tama nia niishishanotajaaja.

<sup>8</sup> Naa jiyoteeri jyaninya nia tari cutara niishijiacacurii. Naa jiyoteeri jyanijuhuj, nia tari jiiitia puetunu Pueyaso niqutionu panishanojuanaa nijaniya. Naajuhuj, nia jiyoteeri jyaninya Pueyasoori nia jiyateree jyaniijanucua nia quiniuria. Naa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jyaniijanucujuhuj, shuquiriaatia pa quiniuria mariyata. <sup>9</sup> Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhua quijiacara, saa puecoosocoriquianojua. Canaa naasucuaari naa quiya mijiriani, puetunu pueyajanaa shootianura canaa, Pueyaso seya shootianura canaajuhuj. <sup>10</sup> Canaa tojtiasacari Cristo, canaa naasucuaari niishiyashijiacacurii. Nijaniyani saniniujia niishijiacacurii, Jesucristo nia rupesacari. Canaa naasucuaari Pueyaso muerasu sasaca quiya saajani. Naaari saniniujia Pueyaso muerasu cumueeca quiya tama nia niquiarajaaja. Pueya jiyoteeri nia shuqiritiaa. Canaari saniniujia saaja rerequetesano quiyani, pueya soosanojuhuaj. <sup>11</sup> Canaari pueyaracaanu miaaqueiaajaani. Canaari jiyamuequiaajaaniuhuj. Canaa cushishano toqueniyojaari jiyareta sesaruqueniyoja. Pueyari canaa miiquiaa taraatiani. Shaaquiiri canaa tia, canaa rucojonuucua pueyaracaanu. <sup>12</sup> Canaari samareequiaani pueyaracaanu canaa poonijosacari tama canaa juaashiquiatajaaja. Pueyari canaa sesacaquiaani. Canaari maninia na rucuaquiaa saajani. Canaa jaara naquiya miishaareni, canaari na rejeretaquiaa juhuajani saajani. Majaari canaa naminiu quiquiaa saniniujia nojori. <sup>13</sup> Pueya jaara tamasa niqiara rimiaaquequiaa canaajiniji, canaari nojoritia jeecatoonu saniquiaa juucuan. Pueyari canaa

jiyatequiaa juhua rucucuarani. Canaari naa quiyajaa nojoririani.

<sup>14</sup> Naa cua naajosacari niaacuaratej, majaari cua cararonu paniniu nijaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. <sup>15</sup> Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Naa tojtiasacari Jesucristo rupaa cua pohuatasacari nijaniya, niaari Pueyaso muerasura quiquiaari. <sup>16</sup> Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniurijuhuj.

<sup>17</sup> Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jyaniiija Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajinijanaacuaani. Naa nia rootanunijani nia niishiniuhua maninia cua niishitiojosano nijaniya tarija. Nojuajaari nia pohutanunijajuhuj taa quiija cua quiyani cua tojishacari pa Jyaniiija Jesucristo, naa maninia nia miiniurijuhuj.

<sup>18</sup> Noojiaqueya nijaniyajinijioori shuquiriaatia quiya, juhua jyaniijanucua nojori jiyatesacari tama na cuaqueyajaaja. Nojoriiri naa miiriqui nojori jyanishacari maja naasucuaari cua tacatenu quiniutianuhua, cua niqiniuhuaa nijaniya socua. <sup>19</sup> Janiyacuaajaari niaacua naquerejiya tarini, cua Jyaniiija Jesucristo jaara paniri niaacua cua quianura. Cua tiuquishacari niaacua, janiyari cuno niishijiacacurii saniniujianunianiani, cua niishiniuria casaate nojorini, maja naa sacuraatia nojori quiniuriatej. ¿Cumaacaracate nojori, saaja pocuajaca soj? <sup>20</sup> ¿Canteeri seetanujuanaa Pueyaso pueyanoni? ¿Saaja pocuajatej? [Maja pocuaja! Cante Pueyaso Sohuanu jiiitia na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. <sup>21</sup> Naa niishiriojore, cuarta Jesuucua tiuuniaanaa. ¿Taa nia paniya cua miiniuria nijaniya cua quiasacari niaacuani? ¿Niaateeri paniya cua sanitionura nijaniya, jacaria cua niishitiojonura nijaniya cua paniniutia soj? ¿Taa nia panijani?

#### Na que niqiuocuata quijajiniji pohuatasano

**5** Nijaniyajiniji pohuatasaarucuaa taraatianijia. Tamonu nijaniyajinijionaaari jyanohua sesa miya. [Na que niqiuocuata quiyaquiniaari! [Pueyanaa, cuno miishanoori socua jyanohua caraatia Pueyaso niishiyashijiacacurii miishanojiniji! Pueyaso niishiyashijiacacurii, majaari quenaaja nojori naa sesa miiniu niishiniutij. <sup>2</sup> Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jiiitaaruhua? [Naa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua nijaniya nia rerejosacari. <sup>3</sup> Cua tojiri taa pa miiniutianiani. Janiyari maja cua quiniu niaata. Naajaa, coojaari niaata quiya cua niishiriojosacari nijaniya.

Naacujitij, janiyari juhua nia tajinia quiyani. Naacujitij, janiyari tari cuno sesa miijia saniniujiuriini.

<sup>4</sup> Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacujitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutianiya noojia na tacatonuhua, Pueyaso toji-jiaara na quiniuhua. Naacujitij, pa Jiyaniijia Jesucristo metasacariuhua pocua, nojuajaari samiitianishaanutanuhua juhua puetunu Pueyaso muerasutajanaa.

<sup>6</sup> Cuarta Jesuucua tiuuniaanaa, ¿taate nia naata shuquiriaatia quini tamajaajani, naa sesa miijia quishacari nia tajiniatej? ¿Majateeri nia niishiniu? [Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacua paaquenutianiya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashoju miniquootasanajuanaari. Naajuhua, sesa miijia jaara sequeyaquishaare na miishano, sesa na miishanoori socua paaquenutianiya.

<sup>7</sup> Tarijia, Pueyasoori pa supuetanaa Judiocuaca rootaquiari puetunu na pan poreetejajanaa nojori jatanura puetunu marijarajanaa. Nojoriiri naa rootasaquiaari saaja poreetesoo pan nojori miaquenura siete juuca, shuquiriaatia nojori quiniuria Pueyaso niquiara. Pueyasoori naa nojori niishitiojoquiaari miriquitij, nojori cartenura puetunu sesa nojori mitiushanojuanaa, nojori rupuenura Pueyaso. Naajuhua quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niquiara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji.

<sup>8</sup> Naa Pueyaso pa cojishacari quiarijiatej, tojetaarucujanaa sesa miyashijiaca pa quirij, shuquiriaatia pa quiniuria pa Jiyanoonia niquiara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

<sup>9</sup> Pueyanaa, janiyari tari niaacuara naajiocanuni cua sequenura niajaniya, maja nia cojiniuria sesoriquia pueya, cuno pojori canapuate na camishoo maaji numuetucuquiaani. <sup>10</sup> Naa cua sequesacari niajaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacuajijianaa rupertenu. Nio jiyacua, pueyari naa sesa miijiacata quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocuaajaaja jiaatiaquiaa puera, maja Pueyasoocua. <sup>11</sup> Cua tojitiare casaa cua sequecanu tari niajaniyani. Cante tama na cuaque-

yajaaja sequejani: "Janiya Pueyaso muerasuni", maja cunota nia cojitianu, cuno jaara na camishoo maaji numuetucuquiaa. Naajuhua, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocuaajaaja jiaatiaquiaajaaniuhua, maja Pueyasoocua. Majaari nia cojiniu narta pueya sesacaja. Majaari nia cojiniu mashaasequejoja. Majaari nia cojiniu nooj, cante tamonu casami nohuasejoquiaa na sapojonutani. Janiycuaajaari tari naa nia sequecanuni maja jiyano pueyatan nia cojitianura. Majaari jiyano pueyanota nia mi-aquenu quenaaja. <sup>12</sup> Naa cua sequesacari niajaniyatej, majaari cua sequenu quiriquiaa tamasa pueyajiniji, canapuetucuaaja maja Pueyaso muerasuni. ¿Paate nojori nequesoreenaani? Maja. Pueyasocuaajaari nojori saniniujiuniutianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatara cuno sesa miijia nia tajiniji, noo cante sacuaratia na que niquiocuata quiyacuajani.

### Sesa miijia cuara nequesoreesaaria narta Pueyaso muerasu niquiara

<sup>6</sup> ¿Seetanutejanaa naa niajaniyajiniji pueya pihatasanajuuhua? Niarta Jesuucua tiuunia jaara sesa miiri niajaniya, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jeecatoyaquiaaani? <sup>2</sup> ¿Niaate niishiyaquia, Pueyaso muerasuuri Pueyaso niishiyashijiaca nequesoreeriquianocuaaja, Pueyaso saniniujiushacari nojori? Pueyaso jaara naa nia nequesoreetenutianiya na ruuretajaca, ¿majate nia naata quiarijia niarta Pueyaso muerasu nequesoreenu tamajaaja, nojori jaara sesa miiri shiitianiyojua? <sup>3</sup> ¿Majate nia niishiniujiuhua, paari Pueyaso seya nequesoreeriquianojuuhua? Pueyaso jaara pa nequesoreetenutianiya na seya na tojiyashijiaca, ¿majate quiarijia nia naata maninia nequesoreenu niarta Pueyaso muerasu mijiria? <sup>4</sup> Naa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutianiya nojoricuara? [Maja maninia naatej! Cuno pojoriiri maja Pueyaso muerasu jitianaa. <sup>5</sup> Naa nia sequeyanijia cua cararonura quenaaja niajaniya, cua niishiriojotenura niajaniyajuhua. ¿Seetanujuanaa tojetaarucujanaa shaaquiti niishijia niajaniyajinijinio, cante na naata nia tonujutoosacari nequesoreenu niajaniya maniniani? [Quiya jiyotucuaajaari! <sup>6</sup> Niajaniyanaari tama niarta Jesuucua tiuuniaacuaraajaaja tonujutoojoquiaa Pueyaso niishiyashijiaca nequesoreena niquiara. Naa nia miishacaritij, [hiaari sesa miiquiaa pueyanaa!

<sup>7</sup> Naaari jiyanoohua jiyajeneya nia juayonuujutasacari. Naa jaara sesa miishaare, niaa cuara jiyanootiorea saniniuuja, nia casami jaara nohuasesaarejuuhua. <sup>8</sup> Niajaniyarijiataj, [hiaari saaja sesa miiquiaacuajua! [Niaanaari niarta Pueyaso muerasu miiquiaa sesa! Niaanaari tama niarta Jesuucua tiuuniaajaaja nohuasejoquiaa, sesa miijiacata nia quiniucua.

<sup>9</sup> Maja tama nia cuaqueyajaaja nia sapojonu, pueyanaa. ¿Niaateeri niishiyakuia Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapue te na camishoo maajipohua numuetucujuquiaani, naajuhuj, noo pojori, canapue te tama na panishanoocuaajaaja jiaatiaquiaani, maja Pueyasoo. Quejoosaanutaniyajaariuhua noo pojori, canapue te narta pueyano niquiocua numuetucujujuaani, naajuhuj, canapue te maajishuriutia qijia juhua maajitiani. Nohuasenuujuacaari quejoosaanutaniyajuhuj, noo pojori, canapue te pueyaracaanu socua casami paniquiaa tama nerajaani. Mashaasequenuujuacaari puetunu quejoosaanutaniyajuhuj, tamasa sesacajacio, tamasaacuara rimiaaquejacajuhuj. Naa quejoosaanutaniyajaariuhua noo pojori, canapue te nohuasejoquiaa na sapojonutani. Puetunu jiyano pueyajaani maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. <sup>11</sup> Noojiaqueya niajanijiniioori jiyano sesa miijiaca pueya quiquiaari tarjia. Na nuhuj, sesa nia miishanoori jeequesaaquiaari Jesucristoo. Pueyaso Sohanuuri nioojiajini tiuquiquiaari, Pueyaso na tojitiniuria niajanija. Naacuajitij, nia rupesacari Jesucristo, Pueyasoori nia jyanooquiaari. Nia sequereeri: “Niaari saa maninija quia cua niquiara”.

#### Pa cuaqueya cuara quiriia saa Pueyasoraja

<sup>12</sup> Queraatia pueyari sequequiaa: “Pueyaso jyanoochacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuaj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartuusacari, na nuhuj majaari pa naata pa jiiishano casaa pa tarinitianu. <sup>13</sup> Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatuucujia saniniuurijia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyjetanu, na nuhuj, Pueyasoori na shaajanutaniya puetunujuanaa. ¿Pa cuaqueyariuhuj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? [Maja! Pa cuaqueya cutaraari shipinishaaquiaari pa Jiyaniijia, na panishano pa miiniuria. Naajuhuj, pa Jiyaniijiaari pa cuaqueyara quiyacujua, na cumaquiniuria pajaniya, maninia pa quiniuria pueyaracaanu. <sup>14</sup> Naajuhuj, taa Pueyaso samiitiani quiaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiutianuhua na cumaacatajuhuj.

<sup>15</sup> ¿Niaateeri niishiyakuiajuhuj, Pueyaso Sohanu quiniuucua poojiajini, pa cuaqueyari seetanujuanaa pa Jiyaniijia cuaqueya quia? Naaratej, Jesucristo

cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. [Cunoori jyanohua sesa! <sup>16</sup> Pueyasocuaajaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyakuia, cante paanatu numuetucureeni, Pueyasora, nojori niquiriyatu cuaqueyaracara quiqui? <sup>17</sup> Naajuhuj, paa jaara Jesucristo rupuereni, pa sohanuuri rupetooree na Sohanuta, niquiriyatu sohanuraca pa quiniuria Jesucristota.

<sup>18</sup> Naaratej, nioojia nia tacatore maja nia numuetucunura tamasa, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesoja. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoja. <sup>19</sup> ¿Majateeri nia niishiniu, nia cuaqueyari Pueyaso Sohanu quiquio? Pueyasoori na Sohanu jiyaroquiaari poojiajini na quiniuria. Pueyasoori nia masequiaari tama nerajaaja nia quiniuria. [Jyanohua naquia na miiniutia nia masereeri Neyanu na motesacari pocuara! Naacuajitij, Pueyasoori quiarjia pa camarnu quia. Naaratej, quiarjia maja pa quiniu tama pa cuaqueya camarujuaaja. Naaratej, pa shuqiritiri pa Pueyaso pa cuaqueyata, pa sohanutajuhuj. Nojuacuajaari pa cuaqueya camaru, pa sohanu camarujuhuj.

#### Pablo rootasano pa caminiuria, camiyojua pa quiniuria soj

<sup>7</sup> Quiarjiani pueyanaa, cucuara nia naajiosanojinia nia nequesotasano riucuaereeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. <sup>2</sup> Saniniuujia, quiarjiani, pueyari puera sesa miiniu niishiquiaa. Nocujia pueya cuara camiiria. Maajipohua cuara camiirijuhuj. <sup>3</sup> Pueyano jaara camiri, necocua cuara na cuaqueya jamueyaquiri neyaca numuetucunu panishacari. Naajuhuj, neyaca cuara na cuaqueya jamueyaquiri necocua panishacari na numuetucusanura. <sup>4</sup> Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujuhuj. Necocuaari neyaca cuaqueya camaru cutara. <sup>5</sup> Naacuajiti maajipohuanaa, maja nia niyacaacuajia nia jamuenu nia cuaqueya, na panishacari numuetucunu niajanija. Naajuhua niajanija canuuna, maja nia niquiocua nia tarjionu na panishacari na numuetucusaanura. Saniniuujia, jyanohua Pueyaso nia secojonu panishacari, jiyacari cutara nia naata tarinitianu numuetucunu rupaquijia, Pueyaso nia secojonura, nia jaara mariyata na miiniu paniri. Na nuhuj cutara, nia numuetucurohua nia niquiocua, Sesa mariqui sesa nia miitiriiri tamonu maaji na paniniuria, nia camueenujusacari puera. <sup>6</sup> Niioori quiarjia maja niaara Pueyaso rootasano janiya. Janiyari nareja naa sequeya niajaniani socua panaatia nia quiniuria. <sup>7</sup> Naaratej, nia

jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

<sup>8</sup> Camiyojua pueyanaa, mashiquiopuena, cua tojitiare: niaa jaara juhuajaniya quiya taa camiyojua cua quiyacuaani, niaari maninia quiniutianiya. <sup>9</sup> Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiiria. Socua maninia cutaraari nia caminiuria, maja maajicua nia jiaatianura pueyaracaanu. <sup>10</sup> Camiyono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca.

<sup>11</sup> Cante neyaca carteyani, nojori cuaara jiyanootoora, na rupuetoonuhara. Jaara maja na naata jiyanootoonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: "Maja nia cartenu nia niquiocua".

<sup>12</sup> Quiariijiani, socua nia niishitiojoreeraj. Nioori tama cua niishitiojosanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jitiaara maninianoj. Quia niquiocua jaara quiata quiniu paniyajaa, majaari na cartenu. <sup>13</sup> Naajuhuj, maaji jaara Pueyaso tojiyashijia niyacaraca quiri, cuaara maninia jitiaara neyaca. Majaari na cartenu, quia niyaca jaara quiata quiniu panirijia. <sup>14</sup> Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca jiyanooria necocua quiniucua niarta Pueyaso pueyano. Nareja nia niquirinoj, niaata na rerejonu panishacari. Naajuhuj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacarijia, necocua cuaara nareja niquishaariajuhuaj, na rerejosacari niaata. Naajuhuj, maja rimiajata nia niquiniu necohua. Necohuari maniniacuaja Pueyasora, maja juhua tama maaji muetusanojuaaja. <sup>15</sup> Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quiriuhua. Majaari socua nia tojiniu coteenu nia niyaca, coteenu nia niquiocuanio. [Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueya-

soori paniquiaa juhuajaniya pa quiniuria, camishano, cartesano soj.

<sup>17</sup> Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiacuaja puetunu Pueyaso pueya maapuerajanaani. Taa nia quiquiaarini, naajuhuj casaate quia poonijosano quiquiaarini, cunocuaajaari Pueyaso panishano quiquiaari niaara.

<sup>18</sup> Naacuajitij, cante tarijia na cararaatiuuquia co miatesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiushacari quiarijia. Naajuhuj, cante miatesoo quiquiaari Pueyaso sequesacari na pueyano na quiniuriani, cuno cuaara quiiria naajuhuj. <sup>19</sup> Cante Judio pueyano na quiniuria miatesaquiuarini, naajaa. Cante miatesoo quiyani, naajaa. Saaja maninia cutaraari pa tojitanura Pueyaso niishitiojosano pajaniya. <sup>20</sup> Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. <sup>21</sup> Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishiriojonu nocua. Juhujaniya nia poonijiore saaja. Saniniuujia, jaara nia naata quiriquia cartesano pueyano nia camarnujiniji, maniniacuajaari. <sup>22</sup> Cante poonitijiotasusano pueyano quiquiaari Pueyaso sequesacari niajaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijiaara. Naajuhuj, cante camarnuujia quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. <sup>23</sup> Pueyasoori jyanohua naquiya miiquiaari na cusojuasacari Neyanuniyojua, na masenura niajaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. <sup>24</sup> Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu niajaniya.

<sup>25</sup> Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquiaa na sequenu panishano cua caminiujuniuria niajaniya, na Sohuanu cumaquishacari janiya. <sup>26</sup> Naacuajitij, naa nia sequeyanijia: niaacuajaari niishiya, quiarijiani, jyanohua puereeta quishacari. Nocuaji niajaniya cuaara quiiria taa nia quiyacuajani. <sup>27</sup> Cante niquiocuaracani, maja nia paniniu na cartenu. Cante niquiocuaaju quiyani, majaari nia niquiocuaaniu paniniu. <sup>28</sup> Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniucua mijiria quiarijiani. Majaari cua

paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniucua quiarijiani.

<sup>29</sup> Cuarta Pueyaso muerasunaa, nijaniya cuaara niishiiria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanohua pa tojitiare pa Jiyaniijia. Naacuajitij, cante niquiocuaraca quiyani, majaari nocua nia niishiriojonu puera. <sup>30</sup> Cante na shaa-jasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiorejuhuaj. Cante casami niq-uitiojojua quiquiaani, naajaa, maja casamiicua nia niishiriojonu puera. Socua nia niishiriojore cutara Pueyasooocua. <sup>31</sup> Canapuate niishijiacani, queraatia casami na masejonura mijiriani, nojori cuaara niishiiria maja casami panijiaa nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

<sup>32</sup> Janiyari paniyani mijiria casaacua tacayashijia nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. <sup>33</sup> Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. <sup>34</sup> Naacuajitij, noojia niqijioteyari. Naajuhua, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaa Jesucristora, nera na poonijionura puetunu nooji-atajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

<sup>35</sup> Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojitianura maninia. Naa jaara cua niishitiojosano tojiri, nia naata pa Jiyaniijia tojiniu maninia. Naacuajitij, niaari nioojia niqijioteyaquiniutianiya.

<sup>36</sup> Pueyano jaara naa niishiriojore: "Majaari maninia cua miiniu cua jamuesacari cua niyatu pueyaracaanu na camiyaquiniuria", cuno pueyano cuaara miiria taa na miiniu paniyacuajani. Camishocoriquiano maaraja, cuaara camitioora. Quia niyatu jaara camiri, majaari sesa. <sup>37</sup> Cante saniniuujia maja noojia niqijioteyaquiya na niishiriojosacari neyatuucuanu, cunoori maninia miiniutianiya na camitiyaquishacari, jaara na naata neyatu cojuanu maninia. <sup>38</sup> Naacuajitij, cante neyatu camitiriini, maninia miyari. Cante neyatu camitiyaquiyajaa-niuhua, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

<sup>39</sup> Camishano maaji cuaara carteyaquiiria neyaca, saminio neyaca quishacarijia. Pueyasoori naa seque-

quiaaritij. Neyaca jaara cusoyare, na mashiquoori ma-ja tari na quiniu juhua camishano. Na panishacari, cuaara camiriia cana na caminiu paniyacuajani. Jaara caminiu paniri, cuaara camiriia Pueyasooocua tiuuujia pueyanota cutara. <sup>40</sup> Naajaa, mashiquio jaara camiyaquiriohua, socua shuquiriaatia quiniutianiya, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

**¿Maniate cuno shu pa miaquenura, seya jaara puecoosano quiri nareja shipinishano casaacua, juhua Pueyasooocuarajanaa?**

**8** Cuarta Jesuucua tiuunaa pueyanaa, janiya quiarijia nia niishitiojonutaniyani teyano pa miaquesanojinijiti puereshiyani. Pueyaso niishiyashijiaaari na miaquesocoriquiano seya puecoonu niishijia shipinishano casaacua juhua Pueyasooocua. Pueyari nequesotaquiaa, ¿maniate cuno shu, Pueyaso muerasu miaquesocoriquianojuhuaj, cuno seru jaara taucuaa jyanishano cumaacaraca quijiaacua mosano quiri? ¿Janiya cutaraari maja cua miaquenunoi! Nia pohuatareera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocua puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanoocua. Cante narta pueya paniquiaani, cunoori narta pueyacu niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. <sup>2</sup> Naacuajitij, cante tama na cuaqueyajaaja jiyaniya niishijiani, cunoori juhuanajuaja maja niishijia seetanujuanaa. <sup>3</sup> Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

<sup>4</sup> Juhuanajuajaari maja cua riucuanu nia niishiniu panishano: "¿Maniatenaari cuno shu pa miaquenu, seru jaara pueya jyanishano pueyasooocua mosano quiri?" ¿Casaatejaara cuno nojori jyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja.

<sup>5</sup> Tamasaca pueyari jiyaniya queraatia cumaacaraca quijiaaari quiya juhua Pueyaso, jiya cajiniocua, mijiriano. Nojoriiri na jiyatequiaa nojori cojuanara, nojori cumaquiriquianojuhuaj. <sup>6</sup> Naajaa, paari niishiyani saa niquiriyatu Pueyasooocua quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijiaari quiyajuhua.



Cunoori pa Jiyaniijia Jesucristo. Na Queeri na shipini-tiquiaari puetunu na shipinishanojuanaa. Pajaniya-juhuaj, paari rishiyani saaja na cumaquishacari pajaniya.

<sup>7</sup> Noojiaqueya Pueyaso pueyari saniniuujia jiyaniya-jaa taucuaca shipinijosano casaari seetanujuanaa cumaacaraca quijiaca juhua Pueyasojuhua. Nojoriiri najuhua sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuajitij, nojori jaara shu miaquere teyanote mosaaree nojori jyanishano cumaacaraca quijiaacuarani, nojori miaquenu nuhuaji, noojia niquijioteyari. Nojoriiri tama sequeyajaaja: "¶Janiya naasucuaari sesa miirii Pueyaso niquiarani!" Naacuajitij, nojoriiri noojia macuhajetequiaa.

<sup>8</sup> Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootini pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhua, cante na miaquequiaani, majaari socua sesa pueyanora na quiniujihua. <sup>9</sup> Niaacuajaari jyanohua tiuquiaa Pueyasocua. Naacuajitij, niaa naasucuaari na naata juhuajaniya tiuquiniu cuno shu miaquenura nojori jyanishano pueyaso quiquiojinia. Niaacuajaari niishiya, cuno, nojori sequesano pueysoni, majaari seetanujuanaa Pueyaso cuno. Naacuajitij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niquiniutianiya na pueresano shu miaquenuyano. Na niquishacari nijaniya, tamaaja sequentaniyari: "¶Jaj! ¶Nojoriqui cuno shu miaquenuyacuua! Saniriirajataj". Naa sequejatej, nojua-jaari jyanijajaa cuno miaquesanoori mosaaree seetanujuanaa tamonu cumaacaraca quijiaacuara. Naacuajitij, na sanishacarihua cuno shu miaquenu, tamajaaja noojia macuhajanutaniyari. Naacuajitij, niaari niarta Pueyaso pueyano sesoya, na niquiara nia miaquesacari cuno shu. Na niquiniucua nijaniya cuno shu miaquenuyano, nojuaajaari cunora na miaquerejuhuaj. Saniniuujia, nojuaajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na miishanojiniji na jyanooشانura. Nijaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuarihua, na rupesacari nijaniya. <sup>12</sup> Nia miaquesacari, niaari na pueresano shu na miaqueteya. Naacuajitij, noojiaari macuhajanutaniya. Naacuajitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhua, nia nia sesosacari tama na pueyanojuaaja. <sup>13</sup> ¶Taa nia sequeyani pueyanaa? ¶Maniinate shu pa miaquenu, seya jaara taucuaca jyanishano pueyasocua puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano

mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniacuaani.

### Taa quijia Pablo quiquiaarini, Jesucristo jiyaramiquishano na quishacari

<sup>9</sup> Janiya jaara cuno shu miaquenu paniyani, cua naata miaquenu cua panishano. Naajuhua, cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhua. Seetanujuanaa cua namijjata Jesucristo niquiquiaarinijia. Nojuaajaari cua jiyatequiaari na jiyaramiquishano cua quiniuria. Naajuhua, cua pohu-atasacari Jesucristojiniji nia niquiara, niaari na muerasura quiquiaari cua pohuatasanoocua nia tiuushacari. Naacuajitij niishishiyari janiyari Jesucristo jiyaramiquishanojaaniuhua. <sup>2</sup> Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo tiuquiaari nia tojishacari cua pohuatasano nojajiniji. Naacuajitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniucua, cua naata miiniujihua taa cuarta Jesu jiyaramiquishano pueya miiquiaacuani.

<sup>3</sup> Tamonu jaara cua nequesoreere taa cua miiquiaani, janiyari saaja naa na riucuaquiaani: <sup>4</sup> "Pueyasoori sequequiaari, na jiyaramiquishano pueya cuaara niquitiosaaria na miaquesocoriquiano". Naaratej, canaa jaara naa miiniu paniriquiani, canaa maara nia sequereni canaa nia niquitiojonura canaa panishano. Naajaa, majaari canaa masenu quiquiaa canaa panishano nijaniyajiniji, janiya, Bernabeenio. <sup>5</sup> Naajuhua, canaa jaara niquiocuara quiriquiani, canaa maara canaa niquiocua rupojoriquia canaacuani, taa cuarta Jesucristo jiyaramiquishano pueya miiquiaacuani. Pa Jiyaniijia Jesu tapueyocuaari naa miiquiaajuhua. Pedrojuanaari necocuata rucuanajoquiaajuhua, Jesucristo rupaa na poojotasacari. Naajaa, majaari naa canaa miiniu quiquiaaqui. <sup>6</sup> Jesucristoori sequequiaar-ijihua: "Cua jiyaramiquishano pueya cuaara niquitiosaaria cumaneeca, na panishano nojori masetajara". ¶Niaateeri jiyaniya cuno sequesano maja quiria, maja Bernabeerajuhua? ¶Cunocuaajaari naa seque-saaquiaari canaarajuhua! Naaratej, canaa jaara naa paniriquiani, canaa maara canaa panishano masere nijaniyajinijini, canaa niishitiojonuucua nijaniya. Naajaa, canaari tama canaa juaashiquiatajaaja poonijio-quiaani, canaa panishano canaa masetajara.

<sup>7</sup> ¶Soldoteeri tamonu poonijosano jiitaja, na miaquesano na masetajara? ¶Maja! Soldadohua jiyaniijiaari na niquitiojua puetunu na miaquesanojuanaa. ¶Pueyanoteeri na cuhuariquia nataja najuhanaj? ¶Maja! Na nuhuaji na natau mianutaniyari na poonijosanojiniji. ¶Majateeri seru juunu camararatu na seru quitiaaca, jaara na paniri? ¶Taaquiririnij! Na ratuyacuuaquinatejaj. ¶Maatucua casaara najuhuaa seesaareerini? ¶Canaarijataj? Canaa jaara naa

paniriquiani, canaa naata nia masenu canaa panishano nijaniyajini. Naajaa, majaari canaa mashiniquijionu quiquiaa quenaaja canaa panishano nijaniyajini. Canaari nareja poonijioquiaa tama canaa juaashiquiatani, Jesucristo rupaa canaa pohuatasacari nijaniya.

<sup>8</sup> Nio cua pohuatasano nijaniyani, majaari tama canaa niishitiojosanojuaaja. Nio niishitiojosanoori taricuacaanu Pueyaso Rupaa naajiosanojinia quiyajuhuj, taa cua sequeriquiaacuajani. <sup>9</sup> Supuetana Moisés caminiujushano Pueyasojinijiiri naa naajiotasaaquiaritij:

“Maja quia juunu rupaa quia seecutanu maja na mi-aquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishitiojoriquiaajaa naa na sequenuratej? [Maja! <sup>10</sup> Pueyasoori naa sequeriquiaaqui na niishitiojonura puetunu pajaniyanaa. Naaratej, Pueyasora poonijionaani, na niishitiojosano pueya cuara nojori niqutiojooora na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiriirini. Na camaruri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuj? Jaa. Niishiyacuajaari na mianutaniyari. <sup>11</sup> Naajaa, niaata cua quishacari, canaari naa poonijioriquiaa Pueyasorani, niojiaca canaa cumaquiniuria maninia. Naacuajitij, canaa cuara niqutiojosaaria saniniuuja canaa panishano. Naajaa, majaari canaa paniniu canaa panishano nia niqutionura canaa. <sup>12</sup> Tamasaca pueya niishitiojosacari nijaniya, niaa cutaraari nojori niqutiojoquiaa nojori panishano. Canaari saniya coteenujanaa pohuataquiaari Jesucristo rupaa nijaniyani. ¿Majateeri coteenu canaa niqutiojosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitaaquishacari canaa panishano, canaari sanaa rejeretaja saajani. Majaari canaa taajetenu paniniu quijia nijaniya, canaa jiitaaquishacari canaa panishano. Canaari naa miiquiaritij, niaa mariqui Jesucristo rupaa tojiniu paniyaquiriiri canaa taajetesacari nijaniya, pueyaracaanu canaa mashiniquijosacari canaa panishano nijaniyajini.

<sup>13</sup> Niaacuajaari niishiyajuhuj, Jerusalén tiacajinia Pueyaso Secojoua tiajinia, cuarta Judiocuaca miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruri secojojuajinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojojua tiajinia poonijionaari miaquesanoraca quiquiaajuhuj. <sup>14</sup> Pa Jiyaniija Jesucristoori na rupaa pohuatanaa naa sequequiaar-ijiuhuj: “Cua rupaa pohuatanaa cuara niqutiojosaaria na panishano pueyaracaanu”. <sup>15</sup> Naacuajitij, cua naata puetunu cua panishanojanaa sequenu nia niqutiojonura janiya, juhuajaniya cua quiniuria, taa

cuarta Jesucristo jiyaramiquishano pueya mi-iquiaacuaani. Naajaa, majaari cua masenu quijia nijaniya cua panishano cua masetajara. Niaa naasucuaari jiyaniya janiyari quiarijia niaacuara naajioore nioni, cua shiniujiuniuria nijaniya nia niqutiojonura janiya cua panishano. [Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia nijaniyajini. Naacuajitij, janiyari tamajaaja shuquiriaatia quia Pueyaso niqiarani.

<sup>16</sup> Cua tojitiaanaa jaara niqutiojore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniija mariqui cua saniitiooreeri cua tojiyaquiniucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari na rupaa cua pohuatanura. Cunoori maja tama cua niishitiojosano cua miiniurijaaja. <sup>17</sup> Majaari cua sequenu quiquiaari cua Jiyaniija: “Cua Jiyaniijianaa, quia rupaa pohuatareera quiajaniyara”. Janiya jaara naa na sequequiaarini, cua Jiyaniija maara cua niqutiojore cua poonijosanojiniji nera, na shuquiriasacari janiya. Saniniuuja, tama na panishacarijaaja cua Jiyaniijajanaacuajaari cua jiyaroquiaari na rupaa cua pohuatanura. Cunora, majaari cua naata na tarijonu. Janyacuajaari na seruni.

<sup>18</sup> Naacuajitij, ¿taa cua miya socuani, cua Jiyaniija cua shuqiritiniuria socuani? Naa miiquiaacuajaniija, nareja poonijioquiaanijia tama cua juaashiquiatajaaja cua panishano cua jiitianura, na rupaa cua pohuatasacari. Naaratej, majaari cua sequenu quiquiaa cua tojitiaanaa, nojori niqutiojonura janiya cua panishano. Jesucristocuajaari sequequiaari na rupaa pohuatanaa cuara niqutiojosaaria na panishano. Naajaa, majaari naa cua sequenu quiquiaa nijaniya. Naacuajiti cua naata pa Jiyaniija shuqiritini socua, cua pohuatasacari na rupaa cua maseyaquishacari cua panishano cua tojitiaanaajini. Naacuajitij, janiyari shuquiriaatia pohuataquiaa Pueyaso rupaa pa Jiyaniijarani.

<sup>19</sup> Majaari pueya niqutionu quiquiaa janiya na jiitiasanojiniji cua niishitiojonuucua nojori. Naacuajitij, janiyari maja juhua nojori seruni. Pueyanoori maja cua jiyarona. Naajaa, janiyari tama cua cuaqueyajaaja jiyatequiaari juhua puetunu pueya serujanaa cua quiniuriani, socua pueya quiniuria pa Jiyaniija Jesucristo tojitiaanaa. <sup>20</sup> Jesucristo rupaa cua pohuatasacari cuarta Judiocuaca niqiuara, janiyari juhua Judio pueyanora quiquiaani. Janiyari naa miiquiaani nojori mariqui cua tojiyaquiriiri, janiya jaara juhua tahue quiri nojori niqiuarani. Naacuajitij, socua Judiocuacaari Jesucristo rupaa tojitiaa. Jesucristoocua cua tiuushacari, janiyari maja socua cua quiniu juhua cua supuetanaa Judiocuaca rootasano tojijia. Naajaa, na tojiqiaajaanijia cua quishacari cuarta Judiocuacata, noo pojoritiatej cante cuno rootasano tojitiaajaani. Naacuajitij, cua quishacari juhua nojori, nojoriiri socua cua tojitiaa cua

pohuatasacari Jesucristojini. <sup>21</sup> Naajuhua, cua quishacari tamasaca pueyata, janiyari juhua nojori quiquiaani, nojori tojiniuria maninia janiya. Nojoriiri maja Judiocuaca supuetanaa rootasano tojiniu niishiniu. Naaratej, janiyari na tojiyaquiuaajuhua, nojoritia cua quishacari. Janiyari naa miiquiaani nojori mariqui cua sooreeri, janiya jaara juhua tamaatia qui-ji qiri nojori niquiarani. Naajaa, Pueyaso rootasano tojiquiaa pueyaracaanu cutaranijia. Naajuhua, puetunu Jesucristo niishitiosanojuanaa tojiquiaanijia. <sup>22</sup> Noojiaqueya Pueyaso muerasuuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhua nojoritia cua quishacari. Nojori jyanishacari tamonu casaa sesa quiya, janiyari mariyata maja cua miiniu nojori pueresano casaa. Naacujitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. <sup>23</sup> Janiyari puetunu naa miiquiaa-janaani, socua pueya cua tojitiniuria Jesucristo rupaa. Naa maninia poonijioquiaa cua Jiyaniijiaranijia, cua masenura puetunu maninia na sequesanojuanaa na muerasura.

<sup>24</sup> Niaacuajaari niishiya taa pueya tacuarishiyojou-quaacuajani. Pueya netecuatusacari, puetunu pueyajaanaari jyanohua netecuatumaja jaaraaja. Cante narta netecuatumaja shocotajani, shanohua casaa niqutioshiyari. Ritiuuquia pueyanoori jyanohua shuquiriaatia qui-ji na shocotanujini na masacari casaa. Naajuhua pueyanaa, jyanohua nia poonijiore Pueyasora mijiria, shuquiriaatia nia masenura nia poonijiosanojinijia na jittiasanojinijia jiyocuacaanu. <sup>25</sup> Naajuhua, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuanu, cunoori saaja shanohua nacaque jaamasujini shiti-asano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacari. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

<sup>26</sup> Pueya netecuatusacari, netecuatumaja cuaara niishiiria tee netenu puequetu quiyani. Majaari najuhuana na camarucuneejonu. Naajuhua, cua poonijiosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhua, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. <sup>27</sup> Janiyari jyanohua saniniuujiquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari

queraatia pueya niishitiojoquiaari Pueyaso rupaani. Janiya jaara tama cua niishitiosanojuaja tojiyaquiri-ni, Pueyaso mariqui cua cartereeri, maja na rupaa cua pohuatanura socua.

### Supuetanaa Israel pueya miishanoori pajaniyara naajiotasaaquiaari pa niishiniuria maninia

**10** Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucanejosacari pueyaracaanu cariquia jiyajinia. Majaari nia niyjetanu niaa mariqui Pueyaso tojiyashijia qiriohuajuhua. Nojori mashishacari Egipto jiyajini, Pueyasoori cohuaaja najaca shipiniquiaari nojori na cojuanura, nojori puetariquianojuhua. Pueyasoori puereetuca shoniacu caminia raqutiaquiaari nojori nuura caminia cajiniocua. Naacujitij, puetunu pueyajaanaari niuutiaquiaari joojuashiquio. <sup>2</sup> Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaaja najaca cariquiaconio. Majaari socua na qutiuni quiquiaari Egipto pueya seya. <sup>3</sup> Puetunu nojorijianaari jiya cajiniocujia casaa miaquenuujua, Pueyaso tinishano nojori miaquesocoriquiano pueyaracaanu cuno cariquia jiyajinia nojori rucanejosacari. <sup>4</sup> Naajuhua, nojori jiyamuetusacari, Pueyasoori mohuaca pojuartaniquiaari saajijini. Puetunu pueyajaanaari cuno mohuaca ratuquiaari. Pueyasoori cuno saajijini naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaaja, pueyaracaanu nojori na cojuanura. [Nojuacuajaari pa Jiyaniijia Cristo quiquiaari] <sup>5</sup> Puetunu cuno supuetanaa Israel pueyajaanaari naa maninia cojuasano quiquiaari cariquia jiyajinia. Naajaa, quera puetunu nojorijianaari Pueyaso tojtiaashijia quiquiaari saaja. Pueyasoori cuno nojori shuquiritiaaquiquiaari. Naaratej nojori cusojuanuriquiaari cuno cariquia jiyajinia nojori camarucunee-tasacari pueyaracaanu, cuaara puequequiaarijiaatijia puetunu cuno tojiyashijiacajanaa.

<sup>6</sup> Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijiniiri puetunu naajiotasaaquiaarijanaa pajaniyara, pa niishiniuria maja sesa casaacua pa jiaatianurajuhua. <sup>7</sup> Shushajanaa nojori coteesacari rucanenu cariquia jiyaco, noojiaqueya nojorijiniinooori caapiqui casaa shipiniquiaari orojini juhua juunu niquishano. Nojoriiri tama nojori shipinijosano casaajaaja sequequiaari: "Niiori pa Pueyasohua, pa mashiquiniaa Egipto jiyajinia pa camarucuaacuaji". Naacujitij, nojoriiri na shipinishano casaa shuquiritiaquiaari sacuaatia. Jiyacari nojori miishanoori naa naajiotasaaquiaariti:

"Pueyari cajituri queranacunura. Na nuhuaji, nuju-atuquiaariiri na shipinishano juyaca tajoji na jiarey-ocuatunura. Socua sacuaatia casaa miitiquiaariiri". [Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

<sup>8</sup> Na nuhuaji, tamacari, noojiaqueya nojorijinijinioori sesa miiquiaari taaturitua, cararaatia taucuaca mi- ishacari nojori shuquirishacari na shipinishano casaa tacoji. Pueyasoori nocuaji naa sequequiaari: “Cuaara puecoosaaria cuno sesa miijiaca!” Cunora, veintitrés mil Judiocuacaari puecoosaquiaari cuno juuca. Cuno- jiniji pa niishiri maja pa miiniuria sesajuhuj, taa nojori miiquiaaricuaa taaturitiani.

<sup>9</sup> Na nuhuaji, noojiaqueya nojorijinijinioori Pueyasota juaaquioquiaari, tamonu miaquesanoocua nojori jiaa- tiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniuji- uri. Maja naa pa miiniutij paa mariqui Pueyaso juaatiri- iri.

<sup>10</sup> Tamacari, noojiaqueya cuno pueyajinijinioori Moisésta juayonuutaquiaari. Moiséscuaaari nojori ji- itianara Pueyaso jiyatesano quiquiaari. Nocuaji Pueya- soori na seru jiyaroquiaari cuno juaajiaca na cusojua- nura. Queraatia pueyari cusonuquiaari jiyacari. Naaratej pueyanaa, majaari pa juaatianu pa jiyani- jianucua.

<sup>11</sup> Puetunu pa supuetanaajiniji naajiotasanojuanaari tariucuacaanu naajiotasaaquiaari, pa numootesaanu- ra quiarijiani, quera pa Jiyaniijia muetasacariuhua.

<sup>12</sup> Naaratej pueyanaa, tama nia cuaqueyajaaja nia co- juare nia jyanishacari niaari Pueyaso tojijia seetanu cutarajanaa, niaa mariqui sesa miiriiri, juhujaniya nia quishacari tamajaaja. <sup>13</sup> Niaari mariyata saniniu- jushaaquiaajuhuj, taa puetunu parta Pueyaso pueya- janaa saniniujiushaaquiaacuaani. Naajaa, nia naata Pueyasocua tiuuniu maja puera nia saniniujiushaanu- ra. Pueyasocua nia niishiya taate nia naata rejereta- nuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuanu taraatia nia miiniucuaaji. Naacuajiti pa naata rejeretanu, Pueyaso jaara Sesaaca saniniujiutiri pajaniya.

### **Maja pa kojiniu tamasaca, na miaquenuusacari na jyanitiushano na pueyasocua na puecootusano**

<sup>14</sup> Cua panishano Pueyaso muerasunaa, maja nia tiuquitianu tamasaca pueya jyanitiushano pueyaso quiquiojinia, na tojitianaa nia kojiniuria, nojori shuquiritiasacari juaashiquiata shipinishano casaa Pueyaso niti. Maja nojori kojiniu, niaa mariqui sani- itiosaareeri. <sup>15</sup> Niaacuajaari niishijiaca. Naaratej, nia ni- ishiojore cua sequesanoocua.

<sup>16</sup> Paa jaara rerejore pa Jiyaniijia cusonu juuca pa ni- ishiniuriani, pa ratunu panishacari, paari seque- quiaani: “Paacarasho canaa Jiyaniijianaa, quia nanacaari puetunu canaacuarajanaa shooquiaari”. Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuara- janaa. Naajuhuj, pa miaquesacari, paari seque- quiaani: “Canaa Jiyaniijianaa, quiaari quia cuaqueya

nootunequiaari puetunu canaacuarajanaa”. Naa pa miaquesacaritij, puetunu pajaniyajanaari jatiqumi pa Jiyaniijia cojiqiaani, na cuaqueya cusonuucua pocuara. <sup>17</sup> Cuno pan pa miaquesacari, puetunu pa- janiyajanaari niquiriyatu panjiniji neecasequiaani. Naacuajitij, paari niishiyani puetunu pajaniyajanaari rupuetoono quia pa Jiyaniijiatani, juhua niquiriyatu cuaqueyaja.

<sup>18</sup> Nia niishiriojoriquia taa Israel pueya mi- iquiaacuaani. Nojori miaquesacari Pueyasocuaara na mosano Pueyaso niqiuara, na niti nojori mosano seru- uri juhua tama nojorijaaja, Pueyaso jiyanooniuria no- jori. Naacuajitij, nojoriiri na naata Pueyaso rupueno, nojori secojonura nojuaja. <sup>19</sup> Jaara naa quiritij, ¿taa- teerini, pueya jaara shipinijosano casaacuara mosano shu miaquere? ¿Casaate pueya jyanishano pueya- soocua mosano shuni? Nareja shucuaaari.

¿Cumaacaraca quijiate cuno, pueya shipinishano casaa juhua Pueyasorani? [Maja! <sup>20</sup> Naajaa, nia tojitiare casaa cua sequenutaniyani. [Pueyaso niishiyashijiaca pueyari na miaquesocoriquiano na seya puecooquaa samaruhuacuara! Naa nojori miishanoniqitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. [Majaari cua paniniu nia rupuenura samaruhua! Nocuaji, maja Pueyaso ni- ishiyashijiaca nia kojiniu cuno shu nia miaquenura.

<sup>21</sup> Majaari pa naata pa Jiyaniijiatani rupuetoonu, samaruhuata pa rupuetosacarijuhuj. ¿Pueyasote samaruhuata kojitishiya? Pa Jiyaniijia cusonu juuca pa niishiniuria, ¿paateeri na sequesano miaquenu- taniyani, samaruhuacuara mosano casaajuhuj? ¿Kojitishiyaate? [Maja pueyanaa! <sup>22</sup> ¿Paateeri pa Jiyaniijia paraca kojiniu paniani, pa Jiyaniijia pa juaatiniuriani? ¿Pajaniyate socua cumueeca pa Jiyaniijianijini? ¿Maja- teeri nia puerenu pa Jiyaniijia saniitionu?

### **Taa pa miiniutianiyanu**

<sup>23</sup> Tari sequereecuajaniija, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya.

<sup>24</sup> Naaratej, majaari pa niishiriojonu saaja maninia pa quiniuria tamajaaja. Pa niishiriojore parta pueyacua, maninia nojori quiniurijuhuj. <sup>25</sup> Seetanujuanaari nio naajiosano: “Nio jiyari pa Jiyaniijia jiya, puetunu tii qui- jia casaajanaano”. Naaratej, niaa jaara shu masere shu niqitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhujaniya. Pa Jiyaniijia ship- inishanocuaaari. Pa miaquesanoori maja na naata na sesonu pajaniya Pueyasora.

<sup>27</sup> Pueyaso niishiyashijia jaara nia masuere nata nia miaquenura, nia quiaare, niaa jaara quianu paniri. Juhujaniya nia miaquere na rupojosano niaara. Ma- jaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa

mariqui nioojia macuhajetereeri niaa jaara niishiri nia miaquesanoori shipinishano casaacuara mosano juhua Pueyasooacuara. Juhujaniya nia miaquere nareja. Puetunujuanaari pa Jiyaniijia shipinishanocuaja.

<sup>28</sup> Saniniuujia, nia cojinia jaara numootere niajaniya: "Nio shuuri mosaaree shipinishano casaacuara juhua Pueyasooacuara", majaari nia miaquenunoj, niaa jaara naa sequesaa. Maja nia miaquenunoj, nia cojinia mariqui na miaquerejaariuhuj na cojishacari niajaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyari. <sup>29</sup> Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutarani nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhajareeri cuno shu na miaquesacari niaata.

Niaa naasucuaari cua nequesotanu paniya: "¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu?"

<sup>30</sup> Paa jaara Pueyaso sequereni 'paacarasho' cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacari?" <sup>31</sup> Cua tojitiare quenaaja cuarta Pueyaso muerasunaa. Nia miaquesacari, nia ratuacari, casaa nia miishacarinio, pueyaracaanu puetunu maninia nia miirijianaa Pueyaso nia shuquiritiniuria. <sup>32</sup> Puetunu nia miishanojuanaa cuara quiriia maninia Judiocuaca niquiara, taucuaca niquiarajuhuj, parta Pueyaso pueya niquiaranio. Jiyanojia taraatia cutaraari, pueya jaara tojiyaquiya Pueyaso, juhujaniya pa miishacari nojori jiyaniitushano sacuraatia casaa. <sup>33</sup> Naaratej, janiyari pueyaracaanu maninia miniu paniquiaa puetunu pueya niquiarajanaani, nojori cuara tojitiara Pueyaso, Pueyaso pueyara nojori jiyatesaanura. Majaari cua niishiriojonu tama cua panishanojuaja cua miiniuria. Janiyari socua niishiriojoquiaa tamasaacuani, maninia cua miiniuria nojori niquiara.

**11** Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacuajaari pueyaracaanu maninia miiquiaari pueyacuaa.

### Maajipohuatucua taa quiriquiani Pueyaso pueya rerejosacari

<sup>2</sup> Cuarta Jesuucua tiunianaana, janiyari nia shuquiritiani, pueyaracaanu nia niishishacari janiya, naajuhuj, maninia nia tojitiacari puetunu cua niishitiojosanojuanaa Pueyasojiniji. <sup>3</sup> Janiyari paniya cutarani socua nio nia niishiniuria: Cristocuajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuani. <sup>4</sup> Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuj, jiyacaritij, canuu cuara jocuara na

nacaque na pocuasacari. Saniniuujia, maajipohua pocuanura, nojori cuara mishiquioora na naca toquerauta. Cararaatia cutaraari caya jaara pocuare Pueyasora, Pueyasotajuhuj, na naca mishiquiosano. Cararaatiajaariuhuj, maaji pocuasacari Pueyasota, Pueyasorano, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuanaacuaraarini? ¿Maajiti juhua cayara quiniu paniya? Maja naasucua. <sup>6</sup> Maaji jaara na naca mishiquionu paniyaquiri pueya niquiara na pocuanura Pueyasora, Pueyaso na secojonurano, cuno tojiyashijia cuara tuqueteera na naca. ¿Cararaatiitee, maaji jaara na naca tuquesano quiri juhua caya? Taaquiririni. Cararaatia quiyajaariuhuj, na secojosacari Pueyaso, na caminiujiushacari Pueyaso sequenu panishano pueya niquiarajuhuj, mishiquiosoo na naca quishacari. <sup>7</sup> Maajiiri neyaca shuquiritiya na tojijia na quishacari. Naacuajitij, neyacaari narta pueya shuquiritiasano quiyajuhuj. Naaratej, maaji cuara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnu na quiniurajuhuj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

<sup>8</sup> Pueyaso jaara coteenujuanaa caya shipiniquiaari, majaari maajijini nia shipinini quiquiaari caya. Maaji cutaraari caya riuquiocujiniji shipinishaaquiaari.

<sup>9</sup> Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuara caya tojiiria cutara. <sup>10</sup> Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuj.

<sup>11</sup> Naajaa, puetunu pajaniyajanaari mariyata Pueyaso muerasuni, Jesucristoocua pa tiuushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuj, cayari maja na naata supueno tamajaaja maajijiu. <sup>12</sup> Seetanujuanaari, maajiiri coteenu shipinishaaquiaari caya cuaqueyajiniji. Na nuhuj, puetunu canuujuanaari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutojonura.

<sup>13</sup> ¿Taa nia sequeyani pueyanaa? ¿Maniateeri, maaji jaara Pueyaso secojore na naca mishiquiosoo pueya niquiara? Maja maninia. <sup>14</sup> Naajuhuj, quera puetunu pueyajanaari sequeja, cararaatia niquishanoori caya jaara tucumuejaru quiya juhua maaji. <sup>15</sup> ¿Maajiirijiatatj? Jaara tucumuejaru quiri, cunoori maninia niquishano cutara. Pueyasoori naa maninia shipiniquiaari maaji, tucumuejaru na quiniuria, na naca

mishiquioriquiano na muecacata. <sup>16</sup> Tamonu jaara na-coonu panijajaa socua pa muesujiniji, niocua na se-  
quere: “Pablocuajaari tari pa niishitiojoree puetunu na  
niishishanojuanaa. Naajuhuaaj, puetunu Pueyaso  
pueya maapuejanaari tamaquiicua naa miiquiaa taa  
Pablo pohuataree pajaniyacujani. Majaari socua pa  
niishiniu tamaatia quiniu”. Niojuanaari cua rootasano  
cunojiniji, pueyanaa.

### Corinto pueyari sesa miiquiaari na miaquenuujujania, pa Jiyaniijia cusonu nojori niishishacari

<sup>17</sup> Cuarta Jesuucua tiuuniaanaa, nio, janiya niaacuara  
na naajiyani, nioori maja cua shuquiritianura nijaniya.  
Nia rerejosacari pa Jiyaniijia cusosacari nia niishiniuria,  
niaanaari saaja sesa miiquiaa. Nia rerejonuni, cunoori  
nia cumaquitioonura juucua. Nia rerejosacari saniniu-  
ujia, niaari saaja socua seseyaree. <sup>18</sup> Janiyari naa pohu-  
atasaarucuaa nijaniyajinijini: “Corinto pueyari sesa na  
niishiriojonuta nojori jiuujiajinia raquirijitiaquiaa nojori  
rerejosacari”. ¿Seetanutejanaa nio pohuatasano nia-  
janiyajiniji? Naa naasucuj. ¿Casaate cua toyani? <sup>19</sup> See-  
tanu naasucujanaa niaari nioojiajinia naa niaaquejo-  
quiaaquij. Paacuajaari tari niishiquiaarini noojiaqueya  
pueyari Pueyaso pueya maapuecujaji rupatenutaniya.  
Naa niishishanote canapuate maja Pueyaso muera-  
suni. Cante seetanujanaa Pueyasooocua tiuujiani, ma-  
jaari na rupatenu quiniutianiya narta Pueyaso muera-  
suucujaji. Cuarta Pueyaso muerasunaa, niaacuajaari  
Pueyaso pueya maanu. Naaratej, niaa jaara rerejore  
nia miaquenura pa Jiyaniijia cusonu nia niishiniuria,  
maja sesa nia niishiriojonu juhua niaaquejono nia  
quiniuria. Niaa jaara naa niaaquejoriquiatej, majaari  
pa Jiyaniijia cusonu nia niishiniu quiquiaa seetanujua-  
naa. <sup>21</sup> Nijaniyanaari tama nia patasanojuaja cotee-  
taquiaa miaquenu. Niaanaari nia miaquesano sero-  
taaquiquiaa. Naacuajitij, casamiijiuniucuaanaari miaaje-  
coquiaacujua. [Saniniuujia casamiriacanaari juhua-  
janiya mashaasequenuquiaacujua! <sup>22</sup> Jiyano-  
hua cararaatiaari naa nia miishanotej! Niaa jaara naa ja-  
muejaca quiriquiretej, ¿majate nia naata tama nia tia-  
jiniajaaja nia miaquenuunu, ratununio? ¿Niaateeri  
niarta Pueyaso muerasu sooquiaa? Naa nia miishacari  
casamiijiuniucuatej, niaacuajaari nojori cararoquiaa,  
casamiijiuniucua nojori quiniucua. ¿Taa nia sequeyani  
pueyanaa? ¿Janiyate nia maniniuhuaqueetaani? [Maja!  
Jiyano-  
hua tacayanijia. Majaari cunora cua shuquiri-  
tiani nijaniya.

### Pa Jiyaniijia rootasano na cusonu pa niishiniuria

<sup>23</sup> Janiyacuajaari nia rootacanu tari pa Jiyaniijia Jesu  
pohuatasano janiyani, taa na miaquequiaari na  
saquiriojosano pueyatani. Cuno niucujaja, Judasri pa  
Jiyaniijia quiateriquiano quiriquirete taucua moso-  
coriquiano. Cua tojtitarohuacuara pueyanaa. <sup>24</sup> Judas  
quiateyaquishacarijia nojuaja, pa Jiyaniijia Jesucristoori  
pan riquiaari. Na Que Pueyaso sequereeri:  
“Paacarasho cua Quena”. Na nuhuaji, na neecasero-

huari na serotanura na pueya. Nojori sequereeri:  
“Nioori cua cuaqueya, niaacuara cua panitiaca nia  
jiyanooshaanura. Nia miaquere. Niocua naa miiriquia  
pueyaracaanutej, nia niishiniuria cua miishano ni-  
aacuara”.

<sup>25</sup> Naajuhuaaj, nojori miaquenu nuhuaji, Jesuuri raa-  
tonuque pataquiaari na pueya na serotanura. Coteenu  
na Que secojoreeri. Na nuhuaji, na pueya sequero-  
huari: “Pueyaracaanu nia ratusacari nio, nia ni-  
ishiriquia, cua Queeri cua nanaca seera nia  
jiyanooquiaa, na muerasu nia quiniuria. Seyari maja  
socua niaacuara na moonu quishaanutaniya, sesa nia  
miiniu jiyanooshaanura juucua. Janiya cutaraari nia niti  
mosaanutaniyani”. Pa Jiyaniijiaari naa sequequiaari.  
<sup>26</sup> Naa nia miaquesacaritij, nia ratusacarijuhuaj,  
pueyari niishiniutianiya niaari Pueyaso jiyanooshano  
pueya, pa Jiyaniijia Jesu cusonuucua pa niti. Naa nia  
miaqueriquia pueyaracaanu na sequesano pan, pa  
Jiyaniijia cuaara tiuquiriohuajaatijia.

### Nia niishiri taate pa naata miaquenu pa Jiyaniijia cu- sonu pa niishiniuriani

<sup>27</sup> Naaratej, niaa jaara sesa miiri, Pueyaso nia seco-  
jore ritia na jiyanooniuhuaa nijaniya, nia miaque-  
nuhuara pa Jiyaniijia cusonu nia niishiniuria. Niaa jaara  
pa Jiyaniijia pan miaquere jiyanooshoo nia quishacari-  
jia, niaa jaara na cusonu mashaca rature jiyanooshoo  
nia quishacarijuhuaj, [hiaari na cusonu rerequeteya!  
Niaari juhua sequeyaruhua, pa Jiyaniijia najuhuaana cu-  
soquiaari. Naa nia miishacaritij, niaa cutaraari sani-  
itiosaanutaniya.

<sup>28</sup> Naaratej, tama nioojiajiniajaaja nia niishiriojore taa  
nia quiquiaani, casaa nia miiquianu sesani. Naa nia mi-  
iri coteenu, niaa mariqui sesa nia miishano miaqueta-  
reeri Pueyaso jiyanoyaquishacarijia nijaniya. Naa nia  
miiniu nuhuajitij, niocua shuquiriaatia juhuajaniya mi-  
aquerohua pa Jiyaniijia pan. Niocua juhuajaniya ratur-  
ohua pa Jiyaniijia raatonuquejiniji cutara. <sup>29</sup> Cante  
juhuajaniya miaquereeni, cante juhuajaniya raturee  
najuhanani, jiyanooshoo na quishacarijia, cuno  
pueyanoori Pueyaso saniitiotenutaniya tama na  
cuaqueyajaaja. <sup>30</sup> Naacuajitij, jiyanooshoo nia  
quishacarijia nia miaquesacari, queraatia nijaniyajini-  
jinioori cunora cusosuhua quiya. Noojiaqueya nia-  
janiyajinijinio cutaraari tari cusonuucanujuhuaaj, Pueya-  
so saniitiosacari nojori. <sup>31</sup> Nocujaja tama nia cuaqueya-  
jaaja nia jeecare suraatia, pa Jiyaniijia mariqui saniniu-  
ujia nia saniitioreeri. <sup>32</sup> Pa Jiyaniijia jaara pa saniniu-  
uri, canapuate sesa quiyani, Pueyasoori na saniitio-  
quiaa na muerasu nojori quiniucua, maninia nojori  
quiniuhuaa juhua maninia na muerasu. Naacuajitij,  
juhuacarijia na saniitiosacari na muerasu, majaari pa  
saniitiosaanu quiniutianiya na ruuretajacata jiya  
puequesacari, Pueyaso jaqueroosacari na tojiyashijia-  
ca.

<sup>33</sup> Naaratej cuarta Jesuucua tiuuniaanaa, niaa jaara  
pa Jiyaniijia pan sanu paniriquia na cusonu niishini-  
uria, nia sashiri niarta Pueyaso muerasu, jatiqui nia

miaquenura maninia. <sup>34</sup> Miaajeyano maaraja, cuaara miaqueera coteenu tama na tiajiniajaaja, Pueyaso mariqui nia saniitioreeri, sesa nia miiniuucua nia reresosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

### Pueyaso Sohuanu cumaquishacari puetunu Pueyaso muerasujuanaa

**12** Cuarta Pueyaso muerasunaa, niaacuajaari tari niishiya Pueyasoori na Sohuanu niqutioquiaa puetunu pajaniyajanaa, na cumaaca pa jiitianura. Quiarijiani, socua nia niishitiojonu paniya cunojinijini. <sup>2</sup> Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiarijianaa, pueya shipinishanoocua nia tiuuniuucua najuhuanaj. Sesaacaari naa nia tojitiquiaari najuhua pueya shipinishano, nia jyanishano pueyasohuani. <sup>3</sup> Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanujuanaa Pueyaso Sohuanu cumaacata pahuataa Pueyasojinijini? Naa nia saniniujuritij: Pueyaso Sohuanu pahuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucuaajari Jiyaniijajanaa”. Naacuajitij, maja nia tojiniu na rupaa, cante Jesucristo sesacajani.

<sup>4</sup> Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujuanaa cumaquiquiaa tamaatia miishano pa miiniuria na cumaacata. <sup>5</sup> Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijara poonijioquiaani. <sup>6</sup> Puetunu pajaniyajanaari tamaatia miiquiaa pa poonijosanoni. Saniniujia, Pueyasojuanaari na panishano miiquiaa puetunu pueya jiuujijajinijanaa. <sup>7</sup> Pueyasoori puetunu na muerasujuanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuanaa. <sup>8</sup> Pueyasoori pa cumaquiquiaa tamaatia miishano pa miiniuria. Naacuajitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaa-juhua Pueyaso sequenu panishano pajaniya. <sup>9</sup> Pueyaso Sohuanuuri tamonu cumaquiquiaa Pueyasooocua na tiuuniuria jyanohua, na shiniujiuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhuj cusosuhua na naatanijionura Pueyaso cumaacata. <sup>10</sup> Pueyaso Sohuanuuri tamonu pueyano jiyajeneta miishano miitijajuhuj Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niqiara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanu, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano

niishitiojoquiaa tamaatia rupaajinia sequesano na pacunura pueya rupaajiniajuhuaj, pueya tojiniuria maninia tama nojori rupaajiniajaaja. <sup>11</sup> Naacuajitij, Pueyaso Sohuanujuanaari puetunu pa cumaquiquiaa-janaa, tamaatia pa miiniuria. Naa pa poonitijioquiaari taa na paniyacuajani, cana na paniyajaaniuhuj.

### Puetunu Pueyaso pueyajanaari juhua niquiriyatu cuaqueya quiya

<sup>12</sup> Tamaatia poonijosano puetunu pajaniyajanaa jiitiasacari, paari juhua niquiriyatu cuaqueya quiyani. Miijiria pa cuaqueyari jyanohua maninia shipinishano jyanohua Pueyaso niishitajata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhuj. Naacuajitij, Cristota rupetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijara pa poonijionura jatiqui. <sup>13</sup> Pueyasoori pa rupetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasujuanaa samiitianiquiaari na Sohuanuta. Pueyaso Sohuanu pa jiitiasacari, puetunu pajaniyajanaari rupetootesano quiya niquiriyatu Sohuanutani. Naacuajitij, paari juhua niquiriyatu cuaqueya quiyani: Judiocuaca, tau-cuacanio, poonitijosano pueyajuhuj, camarnuuju pueyano.

<sup>14</sup> Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. <sup>15</sup> ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuj, majaari pa soonu tamaatia poonijosano pa jiitiasacari Pueyasora. <sup>16</sup> Naajuhuj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaate maja pa cuaqueyajiniji, maja namijia na quishacari? ¿Sooshiyatee? Maja. <sup>17</sup> Paa jaara saaja puereetuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiani? Maja pa naata.

<sup>18</sup> Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupetootesaaquiaari tee Pueyaso paniquiaari nianucuajani. Naajuhuj, Pueyasoori puetunu na muerasujuanaa cumaquiquiaa mariyata, tamaatia poonijosano pa jiitianura taa na paniyacuajani. <sup>19</sup> Pa cuaqueya jaara quiriquia saa namijijaja puetunujuanaa, ¿pa cuaqueyatuma tee quiriquia socuani? <sup>20</sup> Puetunu pa cuaqueya casaajanaari namitia saaja niquiriyatu cuaqueya quiya.

<sup>21</sup> ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhua-na quijiaca. Maja nia naata niqiniu”, ¿majate pa juaashiquia pa panishanojuhuaj? Taaquiriirinij. Naajuhuj, pa naca jaara pa niohuaca sequere: “Niohuacanaa, niaari najuhua quijiaca. Maja cua paniniu niya nijaniya”, ¿majate pa niohuaca pa panishanojuhuaj pa rucuanerotajara? Taaquiriirinij. Pueyanaa, naa pa quiri jatiqijiuhua puetunu parta Pueyaso muerasutajanaa, taa puetunu pa cuaqueyajinia pa jiitasano casaajanaa quiya jatiquicuaani. Naaratej, puetunu parta Pueyaso muerasujuanaari pa panishano quiya, pa cumaquitioonura maninia. <sup>22</sup> Teyano casaate pa cuaqueyajinia socua sasaca quiya pa niqiarani, cunoori socua pa panishano. Maja pa naata rishiniu cunooju. <sup>23</sup> Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhuasu pa quishacari. <sup>24</sup> Saniniuujia, maninia niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojanurajuhua teyanote maja maninia niquishano pa cuaqueyajiniani. <sup>25</sup> Naacuajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia mitiooquiaa, puetunu maninia pa cuaqueya quiniurijanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuaj. <sup>26</sup> Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaarajaaja puetunujanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

<sup>27</sup> Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. <sup>28</sup> Cristo cuaqueya pa quishacari, Pueyasoori co-teenujanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuatanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumacata. Tamasacaari jiyatesaaquiaari cusosuhua naatanijonaa nojori quiniurajuhuj, Pueyaso Sohuanu cumaquishacari nojori. Tamasacaari jiyatesaaquiaarijuhuaj Pueyaso muerasu naacunaara nojori quiniuria. Tamasacaari jiyatesaaquiaarijuhuaj Pueyaso muerasu jiitianaa nojori quiniuria. Tamasacaari pohuatesaaquiaari tamaatia rupaacajuhuj. Naacuajitij, queraatia tamaatia poonijosanoori quiya. <sup>29</sup> ¿Puetunu

Pueyaso muerasujuanaateeri jiyaramiquishaaquiaari Jesucristojiniji nojori pohuatanaa tamasaca niqiarara? Maja. ¿Puetunu Pueyaso muerasujuanaateeri Pueyaso rupaa pohuatanaa? Maja. ¿Puetunu Pueyaso muerasujuanaateeri Pueyaso rupaa niishitiojonaa? Maja. ¿Puetunu Pueyaso muerasujuanaateeri jiyajeneta miishano miijiaca? Maja. <sup>30</sup> ¿Puetunu Pueyaso muerasujuanaateeri cusosuhua naatanijonaa? Maja. ¿Puetunu Pueyaso muerasujuanaateeri tamaatia rupaaca pocuajaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujuanaateeri na naata na pacunu tama nojori rupaajinijaaja? Maja.

<sup>31</sup> Naaratej, nijaniya cuaraa jiaatiaara socua maninia poonijosano nia jiitianura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiunianaanaa, quiarijiani nia niishitiojoreera casaate socua panishanoni, Pueyaso shuquiritianura pajaniya.

### Panijiaca pa quirij

**13** Pueyaso Sohuanu jaara cua pohuaterere queraatia cua niishishoo rupaaca, Pueyaso seya rupaa juhuaj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani.

<sup>2</sup> Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhua quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaano, naajaa, janiya jaara pueya paniyashijia quirini, janiya maara najuhua quijia quiri Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasoocua cua tiuniuucua jiyano huani, naajaa. Cua paniyaquishacari pueya, janiya maara najuhua quijia quiriquia Pueyasorani. <sup>3</sup> Naajuhuj, janiya jaara puetunu cua casamijianaa nareja niqitiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuataturani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucua, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

<sup>4</sup> Cante pueya panijiani, nojuajaari panaatia sashijia. Cante pueya panijiani, nojuajaari maninia miijia puetunu pueyarajanaa. Cante pueya panijiani, nojuajaari tamonu pueya jiitiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu.

<sup>5</sup> Cante pueya panijiani, majaari pueya na cararojonu. Cante pueya panijiani, majaari saaja nera niishiriojua tamajaaja. Cante pueya panijiani, majaari ritia juaajia. Majaari na niishiniu naminiujiuhuj, tamonu jaara sesa na miiri. <sup>6</sup> Cante pueya panijiani, nojuajaari pueyacua



taraajeja, nojori miishacari sesa. Saniniuujia, nojuajaari shuquiriaatia quiya pueya miishacari Pueyaso panishano. <sup>7</sup> Cante pueya panijiani, juhuajaniya pueyaracaanu rejeretaari, tamasaca miishacari sesa nojuaja. Majaari na taacanuunu Pueyaso sequesanojiniji, tamonu sequesanojinijinio. Naajuhuj, majaari na tarinitianu maninia miiniu pueyaracaanu. Pueya panijaari naa puetunu rejeretajajanaa, taraatia na miishacari.

<sup>8</sup> Panijia pa quiniuni, cunoori pueyaracaanu panishaanutaniya, maja saa mijiria pa quishacarijia. Naaratej, socua cutara panijara pa quirij. Mijiria pa quishacari, Pueyaso Sohuanuuri pa cumaquiya Pueyaso sequenu panishano pa caminiujuniuria, pa niishishoo rupaaca pa pocuanurajuhuj, Pueyaso niishitishano pajaniya pa pohuatanurano. Puetunu nio niishishanojuanaari puequenutaniya Jesucristo tiuquishacariuhua pocua. Paniniu cutaraari puequeyaquiniutianiya. <sup>9</sup> Mijiria pa quishacari, paari saaja shiitianiyojua Pueyaso niishishano jitiaani. Pa niishishano Pueyasojiniji pa pohuatasano, cunoori saaja shiitianiyojua Pueyaso niishishanojiniji. <sup>10</sup> Naacuajitij, mijiria pa niishishanoori najuhuana quiniutianiya paa jaara Pueyaso shuriucua quirini. Pueyasoori jiyacari pa niishitiojonutaniya maninia cutara. Paari jiyacari puetunu maninia niishiniutianiyajanaani.

<sup>11</sup> Janiya jaara naatujua quiquiaarini, juhua naatujua pocuaquiaarinijia. Juhua naatujua niishiriojoquiaarinijia. Saaja naatujua niishitijaa jitiaquiaarinijia. Saniniuujia, janiya jaara cumantumaca quiquiaarini, janiyari cua naatujua quiniu niyajetaquiaarini. Naajuhuj mijiria pa quishacari, paari juhua naatujoori quiyajaa Pueyaso niquiarani. Pa Jiyaniijia tiuquishacariuhua, paa cutaraari cumueeca Pueyaso pueya quiniutianiya. <sup>12</sup> Mijiria pa quishacarijia, paari shiitianiyojua niishiyani. Paari juhua ninitia niquiya jariyani, juhua sesarunee niqutiujinia. Pueyaso shuriucua pa quishacari, paari maatia niishiniutianiya. Quiarijiani, saa shiitianiyojuaari pa niishishano. Na nuhuaji, Pueyasota pa quishacari, paari puetunu maninijanaa niishiniutianiya, naatej, taa Pueyaso niishiya puetunu pajaniyajanaacuaani. <sup>13</sup> Quiarijiani, paari Pueyaso rupaacua tiuuniu niishiyani. Naajuhuj, paari juhuajaniya sashiniu niishiyani, maatia pa niishishacari nojuajaari maninia miiniutianiya pajaniya. Nioori maninacuaja. Naajaa, pa panishacari Pueyaso, pueyano, cunoori socua maninia cutara Pueyasora, puetunu tamonu casaajinjiojuanaa.

#### Niishishoo rupaaca pocuanujiniji niishitiojosano

**14** Naarate cua panishano Pueyaso muerasunaa, nia jiaatiare socua jiyanojua pueya panijia nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jitianura maninia nia miiniuria. Panishano cutaraari Pueyaso Sohuanu niishitijaa nia jitianura, Pueyaso sequenu panishano nia caminiujuniuria Pueyaso pueyara. <sup>2</sup> Cante niishishoo rupaa pocuaa pueya niquiarara Pueyaso So-

huanu cumaacatani, cuno pueyanoori maja na cumaquiniu narta Pueyaso pueya. Na pohuatasanoori saaja Pueyaso tojishano, maja pueya tojishano. Cuno pueyanoori jiyasohujaa Pueyaso Sohuanu niishitishano pohuataa pueya niquiarara najuhuanaj. Majaari pueya niishiniu casaa na sequeyani. <sup>3</sup> Saniniuujia, cante Pueyaso sequenu panishano caminiujijia pueya rupaajiniani, cunoori narta Pueyaso muerasu cumaquiya. Na numooteyari. Na cumaniijaajariuhuj. <sup>4</sup> Na pohuatasanoori maja najuhuana na quiniu pueyara. Pueyaso pueya maanu tojishacari na pohuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuana pocuaari. Saa tama noojia cumaquiyajarijia. <sup>5</sup> Puetunu niajanijajanaa jaara niishishoo rupaaca pocuanu niishijiaa quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajanijajanaa jaara Pueyaso sequenu panishano caminiujuniuria quiriquia Pueyaso cumaacata. Cante Pueyaso rupaa pohuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

<sup>6</sup> Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pohuatasee nia janiya nia niishishoo rupaajiniani? ¿Niaatucua cumaquishaare cua pocuasacari najuhuana naa nia niquiaratej? Maja. Niaa cutaraari cumaquishano quiniutianiya, janiya jaara nia pohuatare nia rupaajinijajanaa Pueyaso niishitiojosano janiyani. Maninijaariuhuj janiya jaara nia niishitiojore Pueyaso rupaa nia rupaajiniani. <sup>7</sup> Nia niishiriojore. Jiuujiaaju casamiiri rupaaracajuhuj. Naaratej, paari shuquiriaatia tojitiaa naajua jonesesarini, jaaquequejotaja taquiniosacarijiuhuj. Saniniuujia, pueyano jaara naajua jonenejonu saniniujia nia niishiyaquishacarijia, saaja nareja cojutuneyari. Naacuajitij, cante na tojiyani, majaari na niishiniu casaa na jonenenu paniya juucuaani. <sup>8</sup> Naajuhuj, trompeta jaara sesa jonesesaare, ¿soldadohuate na naata niishiniu casaa na miiniutianiya? Maja. <sup>9</sup> Mariyata naajaariuhuj, niaa jaara niishishoo rupaa pocuaa pueya niquiarara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuana nojori niquiarara. <sup>10</sup> Niaacuajaari niishiya queraatia rupaacaari mijiria quiya. Puetunu maninijanaa cutaraari na niishiniaara. <sup>11</sup> Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuaari tahue quiya quiriaajuhuj. <sup>12</sup> Cuarta Jesucua tiuuniaanaa, niaacuajaari Pueyaso Sohuanuucua jiaatiaquiaa, na cumaaca nia jitianura. Maninacuaja. Naajaa, niajanijaa cuaraa jiaatiaara Pueyaso Sohuanu cumaquiniuria niajanijaa, puetunu tamaatia poonijiosanojuanaa nia miiniurajuhuj, maja saaja tamaatia

rupaacajinia nia pocuanura. Naacujitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

<sup>13</sup> Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secojora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. <sup>14</sup> Pa secojosacari Pueyaso pa niishishoo rupaajinia, Pueyaso Sohuanuuri pa sohuanu secojoteya Pueyaso. Majaari pa niishitiaja niishiniu cutara casaa pa sequeyani. <sup>15</sup> Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secojora Pueyaso pa niishishoo rupaajinia. Pueyaso pa secojorejuhua tama pa rupaajiniajaaja. Naajuhuj, pa sohuanu cuaara jaaquequejora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja.

<sup>16</sup> Pueyaso Sohuanu jaara nia sohuanu secojotere niishishoo rupaajinia, nia tojtianaari maja na naata sequenu: "Jaa, cuaara naa quiiriatej". Majaari nojori niishiniu tamaatia rupaajinia nia secojosano. <sup>17</sup> Naa naa-sucuaari jiyanohua maninia secojiya Pueyaso. Naajaa, saaja najuhua quiyari tamasaara, nojori niishiyaquishacari cuno rupaa. Cuno niishishoo rupaajinia secojosanoori maja na naacunu tamasaara.

<sup>18</sup> Pueyanaa, shuquiriaatia quiyanijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaaja socua nijaniyajini cutarani.

<sup>19</sup> Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhua quiyari. Rupaquijia pohanatasano tama pueya rupaajiniajaajani, cunoori jiyanohua socua maninia tucuyocua pohanatanojini niishishoo rupaajinia. Saaja pueya niishishano rupaajinia cutara cua naata nojori cumaquiniu.

<sup>20</sup> Cuarta Pueyaso muerasunaa, niaari najuhua shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Naa jaara juhua naatujoori quiniu panijajaa, sesa niishirojiyashijia nia quiiri, taa naatujoori quiyacuaani. Saniniuuja, majaari seetanujanaa naatujoori nijaniya. Naaratej, cumantumaca nia quishacari, nia niishirojore maninia nia cumaquitioonura nia rerejosacari. <sup>21</sup> Tariucua-caanu, tama Pueyaso sequesanojaarijia naajio-tasaaquiaari. Naa sequeyari:

"Janiyari taucuaa jiyaramiquiniutianiya cua saquiriosano Israel pueyacuani, cua sequenu panishano nojori pohanatunura cua pueya. Cua pueya niishiyaquishoo rupaacajinia pohanatunutaniyari. Naajaa, niishiyaniija, tahua pohanatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohanatasariquiaa".

<sup>22</sup> Naa Pueyaso sequesacarijij, paari niishiyani, Pueyasoori tamaatia rupaacata na tojiyashijiaa tojtini

saniniujuquiaa na rupaa juucua. Paari saniniuuja tari na rupaa tojtijajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojtiniuria pajaniya nojuaja. Pueyaso sequenu panishano caminiujiushano cutaraari pajaniyara. Cunocuaari tama pa rupaajiniajaaja. Cunoori maja Pueyasoocua tiuyashijiacara. <sup>23</sup> Naaratej, Pueyaso pueya maapue rerejosacari, saaja secaja nijaniyajini-jinio cuaara pocuaara niishishoo rupaacajinia. Naa pocuanu nia tarinitiare quenaaja, tamasa Jesuucua tiuyashijiaa quishacari nia rerejojuajinia, nojori mariqui jiyaniiri: "¡Nio pueyaqui puetunu paatecoorijuhuanajaj!" <sup>24</sup> Saniniuuja, puetunu nijaniyajanaa jaara Pueyaso sequenu panishano caminiujiya tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohanatasano. Puetunu nia pohanatanonjuanaari nojia tacaatiniutianiya sesa miiija na quiniucua. Tama nojuajaarijia niishiniutianiya: "¡Janiyaqui sesa miiija Pueyaso niquiarani!" <sup>25</sup> Naa pohanatasano Pueyasojinijiri puetunu sesa na miishanojuanaa na niishiniutianiya nojiajiniya. Nocuaji, nojuajaari Pueyaso tojijiaa quiniutianiya. Sequenutaniyari: "¡Pueyasoqui seetanujanaa nia tajinia nia quiya!"

**Puetunu nia miirijianaa maninia. Majaari nia riutiocojonu tamonu pocuasacari**

<sup>26</sup> Naaratej, cua tojtiare taa nia miiniutianiya cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuaara quiiri nia cumaquitioonura, socua maninia Pueyaso tojtianaara nia quiniuria. Naacujitij, Pueyaso Sohuanu cumaacata, tamonu naasucuaari jaaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiosano nojiajiniya caminiujiuniutianiya. Tamonu naasucuaari niishishoo rupaajinia pocuanutaniya. Na nuhuaji, tamonu cuaara na pacuura nia rupaajinia, maninia nia tojiniuria. Naa nia miiri maninia. Niquiriyatujua cuaara pocuaara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohanatasacari. <sup>27</sup> Naa jaara niishishoo rupaajinia pocuanu paniri, cuaara pocuaara saa querajaa pueyaja, maja socua. Cuaara pocuaara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuaara pacuura pueya rupaajinia, niishishoo rupaajinia nia sequesano, pueya tojiniuria maninia. <sup>28</sup> Niishishoo rupaa pacuna quiyaquishacari, cuaara pocuaaquiiria cante tamaatia rupaajinia pocuanu paniriquiaa nia niquiarani. Na naata sanaa pocuanu nojiajiniya tamajaaja, saa Pueyaso niquiaraja.

<sup>29</sup> Naajuhuj, nia jaara Pueyaso Sohuanu niishitiosano niojiajiniya pohanatanu paniri, cuaara pocuaara saa querajaa pueyaja, maja socua. Na nuhuaji, Pueyaso Sohuanu cumaaca jiitianaa cuaara saniniujiuria nia pohanatasano, nia niishiniuria, cunote seetanujanaa Pueyaso Sohuanu niishitiosano, maja soj. <sup>30</sup> Naa

pohuatasacari Pueyaso rupaa, tamonu jaara pohu-  
atanu paniya shusha Pueyaso Sohuanu niishitiojosano  
noojiajinia, cante pohuataajaani cuaara sanaajeera, na  
tarajana pocuanura. <sup>31</sup> Naacuajitij, puetunu Pueyaso  
niishitiojosano jiitianaajanaari na naata na pohuatanu.  
Naaratej, niquiriyatujua cuaara pohuataara, na nuhua-  
ji tamonu, na nuhuaji socua tamonu. Naacuajitij,  
puetunu nijaniyajanaa na naata pohuatanu nia ni-  
ishishano Pueyasojiniji. Naacuajitij, puetunu Pueyaso  
muerasujanaari maninia niishitiojosano quiniu-  
tianiya, maninia cumaquishanojuhuj, maninia nia mi-  
iniuria. <sup>32</sup> Maja timia pocuanu jaarajaaja tamonu  
pocuasacari. Majaari Pueyaso Sohuanu pocuatenu tari  
nijaniya, tari tamonu pocuasacari. Nia naata cu-  
taraari sashiniu nia pocuanura. <sup>33</sup> Pa Pueyaso cutaraari  
maninia miijiajanaa. Maja cushitiojojua. Naarate  
pueyanaa, maja tamasa pocuasacari pa riutioco-  
jonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maa-  
puejanaa cuaara naa miiria na rerejosacari. <sup>34</sup> Maajipo-  
hua cuaara sanaa tojitiara Pueyaso rupaa pohu-  
atasacari. Maajipohua cuaara niishitiojiaquiiria pueya  
niquiara. Maajipohua cuaara tojijiaa quiiria, taa pa ni-  
ishitiojosaaquiiaari Moisés Rootasanojinijicuaajani.  
<sup>35</sup> Maajipohua jaara niishiniu paniya socua pohuata-  
na niishitiosanojiniji, nojori cuaara nequesotohuara neya-  
ca tama na tiajiniajaaja, na que maaraja. Cararaatia cu-  
taraari maaji jaara nequesoreetare caya pohu-  
atasacari, Pueyaso muerasu rerejojuajinia. <sup>36</sup> Nia tojiri  
nio cua rootasano pueyanaa. Niaacuajaari niishiya,  
Pueyaso rupaari supueyaquiiaari nijaniyajiniji.  
Naajuhuj, majaari Pueyaso rupaa pohuataanaa ji-  
yaramiquiniu quishaaquiiaari saa niaacuaja. Tamonu  
jiyacajinia, queraatia Pueyaso pueya maapueeri cua ni-  
ishitiojosano tojitiaquiaa maninia cutara. <sup>37</sup> Nijaniya-  
jinijinio, noojiaqueya pueyari Pueyaso Sohuanu  
cumaaca jiitiaa, nia niishiniuria cana cumaacata ta-  
monu pueyano niishitiojiani. Naacuajitij, ¿taa nia se-  
queyani? ¿Majate Pueyaso Sohuanu niishitiojosano  
cua sequesano nijaniya? <sup>38</sup> Cante nio niishiniu  
paniyaquiiani, cuno jiyoteeri maja Pueyaso Sohuanu  
cumaacaraca quiija. Cuno pueyano cuaara to-  
jiaquishaaria saniniuujia.

<sup>39</sup> Naacuajitij cuarta Pueyaso muerasunaa, nia jiaa-  
tiare Pueyaso Sohuanu cumaaca nia jiitanura, pueya  
niquiara nia pohuatanura Pueyaso Sohuanu niishitish-  
hano nijaniya. Naajuhuj, majaari nia tenujunu noo  
pojori, canapuate niishishoo rupaacajinia pocuanu  
paniyani, Pueyaso Sohuanu cumaquishacari nojori.

<sup>40</sup> Nareja maninia nia miiriquia puetunujuanaa.  
Naacuajitij, niquiriyatu cuaara pocuara coteenu, na  
nuhuaji tamonu, na nuhuaji socua tamonu.

#### Cristo samiitiasacariuhua

**15** Cuarta Jesuucua tiunuaanaa, Jesucristo rupaa  
nia niishiriohua, tarijia cua pohuatasano nia-  
janiya, nia jiyanooshaanurani. Niaari nocua tiuquuaari  
maninia. Niaari quiarjia maninia na tojitiaajaa.

<sup>2</sup> Naacuajitij, Jesucristoori niaacuaji tacuquiaa quiarjia,  
maninia nia tojitasacari na rupaa, taa cua pohu-  
ataquiaari nijaniyacuajani. Niaacuajaari Pueyaso  
pueyara jatanishano quiya niaa jaara maja najuhua  
na rupaa tojiaquiiaari. <sup>3</sup> Janiyari niaara caminiu-  
uquiiaari Jesucristo rupaani, taa cua tojiaquiiaaricuaani.  
Nio cutara rupaa nia coteetaquiaari pohuatanunijia:  
Cristoori pocuara cusoquiaari niyacutesanojinia, sesa  
pa miiniuucua. Tariucuacaanu Pueyaso sequenu panis-  
hano caminiujiunaaari naa naajiotaquiaari, taa Cristo  
miishaanutaniya naquiyani. Seetanujuanaa naa mi-  
ishaaquiiaariiri. <sup>4</sup> Jesucristo cusonu nuhuaji, raaco ni-  
asaaquiiaariiri. Jiuujianaraca juuca jaara na shoconu-  
juquiiaari macu na quishacari, na raaco samiitiaquiiaari-  
uhuari. Naa tohuateequiaariiri puetunu tariucuacaanu  
Pueyaso Rupaajanaa, taa nojuajiniji naajiotasaaquiiaar-  
icuaajani. <sup>5</sup> Na nuhuaji, Jesucristoori Pedroocua mue-  
taquiaariuhua. Na nuhuaji, na ji-  
yaramiquishocoriquiano pueyacu muetaquiaariijaari-  
uhuj. <sup>6</sup> Na nuhuaji, muetaquiaarijuhuaj na tojiti-  
naa rerejosaquiiri. Socua quiniento pueyari na niquti-  
aquiiaari jiyacari. Queraatia jiyacari na niquninaajinijinio  
pueyari saminio quiyajaa. Noojiaqueyari tari shaajeco-  
canu. <sup>7</sup> Na nuhuaji, pa Jiyaniijaari Santiagocua mue-  
taquiaarijuhuaj. Na nuhuaji, muetanu pacutequiaari-  
uhua na doce jiyaramiquishocoriquiano pueyacuari.

<sup>8</sup> Puetunu cuno pojori nuhuaji, Jesucristoori socua  
cucua muetaquiaarijuhuaj, nocua tiuujia cua  
quiyaquishacarijia. Naa na paraca cua quishacarijiatej,  
Jesucristoori cucua muetaquiaari na jiyanooniuria  
janiya. Ritia cua jiyatequiaariiri na jiyaramiquishano  
cua quiniurajuhuj. <sup>9</sup> ¿Casaaraquitijia na saquiriojo-  
quiaari janiyatejaj, na jiyaramiquishano cua quiniuria-  
juhuaj? Janiyari puera sesa miijia quiquiaarini cua ni-  
ishiyaquishacari Jesucristo. Cucua na mue-  
taquishacarijia, janiyari Pueyaso saquiriojosano  
pueya miitiaquiiaarini. Cuarta Jesucristo jiyaramiquis-  
hano pueyari maja naa sesa miijiaa na quituniu  
quiquiaari. <sup>10</sup> [Pueyasoori jiyanohua maninia! Cua  
jiyanooquiiaariiri Jesucristo jiyaramiquishano cua quini-  
urajuhuj, taa cua quiya quiarjiaacuajani. Naa quiyani-  
jia Pueyaso jiyanooniucua janiya. Majaari najuhua  
na jiyanooni quiquiaari janiya. Na jiyanooshacari  
janiya, janiyari socua jiyanohua nera poonijiocanu  
cuarta Jesucristo jiyaramiquishano pueyajinijini. Naa-  
jaa, maninia cua poonijosanoori maja tama cua miis-  
hanojuaja na quiniu. Pueyasocuaajaari cua  
cumaquiquiaa na Sohuanuta, maninia cua miiniuria na  
panishano.

<sup>11</sup> Naacuajitij, naa sequeriquiaa nijaniyanijia: cante  
nia pohuataquiaari Jesucristo rupaani, naajaa. Janiyari  
Jesucristo rupaa pohuataquiaaacuahuaj, mariyata taa  
cuarta Jesucristo jiyaramiquishano pueya pohu-  
ataquiaacuaani. Majaari rimiajata cana pohuatasano.  
Niaari cuno rupaacua tiuquuaari maninia.

### Pueyaso muerasu macunucua samiitiasacariuhua

<sup>12</sup> Cuarta Jesuucua tiuuniaanaa, canaa jaara pohu-atariquiaa taa Cristo samiitiaquiaariuhua macujinijini, ¿casaara noojiaqueya nijaniyajinijinio sequequiaani: “Macunucua maja na samiitiaconu quiniutianihua?”  
<sup>13</sup> Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiya-jaacuhuj. ¿Cristoteeri macu quiyajaa? [Maja! <sup>14</sup> Cristo jaara macu quiriquiaja, canaa maara najuhuana pohu-ataa na rupaani. Naajuhuj, niaa maara najuhuana Jesucristoocua tiuya, na pueya nia quiniu paniniuria juucua. <sup>15</sup> Canaacuajaari pohuatanuquiaani Pueyasoori Jesucristo samiitianiyaquishaanutaniya taa nia jiyaniquiaacuajani, canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniuujia, [hiaari jiyajeneya cutara! [Pueyasocujaari seetanujuanaa Jesu samiitianiyaquishaariuhua! <sup>16</sup> Macunucua jaara samiitianiyaquishaanutaniya taa nia sequequiaacuajani, Cristo maara samiitaaquiquiaariuhuj. <sup>17</sup> Cristo jaara samiitaaquiquiaari, niaa jiyoteeri Cristoocua tiuya najuhanaj, Pueyaso na jiyanootiniuria juucua nijaniya. ¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuj. ¿Naatejaatej? <sup>18</sup> Cristo jaara macu quiriquiaja, tariucua shaajecono nocua tiuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua. <sup>19</sup> Pajaniyajuhuj, canapuate saminio quiyajaani, paa maara jiyanoohua taraatia quiyani, pueyaracaanu najuhuana naquiya pa miishacari mijiria. Jaara naa qiritij, pa Jiyaniijia Jesucristo jaara macu quiriquiaja, paa maara najuhuana poonijiori quia pa shuquiritiniuria nojuaja juucuaani.

<sup>20</sup> [Namiitia naa quiyaquiyari! [Cristoori seetanujuanaa samiitianishaquiaariuhua! [canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiuniaajanaari samiitianishaanutaniuhuaacuaj. <sup>21</sup> Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniucua. Naacuajitij, puetunu nojuajiniji supuenaajanaari shaajecoquiaajuhuj. Adán nuhuaji, parta pueyano Jesucristoori saniniuujia Pueyaso tojjia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiuniaajanaari samiitianishaanutaniuhua, pueyaracaanu saminio pa quiniuhua pa Jiyaniijjata. <sup>23</sup> Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiuniaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua

Pueyaso panishacarini. <sup>24</sup> Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianihua, na tucatanuhua puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijajanaa quiniutianiya, na Que cuara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jatasaanutaniyajuhuj, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojana shaajanutaniyaariuhuj. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiidiasano quiriohua, Jesucristoori na Que na niquitionutaniuhua, na Que jiidianuhua puetunujuanaa.

<sup>27</sup> Na Que Pueyasoori Jesu jiyatequiaari Jiyaniijia na quiniuria jiyanoohua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijajanaa. Saa na Que Pueyasojuaari socua Jiyaniijajanaa, maja tamonu. Pueyasojuaari Neyanu jiyaracuaari puetunu na shipinishanojuanaa na jeenucuanura na cumaacata. <sup>28</sup> Na tucatasacari, pa Jiyaniijia Jesucristoori na Que sequenutaniya: “Cua Quena, tari tucataree quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa quiajanijajaari pueyaracaanu Jiyaniijajanaa quiniutianiya cutara, maja socua tamonu”. Naacuajitij, pa Que Pueyasoori Jiyaniijajanaa quiniutianiya pueyaracaanu, puetunu na shipinishanojuanaa na jiidianura maninia.

<sup>29</sup> Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquiniijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuuri? Paa jaara tiuquiniijosaaquiaa Jesucristoocua pa tiuushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhua. Naaari sequeya macunucuaari maja na samiitianishaanu quiniutianihua. ¿Naatejaatej? Macunucua jaara samiitianiyaquishaanutaniuhua taa nia jiyaniyacuaajani, ¿casaara pueya tiuquiniijosaaquiaa shusha shaajeno macu niticuaarini?

<sup>30</sup> Paa jaara samiitianiyaquishaanutaniyani taa nia sequequiaacuajani, canaaquiiri najuhuana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. <sup>31</sup> Seetanujuanaa nia sequeyanijia, janiyari jiyanoohua shuquiriaatia quiyani, Jesucristoocua nia tiuushacari, cua pohuatanuucua na rupaa nijaniya. Seetanujuanaajariuhuj, pueyari cuamonu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua ni-

ishishacari janiyari samiitianishaanutaniuhua. <sup>32</sup> Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuaani, nojuaja jaara samiitianiyaquishaaquiaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: "Pa shuquiriri saminio pa quishacarijia. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani". Naa sesa miiquioquiaari noo pojori, canapuate jiyaniyani macunucuaari maja na samiitianishaanu quiniutianiya.

<sup>33</sup> Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuaatej: "Maninia miijiaari sesa miijiaara jatanishaaree na cojiniuucua sesa miijiaa". Naaratej, majaari nia cojiniu sesoriucua pueya, niaa mariqui seserejaariuhuj. <sup>34</sup> Niishiriojuara nia quiri. Sesa nia miiniu nia cartere. Noojiaqueya niajanijiniinooori Pueyaso niishiyashijiaca quiyajaa. Naa nia sequereenijia pueyanaa, quenaaja nia caririqiniuria.

#### Taamueca pa quiniutianiuhua pa samiitiasacariuhua

<sup>35</sup> Tamonu niajanijiniinooori naasucuaari niishiriojiya: "¿Taa macunucua samiitianijiosaanutaniuhuaaaranii? ¿Taamuecate na cuaqueya quiniutianiyani?" <sup>36</sup> Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritianu. <sup>37</sup> Naajuhuj, niaa jaara saaco natate, tamaatia jajajuhuj, nia natasano jajauri maja juhua neyonarano niqishano. Nia natasanoori saaja shiitianiyojua jajau quiya. Na moritiasacari, jiyanohua tamaatia niqishiyari.

<sup>38</sup> Pueyasoori na maashitiya puetunu na jaamasucuatjanaa, taa na panijacuajani. Pueyasoori puetunu jajajanaa moritianijia tamaatia niqishano na quiniuria. Naa quiniutianiyaariuhua macunucua samiitiasacariuhua. Majaari pa cuaqueya quiniutianiya taa na quiya quiarijiaacuajani. Pa cuaqueyari jiyanohua maninia quiniutianiuhua!

<sup>39</sup> Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniiji. Shuhua cuaqueyari tamaatia quiyajuhuj. Sapitiaaja cuaqueyari tamaatia quiyajuhuj, moojinia na quiniuria. <sup>40</sup> Jiyocuacaanu quiijiaacaari tamaatia cuaqueyaraca, maja juhua mijiria quinaa cuaqueya. Pueyaso seya cuaqueyari shanohua niqishano. Nojori cuaqueyari tamaatia niqishano mijiria quinaa cuaqueyajiniiji. <sup>41</sup> Naajuhuj, pananuuri jiyanohua shacantuuca quiijia. Raca shacantuucaari tamaatia niqishano pananu shacantuucajiniiji. Riya shacantuucaari socua tamaatia niqishano. Naajuhuj, puetunu riyajanaari tamaatia niqishano narta

riyajiniiji. Puetunu Pueyaso shipinishanojuanaari naa tamaatia quiya.

<sup>42</sup> Naajuhuj, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria.

<sup>43</sup> Jamosano pa quete sequeeri samiitianishaanutaniuhua, jiyanohua shanohua niqishano na quiniuria. Cumaacaaju jamosanoori samiitianishaanutaniuhua jiyanohua cumaacaraca na quiniuria. <sup>44</sup> Pa cuaqueya jamosanoori saaja jiyacua rucuanajaca quiquiaari. Paari samiitianishaanutaniuhua tamaatia cuaqueyata, jiyocuacaanu quiijia pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanenura, ¿majateeri Pueyaso niishiniu tamaatia cuaqueya shipininiu na muerasura, na shurucua pa quiniuria? Taaquiriiriniij.

<sup>45</sup> Pueyasoori coteenu pa supuetana shipiniquiaari marajiniiji. Na nuhuaji, na samiitianiquiaariiri. Moisés Naajioneenijiaari naa naajiotasaaquiiaaritiij:

"Adánri saminiora quiquiaari Pueyaso nooshacari na jiquioco".

Jesucristoori saniniuujia jiyatesaaquiiaari juhua pa supuetanara na quiniuria pa supuetana Adán niti. Jesucristoori jiyanohua socua cutara Adánjiniiji! Adánri samiitianishaaquiaari saminio na quiniuria. Jesucristo cutaraari pa samiitianijiajanaa na Sohuanuta. <sup>46</sup> Co-teenujanaa pa supuetanani, majaari na shipinishaanu quiquiaari jiyocuacaanu quiijiarano. Cunora, coteenu pa cuaqueyari saaja mijiria quiijia. Na nuhuaji, pa cuaqueyari jiyocuacaanu quiijiaara jatanishaanutaniya mariyata juhua Jesucristo cuaqueyara.

<sup>47</sup> Adánri saaja mijiria quiriquiano quiquiaari. Marajiniiji shipinishaaquiiaariiri. Jesucristoori saniniuujia jiyocuacaanujinio. <sup>48</sup> Puetunu Adáncaujinio supuenojuanaari saaja mijiria quiijia. Naaratej, puetunu pajaniyanaari saaja cusonuujacani, juhua pa supuetana Adánjuhuj. Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quiijia pa quiniuria. <sup>49</sup> Mijiria pa quishacari, pa cuaqueyari juhua pa supuetana Adán cuaqueya quiya, marajiniiji shipinishano. Majaari pa cuaqueya quiarijia socua maninia Adán cuaqueyajiniiji. Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

<sup>50</sup> Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu. <sup>51</sup> Naajaa, cua tojitiare. Nia pohuatareera pueya niishishoo. Majaari puetunu pajaniyanaa cusonuuriquianoni. Puetunu pa cuaqueyanaa cutaraari jatanishaanutaniyani, maninia cuaqueya pa jiitianura, juhua Jesucristo cuaqueyajuhuj. <sup>52</sup> Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritiacuani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya jone-

neshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniyajuhuj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jiitianurajuhuj, shaajeyashijia-ca pa quiniuria. <sup>53</sup> Cusonuujuua cuaqueya cuaara jatanishaaria, rishijia cuaqueya pa jiitianura saniniuujia. Nio moqueja pa cuaqueyani, jataniniu panishiyari, maninia cuaqueya pa jiitianura, pueyaracaanu pa quiniuria Pueyasota.

<sup>54</sup> Moqueja pa cuaqueya jaara maninia cuaqueyara jatanishaarohua; pa rishiyashijia cuaqueya jaara rishijia cuaqueyara jatanishaarohua; jiyacaritij pocua niishirini tariucuacaanu sequesanoori tari tohuateeree. Naa naajiotasaaquiaari tariucuacaanu Pueyaso Rupaa-jiniatej:

“Dejee! Pa Jiyaniijaari na muerasu mashiquirii macunucua quiquojiniji! <sup>55</sup> Cusojuananaa, Quiaaqui tari shocotasaaree! Quiaari shocotasaaree! Sesaacanaa, quia cusojutaajari juhua mohuacara quiqii cumaa-caaju. Shaajeconoori samiitiacoree!”

<sup>56</sup> Pueyanaa, puetunu pajaniyajanaari cusonuuquiaa sesa miijia pa quiniucua mijiriani. Paari sesa quiquiaani pa tojiyaquishacari tariucuacaanu Moisés Rootasano Pueyasojiniji. Naaratej, puetunu pueyajanaari csonu niishiya. <sup>57</sup> Naajaa, pa Jiyaniija Jesucristo miishanota pocuara, Pueyasoori pa mashiquiquiaa pa cusoyaquiniucuaaji. Naaratej, paari Pueyaso sequequiaani: “Paacarasho canaa Pueyasonaa! Quiaacuajaari canaa shocotaniutianiya csonu, quia Niyanu cusonucua canaacuara, pueyaracaanu canaa quiniuria quia shuriucua. Jiyanhua paacarasho!” Paari naa maninuhuaqueetaa pa Que Pueyasoni.

<sup>58</sup> Naaratej cua panishano pueyanaa, nia numaama nia racatare cua niishitiojosano niajaniya. Saa Pueyaso rupaaja nia tojitiare, maja tamaatia niishitiojosano. Pa Jiyaniija nia poonijiore socua jyanohua, na panishano nia miiniuria saaja. Pa Jiyaniija pa poonijiosanoori maja najuhua na quiniu.

### Casamijuniucua Pueyaso pueyara cumaneeca reratesacari

**16** Quiarijiani, nia riuquareera taa nia miiniutianiyan, cumaneeca nia reratenura casamijuniucua. Cuno cumaneecani, paari na jiyaronutaniya parta Pueyaso muerasura Jerusalén tiacajiniani. Naa cuaara maninia miiria, mariyata taa cua rootacanucua ja Pueyaso pueya maapue Galacia jiyajiniani. <sup>2</sup> Naa nia miiritij. Puetunu domingo juucajanaa, puetunu pueyanaa cuaara racataara tama na niqitiosocoriquiano cumaneeca, teyano nia niqitionutaniya niarta Pueyaso muerasuracuajani. Naa nia racatare juhuataja nia niqitiosocoriquiano cumaneeca puetunu semaana-janaa, maja na reresaanura shusha cua tiuquishacari niaacua. <sup>3</sup> Niocua maninia pueya saquiriojore, nia niqitiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari

cua naajioneeca jiyarotanutaniya nojorini. Naajioreera parta Jesucua tiuuniaa pueyacuara Jerusalén tiacajinia, nojori cuaara shuquiriaatia maseera cumaneecata nia jyarotasano pueya. <sup>4</sup> Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuj.

### Pablo naquerejosacari

<sup>5</sup> Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyan. <sup>6</sup> Janiyari maja ritia cua tajiniu paniniu niajaniya. Niaata camueenujunu paniya pueyaracaanunijia, pa Jiyaniija jaara naa panijuhuj. Janiyari shuniya shocotenu paniya niaatani. Na nuhuaji, nia naata cua naacunu cua jiitianura cua panishano, cua pasocoriquiano tee Pueyaso jiyaronu paniya janiyacujani. <sup>8</sup> Janiyari niya Éfeso tiacajinia camueenujijaaari, Pentecostés juuca cua sashishacari. Queraatia pueyari Jesucristo rupaa tojtianu paniya niya. Naajuhuj, queraatia pueyari Jesucristo rupaa ruureta saniniuujia. Naaratej, janiyari jyanohua socua Jesucristo rupaa pohuatanu panijaa Éfeso pueya niqiarani. Naajaa, janiyari niaacua quianutianiyan Pentecostés juucara queranacunuunu nuhuaji.

<sup>10</sup> Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocuaari pa Jiyaniija poonijioquiaa mariyata taa cua poonijioquiaacuani. <sup>11</sup> Naaratej, maja Timoteo nia rerequetenu. Niocua na naacure saniniuujia, cucua na tiuquiniuhua shuquiriaatia, maninia nia miiniucua nera. Janiyari niya na sashiya parta Pueyaso muerasutani. <sup>12</sup> Janiyari Apolota pocooriquiaani. Janiyacuajaari na nenecooriquiaa juucuni, niaacua na quianura parta Pueyaso muersuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

### Pablo sequesano, naajionu na puecasacari

<sup>13</sup> Cuarta Jesucua tiuuniaanaa, niishiriojuuca nia quiri. Jesucristo rupaa nia niishiri maninia, seetanujanaa na tojtianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniija panishano nia miiniuria. <sup>14</sup> Puetunu nia miishanojuanaa cuaara quiiria seetanujanaa nia paniniutia.

<sup>15</sup> Pueyanaa, niaari niishiya Estéfanasri necohuata coteenu Jesucristo tojtianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia. <sup>16</sup> Naarate nia sequenu panijiani, niajaniya cuaara quiiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyanaa, noo pojori canapuate naa maninia miiquiaa Pueyaso muerasucujani.

<sup>17</sup> Jyanohua shuquiriucuaanijia Estéfanas tiuquishacari niajaniyajiniji Fortunatota, Acaicota-

juhuaj. Nojoriiri cua shuquiritiriucuaa nia niti, cua jiaatiasacari cua niquniuria niajaniya juucua. <sup>18</sup> Nojoriiri coojia cajitiriucuaa puera cua niishiriojiyaquiniuucuaaji niaacua. Nojori naasucuaari nioojia cajitiquianujuhuaj, nojori pohuatasacari niajaniya janiyajiniji. Niajaniya cuaara shuquiritiaara nojori, naa nojori miishacari maninatej.

<sup>19</sup> Pueyaso muerasu maapue niya Asia jiyajiniaari cua sequerucuaa, cua saruhatanura niajaniya. Aquila, Priscilano, nojoriiri jiyanojua nia saruataajuhuaaj, narta Jiyaniijia muerasu nia quiniuucuaajuhuaaj. Pueyaso pueya maanuuri nia saruataajuhuaaj, nooj, teyanote Aquila tiajinia rerejoquiaacuajani. <sup>20</sup> Puetunu parta Pueyaso muerasujuanaari niya nia saruataajuhuaaj.

Nia saruhatatoosacari, nia saruhatatoore seetanujuanaa Pueyaso paniniutia.

<sup>21</sup> Quiarijiani, tama cua juaashiquiatajaaja saaja nioniyojua naajioreeraj, cua saruhatanura niajaniya. Naacuajitij, niocua niishiri nio naajioneeri seetanujuaanaa janiyajiniji.

<sup>22</sup> Cante maja pa Jiyaniijia panijia quiyani, Pueyaso cuaara jataara cuno, saniitosocoriquiano.

¶iyaniijianaa, quia nimiohua!

<sup>23</sup> Pa Jiyaniijia Jesu cuaara cumaquiiria niajaniya na Sohuanuta. <sup>24</sup> Janiyari puetunu niajanijanaa paniyani Jesucristo paniniutia. Tariucuaaja, cua panishano pueyanaa.

## 2 CORINTO

### Pablo saruhatasacari Pueyaso pueya maanu Corinto tiacajinia

**1** Janiyari Pablóni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio niaacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyaani, puetunu Acaya jiyajinia Pueyaso tojtiajaca pueyacuaraajanaano. <sup>2</sup> Pa Que Pueyaso, mariyata pa Jiyaniijia Jesucristo cuara cumaquiiria niajaniya. Nojori cuara jiyateera niajaniya juhuajaniya quijiaca nia quiniuria.

### Pablo miishacari naquiya

<sup>3</sup> Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. <sup>4</sup> Nojuajaari pueyaracaanu pa cumanijiaquiaa naquiya pa miishacari. Naacuajiti pa naata cumanijianu tamasacajuahuaj, naquiya nojori miishacari, taa Pueyaso cumanijiaquiaa pajaniyacuaani. <sup>5</sup> Seetanujuanaa, Cristo rupuejaca pa quishacari, paari naquiya miishaaquiaa juhuaj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. <sup>6</sup> Naacuajitij, canaa jaara naquiya miishaaquiaa Cristojiniji canaa pohuatanuucuaani, Pueyasoori canaa cumaquiiaa saaja canaa rejeretanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso pueya nia quiniuria, nia cumanijiasaanurajuahuaj. Naajuhuj, Pueyaso jaara canaa cumanijiarecuaa, naacuajitij, canaa naata nia cumanijianujuhuaj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. <sup>7</sup> Canaari seetanujuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucujahuaj, taa canaa miiquiaa naquiyaacuaani. Naacuajitij, Pueyasoori nia cumanijianutaniyajuhuj, taa na cumanijiaquiaa canaacuaani.

<sup>8</sup> Canaa panishano Pueyaso pueyanaa, canaari paniyani nia niishiniuria taa canaa tacaquianuni, jiyanohua naquiya canaa miishacari Asia jiyajinia. Canaari puera jiyanohua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jiyaniriquiaani maja naasucua tari canaa rishiniu quiniutaniya. <sup>9</sup> Seetanujua-

naa, canaari jiyaniijiani Pueyaso naasucuaari nareja canaa shanacunutaniya canaa cusunuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samiitianijiojua. <sup>10</sup> Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusunuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejehuj. <sup>11</sup> Naacuajitij, Pueyaso miishacari maninia canaa, queraatia pueya secjonuucua canaacuarajuhuj, queraatia pueyari Pueyaso sequenutaniya, "paacarasho".

### Pablo pohuatasano casaara na quiaaquiiaari Corinto pueyacuaani

<sup>12</sup> Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca niquiaranio. Majaari canaa sapojonu quijia niajaniya. Canaari seetanujuaana niaacua taraajejani Pueyaso jiyatenuucua canaa nia panijia canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. <sup>13</sup> Cunora, janiyari nia nequesotaani, ¿casaara nia cushitiquianu canaa naajionee nia serojosacarini? Puetunu canaa naajioneecajiniajanaa majaari canaa naajionu quiquiaa jiyajeneta casaa, nia cushitiniuria. Puetunujuanaacuajaari maatia niishishaatia quiquiaa nia serojosocoriquiano. <sup>14</sup> Niaacuajaari tari secaja niishiya taa canaa paniya jiyanohua niajaniyani. Pa Jiyaniijia Jesucristo tiuquishacarihua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijia quiquiaarini. Naajuhuj, niajaniyari canaa timitiasano quiniutaniyajuhuj.

<sup>15</sup> Cua jyanishacari niaa naasucuaari seetanujuanaa cua panijia, taa cua paniquiaa niajaniyacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacuajitij, janiyari niishiriojoriquiaani cua naata naasucua nia shuquitiniu Pueyaso rupaata, cua quiasacari Macedonia jiyajiniara, naajuhuj, cua tacatesacarihua cunocojuhua. Janiyari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhua. <sup>17</sup> ¿Niaateeri jiyaniquianu janiyari nareya



nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naque-rejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niquijiotenu quiquianu naa cua sequesacari niajanijatej. <sup>18</sup> ¿Janijateeri coojia niquijotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani?

Pueyasocuaajaari niishiya, na rupaa canaa pohu-atasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup> Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. <sup>20</sup> Jesucristocuaajaari tari tohuateequiaari puetunu tariucuacaanu Pueyaso sequesanojuanaa pajaniyara. Naacuajitij, pa tiushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujanaari canaa quia sequesano, Pueyasonaa”. <sup>21</sup> Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojjijaca canaa quiniuria, niajanijajuhuj. Pueyasoori pa niquitioquiaari na Sohuanu, seetanujuanaa na muerasu pa quiniuria. <sup>22</sup> Pueyaso Sohuanu pa jiitiasacari poojiajinia, naacuajitij, paari tari Pueyaso sesa jiitiaa juhua naajiotasano poojiajiniani, saa neraja pa quiniuria. Na Sohuanu pa jiitiasacari poojiajinia, paari niishiyani, paari puetunu na sequesanojuanaa maseriquianoni.

<sup>23</sup> Niaari cua jiyaniquianu janiyari najuhuaa coojia niquijotejani, niaacua cua quiaaquiniuuca taa cua sequecanu coteenu niajanijacuajani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria niajanijatej, janiyari jaara nia nacasusee jiyanojuani. <sup>24</sup> Canaari maja nia jiyaniijiani canaa shiniujiuniuria puera niajanijatej, Jesuucua nia tiuuniuria. Niaacuajaari tari maninia Jesuucua tiuujia. Canaari saaja niarta Pueyaso pueyani, canaa cumaquiniuria niajanijatej, socua pa Jiyaniijia tojjijaca nia quiniuria, seetanujuanaa shuquiriaatia quijia nia quiniuria.

**2** Janiyari tama sequecanujuanijia, maja juhuari niaacua cua quianu quiniutianiya, maja cua taraajetenura niajanijatej. <sup>2</sup> Janiya jaara nia taraajetere cua nacasusacari niajanijatej, ¿cantucua cua timitiri que-naajani? ¿Cua taraajetesano pueyateeri cua shuquiritiniutianiya? Maja. <sup>3</sup> Naaratej, janiyari niaacuara naajiojanuni, cua nacasunura juhuacari niajanijatej, cua taraajeyaquiniuria niaacua cua tiuquishacari. Janiya jaara sashiri cua nacasunura niajanijatej cua tiuquishacari niaacuani, janiyari maara jiyanojuana nia taraajetereni, jeecatoojua nia quishacari. Saniniuuja, niaa jaara juhuacari jeecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiq. <sup>4</sup> Janiya jaara niaacuara naajiojanu coteenu cua naajioneeni, janiyari jiyacari jiyanojuana

tacaariquiaa niaacuani. Coojiaari jiyanojuana taraajeriquiaa. Janiyari jiyacari nujuqueriquiaa janiyatej. Majaari cua naajionu quiquianu cuno naajioneeni cua taraajonura niajanijatej. Cunoori seetanujuanaa quiquianu cutara cua niishitiniuria niajanijatej, taa cua panijatej jiyanojuana niajanijatej.

### Cuno sesa miijia cuaara jiyanooshaaria jaara tari pishirii sesa na miiniujiniji

<sup>5</sup> Cuno sesa miijiaari maja na taraajetenura quiquianu saa janiyatej. Quera puetunu niajanijatej naasucuaari taraajecanu cuno pueyano miiniuuca sesa. Seetanujuanaa, majaari puetunu niajanijatej taraajetenura quiquianu. Janiya jaara sequerene: “Puetunu niajanijatej taraajecanu”, janiyatej maara puera na maateyani. <sup>6</sup> Puetunu niajanijatej jiyatenuuca nojuaja saniitosano na quiniuria, nojuajaari tari noojia tacatorohua sesa na miiniujiniji. Tariucuaja. Majaari socua na saniitionu. <sup>7</sup> Quiarijiani nojuaja nia jiyanoori-ohua. Nia cumanijarohua, nojuaja mariqui puera tacaariiri jiyanojuana na taraajecari. <sup>8</sup> Nocuaari janiyari jiyanojuana nia rootaani, maninia nia miiriohua cuno pueyano, na niishitiniuria niaacua na panijatej. <sup>9</sup> Janiyacuajaari cunora niaacuara naajiojanu tarini, taa nia miiniutianiya cuno pueyanoni, cua niishitiniuria niaate seetanujuanaa pa Jiyaniijianijatej cua rootasano tojjijatej. <sup>10</sup> Cua tojjijatej, cana nia jiyanooriicuaani, janiyari na jiyanojuana. Naacuajitij, pueyano jaara sesa miiriquia, janiyari Cristo niquiara na jiyanoquiaa juhuaj, jatiq nia quiniuhua. <sup>11</sup> Naaratej, niarta Pueyaso pueya nia jiyanooriquia, Sesaaca mariqui pocua riuticoreeri, juaajia nia jiyatenura niajanijatej, pa jiyanooriicuaquiniuuca. Paacuajaari maninia niishiyani taa Sesaaca niishitiniuria sesa miijiacara na jiyatenura niajanijatej, paa jaara jiyanojuana quiriqianu.

### Pablo tacaashacari Troas tiacajinia na quishacari

<sup>12</sup> Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanojuana tojjijatej paniriquiaa Jesujiniji cua pohuatanura juucua. Jiyacari-tij, seetanujuanaa nojori niquiara pohuataa quiriqiaari. Pa Jiyaniijia Jesuuri juhua tiotiu riatacanu cucuaari juucua, cua pohuatanura nojuajiniji tii. <sup>13</sup> Janiyari saaja nojori tiujacanu puera cua tacaashacari, cua riurataaquiniuuca pa tarajanu Tito. Janiyari juucua paniriquiaani cua pohuataa niajanijatej. Janiyari cunora tacaariquiaa jiyanojuana. Naaratej, janiyari Macedonia jiyajinia quiaarohuani, Tito cua pajenuhuara tii.

### Pa Jiyaniijia Cristoori pa paraa pa shocotaniija

<sup>14</sup> Janiyari jiyanojuana shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuuca pa Jiyaniijia Cristoocua. Pueyasoori na rupaa pohuataniquiaa canaa. Naacuajitij, canaa niishishano Jesucristojinijatej

juhua shanohua jaanutaja jaanujuquiaa pueya tajinia puetunu tiqiyocuajanaa. <sup>15</sup> Pueyasora, canaari juhua shanohua jaanutajani, Cristo quishacari canaa jiuujia-jinia. Nojuajiniji canaa pohuatanuusacari, canaari puetunu pueyarajanaa jaanuuquiaani: Pueyaso muerasurano, saniitosaariquiano pueyaranio. <sup>16</sup> Saniitosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueteeeri seetanujuaanaa Pueyaso jiyaramiquishanoni, na rupaa nojori pohuatanura, pueya na tiuuniuria Jesucristoocuanii? <sup>17</sup> ¿Noo pojoritii, najuhuaana Pueyaso rupaa pohanuuquiaa, pueyajiniji na masejonura pumaneeca na sapojonuunutatej? Maja. Majaari canaa pohuatanu quiquiaa Pueyaso rupaana, pueyajiniji canaa masejonura Pumaneeca. Canaa cutaraari seetanujuaanaa Pueyaso jiyaramiquishano pueyani, na rupaa canaa pohuatanura. Canaari seetanujuaanaa pa Jiyaniijia rupaa pohuataquiaa Pueyaso niquiarani, Cristo rupesano canaa quishacari.

### Quiarinio rupaa Jesucristojiniji

**3** Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijia cutara. Puetunu tiqiyocuajanaa quijiaa pueyari canaajiniji niishiyacuaja, canaari seetanujuaanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua. <sup>2</sup> ¿Naa-jioneetucua casaara panishaareni? Puetunu pueyajanaari na naata niishiniucuaaja canaari seetanujuaanaa Pueyaso jiyaramiquishano pueyani, nojori niishishacari taa canaa paniya jiyanoohua nijaniyani. <sup>3</sup> Cristocuaajaari nioojiajinia naajiotaquiaari na rupaa, nojuajiniji canaa pohuatanuucua nia niqiuara. Majaari na rupaa na naajiotanu quiquiaari nioojiajinia minianata. Seetanujuaanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuaanaa nioojiajiniajanaa naajiotaquiaari na rupaari. Naa jatanishano pueya nia quishacari, puetunu pueyajanaari niishiya niaari seetanujuaanaa Pueyaso pueya, nojuajiniji canaa pohuatanuucua nijaniya.

<sup>4</sup> Naacuajitij, canaari seetanujuaanaa niishiyani canaari Pueyaso jiyaramiquishanoni. Cristocuaajaari naa canaa niishitiquiaa maninia. <sup>5</sup> Majaari canaa niishirojonu canaa miijiosanoori tama canaa cumaacata canaa miishanojuaaja. Maja. Canaari saaja Pueyaso cumaacata poonijioquiaani. <sup>6</sup> Na cumaacata, nojua-

jaari canaa jataniquiaari quiarinio na rupaa pohanu- atanaa canaa quiniuria. Quiarinio na rupaari seetanujuaanaa Pueyaso Sohuanu cumaacaraca cutara, pueya na jataniniuria seetanujuaanaa Pueyaso niqiohuanajori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. <sup>7</sup> Naajaa, cuno rootasano saajianeecaacua quejasononi, cunoori jiyanoohua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucua nocua pacuriquiaa. Naacuajitij, na rosesacariuhua Israel pueyacua, na jiquiooori puera shacantuucua quiquiaari. Naaratej, narta Israel pueyari maja na naata na jiquioo niqiniu quiquiaari. Na nuhuaji, cuno shacantuucuaari jacaria maquesaquiariuhua.

<sup>8</sup> Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatanuucua. Cunoori socua shanohua shacantuucua cutara Moisés jiquioojiniji. <sup>9</sup> Moisés pohuatasano Pueyaso rootasano nojuajani, cunoori seetanujuaanaa jiyanoohua maninia quiquiaari. Naaratej, Moisés jiquiooori shacantuucua quiquiaari. Naajaa, na pohuatanuucua jiniji, Israel pueyari saaja niishiquiaari, Pueyasora, nojoriiri sesa miijiaa quiquiaari. Saniniuujia, quiarijaari socua jiyanoohua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquua seetanujuaanaa sesa miyashijiacara nojori jiyatesaanura Pueyasora. <sup>10</sup> Pueyaso jiyatenuucua Moisés tariucuacaanu na rupaa pohuatanu na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanoohua maninia rupaa canaa pohuatanura Moisés pohuatanuucua jiniji. <sup>11</sup> Moisés shacantuucua maquesaquiariuhuanu, cunoori maja na jataniniu quiquiaari Israel pueya. Quiarija saniniuujia, Pueyaso Sohuanu cutaraari pa jataniquiaa seetanujuaanaa pueyaracaanu shacantuucua quijiaa pa quiniuria.

<sup>12</sup> Quiarijiani, canaari niishiyani paari pueyaracaanu shacantuucua quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup> Majaari canaa miiniu taa Moisés miiquiaaricuaani. Nojuajaari quenaaruque toqueta na jiquioo mishiquioquiaari narta Israel pueya niqiyaquiniuria na shacantuucua maquesaano. <sup>14</sup> Israel pueya jiuujiaaari juhua toqueta mishiquiosano quiquiaarijuhuaj. Cumajiuujiaa nojori quiniuucua, majaari Israel pueya niishiniu quijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup> Quiarijaari naajuhuj. Moisés naajioneeca jaara serojosaariquia Israel pueya niqiuara, nojori niishitiajaari juhua toqueta mishiquiosano

quiyajaa, maja nojori niishiniuria nojori tojishano.

<sup>16</sup> Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiajajiniiji jaariuti-  
asaaquiaa, maninia na niishiniuria Pueyaso Rupaa.

<sup>17</sup> Pa Jiyaniijiaari Pueyaso Sohuanujuhanajaj. Pa Jiyaniijia Sohuanu jaara poojiajania quiya, paari Sesaa-  
cajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua to-  
queta mishiquiosano. <sup>18</sup> Naacujitij, puetunu pajaniya-  
janaari juhua niquitiu nenecuaquiaani, pa Jiyaniijia  
shacantuuca pacusacari pocua. Cunoori pa sohuanu  
rupuetoosacari nata. Naacujitij, nojuajaari pueyara-  
caanu pa jataniquiaa jacaria, socua shacantuuca quiji-  
aca pa quiniuria juhua nojuaja, na Sohuanu pooni-  
josacari poojiajania.

**4** Naa pa Jiyaniijia poonijosacari canaa jiuujiajini-  
atej, majaari canaa pishiniu quiquiaa canaa pooni-  
josacari nera. Pueyaso jiyanooniucua canaa, nojua-  
jaari canaa jiyatequiaari na rupaa pohuatanaa canaa  
quiniuria. <sup>2</sup> Majaari canaa miiniu quiquiaa cararaatia  
casaa, taa tamasaca miiquiaacuaa jiyasohuani. Majaari  
canaa pohuatanu quiquiaa Pueyaso rupaa canaa  
cuaracashiniutia. Naajuhuj, canaa pohuatasacari, ma-  
jaari canaa jataniniu quiquiaa Pueyaso rupaa. Canaari  
seetanujuanaa maatia pohuataquiaa Pueyaso Ru-  
paani, puetunu pueyajanaa niishiniuria nojoriiri na  
naata canaacua tiuuniu. <sup>3</sup> Teyano pueyate canaa pohu-  
atasano Jesucristojiniiji niishiyaquiyani, cuno pojoriiri  
shaajasaariquiano. Nojoriiri niishiyaquiya, juhua to-  
queta mishiquiosano nojori jiuujia quishacari. <sup>4</sup> Pueya-  
so rupaacua tiuyashijiaca nojori quishacari, nojori  
jiyaniijia Sesaacaari nojori jiuujia jiyatequiaa juhua  
cariyojuarura, Pueyaso Rupaa mariqui nojori jiuujia  
cuhuatareeri. Nojori jaara Pueyaso rupaacua tiu-  
uriquia, nojori maara niishiri, Cristoori seetanujuanaa  
shacantuuca quijia cutara, juhua na Que Pueyaso-  
juhuaj. <sup>5</sup> Canaa pohuatasacari Pueyaso rupaa nia-  
janiya, majaari tama canaajiniijiaaja canaa pohuatanu  
quiquiaa nia timitianura canaa. Canaari saaja nia po-  
huataquiaa cutarani, Jesucristoori seetanujuanaa  
Jiyaniijiajanaa cutara. Canaari tama canaa cuaqueya-  
jaaja jiyatequiaa juhua nia seya canaa quiniuriani,  
canaa panishacari pa Jiyaniijia Jesu. <sup>6</sup> Canaari naa  
maninia miijiacani, Pueyaso cuhuatanuucua canaa jiu-  
ujia. Jiya shipinishacari, nojuajaari sequequiaari:  
“Cuhuashiqui cuaara coretaara ninishiquiji”.

Quiarijiaari naajuhuj, nojuajaari poojia cuhuataquiaa-  
juhuaj, pa niishiniuria nojuajaari tojetaarucujanaa  
maninia quijia. Paari cuno niishiyani, Jesucristojiniiji pa  
niishishacari. Nojuajaari seetanujuanaa shacantuuca  
quijia cutara, Pueyaso Niyanu na quiniuucua.

**Paari maninia quijiaa quiniutianiyani saaja Pueyaso  
rupaacua pa tiuushacari**

<sup>7</sup> Cuno cumaaca canaa na jiidiaani, cunoori Pueyaso  
cumaaca cutara. Saniniuuja, canaa cuaqueyari cumaa-  
caaju, saaja juhua maraujiniiji panishano pataco.  
Naacujiti niishishiyari, cuno cumaaca pueya jatanii-

jiani, cunoori seetanujuanaa Pueyaso cumaaca, maja  
tama canaa cumaacaaja. <sup>8</sup> Naacujitij, canaa paraa  
cosejosacari canaa, majaari canaa tarinitianu quiquiaa  
Pueyaso rupaa pohuatanu, cuno cumaaca canaa jiiti-  
asacari. Jiyanoohua canaa tacaashacari, naajaa, majaari  
canaa tarinitianu quiquiaa Pueyasora poonijionu.

<sup>9</sup> Canaari naquiya miishaaquiaaaniuhuj. Naajaa,  
majaari Pueyaso cartenu quiquiaa canaa. Naajuhuj,  
canaari juhua quiaquesano jiyocuara jaque-  
roosaaquiaaaniuhuj. Naajaa, majaari canaa cuso-  
juasaanu quiquiaani. <sup>10</sup> Puetunu tiquiyocujanaa  
canaa quishacari, canaari pueyaracaanu tama canaa  
cuaqueyajaaja panitiaquiaani, taa pa Jiyaniijia Jesu  
panitiaquiaari tama na cuaqueyajaaja pocuaracuaani.  
Naacujitij, canaa na niquitiosano cumaaca pooni-  
josacari canaa rishiyashijiaca cuaqueyajinia, pueyari  
niishiquiaa, Jesuuri seetanujuanaa saminio. <sup>11</sup> Mijiria  
canaa quishacari, pueyari pueyaracaanu canaa  
puecoonu paniquiaani, Jesujiniiji canaa pohuatanu-  
cua. Naacujitij, saminio na jiidiasacari canaa, Jesu  
cumaacaari niquishaaquiaa rishiyashijia canaa  
cuaqueyajinia. <sup>12</sup> Canaari juhua piriuiquiniuuquiaani,  
canaa pohuatanuucua Pueyaso rupaa nia niquiara. Ni-  
aari pueyaracaanu rishijiacara quiriquiano saniniuuja,  
canaa pohuatasanoocua nia tiuuniuucua.

<sup>13</sup> Tariucuacaanu Pueyaso Rupaajinia, supuetana  
David naajotasanoori naa sequeya:

“Pueyasooocua cua tiuuniuucua, janiyari pocuareeni”.  
Canaari naajuhuj. Pueyasooocua canaa tiuuniuucua,  
canaari na rupaa pohuataquiaani. <sup>14</sup> Canaa jaara  
puecoosaariquia na rupaa canaa pohuatanuucuaani,  
naajaa. Canaacuaajaari niishiyani, pa Jiyaniijia Jesu  
Samiitianiacuaajaari canaa samiitianijionutaniuhua-  
juhuaj, Neyanu Jesu rupuesano canaa quiniuucua.  
Pueyasoori canaa rijionutaniya puetunu niajaniyata-  
janaa, pueyaracaanu na shuriucua pa quiniuria.

<sup>15</sup> Naacujitij, canaa jaara rejeretaquiaa naquiya canaa  
miishaanu Pueyaso rupaa canaa pohuatanuucuaani,  
puetunu cunojuanaari niaacuara, maninia nia quini-  
uria Pueyasora. Naa Pueyaso jiyanooniucua niajaniy-  
acuaatej, socua queraatia pueyari na timiniutia na se-  
quenutaniya, “paacarasho”. Pueyasoori jiyanoohua  
shuquiritiasaanutaniya, queraatia pueya na jiyanooni-  
uucua.

<sup>16</sup> Naaratej, majaari canaa pishiniu na rupaa canaa  
pohuatana. Canaa cuaqueyari saaquianoshiya. Naa-  
jaa, canaa jiuujiaari saniniuuja puetunu juucajanaa  
socua mashajashiyacujua. <sup>17</sup> Janiyara, puetunu naquiya  
canaa miishacarijanaa mijiria, cunoori secaja, ru-  
paquijiajuhuaj. Cuno naquiya miiniu canaa rejeretanu-  
ucua, [Pueyasoori cunora jiyanoohua maninia miiniu-  
taniya canaa! Cunora, canaari shacantuuca quijiacara  
jatanishaanutaniyani, pueyaracaanu rishijiaa canaa  
quiniuria. <sup>18</sup> Naaratej, majaari canaa jiaatianu quiquiaa  
canaa jiidianura mijiria canaa niquishano casaa. Canaa  
cutaraari Pueyaso jiidiasano niquishoo casaacua jiaati-  
aquiaani. Mijiria niquishano casaari saaja shaajeja

casaa. Pueyaso jiiitiasano pa niquishoo casaa saniniunijia, cuno cutaraari shaajeyashijia.

**5** Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jiiitiasano pa shoque jaara cusoquee, paacuaajaari niishiyani, paari tari jiiitiaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyacaanu rishiniutianiya pa sohuanu quiquiora. Cunoori maja pueyano shipinishano. <sup>2</sup> Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucuaaji tiasano quiquio. <sup>3</sup> Canaari cuno quiarinio cuaqueya cushiyonutaniya juhua toqueni, maja juhuasu canaa sohuanu quiniuria. <sup>4</sup> Nio cuaqueyajiniia canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuanucua. Canaa cutaraari canaa quiarinio cuaqueya cushiniu paniani, Pueyaso shipinishano canaari. Naacuajitij, nio shaajaja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. <sup>5</sup> Pueyasojuaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niquitioquiaa na Sohuanu, pa niishiniuria nojuajaari seetanujuanaa naa pa miiniutianiya.

<sup>6</sup> Naa canaa niishishacarijij, majaari canaa tacaaniu quiquiaa. Canaacuaajaari niishiyani nio cuaqueyajinia canaa quishacarijia, majaari juhuanujuaja pa quiniu pa Jiyaniijia shuriucua. Naacuajitij, paari tucuacaanu quiyajaani pueyaracaanu pa quiijiarano quiquiojiniji.

<sup>7</sup> Cunora, mijiria canaa quishacarijia, majaari canaa quiniu tama canaa niishitijatajaaja. Canaa cutaraari canaa Jiyaniijiaacua canaa tiuuniutia quiquiaani.

<sup>8</sup> Naacuajitij, canaari shuquiriaatia quiya mijiriani, nocua canaa tiushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata.

<sup>9</sup> Naacuajitij, canaa jaara nio cuaqueyajinia quiyajaa mijiriani, naajuhua canaa jaara na cartequeeni, canaari saaja pa Jiyaniijia shuquiritiniucua jiaatiaani.

<sup>10</sup> Puetunu pajaniyajanaacuajaari Jesucristo tajoji na nequesoreesaqui nujuatejosaariquianoni. Cuniqiu, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaca. Saniniuujia, sesa miijiacaari taraatia miishaanutaniyacujua.

#### Pueyasoori pueya jiyanooni panijia cutara

<sup>11</sup> Naaratej, canaa niishishacari jiyanoohua puereta quiniutianiyaari pa Jiyaniijia saniitosacari na tojiti-aashijia, canaari cunora saniniujuquiaa pueya toji-

tiniuria Pueyaso Rupaani. Pueyasocuaajaari niishiya canaari seetanujuanaa nera poonijionaani. [Seetanujuanaa naa nia niishitiriquiajaanihuaj! <sup>12</sup> Majaari nia jiyaniinu canaari tama canaajiniijiaaja nia pohuatanu coteerohuanihua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniucua. Naacuajiti nia naata cuno pueya tacunu canaacuaji, cuno pojori canapuede sapuenu juhua maninia quiijaca niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. <sup>13</sup> Noojiaqueya niajanijiniinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriquiani, canaari naa quiya niaarani, maninia canaa niishitiojonura niajanija. <sup>14</sup> Cristo paniniucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajini pohuataquiaani. Canaacuaajaari niishiyani, nojuajaari puetunu pueyacuajanaa cusoquiaari. Naa na cusuucua puetunu pueya nitijanaatej, Pueyasora, puetunu pueyajanaari tari cusuucuaiaari Cristota. Naacuajitij, Pueyasoori na naata jiyanooni puetunu Neyanuucua tiuuniaajanaa. <sup>15</sup> Cristocuaajaari puetunu pueyacuajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhua. Naaratej, paa cuara miiria saa na panishanojua. Majaari socua pa miiniu tama pa panishanojuaaja. <sup>16</sup> Tarijia, canaari saaja canaa panishano pueyacuara taraajejani. Quiarijia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhua. Quiarijia cutara, majaari naa canaa niishiriojonu nojuajini. <sup>17</sup> Naajuhua, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatanocuaaja. Saniniuujia, puetunujuanaari quiarinio quiya.

<sup>18</sup> Puetunu cunujuanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurajuhua.

<sup>19</sup> Naacuajitij, Pueyasoori mijiria quinia jiyanoocua saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaari canaa jiyatequiaari na rupaa pohuataanaa canaa quiniuria, pueya canaa tiuutiniuria Neyanu Jesucristoocua, jiyanooshano nojori quiniuriajuhuj.

<sup>20</sup> Naacuajitij, canaari Jesucristo jiyaramiquishanoni, canaa caminiujuniuria niaara na sequesano canaa. Naa canaa caminiujiushacari Jesucristo rupaatej, Pueyasojuaanaari nia masuya na muerasu nia quini-

uria, Neyanuucua nia tiuushacari. Naacujitij, canaari Cristo niti nia secojiyani, ¶tama nia cuaqueyajaaja nia jiyanootiri Pueyasori! <sup>21</sup> Pa Jiyaniijiarano Jesucristoni, nojuajaari tojetaarucuajanaa sesa miyashijiajuhanajaj. Naajaa, na Que Pueyasoori nocua tiuutiaquiaari puetunu sesa pa miishanojuanaa, pa niti na saniitiosocoriquiano. Naacujitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

**6** Naa Pueyasora poonijionaa canaa quiniucuatej, canaari jiyanoohua nia secojiyani cuarta Pueyasori muerasunaa, saa Pueyasoraja nia quiri, nia jiyanoojia na quiniucua. Maninia na muerasu nia quiri. <sup>2</sup> Tariucuaaana na sequesanojuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacari, janiyari quia naacucanujuhujaj”.

Cua panishano pueyanaa, quiarijiaari Pueyasori jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

<sup>3</sup> Cunora, canaari tama canaa cuaqueyajaaja cojuaquiaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijosano sesacarejariuhujaj.

<sup>4</sup> Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiiitiaquishacarijuhuaj. Naajuhujaj, canaari rejeretaquiaa puera canaa tacaashacari, canaa niishiyaquishacari taa canaa miiniutianiya socuani. <sup>5</sup> Naajuhujaj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaaaniuhujaj. Nasojosano pueya jaara miitiano paniquiaa canaani, canaari na rejeretaquiaajuhujaj, pueya tiuuniuria canaa pohuatasanoocua. Naa Pueyasori jiyaramiquishano pueya canaa quishacaritij, canaari jiyanoohua poonijioquiaa nerani. Canaari sequeyarucua sutequiaani.

Canaari miaajequiaajuhujaj. <sup>6</sup> Naajuhujaj, pueyari na naata niishiniu canaari seetanujuanaa Pueyasori seyani, sesa miyashijia canaa quiniucua, maninia canaa niishiniucua Pueyasori rupaajuhujaj. Niishishaatiacujaari, canaari Pueyasori seyani, jacaria pocuajaca canaa quishacari juaajiacua pueyata, naajuhujaj, maninia canaa miishacari puetunu pueyajanaano. Naa niishishaatiajaariuhua canaari Pueyasori seyani Pueyasori Sohuanu cumaquishacari canaa, seetanujuanaa canaa panishacari pueyajuhujaj. <sup>7</sup> Niishishaatiajaariuhua canaari Pueyasori seyani seetanu rupaajanaa canaa pohuatanuucua pueya, naajuhujaj, casaa canaa miiniucua Pueyasori cumaacata. Canaari Sesaaca nujuataquiaa cumaatiani, Pueyasori jiyanooshano pueya canaa quiniucua. Pueyasori rupaata, canaa cutaraari saaja Sesaaca jiyatequiaa canaacujini. <sup>8</sup> Naa Pueyasora canaa poonijosacaritij, noojiaqueya pueyari canaa

shuquiritiaquiaani. Tamasacaari canaa rerequetequiaa saniniucua. Naajuhujaj, noojiaqueya pueyari maninia pohuatanuucua tamasa niquiara canaajini. Tamasacaari canaa sesacaquiaa saniniucua. Noojiaqueya pueyari canaa sequequiaa sapojonuujuacatani. Tamasacaari saniniucua maninia tojitiaquiaa canaa, seetanu rupaajanaa canaa pohuatasacari. <sup>9</sup> Noojiaqueya pueyari canaa niquiquiaa juhua najuhuana quijiacua pueyani. Tamasacaari saniniucua, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jiyanoohua miitiasaaquiaani. Naajaa, majaari canaa puecoosaanu quiquiaani. <sup>10</sup> Taraatia canaa quishacari, naajaa, canaari pueyaracaanu shuquiriaatia quiquiaani, Pueyasori pueya canaa quiniucua. Canaari seetanujuanaa casamiiuniucua juhuaj. Naajaa, canaari queraatia pueya jiyatequiaa queraatia casamiriaca nojori quiniuria Pueyasori casaatani. Canaari juhua casamiiuniucua niquishanoni. Naajaa, canaari puetunu canaa panishanojuanaa jiiitiaacujani.

<sup>11</sup> Corinto tiacajinia quiniaa cuarta Pueyasori pueyanaa, canaa nia tojitiare. Canaa jiaatiasacari niacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. <sup>12</sup> Majaari canaa tarinitiano canaa paniniu jiyanoohua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. <sup>13</sup> Janiyari nia nenecojiyani, naatej, taa pueyano nenecojoquiaa necohuacuaani, ¶majaari canaacuaji nia taacanuunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitiojuaca pa quiniuria.

### Paari Pueyasori quiquioni

<sup>14</sup> Saniniucua, maja Pueyasori tojiyashijiacua pueya nia paniniu, nojori nia cojiniuria. Naajuhujaj, maja cutaraari nia caminiu Pueyasori tojiyashijia, niaa mariqui rimiajata quijiacua quiriiri. ¿Maninia miijiatucua shuquiriaatia quijia quiriquia, sesa miijiatata na quishacari? Maja. Cua riuquareto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijiatata? Maja na naata. <sup>15</sup> Seetanujuanaa pueyanaa, Cristoori maja Sesaaca rupena. Naajuhujaj, Pueyasoori tiuujia pueyanoori maja na naata maninia rupuetoonu Pueyasoori tiyashijia pueyanota. <sup>16</sup> Paa jaara Pueyasori quiquio quirini, ¿paateeri Pueyasori quiquiojinia shanacunutaniya samaruhua tiuquitianura tiini? ¶Maja! Paacujaari pueyaracaanu Quijia Pueyasori quiquioni. Na pueyara na sequesanojuajaari naa naajiotasano quiya:

“Janiyari nojorijinia quiriqianoni. Janiyari nojori tajinia rucuanenutaniyani. Janiyari nojori Jiyaniijiajanaa quiniutianiyanoni. Nojoriiri cua pueya quiniutianiycujua”.

<sup>17</sup> Cunora, pa Jiyaniijiaari na pueya sequeya:

“¶Cua tojitiaashijiacua pueya tajiniji nia pacure! Nia shiriquiri tamocora nojoriicujaj. Majaari sesa casaa nia saniniu paniniu. Naa jaara cua tojijiacua quiri, janiyari

nia jiyatenutaniya quirianoni. <sup>18</sup> Janiyari nia Que quiniutianiyani. Naacujitij, niaari cua niquiohua quiniutianiya. Naa sequeyanijia, puetunu cumaacara-cajanaa cua quiniuucua”.

**7** Naacujiti canaa panishano pueyanaa, paacua-jaari naa seetanujuanaa pa Jiyanijia sequesano pajaniyarano jitiiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojia-juhuaj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijia pa quiniuria, saa neraja pa quiniurijahuaj.

### Corinto pueya tacatosacari nojori jiuujia, maninia nojori quiniuhua

<sup>2</sup> Pueyanaa, ztaa nia miiquianuni? [Canaa panijia nia quiriohua! Majaari canaa miiniu quiquianu sesa nijaniya. Majaari quenaaja niquiryatu nijaniyajinijinio canaa sesonu quiquianu canaa niishitiojosanota. Majaari canaa sapojonu quijia nijaniya. <sup>3</sup> Naa cua sequesacari nijaniyatej, majaari cua sequenu cua cararonura nijaniya. Janiyacuajaari tari nia sequereeni, canaari jyanohua nia paniyani. Naacujitij, canaari shuquiriaatia quiniutianiyani canaa jaara puecoosaare canaa cumaquiniuucua nijaniyani, seetanujuanaa Pueyaso muerasu nia quiniuria. Naacujitij, niaa jaara shaajerejuhuaj, paari pueyaracaanu jatiqiu quijia quiniutianiya Pueyasotani. <sup>4</sup> Janiyari seetanujuanaa naa nia sequeyani cua panishacari nijaniya. Quiarijiani, janiyari jyanohua nia timitiaani, maninia cua tojinuucua nijaniyajiniji. Canaari seetanujuanaa naquiya miiquiaani. Naajaa, maninia canaa tojinuushacari nijaniyajiniji, cunoori cua cumanijiacanu. Cunora, janiyari jyanohua nia shuquiritiaani.

<sup>5</sup> Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanujuanaani. Pueyasocua tiuyashijiaaari canaa juariquiaa. Canaa jiuujiaari niaacua tacaariquiaa saniniuujia. <sup>6</sup> Jiyacaritij, Pueyasoori canaa cumanijiacanu Tito tiuquishacariuhua canaacua. [Pa Pueyasocujaari tacaajiaa cumanijiana! <sup>7</sup> Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu nijaniyajiniji jyanohua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jyanohua nia taraajetenuucua janiya. Niaanaari cucua tacaya jyanohua, cua rootasano tojjijia nia quiniuria quiarijia cutara. Naa cua tojishacari niaacujitij, janiyari jyanohua shuquiriquianuni.

<sup>8</sup> Niaacuara cua naajioneeri nia taraajetecanu. Janiyari taraajecanujuhuaj, naa cua taraajetenuucua nijaniyatej. Quiarijia cutaraari maja cua taraajenu. Cua naajioneecuajaari saaja rupaquijia nia taraajocanu.

<sup>9</sup> Quiarijiani, [shuquiriaatia quiyani! Majaari nia jyaniniu janiyari shuquiriaatia quiyani naa cua taraa-

jonuucua nijaniyatej. Shuquiriaatia quiya cutaranijia, cua niishishacari, naa cua taraajonuucua nijaniyatej, niaari nioojia tacatorohuacuaa Pueyasocua, Pueyaso tojjitajaca nia quiniuhua. Naacujitij, janiyari quiarijia niishiyani, majaquiiri cua sesonu quiquianu nijaniya, naa cua taraajonuucua nijaniyatej.

Pueyasocujaquiiri maninia poonijioriquiaa nioojiacajinia, naa nia taraajesacaritij. <sup>10</sup> Pueyasocua jaara pa taraajetere, cunoori maninia, poojia pa tacatonuhua nocua, na jyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijaaja, cunoori tama poojia pa shaajanurajaaja. <sup>11</sup> Nia taraajesacari cua nacasusacari nijaniya cua naajioneeginiani, cunoori seetanujuanaa Pueyaso taraajetesano quiquianu nijaniya. Naa nia taraajenuucuatej, nia niquishuriirij, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhuaj, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano nijaniya. Naacujitij, niaari ritia cuno sesa miijia taanucanu nia tajiniji, maja socua nia rupuesano na quiniuria. Naa nia miiniuucua puetunu manijanaatej, janiyari quiarijia niishiyani, majaquiiri nia maniniucuanu quiquianu naa sacuaraatia cuno pueyano miishanotej. <sup>12</sup> Pueyanaa, niaari maninia canaa tojjijia. Seetanujuanaa, cua naajiosacari niaacuara, majaari cua naajionu quiquianu saaja cuno sesa miijia pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishiniuria Pueyaso niquiara: niaacuajaari seetanujuanaa canaa panijiaa quiyajaa, nia tojishacari canaa. <sup>13</sup> Naaratej, canaari canaa jiuujia cajitiquianuni, canaa tojishacari Tito pohuatasano nijaniyajiniji.

Majaari saaja Tito pohuatasano cumanijianu quiquianu canaa. Canaari Tito timitiacanujuhuaj, canaa niquishacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhuana na tacaaniuucua niaacuajuhuaj. <sup>14</sup> Tito quiaaquishacari niaacua, janiyacuajaari juhuacarijia na pohuatacanu nijaniyajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajiniji. Puetunu cua pohuatasanojuanaa Tito nijaniyajinijiiri seetanujuanaa quiquianu Titora. Naajuhuaj, puetunu cua pohuatasano nijaniyajanaari pueyaracaanu seetanu rupaajanaa quijia. <sup>15</sup> Quiarijia Tito niishiriojosacari nijaniya, nojuajaari socua jyanohua nia panijia quiya, nia tojinuucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. <sup>16</sup> Janiyajuhuaj, jyanohua shuquiriaatia quiyani, cua niishishacari quiarijia cutara cua naata niaacua tiuuni seetanujanaa.

### Capora pa quiriquiaj

8 Quiarijiani pueyanaa, canaari nia pohuatanu paniyani, taa Pueyaso cumaquiya jiyanoehua na muerasu maapue niya Macedonia jiyajiniani. <sup>2</sup> Nojoriiri jiyanoehua taraatia miiquioquiaa. Naajaa, nojoriiri saaja jiyanoehua shuquiriaatia quiya. Naajuhuj, casamiijiuniucua nojori quishacari, naajaa, nojoriiri caporatujuri. Nojoriiri na cumaneecajiniji nareja niqutiojoquiaa queraatia, Judea jiyajinia casamiijiuniucua Pueyaso pueyara. Nojori niqutiojosanoori juhua casamiriaca pueya niqutiojosano. <sup>3</sup> Seetanujuanaa narta Pueyaso pueyacu nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jiitiasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujua-naari cua sequesano nijaniya. Janiyacuajaari nojori miishano niqiniani. <sup>4</sup> Niya Macedonia jiyajinia quiniaa parta Pueyaso pueyani, nojoriiri nijaniyajiniji tojiqianu. Niaanaari cumaneeca reratenu paniriquiaacuaa, nia jiyarosocoriquiano Judea jiyajinia quiniaa casamiijiuniucua parta Pueyaso pueyara. Naaratej, nojoriiri jiyanoehua canaa nenecojocanu canaa masenura nojori niqutionu panishano cumaneecajuhuj, parta Pueyaso muerasura. <sup>5</sup> Seetanujua-naa Pueyaso tojjiaca nojori quiniucua, nojoriiri maja saaja na cumaneeca na niqutiojonu quiqianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijiaara, taa Pueyaso paniya pa miiniuriacuajani. Naajuhuj, nojoriiri tama na cuaqueyajaaja jiyatecanu canaa tojjiaca nojori quiniurijuhuj. Cunora, canaari nojoriicuaji jiuujiatecanuni. <sup>6</sup> Naa capora niqutiojonaa nojori quiniucuatej, canaari Tito sequerucuaani, niaacua na quianuhuaa quiarijia. Nojuacuajaari tarijia naacucanu nijaniya, nia reratenura nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatunura reratenu puetunu nia niqutionu panishano cumaneecajanaa. <sup>7</sup> Nijaniya, Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasocua tiuujiaa jiyanoehua. Naajuhuj, niaari jiyanoehua maninia Pueyaso rupaa niishitiojonuuuaca. Niaari Pueyaso niishitiaja jiitiaajuhuj. Niaari mariyata shitimia poonijionuujuaca, tamasaca nia naacunura. Naajuhuj, niaari canaa panijiacu jiyanoehua. Naatej, taa maninia miijiacatucuaa nia janiyani, capora nia quirijuhuj, nia cumaneeca nia niqutiojonura nareja parta Pueyaso pueyara.

<sup>8</sup> Majaari juhua nia jiyaniijia cua sequenu nijaniya, nia cumaneeca cua niqutiojotenura nijaniya. Janiyari nareja nia pohuatariquiaa capora Macedonia pueyajinijini, tama nia niishiniurijajaaja, niaate seetanujua-naa canaa panijiacajuhuj, taa Macedonia jiyajinijinio pueya paniya canaacuaani. <sup>9</sup> Niaacuajaari pa Jiyaniijia Jesucristojiniji niishiya; na Que Pueyaso shuriucua na

quishacarijia, nojuajaari puetunu maninia casaajanaa jiitiaja quiquiaari. Naajaa, nojuajaari juhua casamiijuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuuja jiyanoehua shuquiriaatia quijiaca na jiyatenura pajaniya, juhua jiyanoehua queraatia casamiriaca pueya pa quiniuria. Naa jaara seetanujuanaa panijiacu quiriquia, naa nia miirijuhuj, taa pa Jiyaniijia miiquiaaricuaani.

<sup>10</sup> Janiyari niishiriojoriquiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniurijuhuj. Cua tojori. Niaacuajaari niishiya, noo marijiaara pa shococantej, niaacuajaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarijiaa narta Pueyaso pueyacu. <sup>11</sup> Niaari shitimia juhuacatecara nia cumaneeca niqutiojonu coteecanucua. Naaratej, quiarijia nia sequeyanijia, niaa cuara nia shitimia niqutiojonu tucuaara puetunu nia niqutionu panishano cumaneecajanaa. Nia jiitiasano cumaneecajiniji nia niqutiojore, taa cumaneeca nia niqutionu paniyacuajani. <sup>12</sup> Nia tojori. Paa jaara seetanujuanaa nareja niqutionu paniriquia pa cumaneecajinijini, Pueyasoori pa niqutiojore shuquiritiaja, paa jaara juhua capora niqutiojore pa jiitiasanojinijini. Maja cutaraari Pueyaso paniniu pa niqutionura, pa jaara na jiitiaaquiyani.

<sup>13</sup> Majaari Pueyaso paniniu cutara puera nia niqutiojonura nia cumaneeca, tamasaca quiniuria casamiriaca, saniniuuja nia jiitiaaquiniuria nia panishano.

<sup>14</sup> Maninia cutaraari puetunu Pueyaso muerasujuanaa jiitianura na panishano. Naaratej, quiarijiani, niaa cuara niqutiojore nia jiitiasanojiniji, nojori jiitianura na panishanojuhuj. Tamacari saniniuuja, nojoriiri saniniuuja nia jiitiaaquishoo casaa nia niqutionutaniyacujua, niaa jaara na jiitiaaquiri. Naacuajitij, puetunu Pueyaso muerasujuanaari na panishano jitianutaniya mariyata, maja rimijata. <sup>15</sup> Naajuhuj, tariucuaaanu Pueyaso Rupaajiniani, jiyocuaaanu Pueyaso tinishano Israel pueya miaquesocoriquiano panjinijiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuj, cante secaja reratequiaarini, majaari nojoriria na pueetanu quiquiaari”. Naaratej, Pueyasocua tiuujiaa nia qui. Nia jiitiasanojiniji nia niqutiojore nareja, nia jamueyaquiniutia.

### Pablo pohuatasano Titoriniji, Tito cojiniaajinijinio

<sup>16</sup> Titoro jiyanoehua niaacua jiaatiaja, taa cua jiaatiaa niaacuacuaani. Pueyasocuaari na jiyatequiaari nia panijia na quiniuria. Janiyari cunora Pueyaso sequesuaani: “Paacarasho Pueyasonaa!” <sup>17</sup> Naacuajitij, janiya jaara Tito sequerucuaani nia niqiniucua na quianura, nojuajaari cua timitiriucuaa. Tama nojuajaarijia nia niqiniucua jiaatiaa. Naacuajitij, nojuajaari quiarijia quianutaniya niaacua.

<sup>18</sup> Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu

Pueyaso muerasu maapuejanaa shuquiritasano pueyano, maninia na pahuatanuucua pa Jiyaniijia Jesucristojiniji. <sup>19</sup> Macedonia jiyajinia quiniaa Pueyaso muerasu maapueeri tari na saquiriojocanu na tarajana nura canaa, pa niqutiojosano cumaneeca canaa jiyatana nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuj. <sup>20</sup> Maniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenuutaniyani. <sup>21</sup> Canaari pueyaraaanu maninia miiniu paniquiaani puetunu pueya niquiarajanaa, maja saaja Pueyaso niquiarara.

<sup>22</sup> Quiarijiani, niaacua canaa jiyarosocoriquiano pueyata, canaari niqutiojonu tamonu parta Pueyaso pueyano jiyaronutaniyani. Pueyaraaanu na poonijosacari pa Jiyaniijia, janiyajanaari na niqioquianuni. Nojuajaari seetanujuanaa pueya panijia, Pueyaso panijia na quiniuucua. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. <sup>23</sup> Tamonu jaara nia nequesotare cante Titoni, niocua na riucaare: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niqioji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maniuhuaqueetasano, maninia na tojitiajaca nojori quiniuucua. <sup>24</sup> Naaratej, nio nojori jaara niaacua tiuquijioosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhuj, puetunu Pueyaso pueyanaari niishiniutianiya, majaari cua sapojonu quiquianu, maninia cua pahuatasacari nojori nijaniyajiniji.

**Pablo shiniujiushacari pueya, cumaneeca nojori reratenura narta Pueyaso pueyara**

**9** Janiyaruhua najuhuana niaacuara naajiyani, cua sequenura nijaniya, nia cumaneecata nia naacunura Judea jiyajinia quiniaa parta Pueyaso pueya. <sup>2</sup> Janiyacuajaari niishiyani, niaari tarijia na naacunu paniquianucua. Cua shuquiritasacari cunora nijaniya, janiyari pueyaracaanu niya Macedonia jiyajinia quiniaa parta Pueyaso pueya niquiarara pahuataquiaa nijaniyajinijini. Janiyacuajaari nojori pahuataquiaani, nijaniya Acaya jiyajinia quiniaa pueyani, niaari nia cumaneeca niqutionu paniquianu noo marijia pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutionu panijuhuj, naa nojori cua pahuatanuucua nijaniyajinijitij. <sup>3</sup> Janiyari niaacua tiuya seetanujuanaani, niaacuajaari canaacuaji tariucua reratesano jitianutaniya nia cumaneeca, taa cua pahuataquiaa niya nijaniyajinijicuaajani. Naajaa, jani-

yari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niqutiojosocoriquiano cumaneeca. Majaari cua paniniu cutara cua pahuatasano nijaniyajiniji cuaracashitishaanura.

<sup>4</sup> Macedonia jiyajinijinio parta Pueyaso pueya naacuacuari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiyani. Niaari caririquiniutianijuhuj. <sup>5</sup> Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiriia canaacuaji. Naacuajitij, nia niqutiojosano cumaneecaari seetanujuanaa nareja nia niqutionu panishano quiniutianiya, maja canaa niqutiojotesano nijaniya.

<sup>6</sup> Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniya jaariuhuj. Saniniuujia, cante queraatia natajani, queraatia senoonutaniya jaariuhuj”. Naajuhuj, paa jaara capora quiriqiani, Pueyaso saniniuujia socua queraatia pa niqutionutaniya pa niqutiosanojiniji.

<sup>7</sup> Naaratej, puetunu nijaniyajanaa cuara niqutioora taa nioojajinia nia niishiriojoree nia niqutiojonuracuaajani. Majaari nia cumaneeca nia niqutiojonu nia jamuenuta, nocua nia taraajenutanio. Naajuhuj, majaari nia niqutionu nia cumaneeca saaja tamasaca shiniujiushacari nijaniya. Pueyaso cutaraari shuquiriatia niqutiojuaca timitiaja. <sup>8</sup> Pueyasocuajaari cumaacaraca na niqutionura nijaniya puetunu nia panishanojuanaa nia jitasocoriquiano pueyaracaanu. Naacuajitij, niaari pueyaracaanu socua queraatia jitiajaca quiniutianiya, tamasaca nia niqutiojonurajuhuj, nojori jaara jitiaaquiriqia nojori panishano. <sup>9</sup> Naa jaara naa capora quiriqiatej, niaari nio tariucuaaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutiojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyaso. Majaari Pueyaso nijajetanu quiniutianiya”.

<sup>10</sup> Pueyano natasacari casaa jajau na cuhuariquijajinia, Pueyaso na canijiaquiaa. Naacuajitij, na camaruuri socua jitianutaniya tamacari na natasocoriquianohua, na miaquesocoriquianonio. Naajuhuj, juhua capora nia niqutiojosacari nia jitasanojiniji, niaari juhua nia cuhuariquijajinia nataa. Naacuajitij, Pueyaso nia jiyatenutaniya socua queraatia jitiajaca nia quiniuria, pueyaracaanu maninia nia miiniuria tamasacajuhuj. <sup>11</sup> Naa capora nia quiniuucua nia casaatej, Pueyaso juhua capora nia niqutiojonutaniya puetunu na jitasanojinijijanaa, queraatia nia jitianura, tamasaca nia niqutiojonura pueyaracaanu. Naacuajitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojori Pueyaso sequenutaniya, “paacarasho”.

<sup>12</sup> Naacuajitij, nojori jaara masere nojoririano nia ji-



yarosano cumaneeca, majaari saaja nojori jitianu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: "Paacarasho Pueyasonaa".<sup>13</sup> Nojori jitiiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanojua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojtiajacajuhua, naajaa, taucua nia quishacari nojoriria. Nojoriiri Pueyaso maniniuhuaqueetanutaniyajuhua jiyanojua capora nia quiniuucua nojoriria, tamasacaranio.<sup>14</sup> Nojoriiri Pueyaso seconutaniya niaacuarajuhua, jiyanojua nojori paniniutia nijaniya, Pueyaso jiyatenuucua nijaniya nojori panijia nia quiniuria.<sup>15</sup> Naajuhua, janiyari jiyanojua Pueyaso sequeyani, "paacarasho", jiyanojua maninia na miiniuucua nijaniya, Neyanu Jesucristo jataniniuucua nioojia.

**Pablo cuara tojishaaria, Jesucristo jiyatenuucua nojuaja na rupaa pohuatanara**

**10** Janiyacuajaari Pabloni. Quenaaja cua tojitiare. Cua Jiyaniijia Cristoori jyanoojia quiquiaaricuaa, jacaria pocuajajuhua. Janiyari naa quini panijuhua. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuaquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuuja, tucuaaanu cua quishacari, janiyanaari jyanohua nia nacasuquiaa cua naajioneejiniani, juhua nia pueresano jyanijia.<sup>2</sup> ¿Seetanutejanaa, jiyate naani? Janiya jaara naa quiya niaarani, naajaa. Quiarijia tucuaaanu cua quishacari, janiyari nio cua naajiojinia nia nenecojiyani, nia tojiniuria janiya. Saniniuuja, niaacua cua tiuquishacari, janiyari noo pojori nacasunutaniya jyanohuani, sacuaratia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaratia na pocoojutej. Cuno pojoriiri jiyaniya canaari saaja juhua mijiria quinia pueya miiquiaani, maninia canaa quiniuria nia niquiara.<sup>3</sup> Seetanujua naacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojoquiaaani.<sup>4</sup> Mijiria quinia pueyari miaquetojoquiaa cutara tama nojori shipinshano casaatajaaja. Cua miaquetojotaja saniniuuja, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu.<sup>5</sup> Pueyaso cumaacata, canaari mijiria niishijia niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhua pueya niishiriojosano jataniquiaani, Cristo tojijia nojori quiniurijuhua.<sup>6</sup> Canacuajaari Pueyaso jeenucuasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishiriojosanojuanaa tojtiajacara quirihojua, na nuhuaji cutara canaa naata puetunu cureeno tojiyashijiacajanaa saniitionu.

<sup>7</sup> Niaari tama cushitiquiaajaacujua nia tiuushacari cuno sapojonuucua pohuatasanoocua. Nojoriiri sapuenu juhua Jesucristo jiyaramiquishano niquishiya najuhua. Maninia nia niishiriojore pueyanaa, nijaniya cante sapojosaacanucujani. Niaa jaara niishiriniari seetanujuanaa Cristo saquiriojosano pueya, naacuajitij, nijaniya cuara niishiiria canaari Cristo saquiriojosano pueyajiuhua.<sup>8</sup> Naa jaara jiyaniya janiyari juhua pueya shocotaja nia sequeyani: "Canaari nia jitianaa", naajaa, majaari cua caririquini nia cua sequesacari nijaniyatej. Pa Jiyaniijia Cristojua naacuajaari canaa jiyatequiaari nia jitianaa canaa quiniuria. Canaari naa jiyatesaaquiarini, canaa cumaquiniuria nijaniya na rupaata, seetanujuanaa Cristo pueya nia quiniuria. Majaari canaa jitianu najuhua na cumaaca, canaa sesonura nijaniya.<sup>9</sup> Naa cua naajiosacari niaacuaratej, majaari nia jyaniniu janiyari nia piriyojiyani nia puerenura janiya.

<sup>10</sup> Tamasaca nijaniyajinijio pueyanaari cua sequesajuhua: "Pabloni puera jyanohua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhua, na pohuatasacari pa niquiara, na pohuatasanoori maja shanohua tojishano".<sup>11</sup> ¿Seetanutejanaa? Cante naa pocuaquiaani, nojuaja cuara niishiiria quiarijia, taa canaa naajiocanu niaacuaracuaja tucuaaanu canaa quishacarijani, canaari naa miiniutianiya niaacua canaa tiuquishacari.

<sup>12</sup> Cuniqini niaata quiyajariuhua tamasa pueya, canapete nia sequesajacajani, nojoriniaari socua maninia Pueyaso rupaa pohuataanaa tamasajini, canaajiniijuhua. ¿Nojoritiiri seetanujuanaa socua maninia Pueyaso rupaa pohuataanaa canaajini? Johua. Naajaa. Majaari canaa tacaani quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuataanaa. Nojoriiri naa quijiatej, nojori jyanishacari nojori cutaraari socua tojishano pueya tamasajini. Naa nojori miishacarij, nojori cutaraari seetanujuanaa mosanucua.<sup>13</sup> Cua cutara, majaari tamasa poonijosano canaa jyatenu quiquiaa juhua canaa poonijosano Pueyasora. Cua cutaraari saaja canaa miishano shuquiritiaquiaani, tee Pueyaso jiyaroquiaari canacuajani. Nojuacuajaari canaa jiyaramiquiaari niaacua Corinto tiacajinia, nia niquiara canaa pohuatanura na rupaa. Naacuajitij, niaari na muerasura quiquiaari.<sup>14</sup> Majaari najuhua canaa timitianu nijaniya, Pueyaso muerasura nia quiniuucua. Niacuajaari Pueyaso muerasura quiquiaari canaa pohuatanuucua nia niquiara seetanu rupajanaa Jesucristojini. Cua cutaraari seetanujuanaa Pueyaso rupaa pohuatanu coteetanaa nia niquiarani.<sup>15</sup> Majaari canaa shuqiritianu najuhua nijaniya. Cua cutaraari nia tiutiquiaari Jesucristoocua, niaacua Pueyaso jyaronuucua canaa. Naajaa, canaari socua nia pohuatanu panija Pueyaso rupaani, seetanujuanaa Jesucristo rupaacua tiuujia nia quiniuria.

Naacuajitij, niaa jaara seetanujuanaa Pueyaso rupaa tojijiaca quiri, niaari saniniuujia na naata canaa cumaquiniu. <sup>16</sup> Niocua canaa cumaquiri canaa quianura tamaqui, tee Jesucristojiniji pohuatasoojua quiyacuajani, tii canaa pohuatanura nojuajiniijihuhaj. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriaatia canaa poonijiosaquicuaani. ¿Nojori shuquiritasanteeri tama nojori poonijosanojuaaja? Maja. Niaacuajaari Pueyaso muerasura quiquiaari canaa nia tojitianuucua.

<sup>17</sup> Pueyanaa, nio tariucuacaanu naajiotasanoori niaara, nia niishishocoriquiano. Naa sequeyari: “Cante shuquiriaatia quijia quiniu paniyani, nojuaja cuaara pa Jiyaniijia shuquiritiaara cutara”. <sup>18</sup> ¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritasano cutaraari noo pueyano, cana pa Jiyaniijiajanaa sequenutaniyacuaajani: “Quiaa cutaraari maninia cua pueyanoniyojua”.

#### Pablo pohuatasano na paraajiniji

**11** Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. <sup>2</sup> Janiyari jiyanojua nia tacaatiaquiaani, saaja Jesucristora nia quiniuria. Niaacuajaari niishiya, naatej, taa pueyano cojuaacuaa neyatuniyojua canuucuaajini, saaja na camiriquiano pueyanora na quiniuria, naajuhaj, janiyari nia cojuanu paniyani sesosoo nia quiniuria nia Jiyaniijia. Cristocuajaari juhua nia niyacarano. Nia jitiiana cua quishacari, janiyari juhua nia queni. <sup>3</sup> Tarijia, niaacuajaari saaja Cristo tojitiajaca quiquiaari, na panijia nia quishacari. Quiarijia saniniuujia, janiyari Sesaaca nia pueretaani, nojuaja mariqui nia sapojoreeri Cristoocuaaji nia rupatenura, taa cuno Susanacu sapojoquiaari Eva tariucuacaanucuaani. <sup>4</sup> Cuno sapojonuujuaca tiuquijiosacari niaacua, tamaatia nojori pohuatanura Jesujiniji nijaniya, niaari jaarajaaja ritia na tojiquiaa. Nojori niishitiojosanoori tojetaarucuajanaa tamaatia canaa niishitiojosanojiniji nijaniya. Nojori nia tojishacari, niaari juhuajaniya samaruhua niishishano tojitiaquiaajuhaj. Niaacuajaari tari tiuquiaari Jesucristoocua, Pueyaso jiyanooniuria nijaniya. Saniniuujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaarajaaja ritia nojori tojiquiaajuhaj. <sup>5</sup> ¿Cuno sapojonuujuacateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¿Janiyara maja! <sup>6</sup> Seetanujuanaa, majaari cua niishiniu manihuhaqueenu cua pohuatasacari Pueyaso rupaa, taa cuno pojoricuaani. Naajaa, Pueyasojiniji cua niishishano cutaraari seetanu rupaajanaa, tojishocoriquiano cutara. Maja najuhuanaj. Niaacuajaari cuno niishiya,

pueyaracaanu saaja maninia cua miishacari nia niquiara, cua pohuatasanojinijinio.

<sup>7</sup> ¿Casaara nia tojitiaa cuno pojori quiarijianijia, majaari saniniuujia nia tojitanu janiya? ¿Janiyateeri sesa miiquianu nijaniyani, cua masejayaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria nijaniya. Naa cua miiniuucuatej, ¿cunoteeri sesa niaara? <sup>8</sup> Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. <sup>9</sup> Saniniuujia, nia tajinia cua quishacari, cua jitiiaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jitiiaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura nijaniya cua panishano cua jitiiaquishacari. Janiyari naa miiniutianiya pueyaracaanuni. <sup>10</sup> Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. <sup>11</sup> Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacari, ¿janiyateeri nia paniyaquiyani? ¡Maja! Pueyasocuajaari niishiya, janiyari jiyanojua nia panijiani.

<sup>12</sup> Nia sequereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanihanu Pueyaso jiyaramiquishano pueyani, nojoriiri nia jiyajenetenenu paniquiaa. Nojoriniaari seetanujuanaa Cristo jiyaramiquishanojuhaj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanojua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa nijaniya. <sup>13</sup> Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacuajitij, nojoriiri nia sapojia. Nojoriiri sapuenu juhua Cristo jiyaramiquishano pueya niquishano najuhuanaj.

<sup>14</sup> Cunoori maja jiyajeneta naa nojori miiniuriatej. Satanáscuajaari tama na cuaqueyajaaja jatanijia shacantucara, juhua Pueyaso seru na niquishaanura, pueya na sapojonura. <sup>15</sup> Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaca pueya nojori quiniuria. Nojoriiri naa miiquiaa, Satanás seya nojori

quiniuucua. Naajaa, ðhojoriiri saniitiosaanutaniya sesa nojori miiniuucua!

**Pablo pohuatasacari naquiya na miiniujiniji, Cristo jiyaramiquishano na quiniuucua**

<sup>16</sup> Socua nia sequenu pacuteyanijia, majaari nia jiyaniniu janiyari paatecani cua pohuatasacari tama janiyajinijiaaja. Niaa jaara jiyaniya janiyari seetanujua-naa paatecani, naajaa, rupaquijia cua tojitiare quenaaja. Janiyari juhua paateca tama janiyajinijiaaja niaara pohuatanu panijajaaniuhuj, taa nia tojishano pueya miiquiaacuaani. <sup>17</sup> Naa cua pohuatasacari tama janiyajinijiaajatej, cunoori maja cua Jiyaniijia Cristo pohu-atesano janiya. Cunoori tama cua pohuatasanojuaaja, juhua paateca cua quishacari. <sup>18</sup> Naatej, taa queraatia Pueyaso rupaa pohuataanaa tama nojorijinijiaaja pohuatanuquiaacuaani, janiyari quiarijia naa tama janiyajinijiaaja pohuatanu panijajuhuj. <sup>19</sup> Jiyano-hua niishijia nia quishacari, niaari cuno paatecoori tojiti-aquiaa juhuajaniya. Naatej, taa nia tojtiaquiaa cuno pojoricuaani, quiarijia cua tojitiarejuhuaj. <sup>20</sup> Naajuhuj, niaanaari juhuajaniya rejeretaquiaa cuno pojori, nojori jaara nia poonijioquiaa juhua nojori seya. Niaanaari nojori rejeretaquiaa nojori jaara nia jiitiasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiuquiaa saaja, naajaa, nojori soosacari niajaniya. Niaanaari juhua-janiya nojori rejeretaquiaajuhuj, nojori jaara nia jiquioco maseteriquia. <sup>21</sup> ðNojoriqiiiri jiyaniijianucua-janaa cutara! Saniniuujia, janiyari nojori naaqui caririquiyani juhua nojori cua quiaquiniuucua, maja naa canaa miiniuucua niajaniya, taa nojori miiquiaa sesa niajanijacuaani.

Naajaa, quiarijia cutara, janiyari tama janiyajinijiaaja pohuatanutaniyani, taa nojori pohuataquiaa juhua paateca tama nojorijinijiaajacuaani. <sup>22</sup> ¿Taa nojori se-quequiaani? ¿Nojoritiniaari Hebreo pueya, Hebreo rupaa pocuajacajuhuj? Janijajuhuj. Janiyari Hebreo pueyanohuj, Hebreo rupaa pocuajanio. ¿Nojoritini-aari Pueyaso saquirojosano Israel pueyajinijinio? Janiyacuajaari Israel pueyacuajinio supuenohuj. ¿Abrahamtenaari nojori supuetana? Abrahamcuajaari cua supuetanajuhuj. <sup>23</sup> ¿Nojoritiniaari Cristo jiyaramiquishano pueya? Janiya cutaraari seetanujua-naa Cristo seruni. Janiyari jiyano-hua soyani, juhua paateca naa cua pohuatasacari tama janiyajinijiaajatej. Naajaa, janiyari seetanujuaanaa nia sequeyani. Janiya cutaraari socua jiyano-hua nojorijiniji poonijio-quiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuj, janiyari pueyaracaanu caminiujiushaaquiaari majacununi. Naajuhuj, janiyari pueyaracaanu cocuaatia mii-quiaarini, pueya monu panishacari janiya. <sup>24</sup> Cuarta Ju-diocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojojua. Nojori majasano jaara treinta y nueve quiri, nojoriiri jiyacari

carteja na majacusano pueyano. <sup>25</sup> Naajuhuj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniacu caminiajinia cua jaaretasacari buquejinia, jiuujianaraca buqueeri tiuquitiaquiaari. Naa tamacari buque tiuquitasacarijuhuaj, janiyari na raucua cuataquiaari-ni puetunu niucujanaa, niquiriyatu juucanio. Cunoori quiquiaari puereeta shoniacu caminia jiuujiajinia.

<sup>26</sup> Janiyari pueyaracaanu tiquiyocua rucuanerajua quiquiaarini. Naacuajitij, moocua cua niuuniu-jiushacari, janiyari cocuaatia miiquiaarini. Naa cua ru-cuanejosacaritij, janiyari pueyaracaanu puereeta no-huasenuujuaca quishaqui shocoquiaarini. Naajuhuj, tama cuarta Judiocuacajaaritia pueyaracaanu cua mi-itanu panijia, taucucanio. Puereetaari quiquiaariji-uhua cua rucuanerajosaari tiacajinia, tiquiyocua pueya quiaquishaqui, shoniacu caminiajinianio. Naa-juhuaj, puereetaari quiquiaari janiyara, cua jiyani-ahacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup> Jiyano-hua cua poonijiosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaaje-quiaarini. Janiyari jiyamuequiaarijuhuj. Janiyari nooji-aqueya miaqueyaquiquiaarijuhuj, jeya cua quiaquishacari. Janiyari naquiya miiquiaari cua ru-cuanejosacari shiniquajinijuhuj, toqueeju cua quishacarijuhuaj.

<sup>28</sup> Janiyari naa naquiya miishaaquiaarini, mariyata tamaatia naquiya miiniujiuhuj. Naajuhuj, janiyari puetunu juucujanaa niishiriojoquiaani, taariquitijia Pueyaso muerasu maapue quia puetunu jiyacajinia-janaatej. Janiyari jiyano-hua nojoriicua tacaquiaani.

<sup>29</sup> Naacuajitij, tamonu cuarta Pueyaso pueyano jaara rejeretaquiriquia Sesaaca saniniujiushacari nojuaja, janiyari jiyano-hua taraajeja nocuani. Tamonu jaara sesa miitishaare, janiyari na naaqui caririquiyajuhuj.

<sup>30</sup> Niaa jaara panija socua cua pohuatanura niajaniya tama janiyajinijiaaja, nia pohuatareeraqui pueyaracaanu taraatia cua miishaanujiniji. Tama janiyajaja, janiyari maja cumueecani. <sup>31</sup> Pa Jiyaniijia Que Pueyasocuaajaari niishiya janiyari seetanujuaanaa se-queyani. Nojuajanaa cuara pueyaracaanu manini-uhuaqueetasaaria cutara, maja nojuajiniji pohuataanaa.

<sup>32</sup> Tarijia, Damasco tiacajinia cua quishacari, tamonu pueyanoori Damasco tiaca jiyaniijia quiriquiaa. Nojua-jaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohu-atanuucua. <sup>33</sup> Naajaa, cuarta Pueyaso pueyari namitia cua roshinitiaquiaari shuquiriaatia, puereetuuca canaasatujinia, cuno tiaca sohuaca tacuhua shuucuaji. Janiyari naa mashiquishaaquiaari cua paraacuajini.

**Pablo pohuatasano Pueyaso niquitishanojiniji nojuaja**

**12** Paa jaara tama pajaniyajiniji pohuatariquia juhua paatecani, cunoori najuhuanaj. Naajaa,

socua nia pohuatereeraj. Nia pohuatereera taa cua niquitishaaquiaari pa Jiyanijia casaa jiyocuacaanuni. <sup>2</sup>Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujiniijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj. Saaja Pueyasocuaajaari na niishiya. <sup>3</sup>Cua tojitiare, seetanujanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuaajaari na niishiya. <sup>4</sup>Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaaan mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuaacaanu cua tojishano mijiria quiniaa pueyara. <sup>5</sup>Naa Pueyaso niquitiniucua janiyatej, janiya maara tama janiyajiniijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup>Naajuhuj, janiya jaara tama janiyajiniijiaaja pohuatanu paniriquiani, cuno maara seetanujanaa pohuatasano quiriquia, maja juhua paateca pohuatasano. Seetanujanaa majaari naa cua pohuatanu paniniu, pueya mariqui cua pohuatasanojiniji cua jianiriiri janiya jiyanoehua maninia pueyanoni. Pueya cuara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numaatajaaja nojori tojishacari cua niishitiojosanojuhuj. <sup>7</sup>Pueyaso niquitishano janiyani, na niishitishano janiyajuhuj, cunoori puera jiyanoehua maninia quiquiaari. ☩Cunoori jiyanoehua cua timitiquiaari! Naaratej, janiyari cua cuaqueyajinia nootusaaquiaari juhua jiohuacatani, janiya mariqui pueya shocotajara quiriiri. Cuno taajeta noonuuri Satanás miishano quiquiaari, na tacaatiniuria janiya. <sup>8</sup>Janiyari jiyanoehua secojoquiaari pa Jiyanijiani, nojuaja cuara shaataara cua nootunenu. Janiyari jiuujianaraca pacutejoquiaari secononuni. <sup>9</sup>Cua Jiyanijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniucua. Saaja cunocuaajaari quiara. Cua naatacuaajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujanaa cua cumaaca, maja pueyano cumaaca”. Naa cua Jiyanijia riucuasacari janiyatej, janiyari shuquiriaatia quiyani cumaacaaju pueyano cua quiniucua pueyacaanu. Naacujitij, Cristo cumaacaari socua janiyajinia niquishaaquiaa poonijiano. <sup>10</sup>Naacujitij, janiyari shuquiriquiaani cumaacaaju pueyano cua quiniucua, Pueyaso cumaquiniuria janiya. Naacujitij, tamasaca jaara sacuaatia casaa sequeriquia janiya na juashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panis-

hano jiiitaaquiriquiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacujitij, janiya jaara tojetaarucuajanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniucua janiya.

#### Pablo tacaashacari Corinto tiacajinia quiniaa Pueyaso muerasu maanuucua

<sup>11</sup>Janiyari seetanujanaa juhua paateca tama janiyajiniijiaaja pohuatereeni, juhua pueya shocotaja. Niaacuajaari naa cua pohuaterree, niaacuaja naara cucaaji tacuyaquiquianu cua sesacaja pueyatej. Janiyanaari najuhua quijia pueyanoni. Naajaa, niaacuajaari niishiya, janiyari maja socua najuhua quijia cuno pojoriijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujanaa Jesucristo jiyaramiquishano pueyara cutara. <sup>12</sup>Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacujitij, niaa cutaraari niishiquiaari janiyari seetanujanaa Cristo jiyaramiquishano pueyano cutarani. <sup>13</sup>¿Janiyateeri sesa nia jiiitaaquiaarini, Pueyaso rupaa cua niishitiojosacari nijaniya? ☩Maja! Janiyari nia miijiaari maniniani, naajuhuj, taa cua miijiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari nijaniya, niaata cua quishacari. Maja cutaraari cua mashiniquijionu quiquiaari cumaneeca nijaniyajini. ☩Cua jiyanoori cunora, jaara sesa quiquiaari nijaniyara!

<sup>14</sup>Quiarijiani, janiyacuaajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jianiniu janiyari nia cumaneeca mashiniquijionuucua quianutianiyani. Janiya cutaraari maja cua jiaatianu nia jiiitiasano casamiicua. ☩Janiyari saaja niaacuajaari jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiaquishacari cumaneeca nijaniyajini, janiyari seetanujanaa juhua nia queni.

<sup>15</sup>Janiyari shuquiriaatia tama cua cumaneecajaaja puecanutianiyani cua quishacari niaata, socua cua niishitiojonura nijaniya. Naacujitij, janiyari tama cua cumaacajaaja puecanutianiyajuhuj, niojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

<sup>16</sup>Niaacuajaari niishiya, majaari quenaaja nia niquitionu quijia nia cumaneeca janiya. Naajaa, tamasaca nijaniyajiniinionaari soquecuya, janiya naasucua-

naari jiyasohuaja nia cumaneeca nohuasejoquiaani, cua sapojonuta nijaniya. <sup>17</sup> ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? [Maja! <sup>18</sup> Janiyacuajaari Tito jiyaroquiaari niaacua na quianurani, na cumaquiniuria nijaniya. Janiyari nata jiyaroquiaari tamonu Pueyaso pueyanohuaj. ¿Titoteeri jiyacari nia cumaneeca mashiniquiquiaari? [Majaruhua! Niaacuajaari niishiya, Titocuajaari cumaneecaacua jiaatiaashijia, juhua janiyajuhuaj. Janiya Titota, canaacuajaari jiyanohua nia paniquiaani.

<sup>19</sup> Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuajijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niquiara nio naajiya niaacuarani, Cristo pueya canaa quiniuucua. Naajuhuaj, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjijia nia quiniuria. <sup>20</sup> Janiyari puereyani, niaacua cua tiuquishacari, janiyari niaacua taraajenutaniyani cua riuriasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriasese naa sesa quiyanojua, jecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujuatajaa. Naa naasucuaari niarta pueyano jiitiasanooocua jiaatiajaca quiyajaa. Naa naasucuaari juani porocua quiyajaa. Naa naasucuaari tama nia panishanojuaaja miijiacua quiyajaa. Naa naasucuaari niarta pueyacuara coriaacojuaca quiyajuhuaj. Naajuhuaj, niaa naasucuaari niarta pueyacuara rimiaaquenuujuaaca quiyajaa. Naajuhuaj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Naa naasucuaari jatiqui quiyashijiacajuhuaj, pueyaracaanu nia juayonuujuatanuucua. <sup>21</sup> Naacuajitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiacua quiyajaa. Janiyari puereyajaanihuaj, janiya naasucuaari nujuquenu-taniya cua taraajenuta noo sesa miijiacua pueyacuani, cuno pojori jaara sesa na miishano tariniti-aquiquianujua. Noojiaqueya nijaniyajinijinoori sacuaraatia miijiacua quiquianujua: cararaatia miijiacua sacuaraatia, na camishoo maaji numuetucunu porocujuhuaj, naajuhuaj, majaari tama nojori cuaqueya panishanojuaaja nojori rejetenu quiquiaa.

#### Socua Pablo nacasusacari Pueyaso pueya

**13** Nioori quiniutianiya jiuujianaraca cua pacutesacari quianu niaacua. Tariucuacaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatate nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuaj, niaacua cua tiuquishacari, janiyari naa miiniutianiyani cua nequesoreesacari cuno

sesa miijiacua. <sup>2</sup> Pueyanaa, janiya jaara pacutequiaariuhua niaacua quianutej, janiyacuajaari puetunu nijaniyajinijinio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. <sup>3</sup> Cua nequesoreesacari cuno sesa miijiacua, niaari jiyacari niishiniutianiya janiyari seetanujuanaa Cristo sequesano caminiujuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jiitiani nijaniya juhua cumaacaaju pueyano. Niaacuajaari na cumaaca niquiquiaa tama nijaniyajinijaaja na saniitosacari nijaniya. <sup>4</sup> Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhuaj, canaa, na rupaa pohuatanaani, canaari naquiya miishaaquiaajaanihuua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupesano canaa quishacari quiarijiani, canaa cutaraari Pueyaso cumaacaracani, maninia canaa jiitianura nijaniya.

<sup>5</sup> Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujia, maja soj? ¿Niaate maninia miijiacua taa Pueyaso muerasu miiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujia quiri, nojuajaari nioojiajinia quiya? <sup>6</sup> Naajuhuaj, jacaria nia niishiriojore canaajiniji. Naa niishitiriquiani, canaari seetanujuanaa Jesucristo jiyaramiquishano pueyani, maja sapojonuujuaca. <sup>7</sup> Canaari Pueyaso secojoquiaa niaacuarani, tojetaarucujanaa sesa miyashijiacua nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani. Canaari saaja nia panitiaa cutarani, maninia miijiacua nia quiniuria Pueyasora. Naa jaara naa maninia miijiacua quiriohua, majaari canaa saniitionu quiniutianiya nijaniya Pueyaso cumaacata. Naacuajitij, majaari pueya niquiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuana quijiacua pueyani, naajaa. <sup>8</sup> Canaa jiitiasano cumaacaari maja canaa saniitotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria nijaniya, socua maninia Pueyaso Rupaa tojitiajaca nia quiniuria. <sup>9</sup> Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura nijaniya niaa jaara Pueyaso tojitiaashijiacua quiriquia. Naacuajitij, canaari juhua cumaacaaju pueya niquishano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiacua Pueyaso muerasu nia quiniuria seetanujuanaa. <sup>10</sup> Janiyari nio cua najioneeginia jiyanohua nia nacasuyani tucuacaanu cua quishacarijia, maja jiyanohua cua nacasunura nia-

janiya, niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura nijaniya, seetanujua-naa cumueeca na muerasu nia quiniuria. Pueyaso niq-uitiosano na cumaaca janiyari maja cua sesonura nijaniya.

<sup>11</sup> Cua tucuatatura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jia-atiajaca nia quiri. Nioojia nia cumaquiri, maninia cua rootasanota. Naajuhuaaj, nia jiyanoootooriquia maninia rupuetootesano nia quiniuria. Naa nia quishacaritij,

Pueyasoori nia rupueja quiniutianiya. Nojuajaari pa panijia, pa jiyanoojiajuhuaj. <sup>12</sup> Pueyanaa, Pueyaso tojjijaca nia quiniucua, nia saruhajotooriquia nujuunuta, seetanujuaanaa nia paniniutia niarta Pueyaso pueya. <sup>13</sup> Puetunu niqijiniio parta Pueyaso muerasujuaanaari cua sequeya cua saruhuatanura nijaniya.

<sup>14</sup> Pa Jiyaniijia Jesucristo cuaara cumaquiiria nijaniya pueyaracaanu. Nijaniya cuaara quiiria pa Que Pueyaso panishano pueyaracaanujuhuaaj. Naajuhuaaj, niaa cuaara quiiria Pueyaso Sohuanu rupuesano pueyaracaanu. Puetunu nijaniyajanaa cuaara naa quiiria.

# GÁLATA

## Gálata pueyacuara naajione

**1** ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanoni. Mijiria quiniaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacua-jaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. <sup>2</sup> Niya cuata quiniaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiniaa Pueyaso pueya maapuera-janaa. <sup>3</sup> Pa Que Pueyaso, mariyata pa Jiyaniijia Jesucristoni, nojori cuara cumaquiiria niajaniya, nioojia cajitishano nia quiniurijuhua. <sup>4</sup> Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusocuaari pocuaratej, taa pa Que Pueyaso paniquiaar-icujani, na muerasu pa quiniuria. <sup>5</sup> Naaratej, pa Que Pueyaso cuara maniniuhuaqueetasano quiiria. Cuaara naa quiiria pueyaracaanutej.

### Maja tamonu maninia rupaa quiniu socua Jesucristo rupaajiniji

<sup>6</sup> ¿Taa nia miiquianuni pueyanaa? Quiarrijiani, janiyari jiyanohua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiyajaca nia quiniuria? Pueyasocuaajaari Neyanutaja nia cojiriti-aquiaari paniniu, Jesucristo miiniuucua maninia niaaara, na panishano pueya nia quiniuria. <sup>7</sup> Seetanujua-naa, majaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojo-quiaa saajatejaj, najuhuaana tamaatia nia niishitiojonu-uquiaatej. Nojoriiri Jesucristo rupaa cushitiojoquiaa niaaara, nojori tacarajosacari najuhuanaj, mariyateyacato nojori quiniuucua. <sup>8</sup> Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhua, janiya jaara tamaatia pohuatare Jesucristojiniji niajaniyani, jiyocua-caanuji roseno Pueyaso serujuhua, Pueyasojuanaari canaa saniitionutaniya. <sup>9</sup> Janiyacuajaari naa sequeja niajaniyani. Quiarjia socua pacuterohuacuara sequenu nia niishishocoriquiano. Cua tojiri pueyanaa. Niaa jaara tamaatia pohuataasaariquia Jesucristojiniji, maja

naate taa tari cua pohuataquiaari niajaniyacujani, Pueyaso cuara saniitiooranoj.

<sup>10</sup> ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniryani. Janiya jaara saaja pueya timitiasano quiniu paniryani, janiya maara pa Jiyaniijia Jesucristo seru quiyaquirini.

### Taa Pablo jatanishaaquiaari Jesucristo jiyaramiquishano na quiniuriani

<sup>11</sup> Cuarta Pueyaso pueyanaa, nia pohuatareera cante cua niishitiojoquiaari Jesucristo rupaani, cua pohu-atasano niajaniyani. Pueyanaa, nio rupaa janiya na pohuata niajaniyani, nioori maja mijiria quiniaa pueya niishitiojosano janiya. <sup>12</sup> Taa cua sequeya niajaniyacua-jani, majaari nio rupaa cua niishiniu quiquiaari tamasa pueyajiniji. Jesucristojuanaacuaajaari na rupaa cua niishitioquiaari.

<sup>13</sup> Naa naasucuaari janiyajiniji tojinuujiacuaja tarijia. Seetanujuaana cuarta Judiocuaca miishano miiija cua quishacarijia, janiyari Pueyaso saquiriojosano pueya pueconu panijia puetunujuaana. Janiyari jiyanohua paracaajia nojorini. <sup>14</sup> Janiyari seetanujuaana canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. <sup>15</sup> Naajaa, jiyanohua panijia Pueyaso quiniuucua, cua supueyaquishacarijia, ñojuajaquiiri tari cua saquiriojo-quiaari na pueyano cua quiniuria! <sup>16</sup> Naacuajitij, tama na panishacarijiaaja, nojuajanaari Neyanu cua niishi-tiquiaari, Neyanujiniji cua pohuatanura taucua. Neyanu na niishitiniu nuhuaji janiya, majaari quenaaja tamasa nequesotanuucua cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitioquiaari puetunu-juanaa Neyanujiniji. <sup>17</sup> Naajuhua, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujua-naa Jesu jiyaramiquishano pueya quijia. Jiyacaritij, ma-jaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaari-uhua Damasco tiacajiniohuani.

<sup>18</sup> Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén tiacajiniani, Pedro cua niishiniuria shusha-janaa. Nata cua quishacari, quince juucaari cua shoco-joquiaari tiini. <sup>19</sup> Jiyacaritij, majaari socua Jesu saquirio-josano pueya cua niquiniu quiquiaari. Janiyari saaja

Santiago niquiquiaari cutarani. Nojuacuajaari pa Jiyaniijia Jesu tarajanu. <sup>20</sup> Pueyanaa, Pueyasocujaari niishiya, janiyari nio cua naajiojina seetanujuanaa nia pahuataani.

<sup>21</sup> Na nuhuaji, janiyari quiaquiaari Siria jiyajiniani, Cilia jiyajiniano. <sup>22</sup> Saniniuujia, Judea jiyajinia Jesu tojiti-jaca maapueeri juhuanajuaja maja na niishitiuniu quijia janiya. <sup>23</sup> Nojoriiri saaja naa poojotasaaquiaari janiyajiniitij: “Noo pueyano tarijia pa miitiaja naquiya Jesujiniji pa pahuatasacaritij, nojuajanaari quiarijia pa Jiyaniijiajiniji pahuataa pueya niquiarajuhuj”. <sup>24</sup> Naa nojori tojiniushacari janiyajiniitij, nojoriiri Pueyaso maniniuhuaqueetaquiaari nojori paraca na jataniniuucua Jesu rupaa pahuatana na quiniuria.

### Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhuj

**2** Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhuj. <sup>2</sup> Pueyasocujaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojiti-jaca jiiitanaa pueyata rerejoquiaarini. Maja seetanu puetunu nojoritijanaa, saaja nio pojortia: Santiago, Pedro, Juannio. Janiyari saaja cuno pojori niquiara pahuataquiaarini taa cua pahuataquiaa Jesujiniji puetunu taucua-janaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate nahuhuaana sesa niishitiojija taucuaani?” Cua seque-tureeri: “Maja. Quiaacuaja seetanu rupaa-janaa niishitiojija taucua, na Jesucristojiniji quia pahuatasacari nojori”. <sup>3</sup> Naajuhuj, parta Pueyaso pueyano Titoni, cuta quiquiaari tiini, nojuajaari Grecia jiyajiniinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jiiitanaata, nojoriiri Tito niquiquiaari nareja, nojori na rupuenurajuhuj. Nojoriiri niishiquiaari nojuajaari seetanujuanaa Pueyaso pueyanojuhuj, saaja Jesucristoocua na tiuuniuucua. <sup>4</sup> Saniniuujia, noojiaqueya canaa Judiocuacajiniinioori tama nojori cuaqueyajaaja jiyatequiaari juhua Jesu tojijica pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiuushacari. Nojoriiri juucua canaa jiyatenu paniquiaari tariucua-caanu Moisés Rootasano tojijica canaa quiniuhua. <sup>5</sup> Canaari nojori niishitiojosano pataquiaari saajani. Majaari quenaaja shiitaniyojua nojori rootasano cana tojiniu quiquiaari. Canaari naa miiquiaarini seetanu Jesucristo rupaa-janaa cana cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari cana cojitini paniniu quiquiaari Jesucristo rupaa, tariucua-caanu niishitiojosanota.

<sup>6</sup> Cuno pojori Pueyaso pueya maapue jiiitanaa Jerusalén tiacajiniani, nojoriiri jyanohua tojishano pueya quijia. Janiyara naajaa. Pueyasocujaari nahuhua quijica jyanooquiaajuhuj, taa na jyanooquiaa tojishano pueyacuani. Naajaa, cuno tojishano pueya jaara tojiquiaari taa cua pahuataquiaa Jesucristo rupaani, majaari quenaaja niquiriyatu rupaa nojori sequenu quiquiaari, nojori niishitiojonura janiya socua. <sup>7</sup> Nojori cutaraari niishiquiaari Pueyasocujaari seetanujuanaa cua jiyatequiaari na rupaa pahuatana cua quiniuria taucua, taa Pedro na jiyatequiaari Judiocuaca niquiara pahuatana na quiniuriacuani. <sup>8</sup> Pedro Jiyatena Judiocuaca niquiara Jesucristojiniji pahuatariquianoni, cuno Pueyasojuanaacuajaari cua jiyatequiaarijuhua taucua niquiara pahuatana cua quiniuria. Naacuajitij, canaari mariyata Pueyaso jiyaramiquishano pueyani.

<sup>9</sup> Santiago, Pedro, Juannio, nojoriiri socua tojishano quijia puetunu Jesuucua tiuunaa cuarta Judiocuacajiniiniojuanaa. Nojoriiri seetanujuanaa puetunu Pueyaso muerasu jyaniiianucua-janaa quijia. Naajaa, nojoriiri seetanujuanaa niishiquiaari Pueyasoori maninia cua jyanooquiaari, na jiyatenura janiya Neyanujiniji pahuatana cua quiniuria taucua niquiara. Naaratej, nojoriiri na juaashiquia niquitiojiquiaari canaani, janiya, Bernabeenio. Nojoriiri cunota juhua cana sequeturiquiaa canaari seetanujuanaa nojori cojiniaani. Naa cana sequeturiquiaarijuhuj: “Maniniacuaja. Nia quiojyare taucuaacua tii nia pahuatanura Jesujiniji nojoriijuhuj. Canaari saniniuujia parta Judiocuaca tajinia poonijionutaniyanijia, nojori niquiara cana pahuatanura Jesujinijiuhuj”. <sup>10</sup> Nojoriiri cana sequequiaarijuhuj: “Canaa panishano pueyanaa, majaari nia niyajetanu casamiiuniucua pueya naacunu”. Naaratej cuarta Pueyaso pueyanaa, puetunu tiquiyocua-janaa cua rucuanesacari, janiyari naa miiquiaa seetanujuanaani.

### Antioquiya tiacajinia Pedro nacasusaanujiniji pahuatasano

<sup>11</sup> Tamacari, cana quishacari Antioquiya tiacajinia, Pedroori canaacua niquiaarijuhuj, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jyanohua na nacasuquiaarini. Cuno na miishanoni, cunoori seetanujuanaa sesa quiquiaari Pueyasora. Naa na miishacaritij, tamajaaja miiriquiaa cocuaatiari. <sup>12</sup> Pedroori naa miiquiaaritij. Coteenu cana cojiquiaari maniniaari tariucua Jesuucua tiuujiaca taucua, canaata na miaquejonura jatiqui. Jiyacaritij, canaacua tiuquiiioquiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na mi-aquenu paniniu quijia canaata, tariucua Jesuucua tiuujiaca taucua. Narta Judiocuaca puerequiaariiri maja na sequesaanura: “Cunoqui sacuaratia miaquejua taucua”. <sup>13</sup> Tii quiniaa Jesuucua tiuujiaca Ju-



diocuaca jaara niquiquiaari naa Pedro miishanocuaatej, nojoriiri jaarajaaja canaacuaji rupatequiaarijuhuaj, Pedro na cojitiuniuria. Naajuhuj, Bernabeeri jaarajaaja canaacuaji rupatequiaarijuhuaj cuno mosanucua na cojiniuria!<sup>14</sup> Naaratej, janiya jaara naa nojori niquiquiaari tariucua Jesuucua tiuunio taucuaca tamacatiuyanoni, janiyari niishiquiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequequiaari Pedroni: "Quiaari Judio pueyano. Naajaa, majaari seetanujuanaa juhua Judio pueyano quia quiniu quiquiaa. Quiarijia saniniuujia, quiaari Jesuucua tiuunio taucuaca shiniujiya nojori quiniuria seetanujuanaa juhua Judio cuaca, nojori rupenura pajaniya. ¿Casaara naa quia shiniujiya nojoriirini?"<sup>15</sup> Paacuajaari Moisés Rootasano tojjijaca cutarani, Judiocuaca pa quiniucua. Paari maja tahuani, Pueyaso tojiyashijia.<sup>16</sup> Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjijaca pa quiniucua. Maja. Pueyaso cutaraari pa jiyanoojia, Neyanu Jesucristoocua pa tiushacari. Paari cunora Jesucristoocua tiuquiana, nojuaja jiyanooniuria pajaniya puetunu sesa pa miishanojinijianaa. Sesa pa miishanoori maja na jiyanooshaanu quiquiaa Moisés Rootasano pa tojishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojjia na quiniucua. Maja.

<sup>17</sup>Paacuajaari Jesucristoocua tiuquiarini, jiyanooshano pa quiniuria, maja socua Moisés Rootasano tojjijaca pa quiniuria. Na nuhuaji, paa jaara jiyaniyani paa sesa miijica quiriohuani Moisés Rootasano pa tojiyaquishacari tarini, saaja Jesucristoocua pa tiushacari, paari jiyanoohua jiyajeneyani. Naa pa jiyaniharitij, paari juhua sequeyani Cristoori pa jiyaterohua sesa miijica pa quiniuhuara nocua pa tiuuniucua. ¿Quiaateeri naa sequenu paniya Pedronaa? [Maja!<sup>18</sup> Paacuajaari maninia miiquiaarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiushacari. ¿Paateeri socua maninia miijica quiniutianiya Pueyaso niquiarani, paa jaara Moisés Rootasano tojjijaca quiriohuani? [Maja! Paa jaara naa niishiriojiyani, paari jiyanoohua jiyajeneyani. Paacuajaari seetanujuanaa pohuatanuuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiushacari. Naa pa pohuatanuusano jaara sapojosano quiriquia, paa maara jiyanoohua sesa miijica quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiushacari".

Janiyari naa nacasuquiaari Pedroni puetunu tii quinaa Pueyaso pueya niquiarajanaa.<sup>19</sup> Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucuaji. Naaratej, janiyari tama cua cuaqueyajaaja jiyatequiaari juhua tariu-

cua macuni, maja Moisés Rootasano tojjia cua quiniuria socua. Naacuajitij, janiyari quiarijia saaja Pueyaso-ra quia cutarani. Janiyara, janiyari tari cojiriti-asaaquiaari monu Cristota niyacutesanojiniani.

<sup>20</sup>Naacuajitij, quiarijiani, majaari nio janiya quiyani. Jesucristocua jaari nio, cojiajinia quiyani. Majaari tama jaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiuujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura.<sup>21</sup> Majaari cua ruuretano Pueyaso jiyanooni panishacari janiya. Jaara pa naata quiriquia tama pa cuaqueyajaaja jiyanootiniu Pueyaso, Moisés Rootasano tojjijaca pa quiniucua, Jesucristo maara najuhuana cusoquiaari pocuara.

**¿Teyano tojjia pa quishacari pa jiyanooshaaquiiani, Moisés Rootasano, Jesucristoocua tiuuniu soj?**

**3** Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaariuhuj, cante tari nia sapojocanuni, Jesucristoocua tiuuniujiniji nia pishinuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa.<sup>2</sup> Quiarijiani pueyanaa, janiya saaja nio nia nequesotanu paniyani. Cua riucua-ture. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniucua, Jesucristo rupaacua nia tiuuniucua soj? ¿Taa nia sequeyani? Ni-aacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiushacari, niaa jaara na rupaa tojiquiaari.<sup>3</sup> [Niaaquiiri tojetaarucuajanaa mosanucuajuhuanajaj! Nia niquishuriirij, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuquiniuria, Jesucristoocua nia tiushacari. Quiarijia saniniuujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? [Maja!<sup>4</sup> Pueyasocua jaari jiyanoohua maninia miiriquiaa nijaniya, saaja Neyanuucua nia tiushacari. Naa Pueyaso miishano niaarani, ¿cunoteeri najuhuana quiquiaarijuhuaj? <sup>5</sup>Pueyanaa, Pueyaso jaara na Sohuanu niqutioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniucua? Maja. Nojuajaari naa maninia miiquiaa nijaniyatej, saaja na rupaacua tiuujica nia quiniucua, canaa pohuatasano nijaniyani.

<sup>6</sup>¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso

so sequesanoocua tiuuquiaari. Naaratej, Pueyasoori na jiyatequiaari juhua tojetaarucuajanaa sesa miyashijia pueyanora. Naa na jiyatequiaariiri saaja nocua na tiuuniuucua. <sup>7</sup> Naacuajitij pueyanaa, quiarijia nia niishiri cutara, cante Pueyasooocua tiuujiani taa supuetana Abraham tiuuquiaaricuaani, nojoriiri seetanujuanaa canaa supuetana Abraham niqiohuananaa cutara. <sup>8</sup> Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajaniuhuj, nojori jaara nocua tiuuri. Naaratej, nojuajaari naa sequequiaari supuetana Abrahamtej: “Quiaacuajaari cua sequesanoocua tiuuri, Abrahamnaa. Naaratej, quia jinianuucujinino supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajiniujiniano nocua tiuuriquiano pueyatej”. <sup>9</sup> Naaratej, cante Jesucristooocua tiuujiani, Pueyasoori na jiyanooniutianiyajuhuj, taa supuetana Abraham na jiyanooquiaaricuaani, na sequesanoocua Abraham tiuushacari. Cunora, Pueyasoori maninia miiquiaa Jesucristooocua tiuujia, taa na miiquiaari Abrahamcuaani.

<sup>10</sup> Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutianiya. Naa naajiotasano quiyacuajaari tariucuacaanu Pueyaso Rupaa-jinia:

“Moisés Rootasano tojjia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiyaquijiani, nojuajaari pueyaracaanu saniitiosocoriquiano”.

<sup>11</sup> Naacuajitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuujia, naa naajiotasano quiyacuajaari Pueyaso Rupaa-jinia:

“Pueyaso jiyanooshano pueyanoori pueyaracaanu rishiriquiano cutara, Pueyasooocua na tiuuniuucua”.

<sup>12</sup> Saniniuujia, Moisés Rootasano, cunoori maja na niishitiojonu Pueyasooocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojiniuucua rishiniutianiya”.

<sup>13</sup> Maja maninia pa tojiyaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaariuhua tariucuacaanu Pueyaso Rupaa:

“Pueyaso sesacasanoori cuno, niyacutesanojinia teetesano”.

<sup>14</sup> Naa Jesucristo cusonuucua pocuaratej, saaja nocua nia tiuushacari, Pueyasoori na naata shuquiritini niajaniya taucuacajuhuj, puetunu na sequesanojanaa canaa supuetana Abraham. Naajuhuj, saaja pa tiuuniuucua Jesuucua, puetunu pajaniyajanaari Pueyaso So-

huanu masequiaani, taa seetanujuanaa Pueyaso sequequiaari tariucuacaanuujani.

### Moisés Rootasanoori maja na naata Pueyaso sequesano Abraham jataniniu

<sup>15</sup> Cuarta Pueyaso pueyanaa, maatia nia pohuatareera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijiaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. <sup>16</sup> Tariucuacaanu, Pueyasoori naa sequequiaari Abrahamtej: “Janiyari seetanujuanaa maninia quia miiniutianiyani, quia jinianuucujinino supueriquiano pueyanonio”. Nia niishiri pueyanaa, tariucuacaanu Pueyaso Rupaa-jinia naajiotasanoori maja na sequenu: “Abraham jinianuucujinino supueno pueyara”. Maatia sequeyacuajaari: “Abraham jinianuucujinino supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocuaja. <sup>17</sup> Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacuajitij, Moisés Rootasanoori maja na naata Pueyaso sequesano Abraham jataniniuujuhuj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaarijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niqitioquiaari na rootasano, saajianeecaacua na quejasano. Moisésri saniniuujia pueya na niishitiojoquiaari. Naacuajitij, Moisés Rootasanoori maja na naata Pueyaso sequesano Abraham jataniniu, najuhua na quiniuria pajaniyara. <sup>18</sup> Pueyaso niqitiojonu panishano pajaniya jaara pa niqitiosariquia saaja pa tojiniuucua Moisés Rootasano, na niqitiosocoriquiano pajaniya maara nareja niqitiosoo quiri. Saniniuujia, Pueyasocuajaari seetanujuanaa naa Abraham sequequiaari: “Janiyari nareja quia niqitiojutaniya cua sequesano”.

<sup>19</sup> Naa naasucuaari sequeya: “Jaara naa quirij, ¿casaarano socuateeri Moisés Rootasano?” Nia sequeereera pueyanaa. Jiyanoohua Abraham nuhuaji, Pueyasoori Moisés caminiujiutiquiaari na rootasano, pueya niishiniuria nojoriiri seetanujuanaa Pueyaso tojiyashijia. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujinino supueno pueyano cuara tiuquiquiaariijaatijia, taa Pueyaso sequequiaari Abrahamcujani. Nojuajaari pa Jiyaniijia Jesucristocuaja. Naacuajitij, Jesucristocuajaari Pueyaso jiyaniquishano quiquiaari, na sequesacari Abraham, “quia jinianuucujinino supueriquiano pueyano”. Cristocuajaari puetunu Pueyaso sequesano Abrahamjanaa masequiaari pajaniyarajuhuj, taa

Pueyasajuanaa sequequiaari Abrahamcuajani. Saniniuujia, Moisésri saaja pueya niishitiojoquiaari Pueyaso seya caminiujiushano nojuaja. <sup>20</sup> Abrahamra saniniuujia, majaari quenaaja tamonu pueyano quiniu quiquiaari nera na caminiujiuriquiano. Pueyasojua-naacuaajaari nocua muetaquiaari, na sequenura seetanujuanaa taa Neyanuucua tiuujiaa na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanoiniji.

### Casaaranote Moisés Rootasanoni

<sup>21</sup> Naa cua sequesacaritij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jyanootiniu pajaniya, paa maara Moisés Rootasano tojtiajaca quiriquiani, Pueyaso jyanooniuria pajaniya. <sup>22</sup> Saniniuujia, tariucuacaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacuajitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

<sup>23</sup> Pa niishiyaquishacarijia Jesucristoocua pa tiuuniuria, paari juhua Moisés Rootasano jiitiasano pueya quiijiani. Paari naa quiija taraatia pueyacuaani, paa jaara tojiquiaari Jesucristojinijiaatijia, nocua pa tiuuniuria. <sup>24</sup> Naacuajitij, Moisés Rootasanoori juhua pa jiiitiana quiquiaari. Juhua naatujooriniyojua pa pueratej jua Jesucristoocua. Naa na miishacari pajaniyatej, juhuacarijia Jesujiniji pa niishitiojojuuari. Naacuajitij, paa jaara Jesucristoocua tiuquiarini, paari puetunu sesa pa miishanojinijianaa jiyanooshaaquiaarini. <sup>25</sup> Naa Jesucristoocua tiuujiaa pueya pa quishacari quiarijiatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. <sup>26</sup> Quiarijia cutara, puetunu niajanijajanaari Pueyaso pueya, Jesucristoocua tiuuniuucua. <sup>27</sup> Naacuajiti pueyanaa, niaa jaara moojinia tiuquinishaacanu, seetanujuanaa nioojiata nia tiushacari Jesucristoocua, niaari na coquetesaaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniyojua nia quiniuucuaajuhaaj. <sup>28</sup> Naa Pueyaso muerasu pa quiniuucuatej, majaari Pueyaso niqiniu rimiajata pajaniya. Tamonu jaara Judio pueyano quiri, naajaa. Tamonu jaara tahue quirijiuhaaj, naajaa. Poonijotesano pueyano maaraja, camarnuujua pueyanonio, cunoori maja rimiajata Pueyasora. Naajuhaaj, caya, maaji, cunoori maja rimiajata Pueyasora. Jesucristoocua tiuujiaa pa quishacari, Pueyasora, puetunu pajaniyajanaari juhua niquiriyatu pueyanoni. <sup>29</sup> Naajuhaaj, niaa jaara seetanujuanaa Jesucristo pueya quiri, niaari seetanujuanaa canaa supuetana Abraham jiuhaacuajinio

supueno pueya cutara. Naacuajitij, niaari Pueyaso sequesano Abrahamrano maseriquianojuhaaj.

<sup>4</sup> Nia sequenu paniya socuanijia pueyanaa. Cua tojiri. Mijiria, pueyano jaara jyanijia quiri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanojuaja maja na naata na que casami jiitianu. Nojuajaari saaja juhua pataaco seru, naatujua na quishacarijia. <sup>2</sup> Naacuajitij, tamasaacari cuno mueya canashitijia, cuaara mashajara quirijiaatijia, jyanijiaari jiyatesocoriquiano, taa na shipininio sequesaaquiaaricuaajani. Juhucarijia niishitiojoshijajuaruuhuaaj, maninia na jiitianura nerano na que riuriotaca. <sup>3</sup> Paari naajuhaaj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojtishaaquiaarini, pa supuetanaa niishishanonio. Paari naa taraatia jiitiasaaquiaarini. <sup>4</sup> Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajinijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. <sup>5</sup> Naacuajitij, nojuajaari na naata Moisés Rootasano tojijiaa jyanooniu, maja socua pa tojtishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. <sup>6</sup> Seetanujuanaa na niishitiniuria pajaniya paari necojuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacarijia, nojuajaari Pueyaso pa sequetequiaa, "cua Quena". <sup>7</sup> Naacuajitij pueyanaa, majaari tari nia quiniu Moisés Rootasano tojijiaa, juhua pataaco seru. Niaacuajaari seetanujuanaa Pueyaso niquiohua cutara. Naa na muerasu nia quishacarijia, niaari tariucuacaanu Pueyaso sequesano Abrahamrano maseriquianojuhaaj, taa na muerasurano niquitionu na sequesaaquiaaricuaajani.

### Pablo tacaashacari Galacia jiyajinia quiniaa Pueyaso pueyacua

<sup>8</sup> Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojijiaa quiquiaari taraatia. Cuno casaari maja seetanujuanaa Pueyaso. <sup>9</sup> Quiarijia saniniuujia, niaari Pueyasajuanaa niishiya. Pueyasajuanaa cutaraari saniya nia niishiya. Naa Pueyaso panishano muerasu nia quishacarijia, ¿casaara najuhuaana supuetanaa pueya niishishano miiniuria nia panihua socuani? Cuno, canaa supuetanaa Judiocuaca rootasanoni, cunoori maja na naata cumaquiniu niajanijia. Niaari najuhuaana na tojijiaa quiniutianiya. <sup>10</sup> Niaanaari puetunu juucajanaa niishijia quia quia, juhua canaa supuetanaa Judiocuaca. Niaanaari sequetequiaa: "Cuno juuca, majaari pa miacuenu quiniutianiya. Cunoori pueresano juuca, Pueyaso jyanooniuria pajaniya". Niaanaari naa miiquiaa puetunu shuniyarajanaa, puetunu marijijajanaa. ¿Casaara naa miijiacara nia quirihoacuacari-ni cuarta Pueyaso pueyanaa? <sup>11</sup> Naa nia miiniuucuatej, janiyari jyanohua tacaya quiarijia niaacuani. Janiyari

tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

<sup>12</sup> Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua mi-iquiaaricuaani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua nijaniya cua quiniuriajuhuaj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiaquiaari niaata cua quishacari. <sup>13</sup> Niaacuajaari niishiya, cusosu cua quiniucua, janiyari shushajanaa Jesucristojiniji pohu-ataquiaari nia niquiarani. <sup>14</sup> Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaratia cusosu cua quishacaritij. Majaari quenaaja nia soonu quiquiaari janiya. Saniniuujia, niaari cua tojitiaquiaari juhua Pueyaso serujuanaa, nia niqiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua nijaniya. <sup>15</sup> Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia quiniuurini, taa nia quiquiaari coteenucujani? Janiyacuajaari ni-ishiqaarini, jyanohua nia paniniucua janiya, jaara nia naata quiquiaari, nia maara nia namijia samiriootaquiaari nia niquitiosocoriquiano janiya, cucua nia taraajesacari. <sup>16</sup> Quiarijia naa cua sequesacari seetanujuanaa nijaniyatej, ¿niaateeri cunora cua niqiniutianiya juhua nia paraca? <sup>17</sup> Cuno pueya, najuhuana tamaatia nia niishitiojoquiaa Pueyaso rupaani, quiarijia nojoriiri maninia miiquiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojijiaca nia quiniuria. Naacuajitij, majaari tari cua rootasano tojitiajaca nia quiniu quiniutianiya. Niaari cua cartenutaniyajuhuaj. <sup>18</sup> Quiarijiani, cuno pojoriiri nia shuquiritiyacujaa. Majaari nia jyaniniu janiya nia sequeyani, maja maninia parta pueya pa shuquiritiniuria. Taaquiririnij, maniniacuajaari parta pueya pa shuquiritiniuria, seetanujuanaa pa naacunura nojori. Niaacuajaari niishiya pueyanaa, janiyari jyanohua nia tojishano pueyano quiquiaarini, Jesucristojiniji cua pohuatanuucua nia niqiara. [Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! <sup>19</sup> Quiquihuaniyोजना, jyanohua cua tacaashacari niaacua, coojaari jyanohua noonu pacuterohuacuhuj, naatej, taa maajinooquiaacuaa na manajani, quera na ranu panishacari. Naajuhuaj, janiyari naa pueyaracaanu miijionutaniya naquiya niaacuani, niaa cuaara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. <sup>20</sup> [Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari nia ni-

ishiniu taa nia quiya seetanujuanaani. Niaanaari Moisés Rootasano tojjiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

### Miriqui pohuatasano Agarjiniji, Saarajinijinio

<sup>21</sup> Moisés Rootasano tojitiajacaanaa, cua tojiri. ¿Majaateeri tariucuaaanu Pueyaso Rupaajinia nia serojonu quiquiaacuaja, taa Abrahamjiniji na pohuataani?

<sup>22</sup> Moisés Rootasanocuajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacujinijohuj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijuhuaj. Na sesojoquiaariiri Isaac. <sup>23</sup> Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cutaraari Pueyaso panishano. Saniniuujia, saniya necocujanaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijiana muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaariiri: “Abrahamnaa, quiaari niyanuraca quiniutianiya”. Naa Pueyaso sequenucuatej, necocua Saaraari muetuquiaari, motaja na quishacari. Cunoori maja tama nojori cumacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. <sup>24</sup> Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarrimiriqui juhua Moisés Rootasano, Sinaí tuhuananujinia Pueyaso niishitiojosano Moisés. Naaratej, Moisés Rootasano tojitiajacaari juhua seya quiquiaa, taa Agar quiquiaari serucuaani. <sup>25</sup> Seetanujuanaari, Agarrimiriqui juhua Sinaí tuhuananu Arabia jiyajinia. Saniniuujia, nio pa quishacarini, Jerusalén tiacaari juhua Sinaí tuhuananu, cuno tiacajinia quiniiaa pueya quiniucua Moisés Rootasano tojjiaca. Cunora, Moisés Rootasanoori juhua nojori jiitiana quiya, juhua poonijjotesano seya nojori quiniuria. <sup>26</sup> Saniniuujia, quiarinio Jerusalén tiacani, jiyocuaaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojjiacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. <sup>27</sup> Tariucuaaanu Pueyaso sequesanoacuajaari naa naajiotasano quiyajuhuaj: “Niyajaru maajiniaa, shuquiriaatia quia quiri.

Quiaacuajaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniucua. Naajaa, quiaacuajaari socua queraatia niquiohuaraca quiriquiano cuno niyacaraca maajiniji”.

<sup>28</sup> Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarijiani, paari naajuhuaj. Jesucristo rupaacua pa tiuushacari, Pueyasoori

na cumaacata pa jataniquiaari seetanujuanaa na muerasu pa quiniuria. <sup>29</sup> Maninia nia niishiri nio pohu-atasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Sanini-uujia, saniya necocujanaa jaara nera muetuquiaari, cunoori Pueyaso Sohanu cumaacata rasaanquiaari cutara. Na nuhuaji, seru niyanuuri Pueyaso Sohanu cumaacata rasano miitiaja quiquiaari. Quiarijiaari naajuahaj, Pueyaso ruuretajaca pueyari Pueyaso Sohanu jatanishano pueya miitiaquiaa. <sup>30</sup> Quiarijia nia niishiri cutara, naa naajiotasaaquiaaricuaajaari tariucuaaanu Pueyaso sequesano Abraham:

“Quia niquiocua seru quia taanuure neyanuta puetunujuanaa. Cuno, janiya seetanujuanaa quia sequequiaari niquitionuni, cunoori maja Agar niyanurano. Cunoori seetanujuanaa quia niquiocua muetusanorano, cua Sohanu cumaacata rasano mueyaranotuhaj”.

<sup>31</sup> Paari naajuahaj, cuarta Pueyaso pueyanaa. Paari maja seru niquiohuani. Paari Jiyaniijia niquiohuajanaa cutarani.

#### Saaja Jesucristoocua tiuujia pa quiri

**5** Jesucristo cusonuucua pocuara, nojuajaari Pueyaso niquiohuara pa jiyatequiaari, maja socua Moisés Rootasano tojjia pa quiniuria. Naarate pueyanaa, jyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjiacara nia quiniuhua. ¿Moisés Rootasano tojjiacateeri jiyanooshaanutaniya? [Maja! Maja pa naata tama pa cuaqueyajaaja jyanootiniu Pueyaso, Moisés Rootasano pa tojjiniucua. <sup>2</sup> Cua tojjitiare pueyanaa. Janiyari Pablóni. Janiyajanaari seetanujuanaa nia sequeyani, niaacuajaari Jesucristoocua tiuujia, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuanaa Pueyaso pueyara quiniutianiya cutara, nia cararaatiuuquia co miatejosaanuucua? [Maja! Niaa jaara naa niishiriojia, niaari Jesucristo cusonu jiyatenutaniya najuhua na quiniuria nijaniyara. [Pueyanaa, majaari nia tojjiniu cuno Judiocuaca, canapute nia shiniujuquiaa nia cararaatiuuquia co miatejosaanuracuajani, seetanujuanaa Pueyaso pueya nia quiniuria! <sup>3</sup> Janiyari socua sequenu paniya noo pojoririani, cararaatiuuquia co miatejonuujuacatej, nojori jyaniniuucua naa nojori miishacaritij, nojori cutaraari seetanujuanaa Pueyaso muerasu. Cante naa miijiani, nojuaja cuara tojjiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojjiniu, Pueyaso jiyanooniuria nijaniya? [Maja! <sup>4</sup> Naa tama nia cuaqueyajaaja nia jyanootiniu panishacari Pueyasotej, Moisés Rootasano nia tojjiniuucua, niaari Jesucristojiniji carejerucuaa. Majaari Pueyaso naata maninia miiniu nijaniya socua, taa maninia na miiquiaacuaa na panishano muerasuni. <sup>5</sup> Pajaniya saniniuujia, paari Pueyaso Sohanuraca cutarani, Jesucristoocua pa tiuuniu-

cua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. <sup>6</sup> Quiarijiani, Jesucristo rupuesano pa quishacari nocua pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijia pa quiniuria, parta pueya pa paniniurijahuaj.

<sup>7</sup> Cuarta Pueyaso pueyanaa, niaacuajaruhua Jesuucua tiuujia quijia seetanujuanaa. ¿Quiarijiaarihuaj, cante nia tarinitiriohuacuaa seetanu rupaacujanaa nia tiuyaquiniuriani? <sup>8</sup> Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. <sup>9</sup> Cunora, seetanujuanaari nio sequesano: “Shiitaniyojua jereeca mashaca jaara shoqueeca mashacajinia shuushaare, cuno shiitaniyojuaari puetunu cuno mashacajanaa jereteja”. Naajaarihuaj, shiitaniyojua sesa niishitiojosanoori puetunujuanaa pa sesojuahuaj. <sup>10</sup> Naajaa, janiyacuaajaari pa Jiyaniijiaacua tiuya seetanujuanaani, majaari nia tojjiniu quiniutianiya tamaatia cuno pojori niishitiojosano. Saniniuujia, Pueyasoori noo pojori saniitioriquiano, tamaatia na niishitiojonuusanota nia cushitioquiaani. Cante nia niishitiojia sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

<sup>11</sup> Cuarta Pueyaso pueyanaa, majaari cua niishitiojonu quiquiaa taucacajinijinio Jesucristoocua tiuujia, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaquiriquiani. Saniniuujia, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jyanohua cua juaaquiaani. <sup>12</sup> Majaari nojori nia tojjiniu, nojori niishitiojosacari nia cararaatiuuquia co miatejosaanura. Maninia juhvari cuno miatejonuunu porocua jayosaa-nura nia tajiniji, maja socua nojori cushitiojonura nijaniya.

<sup>13</sup> Cuarta Pueyaso pueyanaa, Pueyasocuaajaari nia sequequiaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijotesano pueya, taa nia quiquiaaricuaani Moisés Rootasano nia tojjishacari pueyaracaanu. Naa Moisés Rootasano tojjia nia quiyaquishacari taritij, naajaa, majaari nia jyaniniu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyanta nia cumaquitiojonura, seetanujuanaa nia panitioonuta. <sup>14</sup> Naa jaara naa miijia quiriquiatej, niaari puetunu Moisés Rootasanojuanaa tojjiyacuaja, taa na rootasanojinia naajiotasano quiyacuajani. Naa sequesari:

“Panijia quia quiriquia, taa quia paniyacuaa tama quia cuaqueyajaajani”.

<sup>15</sup> Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu,

naatej, taa sareya sayonuujutaquiaacuaani. Niaa jaara naa quiriquiatej, niari socua puecootoonutaniyaquij.

**Taa quijiate tama na panishanojuaaja miijia pueyanoni, Pueyaso Sohuanu tojjia pueyanonio**

<sup>16</sup> Janiya nia sequeya cutarani pueyanaa. Cua tojiri. Pueyaso Sohuanu tojjia nia quiri pueyaracaanu. Naacuajitij, majaari sacuaraatia tama nia panishanojuaaja nia miiniu quiniutianiya. <sup>17</sup> Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetoosacari poojiajinia, cunora, majaari pa naata miiniu taa pa miiniu paniyacujani. <sup>18</sup> Saniniuujia, Pueyaso Sohuanu jaara nia cumaquiquiaacuja saaja Pueyaso nia tojinuria maninia, cunora, Moisés Rootasanoori tojinu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

<sup>19</sup> Maatia niquishanocujaari taa pueya miiquiaani, noo pojori, canapuate tama na panishanojuaaja miijiacani. Nojoriiri juhuajaniya na camishoo maajipohua numuetucunuujua, sacuaraatia miitioojua narta canuutajaariuhuj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatijaca sacuaraatiatej. <sup>20</sup> Naajuhuj, nojoriiri tama nojori pueyasorajaaja nojori shipinishano casaa secojonuujua. Nojoriiri shimiacurijuhuj, narta pueyano shimiojonuujua. Narta pueyano niqiniu paniyashijiacajaariuhuj. Nojoriiri juaatiojuacajuhuj. Nojoriiri narta pueyano jiiitasanoocua jiaatijacajuhuj. Cunora, nojori niqiniu paniyaquijiaari. Nojoriiri maja na niishiniu rejetenu na juaaquia. Ritia juajiacaaari. Pueya nasojojua narta pueyanoocuarajaariuhuj. Naacuajitij, nojoriiri narta pueya raquiriojotaquiaa narta pueyajini. Nojoriiri saaja tama nojori panishano pueyajaaja panijia, canapuate maninia miiquiaa nojoricujani. <sup>21</sup> Cuno pojori, naa sacuaraatia miijia pueyaracaanu Pueyaso niquiarani, nojoriiri maja na niqiniu paniniu quijia narta pueyano, cante taquiya maninia miishaaree nocujicuaani. Nojoriiri sacuaraatia mashaasequenuujacajuhuj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiiitasano na quiniu quiniutianiya, pueyaracaanu rishijia na quiniuria shuquiriaatia.

<sup>22</sup> Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijara pa jiyateja. Poojia jiyateya shuquiriaatia quijiaari. Poojia cajitijiaariuhuj. Jacaria pocujara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijia pa jiyateyajaariuhuj, pueya tiuniuria pocua. <sup>23</sup> Pueyaso Sohuanuuri pa jiy-

ateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa miijia quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. <sup>24</sup> Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio.

<sup>25</sup> Pueyaso Sohuanu jaara nia samiitianijioquiaari Pueyaso muerasu nia quiniuria, quiarijia seetanujuaanaa pueyaracaanu na tojjia nia quiri cutara. <sup>26</sup> Majaari tama pa cuaqueyajaaja pa jiyaniinu, paa socua maninia pueyano parta pueyajini. Paa jaara pueya shocotejaca quiriquiani, paari parta Pueyaso pueya juaatiniutiani. Maja maninia, paa jaara juaatishaareni tamonu jaara socua tojishano pueyano quiri pajaniyajini, naajuhuj, tamonu jaara socua maninia miishaare pajaniyajini. Majaari naa miijia nia quiniu Pueyaso pueyanaa. Saaja maninia quijia pa quiri cutara.

**Niarta Pueyaso pueyata nia cumaquitioojoriquia**

**6** Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno niajanijini canapuate Pueyaso Sohuanu niishitijaraca cutarani, nojori cuara jacaria na nacasuuranon, sesa miiniu na tarinitianuhua. Cante cuno sesa miijia nacasuyani, nojuaja cuara na nacasuura seetanujuaanaa na paniniutia narta pueyano. Naajuhuj, jiyanohua nia cojuare tama nia cuaqueyajaaja Sesaaca mariqui nia saninijurijiaariuhuj, sesa nia miiniurijuhuj. <sup>2</sup> Maninia cutaraari nia cumaquitiojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyaniija Cristo rootasano pajaniyarano tohuateenutaniyani.

<sup>3</sup> Najuhua quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojuaari tama na cuaqueya sapojijacacujua. <sup>4</sup> Puetunu niajanijanaa cumaati tama niishiriojuaajaacujua, taamueca pueyanote niajaniani, maninia miijia, sesa miijia soj. Niaa jaara seetanujuaanaa maninia miijia quiriquia, tama maninia nia miishanojuaaja nia timitiare. Niarta Pueyaso pueyano jaara socua maninia miijia quiri niajanijini, socua sesa miijia soj, niaara, naajaa. Maja cunora taraajenu, maja cunora shuquiriaatia quiniujuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. <sup>5</sup> Puetunu pajaniyajanaari tamaatia poonijosano jiiitiani. Tama niajanijajaaja cumaati na miiquiaa maninia, Pueyaso shuquirianura niajaniani, seetanujuaanaa shuquiriaatia nia quiniuria.

<sup>6</sup> Canapuate Pueyaso rupaa niishitiojosaaquiaani, cuno pojori cuara na niishitiojonaa niqitiojoora nojori casamijini saniniuujia, nojori niishitiojona jiiitiana nojori panishanojuhuaj.

<sup>7</sup> Pueyanaa, maja tama nia cuaqueyajaaja nia saponu nia jyanishacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: “Casaajajau pa natareeni, paari juhua cuno jajau senoonutaniyajaaniuhuj”. Nio miriqui sequesanoori nio niishitiojiya: cante maninia miijiani, nojuajaari maninia miishaanutaniyajaacuhuj. Naajuhuj, cante sesa miijiani, nojuajaari sesa miishaanutaniyajaacuhuj sesa na miiniuucua. Cunoori maja rimiajata. <sup>8</sup> Naacuajitij, canapuate tama nia cuaqueyajaaja shuquiritijaca sacuarata casa na miishacari mijiriani, Pueyasoori cuno pojori quejoonutaniya cutara, pueyaracaanu na saniitiosocoriquiano. Saniniuujia, cante Pueyaso Sohuanu tojjijiani, Pueyaso panishano na miiniuria puetanujanaa, nojuajaari pueyaracaanu rishijara jiyatesaanutaniya cutara. Nojuajaari shuquiritijaca quiniutianiya pueyaracaanu. <sup>9</sup> Cunora pueyanaa, niaa jaara maninia miijiacacuri, majaari maninia miiniuria nia taajenu. Pueyaracaanu maninia miijiacacuri nia quiri. Niaacuajaari niishiya, pueyano jaara na cuhuariquia natate, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojiniu tarinitiaaquirini, paa cuara sashiirajuhuj. Na nuhuaji cutara paari jyanohua shuquiritijaca quijiacacuri jiyatesaanutaniyani, maninia pa miiniuucua. <sup>10</sup> Naacuajitij, jaara pa naata quiriqia, maninia pa miiriqia puetunu pueyanaa. Saniya maninia cutaraari puetunu parta Pueyaso pueyanaa pa miiniuria maninia.

**Pablo nacasusacari pueya, quera na tucuatascari na naajio**

<sup>11</sup> Nia niquiri cua naajio pueyanaa. Naa quera namijiaa cua naajiosacari niaacuaratej, nia niishiri janiyanaari nio naajia tama cua juaashiquiatajaajani. <sup>12</sup> Socua cua tojiri pueyanaa. Cuno pojori, nia shiniuujia nia cararaatuuquia co nia miatejonurani, nojoriiri naa nia miitiniu paniya saaja narta Judiocuaca

timitianura nojori. Nojoriiri narta Judiocuaca puerequiaa. Nojoriiri niishiya narta Judiocuacaari nojori miiniutianiya naquiya, miatesoo nia cararaatuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jyanohua paniya nia cararaatuuquia co miatesano pueya nia quiniurajuhuj, taa puetunu Judiocuacajanaacuaani. <sup>13</sup> Cuno pojori, canapuate na cararaatuuquia co miatesanocuaani, nojorijianaari maja nojori tojiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatuuquia co miatesano nia quiniurajuhuj. Niaa jaara miatejosaare, nojoriiri tama timiquionutaniyajaaja, nojori tojitiacacuri nia quiniuucua. <sup>14</sup> Janiya saniniuujia, Pueyaso cuara cojuara janiya maja cua shuquiritianura tama cua miishanojuaja. Janiyari saaja pa Jiyaniijia Jesucristo shuquiritianu paniquiaani, pocua na cusonuucua niyacutesanojinia. Naacuajitij, janiyari mijiria niishishanoocua jiaatiaashijia jatanishaaquiarini. Mijiria casaari maja na naata shiniuujia nia janiya, nocua cua jiaatianura socua. <sup>15</sup> Pueyanaa, pa cararaatuuquia co jaara miatesano quiri, naajaa. Naajuhuj, pa cararaatuuquia co jaara miatesoo quiri, naajaa. Majaari rimiajata pa quiniu Pueyaso niquiria cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. <sup>16</sup> Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jyanoochacari nojori. Cuno pojoriiri seetanujanaa Pueyaso saquiriojosano pueya.

<sup>17</sup> Tariucuajaari cua rootasano nio naajionejinia. Quiarijiani, tamonu cuara socua cua taajeteyaquiiria sesa na niishitiojosanota niajaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujanaa Jesu seruni.

<sup>18</sup> Cua panishano cuarta Pueyaso pueyanaa, nioojia cuara jiaataara pa Jiyaniijia Jesucristo cumaaca, na niishitiajanio. Cuara naa quiiriatej.

# ÉFESO

## Pablo saruhatasacari Jesucristo tojtiajaca

**1** ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricua-jani. Niaacuara naajiyaniijia, canapue Pueyaso saquiriojoquiaari tama neracuajani, canapueete Jesucristo tojtianaacuajani. <sup>2</sup> Pa Que Pueyaso, mariyata pa Jiyaniijia Jesucristo cuara taraajeera niaacua, maninia na miinuria niajaniya. Nojori cuara cajitiiria nioojia pueyara-caanujuhuj.

## Taa Pueyaso miiquiaa pajaniyani Cristo rupuesano pa quishacari

<sup>3</sup> Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupenuucua, Pueyasoori capora pajaniyara. Nojuajaari jiyanhua maninia miiquiaa pajaniya, puetunu jiyocuacaanu na jiiiasano cumaacatajanaa. <sup>4</sup> Pueyaso niishishacari taa Neyanu miiniutianiya pocuarani, jiya ship-iniyaquishacarijia, nojuajaari tari pa saquiriojoquiaari na shuriucua quijia pa quiniuria. Pa saquiriojoquiaarijiaariuhua na tojjiaca pa quiniuria, tojetaarucujanaa sesa miyashijia pa quiniurajuhuj. <sup>5</sup> Panijia na quiniucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacujani. <sup>6</sup> Jiyanhua maninia na panishano Niyanuniyoyua miiniucua pocuara, nojuajaari pueyaracaanu jiyanooquiaa pajaniya. Nojuajaari jiyanhua capora. Naa maninia na miiniucua pajaniyatej, paari cunora pueyaracaanu na maninuhuaqueetaquiaani. <sup>7</sup> Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso sanitionu quiniutianiya pajaniya. Puetunu sesa pa miishanojinijianaa pa jiyanooquiaariiri. <sup>8</sup> Pueyasoori na paniniu niishitiquiaari pajaniya, na niqitiosacari na niishitija pajaniya, puetunu casaa niishijajanaa pa quiniuria. <sup>9</sup> Nojuajaari jiyanhua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuujia, nojuajaari jiyasohua na miiniu panishano niishitiquiaari pajaniya. <sup>10</sup> Pueyanaa, nia niishiri casaa Pueyaso miiniutianiyan. Nojuajaari Cristo jiyatenutaniya Jiyaniijiajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari

na tojjiacara quiniutianiya. Nojuajaari naa tohua-teenutaniya tamacari, taa tamajaaja na niishiriojoquiaaricujani.

<sup>11</sup> Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miinuria pajaniya. Pueyasojuanaari tariucuacaanu na niishiriojoquiaari maninia na miinuria pajaniya. Nojuajaari pueyaracaanu tohuateequiaa taa na miiniu paniquiaaricujani, niishijia na quiniucua. <sup>12</sup> Nojuajaari pa saquiriojoquiaari maninia quijiacara na jataninuria pajaniya. Cuarta Judiocuacajinijinio pueyani, canaari coteenujanaa Jesucristoocua tiu-uquiaarini. Naa jiyanhua maninia Pueyaso miiniucua canaa, nojuaja cuara maninuhuaqueetasaria jiyanhua. <sup>13</sup> Quiari naataja nia tojishacari Jesucristo rupaa, niaari cuno seetanu rupaacujanaa tiu-uquiaarijiuhuj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupetequiaari. Na Sohuanu niqitioquiaari niajaniya-jaariuhuj taa na sequequiaaricujani. Naacuaji niishishaaquiaari, niaari seetanujanaa Pueyaso muerasu. <sup>14</sup> Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranojanaa masenutaniya Neyanutajuhuj. Pueyaso Sohuanu pa jiiiasacari, paari niishiyani, Pueyasoori pa rijionutaniya puetunu na saquiriojosano pueyatjanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niqishaanurajuhuj. Cunora, Pueyasoori jiyanhua maninuhuaqueetasano quiniutianiya, jiyanhua maninia na miiniucua pajaniya.

## Taa Pablo secojoquiaari Pueyaso pueyacuarani

<sup>15</sup> Janiyari niajaniyajiniji tojiriucuaani, taa pa Jiyaniijia Jesuucua tiuujia nia quiyani, taa parta Pueyaso pueya panijia nia quiyajaniuhuj. <sup>16</sup> Cunora, pueyaracaanu cua secojosacari niaacuara, majaari cua tarintianu quiquiaa Pueyaso cua sequenura “paacarasho”, maninia na muerasu nia quiniucua. <sup>17</sup> Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqitionura niajaniya jiyocuacaanuji niishitija. Naacuaji nia naata niishiniu na niishitiniu panishano niajaniya, maninia nia niishinuria nojuajuhuj. <sup>18</sup> Janiyari niaacuara secojoquiaaaniuhuj, Pueyaso cuara cuhuataara nioojia, maninia nia niishinuria casaara Pueyaso saquiriojoquiaari niajaniyani, casaa na miiniutianiya niaarajaniuhuj. Janiyari niaacuara



secojoquiaajuhuaaj, maninia nia niishiniuria taa Pueyaso muerasu jiyatesaanutaniya shacantuuca quijiaca nojori quiniuriani. <sup>19</sup> Janiyari secojoquiaajuhuaaj, Pueyaso cuaara niishitiiria na cumaaca nijaniya, cuno, nioojijania poonijiyani. Na cumaacaari jiyanoehua, puequeyashijia. <sup>20</sup> Pueyasocuaajaari cuno na cumaaca poonitijioquiaari Cristo quetejinia, nojuaja jaara na samiitiani quiaariuhua macujiniji. Jaara na samiitiani quiaari, cuno na cumaacata na cajitiquiaariiri Jiyaniijiajanaa cajitijinia na miaquetajara jiyocuaaanu. <sup>21</sup> Tii na cajitiquiaariiri puetunu tamasaca cumaacaraca quijiaca Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasaca jiyaniijianucuaajanaa Jiyaniijia. Puetunu mijiria quijiaca jiiitiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipinirioehua, Jesucristoori jiyacari Jiyaniijiajanaa quiniutianiyajuhuaaj, taa quiarijia na quiyacuaajani. <sup>22</sup> Naacuaajitij, Pueyasoori puetunu na shipinishanojuanaa jiyatequiaari Jesucristo jiiitiasocoriquiano. Naajuhuaaj, Pueyasoori Jesucristo jiyatequiaari na saquiriojosano pueya jiiitiariquiano, canapueete nocua tiuujiacacuaajani. <sup>23</sup> Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuuja, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupuetesaare, Cristo cuaqueyari tucuateenutaniya seetanujanaa maninia jeecanamitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuaaj, nojuajaari puetunu tiqiyocuaajanaa quijiajuhanajaj.

### Panijia Pueyaso quiniuucua, nojuajaari pa jiyanooquiaari

**2** Sesa miijia nia quiniuucua tarijia, Pueyaso tojiyashijiacajuhuaaj, niaari macunucua quijia Pueyasora. <sup>2</sup> Naa jaara naa sesa miijia quiquiaaritij, niaari juhua puetunu mijiria quiniaa Pueyaso tojiyashijiajanaa quiquiaari. Naaari samaruhua jiyaniijia tojiijia quiquiaari, cuno, paratu piyarojosaqui quijiani. Nojuajaari Pueyaso tojiyashijia shiniujujia, nojori miiniuria sesa, taa Sesaaca seque paniyacuajani. <sup>3</sup> Tarijia, puetunu pajaniyajanaari Pueyaso tojiyashijia quiquiaarini. Paari tama pa miiniu panishanojuaja miijia quiquiaarini. Naacuaajitij, paari puetunu pa cuaqueya miiniu panishanojuanaa miijia quiquiaarini, puetunu sacuaraatia pa niishiriojosanojuhuaaj. Naa sesa miijia pa quiniuucuatej, paari tojetaarucuaajanaa jiyanoehua Pueyaso saniitiosocoriquiano quiquiaari juucuaani, juhua tamasacajuhuaaj. <sup>4</sup> Saniniuuja, Pueyasoori pocua taraajeja cutara. Jiyanoehua pa paniquiaariiri. <sup>5</sup> Cunora, macunucua pa quishacarijia nera, sesa miijia pa quiniuucua, nojuajaari Jesucristota pa cojiritiaquiaari samiitianiijionu. Jiyanoootio Pueyaso quiniuucua, nojuajaari nia jiyanooquiaari. <sup>6</sup> Naa na samiitianiijionuucua pajaniya Cristoocua pa tiuuniucuatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya.

<sup>7</sup> Naa Cristota na cojiritianuucua maninia miiniu pajaniyatej, cunoori jyanohua maninia! Nojuajaari naa pa miiquiaaritij, puetunu quijiacajanaa nio pa quishacari nuhuaji niishiniuria maatia, Pueyasoori jyanohua pa panijia. Maatia niishishaanutaniyari Pueyasoori tojetaarucuaajanaa jyanootio cutara, na jiyanooniucua pajaniya, Neyanuucua pa tiuuniucua. <sup>8</sup> Naa Pueyaso quiniuucua jyanootiootej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jyanootiniu quiquiaari tama nijaniyajaaja. Pueyasojuaanaacuaajaari nia jiyanooquiaari niaacua na taraajenuucua. Naa-juhuaaj, nojuacuajaari nia tiuutiquiaari Neyanuucua. <sup>9</sup> Majaari Pueyaso jyanooniu quiquiaari pajaniya, maninia miijia pa quiniuucua. Paa jaara maninia pa miiniuucua Pueyaso jyanootiquiaari tama pa cuaqueyajaajani, paa maara tama pa cuaqueyajaaja timi-tiarenii juhua najuhuaana pocuaaja. <sup>10</sup> Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijia pa quiniuria. Nojuacuajaari tari naa niishiriojioquiaari, maninia miijiacara na jataniniuria pajaniya.

### Jesucristoori pa jiyateja jyanootiojuacara

<sup>11</sup> Éfeso tiacajinia quiniaa pueyanaa, quiarijia nia niishirioehua taa nia quiquiaari tariucuaaanuni, Pueyaso muerasu nia quiyaquishacarijia. Naaari cuarta Judocuaca soosano taucuaa quiquiaari, nia cararaatiuquua co miatesoo quiyaquiniuucua. Canaa cutaraari canaa cararaatiuquua co miatesanoni. <sup>12</sup> Naa niishirijihuaaj, naa nia quishacaritij, niaari Cristooju quiquiaari. Majaari nia naata rupuenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyanoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jyanootiniuria nijaniya. Naaari saaja taraatia shaajeriquiano quiquiaari. ¿Cantucua niaacua taraajereni? Naaari seetanujanaa tojetaarucuaajanaa Pueyasooju quiquiaari mijiria. <sup>13</sup> Tarijia, niaari seetanujanaa tucuaaanu quijia quiquiaari Pueyasojiniji. Quiarijia saniniuuja, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiuushacari. Naacuaajitij, niaari canaa rupuejacajuhuaaj. <sup>14</sup> Cristocuaajaari pa jyanootiootequiaari. Moisés Rootasanoni, cunoori juhua jyaconaja sohuaca quiquiaari pa tajinia, maja nia cojinuria canaa, maja nia rupuenura canaajuhuaaj, taucuaa nia quiniuucua. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cuno jyaconaja sohuaca niyartasaanura, pa juaaquiaca tajiyatenura. Naacuaajitij, nojuajaari pa jiyatequiaari juhua niquiriyatu queecuajinio supueno pueya, Judocuaca, nijaniya taucuaanio. <sup>15</sup> Naa pa niti Jesucristo cusonuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca

quiquiaarini. Paari pueyaracaanu paracaatioojua qui-jiani. Quiarijia saniniuujia, Jesucristo cusonuucua, no-juajaari pa jyanootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. <sup>16</sup> Naaratej, janiyari socua camiya nia sequenuni. Cristo cusonuucua niyacutesanojinia, nojuajaari Pueyaso jyanootiquiaari pajaniya, na panishano muerasu pa quiniuria puetunujuanaa, niajaniya taucua, canaajuhua. Naacujitij, Jesucristoocua pa tiuushacari, paari juhua niquiriyatu tiaca nerani.

<sup>17</sup> Niajaniya taucuaanaa, niari juhua tucuaaanu quijiaca quiquiaari Pueyasojiniji. Canaa cutaraari juhua cateca quiija nojuajinijini. Jesucristoori mijiria niquiaari, na niishitiniuria puetunu pajaniyanaa taa Pueyaso jyanooniu paniya pajaniyani. <sup>18</sup> Cristo jyanootiniuucua na Que Pueyaso pajaniya, naacujitij, pa naata pa Que Pueyaso rupeunu pa secojosacari nojuaja, mariyata na Sohanuraca pa quishacari, niajaniya, canaajuhua. <sup>19</sup> Jesucristoocua nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoona. Quiarijiani, niari seetanujuanaa Pueyaso pueya cutara. Pueyasoori maninia nia jiitiaajuhua, taa na jiitiaquiaa puetunu na saquiriojosano pueyacuani. <sup>20</sup> Pueyaso pueya nia quiniuucua, niari rupeesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiuniaa pueyani, nojoriiri juhua cuno tia pacaariana. Saniniuujia, Jesucristoori juhua cuno tia morijiujanaa cutara, cuno tia nujuatana. <sup>21</sup> Pueyasoori naa saquiriojoquiaa Neyanuucua tiuuriquiano pueya, na quiquiorano na tucuatatura. Cuno tia tucuateesacari, tojetaarucujanaa maninia jeenucuasano quiniutianiya pa Jiyaniijiaari. <sup>22</sup> Niaari naajuhua, Cristo nia rupuesacari, niarta Pueyaso pueya nia rupuesacarijuhuaj, Pueyasora, niari juhua riana, tucurunio. Nojuajaari nia morojotaquiaa na tia na tucuatatura, na Sohanu quiquiorano.

### Pabloori Pueyaso jiyaramiquishano taucuaacua

**3** Jesucristojiniji cua pohuatanuucua niarta taucua, janiyari cunora nujuatesano quiya nujuatejojuajiniani. <sup>2</sup> Naa naasucuaari niishiyacuaa Pueyasoori cua jiyaramiquiquiaari Jesucristojiniji cua pohuatanura taucua, jyanoooshano nojori quiniuriajuhuaj. <sup>3</sup> Tariucuaaanu, majaari pueya niishiniu quijia, Pueyasoori taucua jyanooniutianiyajuhua, taa na jyanooquiaacuaa Judiocuacani. Pueyasojuaacua-jaari naa jiyasohuaja na miiniu panishano cua niishitiquiaaritij, taa shusha nio cua naajio coteejajinia cua pohuataa niajanuyacuajani. <sup>4</sup> Naa jaara cua naajione serojore, niari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacujitij, janiyari niishiyani taa jyanohua maninia nia miishaanutaniyani nocua nia tiuushacari. <sup>5</sup> Tariucuaaanu, majaari quenaaja tamonu pueyano niishiniu

quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuaani. Na sequenu panishano caminiujiunia pueya na niishitiquiaariiaariuhua. Pueyaso Sohanucuaajaari cuno canaa niishitiquiaari. <sup>6</sup> Niajaniya taucuaanaa, niocuajaari Pueyaso miiniu panishano jiyasohuaja niajaniya: Jesucristoocua nia tiuuniuucua, Pueyasoori puetunu Judiocuacaranu na sequesanojuanaa jiyatenutaniya niaarajuhua. Canaari Judiocuacani. Naajaa, Jesucristoocua nia tiuuniuucua, Pueyasoori canaa rupeetequiaa niajaniya, juhua niquiriyatu pueyano pa quiniuria nera. Naajuhua, cunora, Pueyasoori nia niquitioquiaa na Sohanujuhua, taa na sequequiaari Neyanu Jesucristoocua tiuujiacacuajani.

<sup>7</sup> Janiyari Jesucristo ruuretaja quiquiaarini. Naajaa, jiyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. <sup>8</sup> Jesucristo paraca cua quiniuucua tarijia, janiyara, janiya cuaara socua rerequetesano pueyano quiiria puetunu cuarta Pueyaso pueyajinijiana. Saniniuujia, jyanohua jyanootio Pueyaso quiniuucua, nojuajaari pa jyanooquiaari. Cua jiyatequiaari seetanu rupajanaa Neyanu Jesucristojiniji pohuatana cua quiniuria taucua. Janiyari cunora Pueyaso shuquiritiaa jyanohuani. Cristo jiitiasano pajaniyanoni, puetunu cuno casaajanaari pa niishishoojua. <sup>9</sup> Tariucuaaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishirojoquiaari casaa na miinutianiya puetunu pajaniyarajanaani. Naajaa, tariucuaaanu, majaari na niishitini quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. <sup>10</sup> Pueyasoori tariucuaaanu pajaniyara na niishirojosano racataquiaari pueyaracaanu tama na niishitijajinijaaja. Saniniuujia, nio pa quishacari, nojuajaari na niishitiquiaari. Quiarijiani, jyanohua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quiijacajanaari niishiya, Pueyasoori seetanujuanaa jyanohua niishijia cutara. Naacujitij, Pueyaso seya, Satanás, samaruhanio, nojoriiri tacuritia shootiaquiaa pajaniya, Pueyaso miiniuucua maninia pajaniya, niishijia na quiniuucua. <sup>11</sup> Quiari naataja, Pueyasoori tariucuaaanu na miishocoriquiano na niishirojosano tohuateequiaari pa Jiyaniijia Jesucristo cusosacari niyacutesanojinia. <sup>12</sup> Naacujitij, Jesucristoocua pa tiuuniuucua, pa naata juhujaniya rupeunu na Que Pueyaso pa puereyaquiniutia. <sup>13</sup> Naa Pueyaso miiniuucua pajaniyatej, majaari niojia nia niquijiotenu Pueyasooquaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua niajanuyatej, shuquiriaatia nia quiri juhuari. Naa naquiya cua miishacari, cuno cuaara shiniujuuria niajaniya, socua pa Jiyaniijia tojijia nia quiniuria.

**Pablo secojosano Éfeso tiacajinia quiniaa Pueyaso pueyacuara**

<sup>14</sup> Naa Pueyaso muerasu nia quiniuucujuhuj, janiyari mojuquetaquiaani pa Que Pueyaso cua secojonura niaacuara. <sup>15</sup> Nojuacuajaari Que cutara. Puetunu queyajanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. <sup>16</sup> Naa nia Que na quiniuucujuhuj, janiyari niaacuara secojoquiaani, nojuaja cuara cumaquiria jiyanhua niajaniya na Sohuanuta nioojiajinia. Na Sohuanuuri puetunu pa panishanojanaa jitianaa. <sup>17</sup> Naajuhuj, niaacuara secojoquiaanijia, seetanujanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuujia nia quishacari. Naacuajitij, niocua niishiri taa Jesucristo paniya jiyanhua niajaniyani. Naacuajitij, majaari nioojia nia niquijiotenu quiniutianiya socua. <sup>18</sup> Naa Jesucristo paniniu nia niishishacari taritij, niaari puetunu Pueyaso pueyatanaa niishiniutianiya taamuecate Cristo paniniuni. Naajuhuj, niaari seetanujanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. <sup>19</sup> Seetanujanaa, majaari pa naata niishiniu taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujanaa nioojia nia niishiniuria cuno, na paniniuni. Niaa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijia quiniutianiya taa Pueyasocuaani.

<sup>20</sup> Naa Pueyaso miiniucua maniatej, nojuaja cuara shuquiritiasaaria. Naa jiyanhua na cumaacata na poonijosacari poojiajinatej, nojuajaari na naata miiniu socua jiyanhua queraatia pa masesanoinijini nojuaja, pa niishiriojosanoinijinio. <sup>21</sup> Puetunu quijiacajanaa cuara niishiiria Pueyasoori jiyanhua maninia. Nojori cuara naa niishiiria nojori niquishacari Pueyaso jatanishano na saquirojosano pueya, Jesucristo miishanonio. [Cuara naa shuquiritiasaaria pueyaraanutej]

**Pueyaso Sohuanu pa jitiiasacari, paari rupuetootesano quijiani**

**4** Janiyari niya nujuatesano quiyani pa Jiyaniijajinijia cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojjijia nia quiri, seetanujanaa maninia na muerasu nia quiniuria. Pueyasocujaari nia saquirojoquiaari naa maninia na muerasu nia quiniuria. <sup>2</sup> Majaari niarta Pueyaso pueya rerequetejaca nia quiniu. Maninia miitiojuaca nia quiri quia. Puetunu casaajanaa rejeretajaca nia quiri-

juhaj. Naa jiuujiaatoojuaca nia quiri nia panitioosacari. <sup>3</sup> Naa Pueyaso jyanootiootesacari niajanijiatej, pueyaraanu nia jyanootioore, juhuajaniya nioojia quiniuria juhua rupuetootesano. Pueyaraanu naa nia miiri Pueyaso Sohuanu cumaquishacari niajaniya. <sup>4</sup> Naa quijia nia quiri pueyanaa, niquiriyatu cuaqueyaraca pa quishacari pa Jiyaniijia, mariyata niquiriyatu Sohuanuraca pa quishacarijuhuaj. Naa Jesucristoocua tiuujia pa quishacari, Pueyasoori puetunu pajaniyajanaa rijionutaniya, pueyaraanu na shuriucua pa quiniuria. <sup>5</sup> Puetunu pajaniyajanaari niquiriyatu Jiyaniijiaracani. Nojuajaari Jesucristo. Naajuhuj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuj, puetunu pajaniyajanaari moojinia tiuquini-jiosaaquiarini, Jesucristo pa jiyatesacari pa Jiyaniijia. <sup>6</sup> Naajuhuj, saa niquiriyatujua Pueyasoori quiya. Nojuajaari puetunu Neyanuucua tiuujiacajanaa Que. Nojuajaari puetunu na tojjiacajanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

<sup>7</sup> Saniniuujia pueyanaa, puetunu pajaniyacujaari tari jitiiaa tamaatia poonijosano pa miiniuriani, teyano Cristo niquitionu paniquiaari pajaniyacujani. Naacuajitij, puetunu pajaniyajanaari maja pa niishiniu miiniu saa niquiriyatu casaaja. <sup>8</sup> Tariucuaanu Pueyaso Rupa naaajiotasanoinijia, paari niishiyani Pueyasoori na Sohuanu niquitionu paniquiaari na pueya. Cunora naa sequeya Jesucristojinijiri:

“Na quioosano pueya tacataquiaariuhua jiyocuaanuuri. Nareja na niquitionu panishano casaa serotaquiaari na pueyari”.

<sup>9</sup> Jaara sequeya “tacaquiaariuhua”, cunoinijia paari niishiyani nojuaja jiyocuaanu rosequiaari coteenu, taraatia mijiria na mosaanura pocuara. <sup>10</sup> Nojuajani, jiyocuaanu rosequiaarini, nojuajaari tojetaarucujanaa jiyocuaanu tacaquiaariuhua, Jiyaniijajanaa na quiniuria na Que shuriucua. Tacaquiaari puetunu jiya cajiniocujanaa na mishiniuria na cumaacata, puetunu jiyajanaanio. Naacuajitij, nojuajaari puetunu tiquiyocujanaa quijia. <sup>11</sup> Nojuacuajaari noojiaqueya na saquirojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaari pueyaso sequenu panishano caminiujunaa nojori quiniuria. Saniniuujia, tamasaca jiyatequiaari Jesucristo niishiyashijia niquiara poojotanaa nojori quiniuria, Pueyaso jyanooniuria nojori juhuaj, Jesuucua nojori tiushacari. Tamasaca jiyatequiaari na tojjitajaca pueya jitianaa nojori quiniuria. Tamasaca jiyatequiaari na rupaa niishitiojanaa nojori quiniuria narta Pueyaso pueyara. <sup>12</sup> Naacuajitij, Jesucristoori na Sohuanuta cumaquiquiaa cana na paniani, puetunu tamaatia na miiniu panishanojanaa nojori miiniuria. Naa na pueya cumaquiquiaa na Sohuanutaari na saquirojosano pueya tiuniuria nocua, nojori cumaquishaanurajuhuj. Naa Jesucristoocua tiuujia pueya canesacari socuatej, Jesu-

cristo cuaqueyari canequiaa. <sup>13</sup> Jesucristora poonijionaa pueyari naa poonijioquiaatej, paa cuara tojetaarucuajanaa pa Jiyaniijia tojjijaca quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Niyanu niishijijaca quirijiaatijia. Naacujitij, paari tojetaarucuajanaa jeenucuasano quiniutianiya, seetanujuanaa juhua Jesucristo pa quiniuria. <sup>14</sup> Naacujitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niquijitejajaariuhuj. Naa juhua tariucua cumueeca mashaja pa quishacaritij, majaari quenaaja tamasa naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanohua sapojonu niishijijaca, nojori tojjitijaca na tashuquiootenura Pueyasojinijini. <sup>15</sup> Nocuaji pueyanaa, Pueyaso Rupaata pa cumaquutioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. <sup>16</sup> Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiitiasano casaa. Naacujitij, puetunu Pueyaso muerasujuanaa jaara tama na poonijosanojuaja miiquiaa maninia taa pa Jiyaniijia paniyacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuanaa panitiojuaca pa quiniuria.

### Cristoocua tiujujacaari quiarinio pueya

<sup>17</sup> Jesucristo jiyaramiquishano pueyano cua quiniucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijijaca pueya quiyacuani. Nojoriiri najuhuana quijijaca, najuhuana nojori niishiriojonuuca. Naajuhuj, nojoriiri tama na panishanojuaja miiijaca, najuhuana casaacua nojori jiaatianuuca. <sup>18</sup> Nojoriiri naa quijiacatej, juhua ninishiqui nojori niishitijaja quiniucua. Nojoriiri seetanujuanaa niishiyashijijaca, nojori tojjiaquiniucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijijaca nojori quiniuria. <sup>19</sup> Naa pueyaracaanu sesa nojori miiionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja miiijaca. Nojoriiri puetunu sacuaraatia casaajanaa miiniucua jiyartuucuno. <sup>20</sup> Niajaniya saniniujia, majaari naa nia niishitiojosaanu quiquiaari Cristojinijini, naa sacuaraatia miiijaca nia quiniuria. <sup>21</sup> Naa jaara Jesujinijini tojjiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajinijini niishitiojosaaquiaari maninia miiijaca nia quiniuria, sesa nia miiniu nia tarinitianurajuhuj. <sup>22</sup> Pueyanaa, pa toque mocua jaara mocuaatia jaanure, paari ritia na jocuajani. Naa nia

jatarehua sacuaraatia miiniu nia niishishano. Sesa nia miiniu panishanoori tama nia sapojoquiaarijiaaja naa sesa miiijaca nia quiniuriatej. <sup>23</sup> Quiarijia saniniujia, sesa nia niishitijaja nia jatare, maninia niishitijajaca nia quiniuria, maninia jiuujiaracano. <sup>24</sup> Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miiijaca, tojetaarucuajanaa sesa miyashijijaca. Naa maninia nia quiniuni, cunoori seetanujuanaa Pueyaso Rupaa nia tojjiniucua.

<sup>25</sup> Naacujitij pueyanaa, majaari socua cuara-cashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuara quiri seetanujuanaa.

<sup>26</sup> Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. <sup>27</sup> Ritia nia jecatoore, Sesaca mariqui sesa nia miitiriiri nia jyanoyaquishacari.

<sup>28</sup> Nio nia tojjirijuhuj. Cante nohuasejojua quiyajani, cuara tarinitiaara nohuasejonu. Saniniujia cuara poonijioora tama na numatcuatajaaja cutara. Naacujitij, nojuaja na naata na jiitiasanojinijini nareja niquitionu tamasa, cante na panishano jiitaaquiyani.

<sup>29</sup> Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenuju-tonujuhuj. Saaja maninia pocuajaca nia quiri cutara. Naacujitij, nia naata niarta Pueyaso pueya niishitiojonu. Naa naata nojori cumaquiniu. Naa naata nojori nacasunujuhuj. Naacujitij, nia naata nojori shiniujiniu saaja Pueyaso tojjijaca nojori quiniuria. <sup>30</sup> Majaari sesa miiijaca nia quiniu, niaa mariqui nioojijania quijia Pueyaso Sohuanu taraajoreeri. Pueyasocuaajaari juhua na sesa naajiotaquiaari poojijania na Sohuanuta. Naacujitij, na rijionu juuca pajaniya, nojuajaari niishiniutianiya paari na saquiriojosano pueyani.

<sup>31</sup> Pueyanaa, majaari jyanoyashijia nia quiniu. Seetanujuanaa jyanoojiaca nia quiri cutara. Majaari tamasa shanacunu niaacua, na nasojonura niajaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaaja nia quiniu, nia juaaniutia nia sesacanura nojuaja. Naacujitij, puetunu juaaniujianaa nia tarinitiare, puetunu sesa nia miiniujianaano. <sup>32</sup> Saniniujia, maninia miitiojuaca nia quiri. Taraajetoojuaca nia quiriuhuj. Naajuhuj, jyanootiojuaca nia quiriuhuj, taa Pueyaso jyanooquiaari pajaniyacuaani, Neyanuucua pa tiuushacari.

### Seetanujuanaa juhua Pueyaso pueya nia quiri

**5** Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri. <sup>2</sup> Puetunu nia miishanojuanaa nia miiri nia paniniutia, taa Jesucristo

paniquiaari pajaniyacuaani. Jiyano hua na paniniuucua pajaniya, nojuajaari tama na cuaqueyajaaja tariniti-aquiaari pa niti na mosaanura. Naa na miiniuucuatej, nojuajaari Pueyaso shuquiritiqiaari jiyano hua. Na miishanoori juhua shanohua jaanutaja quiqiaari Pueyasora.

<sup>3</sup> Pueyaso pueya maanujinijinio nia quiniuucua, majaan nia camishoo maaji nia numuetucunu, maajishuriu, casaanio. Cunoori jiyano hua sacuaraatia Pueyasora. Majaari quenaaja jiyano sacuaraatia casaa-jiniji nia pocoojonu. Naajuhuj, majaari tamasaca jiti-asanoocua jiaatiajaca nia quiniu. <sup>4</sup> Majaari najuhuaana sacuaraatia pocuajaca nia quiniuujuhuj. Majaari najuhuaana nia niti nia taquiriocuatenu juhua maninia pocuaja. Naajuhuj, majaari sacuaraatia puenujunuujuaca nia quiniu. Puetunu cuno sesa pocuanujuanaari sesa Pueyaso pueyari. Saniya nia pocoojore cutara Pueyaso miishanojiniji, socua pueya maniniuhaqueetanura Pueyaso. <sup>5</sup> Niaacuaajaari tari niishiya, cante juhujaniya na camishoo maajipohua numuetucujuani, maajishuriuhuanio, nojoriiri jiyano hua taraatia quiniutianiya. Pueyaso jiti-asano na tojjijaca pueyarononi, majaari na quiniu quiniutianiya naa miijiaca pueyari. Naa taraatia miishaanutaniyajaariuhua puetunu tamasaca jiti-asanoocua jiaatiajacajanaa. Pueyasora, jiyano pueyari jiyano hua sesa, juhua juaashiquiata shipinijosano pueyasohua secojonuujuaca. <sup>6</sup> Naacuajitij pueyanaa, majaari nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuaajaari juaatishaare. Tari saniitioya na tojiyashijiacua pueyari. <sup>7</sup> Cunora pueyanaa, majaari quenaaja naa sacuaraatia miijiaca nia cojinu.

<sup>8</sup> Pueyaso niishiyashijiacua nia quishacarija tarijia pueyanaa, niaari ninishiqui quijiaca quiqiaari. Quiarijia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. <sup>9</sup> Paa jaara seetanujuanaa cuhuashiqui quijiaca quirini, paari maninia miijiaca quiniutianiya. Naajuhuj, paari tojetaarucujanaa sesa miyashijiacua quiniutianiya. Paari seetanujuanaa Pueyaso Rupaa tojjijaca quiniutianiyajuhuj.

<sup>10</sup> Naajuhuj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? <sup>11</sup> Majaari ninishiqui quijiaca nia cojinu, nojori jaara sesa miya. Saniya nojori nia nacasure juhua. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa.

<sup>12</sup> Jiyasohua nojori miijosano sacuaraatiaari tojetaarucujanaa jiyano hua cararaatia. Pohuataaquishoo.

<sup>13</sup> Saniniuujia, pa nacasusacari nojori Pueyaso Rupaa-ta, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. <sup>14</sup> Pueyaso Rupaacuaajaari nojori jiuujia cuhuataquiaa na cumaacata, cuhuashiqui quijiacara nojori na jataniniuria.

Cunora, naa naajiotasano quiyari tariucuaaanu Pueyaso Rupaajinia:

“Maqueyanonaa, quia niucuaare! Macunucua tajiniji quia sanere, Pueyaso Jiyarosano cuhuatanura quia-janiya!”

<sup>15</sup> Naacuajitij cua panishano pueyanaa, tama nia cuaqueyajaaja nia cojuare jiyano hua, seetanujuanaa maninia miijiaca nia quiniuria. Majaari juhua niishiyashijiacua nia quiniu juhujaniya. Seetanujuanaa niishijiacua nia quiri, maninia miijiaca nia quiniuria.

<sup>16</sup> Nio pa quishacari, sesa miiniuuri socua caneya puetunu juucajanaa. Majaari pa niishiniu taate tariqui quiniutianiya. Naaratej, jaara pa naata quiriqia maninia pa miiniuria, maninia pa miiri puetunu juucajanaa. <sup>17</sup> Majaari moseca nia quiniu. Maninia nia niishiri casaa pa Jiyaniijia paniya nia miiniani. <sup>18</sup> Naajuhuj, majaari nia mashaasequejonuunu. Niaa jaara mashaaseca quiriqia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishiniuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniurijuhuj. <sup>19</sup> Naa Pueyaso Sohuanuraca nia quishacari, tariucuaaanu Pueyaso Rupaajinia naajiotasanojiniji jaaquequejonu nia naminiuujitioore. Naajuhuj, quiari naataja Pueyaso Sohuanu niishitiosano nia jaaquequejotoore. Nia jaaquequejosacari, pa Jiyaniijia nia shuquiriare puetunu nioojatjanaa. <sup>20</sup> Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujia nia quiniuucua.

#### Taa quijia pa quiyani Pueyaso tojjia pa quishacari

<sup>21</sup> Pueyanaa, maninia tojitiojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

<sup>22</sup> Maajipohuanaa, nia niyaca tojjijaca nia quiri, taa pa tojiqiaa pa Jiyaniijiacuaani. <sup>23</sup> Nia niyacaari juhua nioojia quiya niaara, taa Jesucristo quiya na saquiriosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. <sup>24</sup> Naacuajitij, taa Jesucristo saquiriosano pueya na tojitiajaca quiyacuaani, maajipohua cuaara naa pueyaracaanu neyaca tojitiajaca quiirijuhuj.

<sup>25</sup> Canuuna, nia niquioco hua nia paniri taa Jesucristo na saquiriosano pueyarano paniquiaaricuaa jiyano hua. Nojuajaari cunora tama na cuaqueyajaaja tarinitiaquiaari na mosaanura. <sup>26</sup> Nojuajaari naa miiquiaariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. <sup>27</sup> Paa jaara tojetaarucujanaa tari jeequejosano quirini, pa Jiyaniijiajaniyaari pa tiuquinitianutianiya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiya. Paari seetanujuanaa shanohua niquishano quiniutianiya, juhua camishocoriquiano maniniushitishano niyacoo, toje-

taarucujanaa jiyanoehua cohuajaque toqueraca. <sup>28</sup> Pueyanaa, taa nia paniyacuaa tama nia cuaqueyajaajani, naa nia paniri nia niqiuocuajuhuaaj. Cante necocua panijiani, nojuajaari juhua tama na cuaqueyajaaja paniya. <sup>29</sup> Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuani. <sup>30</sup> Puetunu na saquiriojosano pueyajanaari juhua na cuaqueya nera. Paacuajaari na cuaqueyajiniinioni. Naaratej, nojuajaari maninia pa cojuaquiaa. <sup>31</sup> Cunora naa naajiotasano quiyari tariucacaanu Pueyaso Rupaajinia. Naa sequeyari:

“Pueyano jaara camiri, nojuaja cuara shiriquiiria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

<sup>32</sup> Pueyasajuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujuanaari juhua pa Jiyaniijia niqiorano quiya, juhua niquiriyatu cuaqueyaraca pa quiniuria nata.

<sup>33</sup> Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niqiuocua panijia nia quiri juhua tama nia cuaqueyajaaja. Naajuhuaaj, puetunu maajipohujanaa cuara neyaca tojjijia quiiria.

**6** Muerasunaa, pa Jiyaniijia tojjijia nia quishacari, nia queya tojjijia nia quirijuhuaaj. Naa jaara naa miiritij, cunoori jiyanoehua maninia Pueyasora. <sup>2</sup> Tariucacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojjijia nia quiri, nia nucuanio. <sup>3</sup> Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, nia cuara saaquianoshirijaatijia”.

Nio rootasanoori coteenujanaa rootasano tee Pueyaso sequeyacuajani taa na tojtiajaca na miiniutianiya maniniani.

<sup>4</sup> Niajaniya saniniuujia pueyanaa, majaari nia niqiuohua nia juaatijionu najuhuanaj. Nojori nia canashitijiore maninia. Nia niishitiojore maninijuhuaaj. Nojori nia nacasurejuhuaaj. Jaara nia tojtiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacujani.

<sup>5</sup> Niajaniya poonitijosano pueyanaa, mijiria nia camaruhua tojtiajaca nia quiri. Majaari nojori nia rerequetenu. Puetunu nojori sequesanojanaa niajaniya nia miiri nia puerenuta, niaa mariqui sanitiosaareeri nojori sequesano nia miyaquiniucua maninia. Nojori sequesano nia miiriquia maninia, juhua pa Jiyaniijia Jesucristora. <sup>6</sup> Majaari maninia nia poonijionu saaja nojori niqishacari niajaniya, nojori shuquiritianura niajaniya. Maninia nia poonijiore pueyaracaanu puetunu nioojiatjanaa, seetanujanaa juhua Cristora. Naa jaara naa maninia poonijionuuja-

ca quiriquiatej, niaari Pueyaso panishano miyajuhuaaj. <sup>7</sup> Puetunu nia poonijosanojanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. <sup>8</sup> Naaacuajaari tari niishiya, pa Jiyaniijia Jesucristoori puetunu pajaniyajanaa niqitionutianiya maninia pa miiniucua mijiria, poonijiotasano pueya, camarnuuju pueyano.

<sup>9</sup> Niajaniyajuhuaaj seya jiitiajacanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijuhuaaj, niaari mariyata niquiriyatu Jiyaniijiaraca, niajaniya, nojoriijuhuaaj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

### Taate pa naata Sesaaca nujuatanuni

<sup>10</sup> Quiarijia cua panishano cuarta Pueyaso pueyanaa, seetanujanaa pa Jiyaniijia rupuejaca nia quiri, jiyanoehua cumueeca nioojia quiniuria jiyanoehua na cumaacata. <sup>11</sup> Puetunu Pueyaso niqitiosano casaajanaa nia cushiyore juhua toqueya, Sesaaca sapojiaquiniucuaaji niajaniya. <sup>12</sup> Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quijia nia cajiniocua. Sesaacaari cuno na samaruhua jiyatequiaari jiyaniijanucua nojori quiniuria mijiria. Naacuajitij, nojoriiri cumaacaraca, ninishiqui quijia pueya nojori jiitianura. Nojoriiri Pueyaso paraajuhuaaj. <sup>13</sup> Naaratej Pueyaso pueyanaa, puetunu Pueyaso niqitiojosanojanaa nia paracata nia miaquetoojotaqueya nia cushiyore. Naacuajitij, sesashiquari niocua na nujuatare, Sesaaca saniniuujishacari niajaniya. Naa jaara naa nioojia jeenucuare juhuacarijia puetunu Pueyaso casaatajanaatej, niaari nia paraa nujuatajaca quiniutianiya.

<sup>14</sup> Pueyanaa, niaacuajaari niishiya taa miaquetoojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriqiajanaa na mishiquiojonura cashiicuaaji. Naajuhuaaj, na sapatuhua cushiyonuujaariuhuaaj. Na nareenee pootujuaari, nocuaji na nujutajara cashi. Naajuhuaaj, na naca na cojuatajara, cumoco casaa cushiyonuujaari. Na nijiniaquetucuaaja mueruu pootujuaariuhuaaj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacuajitij, seetanujanaa Pueyaso Rupaa niishijia nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijia nia quiri, nioojia nia cojuanura Sesaacaacuaaji, nojuaja mariqui nia cararoreeri nia jaara sesa miiri. Cunoori juhua nia turtuconee nia cushishano. <sup>15</sup> Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooni panyajuhuaaj. <sup>16</sup> Naajuhuaaj,

pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. <sup>17</sup> Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasoocuaaji. Naajuhuj, Pueyaso Rupaa nia niishiri maninia. Cunocuaajaari Pueyaso Sohuanu nijiniaquetucuaaja mueruu, pueya jiuujiajinia na poonijionura. <sup>18</sup> Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari niajaninya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso puey-acuarajanaa. <sup>19</sup> Naajuhuj, cucuara nia secojonuure, Pueyaso niqutionura janiya na niishitiaja, maninia cua pohuatanura Jesujiniji cua puereyaquiniutia. Cucuara nia secojorejuhuj, maatia cua niishitiniuria pueya, Pueyasoori puetunu pueyajanaa jiyanooniu paniya saaja Jesucristoocua nojori tiuushacari. <sup>20</sup> Pueyasojua-naari cua jiyatequiaari na jiyaramiquishano cua quini-

uria, na niti cua pohuatanura na rupaa pueya niquiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

#### Pablo pohuatasano Tíquicojiniji

<sup>21</sup> Pa panishano Tíquicocuaajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. <sup>22</sup> Janiyacuajaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

<sup>23</sup> Pa Que Pueyaso, mariyata pa Jiyaniijia Jesucristota, nojori cuara cuniqui quiniaa parta Pueyaso pueya jiuujia cajitiiria, juhujaniya nia quiniuria. Nojori cuara nia jiyateera panitiojuacarajuhuj, seetanujuanaa Jesucristoocua tiuujica nia quiniurajuhuj. <sup>24</sup> Naajuhuj, Pueyaso cuara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapute seetanujuanaa Jesucristo panijiacuajani.

# FILIPO

## Pablo saruhuatasacari Pueyaso pueya

**1** Janiyari Pablóni. Janiyari Timoteota nia saruhu-ataani, Filipo tiacajinia quiniaa Pueyaso pueyanaa. Canaari Jesucristo poonitijosano pueyajuhua. Canaari nio naajiyani puetunu Pueyaso jatanishano puey-acuarajanaa, nojori tiuuniuucua Neyanu Jesuucua. Canaari cuniqui nia jitianaa pueyacuara naajiyajuhua, nia cumaquiniaa pueyacuara. ¿Niaate maninia quiyajaa pueyanaa? **2** Pa Que Pueyaso, pa Jiyaniijia Jesucristonio, nojori cuara cumaquiiria nijaniya na Sohuanuta. Nojori cuara cajitiiria nioojajuhua.

## Pablo secojosano, Filipo tiacajinia quiniaa Pueyaso pueyacuara

**3** Pueyaracaanu cua niishiriojosacari nijaniya, jani-yari pa Pueyaso sequequiaani “paacarasho”, maninia na muerasu nia quiniuucua. **4** Cua secojosacari, jani-yari pueyaracaanu puetunu niaacuarajanaa cua shuquiriniutia masequiaa Pueyasoni. **5** Niaa jaara shushajanaa Jesucristoocua tiuquuaari, niaari jiyacari coteequiaari cua naacunura, Jesucristojiniji cua poo-jotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. **6** Majaari cua taacanuunu niaacuaji. Naatej, taa Pueyaso cotee-quiaari maninia na miiniuria nioojajiniacuaani, nojua-jaari naa nia jeenucuanu tucuatantuniya, Jesucristota pa naacuneetosacariuhua. **7** Majaari cua jiyajenenu naa cua taacanuquishacari niaacuaji. Janiyacuajaari tari naa niishiyani, jiyanoehua cua paniniuucua nia-janiya. Naajuhua, niaari cua cojiritiasaaquiaa cumaaca niquitiosaanujuhua. Naacuajiti cua naata Jesucristo-jiniji pohuatanu niya nio nujuatejojuajinia, naajuhua, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijiaca. Pueyaso Rupaacuajiiri naa tacusano maatia, nojori ni-ishiniuria, Jesucristoocua nojori tiuushacari, Pueya-soori na naata nojori jiyanooniujuhua. Naa nioojia rupesacari cojiatej, cunoori jiyanoehua cua shiniuji-quiaa Jesucristojiniji cua pohuatanura. **8** Pueyasocua-jaari niishiya taa cua paniya jiyanoehua nijaniyani, Je-sucristo paniniu cua jitiiasacari coojiajinia. **9** Janiyari ni-aacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jitianura-juhua, seetanujuanaa maninia panitioojuaca nia quiniuria. **10** Naacuajitij, niaari niishiniutianiya teyano casaate seetanujuanaa maninia niaarani, saniniuujia,

teyano casaate sesani. Naacuajitij, pa Jiyaniijia Cristo jaara tiuquirioehua, niaari seetanujuanaa maninia miiji-aca quiniutianiya, tojetaarucujanaa sesa miyashijiaca. **11** Naacuajitij, puetunu maninia nia miishanojuanaa Je-sucristo cumaquishacari nijaniyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniuu-cua, pueyari Pueyaso timitianutaniya.

## Pabloori saaja Jesucristora quiniu panijia

**12** Cuarta Pueyaso pueyanaa, majaari cucua nia taraajenu nujuatejojuajinia taraatia cua miishacari. Nio nia niishiri cutara: nujuatejojuajinia nujuateso-coriquiano cua quiasaanuucua, naquiya cua mi-ishacarijuhua, cunoori seetanujuanaa pueya naacuya Jesucristojiniji tojishaanura socua. **13** Naacuajitij, puetunu jiyaniijia César tijinia quiniaa soldadoehua-janaari niishiya, janiyari cumayocua casaata moro-tasano quiya niyani, Jesucristojiniji cua pohuatanuu-cua. Majaari saaja soldadoehua niishiniu cuno, mariya-ta puetunu pueyajanaari na niishiyajuhua. **14** Parta Pueyaso pueyari namitia niishiyajuhua, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujiuriucuaa Jesucristojiniji nojori pohuatanura na puereyaquiniutia, pa Jiyaniijiaacua nojori tiuushacari socua.

**15** Seetanujuanaa, noojiaqueya nojorijinijioori Cristojiniji pohuatanuuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pohuatanuuquiaa nojori shuquiritiniuria Pueyaso. **16** Nojoriiri naa pohuatanu-uquiaaquij, Jesucristo panijiaacua nojori quiniuucua. No-joricuajaari niishiya, Pueyasojuanaacuajaari niya cua niacanu, cua tacunura Jesucristo rupaacuaji.

**17** Tamasacaari saniniuujia Jesucristojiniji pohuatanu-uquiaacujua nojori shocotanu paniniutia janiya. Naa nojori miishacaritij, nojoriiri socua cua tacaatinu paniya juucua. Majaari nojori pohuatanuunu quiquiaa seetanujuanaa nojori paniniutia pa Jiyaniijia Jesucristo. **18** Naa nojori pohuatanuusacari seetanujuanaa nojori paniyaquiniutia pa Jiyaniijiatej, naajaa. Nojoricuajaari Jesucristojiniji pohuatanuuquiaa. Janiyari cunora shuquiriaatia quiyani.

**19** Socua shuquiriniutianiyanijia cua niishishacari Pueyasoori puetunu cuno pojori miishanojuanaa jataniniutianiya quiria saa maniniaraja. Naa miiniu-tianiyari nia secojonuunuucua cucuara, naajuhua, Je-



sucristo Sohuanu cumaquiniuucua janiya. <sup>20</sup> Naacuajitij, janiyacuaajaari Pueyasooocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasooocua tiuya-jaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacua-jani. Janiya jaara rishiriquiani, janiya jaara mosaariquiajuhuaj, naajaa, janiyari jiyanoehua paniyani cua Jiyaniijia Jesucristo timitiasaanura. <sup>21</sup> Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. <sup>22</sup> Naajaa, janiya jaara mijiria rishiriquiajani, cua naata socua poonijionu cua Jiyaniijia. Naacuajitij, quiarijia, majaari cua naata saquiriojonu; rishiniu, shaajenu soj. <sup>23</sup> Naaratej, janiyari coojia niquijioteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. <sup>24</sup> Saniniuujia, socua maniniaruhua mijiria cua rishiniuraja, pa Jiyaniijiaacua cua shiniujiuniuria socua niajaniya. <sup>25</sup> Naa cua niishiriojosacaritij, janiyacuaajaari tari seetanujuanaa ni-ishiyan, janiyari juhuanujuaja mijiria niaata rishiniutianiyani. Naacuajitij, cua naata socua nia naacunu, socua pa Jiyaniijiaacua nia tiuuniuria. Cua naata nia naacunujuhuaj, socua shuquiriaatia quijia nia quiniuria nocua nia tiuushacari. <sup>26</sup> Naa cua rishishacari mijiriatej, janiyari niaacua quianutaniyani cua niquiniuria niajaniya. Naa cua quishacariuhua niaatatej, niaari Jesucristo timitianutaniya maninia na miiniuucua janiya.

<sup>27</sup> Pueyaso pueyanaa, nio nia sequenu paniyanijia, seetanujuanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja niajanijajiniji pohuataaariquiani, taa jiyanoehua Jesucristo tojjijaca nia quiyajaani, jiyanoehua panitioojuacajuhuaj. Naa-juhuaj, jatiqui Jesucristora nia poonijioteriquiani, na rupaa nia pohuatanuucua. <sup>28</sup> Naajuhuj, Jesucristo Rupaa paraa puereyashijiacara nia jiyateriquiani. Nojori piriyojosacari niajaniya, majaari nojori puerenu que-naaja. Naa jaara nia nojori puereyashijiaa quiritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohuatanuquiaa nojori niquiaracuajani. Saniniuujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajaari nia cumaquijia na pueyatej, puereyashijianucua nojori quiniuria.

<sup>29</sup> Pueyasocuaajaari nia tiuutiquiaari Neyanuucua, na muerasu nia quiniuria. Naajuhuj, Neyanu rupuejaca nia quishacari quiarijia, Pueyasoori nia jiyatequiaari Neyanuucua nia miitishaanurajuahuaj, taa Neyanu miiquiaari naquiya pocuaracaani. <sup>30</sup> Nia niishiri, janiya, niajanijajuhuj, paari mariyata naquiya miiniu rejeretaquiaani, pa Jiyaniijia pa poonijosacari. Naaacuajaari tari niquiquiaari naquiya cua miiniu. Ma-

jaari cua tarinitianu quiquiaari Jesucristojiniji pohu-atanu. Quiarijiani, niaari janiyajiniji tojinutianiya-juhuaj, taa cua tarinitiaaquiya Jesucristojiniji pohuata-nuni, naajaa naquiya cua miishacari.

### Juhua Cristo pa quirij, taa na quiquiaaricuaani

**2** Naacuajitij pueyanaa, naquiya nia miishacari, nia niishiri taa Cristo shiniujiuquiaa pueyaracaanu nia-janiyani, maja nia tacaaniuria. Nia niishirijuhuj taa na paniniu cumanjiaquiaa niajanijani, naajuhuj, taa Pueyaso Sohuanu jiuujiaatiotequiaa niajanijani. Nia niishirijuhuj taa Cristo taraajequiaa jiyanoehua niaacua. Naa panitioojuaca nia quirijuhuj. <sup>2</sup> Jiuujiaati-ojuaca nia quirijuhuj, seetanujuanaa panitioojuaca nia quishacari. Naajuhuj, nareja nia shanacure Pueyaso Sohuanu niaacua, nojuaja cuaara puetunu niajanijajanaa ruputeera, jatiqui nia poonijionura pa Jiyaniijia. Naa jaara nia puetunu nio cua sequesano-juanaa miijiaca quiritij, niaari tojetaarucuaanaa shuquiriaatia quijia nia jiyatenutaniya. <sup>3</sup> Maninia nia miishacari, majaari na miiniu juhua tamasa nia shocotanura, nia jyanishacari nia naasucuaari socua maninia miijiaca tamasaajiniji. Puetunu maninia nia miishanojuanaa nia miiri tamasa nia rerequeteyaquiniutia. Puetunu niarta Pueyaso pueyanaa nia jiyatere juhua socua maninia miijiaca niajanijajiniji. <sup>4</sup> Naa jaara maninia miijiaca quiriquiacuaa, majaari tama maninia miijiacajaaja nia quiniu. Niarta Pueyaso pueyacu nia taraajerejuhuaj, maninia quijia-cua nojori quiniurajuahuaj.

<sup>5</sup> Tama nia cuaqueyajaaja nia tarinitiare niarta pueyacu nia taraajesacari, taa Jesucristo tarinitiaquiaari tama na cuaqueyajaaja pocuaracaani. <sup>6</sup> Nojuajaari nia miiquiaaritij: tariucuaaanu, nojuacuajaari Pueyaso quijiajuhanajaj, juhua na Que. Naajaa, nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. <sup>7</sup> Nojuajaari jiyanoehua cumaacaraca Jiyaniijia na quiniu tarinitiaquiaari, juhua nareja poonijioteseano pueyano na quiniuria. Naaratej, mijiria rasaquiaariiri seetanujuanaa pueyano na quiniuria. <sup>8</sup> Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia nia quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miijiaca pueyano. <sup>9</sup> Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucuaajinijianaa. Na sesojiaarijuhuaj "Jesu". Nioori sequeya "pocujia Tacuna". Majaari socua tamonu pocujia tacuna quiniu mijiria, jiyocuaaanunio. <sup>10</sup> Puetunu pueyajaani niishiniutianiya Jesuuri Jiyaniijiajanaa. Maja tamonu. Cunora, nocuaa mojuquetaconutaniyari puetunu jiyocuaaanu quijiacajanaa, puetunu mijiria quijiacajanaajuhuj, puetunu jiya cariquimia quijiacajanaano. <sup>11</sup> Puetunu tamaatia rupaaca pocujacajanaari niishiniutianiya Jesucristoori Jiyaniijiajanaa cutara. Naa

Pueyaso miiniucua Neyanutej, puetunu nojorijianaari niishiniutianiya, Pueyasoori tojetaarucujanaa maninia mijia.

**Pueyaso pueyari juhua ninishiqui cuhuataja mijiria**

<sup>12</sup> Quiarijiani cua panishano cuarta Pueyaso pueyanaa, cua rootasano tojitiajaca nia quiri. Naatej, taa pueyaracaanu cua tojitiajaca nia quiquiaaricujani naata cua quishacari, quiarijia socua cua tojitiajaca nia quiri, tucuacaanu cua quishacari niajanijini. Naacuajitij, seetanujuanaa pa Jiyaniijia tojitiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretanu. Jiyanojua puereeta quiniutianiyari na tojiyashijianucua. <sup>13</sup> Pueyasojua naacuajaari nioojajinia poonijioquiaa maninia nia miiniu paniniuria. Na cumaaca nia niquitioquiaajaari-uhuj maninia nia miiniuria nera nia panishano, taa na paniyacuajani.

<sup>14</sup> Cunora, puetunu nera nia miishanojuanaa nia miiri shitimia, maja nia ririjiotanuta. Majaari nocua juayonujutanujuhuj. <sup>15</sup> Naa jaara naa maninia mijia quiritij, majaari Pueyaso niishiyashijia pueya naata quiniutianiya sesa na saquiriojotanura niaacuara. Naaratej, tojetaarucujanaa sesa miyashijia Pueyaso niquiohua nia quiri, mijiria sesa mijia pueya niquiara. Nojoriiri seetanujuanaa sacuaraatia, Pueyaso tojiyashijia. Cuno juhua ninishiqui quijia pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. <sup>16</sup> Pa samiitianijia rupaa Jesucristojiniji nia jiitiasanoni, niaari cunota cuhuataquiaa mijiria quinia. Naa maninia Pueyaso pueya nia quiniucuatej, Cristo jaara tiuquiriohua na rijionuhua pajaniya, janiyari jiyanojua nia timitianutaniyani. Janiyari naa nia timitianutaniya cua niishishacari puetunu cua poonijosanojuanaari maja najuhua na quiniu quiquiaari. Naajuhuj, majaari najuhua naquiya cua miiniu quiquiaarijuhuaj. <sup>17</sup> Naaacuajaari maninia mijia Pueyasocua tiuujia nia quiniucua, Jesucristojiniji cua pohuatanucua niajanija. Cuno maninia nia miishanoni, cunoori juhua shanohua jaanutaja Pueyasora. Janiya jaara nacata-saare Jesucristojiniji cua pohuatanucua niajanijani, cua nanacaari shoonutaniya juhua Pueyasora niquitiosocoriquiano. Janiya jaara naa miishaareni, janiyari cua nanacata tucuanutaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutianiyani. Janiyari puetunu niajaniyatajanaa jiyanojua timiniutianiyani. <sup>18</sup> Shuquiriaatia nia quiriuhuj, janiya jaara mosaareni, cua Jiyaniijia tojijia cua quiniucua. Cua cojitiuri shuquiriniuhuj.

**Pablo pohuatasano Timoteojiniji, Epafroditojinijinio**

<sup>19</sup> Janiyari niaacuaji tojinu panijani taa nia quiyani, shuquiriaatia cua quiniurajuhuj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, no-

juajacua cua pohuatasuhua niajanijini saniniujia. Janiyari cua Jiyaniijia Jesucua tiyani na rishitiniuria janiya, niajanijini cua tojinuria. <sup>20</sup> Janiyari Timoteo jiyaronutaniya niaacuani. Saa nojuaja cutaraari seetanujuanaa niaacuatacajia juhua janiyajuhaaj, na naacunura niajanija, maninia nia quiniuria.

<sup>21</sup> Tamasacaari saniniujia saaja tama nojori panishano casaacuajaaja tacaajia, maja Jesucristo casaacuataca. <sup>22</sup> Naaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyani, Jesucristojiniji mariyata canaa pohuatanura. <sup>23</sup> Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. <sup>24</sup> Naajaa, janiyacuajaari cua Jiyaniijiaacua tiyani cua cartesaanura niiquiji, niaacuataca cua quianura ritiajuhuaj.

<sup>25</sup> Cua sashishacari Timoteo cua jiyaronura niaacuataca, maniniacuajaruhua ritia cua jiyaronura niaacuataca Epafrodito, parta Pueyaso pueyano. Naaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhaaj. Nojuajaari maninia nia naacuquiaa. Cuata miquiaa naquiya jaarajaari Jesucristojiniji cua pohuatanura. <sup>26</sup> Nojuajaari puetunu niajanijanaa niquiniucua jiaatia. Na niishishacari niaari jiyanojua nocua tacaquioya nia niishiniucua nojuaja cusosu quiquianu, cunora, nojuajaari ritia nia niquiniuria tacaya. <sup>27</sup> Seetanujuanaa nojuajaari cusosu quiquianu. Quera cusocuanu. Pueyaso cutaraari nocua taraajecanu. Cucua taraajecanujaari-uhuj, maja cua taraajenu jiyacatenura socua. <sup>28</sup> Janiyari cunora ritia niaacuataca na jiyaroyani, nia shuquiriniuria nia niquishacari nojuaja niaacuataca tiuquihuano. Naa shuquiriaatia nia quishacariuhatej, janiyari coojia cajitiniutianijiaacuahuaj. <sup>29</sup> Niarta Pueyaso pueyano na quiniucua, seetanujuanaa juhua nia tarajanu nia timitiarenoj, niaacuataca nia tiuquishacariuhua. Puetunu jiyano pueyanaa panijia nia quiri, noo pojori pa Jiyaniijia poonijionuujacatej taa Epafrodito. <sup>30</sup> Nojuacuajaari quera shaajeyarucua Cristora na poonijosacari. Cocuaatia mijiocanujaariuhuj. Nojuajaari tama na cuaqueyajaaja tarinitiacanu, na naacunura janiya nia niti. Tucuacaanu nia quiniucua janiyajini, majaari nia naata naacunu janiya.

**Nio rootasano tojijia pa quiri cutara**

**3** Quiarijia saniniujia, cuarta Pueyaso pueyanaa, pa Jiyaniijia nia shuquiriare, pocuaji Tacuna na quiniucua. Janiyara, maja taajeta cua pacutenuhuara socua cua sequenura niajanija tari cua sequesano niajanija. Cunoori seetanujuanaa maninia niaara. <sup>2</sup> Tama nia cuaqueyajaaja nia cojuare cuno sacuaraatia niishitiojonuujua pueyacuaji, cuno pojoriicuaji, sesa mijiacani. Nojoriiri pueya cararaatiuquia co miatejonuujua najuhanaj, nojori jyanishacari nojori miatesano pueyari seetanujuanaa Pueyaso pueya. <sup>3</sup> Paa cutaraari seetanujuanaa Pueyaso pueyari, Pueyaso Sohanu jiyatenuucua pajaniya Pueyaso tojijia pa quiniuria. Paari timiquiaaaniuhuj Jesucristo rupesano pa

quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujua-naa Pueyaso pueyani. <sup>4</sup> Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijuhuaj. <sup>5</sup> Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicujani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujinino supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicujajinino cua supuenoocua. Naajuhuj, janiyari Hebreo rupaa pocujani taa cua supuetanaacuaani. Cua que, cua nucuaari mariyata Hebreo rupaa pocujaca quiquiaarijuhuaj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jiyanhua supuetana Moisés Rootasano tojjijaca puetunu cuarta Judiocuacajinijinijuanaa. <sup>6</sup> Jiyacaritij, janiyari cua niishitiojona tojjijia quiquiaari jiyanhuaani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojtijajaca miijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojiniuucua Moisés Rootasano, janiyari sesacasoo quiquiaarini Moisés Rootasano niishitiojonaara. <sup>7</sup> Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiarijia saniniuuja, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarijia najuhuana janiyara. <sup>8</sup> Quiarijiani, janiyari socua cua Jiyaniijia Jesucristo niishiniuria jiaatia jyanohuani. Naaratej, puetunu tariucuacaanu cua timitiasano casaajanaari najuhuana janiyara quiarijia. Cristo pueyano cua quiniuucua, janiyari juhua taanusaaquiaari puetunu cuarta Judiocuacajinijijianaani. Naa Cristo tojjijara cua quiniuucuatej, cua shipinijinijiji cua casaarano maseyaquiquiaarinijia. Naajaa, puetunu cuno casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniuria paniya socuani, nata rupuetootesano cua quiniuria seetanujuanaa. <sup>9</sup> Majaari cua jyaniniuria janiya sesa miyashijiani, Moisés Rootasano cua tojiniuucua. Saniniuuja, Jesucristoocua cua tiuushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jyanooquiaari, maja na sesacanura janiya, Neyanuucua cua tiuuniuucua. <sup>10</sup> Janiyari Jesucristo niishiniuria paniya jyanohua socuani, seetanujuanaa nata rupuetootesano cua quiniuria. Janiyari na samiitianitajaja cumaaca paniyajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristo-

ra. Nojuajaari jyanohua taraatia miishaaquiaari mijiria na quishacari, na Que tojjijia na quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniupaniyani, cua miiniuria puetunu cua Jiyaniijia sequesanojuanaa janiya. <sup>11</sup> Janiyari tojetaarucujanaa maninia miijia quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

### Maninia pueya pa quirij, Pueyaso muerasu pa quishacari

<sup>12</sup> Juhuanujuaja majaari cua quiniuria tojetaarucujanaa maninia miijia. Sesa miiniuria niishiyajaanijia. Jeecasoojuaanijia. Naajaa, majaari cua tacaani. Jesucristocuaarijia cua jiyatequiaari na pueyano cua quiniuria. Naaratej, janiyari jyanohua saniniujuquiaani maninia na pueyano cua quiniuria. <sup>13</sup> Cua panishano cuarta Pueyaso muerasunaa, janiyari niishiyacujani, juhuanujuaja maja maninia cua quiniuria taa cua Jiyaniijia quiyacuaani. Naajaa, majaari cua tarininiuria. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniaria niquiyashijia. Naajuhuj, majaari cua niishiriojonu maninia cua miishano tariucuacuaa. Janiyari saaja cua tajoji niquiquiaani, socua maninia miijia cua quiniuria tari cua quiniujinijiji. <sup>14</sup> Pueya tacuarishijosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari najuhuana na netenu jyanohua. Janiyaraari naajuhuj. Majaari najuhuana jyanohua cua saniniujiniuria quiquiaa, maninia cua quiniuria juhua Cristojuhuaj. Mijiria cua quiniuria cua tucuatasaari, Pueyasoori cua jataniniurtianiya juhua Cristo cua quiniuria, Cristoocua tiuuja cua quiniuucua.

<sup>15</sup> Pueyanaa, niajaniya, cante seetanujuanaa Pueyaso tojjijaca quiyani, mariyata naa nia niishiriojore taa cua niishiriojiyacuaani. Naatej, jyanohua nia saniniujuri juhua Cristo nia quiniuriajuhuaj. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiriaria maninia. <sup>16</sup> Paa jaara maninia miiniuria niishijijaca quirini, majaari pa jiyacatenu saaja sesa miiniuucua. Saniya maninia miijiacara pa quiri socua.

<sup>17</sup> Cuarta Pueyaso pueyanaa, maninia miijijaca nia quiri taa canaa nia niquiquiaari maninia miyanocuaani. Naajuhuj, maninia miijijaca nia niquiri, cante maninia miiquiaani taa canaa niishitiquiaari nianianiyacujani, maninia canaa miishacari. Nojorijinijiji nia niishiriquia, maninia nia miiniuriajuhuaj. <sup>18</sup> Jesucristocuaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuuja, queraatia pueyari juhujaniya miiquiaa sesa. Janiyacuajaari nojorijinijiji pohuatanu pacutejoquiaari nianianiyani, maja juhua nojori nia quiniuria. Quiarijia cua nujuquenuta, janiyari nia pohuatarohua-

niuhua jiyano sesa miijiaca jiniji. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjijaca nojori quiniuucua. <sup>19</sup> Nojoriiri puetunu quejoosaanutaniyajanaa mani quiquiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiaca nojori quishacaritij, majaari nojori niishiniu caririqiniu. Saa ja sesa na miitiushano timitiatuuyari. Nojoriiri saaja mi jiria casaacua jiaatiajaca. <sup>20</sup> Pajaniya saniniuujia, paa cutaraari tari jiyatesaaquiaari jiyocuacaanu quijiacararoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. <sup>21</sup> Jiyano hua na cumaacata, nojuajaari pa cuaqueya seque jataniniutianiya, shacantuuca quijia pa quiniuria juhua na cuaqueyajuhaaj. Nojuajaari cumaacaraca puetunu casaajanaa na tojitiniuria nojuaja. Naacujitij, nojuajaari na naata moqueja pa cuaqueya jataniniu, pueyaracaanu rishijia pa quiniuria.

**Pueyaracaanu pa Jiyaniijia pa shuquiritiare**

**4** Cunora, cua panishano cuarta Pueyaso pueyanaa, pueyaracaanu pa Jiyaniijia tojjijaca nia quiri. Janiyari jiyano hua nia niqiniuucua jiaatiaani. Nia niqiara cua pohuatanuucua Pueyaso rupaa, niaaquiiri seetanujuanaa na tojjijaca quiquiaari. Naa jiyano hua maninia Pueyaso muerasu nia quiniuucuatej, cunoori jiyano hua cua timitiquiaa.

<sup>2</sup> Janiyari Evodia sequeya cutarani, narta maaji Sintiquenio, nojori cuaara jyanootioora juhua seetanujuanaa Pueyasooqua tiuujia maajipohua. <sup>3</sup> Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniani, cuno maajipohua quia jyanootiooterohua, nojori rupuetoonuhua. Cuno maajipohuacuajaari jaarajaaja cuata poonijionuuquiaari, Clementejuhuaaj, pa Jiyaniijiajiniji cua pohuatasacari. Naa cuata poonijionuuquiaarijuhua tamasa, canapuate cuata quiquiaaricuajani. Nojori sesacacuajaari tari naajiotasano quia Pueyaso nequesoreetuneejinia, tee cuniqui pueyaracaanu rishijiacarano sesaca naajiotasano quiyacuajani.

<sup>4</sup> Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. <sup>5</sup> Puetunu pueyajanaa cuaara niishiiria niaari seetanujuanaa maninia pueya, maja juaajia. Pa Jiyaniijiacuajaari quera tiuquihua.

<sup>6</sup> Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuaaj "paacarasho". <sup>7</sup> Naa nia miishacaritij, Pueyasoori nioojia cajitiniutianiya. Naa Pueyaso cajitiniuucua nioojiatej, majaari socua nioojia tacaaniu quiniutianiya, nia niishitiajanio. Naacujitij, niocua juhua janiya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyano hua jiyajeneta. Nocuaji jiuujiatesano.

**Saaja maninia casaacua niishiriojuaca nia quiriquia**

<sup>8</sup> Naajuhua cuarta Pueyaso pueyanaa, nio tojjijaca nia quirijiuhaaj. Pueyaracaanu saaja seetanujuanaa rupaacua niishiriojuaca nia quiriquia. Naajuhuaaj, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, maja cararaatia casaacua. Naajuhuaaj, saaja Pueyaso shuquiritasano casaacua nia niishiriojore, maja Pueyaso sesacasano casaacua. Naacujitij, puetunu maninia casaacuajanaa nia niishiriojore, casaajinjiti pueya naata Pueyaso shuquiritianuni.

<sup>9</sup> Maninia nia miiriquia pueyaracaanu, taa cua niishitiojoquiaari niajaniyacuajani. Niaacuajaari cua rootasano tojiquiaari. Naajuhuaaj, niaacuajaari cua niqijia taa miijia cua quiquiaarini. Naa jaara nia miijia quiri juhaaj, poojia cajitiniya Pueyasoori niaata quiniutianiyajuhaaj.

**Pablo pohuatasano, Filipino tiacajinia quiniaa Pueyaso pueya jiyaronuucua cumaneeca nera**

<sup>10</sup> Janiyari jiyano hua cua Jiyaniijia timitiaani juhua shusha nia niishinuuquiohua janiya, cucua nia jiyaronuucua nia reratesano cumaneeca. Naa cua sequesacari niajaniyatej, majaari nia jyaniniu janiya nia sequeyani niaari cua niyacetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. <sup>11</sup> Majaari naa cua sequenu niajaniyatej cua panishano cua jiiitaaquiniuucua. Maja. Janiyacuajaari tari jiyartuunoni, juhua janiya cua quiniuria cua jiiitiasanonyojuata. <sup>12</sup> Naajuhuaaj, janiyari niishiyani juhua janiya cua quiniuria cua panishano cua jiiitaaquishacari. Naajuhuaaj, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniuujushanoni puetunu casaajanaa cua rejeretanura. Juhua janiya quiniu niishiyani miaajaaraca cua quishacari, miaajeeju cua quishacarijuhaaj. Cua naata juhua janiya quiniu casamijiu cua quishacarijuhaaj, maja saaja casamiriaca cua quishacari. <sup>13</sup> Cua naata rejeretanu puetunujuanaa, Cristo cumaquishacari janiya. <sup>14</sup> Naajaa, niaari maninia miiruucua nia cumaneeca nia jiyarosacari cucua, naquiya cua miishacari niya. Naaari niarta pueyanoocua taraajeja cutara.

<sup>15</sup> Naajuhuaaj, Macedonia jiyajiniji cua quiasacari nia shuriucujia Filipino tiacajiniji, tamonu jiyacajinia cua pohuatanura Pueyaso rupaa, saaja niajaniya cutaraari cucua jyanooquiaari. Cunoori quiquiaari shushajanaa Jesucristoocua tiuujia nia quishacari. Jiyacaritij, niaari nia reratesano cumaneeca jiyaroquiaari cucua, shuquiriaatia nia quishacari cua pohuatanuucua nia niqiara Jesucristojiniji. <sup>16</sup> Juhuanu juaja nia Macedonia jiyajinia cua quishacarijia, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. <sup>17</sup> Majaari saaja cua paniniu pueyaracaanu nia niqutiojonura nia cuma-

neecajiniji janiya. Janiya cutaraari nia panitiaani capora pueya nia quiniuria. Naacujitij, Pueyasoori saniniuujia socua queraatia nia niqutionutaniyacujua. <sup>18</sup> Epafroditocujaari puetunu nia jiyarosano cumaneecajanaa cucua tiuquitiasecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosanoi, cunoori juhua Pueyasora niqitiosano casaa. Nera, cunoori juhua shanohua jaanutaja catijiasano nocuara. Na shuquiritiriiri. <sup>19</sup> Naaratej, cua Jiyaniijia Pueyasoori puetunu nia jiidiaaquishoo casaa-janaa nia niqutionutaniya. ¿Pueyasoteeri casamiiiju? [Maja! Nia rupuesacari Neyanu Jesucristo, puetunu na jiidiasanojuanaari niaaranojuhuaj. <sup>20</sup> Pa Que Pueya-

soori jiyanoohua maninia! Saaja nojuaja pa shuquiritiare pueyaracaanu. Cuaara naa quiiriatej.

### Nata quiniaata Pablo saruhuatasacari narta Pueyaso pueya

<sup>21</sup> Quiria nia sarhuatare puetunu Jesucristo jiyanooshano pueyajanaa. Niya cuata quiniaa Pueyaso pueyari nia sarhuataajuhuj. <sup>22</sup> Naajuhuj, Jesucristoocua tiuujica jiyaniijia Césarra poonijionaa pueyari nia sarhuataajaacuhuj, puetunu niya Jesucristoocua tiuujiacajanaano.

<sup>23</sup> Pa Jiyaniijia Jesucristo cuaara cumaquiiria puetunu nioojajanaa. Tariucujaja pueyanaa.

# COLOSA

## Pablo Colosa tiacajinia Pueyaso pueya maanuucuaa naajioquiaari

**1** ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa pohuatariquiano taa na Que Pueyaso paniquiaaricuajani. Pa tarajanu Timoteota naajiya nionijia. <sup>2</sup> Niaacuara naajiyaniijia, canapue Pueyaso saquiriojoquiaaricuajani tama nerajaaja nia quiniuria. Niajanuyacuajaari maninia tiuuquiaa Pueyasoocua, Cristo rupuesano nia quishacari. Pa Que Pueyaso cuaara cumaquiiria niajaninya, shuquiriaatia nia quiniuria, juhuajaniya nioojia quiniuriajuhuaj.

## Pablo secojosano Jesuucua tiuuniaa pueyacuara

<sup>3</sup> Canaari pohuatasaaanuni taa nia tiuuquiaa Jesucristoocuaani, naajuhuj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: "Paacarasho canaa Quena". <sup>5</sup> Niaari naa maninia quiyatej, nia niishishacari Pueyasoori jiyanojua maninia pa miiniutianiya na niquitosacari pajaniya jiyocuacaanu na jiitiasanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. <sup>6</sup> Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojia-cajiniacuani. Naa caneyari nia niishishacari Pueyasoori seetanujuanaa pa paniya, taa nia pohuatasaaquiaaricuajani. <sup>7</sup> Pa panishano Epafrasri naa pohuataquiaari niajaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. <sup>8</sup> Nojuajaari canaa pohuatarucuaa niajanijini, naajuhuj taa Pueyaso Sohuanu panitiooteya niajanijiani.

<sup>9</sup> Naaratej, canaa jaara tojiquianu niajanijini, majaari canaa tarinitianu quiriqiaa Pueyaso secojonu niaacuara. Canaari Pueyaso secojoquiaani, nojuaja cuaara nia jataniiria niishijia nia quiniuria na Sohuanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia miiniuriajuhuaj. <sup>10</sup> Naa jaara Pueyaso panishano niishijia quiri, naacuajitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquirianura niajaninya, pueyaracaanu maninia nia quishacari. Niaari puetunu

maninia casaajanaa miiniutianiya. Naajuhuj, niaari socua maninia niishiniutianiya Pueyaso. <sup>11</sup> Canaari Pueyaso secojoquiaa niaacuara juhuaj, Pueyaso cumaquiniuria niajaninya puetunu na cumaacatajanaa. Jiyanojua maniniaari na cumaaca, shuquiriaatia nia rejeretanura juhuajaniya puetunu casaajanaa.

<sup>12</sup> Canaari Pueyaso secojoquiaajujuaj niaa cuaara pueyaracaanu sequeera nia shuquiriniutia "paacarasho", pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojinia pa quishacari. <sup>13</sup> Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaa pa quiniuria, Neyanuniyojua jiitiasano pa quiniuria maninia cutara. <sup>14</sup> Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

## Paari maninia quiya Pueyasotani, Cristo cusonuucua pa niti

<sup>15</sup> Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujanaa quiquiaari Pueyaso shipiniyaquishacari puetunu casaajanaa. <sup>16</sup> Na Que Pueyasoori na shipinitiquiaari puetunu casaajanaa jia cajiniocua, mijirianio; niquishano casa, niquiyaquishoo casaanio. Naacuajitij, Cristoori puetunu tamonu cumaacacua quijiacajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casa, jiyocuacaanu quijiacanio, mariyata mijiria casa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. <sup>17</sup> Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuua, maninia na quiniuria. <sup>18</sup> Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujini, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuaj. <sup>19</sup> Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja

na quiniu na Quejiniji. <sup>20</sup> Naajuhua, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanooti quiaari puetunu casaajanaa tama na cusonutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

<sup>21</sup> Tariija, niaari Pueyaso paraa quiquiaari, juhua taanuusano pueya Pueyasojiniji, sesa miijiaca nia quiniuucua. <sup>22</sup> Saniniuujia quiarijiani, Pueyasoori nia rupuetequiaariuhua nocua, Cristo cusonuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucuajanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niaquara. <sup>23</sup> Niaari naa quiniutianiya maninia, niaa jaara cumaatia rupaquiaa Cristoocua, nocua nia tiuushacari, nioojia nia niqijioteyaquiniutia. Majaari nia niishiriojonu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricuajani. Nia tojishano Pueyaso ru-paacuajaari tari pohuatasacaanu puetunu jiyacajinijanaa. Janiya, Pabloni, janiyari na pohuatanu naacutaajaniuhua.

#### Pablo Pueyaso pueya maanu cumaquiniara jiyate-saquaari

<sup>24</sup> Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiqiyocuatej, janiyari Cristo naquiya miiniu tucataa tama cua cuaqueyajinijaa. <sup>25</sup> Pueyasocuaari cua jiyatequiaari na saquiriojosano pueya cua jiitianura, cua cumaquiniuria niajaniya puetunu na rupaatajanaa. <sup>26</sup> Cuno rupaari saaja Pueyaso jiyasohua niishishano quiquiaari tariija. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. <sup>27</sup> Pueyasoori pa niishitiniu paniquiaari taa jiyanoohua shacantuuca na cumaaca quiya niajaniyarani, canapuee maja na saquiriojosano Judiocuaca quiquiaaricuajani. Niocuajaari jiyasohua Pueyaso miiniu panishano tariija: ☩Cristoori nioojiajinia quiya! Nia jiitiasacari Cristo, niaari niishiya niaari shacantuuca quijiara jatanishaanutaniyajuhua.

<sup>28</sup> Naaratej, Cristocuaajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuajanaa maninia canashitishano

pueya, Cristo rupuesano nojori quishacari. <sup>29</sup> Naaratej, puetunu Cristo niqitiosano cumaacatajanaa jiyanoohua poonijioquiaanijia, na cumaquishacari janiya.

<sup>2</sup> Pueyanaa, janiyari paniyani nia niishiniuria taa jiyanoohua cua poonijioquiaa Pueyaso cua seconota niaacuarani, Pueyaso muerasuucua Laodicea tiacajiniajuhuaj, puetunu juhuanajuaja cua niqiyacquiniaa pueyacuarajanaano. <sup>2</sup> Jiyanoohua seconotia niaacuarianijia, nioojia cumaquishaanura, nioojia rupuetoonura jatiqijiuhuaj, jiyanoohua nia panitiosacari. Naajuhua, seconotia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. <sup>3</sup> Neyanu Cristocuaajaari puetunu niishijijanaa. Majaari tamonu niishijia quiniu juhua nojuaja. Jiyanoohua maninia miijia puetunu na niishishanotajanaari. <sup>4</sup> Janiyari nio sequeya niajaniyani, tamonu mariqui nia sapojoreeri najuhua tamaatia na pohuatasanota. <sup>5</sup> Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

<sup>6</sup> Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. <sup>7</sup> Maninia nia rupuetooore Cristota, naatej, taa naana cumaatia nujuaacuani, jaara tucamaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaricuajani. Cunora, pueyaracaanu nia sequeriquia Pueyaso: "Paacarasho canaa Quena".

#### Niaari quiarinio pueya, Cristo quishacari nioojiajinia

<sup>8</sup> Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Naa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhua.

<sup>9</sup> Nocuaji saaja Cristo nia tojiri. Tama Cristo cutara-jariija puetunu Pueyaso cumaacajanaa jiitiaja, puetunu na niishitijajanaano. <sup>10</sup> Naajuhua, niaari Pueyaso cumaaca jiitiaa, na niishitijajano, nia rupuesacari Cristo. Naacuajitij, niaari puetunu nia panishanojuanaa jiitiaa tari, maninia quijiaca nia quiniuria. Cristojanaari Jiyaniijijanaa. Cristo jaara na jiyarore, puetunu tamonu cumaacaraca quijiacajanaari na tojitiaa; jiyocuacaanu camarnu, mijiria camarnunio.

<sup>11</sup> Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuani. Nojori miatesaaquiaa nojori niishiniuria nojori cuara quiiria saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji.

Cristo cutaraari sesa nioojia jataquiaari, seetanujua-naa sesa nia quiniu jatasaanura puetunujuanaa. <sup>12</sup> Puetunu sesa nia quiniujianaari juhua jamosaaquiaari Cristota, niaa jaara moojinia tiuquini-jiosaare. Nia tohuatasacariuhua, niaari juhua samiitianihaarohua Cristota, Pueyaso cumaacaacua nia tiuushacari. Niaari samiitianihaarohua taa Pueyaso samiitianiquiaariuhua Cristocuaani. <sup>13</sup> Niaari juhua macu quiquiaari tarijia, sesa miijiaca nia quishacarijia, sesa jiuujiaraca nia quishacarijiano. Jiyacaritij, Pueyasoori nia samiitianiquiaari Cristota, na jiyanooshacari nijaniya puetunu sesa nia miishanojinijijianaa. <sup>14</sup> Pa tojiyaquishacari tariucuacaanu Pueyaso rootasano, paari puecosocoriquiano quiquiaari juucuaani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiuutiaquiaari Cristocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiuutiasaanu pocua. <sup>15</sup> Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequetereeri, naatej, taa quioosano pueya jaatucunuusaaquiaacuaani, pueya niquiara macaatishocoriquiano.

### Saaja Pueyaso casaacua nia jiaatiariquia

<sup>16</sup> Naaratej, majaari nia tojiniu noo pojori, canapuate nia tojitiniu saniniujija supuetana niishitiojosanocua-jani. Nojoriiri najuhuaana niishitiojoquiaa casaa sumatuute puereshiyani, rusanonio. Nojoriiri niishitiojoquiaajuhuaaj teyano juucate poonijiaquishiyani, naajuhuaaj, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jyanishacari paa jaara naa miyaquirini, Pueyaso mariqui pa saniitioreeri. <sup>17</sup> Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujuanaa quiniutianiyani Niriquiano jaara tiuquiri. Cuno Niriquianocuaajaari Cristo. Tari tiuquiquiaariiri. Nojua-jaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. <sup>18</sup> Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niquitionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jyanishacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujinia na niquishanoocuaajaaja tiuujia, maja Pueyaso ru-paacua. Naacuajitij, nojori tiuushacari tama na niishiriojosanoocuaajaaja, nojoriiri seetanujuanaa pueya shocotajaca quiya. <sup>19</sup> Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojiari maninia maashitiya puetunu pa

cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatano. Pueyasoori naa pa maashitiniu panijahuaj Cristota rupuetootesano pa quishacari.

<sup>20</sup> Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajanijariuhuaaj? ¿Casaara nia tojitiaajaa cuno tariucuacaanu rootasano? Niaari juhua nareja mijiria quinia quiyaja, nia tojishacarijia cuno rootasano. <sup>21</sup> Supuetanaari naa piriyojoquiaaritij: “Maja pa quianu cuno. Maja pa miaquenu cunojuhuaj. Maja cuno pa cooni”. Pa supuetanaari naa sequejatej. <sup>22</sup> Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuacaanu rootasanoori saaja tama pueya niishishanojuaja quiquiaari. <sup>23</sup> Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quiri-ni paa jaara casaa sumatuu puerereni, naajuhuaaj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaana Pueyasora. Cunoori maja na naacunu pajaniya sesa casaacua pa jiaatiaaquiniuria.

**3** Naa jaara samiitianihaarohua Cristota, jiyocua-caanu Pueyaso jiiatiasanoocua nia jiaatiare, tee Cristo cajiya na Que Pueyaso miaquetajaracuajani. <sup>2</sup> Pueyaso casaacua nia niishiriojore saaja, maja mijiria casaacua. <sup>3</sup> Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiy-ateretama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianiija. Saniniujija, juhuanajuaja maja niishishano taamueca quijiaca pa cuaqueya quiniutianiyani. <sup>4</sup> Cristo jaara muetarohua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuaaj.

### Maninia rootasano Pueyaso muerasura

<sup>5</sup> Naaratej, nia cuaqueya cuaara quiiria juhua macu tama nia niquiarajaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatiajaari juhua Pueyaso ruureta-ja quiya, tama na jiiatiasano casaacuajaaja na tiu-ushacari juhua Pueyasoocuaaja. <sup>6</sup> Pueyasoori jyanohua saniitionutaniya na tojiyashijiaca, canapuate naa sesa quijiacacuajani. <sup>7</sup> Pueyaso tojiyashijiaca nia quishacari tarijia, niaari naa sesa miijiaca quiquiaari. <sup>8</sup> Quiarijiani, nia tariniitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jyanoyashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaara-



tia najuhuana nia niti taquiriocuateja nia quiniu. <sup>9</sup> Maja nia cuaracashijotoonu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniuucua jitinio nia quishacarijii-uhuj. <sup>10</sup> Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipininia Pueyaso nia quiniuria, seetanujuanaa Pueyaso niishijia nia quiniuria. <sup>11</sup> Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasaca pueyano; na cararaatiuuquia co mialesano pueya, miatesoo pueyano. Paa jaara tahue quiyani, juhua mococori, poonijiootesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poonijiania quiyajuhuj.

<sup>12</sup> Pueyasoori nia saquiriojoquiaari saa maniniaja nia quiniuria nera. Niajanitari na panishano muerasu. Naaratej, pueyacu taraajeja nia quiri. Maninia miijia nia quiri. Majaari nia jyaniniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. <sup>13</sup> Jacaria nacasutoojua nia quiri. Maninia nia jyanoori cante sesa miirii nia-janiyani. Taa pa Jyanijia jyanooquiaari pajaniyacuaani, naa nia jyanootioorejuhuj. <sup>14</sup> Seetanujuanaa pueya panijia nia quirijuhuj. Cunoori socua jyanohua panishano. Panitioojuaca nia quishacari, puetunu nia miishanojuanaari jyanohua maninia quiniutianiya, jatiqiu nia quiniurijuhuj. <sup>15</sup> Naajuhuj, Pueyaso nia shanacure nioojia na cajitiniuria pueyacaanu. Nojuacuajaari nia saquiriojoquiaari juhujaniya quijiaca nia quiniuria, maninia rupuetootesano. Pueyaso muerasu cuara jatiqiu poonijionuujuaca quiri, naatej, taa pa cuaqueyajiniacuma casaa puetunujuaana jatiqiu quiyacuani. Majaari nia juaatiojonu. Naajuhuj, Pueyaso nia shuquiritiare pueyaracaanu, puetunu maninia na miishanojinijianaa niaara.

<sup>16</sup> Nioojia cuara quiri mishaja Cristo rupaata, jyanohua na tojjijaca nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitioojore puetunu Cristo niishishanotajanaa. Nia jaaquequejonuure Pueyaso Rupaa naajiosanojiniji, pueya naajiosanojinijiiuhuj, Pueyaso Sohanu niishitiojosano niajanianio. Naa nia jaaquequejore Pueyasora, nia shuquiritianuta nojuaja. <sup>17</sup> Jesucristocuajaari nia Jyanijia quiya. Naacuajitij, niaari na sesaanucua. Naaratej, nia sequesano, nia miishanojuhuj, puetunu cunojuanaa cuara quiri maninia nera. Naa nia miriquia pa Que Pueyaso nia sequenuta "paacarasho", Neyanu cumaquiniucua niajaniana.

### Maninia miijia pa quiri Pueyaso muerasu pa quishacari

<sup>18</sup> Maajipohuanaa, nia niyaca tojjitajaca nia quiri. Pa Jyanijiaacua tiuujiaca cumaati naa miiquiaaqui.

<sup>19</sup> Pueyanaa, nia niquiocua nia paniri. Majaari na juaniu. <sup>20</sup> Mueraasapuenaa, nia queya tojjijaca nia quiri, nia shuquiritiniuria pa Jyanijia. <sup>21</sup> Pueyanaa, maja nia juaatinu nia niquiohua, nojori mariqui maninia miiniu-

ucujia pishiriiri, puera nia juaashacari nojori. <sup>22</sup> Poonitijosano pueyanaa, puetunu nia camarnu sequesanojuanaa nia tojiri. Maja na tojjia nia quiniu saaja na shootiasacari niajaniana, na shuquiritianura niajaniana. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuaana Pueyaso. <sup>23</sup> Puetunu nia miishanojuanaa nia miiri shitimia, juhua pa Jyanijia Cristora. Naa nia miiritij, maja juhua nareja pueyara. <sup>24</sup> Maja nia niyajetanu, pa Jyanijiaari nia niqutionutaniya jiyocuacaanu niaara na jiiiasanojiniji. Mijiria camarnura nia poonijosacari, niaa cutaraari Cristora poonijia. Nojuacuajaari nia camarnujuanaa. <sup>25</sup> Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniujijia. Mijiria camarucua, poonitijosano pueyano, naajaa, nojoriiri maja rimiajata Pueyasora.

**4** Camarucua, pueyaracaanu maninia nia miriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

<sup>2</sup> Pueyanaa, Pueyaso secojojua nia quiri pueyacaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, "paacarasho". <sup>3</sup> Naajuhuj, canaacuara nia secojore Pueyaso, nojuaja cuara canaa pohuatiiriia pueya niqiuara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quianijia nio nujuatejojua-jinia. <sup>4</sup> Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracuajani.

<sup>5</sup> Maninia nia niishiriojore taa nia miiniutianiya nojorini, canapuetucuaaja maja Pueyaso muerasuni. Maninia nia miiri nojori, mijiria nia quishacarijia. <sup>6</sup> Nia pocojosacari nojoritia, maja najuhuana nia pocuanu. Pueya nia cumaquiri nia sequesano. Nia niishiriojore taa nia riucuanutaniya tamasaca pueyani, nojori jaara nequesotariquia niajaniana Pueyasocua nia tiuuniujiniji.

### Nata quiniaata Pablo saruhuatascari pueya, naajionu na puecanura

<sup>7</sup> Pa panishano pa tarajanu Tiquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jyanijia canaa poonijionura. <sup>8</sup> Niaacua na jiyaroyanijia na pohuatanura niajaniana taa canaa quiyani, naajuhuj, na cumanijanura niajaniana. <sup>9</sup> Pa panishano Onésimoori nata quianutaniyajuhuj. Nojuacuajaari niajanianijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niqijianaa.

<sup>10</sup> Aristarco, cuata nujuatesano pueyanoni, nojuajaari cua sequeya cua saruhuatanura niajaniana nera. Mar-

coori nia saruhuataajuhuj. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. <sup>11</sup> Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijiniori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. <sup>12</sup> Epafraasi nia saruhuataajuhuj. Nojuajaari Cristo seru niajanijajinijiniuhuj. Nojuajaari pueyaracaanu niaacuara secojoquiaa queraatia, jiyanoehua cumaatia Pueyasooocua tiuujia nia quiniuria. Secojoquiaajaariuhua ritia Pueyaso tojjijia nia quiniuria, puetunu Pueyaso panishanojuanaa nia miiniuria maninia. <sup>13</sup> Seetanujuanaa, Epafraasi jiyanoehua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. <sup>14</sup> Pa panishano naarajona Lucasri nia saruhuataa. Demas nia saruhuataajuhuj.

<sup>15</sup> Canaara nia sarhuatatare Laodicea tiacajinia quiniaa parta Pueyaso muerasu. Ninfas nia sarhuatatarehujuhuj, na tiajinia rerejonaa Pueyaso pueya maanuhujuhuj. <sup>16</sup> Naa jaara nio naajioneerojorecuaa nia rerejosacari, Laodicea tiacajinia nia jiyarotatarehujuhuj, cuaara serojosaaria Pueyaso pueya maanu niquiara tiijihujuhuj. Naajuhuj, cua naajioneero Laodicea pueyacuara nia serojore, niaacua nojori jiyarotasacari Laodicea tiacajiniji. <sup>17</sup> Naa Arquipo nia sequere quiria: “Tama quia cuaqueyajaaja quia cojuare quia tucuanura quia poonijiosano pa Jiyaniijia. Nojuajaari quia jiyatequiaari nera poonijioriquiano”.

<sup>18</sup> Janiyari Pabloni. Quiarijiani, tama cua juaashiquiatatajaaja naajijianijia saaja cua sarhuatanura niajanija. Nia niishiriquia, janiyari moronucua nujuatesano quiyani. Pueyaso cuaara cumaquiiria niajanija na cumaacata jiyanoehua. Tariucuaja.

# 1 TESALÓNICA

## Pablo saruhatasacari Pueyaso pueya

**1** Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacadio. Canaari mariyata nia saruhu-ataani, Silvano, Timoteonio. Pueyaso cuara maninia jiitiaara na cumaacata niajaniya, maninia nia quiniuria. Cuaara nioojia cajitiirijahuaj, juhuajaniya nia quiniuria.

### Tesalónica pueyanaari Jesuucua tiuujiaqui quiquiaari seetanujuanaa

**2** Maninia nia quiniucua, canaari pueyaracaanu Pueyaso sequequiaani, “paacarasho”. Canaa secojonu-usacari, canaari pueyaracaanu niaacuara secojonu-uquiaani. **3** Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasorani, Neyanuucua nia tiuuniucua. Canaari niishiquiaajuhuaj taa nia paniniutia nia naacuquiaa niarta pueyani. Naajuhuaj, niaari maninia rejeretaquiaa taraatia nia miiniu, nia niishiniucua pa Jiyaniijia Jesucristoori pocua niniutianihua. **4** Pueyaso panishano pueyanaa, canaacuajaari niishiyani, nojuajaari nia saquiriojiquiaari na panishano muerasu nia quiniuria. **5** Canaa jaara nia niqiuara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyanoohua Pueyaso cumaacaraca quiquiaari. Pueyaso Sohuanuuri jiyanoohua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu ru-paajanaa. Niaacuajaari niishiya taa quijia canaa quiquiaari canaa quishacari niaatani, maninia Pueyaso muerasu nia quiniuria.

**6** Niaari canaacua jiaatiaquiaari, juhua canaa nia quiniurijahuaj, juhua pa Jiyaniijia Jesu nia quiniurijahuaj. Niaari seetanujuanaa naa miijiacara quiquiaari, Pueyaso tojjijia nia quiniurijahuaj taa canaacuaani. Pueyaso rupaa nia tojjishacari, niaari jiyanoohua na timitiaquiaari. Cunora, niaari jiyanoohua naquiya mi-ishaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria.

**7** Naa shuquiriaatia Pueyaso tojjijia nia quiniucuatej, niaari niarta Pueyaso pueya shiniujuquiaari, seetanujuanaa Pueyaso tojjijia nojori quiniurijahuaj. Niaari naa shiniujuquiaari puetunu niarta Pueyaso pueyanaa Macedonia jiyajinia quiniaatej, Acaya jiyajinia

quiniaanio. **8** Pa Jiyaniijia rupaari niajanijini tucua-caanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiquiyocua-janaa poojotasaquiaari. Naacuajitij, puetunu tiquiyocua quijia pueyanaari tari niishiya taa Pueyasoocua tiuujia nia quiya seetanujuanaani. Naacuajitij, ¿canaatucua casaara niishitiojore Jesujinijini socuani, tee cuniqui pueya niishiya tari nojuajinijicuaani? **9** Tee cuniqui canaa tiuquiquiaani, pueyari canaajinijini poojotanuya tari, taa Jesujinijini canaa pohuataquiaaricua niajanijini. Nojoriiri niishiyajuhuaj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojiniuria. Naajuhuaj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojuanaa tojtiajaca nia quiniuria. **10** Naajuhuaj, niaanaari Neyanu sashiya, jiyocuaaanu na tiuquiniuhua, teyano Pueyaso samiitianiquiaariuhua macujinijicuaani. Pueyari niajanijini niishiyajahuaj, Jesuuri pocuaji Tacuna, maja mani quiquiojinia pa quejoosaa-nura, Pueyaso saniitiosacari na tojtiaashijia.

### Pablo niishitiosacariuhua pueya, taa na quiquiaari nojoritiani

**2** Cuarta Pueyaso pueyanaa, niaacuajaari niishiya, majaari najuhua canaa quiniu quiquiaari, niaata canaa quishacari. **2** Niaacuajaari niishiya, Filipino tiacajinia canaa quishacari, niaacua canaa tiuquiyaquishacari, canaari cuno tiacajinia sesacasaquiaarini. Canaari jiyanoohua taraatia mi-ishaquiaarijuhuaj. Naajuhuaj, nia tiacajinia canaa tiuquijiosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojinijini nia niqiarajuhuaj. **3** Canaacuajaari niishiquiaarini canaa pohuatasanoori seetanu rupajanaa. Majaari canaa pohuatanu quiquiaari canaa miiniuria sesa niajanijia, canaa sapojonura niajanijijahuaj. **4** Pueyasojunaari canaacua tiuquiquiaari. Cunora, canaa jiyatequiaariiri Neyanujinijini pohuataanaa canaa quiniuria. Naacuajaari taa canaa poojotaquiaa pueya tiuuniuria nocuacuaani, Pueyaso jiyanooniuria nojori. Canaari seetanujuanaa Pueyaso timitini panijani, maja saaja pueya. Pueyasocuaari canaa jiuujia niishijia. **5** Niaacuajaari niishiyajuhuaj, majaari canaa sapojonu quiquiaari niajanijia shanohua canaa sequesanta, canaa nia maniniucuanura. Naajuhuaj, majaari canaa cuaracashijionu quiquiaari niajanijia,

canaa nia niquitiojonura nia cumaneecajiniji. Pueya-soori na niishiyacuaja. <sup>6</sup> Majaari quenaaja canaa ni-ishiriojonu quijia pueya timitiasano canaa quiniuria, nia timitiasano pueya canaa quiniurijuhuj. Maja. <sup>7</sup> Canacuajaari seetanujuanaa nia jiyaniijianucuaani, Jesucristo jiyaramiquishano pueya canaa quiniuucua. Naajaa, niaata canaa quishacari, majaari naa canaa miiniu quiquiaari niajaniya, juhua canaa seya nia quiniuria. Saniniuujia, canaari tojetaarucujanaa juhua naatujuori quiquiaarini, niaata canaa quishacari. Naatej, taa maaji jiidiaa maninia necohuacuaani, canaari naa nia jiidiaquiarijuhuj. <sup>8</sup> Jiyanhua canaa paniniuucua niajaniya, majaari saaja Pueyaso rupaa canaa pohuatanu quiquiaari niajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuaara puecoosaariaqui. Canaari naa jiidiaquiaari niajaniyani, jiyanhua canaa paniniuucua niajaniya. <sup>9</sup> Cuarta Pueyaso pueyanaa, niaacuajaari niishiya taa canaa poonijioquiaari jiyanhuaani, tama canaa panishanojuaaja canaa masetajara. Canaari naa poonijionuuquiaarini juuca, niucuanio, canaa pohuata-nura Pueyaso rupaa niajaniya. Canaari naa miiquiaarini maja canaa taajetenura niajaniya canaa mashiniquijionuta nia cumaneeca.

<sup>10</sup> Naacuajitij cuarta Pueyaso pueyanaa, niajaniya, Pueyasojuhuj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canaacuara saquiriojotanu, canaa jaara tojetaarucujanaa sesa miyaquiquiaarini. <sup>11</sup> Niaari niishiyajuhuj taa canaa shiniujiuquiaari niajaniyani Pueyaso nia tojiniuria. Niaari niishiyajuhuj taa canaa cumaniiaquiaari puetunu niajaniyanaani taraatia nia quishacari, naatej, taa pueyano miiquiaa na panishano niquiohuacuaani. <sup>12</sup> Naajuhuj, canaacuajaari jiyanhua nia nacasuquiaarini maninia miijiaca nia quiniuria juhua seetanujuanaa Pueyaso pueya. Pueyasocujaari nia saquiriojoquiaari pueyara-caanu nata nia quiniuria, jiyaniijianucua nia quiniurijuhuj, juhua nojuajuhuj. Nojuacuajaari na shacantu-uca cumaacajinia quijia.

<sup>13</sup> Canaa jaara Pueyaso rupaa pohuataquiaari nia niquiarani, majaari nia jiyaniniu quiquiaari cunoori saaja pueyajiniji canaa tojiniuushano. Maja. Niaari seetanujuanaa na tojtiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, "paacarasho". Canaa pohuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria niajaniya, Jesuucua tiuujiaca nia quiniuucua. <sup>14</sup> Naa Jesucristoocua tiuujiaca nia quiniuucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaarijia nojori miiquiaari naquiya, Jesucristo tojijia nojori quiniuucua. <sup>15</sup> Nio cuarta Judiocuacani, nojori supuetanaajuhuj, nojoricuajaari pa Jiyaniijia Jesucristo motuquiaari. Nojori supuetanaari naa tariu-

cuacaanu puecooquiaarijuhua Pueyaso sequesano caminiujiunaa pueyatej. Naajuhuj, Jesuucua tiuyashijaca cuarta Judiocuacari canaa taanuuquiaari canaa Judea jiyajiniji. ¿Cuno pojoritiiri Pueyaso timitiasano? [Maja! Cuno pojoricuajaari juhua puetunu mijiria quiniaa paraajanaa. <sup>16</sup> Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nojori jiyatesaanurajuhuj, Judiocuacari canaa tenujuquiaa juucuaani. Naacuajitij, Pueyasora, sesa Judiocuaca miiijosanoori tari tojetaarucujanaa puera. Cunora, Pueyasoori nojori saniitioquiaa jiyanhua.

### Pablo naquerejosacari juucua Tesalónica tiacajinia quiniaa Pueyaso pueyacua

<sup>17</sup> Cua panishano pueyanaa, canacuajaari rupaquijia nia shuriucujia quiaquiaarihuani. Jiyacari canaa niquiyaquishacari niajaniya, naajaa, canaacuajaari juhua niaata quiquiaaani, pueyara-caanu canaa ni-ishiriojosacari niajaniya, niaacuara canaa secojosacari. Canaari juucua jiyanhua nia niquiniu paniriquiaani. <sup>18</sup> Cunora, canaari niaacua naquerejoquiaari juucuaani. Janyari niaacua naquerejonu pacutejoquiaarini. Satanásri canaa cushitioquiaari saajani. <sup>19</sup> ¿Janiyatucua casaara nia niquiniu paniyaquiririni? Niaacuajaari jiyanhua cua timitiasano pueya. Pa Jiyaniijia Jesucristo tiuquishacarihuua, janyari niishiyani, nojuajaari canaa shuquiritianutaniya maninia na tojijia nia quishacari canaa niishitiojonuucua na rupaa niajaniya. Pa Jiyaniijia pa quishacari, jiyacaritij, canaari jiyanhua nia timitianutaniyani, maninia na tojtiajaca nia quiniuucua mijiria. <sup>20</sup> Taaquiririni, canaacuajaari tari shuquiriaatia quiyani, maninia na tojtiajaca nia quiniuucua. Niaacuajaari seetanujuanaa canaa timitiasano pueya.

**3** Naa jiyanhua canaa niishiniu panishacari juucua niajaniyajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniacuajaari canaa jateenura tamajaaja Atenas tiacajinia. <sup>2</sup> Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janyari niaacua na jiyaroquiaarini na cumaquiniuria niajaniya, mariyata socua na shiniujiuniuria niajaniya Jesuucua nia tiuuniuria saaja. <sup>3</sup> Na jiyaroquiaarinijia na cumaquiniuria niajaniya maja quenaaja niquiriyatu niajaniyajinijinio pishiniuria Pueyasocujia, naquiya nia miishacari. Niacuajaari tari niishiquiaari, paari naquiya miishiyani Jesucristoocua pa tiuuniuucua. <sup>4</sup> Canaa quishacari niaataja, canaacuajaari tari nia numootequiaarini, puetunu pajaniyanaari naquiya miishaanutaniyani Jesucristo tojtiajaca pa quiniuucua. Niacuajaari niishiya, seetanujuanaa naa tohuateecanuuri cua sequesano. <sup>5</sup> Cua niishishacari niajaniyajiniji, niaanaari naquiya miishaaquiaa, janyari puereriquiaani Sesaaca naasucua nia miitiriucaa sesa. Jaara naa qiritij, puetunu canaa miishanojuanaa niaara maara na-

juhuana quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniijia cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pohuatanuhuaa janiya, niaate Jesuucua tiuyajaa.

<sup>6</sup> Timoteocuaajaari tari niajanijajiniijia tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitioojuaca quiyajaa. Canaa pohuatasuhuacuaajaariuhuaaj, niaanaari canaa niishiriojoquiaa jiyanoehua nia paniniutia canaa. Niaanaari canaa niquiniucua jiaatiaa, naatej, taa canaa jiaatiaa canaa niquiniuria niajanijacuaani. <sup>7</sup> Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaaj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. <sup>8</sup> Naa canaa tojishacari niaacuajitij, canaari juhua samiitia-corohuani, pa Jijaniijia tojitiajaca nia quiniucuaa. <sup>9</sup> Cunora, canaari jiyanoehua nia shuquiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniucuatej, canaari jiyanoehua shuquiriaatia quiyani. <sup>10</sup> Naajuhuaaj, canaari juuca, niucua secojoquiaa Pueyasoni, nojuaja cuara canaa tiuquithuara niaacua. Canaari maninia nia niishitiojonu tucuatano paniyani, seetanujuanaa maninia jeenucuasano Pueyaso pueya nia quiniuria.

<sup>11</sup> Canaari paniyani pa Que Pueyasojuanaa, pa Jijaniijia Jesucristonio, nojori cuara canaa naacuura niaacua canaa tiuquiniuria. <sup>12</sup> Pa Jijaniijia cuara nia jiyateera socua jiyanoehua panitioojuaca nia quiniuria, tamasa panijiacua nia quiniuriajuhuaaj, taa canaa panija niajanijacuaani. <sup>13</sup> Naa panijiacua na jiyatesacari niajanijatej, niaari nioojia niquijioteyashijiacua quiniutianiya cutara. Naajuhuaaj, niaari tojetaarucuajanaa sesa miyashijiacua quiniutianiya, pa Jijaniijia Jesucristo tiuquishacariuhuaa puetunu na jiyanooshano pueyatajanaa.

#### Taate pa naata Pueyaso shuquiritiniuni

**4** Quiarijiani cuarta Pueyaso pueyanaa, pa Jijaniijia Jesu jiyaramiquishano pueya canaa quiniucua, canaa sequesano nia tojiri. Quiarijiani, canaari nia shiniujiyani socua maninia miijiacua nia quiniuria. Canaari nia niishitiojoquiaari maninia miijiacua nia quiniuriani, Pueyaso nia shuquiritiniuria. Niaacuajaari naa maninia miya.

<sup>2</sup> Niaacuajaari canaa rootasano pa Jijaniijia Jesujiniijia niishiya tari. <sup>3</sup> Canacuajaari nia rootaquiariini, Pueyaso nia panitiaa saaja nera nia quiniuria, tojetaarucuajanaa maninia jeequesano nia quiniuria sesa nia miishanojinijia. Majaari nia numuetucunu nia camishoo maaji. <sup>4</sup> Puetunu mashiquiorijianaa cuara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuara na cuaqueya panishano rejetenu niishiiria. <sup>5</sup> Majaari sacuaatia nia miiniu taa Pueyaso niishiyashijiacua pueya miijiaacuani, jiyanoehua nojori jiaatiasacari

maajiicua. <sup>6</sup> Naajuhuaaj, majaari quenaaja jiyasohuaja niarta pueyano niquiocua nia numuetucunu, neyaca nia sapojonuta. Cuno maajicuajaari saa neyacaraja, maja tamonura socua. Pueyasocuaajaari naa miijiacua saniitionutianiya jiyanoehua, taa canaa numootequiaari tari niajanijacuaani. <sup>7</sup> Pueyaso nia nia saquiriojonu quiquiaari pajaniya sacuaatia miijiacua pa quiniuria. Pa saquiriojoquiaari tojetaarucuajanaa sesa miyashijiacua pa quiniuria, saa neraja. <sup>8</sup> Naacuajitij, cante nio rootasano ruuretajani, nojuajaari maja saaja na rerequetenu nio rootasanojinijia pohuatana. Nojuajaari Pueyasojuanaa rerequeteya cutara, cante na Sohuanu niquitioquiaari niajanijacuaani.

<sup>9</sup> Quiarijiani cuarta Pueyaso pueyanaa, janiyara, najuhuanaruhua niaacuara cuara naajionura cuara niishitiniuria niajanijia, panitioojuaca nia quiniuria. Pueyasocuaajaari tari nioojiajinia nia niishitiquiaari panitioojuaca nia quiniuria. <sup>10</sup> Niaacuajaari seetanujuanaa puetunu Macedonia jiyajinia niarta Pueyaso pueya panijiacua quiyacuaja. Naajaa, cuarta Pueyaso pueyanaa, canaa nia tojiri. ☐ Socua panijiacua nia quiri! <sup>11</sup> Tama nia cuaqueyajaaja nia cumaquiriquia juhuanijaniya quijiacua nia quiniuria. Tama nia poonijosanojinijiaaja nia cojeriquia, tama nia juaashiquiatajaaja nia poonijosacari, taa canaa rootaquiari niajanijacuaani. <sup>12</sup> Naacuajitij, Pueyaso niishiyashijiacua pueyari nia rerequeteyaquiniutianiya. Naajuhuaaj, niaari puetunu nia panishanojuanaa jitianutianiya.

#### Taa pa Jijaniijia tiuquishacariuhua quiniutianiyanani

<sup>13</sup> Cuarta Pueyaso pueyanaa, canaari juhuacarijia nia tonu paniyani taa Jesuucua tiuujiacua shaajecono pueya miishaanutianiyanani. Canaari nia niishitini paniyani maja nia taraajenura juhua Jesuucua tiuyashijiacua pueya. Nojori nia nia jitianu nojori Jiyano, nojori nia samitianijionuhuaa. <sup>14</sup> Paacuajaari niishiyani Jesuuri cusoquiaari. Na nuhaji samiitiaquiariuhuaari. Naajuhuaaj, paari niishiyani, Pueyaso Jesuucua tiuujiacua shaajecono pueya samitianijionutaniuhua, nojori nia rijionura Jesuta, Jesu tiuquishacariuhua.

<sup>15</sup> Canaajanaacuajaari nia sequeyani, niocuajaari pa Jijaniijia niishitishano canaa: pajaniya, canapute pa Jijaniijia tiuquishacariuhua saminiucua quiniutianiyanajani, majaari macunucua pa puetanu quiniutianiya pa Jijaniijata pa naacuneetonura jia cajiniocua. <sup>16</sup> Naa quiniutianiyanani. Pa Jijaniijia nicanuuri tojishaanutianiya, Pueyaso seya jiyaniijia nicanujuhuaaj, Pueyaso trompeta jonenenunio. Jiyacaritij, pa Jijaniijiajanaari jiyocuaanuujia rosenutianiya cohuaaja najacajiniara. Jiyacarijiuhuaaj, puetunujuanaa Jesuucua tiuujiacua shaajecono pueyari samiitiaconutaniuhuaa coteenu. <sup>17</sup> Na nuhaji pajaniya, canapute saminiucua quiyajani, paari nojoritia ritia rijiosaanutianiya cohuaaja najacajiniarani. Paari tii coquetonutianiya pa Jijaniijata paratujiniyani. Jiyacaritij, paari tari pueyaracaanu nata quijiacarano quiniutianiyanani. <sup>18</sup> Cua panishano pueyanaa, nio cua pohuatasanota nia cumaniijia-tooriquia.

**5** Majaruhua maninia cua naajionura niaacuara cua niishitiniuria niajaniya socua, taacari pa Jiyaniijia tiuquiniutianihuani. Niaacuajaari tari na niishiya, naajuhuj, taate mijiria quiniutianiyani na tiuquiyacuishacarijia. <sup>2</sup> Niaacuajaari maninia niishiya, pueya jiyaniishacari juhuanajuaja maja pa Jiyaniijia tiuquiniu quiniutianihua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. <sup>3</sup> Naajuhuj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: "Paacuaja maninia quiyani. Shaaquicuaja miaquetoojonu". Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. <sup>4</sup> Niajaniya saniniuujia cuarta Pueyaso pueyanaa, niaari maja juhua ninishiqui quijia-ca, pa Jiyaniijia cariyatunura niajaniya. <sup>5</sup> Puetunu niajaniyajanaacuajaari cuhuashiqui quijia-ca. Pueyasojuanaacuajaari nioojiaa cuhuataquiaari. Majaari tari juhua ninishiqui quijia-ca pueya pa quiniu. <sup>6</sup> Cunora, pa Jiyaniijia sashijiaca pa quirij. Maja juhua tamasaaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojojuacajuhuj. <sup>7</sup> Maquetujuacaari niucua maquetuquiaa. Naajuhuj, mashaasequenujuacaari niucua mashaasequenuquiaa. Naa miijiaaari Pueyaso tojiyashijiaca. Majaari na maniniucuanu cuhuashiqui. <sup>8</sup> Pajaniya saniniuujia, paari cuhuashiqui quijia-ca cutarani. Naaratej, pueyacaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuuja, nocuaji na nujutajara cashi. Cumueeca casaa cushiyonuujuajaariuhuj, na naca na cojuatajara. Naajuhuj, naa poojia pa cojuare, saaja Jesuucua pa tiuuniutia, seetanujuanaa panijia-ca pa quishacarijuhuaj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niquiriotenura najuhanaj. Naacuajitij, Sesaacaari maja na naata shocotanu quiniutianiya pajaniya. <sup>9</sup> Pueyasoori maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jyanooniuria pajaniya, na muerasu pa quiniuria, Neyanu Jesucristoocua tiuujia-ca pa quishacari. <sup>10</sup> Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio quiyajuhuj, pa Jiyaniijia tiuquishacariuhua, puetunu nocua tiuujia-cajanaari pueyaracaanu saminio quiniutianiya nata. <sup>11</sup> Naaratej, pueyaracaanu nia cumaquitioojoriquia Pueyaso rupaata. Nia shiniujiutiooriquiajuhuaj, seetanujuanaa pa Jiyaniijia tojijia-ca nia quiniuria, taa nia miiquiaacuaja tarini.

### Socua Pablo rootasacari Pueyaso pueya

<sup>12</sup> Cuarta Pueyaso pueyanaa, canaa nia tojiri. Cuniqini nia jiitianaa tojijia-ca nia quiri. Majaari nojori rerequetenu. Nojoriiri jiyanoehua poonijioquiaa pa Jiyaniijia nojori niishitiojonura niajaniya, na nacasunura niajanijajuhuj. <sup>13</sup> Cunora, jiyanoehua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria niajaniya. Maninia nia quiri pueyanaa. Majaari juayonuujuatanu.

<sup>14</sup> Nio nia tojirijuhuj cuarta Pueyaso pueyanaa. Taa-jecori nia nacasura. Noojia niquirijotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniujiushacari na cuaqueya miiniu panishano rejeretaashijacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasaaca.

<sup>15</sup> Naajuhuj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia niajaniya. Saniniuujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuj.

<sup>16</sup> Pueyaracaanu nia shuquiririquia, Pueyaso pueya nia quiniucua. <sup>17</sup> Naajuhuj, pueyaracaanu nia secoriquia Pueyaso. <sup>18</sup> Naa jaara maninia miishaare, nia jaara sesa miishaarejuhuaj, naajaa, puetunu naa nia miishaanuucujanaa Pueyaso nia sequeriquia, "paacarasho". Pueyasojuanaacuajaari naa paniya pa miiniuria, Jesucristo Sohuanu pa jiitianuucua poojia-jinia. <sup>19</sup> Majaari Pueyaso Sohuanu nia ruoretanu, nojuaja jaara nioojiajinia nia shiniujiya maninia nia miiniuria. <sup>20</sup> Naajuhuj, majaari nia soonu Pueyaso sequesano caminiujiuniaa pohuatasano. <sup>21</sup> Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijioti maniniani, cuno tojijia-ca nia quiri. <sup>22</sup> Puetunu sesa niishishano casaajanaa soojeaca nia quiri.

<sup>23</sup> Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijiaca nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, tojetaarucujanaa soosoo nia quiniuria pa Jiyaniijia Jesucristo cuaara tiuquiriohuajaatijia. <sup>24</sup> Cante nia saquiriojoquiaaricua nia pueya nia quiniuriani, nojuajaari puetunu shusha cua sequesanojuanaa niajaniya miiniutianiya niaara. Nojuajaari maja na niishiniu na rupaa jatanu. Nojuaja cutaraari na sequesano miijia pueyaracaanu.

### Pablo sequesano na naajionee na tucuatasaari

<sup>25</sup> Cuarta Pueyaso pueyanaa, Pueyaso nia secojonuriquia canaacuarajuhuj.

<sup>26</sup> Canaara nia saruhuatate cuniqini quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

<sup>27</sup> Pa Jiyaniijia jiyaramiquishano cua quiniucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

<sup>28</sup> Pa Jiyaniijia Jesucristo cuaara cumaquiiria nioojia. Cuaara naa quiiratej.

## 2 TESALÓNICA

### Pablo saruhatasacari Jesucristoocua tiuujica

**1** Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapue te pa Que Pueyaso rupuejacacuajani, pa Jiyaniijia Jesucristo rupuejacanio. <sup>2</sup> Pa Que Pueyaso, pa Jiyaniijia Jesucristojuhuj, nojori cuaara nioojia cumaquiiria. Cuaara nia jiyateera juhuajaniya quiji-acarajuhuj.

### Pueyasoori na tojtianu paniyashijica saniitioriquiano Jesucristo tiuquishacariuhua

<sup>3</sup> Cuarta Pueyaso pueyanaa, canaari jiyano hua nia timitiaani jiyano hua Pueyasoo cua tiuujica nia quiniucua socua, panitiojuaca nia quiniucua socuajuhuj. Cunora, canaa secojosacari Pueyaso, canaari pueyara-caanu na sequequiaani, “paacarasho”. <sup>4</sup> Naa maninia nia quiniucuatej, canaari shuquiriaatia poojotaquiaa niajanijini Puyaso pueya maapue niquiara tamaquicua canaa rucuanesacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujihuj, Pueyasoo cua tiuujica nia quiniucua. <sup>5</sup> Pueyaso saquirio-jonuucua niajanija pueyaracaanu shuquiriaatia quijica nia quiniuria na shuriucua, cunoori maja najuhuaa quiquiaari. Niaacuajaari seetanujuanaa na pueya. Cunoori maatia niishishiyacuaja juhuajaniya nia rejere-tasacari naquiya nia miiniuni, Pueyasoo cua nia tiuuniucua. Pueyaso niishiyashijica pueyari naa naquiya mi-iquiaa niajanijatej, Jesucristoocua tiuujica nia quiniucua.

<sup>6</sup> Naajaa, Pueyasocuaajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca niajanijatej. <sup>7</sup> Nijaniya saniniujia, naquiya miiijosaaquiarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacaritij, nojuajaari niquishaanutaniya mani rimianuqueyano tiuquitiohuano, jiyano hua cumaacaraca na seyata jiyocuaaanuji. <sup>8</sup> Tiuquiniutian-iuhuari na saniitionura noo pojori, canapue te Pueyaso niishiniu paniaquiquiaani, noo pojorijuhuj, pa Jiyaniijia Jesu rupaa ruuretjacatej. <sup>9</sup> Puetunu cuno pojori-jianaari pueyaracaanu saniitiosocoriquiano jiyate-saanutaniya. Nojoriiri tucuaaanura quejoosaanutaniya pa Jiyaniijia shuriucujaji. Naacuajitij, majaari nojori niquiniuni quiniutianiya na jiquioco, shacantuuca na cumaacanio, nojuaja jaara mijiria tiuquiriohua pa

shuquiritianura nojuaja. <sup>10</sup> Jiyacaritij, puetunu na jeenucuasano pueyajanaari jiyano hua na timitianutaniya. Puetunu nocua tiuujica pueyajanaari jiyano hua jiuujiateconutaniya, pa Jiyaniijia na shootiatasacari. Niaari na niquiniutianiyajuhuj, nojuajiniji canaa pohuatasanoocua nia tiuuniucua.

<sup>11</sup> Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua niajanija. Canaari niaacuara secojoquiaaaniuhuj, Pueyaso cuaara nia tucuataniiria na cumaacata puetunu maninia casaa nia miiniuni panishanojuanaa. Cuaara nia tucuataniiriajuhua puetunu nia miishanojuanaa, cuno, Pueyasoo cua nia tiuuniutia nia poonijosanoni.

<sup>12</sup> Naacuajitij, pa Jiyaniijia Jesuuri socua timitiasaanutaniya naa nia miiniucua maninatej. Naajuhuj, nojuajaari nia timitianutaniyajuhuj. Naa maninia quiniutianiyari pa Pueyaso pa Jiyaniijia Jesucristota na cumaquishacari niajanija.

### Maatia pohuatasano, taate mijiria quiniutianiya, pa Jiyaniijia tiuquishacariuhua

**2** Quariijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetonutaniya natajanijuhuj. <sup>2</sup> Canaa sequesano niajanija nia tojori, pueyanaa. Majaari nia niyajetanu tariucuaaanu canaa niishitiojosano niajanija, nia jiyajeneyaquiniucujaji tamasaca sapojosacari niajanija. Majaari nia shiriiquiniuni tamasaca jaara sequere niajanija: “Pueyaso Sohuanuuri cua niishitirii, pa Jiyaniijia tiuquishacariiri quarijia”. Tamasa jaara naa nia pohuatare, majaari na sequesano tojinuu. Naa-juhuj, tamasaca jaara naajionuure tamajaaja, niaara na jiyatesocoriquiano juhua canaa naajioneer, majaari nojori tojinuu. Nojoricuaajaari nia sapojiya. <sup>3</sup> Pueyanaa, majaari niaacua nojori nia shanacunu nojori sapojonura niajanija. Naa niishiri, pa Jiyaniijia tiuquiyaquishacariuhuj, queraatia pueyari Pueyasoo cujaji pishiniutianiya. Jiyacarijihuj, Pueyaso rootasano Ruuretajajanaari supenuutaniya. Nojuacuajaari tariucua Pueyaso saniitiosocoriquiano na riuriotaca. <sup>4</sup> Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojinuria Pueyaso, pueya shipinijosano nojori pueyashuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijia-



janaa cajitiujinia. Jiyacari sequenutaniyari: "Janiyacua-jaari Pueyasoni".

<sup>5</sup> Pueyanaa, ¿majateeri nio nia niishiniucuaja? Janiyacuajaari nojuajiniji nia poojotajani niaata cua quishacari. <sup>6</sup> Naa naasucuaari niishiyacuaja canteeri juhua na quiaajaani, maja juhuanojuaja mijiria na miiniuria tama na panishanojuaja, Pueyaso paniyaquishacarijia. <sup>7</sup> Seetanujuanaa, Sesaaca cumaacari tari mijiria poonijia jiyasohuaja. Naajaa, Pueyaso paracaari juhuanojuaja maja na naata muetanu, pueya niishiniuria nojuaja, na tenujuna cuaara niiquiji rishaarejaatijiaj. <sup>8</sup> Na tenujuna jaara rishaare niiquiji, jiyacarijij cuno sesaaca sequeeri muetanutaniya, jiyanojua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujuanaa. <sup>9</sup> Cuno sesa miiija sequeeri muetanutaniya Satanás cumaquishacari nojuaja. Naacuajitij, nojuajaari jiyanojua cumaacaa jitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. <sup>10</sup> Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojinu paniniu quiquiaari seetanu rupaajanaa, Pueyaso jiyanooniuria nojori. <sup>11</sup> Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuunuucua. <sup>12</sup> Naacuajitij, puetunu noo pojorijanaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucuajaca nojori quiniuucua.

### Pueyaso muerasuranoori tariucuacaanujiniji saquiriojosano

<sup>13</sup> Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacarijia, niaacuajaari tariucua Pueyaso saquiriojosano pueya quiquiaari. Naaari Pueyaso pueyara quiquiaaricuaja, na Sohanu jataniniuucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyaracaanu Pueyaso sequequiaa niacuuarani, "paacarasho". <sup>14</sup> Canaa pahuatasacari Pueyaso rupaa nia niquiara, niaari Jesucristoocua tiuquiaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuani.

<sup>15</sup> Naaratej cuarta Pueyaso pueyanaa, majaari nioojia nia niquijiotenu Pueyasoocua. Naajuhuj, nia numaa nia racatare canaa niishitiojosano niajaniya niaata canaa quishacari, canaa naajioneecajinia canaa rootasano niajaniyajuhaaj. <sup>16</sup> Jiyanoojia pa Jiyaniijia Jesucristo quiniuucua, pa Que Pueyasojuhuaj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanojua maninia miishaanutaniya

pueyaracaanuni. <sup>17</sup> Naajuhuj, nojori cuaara nioojia shiniujiiria, maninia nojori tojtiajaca nia quiniuria pueyaracaanu. Nojori cuaara cumaquiri niajaniya, tojetaarucuajanaa maninia nia sequesano quiniuria, nia miishanonio.

### Pueyaso rupaa pahuatanaacuara pa secojore

**3** Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiquiyocujanaa. Naa secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari niajaniyacuani. <sup>2</sup> Canaacuara nia secojorejuhuaj, Pueyaso cojuanura canaa na tojijashijaca pueyacuaji, maja nojori miiniuria sesa canaa. Niacuajaari niishiya, puetunu pueyajanaari maja na tiuuniu Pueyasooocua. Cuno pojoricuajaari canaa paracaajaca. <sup>3</sup> Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquniutianiya, maja nioojia nia niquijiotenura nocuaji. Sesaacuajia nia cojuanutaniyajaariuhuj. <sup>4</sup> Pa Jiyaniijiaacua canaa tiuushacari, majaari canaa taacanuunu niaa naasucuaari canaa rootasano tojtiaaquiniutianiya. Maja. Naa naasucuaari na tojtiaacuaja. <sup>5</sup> Pa Jiyaniijia cuaara niishitiiria nioojiajania, panijaca nia quiniuria taa Pueyaso paniyacuani. Naajuhuj, cuaara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

### Poonijiojuaca pa quiri

<sup>6</sup> Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniuucua, canaa nia tojitiare. Majaari noo pojori nia rupuenu: taajecoritij, noo pojorijihuaj, canaa rootasano tojijashijacatej. <sup>7</sup> Niacuajaari niishiya taa quijiacaa canaa quiquiaari niaata canaa quishacari. Naa quijiacaa nia quiriijihuaj. Majaari canaa taajeyaca canaa matanu quijiani. <sup>8</sup> Majaari najuhua canaa miaquenu quijia nia miaquesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiarini canaa panishano canaa jitianura, maja quenaaja canaa taajetenura niajaniya, maja nia tacaatianura canaajuhuj. <sup>9</sup> Pueyaso jiyaramiquishano pueya canaa quiniuucua, canaa naata quiquiaaricuajaari canaa panishano canaa mashiniquiniuria niajaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiarini, canaa niishitiojonura niajaniya, poonijionuujuaca nia quiniuria juhua canaajuhuj. <sup>10</sup> Canaa quishacari niaata jiyacarijuhuaj, canaari nio nia niishitiojoquiarini: "Cante poonijionu paniyaquiyani, cuaara miaqueteshiyaquiriuhuj". <sup>11</sup> Canaari pahuatasaarucuaajaaniuhuj, noojiaqueya niajaniyajinijionaaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. <sup>12</sup> Pa Jiyaniijia Jesucristo jiyaramiquishano pueya canaa

quiniuucua, canaari cuno taajecori sequeyani, nojori cuaara poonijionuura, nojori panishano nojori jiitianu-  
ra.

<sup>13</sup> Cuarta Pueyaso pueyanaa, teyano niajanijajinijiniote maninia miijiacacuaani, majaari maninia miiniu nia tarinitianu. <sup>14</sup> Saniniuujia, cante nio naajioneeginia canaa sequesano tojiniu paniyaquiyani, nojuaja nia nishiri cantenonjoni. Majaari na rupenunonj, na caririquiniuria quenaaja. <sup>15</sup> Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

#### Pablo sequesano na naajio na tucuatasaari

<sup>16</sup> Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitaaara puetunu niajanijajanaa.

<sup>17</sup> Janiyari Pabloni. Cua saruhuatanura niajanija, janiyari tama cua juaashiquiatajaaja nio naajiyani. Nia niqiri cua naajiosano, taamuecatenonjoni. Janiyari naa puetunu cua naajioneecajanaa tucuatatquiaani, cua sesa cua naajionuta. <sup>18</sup> Pa Jiyaniijia Jesucristo cuaara cumaquiiria puetunu niajanijajanaa. Cuaara naa qui-  
riatej.

# 1 TIMOTEO

## Pablo saruhatasacari Timoteo

<sup>1</sup> Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojori nio nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. <sup>2</sup> Timoteonaa, janiyari nio naajiya quiarani. Quiaari juhua quianura quiquiaari, Pueyaso pueyanora quia jatanuucua, quia niquiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuaj, nojori cuara cumaquiiria quiajaniya. Nojori cuara quiocua taraajeerajuhua. Nojori cuara pueyaracaanu quioojia caji-tiirijuhua.

## Pablo sequesacari sesa niishitiojonuujuaca cuara sanaajasaaria

<sup>3</sup> Janiya jaara Macedonia jiyajiniara quiaquiaarini, janiyacuaajaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. <sup>4</sup> Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucuyocuara naajionuutasanoni. Pueya niishiriojonu-usacari pueyaracaanu cuno najuhuana casaajinia, nojori nio cunoocua juayonuujutaquiaa saaja. Saniniuujia, nojori cuara Pueyaso rupaacua niishiriojoora cutara. Nocua pa tiushacari, paari cumaquishaanutaniyani Pueyasora pa poonijionura maninia.

<sup>5</sup> Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiriia, juhua jeequesano nojori jiuujia quishacari. Seetanujuanaa Pueyasooocua nojori tiushacari, nojori cuara panitioora maja noojia macuhajenuta sesa nojori miishanojiniji. <sup>6</sup> Noojiaqueya cuno pojorijiniijioori tari tarinitiacanu tojiniu nio maninia niishitiojosano. Nojori nio cushitiquianu na pocoojonuucua, na nacojonuucua najuhuana tama nojori niishishanojinijiaaja. <sup>7</sup> Nojori nio Moisés Rootasanojiniji niishitiojonaara quiniu paniya juucua. Majaari quenaaja nojori niishiniu tama nojori sequesanojuaaja, nojori shiniujiushacari pueya, pueya tojiniuria najuhuana capa nojori niishitiojosano.

<sup>8</sup> Paacuajaari niishiyani, Pueyaso rootasano Moisésni, cunoori maniacuaaja, paa jaara niishirini casaara naa Pueyaso rootaquiaari pa supuetanaani. <sup>9</sup> Paacuajaari niishiyani, Moisés Rootasanoori maja na pueretenu maninia miijica pueya cutara. Pueyasoori maja na rootasano na niishitiniu quiquiaari maninia miijicara. Na niishitiquiaari cutaraari na tojitiaashijiacara, tama na panishanojuaaja miijicara, Pueyaso soojeacarajuhua, sesa miijacaranio. Moisés Rootasanoori Pueyaso rerequetecacara, Pueyaso casaa rerequetecacarajuhua, noo pojoririjuhua, tama na que tacartaja monutej, na nucuanio, pueya puecoojuacarajuhua. <sup>10</sup> Moisés Rootasanoori na camishoo maajipohua numuetucunujuacara, maajishuriuhua, na numuetucunujuacaranio. Moisés Rootasanoori pueya nohuasenujuacara juhua casami na niquitiojosocoriquiano tamasaca seyara; sapojonujuacarajuhua; na sapojonuta na sequesano maatejacaranio, nocua na tiushaanura; puetunu noo pojoririjanaanio, maninia niishitiojosano tojiyashijiacatej. <sup>11</sup> Cuno maninia niishitiojosanoni, cunocuaajaari cua pohuatasano Jesucristo rupaajiniiji, pueya jatanura Pueyaso pueyara. Pueyasoori jiyanoohua maninia, cuno rupaa pohuatanara na jiyatenuucua janiya.

## Pablo shuquiritasacari Pueyaso, na rupaa pohuatanara na jiyatenuucua nojuaja

<sup>12</sup> Pa Jiyaniijia Jesucristoori cucua tiuuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, "paacarasho". <sup>13</sup> Tariucuaaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijuhuaj, nocua tiuujiaca cua miitiasacari. Janiyari jiyanoohua na paracaaja quiquiaarijuhuaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacariija.

<sup>14</sup> Naa cucua na taraajenuucatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujiaca cua quiniuria, panijia cua quiniuriajuhuaj.

<sup>15</sup> Timoteonaa, niioori seetanujuanaa. Puetunu pueyajanaa cuara niishiiria nio. Cua tojiri. Jesucristoori mijiria niquiaari na Que Pueyaso na jiyanootiniuria sesa miijica. Janiyacuajaari tojetaarucujanaa cuno sesa miijica pueyajiniijio na jiyanooshanoni.

<sup>16</sup> Janiyari naa jiyanooshaaquiaarini puetunu pueyajanaa niishiniuria taa jiyanoohua jiyanoote Jesu-

crisoni, pueyaracaanu na rejeretanuucua cua juaaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuaara niishiiria, nojoriiri na naata jiyanooshaanu-juhuaj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. <sup>17</sup> Naa jiyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari Jiyaniijiajuhuanaajaj. Nojuajaari Pueyasocuaaja, shaajeyashijia, namijiata niqiyaquishoo. [Jiyanoohua maniniaari pa Jiyaniijia! Naa seetanujuanaari!

<sup>18</sup> Timoteonaa, quiaacuajaari niishiya taa Pueyaso cumaquiquiaari quiajanuyacuajani, nera quia poonijionura. Cunoori quiquiaari Pueyaso pueya jitianaa jaara caminiuquiquiaari Pueyaso sequenu panishano quiaara, nera poonijiona quia quiniuria. Naacuajitij quiyannuaa, cua tojiri. Pueyaso cumaaca quia jiiti-asacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. <sup>19</sup> Naa quia quiri Pueyaso rupaa quia pohuatasacari, seetanujuaanaa na rupaacua tiuujia quia quishacari, seetanujuaanaa na rupaa tojjia quia quishacarijuhuaj. Naa quijia quia qiritij, quioojia mariqui quia macuhajareeri quiaa jaara sesa miiriquia. Noojiaqueya pueyari tari Pueyasocua tiuuniu tarinitiacanu nojori ruuretanuucua Pueyaso Sohuanu numootesacari nojori jiuujia-jinia, sesa nojori miishacari. <sup>20</sup> Naa miitiuquianuuri Himeneo, Alejandronio. Janiyari cunora Pueyaso secorucuaani, Pueyaso cuaara nojori tarinitiaara Satanásra, Satanás miiniuria naquiya nojori. Naacuajitij, nojori cuaara niishiiria maja socua sacuraatia nojori rimi-aquenura Pueyasocuaara.

### Secojonuunura niishitiojosano

**2** Cua tojiri Timoteonaa, niaa jaara Pueyaso secorucuaara, nia secorucuaara puetunu pueyacuara. Naa panishano casaacuara nia secorucuaara juhuaj. Naajuhuaaj, Pueyaso nia sequeriquia "paacarasho", pueyaracaanu maninia na miiniucua. <sup>2</sup> Jiya jiyaniijianucuaacuara nia secorucuaara juhuaj, puetunu pueya camarucuaacuara juhuaj. Nojoriicua nia secorucuaara, juhuaajaniya pa quiniuria panaatia, juhuaajaniya pa tojiniuria Pueyaso, maninia pa quiniuria parta pueyatajuhuaj. <sup>3</sup> Pa Jiyanoojia Pueyasoori naa paniquiaa pa secorucuaara. Naa pa secorucuaara maniniucuaquiaari. <sup>4</sup> Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijia nojori quiniuriajuhuaj. <sup>5</sup> Pa Que Pueyasoori niquiriyatujua. Majaari tamonu Pueyaso quiniu socua. Naajuhuaaj, niquiriyatujua pueyanoori quia Pueyaso jiyanootijia pueya. Nojuajaari Jesucristocuaaja. <sup>6</sup> Puetunu pueyajanaa quishacari sanitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacuajitij, na Que Pueyasoori na naata jiyanooni pa-janiya saniniuujia. Quiarijiaacuajaari Pueyaso pan-

ishacari Neyanujiniji pohuatasaanura pueya niquiara, nojori jiyanooshaanura. <sup>7</sup> Nio rupaa cua pohuatanurajujuaj, Pueyasocuaara cua jiyatequiaari Jesucristojiniji pohuataa cua quiniuria. Cua jiyaramiquiquiaari-iri taucuaca cua niishitiniuria Jesucristoocua nojori tiuuniuria, seetanu rupaajanaa nojori niishitiniuriajuhuaj. Nio cua sequesanoori seetanujuanaa. Majaari cua sapo-jonu.

<sup>8</sup> Cunora, cua tojiri. Janiyari paniyani puetunu tiquiyacuajanaa pueya secorucuaara Pueyaso. Jiyocua-cuanu nojori shiitiosacari nojori juaashiquia nojori secorucuaara, nojori jiuujia cuaara quiri jeequesano sesa nojori miishanojiniji. Naajuhuaaj, cuaara quiaquiri najiquitishano, maja sesa niishiriojonutajuhuaaj. <sup>9</sup> Naajuhuaaj, janiyani paniyani maajipohua cuaara cushiyaquiri puera maniniquiya toqueya, narta maajipohua na shocotanura. Cuaara cushiyaquiri cararaatia niquishano toqueyajujuaj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiri nojoriiri seetanujuanaa shanohua niquishano, nojori muecaca jeeacasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushitanuucua queraatia cumaneecata masesano noturu shipinijosano sai tiujiau, queraatia cumaneecata masesano maniniquiya toqueyano? Maja. <sup>10</sup> Nojori cuaara maniniucuaara quia cutara, maninia miijia maajipohua nojori quiniucua. Nojori cuaara quiri juhua noo maajipohua, canapuetucuaaja tama nojori cuaqueyajaaja jiyatecanu Pueyasora na quiniuria seetanujuanaa.

<sup>11</sup> Pueyaso rupaa niishitiojosacari, maajipohua cuaara tojitiariquia sanaa, maja Pueyaso rupaa pohuataanaa na rejetenuta. <sup>12</sup> Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuaaj, majaari cua shanacunu maajipohua jiyatesaanura narta Pueyaso pueya jitianaa na quiniuria. Nojori cuaara sanaa tojitiariquia cutara, narta Pueyaso pueya rerejosacari. <sup>13</sup> Quia niishiri Timoteonaa, casaara naa cua sequyani. Pueyasocuaajaari coteenu Adán shipiniquiaari. Na nuhuaji Adán niquiorano Eva shipiniquiaari. <sup>14</sup> Quia niishirijuhuaaj, Soconurano jaara sapojoquiaari Evatej, majaari na sapojonu quiquiaari neyaca Adán. Eva cutaraari sapojosaaquiaari. Naacuajitij, na sapojosaaanuucua, Evaari Pueyaso tojiyashijia quiquiaari. <sup>15</sup> Naaratej, maajipohua cuaara maninia canashitijioora necohua. Cuaara panijia quiri juhuaj. Cuaara maninia miijia quiri juhuaj, maninia niishiriojuuca nojori quishacari. Naa maajipohua miishacari, Pueyasoori nojori jitianutaniya maninia, Jesucristoocua tiuujia nojori quishacari.

### Pueyaso pueya jitianatucua taamueca pueyano quiriqiani

**3** Nio sequesanoori seetanujuanaa: cante Pueyaso pueya jitianara quiniu paniyani, nojuajaari

maninia poonijiosano miiniuucua jiaatiaa. <sup>2</sup> Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niquijoteyashijia, maninia niishiriojuajuhua, pueya rerequeteyaquishoonio. Cuaara quiiria maninia pueyano, rucojuaca pueya tiuquinitiaja na tiajinia. Cuaara quiiria Pueyaso rupaa niishitiojojua maninia. <sup>3</sup> Naajuhua, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya rihuaneyashijia, pueya juaashacari nojuaja. Cuaara quiiria shiniquiajuhuaj. Cuaara cumaneecaacua jiaatiaashijia quiiriajuhuaj. <sup>4</sup> Naajuhua, nojuaja cuaara na tiajinia quiniaa jiitiaja quiiria maninia. Cuaara necohua niishitiojojua quiiria maniniajuhuaj, tojitiajaca nojori quiniuria, pueya rerequeteyashijiacanio. <sup>5</sup> Naacuajitij, pueyano jaara maninia casaa necohua niishitiojiyashijia qiriquia, ¿maatucua taa maninia jiitariquia Pueyaso pueya maanuni? <sup>6</sup> Naajuhua, Pueyaso pueya maanu jitiariquiano cuaara quiiria seetanujuanaa Pueyaso tojijia pueyano cutara. Cuaara quiyaquiiria shusha Pueyasooocua tiuunio pueyano, nojuaja mariqui jiyaniiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajini, nojuajaari cocuaatia miya taa Satanás miiquiaaricuaani. Pueyaso panishano seru Satanás quishacarijia, nojuacuajaari taanuusaquiaari Pueyaso shuriucujia, na jyanishacari nojuaja na naata na Jiyaniijia Pueyaso shocotanu. <sup>7</sup> Naajuhua, Pueyaso pueya maanu jitiariquiano cuaara quiiria maninia miijia pueyano, Jesuucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiriritij, nojuajaari juhua Sesaaca norijiosano quiniutianiya. Naacuajitij, pueya tojiyaquishano quiniutianiya.

### **Narta Pueyaso pueya naacunaatucua taamueca pueya qiriqiani**

<sup>8</sup> Naajuhua, parta Pueyaso pueya naacuna cuaara quiiria tojishano pueya, rerequetesoo. Cuaara quiiria na sequesano miijia. Cuaara quiyaquiiria puera mashaca jereca ratunuucua jitiinio. Cuaara quiiria cumaneecaacua jiaatiaashijia, jiyasohuaja na nohuasejonura, na sapojonuta na masenurano. <sup>9</sup> Naajuhua, nojori cuaara seetanujuanaa Pueyaso rupaa tojijia quiiria, teyanooocua tiuujiaca pa quiyacuajani. Naacuajitij, nojori jaara naa miijia quiriritij, ¿nojoritiucua casaacua cararosaariquiani? <sup>10</sup> Cunora, pueya cuaara senota jiyateyaquishaaria Pueyaso pueya naacuna nojori quiniuria. Cuaara coteenu maninia niishishiiria nojori seetanujuanaa Pueyaso tojitiajaca. Nojori jaara maninia miijia pueya quiri, na nuhuaji cutara, nojori cuaara jiyatesaaria narta Pueyaso pueya naacuna nojori quiniuria. <sup>11</sup> Naajuhua, Pueyaso pueya naacuna niquiocohua cuaara quiiria tojishano maajipohua, maja rimiaacaturu. Cuaara quiiria niishiriojojua, na sequesano miijia pueyaracaanunio. <sup>12</sup> Cante

Pueyaso pueya naacunaani, nojori cuaara jiitiaara saa niquiriyatu niquiocuaja. Cuaara quiiria necohua niishitiojojua maninia casaa, na tojitiajaca necohua quiniuria. Naajuhua, cuaara quiiria maninia jiitiaja na tiajinia quiniaa pueya. <sup>13</sup> Naacuajitij, Pueyaso pueya naacuna jaara maninia poonijioquia na naacusacari narta Pueyaso pueya, nojori seetanujuanaa pueya tojishano pueya quiniutianiya. Naajuhua, nojori socua jiyanohua Jesucristooocua tiuujiacara jatanutaniya, na puereyaquiniutia nojori poonijionura pa Jiyaniijia.

### **Jesucristojini Pueyaso niishitishano pueyani, paari nocua tiuujiacani**

<sup>14</sup> Timoteonaa, janiyari quiocua naquerejiyani. Naajaa, janiyari quiara naajia nioni. Naacuajitij, janiya jaara tarishirini, janiyari paniani juhuacarijia quia niishiniuria taa quijia quia quiniutianiya, Pueyaso pueya maanujinia quia quishacari. Pueyaso pueya maanucujaari pueyaracaanu rishijia Pueyaso quiquio. Na saquirojosano pueya nojori quiniuucua, nojori na rupaa jiitianaacuaja, nocuaji tacunaajaarihuaj. <sup>16</sup> Seetanujuanaa nocuaji jiuujiatesanoori Pueyaso niishitishano Jesucristojini pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupenua pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhua, Pueyaso seyacuajaari Jesu niquiquiaari na samiitiasacarihua. Nojuajiniiri pohuatasaaquiaari Judiocuaca niquiara, taucua niquiarajuhua. Pueya-pueeri nocua tiuuquiaari. Na Queeri na tacaniquiaarihua Jiyaniijiajanaa na quiniuria.

### **Pueyaso Rupaa carteriquiano pueyajini pohuatasano**

**4** Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojiniu, tamaatia niishitiojosano nojori tojiniuucua. Nojori seetanujuanaa sapojosaanutaniya na nojori tojiniuucua samaruhua niishishano. <sup>2</sup> Nojori sapojonuucua pueya tojitiajaca quiniutianiya, noo pojori, sapuenu juhua maninia niquishano pueyatej. Cuno sapojonuucuaari tariucua sesa miiniuucua jitiqionio. Majaari tari na niishitiniu caririquiniu. <sup>3</sup> Cuno pojori pueya niishitiojojua maja na caminiuria. Niishitiojonuuquiaajarihuaj maja pueya miaquenura noojiaqueya miaquesanojuhuaj, teyano Pueyaso shipiniquiaari Jesuucua tiuujiacaracujani, cante seetanu rupaaajanaa niishijiacacujani. Cuno miaquesanocujaari pa timitiasocoriquiano, Pueyaso pa sequenura, "paacarasho". <sup>4</sup> Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaquenu, paa jaara coteenu nocua Pueyaso sequerenu, "paacarasho". <sup>5</sup> Pueyaso rupaacua tiuujiaca pa quishacari, naacuajitij, nocua pa secojosacari, Pueyasoori na jiyatequiaa maninia na quiniuria pajaniya.

**Jesucristora poonijiona pueyanotucua taamueca pueyano quiriquiani**

<sup>6</sup> Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhua, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojaaja rootasanotanio, taa quia toji quiaacuajanoj. Quiaa jaara naa miijia quiriritij, quiaari maninia poonijiona quiniutianiya Jesucristora.

<sup>7</sup> Majaari najuhuaana tariucuacaanu supuetanaa pohuatanuusano tojijia quia quiniu, najuhuaana tama pueya niishishanojuajanio. Majaari cuno tojiniuucua quia cojenu najuhuanaj. Jiyanoehua quia jiaatiare cutara, saaja Pueyaso tojijia quia quiniuria. Naa miiniu quia saniniujiuri jiyanoehua, seetanujuanaa Pueyaso panijia quia quiniuria. <sup>8</sup> Pueyari queraatia casaa miiniu niishiya, cumueeca pueya nojori quiniuria. Supuetanaari pueyaracaanu nanoojoquiaari na cuaqueya na jiyartuutenura, cumueeca na quiniuria. Cunoori maniniacuaja pa cuaqueyara, mijiria pa quishacari. Saniniuuujia, socua jiyanoehua maninia cutaraari Pueyaso panijia pa quiniuria seetanujuanaa. Cunoori jiyanoehua maninia, mijiria pa quishacariria, Pueyaso shuriucua pa quishacaririjuhua. <sup>9</sup> Nio cua sequesanoori seetanujuanaa. Puetunu pueyajanaa cuaara na tojiiria. <sup>10</sup> Cunora, pueya jaara pa miitariquia, naajaa, paari jiyanoehua poonijioquiaa pueya pa tojitiniuria Pueyaso rupaani. Majaari naa miiniu pa tarinitianu. Paacuajaari niishiyani, paari pueyaracaanu rishijia Pueyasooocua tiuyani. Nojuacuajaari puetunu pueyacuaji Tacunajanaa, canapue cutarate nocua tiuujiacuajani.

<sup>11</sup> Nio cua sequesano quiajaniya quia niishitiojore pueya. Nojori quia nacasuriquia jiyanoehua, na tojitianura quiajaniya. <sup>12</sup> Majaari pueya shanacunu quiocua, nojori rerequetenura quiajaniya, mashaja quia quiniuucua. Saniya maninia quijia quia quiriquia cutara, pueya jiaatianura quiocua, juhua quiajaniya nojori quiniu paniniurijuhua. Naaratej, tama quia cuaqueyajaaja quia cojuare, taa quia pocuaani, taa quia quiyani. Naajuhua, seetanujuanaa panijia quia quiri, Pueyaso rupaacua tiuujiujuhua. Majaari rucuaajejojua quia quiniu. Naa maninia miijia quia quiri, pueya jiaatianura quiocua. <sup>13</sup> Naacuajitij, cua tiuquiyaquishacarijia quiocua, pueya niqiuara maatia quia serojoriquia Pueyaso Rupaa. Parta Pueyaso pueya quia nacasuriquia jiyanoehua, Pueyaso tojitiajaca nojori quiniuhua seetanujuanaa. Seetanujuanaa nojori quia niishitiojoriquia maninia. <sup>14</sup> Pueyasocuaajaari na cumaaca niquitioquiaari quiajaniya. Pueyaso Sohuanucuaajaari naa pohuatequiaari Pueyaso pueya maanu jitianaa pueyatej, nojori jaara niojoquiaari na juaashiquia quiocua, quia jiyatesaanura Pueyasora poonijiona quia quiniuria. Cuno cumaaca quiaa na jitiaani, quia poonijiotere pueyaracaanu. Majaari najuhuaana na jitianu.

<sup>15</sup> Puetunu niya cua rootasanojuanaa quiajaniyani, cuno tojijia quia quiriquia. Naa quia quiriritij, puetunu

pueyajanaa niquiniuria taa seetanujuanaa socua maninia Pueyaso tojijia quia quiyareeni. <sup>16</sup> Naacuajitij, tama quioojiaaja quia cojuare. Naajuhua, tama quia cuaqueyajaaja quia cojuare seetanu rupaajanaa quia niishitiojonura pueya. Majaari quia tarinitianu miiniu cua sequesano quiajaniya. Naacuajitij, quiaa jaara naa maninia miijia quiri, quiaari tama quia cuaqueyajaaja jiyateya maninia Pueyaso pueyanora. Quia tojitiajaca pueyari Pueyaso pueyara quiniutianiyajuhua.

**Paatucua taa jiitariquia parta Pueyaso pueyani**

<sup>5</sup> Majaari quia saaquiapue quia nacasunu quia juaaniutia, Pueyaso rupaa nojori tojiyaquiniuucua. Nojori quia nacasura jacaria, juhua quia que. Mashiquiori quia nacasura jacarijuhua, juhua quia tapueyocua. <sup>2</sup> Naajuhua, motajoori quia nacasura juhua quia nucua. Niyacoojori quia nacasura juhua quia rimiatuhuaajuhua, maja nojoriicua quia jiaatianuta.

<sup>3</sup> Mashiquiopue jaara tojetaarucuajanaa niquiohuaju quiri, jianianuhuajunio, Pueyaso pueya cuaara nojori naacuura. <sup>4</sup> Saniniuuujia, mashiquio jaara niquiohuaraca quiriquia, jianianuhuaraca soj, cuno pojori cuaara cootenu tama na nucuaajaaja cojuatunu niishiiria, na jiiuhua. Naacuajitij, necohua cuaara na queya cojuara, taa na queya cojuaquiaari nojoricuaani, naatujoori nojori quishacari. Pueyasoori naa na queyacuara taraajejaca timitiaja. <sup>5</sup> Noo mashiquio, cante seetanujuanaa jiyopueejuni, nojuajaari saaja Pueyasooocua tiuuquiaa. Majaari na tarinitianu secojonu juuca, niucuanio. <sup>6</sup> Noo mashiquio saniniuuujia, tama na cuaqueyajaaja shuquiritijatej, nojuajaari tariucua juhua macu Pueyasora, saminio na quishacarijia. <sup>7</sup> Parta Pueyaso pueya quia niishitiojore nio cua rootasanojuhua, sesacasoo nojori quiniuria. <sup>8</sup> Canapueete na queecua, na nucuaacua taraajejaquijiani, tama na tiajinia quijia pueyacuajuhua, naa miijiacatej, nojoriiri Pueyaso Rupaa tojiyashijiacara jiyaterohua tari tama nojori cuaqueyajaaja. Naacuajitij, nojoriiri socua tojetaarucuajanaa sesa, Pueyasooocua tiuyaquijia pueyajiniji.

<sup>9</sup> Mashiquio jaara Pueyaso pueya jitianaa naacunara jiyatenu panishaare, cuno mashiquiopue cuaara quiri tariucua sesenta marijia shocotejono. Cuaara quiri noo mashiquio, cante saaja na camishano pueyanota quiquiaari maninia pueyaracaanuni. <sup>10</sup> Cuno mashiquio cuaara niishishano maaji quiri, maninia miijia na quiniuucua. Cuaara quiriujuhua, cante maninia canashitijioquiaari necohuani. Cuaara rucoojuacaacua taraajeja quiriujuhua, na tiajinia na maquiojojua. Cuaara maninia miijia quiriujuhua, narta Pueyaso pueya niohuaca jeequejojua. Cuaara taraatia miishano pueyacuara taraajeja quiriujuhua, nojori cumanijianajuhua. Cuaara puetunu maninia na miiniujiana tarinitiaaquijia quiriujuhua.

<sup>11</sup> Saniniuuujia, noo mashiquio, teyanote juhuanuojua maja na shocotejonu sesenta marijiani, nojori cuaara jiyateyaquishaaria Pueyaso pueya jitianaa naacu-naara. Nojori na naata Cristo samiritianu, niyacaaniuu-

cua nojori jiaatiasacari. <sup>12</sup> Naacuajitij, nojori camishacariuhua, nojoriiri tari sesa miirii, nojori jatenucua nojori sequesano saaja Jesucristora na poonijionura. <sup>13</sup> Naajuhuj, niyacoo naata mashiquio nojori quishacarijia, nojoriiri saaja rucuanenon maniniucua, na tiuquiiionura puetunu tiacojuanaa. Naa tama na poonijosanojuaaja na jiitiaaquishacarijij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasacaraj. Naajuhuj, sacuaraatia neteyocoyari juhua paateca, na taajetenura pueya, na caminiujiushacari jiyasohuaja niishishano casaa. <sup>14</sup> Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara mueturajuhuj. Cuaara na tia camarucua quiquiora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. <sup>15</sup> Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojijiaa nojori quiniuria saniniuujia.

<sup>16</sup> Pa Jiyaniijiaacua tiuujiaa maajipohuajinijinio jaara tama na pueyajinijiojuaaja jiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapueete tojetaarucujanaa jiyopueejuni.

<sup>17</sup> Pueyaso pueya jiitianaa, noo pojori canapueete maninia jiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuj, nojori cuaara nareja niqitiosaaria, na panishano nojori jiitianura. Pueyaso pueya maanu jiitianaajinijinio, canapueete Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niqitiosaaria, maninia poonijosano nojori miiniucua. <sup>18</sup> Tariucuaaanu Pueyaso Rupaajinia naajio-tasanoori naa niishitiojiyajuhuj, naa na sequesacari miriqui:

“Majaari quia juunu rupaa mishiquionu na miaqueyaquiniuria quia casaa, quia rapijotesacari quia natau, na jocuanura na sucujajiniji”.

Naa sequeyajaariuhuj:

“Poonijotesano pueyano cuaara niqitiosaaria na poonijionu sami”.

<sup>19</sup> Pueyano jaara saquirojotariquia Pueyaso pueya maanu jiitianaacuara, majaari na tojiniu, jaara nocuara cojitiaaquiri saquirojotanu. Querajaa pueya jaara nocuara cojitiare saquirojotanu, cunoojori sequesano cutaraari seetanujuanaa. <sup>20</sup> Naacuajitij, Pueyaso pueya maanu jiitianaajinijinio jaara sesa miiriquia, Pueyaso pueya maanu niqiara quia nacasurenoj, puetunu narta Pueyaso pueyajanaa puerenura, maja sesa nojori miiniurajuhuj. <sup>21</sup> Timoteonaa, janiyari nio quia sequeya Pueyaso niqiarani, Jesucristo niqiarajuhuj, na saquirojosano seya niqiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa

maninia pa niishiyaquishacari na miishano. Naajuhuj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijionu sacuaraatia. <sup>22</sup> Naajuhuj, majaari senota quia juaashiquia quia nianu quia niishishoo pueyanoocua, nojuaja quia jiyatenura Pueyaso pueya jiitianara. Maninia cutaraari coteenu quia niishiniuria taamueca pueyanotenonjoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej, Pueyasoori quiocua tiuutianutaniya cunoojori miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

<sup>23</sup> Timoteonaa, naa quia seeco nojonuucuatej, majaari saaja mohuaca ratunu. Sequeyarucua cusosu quia caminiuucua, secaya vino quia raturiquiajuhuaj quia jiniacuma na jeecanura.

<sup>24</sup> Noojiaqueya pueya, sesa nojori miishanoori maatia niishishanocuaaja, Pueyaso saniitionu juuca quiaquishacarijia. Tamasacara saniniuujia, sesa nojori miishanoori maja na niishishaanu quiniutianiya juhuanouaja, Pueyaso cuaara nojori nuuatejore na tacojijiaatijia, na nequesoresocoriquiano. <sup>25</sup> Naajaariuhuj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatiajuhuaj.

**6** Parta Pueyaso pueyajinijinio, canapueete poonijotesano pueyani, nojori cuaara na camarucua tojitiaaja quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniucua. <sup>2</sup> Poonijotesano pueyano camarnu jaara Pueyaso pueyano quiriquia, juhua na serujuhuj, na seru cuaara na tojijia quiiria. Cuaara na rerequeteja quiaquiiria, narta Pueyaso pueyano na camarnu quiniucua. Nojuaja cuaara seetanujuanaa maninia poonijioora nera, na niishishacari na camarnucujaaari narta panishano Pueyaso pueyano.

#### Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuj. <sup>3</sup> Tamonu jaara tamaatia niishitiojoriquia quia niishitiojosanojiniji, nojuajaari tojetaarucujanaa moseca. Pa Jiyaniijia Jesucristo rupaari jyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. <sup>4</sup> Cante cunoojori niishitiojosano ruuretaja tama na niishishanojuaaja na niishitiojonurani, nojuajaari tama na cuaqueyajaaja jiyaniya nojuaja niishijia cutara. Nojuajaari juaatooonu porocujuhuj, Pueyaso rootasanojiniji na taacanusacari. Naa quijiaa pueya quishacarijij, nojoriiri juajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetoquiaa na juayonuutanura. Sesacatoquiaaariuhuj. Naajuhuj, nojoriiri najuhua soquequiaa, narta Pueyaso pueya naasucua sesa miiquiaa. <sup>5</sup> Nojori-

iri juayonuujutanu tarinitiaaquijiaca. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiitijacara quiniu paniya, nojori jiyani- ishacari nojoriiri naacuaji jiyanoehua casamiriacara quiniutianiya. <sup>6</sup> Taaquiriirinij, Pueyasooocua tiuujiaca pa quishacari, paacuaaquinatejaj seetanujuanaa juhua queraatia casamiriaca quijiicani. Paacuajaari shuquiri- aatia quijiaca Pueyaso rupaacua tiuujiaca pa quishacarini, juhujaniya quijiaca pa quishacarijuhuaj pa jitiiasano casaaniyojuata. <sup>7</sup> Paacuajaari juhua- sunucua roosaaquiaari mijiriani. Naajuhuj, paari juhuaasunucua tacateriquianohuani. <sup>8</sup> Naaratej, paa jaara pa miaquesocoriquiano jiitiariquiani, paa jaara pa cushishocoriquiano jiitiariquiajuhuaj, saa cunotaja shuquiriaatia pa quiri. <sup>9</sup> Saniniuuja, noo pojori, jiyanoehua casamiriaca quiniucua jiaatijacatej, nojori- iri maja na niishiniu rejetenu, na panishano na miyaquiniuria. Naacuajitij, nojoriiri cocuaatia miiquiaa. Nojoriiri juhua norijosaaquiaa, najuhuaana casamiicua nojori jiaatiasacari, sesa casaacuanio. Puetunu cuno sesa casaajanaari pueya sesoquiaa, nojori saniitiosaa- nura taraatia. <sup>10</sup> Cumaneeacaacua jiaatianu jiyanoehuani, cuniquiji supuejaari puetunu sesa casaa pa miiniuria- janaa. Naacuajitij, noojiaqueya parta Pueyaso pueya- jinijinooori Pueyaso rupaa tojinu tarinitiacanu tari. No- joriiri tama nojori cuaqueyajaaja miitiquiaa naquiya, naa cumaneecaacua jiaatijaca nojori quishacari. Naaratej Timoteonaa, majaari cumaneecaacua jiaatia- ja quia quiniu.

#### **Pablo shiniujiushacari Timoteo, Pueyaso tojjia na quiniuria pueyaracaanu**

<sup>11</sup> Quiajaniya Timoteonaa, quiaacuajaari Pueyaso saquiriojosano pueyano. Naaratej, puetunu sesa casaajanaa miyashijia quia quiri. Tojetaarucujanaa saaja maninia miiija quia quiri, juhua pa Jiyaniijiaja. Pueyasooocua tiuuja quia quiri socua. Socua panijia quia quiri juhuaj. Puetunu casaajanaa rejeretaja quia quiri juhuaj. Jacaria pocuaja quia quiri juhuaj, maja pueya rerequeteja. <sup>12</sup> Pa paraca nujuataja quia quiri quia, jiyanoehua quia tiuuniutia Pueyaso rupaacua. Pueyasocuajaari quia saquiriojoquiaari na pueyano quia quiniuria. Cunora, quiaari queraatia pueya niqiara pahuataquiaari Jesucristooocua quia tiuuniu- jiniji. Naa pueyaracaanu rishijiarano quia quishacari, cunora, majaari Pueyaso niqutiojonu panishano quia- janiya jaaretenu. <sup>13</sup> Quiaacuajaari niishiya taa Jesu- cristo seetanujuanaa pahuataquiaari Poncio Pilato niqiaracuajani, nojuajaari seetanujuanaa Pueyaso Niyanu. Naajaa, nojuajaari niishiquiaari nojuajaari cunora mosaanutaniya. Na Que Pueyasocuajaari na samiitiani quiaariuhua. Pueyasocuajaari saminiara jiy- ateja puetunu saminio casaajanaa. Naa quia ni- ishishacari Timoteonaa, janiyari nio quia sequeya Pueyaso niqiarani, pa Jiyaniijia niqiarajuhuj. Cua to-

jiri. <sup>14</sup> Puetunu cua rootasano quiajaniyajanaa quia to- jiri. Majaari na jataniniu quenaaja, pa Jiyaniijia mariqui quia niishitiojosano tamacareeri. Taa cua rootaa quia- janiyacujani, na tojjia quia quiri pueyaracaanu, pa Jiyaniijia Jesucristo cuaara tiuquiriohuajaatijia, Jiyaniijia- ajanaa na quiniuria. <sup>15</sup> Na Que Pueyasoori na tiuqui- tiniutianiya na panishacari, taa na sequequiaaricua- jani. Pueyasocuajaari jiyanoehua pa timitiasano, saaja maninia na quiniucua. Nojuajaari Jiyaniijia. Noju- jaari puetunu tamasa Jiyaniijianucujanaa Jiyaniijia. Nojuajaari camarucujiniji Camarnujuanaa cutara. <sup>16</sup> Saaja nojuajaari pueyaracaanu quiji juhuanaajaj. Ma- jaari na supueni quiquiaari. Majaari na shaajenu quiniutianijuhuj. Nojuajaari jiyanoehua na shacantu- uca cumaacajinia quiji juhuanaajaj. Cunora, majaari quenaaja tamonu pueyano na naata nocua cate- canonu. ¿Canteeri na niqiquiaari quenaajani? Shaajui. Pueyanoori maja na naata na niqiniu. [No- juaja cuara pueyaracaanu timitiasaaria! [Nojuajaari namitia na cumaaca jiitianajuhuanajaj! Cuaara naa quiri pueyaracaanutej.

<sup>17</sup> Timoteonaa, parta Pueyaso pueya quia tojtiri nio, noo pojori, queraatia casamiriacatej. Nojori cuaara ni- ishiria maja pueya shocotejaca nojori quiniuria, casamiriaca nojori quiniucua. Nojori cuaara niishiiria- juhuaj, maja na casamiicua nojori tiuuniuria, nojori jiyaniishacari nojoriiri pueyaracaanu shuquiriaatia qui- jiaca quiniutianiya casamiriaca nojori quiniucua. Pa ji- itiasano casamiiri shaajeriquiano. Nojori cuaara Pueyasooocua tiuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. <sup>18</sup> Cunora, nojori quia niishi- tiojore, pueyaracaanu maninia miiijaca nojori quini- uria. Naatej, taa queraatia casamiriacatucuaa nojorini, maninia nojori miishano cuaara naa queraatia quiri- juhuaj. Nojori cuaara ritia niqutiojojuaca quiri nojori jiitiasanojiniji, narta Pueyaso pueyano jiitiaaquishacari na panishano. <sup>19</sup> Naa capora nojori quishacari, no- joriiri juhua tari jiyocuacaanu racataa nojori casaa. Naacuajitij, nojoriiri seetanujuanaa shuquiriaatia quiji- aca quiniutianiya pueyaracaanu, mijiria, jiyocuacaa- nunio.

#### **Pablo rootasano Timoteo, naajionu na tucuatascari**

<sup>20</sup> Timoteonaa, Pueyasocuajaari quia jiyatequiaari na rupaajiniji pahuatana quia quiniuria. Maninia quia co- juare seetanu Pueyaso rupaajanaa. Majaari najuhuaana tama pueya niishitiojosanojuaaja tojjia quia quiniu. Noo niishishanojuhuaj, pueya sequesano: “Seetanu ni- ishijajanaa niishishano cutaratej”, majaari cuno to- jiniu. Cuno niishishanoori seetanu niishishanojuanaa paraca, najuhuaanaari. <sup>21</sup> Noojiaqueya parta Pueyaso pueyari Pueyaso rupaa tojinu tarinitiacanu tari, cuno najuhuaana niishishanoocua nojori tiuuniucua. Nio- juanaa Timoteonaa.

Pa Jiyaniijia cuaara quia cumaquiriia.



## 2 TIMOTEO

### Pablo saruhuatasacari Timoteo

**1** Janiyari Pabloni, Jesucristo jiyaramiquishano, taa Pueyaso paniquiaaricuajani. Naacujitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. <sup>2</sup> Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuj, nojori cuara cumaquiiria quiajaniya. Naajuhuj, nojori cuara taraajeera quiocua, nojori cuara pueyaracaanu quioojia cajitiirijuhuj shuquiriaatia quia quiniuria.

### Jesucristojiniji quia pohuatariquia tamasaca

<sup>3</sup> Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjia quia quiniucua, janiyari Pueyaso sequequiaani, "paacarasho". Janiyari nera shitimia poonijioquiaa coojia najiquitishooni, taa pa supuetanaa tojitiaquiaari Pueyasocuaani. <sup>4</sup> Majaari cua niyajetanu quiquiaa quia nujuquenu cucua, janiya jaara quia shuriucuaji quiaquiaarini. Janiyari cunora jiyanohua jiaatiaa cua niqiniuria quiajaniyani, shuquiriaatia cua quiniuria quia shuriucua. <sup>5</sup> Janiyacuajaari niishiyani quiaari seetanujuanaa pa Jiyaniijiaacua tiuujacuaja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaa quiquiaari. Majaari cua taacuanunu quiaari seetanujuanaa Jesucristoocua tiuujia quiquiaajuhuj, taa nojori quiquiaaricuaani.

<sup>6</sup> Pueyasocuaajaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quiocua. Naacujitij, quiaacuajaari Pueyaso Sohuanu cumaacaraca quioojiajania. Naaratej, Pueyaso Sohuanu quia shanacure quiocua, na cumaa na poonijiotenura socua quioojiajania. <sup>7</sup> Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniuriajuhuaj, maninia niishiriojojuacarano. <sup>8</sup> Naacujitij, majaari quia caririquiniu pa Jiyaniijia Jesucristojiniji quia poojotanura. Naajuhuj, majaari cua naaqui quia caririquiniu, nujuatejojuajinia cua nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuaj, Jesucristojiniji quia pohuatasacari. <sup>9</sup> Pueyasocuaajaari pa

jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pa-janiyani, majaari na quiniu quiquiaari maninia miijiaa pa quiniucua juucua. Maja. Nojuacuajaari naa pa jiyanooquiaari saaja naa na miiniu paniniucua, jiyanoojia na quiniucuaajuhuj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. <sup>10</sup> Quiari naataja pocuaji Tacuna Jesucristo niniucua, Pueyasoori pa niishitiquiaari taate na naata jiyanooni pajaniyani. Cunora, Jesucristoori pa niti cusoquiaari. Na samiitiasacarihua, nojuajaari cusonu shocotaquiaari. Naacujitij, nocua pa tiuushacari, paari pueyaracaanu rishijiaa jiyatesaanutaniyani.

<sup>11</sup> Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. <sup>12</sup> Naacujitij, janiyari niya naquiya miya nujuatejojuajiniani. Naajaa, majaari cua caririquiniu. Janiyacuajaari niishiyani canaacua cua tiuquiarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacarihua pocua.

<sup>13</sup> Timoteonaa, maninia niishitiojosano tojjia quia quiriquia taa cua niishitiojoquiaari quiajaniyacuajani. Naa quia miiriquia Pueyaso rupaacua tiuujia quia quishacari, pueya panijia quia quiniucuaajuhuj, Jesucristo rupuesano pa quiniucua. <sup>14</sup> Pueyasocuaajaari quia niishitiquiaari seetanu rupaajanaa. Pueyaso Sohuanu quiniucua poojajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

<sup>15</sup> Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamaaja. Majaari na naacutunu paniniu quiquianu janiya. Nojoriijinijioori quiquianujuhua Figelo, Hermógenes. <sup>16</sup> Saniniucua, Onesiforo cutaraari cucua tiuquitiacuanu. Cunora, pa Jiyaniijia cuara nocua taraajeera, puetunu na tijajinia quijiaacuajuhuj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuara cua riuriatarejaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. <sup>18</sup> Quiaacuajaari niishiyajuhuj taa no-

juaja naacuquiaari pajaniyacujani, Éfeso tiacajinia pa quishacari. Naa maninia na miiniucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesíforo saniniujia.

### Jesucristora poonijojua quia quiri quia puereyaquiniutia

**2** Quiajaniya saniniujia quianunaa, quioojia quia cumaquiriquia Jesucristo niqitiosano cumaacata. <sup>2</sup> Nocua tiuushano pueya quiarta Pueyaso pueyajini-jinio quia niishitiojore Pueyaso rupaa, nojori niishitiojonura tamasaca saniniujia. Cuno maninia pueya quia niishitiojore puetunu Pueyaso rupaaajanaa, taa quia tojiqiaari queraatia pueya niquiara cua pohuatasacarcicujani.

<sup>3</sup> Juhujaniya naquiya miiniu rejeretaja quia quiri quia juhua pa Jiyaniijia Jesucristo soldado, puereyashijia.

<sup>4</sup> Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiri quia juhujaj Timoteonaa. <sup>5</sup> Naajuhujaj, pueya tacuarishijosacari, nojori cuaara quiiria tacuarishijionu camarnu tojjia. Tamonu jaara shocotare na tojiyaquiniutia camarnu, cuno na shocotanuuri najuhuanaj. Naacujitij, majaari na niqitiosaanu casaa, sesa na miiniutia na shocotasacari. <sup>6</sup> Nio quia niishirijihuhuj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niqitiojonu na senoosanojiniji. <sup>7</sup> Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

<sup>8</sup> Majaari nio niyajetanu: Jesucristoori macujiniji samiitianishaaquiaruhua, Pueyaso Niyanu na quiniucua. Pueyano quiquiaarijuhuj. Nojuacuajaari pa supuetanaa jiyaniijia David niquihuacuajinio supueno pueyano quiquiaari. Naacujitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocujaaari cua pohuatasano Pueyaso Rupaa. <sup>9</sup> Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhuj, juhua sesa miijia. Naajaa, Pueyaso rupaa cutaraari maja na naata sanaajasaanu. <sup>10</sup> Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojiniuria Jesucristojiniji. Naacujitij, nojoriiri na naata nocua tiuuniu, Pueyaso pueyara nojori jiyatesaanurajuhuj, taa na jatanishano pueya pa quiyacuani. Naacujitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

<sup>11</sup> Nio sequesanoori seetanujuanaa:

Jesucristoocua pa tiuushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacujitij, Jesucristo mosaanu jaara pocuara quiquiaari, na samiitianuhuari pajaniyara quiyajuhuj, pueyaracaanu rishiriquiano pa quiniuria. <sup>12</sup> Naajuhujaj, paa jaara naquiya miitiasariquia nocua

pa tiuuniucuanu, nojuajaari camarucua pa jiyatenu-taniya narta jiyaniijianucua pa quiniuria. Saniniujia, pa jaara pa Jiyaniijia tamacariquia Pueyaso niishiyashijia pueya niquiarani, nojuajaari pa tamacanutanijuhuj. <sup>13</sup> Paa jaara na sequesano tojiyashijia quiri quiani, naajaa, nojuajaari pueyara-caanu na sequesano miijia. Pueyasoori na sequesano jataniyashijia cutara.

### Taamueca quijiate Pueyaso shuquiritasano nera poonijionani

<sup>14</sup> Parta Pueyaso pueya quia niishitiojorohuarohua maja najuhua nojori juayonuujutanura tamaatia niishitiojosanoocua. Jyanohua quia nacasure nojori Pueyaso niquiara, maja naa nojori nacojonura najuhua supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. <sup>15</sup> Tama quia cuaqueyajaaja quia cojuare, saa maninijia quia niishitiojonura Pueyasojiniji cuno seetanu rupaaajanaa. Naacujitij, Pueyasoori quia timitianutaniya nera poonijiona maniniu quia quiniucua. Majaari capa quia niishitiojonu, quiaa mariqui tamaaja caririquiriiri. <sup>16</sup> Naaratej, majaari najuhua tama mijiria pueya niishishanojuaja quia tojinu. Pueya tojishacari cuno, nojoriiri socua jiyacatenutaniya Pueyaso tojiyashijia nojori quiniuria. <sup>17</sup> Cuno najuhua niishitiojosanoori jyanohua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiacuaani, na camaru na cusojuanura. Himeneo, Filetonio, nojoriiri naa miiquioya quiarijia. <sup>18</sup> Nojoriiri seetanu rupaaajanaa jataniquianu tamaatiara. Nojoriiri pueya niishitiojiya, paanaari tari tojetaarucujanaa samiitianishanocujani. Naacujitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri nojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. <sup>19</sup> Naajaa, Pueyasojuanaacuajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuja”.

Naa naajiotasanoori quiyajuhuj:

“Canapuate pa Jiyaniijia Jesucristoocua tiuujiacani, nojori cuaara sesa na miijionu tarinitiaara”.

<sup>20</sup> Sanajanaa, cua tojiri. Jyanohua queraatia casamiriaca pueyano tiajinia, cuno tiajiniaari maja saaja orojiniji shipinijosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiaariuhua mati, suruhuatu numajiniji quejasano. Quijiaariuhua maraujiniji panishano patacocua, conaanio. Puetunu cuno casamijinijiojuanaani, nojiaqueyari racatasano saajama masu miaquetejarano quiya, na raatojotjaranonio.

Quiyajaarihua rucucuaacuaji casaa, rucucua cajitiaja. <sup>21</sup> Paari naajuhuaaj. Paa jaara tama pa cuaqueyajaaja cojuariquia tojetaarucuaajanaa sesa pa miiniuucujini, saaja pa Jiyaniijia pa quiniuriajuhuaj, naacujitij, pa naata juhua pa Jiyaniijia timitiasano tohuatashiniyojua quiniu. Naacujitij, pa Jiyaniijia na naata poonijotenu pajaniya puetunu maninia casaajanaa pa miiniuria.

<sup>22</sup> Sanajanaa, quiaacuajaari niishiya, casaa miiniuucua jiaatiajacate mashiquireini. Puetunu cuno sesa niishiriojosanojuanaa quia tarinitiariquia. Saniniuujia, saaja maninia mijia quia quiriqia. Saaja Pueyaso rupaacua tiuujia quia quiriqia, pueya panijiajuhuaj. Jiyanoojia quia quiriqiajuhuaj. Naa quia quiriqia, taa puetunu Pueyaso jiyatesano sesa miyashijia pueyanaa miiquiaacuani, pa Jiyaniijiaacua nojori tiuuniuucua. <sup>23</sup> Pueya jaara nacojojoriquia nojori niishiyaquishoo casaajini najuhanaj, nojori quia ruuretare saaja, nojori jaara quia nequesoretare cuno casaajini. Quiaacuajaari niishiya, pueyari jiyano casaacua paracaatiojua. <sup>24</sup> Pueyasora poonijojua pueyano cuaara quiaquiiira pueya paracaajia. Saniya cuaara quiiira cutara puetunu pueya panijiajanaa. Cuaara quiiirajuhua maninia niishitiojojua. Cuaara juhuajaniya rejeretaja quiiira, tamasa jaara na taajetere. <sup>25</sup> Cuaara Pueyaso rupaa tojiyashijia nacasuuar jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijia nojori quiniuria. <sup>26</sup> Naacujitij, nojoriiri maninia niishiriojojua quiniutianiya, nojori jaareteenura Sesaacacuaji, maja Sesaaca miitiniuria nojori taa na paniyacujani.

### Taa quijia mijiria quinia quiniutianiya quera jiya puequesacarini

**3** Quia niishirijuhua Timoteonaa, jiya puequenu panishacari, pueyari socua jiyacatenutaniya sesa mijiacara. <sup>2</sup> Pueyari saa tama nerajaaja niishiriojojua quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajaca quiniutianiyajuhuaaj. Naajuhuaaj, pueyari najuhua narta pueya niquiara pocuajaca quiniutianiya, na jyanishacari nojori cutara socua niishijia narta pueyajini, socua shanohua niquishano tamasaajini. Pueyari Pueyaso sesacajaca quiniutianiya, narta pueya sesacajacajuhuaaj. Pueyari na queya tojiyashijia quiniutianiya. Majaari quenaaja pueya timitianu quiniutianiya maninia na mijia. Pueyari maninia miyashijia quiniutianiya, Pueyaso-jini maninia casaa rerequetajaca nojori quiniuucua. <sup>3</sup> Naajuhuaaj, majaari quenaaja na queya panijia pueya quiniu quiniutianiya, tapueyocua, tama necohuaajanio. Pueyari tojetaarucuaajanaa jyanoyashijia quiniutianiya. Sacuaraatia rimiaacatujuri quiniutianiyajuhuaaj. Naajuhuaaj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya mijia quiniutianiya, nojoriicua na taraajeyaquiniutia.

Pueyari puetunu maninia mijiacajanaa soojeaca quiniutianiyajuhuaaj. <sup>4</sup> Pueyari tama na cojiniaaja tacartajaca quiniutianiya. Pueyari cocuaatia casaa mijia quiniutianiya, mosanucua nojori quiniuucua. Pueyari juhuajaniya quijia quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. <sup>5</sup> Pueyari sapuenu juhua Pueyaso pueya niquishaanutaniya. Naajaa, nojori miishanojinijia, maatia niishishaanutaniyari, nojoriiri Pueyaso cumaaca maseyaquiquaari seetanujanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

<sup>6</sup> Tamasaca cuno pueyajiniini, nojoriiri tiaco tiuquitiajaca, noo maajipohua na sapojonura, najuhua na pueya pahuatanoocua ritia tiuujacatej. Cuno maajipohuari tama na cuaqueya miiniu panishanojuaaja rejetejashijia. Naa sesa mijia nojori quiniuucuatej, nojoriiri najuhua tacaquiquiaa. Cunora, nojoriiri cuno sapojonuujuaca tojtiaquiaa. <sup>7</sup> Cuno maajipohuari najuhua pueyaracaanu tojtiaquiaa cuno sapojonuujuaca niishitiojosano. Saniniuujia, majaari Jesucristojini seetanu rupaajanaa niishijacara nojori quiniu quiquiaa, Pueyaso jyanooniuria nojori. <sup>8</sup> Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moisés-cuaani. Naacujitij, nojori niishitajaari juhua niishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuaara tojiyaquiiira nojori saniniuujia. Nojoricuaari Jesucristoocua tiuyashijia. <sup>9</sup> Naajaa, majaari queraatia pueya tiuuni quiniutianiya nojoriicua. Ritia niishishaanutaniyacuaari, nojoriiri seetanujanaa niishiyashijia, taa pa supuetanaa niishiquiaaricuaani cuno shimiacuriiri sapojonuujuaca.

### Pablo tucuatascari naajionu, socua rootaa Timoteori

<sup>10</sup> Timoteonaa, quiaacuajaari pueyaracaanu cua cojiquaari maninia quia niishiniuria puetunu cua niishitiojosanojuanaa. Quiaacuajaari niishiya taa mijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujanaa pa Jiyaniijiaacua tiuujia cua quiquiaarini, jacaria pocuajajuhuaaj, pueya panijianio. Quiaari niishiyajuhuaaj, majaari cojia cua najiquitiniu quijiani, pueya miishacari naquiya janiya. <sup>11</sup> Quiaari niishiyajuhuaaj taa cua miitiasaaquiaari Antioquiya tiacajiniani, Iconio tiacajinijuhuaaj, Litra tiacajiniano. Seetanujanaa, janiyari naquiya miishaaquiaarini. Naajaa, pa Jiyaniijiaari cucua taraajequaari maninia na rishitiniuria janiya. <sup>12</sup> Seetanujanaa naquiya miishaanutaniyari puetunu noo pueyanaa, tama na cuaqueyajaaja jiyatejaca saaja Jesucristo tojijia nojori quiniuriatej. <sup>13</sup> Saniniuujia, sesa mijia pueya, sapojonuujuacanio, nojoriiri socua sesa miiniuria jiyacatenutaniya. Nojori sapojonu-

usacari tamasaca, nojoriiri naa tama na cuaqueyajaaja sapojonutaniyajaacujua.

<sup>14</sup> Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiya, cuno niishitiojosanoori seetanu rupaajanaa. Quiaari niishiyajaacuhuj canapuete quia niishitiojoquiaarini. <sup>15</sup> Quiaacuajaari quia naatujujajini tariucuaaanu Pueyaso Rupaa niishijia. Cunoori quia niishitiquiaari Jesucristoocua quia tiuuniuria, Pueyaso jiyanooshano pueyano quia quiniuria. <sup>16</sup> Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhaaj pa miishanoori sesa, na nacasunura pajaniya maninia miijia pa quiniuhua. Pa rootaajaarihuaj tojetaarucujanaa maninia miijia pa quiniuria. <sup>17</sup> Naacuajitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

**4** Quiaacuajaari niishiya, Jesucristo tiuquishacariuhua mijiria, Jiyaniijajanaa na quiniuria, nojuaajari puetunu na tojtiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri. <sup>2</sup> Majaari pueya niquiara Pueyaso rupaa pohuatano quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatana. Pueyaso rupaata quia niishitiri sesa miijia nojori miishanoori sesa Pueyasora. Pueyaso rupaa tojiyashijia quia nacasuriquia. Pueya quia shiniujiuriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaaniutia. <sup>3</sup> Naa quia poojotariquia pueya niquiara, nojori tojiniu panishacarijia Pueyaso rupaa. Na nuhuaji, pueyari seetanu rupaajini niishitiojosano tojiniu paniyaquiniutianiya. Saaja na ruuretanutaniyajaarihuaj. Naa Pueyaso rupaa nojori tojiniu paniyaquishacarijij, nojoriiri queraatia tamaatia niishitiojonuujuaca rerejotenutaniya, cuno pojori shuquiritiniuria nojori najuhuana pohuatasana. <sup>4</sup> Nojoriiri seetanu Pueyaso rupaajanaa tarinitianutaniya, najuhuana sapojonuuusano tojtiajaca nojori quiniuria saniniuujia. <sup>5</sup> Quiajaniya saniniuujia, maninia niishiriojojua quia quiriquia, maja quia sapojosaanurajuhaaj. Naquiya miiniu rejeretaja quia quiriquia. Pueyaso rupaa Jesucristojini pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tuccatare maninia, taa pa Jiyaniijia sequequiaari quiajaniyacujani.

<sup>6</sup> Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niqutiosano quiniutianiya. <sup>7</sup> Majaari cua taajenu quijia, pueyaracaanu cua poonijosacari cua Jiyani-

ijia. Janiyari tari tucuatacanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari que-naaja. <sup>8</sup> Naacuajitij, shanohua tuhuajaari quiriano jiyocuacaanu racatasano quia tari, maninia miijia cua quiniucua. Cua Jiyaniijiaari cuno tuhuaja cua niqutionutaniya na samiitianishacariuhua janiya. Pa Jiyaniijiaari jyanohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijianaa niqutionutaniyajaarihuaj, canapuete nojuaja na paniniutia sashiyajaani, cuaara tiuquihuara shacantu-uca na cumaacatajaatijia.

#### Pablo sequesano Timoteo miishocoriquiano

<sup>9</sup> Majaari puera tarishiniu. Quia secoore, cucua quia tiuquiniuria ritia. <sup>10</sup> Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijia jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. <sup>11</sup> Saaja Lucasri niya cuata quia. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijia cua poonijosacari. <sup>12</sup> Janiyari saniniuujia Tíquico jiyarorucuaa Éfeso tiacajiniani. <sup>13</sup> Taa cua sequeya quiajaniyacujani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetuneeacujahuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

<sup>14</sup> Noo Alejandro, cumueeca casaajini shipinijiojua casamitij, nojuajaari jyanohua cua paracaajia quiquianu. Naajaa, pa Jiyaniijiacujajari saniniuujia cucua na naminiutianiyacujua, naa na miiniucua janiyatej. <sup>15</sup> Tama quia cuaqueyajaaja quia cojuare maja na miiniuria sesa quiajaniyajuhaaj. Nojuajaari pa pohuatasano cuaracashitiya saaja, Pueyaso rupaa ruuretaja na quiniucua.

<sup>16</sup> Janiya jaara shushajanaa nujuatesaacanu jiyaniijianucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniu quiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuaara jyanooria nojori. <sup>17</sup> Naajaa, pa Jiyaniijiaari cua cojiquianuni. Cua cumaquiquianujaarihuaj, nojuajini cua pohuatana puetunu cuniqui quiniaa Pueyaso niishiyashijia pueyajanaa. Pa Jiyaniijiaari cocuaatia cua miiniujini juhua nojori juaashiquiaajini cua jaaquianu, maja nojori monura janiya. <sup>18</sup> Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyajaarihuaj, pueyaracaanu rishijia cua quiniuria na shuriucua jiyocuacaanu, Jiyaniijajanaa na quishacari. Jiyanoohua

maniniaari pa Jiyaniijia! [Nojuaja cuaara shuquiriti-asaaria pueyaracaanu! Cuaara naa quiiriatej.

**Pablo sequesano na naajionee na tucuatascari**

<sup>19</sup> Quiria quia saruhatate Prisca, neyaca Aquilano, puetunu Onesíforo pueyajanaajuhuj, na tijinia quini-aani. <sup>20</sup> Erastoori Corinto tiacajinia jateecanu. Janiyari saniniuujia Trófimo tiujiacanu Mileto tiacajiniani, cuso-su na quiniuucua. <sup>21</sup> Cucua quia niniuria quia secoore,

shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua se-quereeni, nojoriria cua saruhatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaanio.

<sup>22</sup> Pa Jiyaniijia cuaara quioojiajinia quijia quiiria pueyaracaanu. Pueyaso cuaara cumaquiiria puetunu niajanijajanaa.

# TITO

## Pablo naajosacari Titoocuara

**1** Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiutiniuria Jesuucua, Pueyaso pueya nojori quiniuria. Cua jiyaroquiaarijuhua Jesuucua tiuuni-aa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. <sup>2</sup> Nojori tojishacari cuno rupaa, nojoriiri niishiquiaa nojori cutaraari samitianishaanutaniuhua Pueyaso muerasu nojori quiniuucua, pueyaracaanu quijiacua nojori quiniuria Pueyasota. Cunocuaajaari tariucuacaanu Pueyaso sequesano, jiyanoehua tarijiatej, jiya shipinishaacarijijyojua. Nojuajaari maja na naata sapojonu. <sup>3</sup> Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuacaanucuaajani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiutiniuria nocua. <sup>4</sup> Quiarijiani, quiocuara naajiyanjia Titonaa, juhua cua niyanuniyoyua quia quishacari. Quiaari Pueyaso pueyanora quiquiaari quia tiushacari Cristojiniji cua pohuatasanoocua, taa cua tiuquiaaricuaani. Naacujitij, paari mariyata nocua tiuujacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiiitaa quioojia maninia, shuquiriaatia quia quiniuria pueyaracaanu.

## Titora Pablo sequesano, Creta jiya tucuaatiajajinia na miishocoriquiano

<sup>5</sup> Janiyari quia tiujiaquiaari Creta jiya tucuaatiajajiniani, quia tucuatanaura cua poonijosano cureeno. Naaratej, quia sequecanunijia quia jiyatenura jiyani-ijanucua, Pueyaso muerasu maapue jiiitanaa quiniuria puetunu cuno jiya tiacajinijanaa, taa cua sequequiaari quiajanijacuaajani. <sup>6</sup> Pueyaso pueya jiiitariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuaara jiiitaa niquiryatujua niquiocua. Necohua cuara quiiria Pueyaso muerasujuhua, maja sesa miijiacua, maja tojiyashijiacajuhua. <sup>7</sup> Cante Pueyaso muerasu jiiitanani, nojuajaari Pueyasora poonijiojua. Naaratej, nojuaja cuara quiiria maninia quijia, sesacaso, maja tojiyashijia. Cuaara quiaquiiria ritia juaajia, mashaasequejojua, piyojotaja. Cuaara quiaquiiria cumaneeca panijia sesa na miishanota na masenura. <sup>8</sup> Naajuhua, Pueyaso pueya jiiitana cuara quiiria rucoonaacua taraajeja. Cuaara quiiria maninia miijia, maninia niishiriojojua. Cuaara quiiriajuhua seetanujua-

naa Pueyaso rootasano tojjia, maja rimiajata maninia miijia. Cuaara quiiriajuhua Pueyaso panijia cutara, tama na cuaqueyajaaja jiiitaa maninia, maja sacuaratia casaa porocua. <sup>9</sup> Cuaara quiiria Pueyaso rupaa tojjia cutara, taa na niishitiojosaaquiaricuaajani. Naacujitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacujijuhua, nojuaja na naata pueya tacatonuhua Pueyasooocua sesa nojori niishishanojiniji, noo pojori canapuate Pueyaso Rupaa ruuretajaca quiyacuajani.

<sup>10</sup> Naa quia sequereenijia, queraatia tojiyashijia pueya quiniuucua, canapuate juhua niishiyashijia niishitiojoquiaa najuhuaana niishitiojosanocuaajani. Nojoriiri Pueyaso muerasu sapojia. Queraatia cuno pojoriiri cuarta Judiocuaca. Nojoriiri pueya niishitiojia pueya cararaatiuquia co miatesaanura, taa Moisés niishitiojoquiaari tarijiacuajani, seetanujanaa Pueyaso muerasu nojori quiniuria juucua. <sup>11</sup> Nojoriiri queraatia niquiohwaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujuanura. Cuno niishitiojona cuara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

<sup>12</sup> Creta jiya tucuaatiaja pueyajinijinio tamonu shimiacuuri tama na pueyajinijiaaja naa sequequiaaritia: "Creta pueyari pueyaracaanu saaja sapojonuujuaca. Nojoriiri jiyanoehua juaajiacua juhua sayoru. Nojoriiri puera miaquenuujuaca. Nojoriiri taajecorijihua".

<sup>13</sup> Seetanujanaari cuno shimiacu sequesano. Nocuaji, jiyanoehua quia nacasure nojori, nojori cuara Pueyaso tojjia quiri, maninia quijia nojori quiniuria.

<sup>14</sup> Quia rootare nojori maja na tojtianura Judiocuaca nareja najuhuaana pohuatasano, naajuhua, maja nojori tojiniuria pueya rootasano, canapuate Pueyaso seetanu rupaajanaa tojiyashijia quiyacuajani.

<sup>15</sup> Pueyano jaara maninia jiuujaraca quiri, puetunu casaajanaari maninia quia nera. Saniniujia, pueyano jaara sesa jiuujaraca quiri Pueyaso rupaacua tiuyashijia na quiniuucua, majaari quenaaja niquiryatu casaa maninia quiniu nera. Na niishitijaari juhua curuutuuca, noojiano. <sup>16</sup> Nojoriiri tama na cuaqueyajaaja sequeya: "Pueyaso niishiyanjia". Naa nojori sequesacaritij, najuhuaana sequeyari. Nojori miishanojiniji, paari niishiyani nojori maja seetanujanaa Pueyaso muerasu. Nojoriiri jiyanoehua soosano pueya, puera sesa na quiniuucua. Nojoriiri jiyanoehua sesa, tojiyashijiacajuhua. Majaari na naata quenaaja maninia miiniu.

### Maninia niishitiojosano cutara

**2** Nocuaji, pueya quia niishitiojore maninia nojori quiniuria taa pa niishitiojosaaquiaaricujani.

<sup>2</sup> Naaratej, socua saaquiapue quia niishitiojore nojori cuara quiaquiiiria miaquejoru, mashaasequejorunio. Nojori cuara quiiiria tojishano pueya cutara, maja rerequetesano. Nojori cuara quiiiria maninia niishiriojuuaca. Cuaara quiiiria maninia quijiacajuhua, na tojishacari puetunu Pueyaso niishitiojosanojuanaa, na panishacari pueyano. Nojori cuara quiiirijuhua maninia rejeretajaca taraatia na miishacari, juhuananiya nojori sashishacari pa Jiyaniijia. <sup>3</sup> Naajuhua, socua motaja maajipohua quia niishitiojore nojori quiniuria maninia Pueyaso niqiiara pueyaracaanu, maja rimiaacatujiuri, maja mashaasequenujuuaca. Nojori cuara pueyaracaanu miiria maninia tamasaca niqiiara, tamasaca miiniuria juhua nojori miishanojuhuaj. <sup>4</sup> Nojori cuara niishitiojora niyacaraca maajipohua, maninia na paniniuria neyaca, necohuanio. <sup>5</sup> Cuno jiyaniyacuaca cuara niishitiojora narta maajipohua, maninia niishiriojuuaca nojori quiniuria, saaja neyaca panijiaci nojori quiniuria, maja tamonu caya panijiacara. Nojori cuara niishitiojosaariajuhuaj, maninia poonijiojuaca na tiajinia nojori quiniuria, caporatujuri nojori quiniuria, neyaca tojitiajacadano. Nojori cuara naa miiria, Pueyaso Rupaa mariqui rerequetesaareeri.

<sup>6</sup> Naajuhua, mashiquori quia niishitiojore maninia niishiriojuuaca nojori quiniuria. <sup>7</sup> Puetunu quia miishanojuanaa cuara quiiiria maninia nojori niqiiara, nojori jiaatianura quiocua, juhua quiajaniya nojori quiniuriajuhuaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuu quia quiniu quia niishitiojosacari. <sup>8</sup> Maninia quia niishitiojore Pueyaso Rupaa, taa quia niishitiojosaaquiaaricujani. Naacuajitij, tamasacaari maja na naata ruuretano quiniutianiya quia niishitiojosano pueya niqiiara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

<sup>9</sup> Poonitijiosano pueya quia rootare, puetunu na camarucua sequesanojuanaa nojori tojiniuria, na camarucua shuquiritianura nojori. Cuaara quiiiria na camarucua panijiaci, maja rihuanejaca. <sup>10</sup> Cuaara nohuaseyaquiiiria na camarucua casami. Cuaara quiiiria seetanujuanaa maninia miijiaci, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijiosano pueya jaara maninia quiriqia, Pueyaso Rupaari juhua maniniushitishano quiya tamasaca niqiiara.

<sup>11</sup> Paacuajaari niishiyani Pueyasoori jiyanohua jiyanoojia seetanujuanaa, Jesu cusuucua puetunu pueyacuarajanaa, sesa pa miishanojiniji pa jiyanooshaanura. <sup>12</sup> Pueyaso jiyanooshacari pajaniya, cunoori pa niishitiojiya pa cartenura puetunu sesa pa

miishanojuanaa, maja mijiria casaacua pa jiaatianura sacuaraatiajuhuaj. Naajuhua, Pueyaso jiyanooniucua pajaniya, cunoori pa shiniujiya maninia niishiriojuuaca pa quiniuria mijiria pa quishacarijia, maninia miijiacajuhua, Pueyaso tojijianio pa paniniutia nojuaja. <sup>13</sup> Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuahuaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuuca na cumaacajinia. Naacuajitij, paari shuquiriaatia sashiya pa Jiyanooni. <sup>14</sup> Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia sequejeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanohua maninia miiniucua jiaatiajaca pa quiniuriajuhuaj.

<sup>15</sup> Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriqia pueyaracaanu, tamonu mariqui quia rerequetereri.

### Maninia rootasano Pueyaso pueyara

**3** Quia pueya quia niishitiojorohua jiya jiyaniijia tojijiaci nojori quiniuria, jiyaniijanucua na jiyatesano pueya nojori tojiniuriajuhuaj. Nojori cuara cuno pojori naacutaara jaara sequesaaare maninia casa nojori miiniuria. <sup>2</sup> Pueya quia niishitiojore nojori cuara pueya sesacaashijiaci quiiirijuhua. Nojori cuara quiiiria juhuajaniya quijiaci, maja juaajiaci. Cuaara quiiiria jiyanoojiaci. Cuaara maninia niqiiiria puetunu pueyanaa, juhua socua maninia pueya nojorijiniji, maja rimiajata na miiniuria tamasaca.

<sup>3</sup> Tarijia, paari mariyata mosanucua quiquiaarini, Pueyaso tojiyashijiacano. Paari juhua tashucua quiquiaarini, sapojosano pa quishacari. Paari sesa miiniucua jiiitiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniucua jiaatiajaca quiquiaarini sesa pa niishihanota. Paari sesa miijiaci quiquiaarini. Paari tamasaca jiiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaci quiquiaarini. Paari niqiiitiojuaca quiaquiquiaarini. <sup>4</sup> Naajaa, pa Jiyanoojia Pueyaso cutaraari maninia miiquiaari pajaniya. Naacuajitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. <sup>5</sup> Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujiaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. <sup>6</sup> Pocuaji Tacuna Jesucristo miiniucua maninia, Pueyasoori jiyanohua queraatia na Sohuanu niqiiitioquiaari pajaniya. Juhua pocua totasaareeri na Sohuanu. Maja shiitianiyojua

quenaaja. <sup>7</sup> Naacuaajitij, pa jiyatereeri maninia quiijaca pa quiniuria na jiyanooshacari pajaniya. Naa pa jiyate- quiaariiri na muerasu pa quiniuria, pa masenura puetunu na jiiatasanojuanaa puera, jiyocuacaanu na racatasano. Naaratej, paari juhujaniya sashiquiaani, pa niishishacari paari pueyaracaanu quiijaca quiniutianiya natani.

<sup>8</sup> Nio cua sequesanoori seetanu rupaajanaa. Nio ru- paata quia nacasure Pueyaso tojitiajaca puetunu quioojiatajanaa, nojori cuaara niishiriojora, maninia nojori miiniuria pueyaracaanu. Nio rootasanoori jiyanoohua maninia. Maninia cutaraari puetunu pueya cumaquitiajarajanaa. <sup>9</sup> Maja cutaraari quia rupuenu cuno pueya, noo pojori canapueete najuhuaana nacojo- quiaani, naajuhuj, noo pojori canapueete pueyara- caanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupuenu noo pojori canapueete juaa- tiooquiaani, canapueete tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

<sup>10</sup> Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja

ja cuaara quiiriaqui juhua taanuusano. <sup>11</sup> Naa na to- jiyaquishacari quiajaniyatej, quiocua niishiri cuno pueyano tari seseree. Tama sesa na miishanojuaarjia juhua nocuara saquiriojotaa.

#### Pablo sequesano Titora

<sup>12</sup> Janiya jaara Artemas jiyarore quiocuani, jiyanoohua quia saniniujiuri cucua quia niniuria Nicópolis tiaca- jinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. <sup>13</sup> Zenas, Apoloori quiocua tiuquiniutianiya. Nojori quia naacutare quia jiiatasano- ta, nojori jiiitanura puetunu na panishanojuanaa no- jori quianu panishacari quia quiijajiniji. Zenasri puey- acuaji tacuna pueya nequesoreenaa.

<sup>14</sup> Parta Pueyaso muerasu cuaara niishiiria maninia miiijaca nojori quiniurijuhuj, maja najuhua quijia- ca na quiniuria. Maninia cutaraari nojori naacutanura na panishano jiiitaashijaca.

#### Naajionee puequesacari saruhuatano

<sup>15</sup> Puetunu cuata quiniaajanaari cua sequeya cua saruhuatano quiajaniya. Canaara quia saruhuatano parta Pueyaso muerasujuhuj, canapueete canaa pani- jiacacuajani. Pueyaso cuaara cumaquiiria puetunu nia- janiyajanaa. Cuaara naa quiiriatej. Tariucuaja Titonaa.



# FILEMÓN

## Pablo saruhuatasacari Filemón

**1** ¿Quiaate quiyajaa canaa panishano Filemónnaa? Janiyari Pabloni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. <sup>2</sup> Canaara quia saruhuatare pa rimiatucua Apia, Arquiponio, jaarajaaja pa Jiyaniijiajiniji pohuatanani. Canaara quia saruhuatarehua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. <sup>3</sup> Pa Que Pueyaso, pa Jiyaniijia Jesucristonio, nojori cuara cumaquiiria nijaniya, jiyanoojiaca nojori quiniuucua. Nojori cuara cajitiiria nioojiajuhuaj, juhua-janiya nia quiniuria.

### Filemón paniniujiniji pohuatasano, Pueyasoocua na tiuuniujinijio

<sup>4</sup> Pueyaso cua secojosacari, janiyari quia seera pueyaracaanu Pueyaso sequequiaani, “paacarasho”. <sup>5</sup> Janiyari naa sequequiaa Pueyasoni, quiajanijiniji cua tojinuucua taa quia paniquiaa pa Jiyaniijia Jesuni, puetunu na pueyajanaanio. Quiaanaari seetanujuanaa pa Jiyaniijiaacua tiuujia. Janiyari cunora quia timitiaani. <sup>6</sup> Janiyari quiocuara secojoquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacujitij, nojori quia cumaquishacari, quiaari maatia niishiniutianiya puetunu quioojiajinia quia jiišanasojuanaa Jesucristojiniji, Jesucristoocua tiuujia quia quiniuucua. <sup>7</sup> Parta Pueyaso pueya panijia quia quiniuucua, quiaanaari nojori cumanijiacanau, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuaj. Cunora, shuquiriaatia quiyaniija.

### Pablo sequesacari Filemón, nojuaja jiyanooniuhuaa tama na seru Onésimojuaja

<sup>8</sup> Jesucristo jiyaramiquishano pueyano cua quiniuucua, cua naata sequenu quiajanija quia miiniuria cua sequesano. <sup>9</sup> Naajaa, majaari cua sequenu paniniu quiajanija juhua quia jiyaniijia. Saniniuujia, panijia quia quiniuucua, janiyari quia sequenu paniani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiiano. Naajaa, quia rupeña Pablo cua quiniuucua, cua tojiri Filemónnaa. <sup>10</sup> Cucua quia taraajere quenaaja. Quia nenecojianijia cua niyanuniojua Onésimoocua. Nojuajaari seetanujuanaa

juhua quyanura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

<sup>11</sup> Tariija, Onésimoori sesa seru quiquiaari quiaara. Quiarijia saniniuujia, nojuajaari na naata maninia quiniu quiaara, taa quiria na quiyacuaani. <sup>12</sup> Janiyari quiarijia quiocua jiyaroya quyanuni. Quiocua na maserohua quia timiniutia, taa quia masequiaa janiyacuaani. <sup>13</sup> Moronucua cua quishacari Jesucristo rupaa cua pohuatanuucua, janiyari niyaja na jiyojetenu paniriquiaa juucuaani, na naacunura janiya quia niti. <sup>14</sup> Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajanija. Janiya jaara quia sequereni janiya niya na jitianutaniya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniani. Cunora, janiyari na jiyaroya quiocuani. <sup>15</sup> Onésimo jiyoteeri quiocuaji rupatecanu rupaquiriaja, quiarijia quiaara na quiniuhuaa pueyaracaanu cutara. <sup>16</sup> Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiarijiani, Jesuucua tiuujia na quishacarijuhuaj. Nojuajaari jiyanoohua cua panishano parta Pueyaso pueyano. Naajaa, quiaa cuara jiyanoohua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

<sup>17</sup> Naacujitij, janiya jaara seetanujuanaa quiarta Pueyaso pueyano quiri quiarani, Onésimo tiuquishacari quiocua, nojuaja quia miiri maninia, taa quia miiquiaacuaa janiyani. <sup>18</sup> Onésimo jaara sesa miiquiaari quiajanija, jaara quia casaa nohuasequiaarjihuaj, nojuaja quia jiyanoori. Saniniuujia cucua quia tiutiare puetunu sesa na miishanojuanaa quiajanija. <sup>19</sup> Janiyacua saniniuujia cua cumaneecajiniji quia niquitoren puetunu sesa na miishanojinijijianaa quiajanija. Janiyari Pabloni. Janiyari tama cua juaashiquiatajaaja nio naajiyani, cua sequesanoocua quia tiuuniuria. Janiyari quia niishitiniu panijajuhuaj, Jesucristojiniji cua pohuatasanoocua quia tiushacari, quiaacuajaari pueyaracaanu quijiaa jatanishaaquiaari. Naacujitij, cua naata sequenu quiajanija, cua serura quia quiniuriajuhuaj. Naajaa, janiyari saaja quia sequeyani Onésimoocua quia taraajenura. <sup>20</sup> Naa quiria quia miiri quenaaja, mariyata Jesuucua tiuujia pa quiniuucua, cua panishano Filemónnaa. Quiaa jaara Onésimo jiyanoori, Cristo panijia quia quiniuucua, quiaari seetanujuanaa coojia cumanijianutaniya.

<sup>21</sup> Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaaniuhuj, quiaari socua maninia na miiniutianiya cua sequesanojiniji. <sup>22</sup> Naajuhuj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, ni-aata cua quiniuria.

#### Pablo sequesano na naajio na tucuatascari

<sup>23</sup> Epafasri cua sequeree cua saruhuatanura nia-janiya. Nojuajaari cuarta moronucujuhuj, Jesucristojiniji canaa pohuatanuucua. <sup>24</sup> Jaarajaaja cuata Jesucristojiniji pohuatanaa pueyari nia saruhuataajuhuj. Nojoriiri Marco, Aristarco, Demas, Lucasnio.

<sup>25</sup> Pa Jiyaniijia Jesucristo cuaara cumaquiiria nia-janiya.

# HEBREO

## Pueyasoori pajaniyara na rupaa pohuataniquiaari Neyanujiniji

**1** Tariucuacaanu, Pueyasoori pueyaracaanu na sequenu panishano caminiujiuniasa pueya pootaniquiaari pa supuetanaara. Nojuajaari nojuajiniji caminiujiuniasa miijotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini. <sup>2</sup> Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipiniquiaari puetunu casaajanaacuajaari; nio jiya, jiya cajiniocuajuhuaaj, puetunu pa niqiyaquishoo casaajanaano. Naajuhuaaj, Pueyasoori Neyanu jiyatequiaari puetunu tama na shipinishanojuanaa jittiana quiriquiano. <sup>3</sup> Neyanuuri tojetaarucujanaa maninia, juhua na Quejuhuaaj, juhua na Que niqishanojuhuaaj. Naacuajitij, nojuajaari jiyanojuaa shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaji, jiyocuacaanu tacaquiaarihuuari, na Que Pueyaso miaquetajara na cajiniuria Jiyaniijajanaa quiquojinia.

## Pueyaso Niyanuuri Jiyaniijajanaa cutara Pueyaso seyajiniji

<sup>4</sup> Naacuajitij, Pueyaso Niyanuuri Jiyaniijarajanaa quiquiaari Pueyaso seyajiniji. Nojuajaari na Que sesaanucua. <sup>5</sup> ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? [Maja! Neyanu sequequiaari cutaraari:

“Quiaari quiyanu. Janiyari pueyanora quia mueraterree jiyacuani, cua saquirojosano pueya Jiyaniijia quia quiniuria”.

Neyanujiniji sequequiaarihuuarihuaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. <sup>6</sup> Tariucuacaanu Pueyaso Rupaajinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhuaa miijiria, Jiyaniijajanaa na quiniuria:

“Puetunu cua seyajanaa cuara Quiyanu tojitiaara, Jiyaniijajanaa na quiniucua”.

<sup>7</sup> Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua maniriano, na panishano nojori miiniuria”.

<sup>8</sup> Neyanu sequeya saniniuurijia:

“Quiyanunaa, quiaacuajaari Pueyasojuhuanajaj.

Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jitianura puetunu pueyajanaa. <sup>9</sup> Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniucua. Janiyari quia jiyatequiaarijuhua socua shuquiriaatia quijia quia quiniuria puetunu quia cojiniaajinijijanaa”.

<sup>10</sup> Pueyasoori naa sequequiaari Neyanujuhuaaj:

“Jiyaniijanaa, quiaacuajaari coteenujanaa casaa shipinijia. Quiaari jiya shipiniquiaari, puetunu jiya cajiniocua niqishano casaajanaano. <sup>11</sup> Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucuashiriquiano juhua toqueja. <sup>12</sup> Naa na tariucuashishacaritij, quiaari juhua toque mocua na junicoriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

<sup>13</sup> Pueyasoori Neyanu sequequiaarijuhuaaj:

“Miji, cua miaquetajara quia cajishii, janiya jaara quia paraa shocojotare puetunujuaanaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio. <sup>14</sup> Puetunu nojorijianaacuajaari Pueyasora poonijionaa. Pueyasoori nojori jiyaramiquiaa Jesuucua tiuuriquiano pueya nojori cojuanura.

## Maja cumaati Jesucristo tojiyashijiacara pa quiniu

**2** Naaratej, Jesucristojiniji pa tojishano tojijiaa pa quiriquia socua, paa mariqui Pueyasooquaji rupaateeri. <sup>2</sup> Tariucuacaanu, Pueyaso seya caminiujiushano Pueyaso rootasano pueyarani, cuno rootasanoori seetanjuanaa pueya tojishocoriquiano cutara. Cuno rootasano ruuretajaca, na miyashijiacajuhuaaj, nojoriiri saniitiosaaquiaari. <sup>3</sup> Pueyaso seya caminiujiushano tojiyashijiaca jaara saniitiosaaquiaaricuaa, ¿paateeri jiyaniyani Pueyaso pa jiyanooniucua?

tianiya juhuajaniya Neyanu rupaa tojiyashijiaca pa quishacari? [Maja! Cuno rupaa nocua pa tiuushano pa jiyanooshaanurani, cunoori pa Jiyaniijiajanaa pohu-atasano. Pa Jiyaniijia nuhuaji, cuno pojori, canapuede pa Jiyaniijiajanaa tojiquiaari pueyaracaanuni, nojoriiri saniniuujia cuno rupaa caminiujuquiaari pajaniyara. Canaa sequetuquiaariiri nojori tojishanoori seetanu rupaajanaa. <sup>4</sup> Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jiyanoohua na cumaacata, maatia pueya niishinuria nojori pohuatasanoori seetanujuanaa. Pueyari cunora jiyanoohua shiriqutiuiquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujiaca niqutioquiaa na Sohuanu, tamaatia pa miiniuria na cumaacata, taa na panyacuajani. Cunora, paa cumaati seetanujuanaa Pueyaso rupaa Jesucristojiniji tojitiajaca quiyani.

### Jesucristo mijiria rasaaquiaari pa puerana na quiniuria

<sup>5</sup> Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. <sup>6</sup> Naajaa, tariucuacaanu Pueyaso Rupaajinia naa naajiotasaaquiaariiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? <sup>7</sup> Quiaacuajaari na shipiniquiaari rupaquijiaara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniurijuhuj. <sup>8</sup> Quiaari na sequeriquiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiitiasoo. Saniniuujia, paacuaajaari niishiyani, pueyanoori juhuanojuaja maja seetanujuanaa cumaacaraca na quiniu puetunu casaajanaa na tojitiniuria tama nojuajaaja. <sup>9</sup> ¿Jesuurijataj? Pueyano na quiniuria, na Que Pueyasoori rupaquijiaara na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na cusonuucua pocuaratej, Pueyasoori na jiyatequiaari Jiyaniijiajanaa na quiniuria, jiyanoohua cumaacaraca na quiniurijuhuj.

<sup>10</sup> Jamueyashijia Pueyaso quiniuucua, nojuajaari puetunu na muerasuranujuanaa panitiaquiaari na cojiniaa nojori quiniuria. Paniquiaariiri jatiqui nata shuquiriaatia pa quiniuria, puetunu tama nerajaaja na shipinishano casaatajanaajuhuj. Jeenucuasano pa quiniuria pa cojinuria Pueyaso, nojuajaari jiyanoohua maninia miiquiaari pocuara, Neyanu na miitishacari naquiya pa niti. Naacuajitij, Neyanuuri tojetaarucuaajanaa maninia quiquiaari Pueyaso muerasuranooquaji Tacuna na quiniuria. <sup>11</sup> Jesucristo jeequenuucua pa-

janiya sesa pa miishanojiniji, jatanishano pueya pa quiniuria, paari cunora seetanujuanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuani. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. <sup>12</sup> Tariucuacaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritiasacari quiajaniya”.

<sup>13</sup> Tamaqui, Jesu sequesanoori naa naajiotasano quiyajuhuj:

“Janiyari cua Queecua tiuuji quiniutianiyani”.

Naacuajitij, mijiria na quishacari, Jesuuri na Que Pueyasooocua tiuuquiaaricuaa taa pa tiuuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquiti-asacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojtianuucua janiya”.

<sup>14</sup> Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojtiaashijiaca pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. <sup>15</sup> Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniuucua. Paari niishiyacuajani, pa cusosacari, paari pa Jiyaniijia quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. <sup>16</sup> Seetanujuanaa, majaari Jesucristo ninu quiquiaari Pueyaso seya na naacunura. Niqiaari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasooocua tiuujiacuaani. <sup>17</sup> Maninia pa naacuna na quiniuria, Jesucristoori puetunu naquiya miiniujianaa rejeretaquiaari mariyata taa narta pueya miishaaquiaacuani. Naacuajitij, nojuajaari pocua taraajaja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jyanooniu puetunu sesa pa miishanojinijianaa. <sup>18</sup> Mijiria na quishacari, nojuajaari pueyaracaanu taraatia miishaaquiaari. Nojuajaari jiyanoohua saniniuujushaaquiaari sesa na miiniuria juucuaajuhuj. Naacuajitij, nojuacuajaari jiyanoohua niishijia na cumaquiniuria pajaniya, paa jaara sesa miiniuria saniniuujushaariquiani, paa jaara taraatia miishaariquijuhuj.

### Jesucristo cutaraari Jiyaniijiajanaa Moisésjiniji

**3** Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria.

Nojuajaari Neyanu Jesu jiyaroquiaari na rupaa na ishitiuria pajaniya, Pueyaso pueyara pa jatanishaanura. Neyanuuri na jiyanoottijia pajaniya, nocua pa tiushacari. Cunora, jacaria pa niishiriojore socua Jesucristojiniji. <sup>2</sup> Mijiria na quishacari, Jesuuri na Jiyarona tojjia quiquiaari pueyaracaanu, taa Moisés quiquiaari Pueyaso tojjiaacuaani, Israel pueya jiiitiana na quishacari. <sup>3</sup> Naajaa, Jesucristo cutaraari Jiyaniijiajanaa Moisésjiniji. Moisésri saaja narta Pueyaso pueyajini-jinio pueyano quiquiaari. Saniniuujia, Jesucristoori puetunu Pueyaso pueyajanaa shipinina cutara. Naaratej, Jesucristo cuaara tojishaaria socua cutara. <sup>4</sup> Puetunu pueyapuejanaari supuetanaaraca. Naajaa, Pueyasोजनाari nojori shipinina seetanujuanaa. <sup>5</sup> Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniucua. <sup>6</sup> Saniniuujia, Jesucristoori Pueyaso Niyanujuanaa cutara. Nojuajaari Pueyaso saquiriojosano pueya Jiyaniijiajanaa. Nojuajaari nojori jiiitaa saa maniniaja, taa na Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuquiaani, naajuhuj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

#### Pueyasoori na pueya samaraataja

<sup>7</sup> Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaaji. Na sequesanoori naa naajiotasano quiya tariucuacaanu Pueyaso Rupaajinia pajaniyarajuhuj:

“Pueyanaa, niaa jaara quarijia tojiri quia Pueyaso sequesano niajaniya, majaari na sequesano ruuretajaca nia quiniu. <sup>8</sup> Majaari naa nia quiniu taa nia supuetanaa quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojjiyashijiacac nojori quishacari. <sup>9</sup> Nojoricuajaari pueyaracaanu cua cumaacata cua miiijosano niqutiutuquiaari. Cuarenta marijiaari shocojoquiaari, pueyaracaanu jiyajeneta casaa cua miiijosacari cua cumaacata, maninia cua jiiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji. <sup>10</sup> Janiyari cunora seetanujuanaa juaaquiaari puetunu cuno pojoritijajanaani. Naaratej, janiyari sequesaaquiarini: ‘Nojoriiri juhua cucuaji tashuquioonoo rucoojiya tamajaaja. Nojoriiri cua niishitiojosano ruuretajuiaa saaja’. <sup>11</sup> Janiyari cunora jiyanoohua cua juaaniutia nia sequesaaquiarini: ‘Majaari nojori rupuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaa nojori quiniuria cuata’”.

<sup>12</sup> Naarate cuarta Pueyaso pueyanaa, tama nia cuaqueyajaaja nia cojuare jiyanoohua, niaa mariqui Pueyaso Rupaacua tiuyashijiacara quiriouhuari, Pueyasooacuaaji nia rupatenura puetunujuanaa. Pa Pueyasocuaajaari quijiajuhuanajaj. Nojuajaari na tojjiyashijiacac saniitiojua. <sup>13</sup> Cunora, seetanujuanaa

Pueyaso Rupaa tojjitajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyashacarijia taa na Rupaa sequeyacuajani. Naa nia shiniujiutiooriquiatej nia jiiitiquiniucuaaji sesa miiniuria. Saniniuujia, niaa jaara sesa miijiacac quiri quia, tama sesa nia miiniujiaarijia nia sapojonutianiya Pueyaso tojjiyashijiacac nia jatanuhua. <sup>14</sup> Jesucristoocua pa tiuuniucua, paari na cojiniara jiyatesanoni. Naacuajitij, puetunu na jiiitiasanojuanaari puera quiri quianojuhuaj, paa jaara nocua tiuquiacac pueyaracaanuni, taa shushajanaa seetanujuanaa nocua tiuujiaa pa quiri quiaacuajani.

<sup>15</sup> Cunora, naa naajiotasano quiyari tariucuacaanu Pueyaso Rupaajinia:

“Pueyanaa, niaa jaara quarijia tojiri quia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojjitashijiacac nojori quishacari”.

<sup>16</sup> ¿Canapueeteeri cuno pojorini, Pueyaso tojjitashijiacacani? ¿Secaja pueyatee? Maja. Puetunu noo pojoricuajaari Egipto jiyajini Moisés mashiquishano pueyatej. Nojoriijianaacuajaari Pueyaso tojjiquiaari pocuaano. Naajaa, nojoriiri saaja na ruuretajaca quiquiaari. <sup>17</sup> Nia niishiritioj, ¿canapueeteeri cuno pojorini, Pueyaso juaatijioquiarini, pueyaracaanu nojori camarucuneejotasacari carii quia jiyajini? Noo pojoricuajani sesa miijiacatej. Nojoriiri cunora cusonuquiacacari nojori quiojosacari nucuaco carii quia jiyaco. Na cusonuusaquijia jamojosaaquiariri. <sup>18</sup> Nia niishirijuhuj, ¿canapueeteeri naa Pueyaso sequesaaquiarini seetanujuanaa na juaaniutiani: “Majaari nia tiuquitanu quiniutianiya niaarano cua niqutionu panishano jiyajinia, tii juhuanianiya shuquiriaatia nia quiniuria cuata”? Puetunu Pueyaso tojjitashijiacacajanaacuajaari na sequesaaquiaritij. <sup>19</sup> Naacuajitij, paacuajaari quarijia maatia niishiyani, Pueyasooacua tiuyashijiacac nojori quiniucua, majaari nojori tiuquitanu quiquiaari Pueyaso niqutionu panishano jiyajinia.

**4** Pueyasocuaajaari pa masuyajaa panaatia pa quiniuria nata. Cunora, jiyanoohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajini-jinio mariqui jiyanoaquishaareeri. Na sequesanoocua tiuyashijiacacari maja na rupuenu quiniutianiya Pueyaso, shuquiriaatia na quiniuria Pueyasota. <sup>2</sup> Pueyaso rupaacuajaari tari pa niquiara pohuatasaaquiarijuhuj, nocua pa tiuuniuria, taa pa supuetanaa niquiara na pohuatasaaquiaricuaani. Nojoriiri Pueyaso rupaa tojjiquiaari najuhuanaj. Majaari nocua na tiuutiuni quiquiaari. <sup>3</sup> Cunora, Pueyasoori pa supuetanaajini nia sequesaaquiarini:

“Cua sequesanoocua nojori tiuyaquiniucua, janiyari cunora seetanujuanaa nia sequesaaquiarini cua juaaniutiani: ‘Majaari nojori tiuquitanu quiniutianiya cua niqutionu panishano jiyajinia, cuata nojori quiniuria shuquiriaatia’”.

Pajaniya saniniuuja, Jesuucua tiuujiaca pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhujaj: jiya shipininiu na tucuatano nuhuaji, nojuajaari panaatia quiya. <sup>4</sup> Cunora, tamaqui tariucua-caanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatasaari puetunu na poonijosanojuanaa, na nuhuaji nojuajaari séptimo juucajinia samaatequiaari”.

<sup>5</sup> Pueyaso sequesanoori tariucuaaanu na Rupaajinia naa pacutejosaaquiaari naajiotanu:

“Majaari cua tojtiaashijiaca rupeunu quiniutianiya janiya, panaatia nojori quiniuria cuata”.

<sup>6</sup> Naa sequesanojinijitij, maatia niishishiyari Pueyasoori pueya masuyajaa, nojori rupenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniuucua. <sup>7</sup> Naa Pueyaso panitianoocua pueya, shuquiriaatia nojori quiniuria natajuhuaj, nojuajaari quiarijia masuyajaa pueya. Cunora, jiyanoohua Moisés nuhuaji, Pueyasoori supuetana David naajiotaniquiaari pajaniyara saniniuuja. Naa sequeyari:

“Niaa jaara quiarijia tojiri Pueyaso rupaa, Pueyaso sequesano niaarano, majaari na ruuretanu”.

<sup>8</sup> Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasooocua tiuyashijiaca nojori quiniuucujuhuj, taa nojori supuetanaa quiquiaaricuaani. Naacuajitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarijia pa masuuriquiaja Jesuucua pa tiuunuriani, seetanujuanaa panaatia quijiacara pa quiniuria natani? <sup>9</sup> Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu.

<sup>10</sup> Naacuajitij, cante Jesucristoocua tiuujiani, nojuajaari panaatia quijiaara jatanishaanutaniya. Majaari socua na tacaaniu quiniutianiya taa tama na cuaqueyajaaja na jiyanootiniutianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuaana na poonijosanojinijij, naatej, taa Pueyasojuaanaa samaatequiaari na poonijionu nuhuajicuaani. <sup>11</sup> Naaratej, panaatia pa quiniuria Pueyasota, seetanujuanaa na Rupaa tojijiacara pa quiriquia quiarijia. Naa na rupaa tojijiacara pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijiaca nojori quiniuucua.

<sup>12</sup> Pueyaso Rupaari samiitianijia, cumaacaracajaariuhua pueya jiuujajinia na poonijionura. Pueyaso Rupaari jiyanoohua socua shamatucaaja nijiniaquetucua mueruujinijij. Nijiniaquetucuaaja mueruuri saaja na naa-

ta pa cuaqueya jiyatanu. Pueyaso Rupaa cutaraari pa sohuanu tohuariquijia, pa niishitijia tohuariquijianio. Na naata cuhuatanu poojajinia jiyasohuaja pa niishiriojosano casaa, poojajinia pa niishishoo casaanio. Naacuajitij, Pueyaso Rupaari poojajinia sesa casaa pa niishiriojosano nequesoreeja, jiyasohuaja pa miiniu panishano poojajinia pa niishiriojosanonio. <sup>13</sup> Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

### Jesujuanaari Pueyaso jiyanootijia pueya

<sup>14</sup> Pueyaso Niyanu Jesuni, nojuajaari na Que jiyanootijia pajaniya. Nojuajaari jiya cajiniocua tohuariquiquiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujiaca pa quiniuucua, maja cumaati pa pishiniu nocuaji. Paacuajaari na muerasuniyojuani.

<sup>15</sup> Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. <sup>16</sup> Cunora, pa jiyanoojia Pueyaso pa rupueriquia pa puereyaquiniutia. Nojuacuajaari pa tojiquiaa pa secojosacari nojuaja, na jiyanooniuria pajaniya sesa pa miishanojinijij. Ritia pa cumaquiquiaajaariuhuj, pa rejeretanura paa jaara sesa miiniuria saniniujiushaariquiani.

**5** Puetunu pueyacuara secojonaa jiyaniijajanaari pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moiséscajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejojua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojinijij. <sup>2</sup> Pueyacuara secojona quiniuucua pueyanojuhuaj, nojuajaari sesa miijiajuhuaj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujiuhuj. <sup>3</sup> Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuarani, sesa nojori miishacari. <sup>4</sup> Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocujaari naa saquiriojoquiaaricuaa Moisés tarajanu Aarón, pueyacuara secojona jiyaniijia na quiniuria. <sup>5</sup> Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuaarijia na jiy-

atequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muer- ateree jiyacuani cua saquiriojosano pueya Jiyaniijia quia quiniuria”.

<sup>6</sup> Pueyaso sequesanoori tamaqui tariucuacaanu na Ru- paajinia naa naajiotasano quiyajuhaaj:

“Pueyaracaanu rishijia quia quiniuucua, quiaari pueyaracaanu pueyacuara secojoriqiano cutara, taa Melquisedeccuaani”.

<sup>7</sup> Naa pueyano na quishacari mijiriatej, Jesucristoori jiyanhua saniniuujushaaquiaari. Naquiya na miyaquishaanuucuaaji juucua, nojuajaari na Que Pueyaso secojoquiaari jiyanhua na nujuquenuta. Jiyanhua martequiaariiri na Que na secojosacari, ma- ja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojjia na quiniuucua, na Que sequequiaariiri: “Naajaa, quia miiri quia panishano cua Quenaa, taa quia panitiaquiaari miini janiyacuaajani”. Na Queeri na tojiquiaari. <sup>8</sup> Jesucristoori seetanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanhua naquiya mi- ishaanutaniya nojuaja jaara na Que tojiri, naajaa, no- juajaari saaja na tojiquiaari. <sup>9</sup> Naacuajitij, tojetaarucua- janaa maninia miijia na quiniuucua, nojuajaari puey- acuaji Tacunara quiquiaari, puetunu na tojtiajacajanaa na jiyatenura pueyaracaanu rishijiacara. <sup>10</sup> Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

#### Jiyanhua puereetaari Jesu tojiniu tarinitianu

<sup>11</sup> Janiyari queraatia socua nia niishitiojonu paniya Je- sucristojinijini, nia niishiniuria nojuajaari seetanujua- naa juhua Melquisedec. Cunoori puera jiyajeneta, maatia cua niishitiojonura nijaniya, juhua ni- ishiyashijiacara nia quiniuucuihua. Niaacuajaari tari niyajetarucuaa tariucuacaanu nia tojishano. <sup>12</sup> Tari- cuacaanujiniji Pueyaso rupaa tojjia nia quiniuucua, ztaateni? Naa mariqui na niishitiojonuujuaca quiriquia tari. Saniniuujia, niaari quiarijia paniya socua nia ni- ishiojosaanuhua maatia niishishaatia casaa Pueya- sojiniji. Naaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu. <sup>13</sup> Naa maatia niishitiojosano niishijia nia quishacari saa- jatej, niaari juhua conaaja quiyajaa, saaja quitiaa- caacua naataja. Majaari Jesucristo niishitiojosano tojiti- ajaca nia quiniu, maninia miijia nia quiniuria.

<sup>14</sup> Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenu- ujuaca. Naajuhuaaj, puetunu Jesucristo niishitiojosano- juanaa niishijia nia quiriquia. Naa jaara na niishitio- josano tojjia quiriqia, saaja maninia miijia nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

<sup>6</sup> Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso ru-

paa tojtiajaca nia quiriquia, juhua tariucua cumantu- maca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano ni- ishijia. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari ni- ishiya, majaari nia naata maninia nia miishanota tama nia cuaqueyajaaja jyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria nijaniya. <sup>2</sup> Naajuhuaaj, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniuucua. Naaari niishitio- josaaquiaarijuhua Pueyaso pueyacu nia nianura nia juaashiquia nojoriicua nia secojosacari, Pueyaso cumaquiniuria nojori. Naaari niishiyajuhaaj, ma- cunucuaari samiitiaconutaniuhua. Nojorijinijinio saniniuujia, Pueyaso tojyashijiacari pueyaracaanu saniitiosocoriquiano jiyatesaanutaniya. <sup>3</sup> Quiarijiani, majaari socua nia niishitiojonu quiniutianiya nijaniya nio shusha cua sequesanojiniji nijaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya nijaniyani.

<sup>4</sup> Pueyano jaara Pueyaso Rupaa tojyashijia quiri- o- hua, najuhuaari na niishitiojonu pacutenuhua, no- juaja jaara tari Pueyaso Sohuanu cuhuatasano jiuu- jiaraca quiquiaari. Najuhuaari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuanajaari- uhua nojuaja jaara tari Pueyaso Rupaa shuquiritiaja quiquiaari, nojuaja jaara tari Pueyaso cumaacaraca quijia quiquiaarijuhuaj. <sup>6</sup> Jiyano pueyanotej, majaari tari na naata sesa miijia na quiniuucua taraajete- saanuhua, Jesucristoocua na tiuuniuhua seetanujua- naa. Nojuajaari juhua Pueyaso Niyanu teetenu pa- cuteya niyacutesanojinia, naa na ruuretajaca na quini- uucua. Naa Jesucristo tacartaja na quiniuucuatej, tamasaari Jesu rerequetequiaajuhuaaj. <sup>7</sup> Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucuaajani, riyocua- canio. Pueyasoori najuhua maru niyojotequiaa. Ma- jaari cuno cuhuariquiajinia nataacuaca muetunu. Jiyano cuhuariquiatej, na camaru cuara catijataara- noj. Pueyasoori naa saniitionutaniya nocuaji rupare- queno pueyajuhaaj. Saniniuujia, Jesucristo rupaa tojiji- acani, nojoriiri juhua maninia cuhuariquia. Pueyasoori maru niyojotequiaa nocua, maninia na muetutenura tii natoosano casaa. Naacuajitij, na camaruuri queraa- tia miajajauraca quiniutianiya. Naajuhuaaj, Pueyasoori na tojtianu tarinitiaashijia shuqiritiniutianiya pueyaracaanura.

#### Pa niishishacari Pueyasoori maninia pa miiniutianiya, paari cunora na tojiniu tarinitiaaquiquiaani

<sup>9</sup> Miriqui cua pohuatasano sesa cuhuariquiajinijini, cunoori maja nijaniya cua panishano pueyanaa. Ma- jaari cua taacanuunu nijaniyajiniji. Niaacuajaari pa Jiyaniijia tojtiajaca quiquiaa. <sup>10</sup> Pueyasocuaajaari jiyanhua maninia. Nojuajaari maja na niyajetanu

quiniutianiya maninia nia miishano niarta Pueyaso pueya, Pueyaso panijiaca nia quiniuucua, taa quiarijia nia miyajaacuajani. <sup>11</sup> Naatej, taa shitimia niarta Pueyaso pueya naacujuacatucua niajaniani, naajuhuj, janiyari nia panitiaani pa Jiyaniijia nia sashiniuria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishitiriquiajaanihuaj, Pueyasoori jiyano nia maninia miiniutianiya pajaniya. <sup>12</sup> Majaari nia macuhuajeconu juhua taajecori nia quiniuria pa Jiyaniijia. Saniya nia quiriqia cutara juhua tariucua caanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquiya miiniu rejeretajacaari quiquiaarijuhuaj. Naaratej, Pueyasocuaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

<sup>13</sup> Pueyasoori seetanujuanaa saaquiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranj, nojuaja jaara miyaquiri na sequesano saaquiano Abraham. ¿Cantucuaa cumaacaraca Pueyaso na sanitionurani? Shaaqui. Nojuajanaacuajani Jiyaniijiajanaa. <sup>14</sup> Naaratej, Pueyasoori naa sequequiaari saaquiano Abraham:

“Janiyari seetanujuanaa maninia miiniutianiya quiajaniani. Janiyari quia juhua muetutenutaniya jiyano nia queraatiarani”.

<sup>15</sup> Naa Pueyaso sequenu nuhuaji saaquiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijiaatijia. <sup>16</sup> Pueyanaa, niaacuajani niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacarij, parta pueyanoori juhuajaniya pocua tiuujia. Majaari tari na taacanuunu pocuaji. <sup>17</sup> Naajuhuj, Pueyaso sequesacari taa seetanujuanaa na miiniutianiya na pueyarano, nojuajaari jiyano nia panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequesanojinijia. Cunora, nojuajaari naa sequequiaari: “Janiyacuaari Pueyasoni. Majaari cua niishiniu sapojonu. Cua sequesanoori seetanujuanaa”. <sup>18</sup> Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujia pueyani, paari poojia caji-tiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacuajitij, majaari pa taacanuunu quenaaja. <sup>19</sup> Naa Pueyaso sequesanoocua tiuujia pa quishacarij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni,

pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojijari. Naajuhuj, nocua pa tiuushanoni, nojuajaari jiyocuaaanu quia, niquishoojaariuhua na Que Pueyaso shuriucua na quiniuucua. <sup>20</sup> Nojuajaari na Quecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

### Jesuuri pueyacuara secojona, taa Melquisedec quiquiaaricuaani

**7** Cuno Melquisedecni, nojuajaari Salem tiaca jiyaniijia quijia. Nojuajaari Pueyasojanaa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasa tiacajinijinio jiyaniijianucuaani, Melquisedecri nocua tohuataquiaari Salem tiacajinijia. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jiyano nia maninia”. <sup>2</sup> Jiyacarij, Abrahamri na paraa casami nitariquiohua na quiquiojiniohuara. Naacuajitij, nojuajaari puetunu cuno casamijinijiojuanaa Pueyasora na riurosano niqutioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjinijia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuj, na tiaca sesa Salemni, cunoori pueyano rupaajinia sequeya, “Juhua janiya quijia pueya tiaca”. Na sesaari naa quiquiaari na pueya jiuujia cajitijia na quiniuucua. <sup>3</sup> Majaari tojearucuajanaa na niishishaanu, ¿queraca quiquiaaritia, nucuaracajuhuj, supuetanaaracano? Majaari quenaaja na pohuataasanujuhua na rasaanujinijia, na shaa-jenujinijinio. Naacuajitij, pajaniyara, Melquisedecri juhua pueyaracaanu quijiajuhanajaj. Majaari na niishishaanujuhuj, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Niyanu, pueyacuara secojona na quiniuria pueyaracaanura.

<sup>4</sup> Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjinijia. Naaratej, pa supuetana Abrahamri nareja na niqutioquiaari na paraa na shocotasano casamijinijinio. Secaja niqutioquiaariiri taa Pueyaso rootaquiaari pa supuetanaacuajani, nojori niqutiojonura nera. Tariucuaaanu, Pueyasoori pa supuetanaa niishitiojoquiaari nojori niqutiojonura secaja, puetunu nojori jiiatiasano casaajinijianaa. Naacuajitij, pueyano jaara diez casaa jiiatiare, cuaara Pueyasora niqutioora niquiriyatujua. <sup>5</sup> Pueyasocuaari supuetana Leví niqiohuacuajinijio supueno pueya jiyatequiaari narta Israel pueyacuara secojona nojori quiniuria. Nojoriiri jiyatesaaquiaari Pueyasora pueya niqutiojosano masejojua nojori quiniuriajuhuaj. Naa Pueyaso sequesanoacuajani Moisés Rootasanojinia naajiotasaaquiaari. Abrahamcuajani puetunu Is-



rael niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiojosano masejojua. <sup>6</sup> Melquisedecri pueyacuara secojona quiquiaarijuhuaj. Maja cutaraari Leví niquiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojuaacuajaari tari Abraham sequequiaari, nojuajaari maninia na miiniutianiya. Naajuhuj, Melquisedecri pa supuetana Abraham sequequiaari Pueyasoori jyanohua maninia miiniutianiya nojuaja. <sup>7</sup> Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji. <sup>8</sup> Quiarijiani, Pueyasorano pueya niquitiojosano masejojuacani, puetunu nojorijianaari shaajejaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminiojiniji pohuatashiyari. <sup>9</sup> Nia niishirijihuaj, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojona nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacuajitij, Abraham niquitiosacari Pueyasorano na riuriotaca Melquisedec, pa naata sequenu Leví quiriquianojuanaari jiyacari Melquisedec niquitioquiaari, Abraham quiniuucua na jiyasorano tari.

<sup>11</sup> Leviicuajinio supueno pueyari pueyacuara secojona quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seya puecooquiaari pueyaracaanu tama na camaruhuacuaraajaaja, nojori na jyanootiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajejaca cutara. <sup>12</sup> Aaróncuajaari narta pueyacuara secojona jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhuj, Moisés Rootasano niti na quiniuria. <sup>13</sup> Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucujiniocuaja, saniniuujia tamonu neyanuucujiniojaarohuj, teyanooquajinio que-

naaja niquiriyatu pueyacuara secojona supueyaquiquiaaricuajani. <sup>14</sup> Maatia niishishiyacuajaari, pa Jiyaniijiaari Judá niquiohuacuajinio supueno quiquiaari. Judaari Leví tarajanucuaja. Moisés pohuatasacari pueyacuara secojonaajinijini, majaari que-naaja Judá na jyaniquiniu quiquiaari.

<sup>15</sup> Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari. <sup>16</sup> Nojoriiri pueyacuara secojona quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. <sup>17</sup> Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

<sup>18</sup> Naacuajitij, puetunu Moisés rootasanojuanaa pueyacuara secojona pueya miishocoriquianoori tari jatasaaquiaari, najuhuana na quiniuucua. Cuno miishanoori cumacaaju quiquiaari pueya na jataniniuria.

<sup>19</sup> Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojtiajaca. Quiarijia saniniuujia, paari Pueyaso rupaa Jesucristojiniji jiitiaani. Nocua pa tiuushacari, Jesucristoori pueyaracaanu pa jyanootiquiaa na Que, juhujaniya pa rupenura nojuaja.

<sup>20</sup> Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojona nojori quiniuria.

<sup>21</sup> Saniniuujia, Neyanujiniji na sequesano, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequerecuajaari: ‘Quiaari pueyacuara secojoriquiano pueyaracaanu’”.

<sup>22</sup> Naacuajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniuucua. Naacuajitij, Pueyaso rupaa Jesujinijiri socua jyanohua maninia Moisés Rootasanojiniji. Cunoori pueyaracaanu rishijia Jesu quiniuucua.

<sup>23</sup> Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. <sup>24</sup> Jesu cutaraari shaajeyashijia. Naa pocuara secojona na quishacari, majaari quenaaja tamonu sanitiniu quiniutianiya nojuaja. <sup>25</sup> Naacuajitij, nocua pa tiuushacari, nojuajaari pueyaracaanu pocuara secojoquiaa, tojetaarucuajanaa maninia miijiacara pa jatanishaanura, Pueyaso pa

rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

<sup>26</sup> Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijia-ca tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijiaara na jiyatequiaari, Jiyaniijajanaa na quiniuria na shuriucua, tii na secojonura na Que pocuara. <sup>27</sup> Leví niquiohuacuajinio supueno pueyacuara secojona jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuarasaniuuja. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregonioyujua sesa pa miishanoocuaru, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijanaa. <sup>28</sup> Moisés Rootasanojinia, Pueyasoori tii sequeyacuaja canapuate pueyacuara secojona jiyaniijia jiyateshiyani. Puetunu cuno pueyacuara secojona jiyaniijianucujanaari sesa miijia quiquiaari, juhua puetunu pueyajuhuj. Jiyanoohua Moisés nuhuaji, Pueyasoori saniniuuja tama Neyanujaja jiyatequiaari pocuara secojonajanaa na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacuajitij, nojuajaari tojetaarucujanaa maninia, pocuara secojonara na jiyatesaanura.

#### Quiarinio Pueyaso Rupaacua pa tiushacari, Jesuuri pa jiyanootiquiaa na Que

**8** Nio, janiya na pacutenutaniuhua sequenuni, cunoori socua panishano nia niishiniuria. Cua tojjiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. <sup>2</sup> Nojuajaari tii na Que secojoquiaa pocuara Pueyaso Quishaquijijanaa. Cunoori Pueyasojanaa shipinishano quiquio, maja pueyano tiasano.

<sup>3</sup> Puetunu pueyacuara secojonaajanaari jiyatesaaciaari nojori masejonura narta pueya poosano casaa, Pueyasora nojori niquitiososano. Naajuhuj, nojoriiri seya puecoojuaca, Pueyaso nojori jiyanootiniuria. Naacuajitij, Jesucristo quiniuucua pueyacuara secojonajuhuj, nojuaja cuara casaa jiitiaara, Pueyaso na niquitiosocoriquianojuhuj. Cuno casaacuajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. <sup>4</sup> Leví niquiohuacuajinio supueno pueyacuara secojonaacuajaari pueya nitiasano nojoriicua masejoquiaajaa, Pueyasora nojori niquitiosocoriquiano taa Moisés Rootasano-

jinia sequeyacuajani. Naacuajitij, Jesucristo jaara mijiria quiriqiaaja, nojuaja maara pueyacuara secojona quiquiriqiaaj. Pueyacuara secojonaacuajaari queraatia quiya. <sup>5</sup> Pueyacuara secojonaa jeecajosano casaa Pueyaso Secojojuaja tajinia nojori jiitiasanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriqiaa Pueyaso Secojojuara suhuorotu, puetunu na casamitajanaano, jiyacaritij, Pueyasoori naa Moisés sequenu pacutequiaari:

“Moisésnaa, cua tojjiri. Maninia quia miiri jacaria puetunujuanaa, naatej, taa cua niquitiquianucua quiajaniyani, Sinaí tuhananuucua quia quishacari”.

<sup>6</sup> Pocuara Secojonajanaa miishanoori jiyanoohua maninia socua pueyacuara secojona Leví niquiohuacuajinio supueno miijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojiniiri jiyanoohua socua maninia Moisés Rootasanojiniji.

<sup>7</sup> Pueya jiuujia jaara na naata quiriqia seetanujanaa sesa miyashijiacara jatanishano Moisés Rootasano tojjijia nojori quiniuucua, Pueyaso maara quiarinio rupaa niishitiyaquiquiaari pajaniya. <sup>8</sup> Saniniuuja, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojinu. Cunora, tariucuacaanu pueyara Pueyaso sequesano caminiujunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujanaa cua pueya quiniutianiya. <sup>9</sup> Quiarinio cua rupaari tamaatia quiniutianiya Moisés cua niishitiososano rupaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriqiaa juucuanu nojori cua niquitiosocoriquiano jiyajiniara. Saniniuuja, nojoriiri Moisés cua rootasano nojoriria tojinu paniyaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. <sup>10</sup> Socua sequeyari: ‘Nio pa quishacari nuhuaji, janiyari naa miniutianiya cua saquiriososano pueyarani: janiyari coojia nianutianiya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitijajinia, seetanujanaa cua tojjitajaca nojori quiniuria. Naacuajitij, janiyari nojori Jiyaniijajanaa quiniutianiyani. Nojoriiri saniniuuja cua pueya quiniutianiyacujua. <sup>11</sup> Jiyacaritij, pueyano jaara janiyajiniji pohuatanu paniri narta pueyano, na cojiniajuhuj, tapueyocucacano, cunoori najuhua quiniutianiya. Puetunu pueyapuejanaacuajaari tariucua cua niishijia-ca quiniutianiya; jiyaniijianucua, poonijotesano pueyano. <sup>12</sup> Janiyari nojoriicua taraajeja quiniutianiyani. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutianiyani”.

<sup>13</sup> Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucua-caanu Moisés na rootasano jiyatequiaari tariucua-neera. Naacuajitij, Moisés Rootasanoori quera shaa-jasaanutianiya puetunujuanaa.

**Tariucuaaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj**

**9** Tariucuaaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaariiaariuhua taa pueyacuara secojonaa poonijionutaniya cuno na quiquiojiniani. <sup>2</sup> Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejanio, tee Pueyaso tacoji pan niojosaquiaari pueyaracaanucujani. Cuno sohuaca sesa quiquiaari "Pueyaso Shuriucua Quiquio". <sup>3</sup> Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari "Pueyaso Quishaquijianaa". <sup>4</sup> Pueyaso Quishaqui tacoji nujuatajaari juhuacutu, orojiniji shipinishano. Cuniqiu catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuca casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari "maná". Manaari quiquiaari Pueyaso tinishano casaa, Israel pueya miaquesocoriquiano cariiquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niquitiojosano. <sup>5</sup> Cuno caaja tiotiu caco nujuatejosano quiquiaariiri caapiqui shipinishano casaa, nesuhuara-ca, juhua Pueyaso seya niquishano. Nojori nesuhuari coqueetesano quiquiaari. Teecojuaari, teje Pueyaso shacantuuca mueranacujuquiaari Moisésacuajani. Cuno caaja tiotiuuri seya nanaca majiriutiasaquiijuhuj, Pueyaso jiyanooniuria puetunu Israel pueyajanaa. Tariucujaja puetunu cuno casaajiniijijianaa cua pohuatasano nijajaniya.

<sup>6</sup> Pueyaso Secojoua tia jaara tari naa maninia tiasano quiquiaari puetunu na casamitijajanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. <sup>7</sup> Saaja nojori jiyaniijia cutaraari tii tiuquiquiaari saaja rupaquijia puetunu marijijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. <sup>8</sup> Naa Pueyaso Quishaqui quiniuucua mishiquionucua pueyacuajitij,

Pueyaso Sohuanuuri pa niishitiya, pueyari juhuanoujaja maja na naata rupuenu quiquiaari Pueyaso.

<sup>9</sup> Naacuajitij, puetunu cunojuanaari quiquiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaa-janaari miriqui miishano quiquiaari saaja. Naajuhuj, pa supuetanaa niquitiojosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacuajitij, cunoori maja na naata cuno pueya jiuujia jeeccanu seetanujuanaa, juhujajaniya nojori rupenura Pueyaso. <sup>10</sup> Naaratej, cuno tariucuaaanu rootasanoori saaja panishaaquiaari Pueyaso cuara na sanitiquiaariiaatijia quiarinio rupaata. Cuno tariucuaaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaano, juhua maninia jeequejosano nojori quiniuria Pueyaso niquiara. Puetunu naa pueya miishanojuanaari maja na naata pueya jiuujia jeeccanu sesa nojori miishanojiniji.

<sup>11</sup> Quiari naataja saniniuujia, Jesucristoori pocuara Secojonajanaa jiyatesaaquiaari, Pueyasojiniji na masenura Pueyaso jiiitasano pajaniyarano. Cuno quiquio, tee na secojoquiaa na Que pocuaracuajani, cunoori seetanujuanaa Pueyaso quiquio jiyocuacaanu, maja pueyano tiasano. <sup>12</sup> Naa Cristo tiuquishacari na Que quiquiojinia Pueyaso na jiyanooniuria pajaniyatej, nojuajaari maja na tiuquitianu quiquiaari cabra nanaca, juunu niquiohua nanacanio. Nojuaja cutaraari tama na nanacatajaaja Pueyaso jiyanootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusonuucuatej, na Queeri Neyanuucua tiuujiaa jiyanooquiaa puetunujuanaa. Naacuajitij, majaari Pueyaso shuriucujaji pa taanuusaanu quiniutianiya.

<sup>13</sup> Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuj, jiyacaritij, nojuajaari juhua curuutuucua Pueyasora. Naacuajitij, cuno pueyanoori maja na naata narta pueya rupuenu. Majaari na naata Pueyaso Secojoua tijajinia tiuquiniujihuj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhua Pueyasora. <sup>14</sup> Naa pueya cuaqueya quiniuucua juhua jeequesano saaja seya nanacatacuatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajiniijijianaa. Naatej, taa pueyacuara secojonaa jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniuucua, Jesucristojuanaari tama na nanacajaaja

tiuquitiaquiaari Pueyasooocua, pa jiyanooshaanura puetunu sesa pa miishanojinijijianaa. Nojuajaari toje-taarucuajanaa sesa miyashijia quiquiaari. Naacujitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanootiniu Pueyaso tama pa miishanotajaaja. Naacujitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

<sup>15</sup> Jesucristo cusonuucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasooocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusonuta quiari naatajahuaj. Naacujitij, puetunu Pueyaso saquiriojosano pueyapuejanaari na naata puetunu Pueyaso niquitiojonu panishanojuanaa masenu, taa na sequequiaari niquitionu seetanujuanaacujani, pueyaracaanu shuquiriaatia jatiqui pa quiniuria nata. <sup>16</sup> Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa mijiani pa casami serotasaanura maninia, teyano pueya pa panitiaa nojori jitianura pa casamicujani pa shaajenu nuhuaji. Naacujitij, paa jaara tari jamosaareni, pueyari maninia miiquiaa taa pa naajiotaciaaricujani, saminio pa quishacarijia. <sup>17</sup> Naacujitij, saminio pa quishacarijia, najuhuaanari pa naajiotasano. Pa shaajesacari, jiyacari cutara pa casamiiri niquitiojosano. <sup>18</sup> Tariucuacaanu naajuhuj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. <sup>19</sup> Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaji, Moisésri juunu niquiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuaari. Cunota, mohuacanacu majiriutiaquiaari Pueyaso Rupaa na naajiotasanoocuaari, puetunu Israel pueyacuajanaanio. <sup>20</sup> Jiyacaritij, nojori sequequiaariiri: "Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojjijiaa quirini". <sup>21</sup> Moisésri Pueyaso Secojua tiaacua majiriutiaquiaari nanacajuhuj, puetunu Pueyasora poonijiotajara shipinijosano casamiicujanaanio. <sup>22</sup> Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

### Sesa pa miiniuri jiyanooshaaquiaa Cristo cusonuucua pocuara

<sup>23</sup> Mijiria Pueyaso Secojua tia, puetunu na casaatjanaa quiniucua juhua jiyocuacaanu casaa naaqui, seya nanacaari maninia quiquiaaricujanaa cuno mijiria casami quiniuria jeequesano. Saniniujia, jiyocuaaanu casaa quiniuria jeequesano, socua maninia

nanacaari panishaaquiaari seya nanacajiniji. <sup>24</sup> Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. <sup>25</sup> Mijiria pueyacuara secojonaa jiyaniijianucuaari puetunu marijarajanaa pueyaracaanu tiuquijioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. <sup>26</sup> Jesu jaara Pueyaso pa jiyanootiriquia puetunu marijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijarajanaa. Quiari naataja saniniujia, Jesucristoori mijiria rasaaquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijijianaa. Majaari socua na pacutesaanu quiniutianiuhua monu. Naa na mosaanuucuatej, cunoori tariucuaa puetunu nocua tiuujiaa pueyajanaa jiyanooshaanura. <sup>27</sup> Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhua, socua na cusonuhua juhua coteenu na cusonu. Nojori shaajenu nuhuaji, nojoriiri saaja sashiya Pueyaso nequesoreenura nojori. <sup>28</sup> Naajuhuj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacujitij, pocua na muetasacariuhua, majaari jiyacari socua na mosaanu quiniutianiuhua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianiuhua, noo pojoriria canapuate na sashiyacuajani.

**10** Moisés Rootasano pueya miishocoriquiano, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojtiaajaca pueya cutaraari puetunu marijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miiijiaa pueyara na jatanishaanu seya nanacata. <sup>2</sup> Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. <sup>3</sup> Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia nojori miishano sesa. <sup>4</sup> Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujua seetanujuanaa.

<sup>5</sup> Cunora, tariucuacaanu Pueyaso Rupaajinia, mijiria Jesucristo nishacari na sequesocoriquianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacuajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyara-cua cua quiniuria cua jiyateree, quiocuara cua mosaanura. <sup>6</sup> Majaari quia timiniu quiquiaa seya catijiasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. <sup>7</sup> Naaratej, janiyari quia sequeyani: ‘Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajio-tasaaquiaricujani’”.

<sup>8</sup> Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasoocuara, na nataacuacajinijinio nojori niqutiojonura nerajuhuj. Nojoriiri niishitiojosaaquiaarijuhuaj nojori catijanura na seya Pueyasoocuara, tama nojori seya nanacajaaja shootesaanurajuhuj, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. <sup>9</sup> Nocujaji, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niqiaari pocuara na mosaanura, seetanujuanaa jiyanooshano pa quiniuria cutara, maja najuhua seya puecoosaanura socua. <sup>10</sup> Pueyaso tojijia na quiniucua, Jesucristoori tama na cuaqueyajaaja tarinitiaquaaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

<sup>11</sup> Israel pueyacuara secojonaa pueya poonijiosacari Pueyaso Secojouja tijinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. <sup>12</sup> Saniniuujia, Jesucristoori tama na cuaqueyajaaja tarinitiaquaaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na cusonuucua pa niti, puetunu nocua tiuujia pueya sesa miishanojuanaari tojetaarucujanaa jiyanooshaaquiaa. Naa na tuccatanu nuhuaji Pueyaso miiniu panishano pueratej, nojuajaari na Que miaquetajara cajiquiaari. <sup>13</sup> Quiarijia tii sashiyari, Pueyaso cuara na paraa shocotare puetunujuanaajaatijaj. <sup>14</sup> Naa niquiriyatu pueyano mosaanuucatej, puetunu nocua tiuujia pueyajanuari maninia mijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. <sup>15</sup> Pueyaso Sohuanucujajaari naa pa niishitijuhuj naa Pueyaso sequesacari tariucuacaanu na rupaajinia:

<sup>16</sup> “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua

saquirojosano pueyani, quiarinio cua rupaacua nojori tiushacari. Janiyari quiarinio cua rupaa nianutaniya nojori jiuujiajiniani, na tojijia nojori quiniuria. Naa-juhuj, janiyari juhua na naajiotanutaniya nojori niishitijajiniani. <sup>17</sup> Janiyari puetunu sesa nojori miishanojuanaa niyajetanutaniya seetanujuanaa’”.

<sup>18</sup> Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

### Pueyaso pa rupuere jeequesano poojiata

<sup>19</sup> Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. <sup>20</sup> Nojuajaari quiarinio nucuaco pa jaatiaquiaa na Queecua. Nojuajaari juhua pocujaji nuunuquiaari Pueyasoocuara. Mijiria Pueyaso Secojouja tijiniani, Pueyaso Quishaquiiiri shiquiaruque toqueta mishiquionucua quiquiaari, pueya tiuquitiaaquiniuria Pueyasoocuara. Cuno shiquiaruque toque cutaraari sutequiaari Jesu cusosacari. Cunocujajaari pa niishitiya, pocujajiiri juhua nuunusano quiya Pueyasoocuara. Neyanu Jesucristocujajaari cuno quiarinio nuu. Nocua pa tiushacari, paari pueyaracaanu rishijiacara jatanishaaquiaa juhua nojuajuhuj. <sup>21</sup> Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. <sup>22</sup> Cunora, Pueyasoocuara pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocujaji pa taacanuunuta. Naa pa rupueriquia nojuaja, jatanishano jiuujiata, juhua poojiacua Jesu nanaca majiriutiasano quishacari. Naa-juhuj, puetunu sesa pa miishanojuanaa cuara jiyanooshano quiiira, naatej, taa pa cuaqueyacuanaa, pa nanasacari maniniuniacu mohuacata. <sup>23</sup> Naa jaara moojinia tiuquinijiosaaquiaari, niaari maninia pohuataquiaari pueya niqiuara Jesuucua nia tiuuniujiniji. Nocua nia tiushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocujaji. <sup>24</sup> Parta Pueyaso pueyacuara tacaajia pa quiriqia. Panijia pa quiniuria pa shiniujitiooriquia, maninia mijia pa quiniuriajuhuaj. <sup>25</sup> Noojiaqueya parta Pueyaso pueyari tari jitiqiuocanu maja na rerejonura narta Pueyaso pueyata. Majaari naa nia miiniujuhuj. Maninia cutaraari pueyaracaanu pa rerejonura parta Pueyaso pueyata, pa shiniujitioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuari tari catecanoya.

<sup>26</sup> Naa niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa mijioquiaa tama pa panishacarijaajani, ¿cantucua socua pocuara cusonu pacuterohua saajaniuhuj? Shaaqui.

<sup>27</sup> Naa sacuaatia mijiacani, nojori cuara niishiiria, nojoriiri cocuaatia miya. Nojori jaara nojori jiuujia taca-

toyaquiri sesa nojori miiniujiniji, nojoriiri jiyanoohua saniitiosaanutaniya. Narta Pueyaso paraata cojiriti-asaanutaniya quejooonu mani quiquiojiniaari pueyara-caanura. <sup>28</sup> Pueyano jaara Moisés Rootasano to-jiyaquiquiaari, querajaa pueya jaara nocuara saquirio-jotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. <sup>29</sup> Moisés Rootasano to-jiyashijiaa jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua na-juhuanaratej? ¿Noo pojoritiiri jiyanooshaanutaniya-juhuaj, Pueyaso Sohuanuucua rimiaaquejaca sacuaaraatej? [Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojiyashijiaa pueyajiniji. <sup>30</sup> Paacuajaari tari tojiyashijiaa naa Pueyaso sequesanoori: “Janiyacuajaari naminiani. Janiyari sesa miijiaa saniitionutaniya”. Naa naajiotasaaquiaarijuhuaj: “Pa Jiyaniijia Pueyasoori na pueya nequesoreenutaniya”. <sup>31</sup> Jiyanoohua puereeta quiniutianiya cutaraari Pueyaso jyanoonuuruuretajaca pueyara, Pueyaso nequesoreesacari nojori!

<sup>32</sup> Pueyanaa, tariucuacaanu naquiya nia miishaanu nia niishiriqia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niari juhuajaniya rejeretaquiaari saaja. <sup>33</sup> Noojiaqueya nijaniyajinijioori cararaatia macaatashaaquiaari. Ni-aari pueya niqiuara naquiya miishaaquiaarijuhuaj. Niarta Pueyaso pueya niqishacari naa nia mi-ishaanutej, nojoriiri na puereyaquiniutia nia cojiqiaari saaja, niaacua nojori taraajesacari. <sup>34</sup> Naajuhuj, niarta Pueyaso pueyajinijio jaara nujuatejosano quiquiaari nujuatejojuajinia, Jesu tojtiajaca nojori quiniuucua, ni-aari nojoriicua tiuquijioquiaari, nojori nia cumaniijnura nocua nia taraajenuucua. Naajuhuj, nia paraa jaara nia jiitiasano casami riutiocojoquiaari tama nojoririjaaja, nojori soosano Jesu pueya nia quiniuucua, niari juhuajaniya nojoriria tarinitiaquiaari saaja. Ni-aari saaja shuquiriaatia quiquiaari nia niishishacari ni-aari jiyocuacaanu jiitiaa socua maninia casaa cuno casamijiniji, pueya jaariutiasano nijaniyajinijio. Cuno, Pueyaso jiitiasano niaaranoni, cunoori shaajeyashijia casami cutara. <sup>35</sup> Naatej, taa juhuajaniya naquiya miiniu rejeretajaca nia quiquiaaricuaajani, Pueyaso sequesanoocua tiuujiaa nia quiniuucua, naa Pueyaso sequesanoocua tiuujiaa nia quiriqia pueyaracaanu. Pueyasocuaajaari jiyanoohua maninia miiniutianiya nocua tiuuniu tarinitiaashijiaa. <sup>36</sup> Naquiya nia miishacari pueyaracaanu, juhuajaniya nia rejere-tariquia saaja, maninia nia tucuatana puetunu Pueyaso panishano nia miiniurijanaa. Naacuajitij, ni-aari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria.

<sup>37</sup> Tariucuacaanu Pueyaso sequesanoocuaajaari naa naajiotasano quiya:

“[Niaaj! Quera tiuquiya pueyacu Niriquiano! Maja na tarishiniu. <sup>38</sup> Cua jiyanooshano pueyari pueyaracaanu rishijiacara jatanishaanutaniya saaja Quiyanuucua nojori tiuushacari. Saniniuuja, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

<sup>39</sup> Cuno pojoriiri saniitiosocoriquiano seetanujuanaa. Pajaniya saniniuuja, paa cutaraari maja jiyano pueyajinijio. Paacuajaari pa Jiyaniijiaa tiuujiacani, pueyaracaanu nata pa quiniuria shuquiriaatia.

### Pueyasocua tiuuniujiniji pohuatasano

**11** Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyano pa niqishoo casaani, cunoori seetanujuanaa quiya. <sup>2</sup> Noojiaqueya pa supuetanaajinijioori seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojorijiniji naa sequesocua: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujanaa”.

<sup>3</sup> Pajaniyara naajuhuj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacuajitij, puetunu pa niqishano casaajanaari shipin-ishaquiaari niqishoo casaajiniji.

<sup>4</sup> Supuetana Abel tiuuniuucua Pueyasocua, Pueyasocua na catijasanoori socua maninia quiquiaari Pueyasora tarajanu Caín catijasanojiniji. Naa Abel tiuuniuucua Pueyasocuatej, Pueyasoori na jiyatequiaari maninia na pueyano na quiniuria. Pueyasoori Abel catijasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajaari pa niishitiojijajaa Pueyasocua pa tiuuniuria taa nojuaja tiuquiaar-icuaani.

<sup>5</sup> Supuetana Enoc quiniuucua Pueyasocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucuaaji. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajiniji pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. <sup>6</sup> Seetanujuanaari, paa jaara Pueyasocua tiyashijia quirini, majaari pa naata timitiniu Pueyaso. Naacuajitij, cante Pueyaso niishiniuucua jiaatiaani, nojuaja cuara tiuuria Pueyasoori seetanujanaa quijia. Nojuaja cuara tiuuriajuhuaj, Pueyasoori na seconuujuaca tojiquiaa. Nojori panishano miiquiaa nojoririjaarijuhuaj.

<sup>7</sup> Pueyasoori supuetana Noé numootequiaari nojuajaari nio jiya pajaashitaniniutianiya, puetunu mijiria sesa miiijacajanaa na shaajanura. Pueyasoori na sequesocuaarijuhuaj puereetuca buque na shipiniuria

tii na tacatajara pajaacuaji. Jiyacaritij, Noeeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquiocoahuatajuhuaj. Puetunu narta mijiria quijiaca pueyajanaari cusonuquiaari pajaajinia, nojori tiuyaquiniuucua Noé pohuatasanoocua Pueyasojiniji. Noé cutaraari juhua sesa miyashijara jiyatesaaquiaari pueyaracaanu Pueyasota rishijara na quiniuria, Pueyasooocua tiuujia na quiniuucua.

<sup>8</sup> Abrahamri Pueyasooocua tiuquiarijiuhuj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijiaara na niqutionutaniya tama na jiyaranojuaja. <sup>9</sup> Pueyaso niqutiosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanajojuua pueyano. Abrahamri juhuanojuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abrahamri niyanu Isaacri naa quijia quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujia quiquiaari pueyaracaanujuhuj. <sup>10</sup> Pueyaso jaara Abraham sequequiaari, nojuajaari pueyaracaanu na quijiarano quiquio na niqutionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

<sup>11</sup> Naajuhuj, seetanujuanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. <sup>12</sup> Naacuajitij, mueya shipiniyashijia saaquianoori mueya mueratequiaari. Cuno neyanuucujinjo supueno pueyari queraatiara canequiaari, queraatiata juhua riya, serojijaquishoo, juhua shoniniacu caminia shuriuquioco paajia jaaquia.

<sup>13</sup> Puetunu cuno pa supuetanaajanaari Pueyasooocua tiuujia shaajecoquiaari. Nojoriiri juhuanojuaja maja na jiitiano quiquiaari seetanujuanaa Pueyaso sequesano nojori na niqutiosocoriquiano. Naajaa, seetanujuanaa nojori tiushacari Pueyasooocua, nojoriiri, Pueyaso sequesanoori juhua tariucua tucuaaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri

juhuajaniya quiquiaari juhua rucoojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano.

<sup>14</sup> Naacuajitij, paari niishiyani nojoriiri tamonu jiya jiitianoocua jiaatiariquiaa, pueyaracaanu nojori quiquiorano cutara. <sup>15</sup> Nojori jaara saaja mijiria jiya camaruhua quiniuria panijia quiquiaari, nojori maara na supuetujua jiyajiniara riujuuquiaariuhua. <sup>16</sup> Saniniuujia, nojori cutaraari socua maninia jiya jiitianoocua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuanano nojoriiri. Naaratej, majaari Pueyaso caririquiniu quiquiaari nojori sequesacari: "Pueyasoori canaa Jiyaniijia". Nojuacuajaari tari jeenucuanano tiaca jiitiaa nojoriiriano jiyocuacaanu.

<sup>17</sup> Pueyaso sequesano Abraham na mueratesano mueya jaara tari mashajaniyojuua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariicuaara na panishano niyanu moora, nocuara na catijiasocoriquiano. Cuno neyanu Isaacuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretano quiquiaari Pueyaso. Nojuajaari tari Pueyaso sequesanoocua tiuuriquiaa saaja. <sup>19</sup> Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojuua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacuaani.

<sup>20</sup> Isaac tiuuniuucua Pueyasooocujuhuj, nojuaja jaara saaquiano quiquiaarijuhuaj, nojuajaari necohua sequequiaari, Jacobo, Esaúnio: "Pueyasoori jiyanohua maninia miiniutianiya niaara, niaacuajinio supueno pueyano, taa na sequequiaari janiyacujani".

<sup>21</sup> Jacoboori Pueyaso sequesanoocua tiuujia quiquiaarijuhuaj. Naacuajitij, quera na cusonu panishacari, nojuajaari neyanu José niqiohuua sequequiaari: "Pueyasoori jiyanohua maninia miiniutianiya niaara, niaacuajinio supueno pueyano". Naa na sequenu nuhuaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

<sup>22</sup> Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianiuhua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujanura na nucuha Egipto jiyajinia, nojori

jaara quiojorohua Pueyaso niqutiosocoriquiano jiyajiniara.

<sup>23</sup> Moisés queya quiniuucua Pueyasooocua tiuujiaca, nojoriiri Moisés jamoquiaari jaara shusha rasaaquiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyara-caanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocohua shusha roosano canuujuanaa cuaara moojinia quejoosaaria. Naajaa, nojoriiri cuno sequesano tojiyaquiaari nojori puereyaquiniutia saaja, Pueyasooocua tiuujiaca nojori quiniuucua.

<sup>24</sup> Naajuhuj, Moisés quishacari tariucua cumantumaca, Pueyasooocua tiuujiaca na quiniuucua, nojuajaari na canashitinia Faraón niyatu tamacaquiaari. Nojuajaari tama sequequiaariijaaja: “Majaari Faraón jinianu cua quini paniniu. Janiyacuajaari Israel pueyanoni”.

<sup>25</sup> Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacuara taraajequiaari, Egipto jiyajiniijia poonijitenucua nojori puera. Cunora, nojuajaari niishiriojoquiaari nojuaja cuaara cojiritiasaaria naquiya miishaanu narta Israel pueyatajuhuaj. <sup>26</sup> Pueyaso sequesanoocua tiuujiaca na quiniuucua, nojuajaari niishiquiaari Pueyasoori na tojtiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jitiaja na quiniuria mijiria, Faraón jinianu na quiniuucua.

<sup>27</sup> Pueyaso sequesanoocua tiuujiaca Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniijia. Majaari na puerenu quiquiaari Egipto jiyajiniijia juaashacari jiyanojua. Seetanujuanaa Moisés tiushacari na niquiyaquishoo Pueyasooocua, nojuajaari Pueyaso niquiquiaari nojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. <sup>28</sup> Quera Israel pueya mashishacari Egipto jiyajiniijia, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijia jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiujiutianura na tia tohuateyaji, maja nia jiyapueranuhua cusojuasaanurajuhuj”. Moisésri Pueyaso sequesanoocua tiuuquiaari. Naacuajitij, puetunu Israel pueya jiyapueranuhujiniijianu, majaari quenaaja niquiriyatu niyanu mosaanu quiquiaari cutara.

<sup>29</sup> Israel pueya mashishacari Egipto pueyacuaji juucua, Naatunacu jyanishano caminiaari nojori ritiquiaari saaja. Nocuaji, Pueyasoori caminia raqitiquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiaara

caminia taquijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiyajiniijia soldadohua jaara juhua nojori niuutianu paniquiaariijiuhuaj, nojoriiri saaja shushiniuucua.

<sup>30</sup> Israel pueya tiuquishacari Pueyaso niqutiosocoriquiano jiyajinia, nojoriiri na paraa Jericó tiaca shocua camaruncuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaariijianaa.

<sup>31</sup> Puetunu Pueyaso tojtiaashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajiniijio namuenujuna na jamojuuucua tarijia narta pueyacuaji. Rahabri naa maninia miiquiaari Pueyasooocua tiuujiaca na quiniuucua. Naaratej, Israel pueyari cuno paanatu jiyanoocua.

<sup>32</sup> ¿Teyano pa supuetanaajiniijia cua pohuatanutaniya nijaniya socuani? Socua queraatia pa supuetanaari Pueyasooocua tiuujiaca quiquiaari. Tariucuaaja cua pohuatasano, maninia nia niishiniuria Pueyasooocua tiuujiaca pueyari Pueyaso jiyanooshano. Naajuhuj, majaari jeya cua quiniu cua pohuatanura maninia nio porijiniijia: Gedeón, Barac, Sansón, Jefté, David, Samueljiniijio, socua narta Pueyaso sequesano caminiujunaa pueyajiniijio. <sup>33</sup> Pueyasooocua tiuujiaca nojori quiniuucua, nojoriiri tamasa jiyaniijianucua miaquejoquiaari na jiyajiniijia. Pueyasooocua tiuujiaca nojori quiniuucua, nojoriiri maninia jiyaniijianucua quiquiaari, maninia na jitianura narta Israel pueya. Pueyaso sequesanoocua tiuujiaca nojori quiniuucua, nojoriiri Pueyaso sequesano nojori na niqutiosocoriquiano masequiaari. Pueyasooocua tiuujiaca nojori quiniuucua, juurunu sareya rupaari juhua seecujutasaquiaari saaja, maja na soonura nojori. <sup>34</sup> Pueyasooocua nojori tiuuniuucua, nojori jaara manijinia quejoosaaquiaari, nojoriiri maja na catenu quiquiaari. Pueyasooocua tiuujiaca nojori quiniuucua, nojoriiri na paraacuaji mashiquiaari saaja, maja na puecoosaanura nijiniaquetucuaaja mueruuta. Pueyasooocua tiuujiaca nojori quiniuucua, sasaca pueyari jyanohua cumaacaraca quijiacara quiquiaari. Pueyasooocua tiuujiaca nojori quiniuucua, nojoriiri jyanohua cumaquishaaquiaari na paraa nojori miaquejonura, na paraa nojori mashiquiniuria nojori jiyajiniijiuhuaj.

<sup>35</sup> Naajuhuj, Pueyasooocua tiuujiaca maajipohua quiniuucua, nojori macuuri samiiticoquiaariuhua nojoriria.

Tamasacaari jyanohua taraatia miishaaquiaari Pueyasooocua tiuujiaca nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasooocua tiuujiaca nojori quiniuucua, nojoriiri saaja paniquiaari nojori cuaara puecoosaaquiaari, naajaa, jyanohua naquiya na miiniutia. Nojoricuajaari niishiquiaari, Pueyasoori nojori samiitianijionutaniuhua,



jiyanohua shuquiriaatia nojori quiniuria pueyaracaanura cutara. <sup>36</sup> Tamasaca quiniuucua Pueyasooocua tiuujiacajuhuj, nojoriiri cararaatia macaatishaaquiaari, jiyanohua majacusaaquiaariijaariuhuj. Naajuhuj, tamasaacari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. <sup>37</sup> Tamasacaari saitia jacusaaquiaari na puecoosaanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanohua naquiya na miishaanura. Naajuhuj, tamasaacari nijiniaquetucujaja mueruuta puetujusaaquiaarijianaa piyonu. Naajuhuj, tamasaaca quiniuucua Pueyasooocua tiuujiacajuhuj, nojoriiri juhua taanuusano rucojoquiaari puetunu tiquiyocujajanaa. Casamijuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanohuj. <sup>38</sup> Juhua taanuusano nojori quiniuucua, nojoriiri juhua tashuquioono rucojoquiaari cariiquia jiyajinia, tuhuananuhujianio. Tiaajunucua nojori quiniuucua, nojoriiri saaja raaco maquiyonuujajaca quiquiaari. Mijiria quijijaca pueyari nojori jiyatequiaari juhua najuhua quijijaca pueyara. Naajaa, nojori cutaraari seetanujuanaa Pueyaso timitiasano pueya quiquiaari, nocua tiuujijaca nojori quiniuucua.

<sup>39</sup> Pueyasooocujajari nojori jiyanoocujajari, seetanujuanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujuanaa Pueyaso sequesano nojori na niqutiosocoriquiano. <sup>40</sup> Pueyasoori nio pa quishacari nojori sashitijajara, jiyanohua maninia na miishacari pajaniya na Sohuanuta, Neyanu Jesucristooocua pa tiuuniuucua. Na nuhuaji, Pueyasoori puetunu nojoritijajanaa pa cojiritianutaniya jataniniu tojetaarucujajanaa maninia miijijaca pa quiniuria, na shuriucuaara na rijiosacari puetunu pajaniyajanaa.

**Jesu miishano pa niishiriojoriquia, naquiya rejeretajaca pa quiniurijuhuj**

**12** Naa pa niishishacari taa queraatia pueya maninia miijijacari Pueyasooocua tiuujijaca nojori quiniuucuaacuaani, cunora, tama pa cojetasano najuhua casaa pa tarinitiariquia. Tarinitiaashiyari puetunu najuhua casaaajanaa, teyanooocua pa cojequiaa Pueyaso panishano pa miyaquiniuriacujajani. Naajuhuj, puetunu sesa miiniujajanaa pa tarinitiare, puetunu pa cumaacajanaa pa jitianura, juhuajaniya rejeretajaca pa quiniuria. Naacuajiti pa naata maninia tucuatunu puetunu Pueyaso panishanojuanaa pa miiniuria. <sup>2</sup> Jesu miishano pa niishiriojoriquia pueyaracaanu. Nojuajaari tojetaarucujajanaa na Que Pueyasooocua tiuujijaca quiquiaari. Nojuajaari niishiquiaari, naquiya na miiniu nuhuaji, na Queeri jiyanohua shuquiriaatia quijijara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanuhuj. Cunora, nojuajaari na Que miaquetajara cajiya, Jiyaniijajanaa na quishacari.

<sup>3</sup> Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa miijijaca paraacashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia tarajenuta naquiya nia miishacari. <sup>4</sup> Niaacuajaari naquiya miishaquiaa, Jesucristooocua tiuujijaca nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucujaji. Nia rejeretariquia saaja. Majaari juhuanojuaja nia puecoosaanu quiquianu na tojtijajaca nia quiniuucua. <sup>5</sup> ¿Niaateeri Pueyaso rootasano niyajetarucuaa tari, na rootasano pajaniya juhua necohujaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. <sup>6</sup> Quia Jiyaniijia cua quiniuucua, janiyacujajari cua panishano pueyano jiuujijayashijiani sesa na miishacari. Naa-juhuj, janiyari cua niyanura cua jiyatesano pueyano saniitiojani jaara sesa miiriquia”.

<sup>7</sup> Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria nijaniya, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? [Maja! <sup>8</sup> Naa-juhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niqiriquia nijaniya sesa nia miishacari, cunora quiri maja seetanujuanaa necohua nia quiniuucua, juhua tamonu queecuajinio nia quishacari. <sup>9</sup> Naajuhuj, naatujoori pa quishacari, pa queyari pa majacujaja, nojori pa tojiyacquishacari. Majaari cunora nojori rerequetajaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? [Maja! Nojuacuajajari seetanujuanaa pa sohanu Que, pueyaracaanu rishijijaca pa quiniuria. <sup>10</sup> Pa queyari pa canashitioquiaari taa nojori paniquiaaricujajani. Nojori rootasacari pajaniya, nojori saniitiosacari pajaniya, cunora quiquiaari saaja mijiria pa quiniuria maninia. Pa Que Pueyaso saniniujijaja, nojuajaari pa saniitioquiaa seetanujuanaa maninia miijijaca pa quiniuria, juhua nojuaja pa quiniurijuhuj. <sup>11</sup> Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijijara jatanishaaquiaani, socua Pueyaso tojiijara pa quiniuria juhuajaniyajuhuj.

**Jiyanohua cocuaatiaari Pueyaso pa tojiyacquishacari**

<sup>12</sup> Naacuajitij, majaari nia pishiniu pueyanaa, Pueyasoori saniitiosacari nijaniya. Nocua nia tiuuri saaja. Nioojijaca nia cumaquiriohua. <sup>13</sup> Saaja Jesucristo rupaa tojiijijaca nia quiri, jatarinitiaja Pueyasooocua tiuujijaca mariqui noojia niqijiotereeri. Nojori cuuara saniya cumaquishano quiri cutara.

<sup>14</sup> Tama nia cuaqueyajaaja nia cumaquiriquia, juhuajaniya quijijaca nia quiniuria puetunu pueyatajanaa.

Majaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniijia niquiniutianiya, seetanujuanaa maninia miijiacara jatanishano pueyatej.

<sup>15</sup> Pueyasocuaajaari pa jiyanoojia. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari nijaniya. Nojuajaari cumaacaracacuaaja na cumaquiniuria nijaniya nia panishacari. Naacujitij, niarta Pueyaso pueyano jaara juaatishaare tamonu miiniucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacu paaquentaniya na sesonura queraatia pueya. <sup>16</sup> Naajuhuj, tama nia cojuatooriqijaaja. Naa nia miitiooriquia tamonu nijaniyajiniinio mariqui Pueyaso sequesano na niquitiosocoriquiano pajaniya soojeara quiriiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miqiaaritij. Tamacari na miaajesacari, nojuajaari Jacobo sequesiaari: "Cua tarajanunaa, pa que niquitiosocoriquiano janiya, na jiyapueranu cua quiniucuanu, cuno cuara quiiria quiara, quiaa jaara quia sumatuu-jiniji rupore quiiria. Jiyanoohua miaajeyanijia". <sup>17</sup> Ni-aacuaajaari niishiya, na nuhuaji, Esauuri paniquiaari na que secojonura nocuara, jiyanoohua maninia Pueyaso miiniuria nojuaja, na que jiyapueranu na quiniucua. Na queeri na ruuretaquiaari saaja. Esauuri jiyanoohua na que nenecojoquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niquiara.

<sup>18</sup> Nio pa quishacari, pajaniyara, Pueyasoori maja juhua tariucuaaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanoohua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanoohua ninishiquiiri quiriqiaajuhuj. Paratuuri jiyanoohua piyarojoriquiaa puereetajuhuj. <sup>19</sup> Trompeta jonenenuunuuuri jiyanoohua tojishaariquiaa. Pueyaso pocuanuuri jiyanoohua tojishaariquiaajuhuj. Israel pueya tojishacari Pueyaso pocuaano, nojoriiri jiyanoohua puere-tuquiaari. Naaratej, nojoriiri Moisés sequetuquiaari maja socua Pueyasojuaanaa pocuanura nojoriicua.

<sup>20</sup> Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari na sequeriquiaa nojoritij, cuno tuhuananuucua nojuajanaa quiniucua:

"Cante nio tuhuananu rupueyani, cuno pueyano cuara mosaaria saitia jacusano, cashanata soj. Naa miijia seru cuara naa puecoosaariajuhuj".

<sup>21</sup> Puetunu Israel pueya niquishanojuanaari jiyanoohua puereeta quiquiaari seetanujuanaa. Moisésjanaari na puerequiaarijuhuj. Nojuajaari na puerenuta sequesiaari: "Cua puerenuta tetecanijia".

<sup>22</sup> Nio pa quishacari saniniuujia, majaari pa catecanonu quiquiaa cuno tariucuaaanu pueya puere-

sano tuhuananuucua. Jesucristo cusonuucua pocuara, paari Pueyaso quiquiojinijanaa tiuquitiaquiaani. Cuno na quiquio sesaari miriqui sequeshiya "Sión tuhuananu". Na pueya pa quiniucua, nojuajaari jiyocuaaanu pueyaracaanu pa quijiarano tiaca jiitiaa.

Cunoori seetanujuanaa jiyocuaaanujinio Jerusalén tiaca. Naacujitij, paari jiyanoohua queraatia Pueyaso seya rupuequiaani, Pueyaso pa maniniuhaqueetanura nojoritajuhuj. <sup>23</sup> Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniucua, pa sesacaari jiyocuaaanu Pueyaso nequesoreetuneejinia naajiotasano quiya. Paari Pueyasocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasocua tiuujiaa sohuanuhuari tii quiyajuhuj, canapue Pueyaso jiyatequiaari tojetaarucujanaa sesa miyashijiacaracuaani. <sup>24</sup> Jesucristoori tii quiyajuhuj. Nojuajaari tama na cusonutajaaja Pueyaso jiyanootiquiaari nocua tiuujiaa. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucujanaani. Naacujitij, Jesu nanacaari jiyanoohua socua maninia Abel nanacajiniji. Cain monuucua tarajanu Abel, Abel nanacaari Pueyaso shiniuujia na mona cuara mosaariajuhuj. Jesucristo nanaca saniniuujia, cunoori Pueyaso pa jiyanootiquiaacujua.

<sup>25</sup> Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuaaanu, pueyari jiyanoaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoaquishaaquiaari nojori tojiyaquiniucua mijiria Pueyaso quishacari na sequesano. Nojori jaara naa jiyanoaquishaaquiaaricuaa, nio pa quishacari saniniuujia, zpaatucua taa jiyanooshaariquia pa ruuretasacari Pueyaso quiarijiani, jiyocuaaanuji na piriyojosacari pajaniyani? <sup>26</sup> Pueyaso pocuasacari Sinaí tuhuananujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: "Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu". <sup>27</sup> Naa na sequesacari taa socua na caminiutianihua jiya jiuuquiutianuni, naacujiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. <sup>28</sup> Quiarinio quiquio, Pueyaso shipinishano na niquitiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanoohua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja. Naacujitij, nojuaja pa timitiare jiyanoohua pa paniniutia nojuaja, pa puerenutatio. <sup>29</sup> Nojuajaari puereeta mani, Neyanu ruuretajaca shaajaja, sesa pa miishano catijajajuhuj.

### Taa pa miyani Pueyaso pa timitiniuria

**13** Majaari panitioonu nia tarinitianu. Naa Pueyaso pueya nia quiniuccuatej, pueyaracaanu panitioojuaca nia quiriquia. <sup>2</sup> Naajuhuj, majaari rucoojua-ca ruuretanu, niaacua nojori tiuquishacari. Nojori pani-jia nia quiriquia. Noojiaqueya pa supuetanaajinijin-iocujaaari Pueyaso seya masuuquiaari na tiacora, no-jori jiyanihacari nareja pueyano naasucua.

<sup>3</sup> Nujuatejosano pueyacuara taraajejaca nia quiriquia. Tama nia cuaqueyajaaja nia jiyatere juhua nojoritia nu-juatejosanojuhuj, nojoriicua nia taraajenura seetan-juanaa. Naquiya miitiasano pueyacuara taraajeja nia quiriquiajuhuj. Nia niishiriquia, niaari na naata naa miitiasaanujuhuj.

<sup>4</sup> Pueyasojuanaacuajaari pa niishitioquiaari pa cami-tioonura. Cunora, camitioonu pueya cuara saaja ney-acata, necocuata quijia quiiria. Cante camiojuani, no-juaja cuara tama na cuaqueyajaaja cojuara maja narta pueyano niqiuocua na numuetucunura, na camishoo maajinio. Nia niishiri, Pueyasocuajaari naa sacuaraatia miijica saniitionutaniya.

<sup>5</sup> Majaari cumaneeca porocua nia quiniu tama ni-aarajaaja nia jiitianura. Juhujaniya quijica nia quiriquia nia jiitiasanota. Nia niishiri, Pueyasocuajaari sequequiaari: "Majaari cua cartenu quiniutianiya nia-janiya juhua japueyojua nia quiniuria. Majaari quenaaj-a cua tiujianu quiniutianiya nijaniya". Cunora pueyanaa, maja nia tacaaniu. <sup>6</sup> Naa seetanujuanaa na sequesanoocua pa tiuushacaritij, pa naata sequenu taa supuetana David naajiotaqueiaari na seque-sanocuajani. Naa sequequiaariiri:

"Jiyaniijia Pueyasocuajaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya".

<sup>7</sup> Coteenujuanaa nia jiitianaa pueya nia niishirio-joriquia, noo pojori canapuate shushajanaa nia tojtio-quiaari Pueyaso rupaacuajani. Nojoriiri seetanujuanaa Pueyaso tojjiaca quiquiaari, Jesucristoocua tiuujia nia nojori quiniuccua. Juhua nojori quiniuccua jiaatijaca nia quiriquiajuhuj, taa nojori quiquiaaricuaani.

<sup>8</sup> Taa quijia Jesucristo quiquiaari tariucuaaanuni, no-juajaari naa quiyajaa. Naa quiniutianiya pueyara-caanuuri. Majaari na jatanu. <sup>9</sup> Naaratej, majaari tamaa-tia niishitiojosano nia tojiniu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojtiajaca. Naajuhuj, majaari pueyacuara secojonaa jiuujia cumaquishaanu quiquiaari nojori miaquesacari Pueya-sorano puecoosano seya shujiniji. Pueyaso Sohanu cutaraari poojia cumaquiquiaa, panijica pa quiniuria.

<sup>10</sup> Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriutianura tii. Na nanaca shoote-sano seruuri saniniuujia tiacajiniji jiyatasaaquiaari mij,

tii na catijiasaanura puetunujuanaa. Pueyacuara seco-jonaa jiyaniijiaari tojetaarucujanaa tenujusaaquiaari maja na miaquenura cuno shu. Nio pa quishacari saniniuujia, paari jyanohua cumaquishaaquiaani Jesu-cristo cusonuuccua pocuara. Cunojiniji, paari seetan-juanaa Pueyaso rupuesano quiyacuajani. <sup>12</sup> Naajuhuj, Jesucristo mosaanura pocuara, nojuajaari Jerusalén tiacajiniji jiyatasaaquiaarijuhuj, naatej, taa na nanaca shootesano seya jiyatasaaquiaari tamaquiriacuaani. Nojuajaari naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijianaa. <sup>13</sup> No-juajaari jyanohua cararaatia teetesaaquiaari niyacute-sanojinia pa niti. Naa Jesu miiniuuccua pocuaracuatej, Pueyaso niishiyashijica jaara cararaatia miiriquia pa-janiya Jesuuccua pa tiuuniuccua, juhujaniya na re-jeretajaca pa quiriquiajuhuj. <sup>14</sup> Pajaniyara, Jesuuccua tiuujiacani, nio jiyari maja pa quiquio. Mijiria, shaacui-iri pueyaracaanu rishijia quiquio pajaniyarano. Cunora, paari jiyocuaaanu pajaniyarano Pueyaso shipinishano tiacaacua jiaatiaani. <sup>15</sup> Naa Pueyaso jiitianuuccua pueyaracaanu rishijia quiquio pajaniyarantej, nojuaja pa timitiariquia pueyaracaanu. Neyanu Jesucristo quiniuccua pocuara Secojona, nojuajaari pa tiuquiti-quiaa na Queecua. Nio pa quishacari quiarijiani, ma-jaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maninuhuaqueetanura nojua-ja. Cunocuajaari na panishano. <sup>16</sup> Naajuhuj, majaari nia niyajetanu maninia nia miiniuria niarta Pueyaso pueya. Nojori jiitiaaquishacari nojori panishano, nia ji-itasano casaajiniji nia niquitiojoriquia nareja nojori. Paa jaara naa miijica quirini, paari juhua Pueyasora pa casaa niquitioyani. Cuno cutaraari na timitiquiaa.

<sup>17</sup> Cuarta Pueyaso pueyanaa, nia jiitianaa tojtiajaca nia quiriquia. Majaari nojori niishitiojosano nia ruure-tanu. Nojoricujaaari nioojica cojuaquiaa pueyara-caanu, nojori niishishacari Pueyasoori nojori neque-soreenutaniya nia jiitiajaca nojori quiniuccua. Naaratej, shamaatia nojori tojtiajaca nia quiriquia maninia, Pueyaso nojori pohuatanura shitimia nia-janiyajiniji. Naa jaara nojori tojtiaashijica quiri, no-joriiri Pueyaso pohuatanutaniya na taraajenuta nia-janiyajiniji. Jaara naa quiritij, niaa cutaraari taraatia quiniutianijuhuj.

<sup>18</sup> Canaacuara nia secojonuuriquia. Canaacuajaari saaja maninia miiniuria saniniuujiquiaa pueyaracaanuni. Naacuajitij, canaa jiuujiaari panaatia quiya Pueyaso niquiara. <sup>19</sup> Janiyari jyanohua paniyani cu-cuara nia secojonura, Pueyaso tiuquitiuhuaa ritia janiya niaacua.

### Nio naajiona panishacari maninia Pueyaso miiniuria pueya, na saruhuatasacari pueyajuhuj

<sup>20</sup> Jesucristo shootenuuccua na nanaca pocuara, paari niishiyani puetunu Pueyaso sequesanojuanaari see-tanujuanaa pajaniyarano quiniutianiya pueyaracaanu.

Naa Jesucristo miishanoocua pa tiuushacaritij, na Que Pueyasoori pa jiyanooquiaa, juhuajaniya pa rupuenura nojuaja. Pueyasajuanaacuajaari pa Jiyaniijia Jesucristo samiitiani quiaariuhua macujiniji. Nojuacuajaari pa cojuana, na panishano pueya pa quiniuucua. ¶Jiyanoohua maninia pa Pueyaso! <sup>21</sup> Neyanu Jesucristoocua nia tiuuniuucua, nojuaja cuaara jataniiria niajaniya tojetaarucuaajanaa jeenucuasano nia quiniuria, taa na panyacuajani. Nojuaja cuaara naa miiria niajanijatej, maninia nia tucuatunura puetunu na panishanojuanaa. ¶Pa Jiyaniijia Pueyaso cuaara pueyaracaanu shuquiritiasaaria jiyanoohua maninia na quiniuucua! Cuaara naa quiiriatej.

<sup>22</sup> Cuarta Pueyaso pueyanaa, jiyanoohua nia secojiyaniijia maja nia ruuretanura secaja rupaata cua shiniujiushacari niajaniya nio cua naajiojinia. <sup>23</sup> Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyaquiri cucua na tiuquiniuria, janiyari cucua na ruponutaniyani nia niquiniuucua cua quiasacari.

<sup>24</sup> Naajuhuj, quiria nia saruhuatate puetunu nia jitianaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhuj.

<sup>25</sup> Pueyaso cuaara na Sohuanuta cumaquiiria puetunu niajanijajanaa.

# SANTIAGO

## Santiago naajiosano niyaquejeno pueyacuara

**1** Janiyari Santiagoni, Pueyaso seru, Neyanu Jesu-cristo serujuhuj. Nia saruhuataanijia puetunu tiqiyocua jiyacajinijanaa niyaquejeno Israel doce niquiohuacuajinio caneno pueyanaa.

## Niishitiaja Pueyasojiniji masesano

**2** Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuaj. **3** Niaacuajaari niishiya, niaa jaara Pueyasooocua nia tiuuniucua saniniujiushaare, niaari socua juhuajaniya sashijiacara quiniutianiya. Ni-aaraari naa miishaanutaniyaqui nia sashishacari Pueyaso cuaara puetunu maninijanaa miiria niaara-jaatijia. **4** Nia rejeretare seetanujuanaa maninia sashijica nia quiniuria, majaari quenaaja nia taacanuunu. Niaa jaara naa miijia quiriritij, niaari maninia jeenu-cuasano quiniutianiya, pueyaracaanu maninia miijia nia quiniuria.

**5** Tamonu nijaniyajinijinio jaara niishiyaquiri taa na miiniutianiyani, nojuaja cuaara Pueyaso maseera, Pueyaso na secojosacari. Pueyasoori na niishitiaja niq-uitionutaniya. Nojuajaari puetunu pueyajanaa niq-uitioquiaa, capora na quiniucua. Majaari na juaaniu niaa jaara na masere. **6** Nia masesacari, seetanujuanaa nia tiuuri Pueyasooocua, majaari quenaaja nia taacanu-unu. Cante na masesacari taacanuujuaani, nojuajaari juhua paratu piyarojosano mohuaca, naatej, taa paratu tacaropiya mohuaca na piyarojosacaricuaani. **7** Jiyano pueyanotej, Pueyasoori maja na masesano na niq-uitionu quiniutianiya, noojia niq-uitioteja na quiniucua. **8** Noojia niq-uitioteja pueyanoori quiarijia maseya na panishano. Tariqui na secojosacari saniniuuja, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niq-uitioteja pueyaracaanu. Majaari quenaaja na miiniu panishano na tucuatano quiniutianiya.

**9** Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocuaajaari nia jiyatequiaari na muerasura, na jii-tiasanojiniji nia jii-tianurajuhuj. **10** Saniniuuja, niaa jaara casamiriaca pueyano quiri, shuquiriaatia nia quiriquia Pueyaso jiyanooshano nia quishacari. Ni-aacuajaari niishiya niaari tojetaarucujanaa saniitioso-coriqiano quiquiaari juucua sesa miijia nia quiniucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaqui-

jia niquishiya shanohuari. **11** Pananu jaara nasaatia jama, neyonaari sorequee. Na shuuri tiqii. Shanohua niquishanoori shaajequeejuhuj. Casamiriaca pueyanoori naajuhuj. Na casami na niq-uitiojosacarijia na canijianura juucua, canashiyaquiji shaajenutaniya-jaariuhuj.

## Naquiya pa miishacari

**12** Shuquiriaatia quijia cutaraari Pueyasooocua tiuuja, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niq-uitiosaanutaniya, pueyara-caanu rishijia na quiniuria. Cunoori Pueyaso niq-uitionu panishano na panijia, taa na sequequiaaricuaani.

**13** Niaa jaara sesa miiniucua jiaatiaa, majaari se-quenu: "Pueyasoqui sesa cua miitiniu paniya". Pueyasoori maja sesa miijia. ¿Pa Jiyaniijiatucua casaara sesa miitiri pajaniyani? **14** Saniniuuja, tama poojia seque-jaarijia pa shiniujuquiaa sesa pa miiniuria. Naajuhuj, tama pa niishitajajaarijia pa sapojoquiaa sesa pa panishano pa miiniuria. **15** Naa sesa miiniucua pa jiaati-asacaritij, cunora paari sesa miiquiaani. Naa sesa miijia pa quishacaritij, paari cunora shaajasaanutaniyani.

**16** Cuarta Pueyaso pueyanaa, maja tama nia cuaqueyajaaja nia sapojonu. **17** Puetunu maninia casaajanaa pa masesanoni, cunoori Pueyaso niq-uitiosano jiyocua-caanuji. Nojuajaari puetunu jiyocuaaanu pa niquishano casaajanaa shipinijioquiaari, mijiria pa cuhu-atariqiano. Pueyasoori pueyaracaanu maninia quijia. Majaari na jatanu tamaatia na quiniuria, na co-juaaquinuria pajaniya. **18** Pueyasocuaajaari pa sohuanu samitianijioquiaarihua na rupaacua pa tiuushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuaani, Pueyasoori naa juhua pa tutaquiaari na shuquiriniutiajuhuaj, coteenujanaa na jiyapueranuhua pa quiniucua. Nojuajaari tariucuaaanujiniji naa pa riurioquiaaritij.

## Seetanujuanaa Pueyaso tojtijajaca

**19** Naacuajiti cua panishano cuarta Pueyaso pueyanaa, cua tojitiare. Puetunu nijaniyajanaa cuaara quiri ritia tojjia, jacaria pocuaja. Cuaara quiri shiniquijuhuj, maja ritia juaajia. **20** Pueyanoori maja na naata Pueyaso panishano miiniu na juaaniutia.

**21** Naaratej, nia cartere puetunu sacuaatia nia miiniujianaa, puetunu sesa nia niishiriojosanojuanaanio. Nio pa quishacarini, puera sesa miiniuuri quiquiaa. Naa-

juhuaj pueyanaa, juhua maninia naatujua nia tojiri Pueyaso rupaa, taa nia niishitiojosaaquiaaricujani. Majaari na ruuretano. Pueyaso rupaacuaajaari cumaacaraca tojetaarucujanaa sesa miyashijiacara na jiyatenura pajaniya.

<sup>22</sup> Pueyaso rupaa tojjijaca nia quiri seetanujuanaa. Majaari nia numaa shama nia tojtianunoj. Niaa jaara Pueyaso rupaa tojijyaquiri, niaari tama nia cuaqueyajaaja sapojiya. <sup>23</sup> Pueyano jaara Pueyaso rupaa tojijua saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. <sup>24</sup> Jaara tacateyarohua, na jiquioco niyasetaseequiohuari taamuecate na jiquioco quiri quiaani. <sup>25</sup> Pueyaso rootasanoori jiyanojua maninia, maja quenaaja sesa. Sesa miiniucuaa jiiitnio pueyano jaara na tojjijara quiri, nojuajaari na naata sesa na miiniu tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhua.

<sup>26</sup> Cante na niti rejetyashijiani, nojuaja jaara tama na cuaqueyajaaja jiyaniya: "Janiya cutaraari Pueyaso tojjijani", cunoori tama na cuaqueya sapojijaaacujua. Saaja sacuaratia pocuaja quiya pueyaracaanuuri. Nojuajaari najuhua Pueyaso rupaa tojjijia. <sup>27</sup> Cante seetanujuanaa pa Que Pueyaso rupaa tojjijani, nojuaja cuara japueyojuaca niqiniucua rucuanera, nojori na naacunura. Cuara naa miiria mashiquioperajuhuaj, nojori taraajenucujusacari nojori na cumanijianura. Naajuhua, cuara tama na cuaqueyajaaja cojuara, narta pueya na miyaquiniucuaaji sesa. Naa miijia pueyanotej, nojuajaari Pueyaso pueyano cutara.

### Maja cumaati rimiajata pa paniniu pueya

**2** Cuarta Pueyaso pueyanaa, pa Jiyaniijia Jesu-cristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niqiniu tamasa. ¿Pa Jiyaniijiateeri pa sooquiaaricuaa, niishiqui quijia pa quishacarijiani? Maja. <sup>2</sup> Cunora cua sequesanojinia nia niishiriojore: casamiriaca pueyano jaara nia secojonuujua tiajinia tiuquimia, maniniuqui toqueraca, jaaniishoracajuhua, ¿taa nia miiniutianiyan? <sup>3</sup> Niaari naa sequeja: "Niya quia cajishii pueyanonaa, cajitii maniniujiniani". Saniniuujia, toqueeju pueyano jaara jiyacari tiuquimijuhua, jiyareta curuutuquenaniyojua, niaari na sequereecujua: "Cuniquijia quia nujuare". Casaa maaraja: "Cuniquijia quia cajiri quiaa tii nujuani". <sup>4</sup> Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamiiju pueyanojiniji. Naaratej, niaari casamiriaca pueyano shuquiritiniu panijia.

<sup>5</sup> Cua tojitiare cuarta Pueyaso pueyanaa, ¿majateeri nia niishiniu, Pueyasocuaajaari casamiijiuniucua pueya saquiriojoquiaari nocua tiuujia nojori quiniuria? Nocua tiuujia nojori quishacari, nojoriiri juhua jiyanojua casamiriaca Pueyasora. Naajuhua, Pueya-

soori nojori jiyatenutaniya jiyaniijianucua nojori quiniuria, puetunu Pueyaso jiiitasanojuanaa nojori jiiitianura. Naa miiniutianiya na panijiaaari taa na sequequiaari seetanujuanaacujani. <sup>6</sup> Niajaniyarijiataj, niaari nojori cararojoquiaacujua. ¿Majateeri nia niishiniuujuhua, cuno casamiriaca pueyacuajaari nia nohuasejoquiaa na sapojonuta? Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri naa miitiquiaaqui nia jiiitasano casaaniyojua na jaariuutianura puetunujuanaa. <sup>7</sup> ¿Majateeri nia niishiniu, nojoricuajaari pa shuquiritiasano Jiyaniijia sesacaquiaajuhua? Pa Jiyaniijia sesa jiyaniquitiquiaa na soonutaari.

<sup>8</sup> Puetunu Pueyaso rootasanojinijianaani, niiori socua tojishocoriquiano. Naa naajiotasano quiyari: "Pueya nia paniri taa nia paniya tama nia cuaqueyacuani". Pueyanaa, niaa jaara cuno rootasano miijia quiri quia, niaacuajaari maninia miijia. <sup>9</sup> Saniniuujia, niaa jaara rimiajata paniri pueya, niaari sesa miya. Niaari sanitosocoriquiano, Pueyaso niishitiojosano tojijashijia nia quiniucua. <sup>10</sup> Pueyano jaara puetunu Pueyaso rootasanojuanaa tojijua maninia, saniniuujia, jaara niquiriyatu cuno rootasanojiniji tojijashijia quiri, cuno pueyanocuaajaari Pueyaso tojijashijia. <sup>11</sup> Pueyasojua-naacuajaari sequequiaari: "Maja nia camishoo maaji nia numuetucunu". Sequequiaariiaariuhua: "Maja monu". Naacuajitij, pueyano jaara na camishoo maaji numuetuqueyacuquijia quiri, saniniuujia narta pueyano moyari, cuno pueyanoori Pueyaso rootasano tojijashijiajuhuaj. <sup>12</sup> Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocujani. Nocuaji tama pa cuaqueyajaaja pa cojuare taa pa miiquiaani, taa pa pocuquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa Pueyaso rootaquiaaricujani, nojoriiri jiyanooshaanutaniya taa nojori jiyanooshaanicuaa tamasaani. <sup>13</sup> Saniniuujia, canapuate narta pueyano jiyanooshaanicuaa quiquiaarini, Pueyaso nequesoreenu juuca puetunu pueyanaa, nojoriiri jiyanooshaanicuaa quiquiaarini. Canapuate jiyanooshaanicuaa cutarani, nojoriiri jiyanooshaanutaniya cutara, taa tamasa nojori jiyanooshaanicuaa. Nojoriiri shuquiriaatia quiri quiano cuno juuca, Pueyaso nequesoresacari nojori.

### Pueyasocua tiuujiaaari maninia miijia

<sup>14</sup> Cuarta Pueyaso pueyanaa, ¿maniate pueyano jaara sequere: "Janiyacuaajaari Pueyasocua tiuujiani", nojuaja jaara maninia miyashijia quiyajaa? Nojuaja jaara maninia miijia jatanishoo quiyajaa, najuhua sequere: "Pueyasocua tiuujiani". <sup>15</sup> Naacuajitij, tamonu parta Pueyaso pueyano jaara pa sequere: "Maja cua jiiitanu toque. Maja quenaaja cua miaquesocoriquiano cua jiiitanujuhua", ¿taa pa miyani? <sup>16</sup> ¿Maniateeri paa jaara na sequereni: "Juhujaniya quia quiaarohua. Quia miaquesuhua. Toque quia

cushishuhua juhuaj”? Maja. Paa jaara quenaaja na niq-uitioyaquiri na panishanoni, pa sequesanoori najuhuanaj. <sup>17</sup> Naajuhua, pueyano jaara sequere: “Jesu-cristoocua tiuujianijia”, jaara seetanujuanaa Pueyaso rootasano tojyaquiri, na sequesanoori najuhuanajuhua. Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijia quirijuhua. Maninia miyashijiaari maja seetanujuanaa Pueyasoocua tiuujia.

<sup>18</sup> Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishiniutianiyani janiyari seetanujuanaa Jesuucua tiuujia cutarani, maninia cua miishacari”.

<sup>19</sup> Pueyaso Rupaacua quia tiuuniucua, quiaari niishiyacuaja Pueyasoori Jiyaniijajanaa. Cuno quia tiuuniuuri maniniacuaja. Naajaa, nia niishiri, samaruhuari cuno niishiyajuhua. Na puerenta nocuaji tetecatiuyari.

<sup>20</sup> Mosanucuaana, ¿majateeri nia niishiniu? Jesuucua tiuujia nia quishacari, niaa jaara maninia miyashijia-cua qiyajaa, Jesuucua nia tiuuniuuri najuhuanaj, nia tojyaquishacari Pueyaso. <sup>21</sup> Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaari: “Abrahamnaa, quia niyanuniyojua quia more cucuara quia catijiaso-coriquiano”. Majaari Abraham ruuretanu quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanojua maninia Abraham, cua tojjia cutara”. <sup>22</sup> Naacuajiti cuarta Pueyaso pueyanaa, naa Abraham tojiniucua Pueyasotej, paari maatia niishiyani nojuajaari seetanujuanaa Pueyasoocua tiuujia quiquiaari. Naajuhua, Pueyaso sequesano na miishacari, nojuajaari Pueyasoocua tiuujia quiquiaari tojetaarucujanaa. <sup>23</sup> Naa Abraham miiniucuatej, nojuajaari tariucuaaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasoocua tiuquiaari. Naa na tiuuniucua Pueyasoocuatej, Pueyasoori na jiyatequiaari juhua tojetaarucujanaa sesa miyashijia na quiniuria”. Naa Abraham quiniucua Pueyaso tojjiatej, nojuajaari sequesaaquiaari Pueyaso rupenata.

<sup>24</sup> Naacuajiti pueyanaa, Pueyasocuaajaari na sequesano miijia jiyanoocua. Maja cutaraari na jiyanooni noo pojori, nocua tiuuniu sequeja najuhuanatej. <sup>25</sup> ¿Ni-aate niishiyajuhua taa Pueyaso jiyanoocuaari Jericó tiacajinijinio paanatucuaani, nooj, Rahab jiyanihanotej? Pueyasoori na jiyanoocuaari neyatu na quiniurajuhua. Na jiyanoocuaari maninia na miiniucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiaariuhua tamocoori, narta Jericó tiacajinijinio pueya puecyaquiniucua cuno pojori. Rahabri naa maninia miiquiaariti Pueyasojiniji na tojihanoocua na tiuushacari. Niishiquiaari Pueyasoori Israel pueya cumaquinia quiquiaari. <sup>26</sup> Nio pohu-

atasanoori pa niishitiojia, naatej, taa pa cuaqueya macu quia sohanuucuaani, naajuhua, paa jaara Pueyaso sequesano miyashijia quirini, paari najuhuanate sequeyani: “Jesuucua tiuujianijia”.

### Pa niti juhua mani

**3** Cuarta Pueyaso pueyanaa, maja cumaati puera nijaniyajinijinio jiaatianu Pueyaso rupaa niishitiojona nia quiniuria. Niaacuajaari niishiya, Pueyaso rupaa niishitiojonaari socua jyanohua saniitosaanutaniya tamasacajiniji, nojori tojtiaaquiniucua tama nojori niishitiojosanojuaja. <sup>2</sup> Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitiyaquijia na pocuasacari? Shaaqui. Pueyano sequesano jaara puetunu maninijanaa quiri pueyaracaanu, cuno pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jitianu niishiriqiajuhua sesa na miyaquiniucua. <sup>3</sup> Niaacuajaari niishiya, caballo rupaama jaara niasaare na niqitijotaja, na camaru na tojiniuria, na netesacari, na camaruuri puetunu na caballo cuaqueyanaa niqitijotaa na panishaco.

<sup>4</sup> Puereetuca buqueeri naajuhua. Shiitaniyojua na niqitijotaja jiaaajaariuhua. Jyanohua paratu piyarojosacari, naajaa, na camaruuri saa cunotaja na niqitijotaa na panishaco. <sup>5</sup> Pa nitiiri naajuhua, shiitaniyojua casaaniyojuaari pa cuaqueyajinia shipinishano. Naajaa, jyanohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquajinia, cuno maniyashiiri puereetuca maniria pacusee. Cuhuariquiaari puetunu catemaajanaa. Pa nitiiri naajuhua. <sup>6</sup> Pa nitiiri seetanujuanaa juhua mani quia pa cuaqueyajinia. Paa jaara sesa pocuareni, paari puetunu pa cuaqueyanaa sesoyani. Pa nitiiri puetunu sesa niishijajanaa. Paa jaara sesa pocuare pueya niqiarani, puetunu pueyajanaari pa sequesano caminiujuquiaa tamasaca niqiaari. Pa nitiiri Sesaaca poonijotesano. Naacuajitij, sesa pa pocuasacari, paari puetunu mijiria pa quiniujianaa sesoquiaani. <sup>7</sup> Pueyanoori na naata jiyartuutenu puetunu casaajanaa: jaacuatujua, roshiyocuatujucajuhua, moojinijinio casaanio. Seetanujuanaari, pueyari tari naa na jiyartuutejoquiaa. <sup>8</sup> Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. <sup>9</sup> Paari jiyano pa nititaja pa Que Pueyaso maniniuhuaqueetaquiaani. Naajuhua, paari Pueyaso shipinishano parta pueya sesacaquiaa natajuhua. <sup>10</sup> Naacuajitij, pa rupaamaji tohuataari maninia sequesano, sacuraatia sequesanojuhua. Cuarta Pueyaso pueyanaa, Maja cumaati naa pa quiniutij! Maja maninia naatej. <sup>11</sup> Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacute saniniucua pacaretaquiaacujua? Maja. Samo nacaari pueyaracaanu maniniuniacu quijia. <sup>12</sup> Cuarta Pueyaso pueyanaa,

¿mariyajate na naata muetunu shucuenajara? ¿Nateecate sacamanajara muetuajuahuaj? Maja. Naajuahuaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuahuaj, paa cuaara pueyara-caanu maninia pocuara saaja. Maja cumaati pa pocuasano pa cojitiniu sesa pocuasanota.

### Niishijia pueyano

<sup>13</sup> Tamonu nijaniyajinijinio jaara niishijia quiri, nojuaja cuaara juhuajaniya maninia miihia quiri nareja, maja pueya shocoteja. Jaara naa maninia quijia quiri, pueyari niishiniutianiya nojuaja seetanujuanaa niishijia. <sup>14</sup> Saniniujia, nioojia jaara najiquitishano quiri, niishijia nia quiyaquiniucua juhua niarta Pueyaso pueyano, niaari seetanujuanaa mosanucua. Naajuahuaj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamaaja, majaari nia jyaniniu niaari niishijia. Naa miihiaca nia quishacaritij, niaa jaara tama nia niishitajajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojia. <sup>15</sup> Cuno nia niishitajaari maja jiyocuacaanu Pueyaso niishitaja. Cuno niishitajaari tama nia niishishanojuaja, mijiria niishishanojuahuaj, Sesaacajanaa niishishanonio. <sup>16</sup> Pueyanaa, tee Pueyaso pueya juaatishano quiya tamasa jaara na shocotare, naajuahuaj, pueya miishacari saaja tama na panishanojuaja, tii quiyari juayonuujutunu, puetunu sesa miiniujianaanio. <sup>17</sup> Saniniujia, cante Pueyaso niishitaja jiihia cutarani, nojuajaari maninia miihia pueyano cutara. Jiyano pueyanoori maninia quijia puetunu pueya niqiiarajanaa, jyanootio, jacaria pocuaja. Majaari na niishiniuritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. <sup>18</sup> Naajuahuaj, cante juaatoyano jyanootiootejani, nojuajaari jyanohua shuquiriaatia quiniutianiya Pueyaso shuquiritishacari nojuaja maninia na miiniucua.

### Mijiria casaacua jiaatijacajiniji pohuatasano

**4** ¿Niaate niishiya casaara nia juayonuujutaquiaa tamaaja pueyaracaanuni? Niaari naa quiyaquij sesa miiniucua nia jiaatiasacari. Nioojiaari najiquitishano quiquiaa nia panishanoocua nia jiaatiasacari sacuaraatia. <sup>2</sup> Naaratej, nia panishano nia maseyaquishacari, niaari na casamiicua pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jyanohua, niaari cunora miriyojotaquiaa. [Niaari socua piyotariquiaaqui! Niaari naa quiyacui Pueyaso nia secojiyaquiniucua nojuaja niqutionura nijaniya nia panishano. <sup>3</sup> Naajuahuaj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequesereeraj. Niaari sesa nia jiaatianuta na masequiaajuhuanaj. Niaari nia jiaatiasanoocua masequiaa juucua, tama nia cuaqueyajaaja

nia shuquiritiniuria. <sup>4</sup> [Pueyanaa, niaaqui Pueyaso rootasano ruuretajacajuhuanaj! ¿Majateeri nia niishiniu? Cante mijiria sesa miihiaca miishano timitiajancani, nojuajaari Pueyaso paracara quirii. Niaa jaara naa miihiaca quiniu panijahuaj, niaari tari Pueyaso paracara quirii. <sup>5</sup> Tariucuaanu Pueyaso Rupaajinia naa naajiotasanoori quiyaquij:

“Pueyasoori na Sohuanu niaquiaari poojiajinia, nera na cojuanura pajaniya. Jyanohua na paniniutia pajaniya, Pueyaso Sohuanuuri pa jamuequiaa juucua saaja Pueyasora pa quiniuria”.

<sup>6</sup> Naajuahuaj, Pueyasojuanaari jyanohua maninia naacuquiaa pajaniya, jyanootio na quiniucua. Na Rupaajiniaari naa naajiotasano quiyajuahuaj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniujia noo pojori maniniucuaarijia, naa sequejacatej: ‘Maja cua naata miiniu maninia tamajaaja. Pueyaso cuaara cua naacuura’”.

<sup>7</sup> Naarate pueyanaa, seetanujuanaa Pueyaso tojtiajacara nia quiriqia. Cumaatia nia nujuatara Sesaaca, maja na shocotanura nijaniya. Niaa jaara naa miiritij, niaacuaji mashiniutianiyari. <sup>8</sup> Niaa jaara Pueyaso rupeere, Pueyasoori nia rupenutanijahuaj. Sesa miihiacanaa, cua tojtiaare. Taa curuutucojuanucua shuquirioyacuana, naa tama nia cuaqueyajaaja nia jeequejorejuhua sesa nia miishanojiniji. Nioojiaqueya Pueyaso panijiacari mijiria sesa miishano paniquiaajuhuj. Cuno pueya cuaara noojia jeequejora maja socua noojia na niqiiiotenura najuhuanaj. Cuaara saaja Pueyaso panijiacara quiri cutara. <sup>9</sup> Sesa nia miiniucua nia nujuquature, nia taraajerejuhuj. Nia sapiyonuure. Sesa miishano nia saroojotanu nia jataniri namijiaacatenuucua. Sesa miiniujiniji nia shuquiriniu nia jataniri taraajenuucujuhuj. <sup>10</sup> Niaa jaara nioojiajinia sequeriquia Pueyaso niqiiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jyaniijianucua nia quiniuria.

### Parta Pueyaso pueyacuara rimiaaqueyashijia pa quiriqiaj

<sup>11</sup> Pueyanaa, maja sacuaraatia nia rimiaaquenu niarta Pueyaso pueyacuara. Maja maninia naatej. Cante narta Pueyaso pueya sesacaani, Pueyaso Rupaajinia naajiotasano tojiyashijiaari jyanotej. Niaa jaara naa miiritij, niaari Pueyaso Rupaajinia naajiotasano sesaca. Naajuahuaj, niaari tama nia cuaqueyajaaja jiyateya juhua jyaniijiara, niarta pueya nequesoreena nia quiniuria. Naa nia miishacaritij, niaari Pueyaso rupaa tojiyashijiacara quiquii. <sup>12</sup> Pueyasojuanaari tamaaja Jyaniijajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhuj. Nojuajaari cumaacaraca pocuaji na tacunura, na shaajanura pajaniyahuj. ¿Canteeri quiajanianijia, quia saniniujiunuria tamasa, juhua nojori jyaniijiani?



## Majaari pa niishiniu tariquiria

<sup>13</sup> Pueyari naa sequejaca: "Canaari tariqui quianutaniya tamonu tiacajiniani. Canaari cuniqui shocotenu-taniya niquiriyatu marijani canaa niqutiojosacari tii canaa casami. Canaari queraatia cumaneeca masenu-taniya canaa casami samini". Cua tojitiare naa sequejaca. <sup>14</sup> Majaari nia niishiniu taa nia juhuaquenu-taniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niquishiyari, na nuhuaji tajimiohuari, paari naajuhuj. <sup>15</sup> Naaratej, naa nia sequere cutara: "Pueyaso jaara paniri, canaari tariqui quianutaniya poonijionuucuan". Naa cutarate maninia sequenu. <sup>16</sup> Niaari saniniuujia sequequiaacujua: "Janiryari tariqui quianutaniyani cua miiniu panishano cua miiniuria". Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuana nia rupaa riutioconeetequiaa puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanoehua sesa. <sup>17</sup> Naajuhua pueyanaa, niaa jaara maninia miyaquiri, maninia miiniu niishijia nia quishacari, niaari tari sesa miijiaca.

## Casamiriaca pueya nacasusaanu

**5** Nia tojitiare, casamiriaca pueyanaa. Juhucarijia nia sapuere! Naa sariyocature! Naaari naquiya miiniutianiya taraatia! <sup>2</sup> Niaari jiyanoehua casamiriaca. Cuno nia jiiatasano casamini, najuhuana moqueyari. Surequeyari nia maniniuquiya toqueya miaqueyajujuaj. Naacuajitij, puetunu nia jiiatasanojuanaari moquenutaniya. <sup>3</sup> Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuaraatia jamuejaca quiquiaari. Naa miijiaca nia quiniuucuatej, niaari saniitiosaanutaniya. Naaari socua shaajasaanutaniyaquij. Naaari najuhuana queraatia casami paatijia shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniuujiauniuria pajaniya. <sup>4</sup> Jiyaniijiajanaari nia poonijiotosano pueya tojiquiaa! Nojoriiri sariyocuatuiya nia cumaneecajiniji nia niqutioyaquiniuucua nojori poonijionuunujiniji, niaara na senoonuucua nataacuaca nia cuhuariquiajiniji. <sup>5</sup> Mijiria nia quishacarijia, niaari shuquiriaatia quiquiaa puetunu nia panishanojuanaa nia jiiatasacari. Naa shuquiriaatia nia quishacaritij, niaari juhuajaniya shiyoshiya juhua puecoosocoriquiano cushiya. Naaari naa miishaanutaniyajuhuj. <sup>6</sup> Niaari maninia miijiaca puecooquiaa. Majaari nojori nujuatanu quiquiaa niajaniya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

## Juhujaniya pa sashiri pa Jiyaniijia

<sup>7</sup> Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquihuara. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiyajaariuhua cuaara niiria, na natau jajau na queraajaacaatiniuria. <sup>8</sup> Naa nia sashirijihuuj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. <sup>9</sup> Cuarta Pueyaso pueyanaa, majaari niarta pueyacuara nia rimiaaquenu nojori nia soonuta, niaa mariqui saniitiosaaereeri. Naa niishiri, pa saniniuujia Pueyasoori pocua catecanoya. Tari juhua pa tohuatayaji nujuajari. Nojuajaari seetanujuanaa pa saniniuujia cutara. Nocuaji maninia pa quiriij. <sup>10</sup> Pueyanaa, juhuajaniya pa rejeretarejuhuaj, paa jaara naquiya miishaareni. Naatej, taa tariucuacaanu Pueyaso sequesano caminiuujia rejeretacoquiaari taraatia nojori miishacaricuaani, naa nia rejeretarejuhuaj. <sup>11</sup> Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutiani-yari. Naaacuajaari tari pohuatasaaquiaarijuhuaj taa supuetana Job rejeretaquiaari naquiya na miishacaricuaani. Na nuhuaji cutara, Pueyasoori jiyanoehua maninia na miiquiaariuhua, jiyanoehua pueyacuara taraajeja na quiniuucua, jiyanoojiaariuhuj. <sup>12</sup> Cuarta Pueyaso pueyanaa, nia tojitiare. Naa pocoojosacari, tamonu jaara quia sequesanoocua tiuyaquiri, naajaa, majaari najuhuana sesa pocuanu. Maja cutaraari sequenu: "Cua sequesanoori seetanujuanaa juhua jiya cajiniocuaja. Majaari na shaajenu quiniutianiya". Majaari sequenujuhuaj: "Cua sequesanoori juhua nio jiya. Majaari na shaajenu quiniutianiya". Majaari naa pocuanu sacuaraatiej. Naa sequesano jaara seetanujuanaa quiri, nareja nia sequere: "Taaquiri-irinij". Naajuhuj, nia sequesano jaara quiri "maja", cuaara naa quiiria seetanujuanaa. Majaari nia sequesano nia maatenu socua, Pueyaso mariqui nia saniitioreeri. <sup>13</sup> Tamonu niajanijajinijinio jaara naquiya miishiya, nojuaja cuaara Pueyaso secojora. Shuquiriaatia nia quishacari saniniuujia, Pueyasora nia jaaquequejore. <sup>14</sup> Cusosu nia quishacari, Pueyaso pueya jiiatanaa nia sequere nojori cuaara secojora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. <sup>15</sup> Naa secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. <sup>16</sup> Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaaacuarajaaja. Pueyasocua nia naatanijiorohua. Maninia pueyano secojosacari jiyanoehua, cunoori jiyanoehua cumaacaraca. Pueyasoori na secojosano tojijia. <sup>17</sup> Tariucuacaanu pueyara Pueyaso sequesano caminiuujia Elfasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja

jaara Pueyaso secojoquiaari maja maru niniuria, ma-  
jaari maru niniu quiquiaari jiuujianaraca marijia  
cuaara shocojoquiaariijaatijia, socua seis racanio. Ma-  
jaari maru niniu quiquiaari tojetaarucujanaa. <sup>18</sup> Elías  
jaara pacutequiaariuhua secojonu maru na pan-  
ishacari, maruuri shusha niquiaariuhua. Pueya  
nataacuacaari jiyacari shusha moritiaquiaariuhua.

<sup>19</sup> Cuarta Pueyaso pueyanaa, tamonu niajanijajini-  
jino jaara Pueyaso rootasano tojiyashijara quiriohua,

tamasaca jaara na niquiri, cuaara na rootaaranoj,  
maninia miiijia na quiniuhua. <sup>20</sup> Nia niishiri, cante  
sesa miiijia tacatorohua Pueyasocua sesa na miiniu-  
jinijini, nojuajaari cuno sesa miiijiaacuaji tacuya maja  
senota na shaajasaanura. Pueyaso na jiyanooyajaari-  
uhua puetunu sesa na miishanojinijijianaa. Tariucujaja  
cua panishano pueyanaa.

# 1 PEDRO

## Pedro saruhuatasacari narta Pueyaso pueya

**1** ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya ni-aacuarani, noo pojoriicuara canapue te tiquiyocua niyaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajini-anio. <sup>2</sup> Tariucuacaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacuajitij, Jesucristo shootenuucua na nanaca, Pueyasoori nia jiyanoquiaa, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujanaa Jesucristo tojijiaca nia quiniurajuhua. Naa Pueyaso panishano pueya nia quiniucua, nojuaja cuara cumaquiria jiyanoquia niajaniana. Cuara nioojia cajitiiria pueyaracaanujuhua.

## Pa niishiri, paari jiyanoquia maninia miishaariquianoni

<sup>3</sup> Pa Jiyaniijia Jesucristo Que Pueyaso pa maninuhuaqueetare, jiyanoquia maninia na miiniucua pajaniya. Jiyanoquia na taraajenuucua pocua, na pueya pa quiniucujuhua, nojuajaari pa niishitiquiaari paari juhua quiariniora samiitianijiosaanutaniuhuanoni. Paari naa samiitianijiosaanutaniuhuanoni, naatej, taa Jesucristo samiitiaquiaarihuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacuajani. <sup>4</sup> Naacuajitij, niaari niishiya niaari seetanujanaa masenutaniya puetunujanaa niaarano Pueyaso jiiitasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuashiniujuhuaj. <sup>5</sup> Pueyasocua nia tiuuniucua, nojuajaari na cumaacata nia cojuaquiaa. Pueyaracaanu nia cojuanutaniyani nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanoquia maninia Pueyaso miiniu panishano na pueyaranononi, shusha jiyacari niquishaanutaniyani.

<sup>6</sup> Cunora niaari shuquiriaatia quiya. Saniniuujia, niaa naasucuaari taraajeya rupaquijia nia miijiosacari naquiya mijiria. Naajaa, niaa jaara naquiya miishaare, cunoori maja najuhuanaj. <sup>7</sup> Naquiya pa miiniuni, cunoori pa saniniuujishaanura paate seetanujanaa

Pueyasocua tiuujiacani. Niaacuajaari niishiya, pueyari jiyanoquia oro panijiaca. Saniniuujia, Pueyasocua pa tiuuniuni, cunoori jiyanoquia socua panishano orojiniji. Niaacuajaari niishiya, pueyari oro catijiaja, na sanishaanura maninia oro seetanutejanaa. Naajaa, seetanujanaa maninia oroori shaajejajuhua. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujia pa quiniucua, cunoori socua jiyanoquia maninia cuno shaajaja orojiniji. Pueyasocua nia tiuuniu jaara saniniuujishaare juhua orojuhua, jaara seetanujanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanoquia maninia miiniutaniya niajaniana. Jiyaniijianucua nia jiyatenutaniyani.

<sup>8</sup> Majaari juhuanujuaja Jesucristo nia niqiniu. Naajaa, niaacuajaari na panijiaca. Nia niquishoo na quishacarijia, naajaa, niaari nocua tiuquiaa. Niaari na timitiaquiaa jiyanoquia. Tojetaarucujanaa jiyanoquia nia timiniu quiniucua nioojiajinia, majaari nia naata na pohuatana nia rupaata. <sup>9</sup> Niaari naa timiquiaa, tariucua jatanishano nioojia quiniucua, Jesucristoocua nia tiuushacari.

<sup>10</sup> Tariucuacaanu, pueyara Pueyaso sequesano caminiuujiniana pueyari poojotaquiaari taa Pueyaso jiyanooniutaniya nio pa quishacari pueyani, na pueya nojori quiniuria. Nojoriiri tama nojori naajiotasanonijaaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoquia niishiniu paniquiaari taa Pueyaso jiyanooniutaniya pueyani. <sup>11</sup> Jesucristo Sohuanucuaajaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaariaruahuaj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniuujiquiaari juucua, cantejaara cuno quiniutaniyani, Pueyaso Jiyarosocoriquianoni, naajuhua, taacari na muetanutaniyani. <sup>12</sup> Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoriirijaaja na quiniu quiquiaari. Cuarta Pueyaso pueyanaa, cunoori niaarano quiquiaari seetanujanaa! Tariucuacaanu poojotasano Pueyaso Jiyarosocoriquianojinijiiri tari tohua-teequiaari! Jiyocuacaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuajitij, quiari naataja nia tojishano Jesucristojinijini, cunoori supuetanaa pohu-

atasano quiquiaaricuaja. Pueyaso seyajanaacuajaari pueyarano Pueyaso miishocoriquianoocua maatia niishiniuucua jiaatiaajuhuj.

### Pueyasoori paniya saaja maninia miijiaca pa quiniuria

<sup>13</sup> Cunora, cuarta Pueyaso pueyanaa, jeenucuasano nia quiriqia. Jesucristo muetasacari pocua, Pueyasoori jiyanoohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niqijotejaca nia quiniu. Maninia niishiriojojuaca nia quiriqia. <sup>14</sup> Tarijia, niaari tama nia cuaqueya panishanojuaja miijiaca quiquiaari, Pueyaso niishiyashijiaca nia quishacarijia. Quiarijia saniniuuja, niaari na tojijiaca cutara. Naaratej, na muerasu nia quiniuucua, majaari naa quijiaca nia quiniu socua.

<sup>15</sup> Saniniuuja, saa maninia miijiaca nia quiriqia. Pueyasocuajaari nia saquiriojojuajaari naa tojetaarucujanaa maninia miijiaca nia quiniuria, juhua nojuajuhuj. <sup>16</sup> Tariucuacaanu Pueyaso sequesanoori naa naajiotasano quiyajuhuj:

“Tojetaarucujanaa sesa miyashijiaca nia quiri, taa janiyacuaani”.

<sup>17</sup> Nia secojosacari, niaari Pueyaso sequequiaa, “cua Quena”. Cunoori maniniacuaja. Naajaa, majaari nia niyjetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojininio. Majaari rimiajata na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriohuari. <sup>18</sup> Pa supuetanaa quiniuucua sesa miijiaca, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio, shaajeja casaata. <sup>19</sup> Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niqiara mosaaquiaari na camaru niti, cuno borregoori tojetaarucujanaa borrego maniniu quiquiaari. Naajuhuj, Jesucristoori tojetaarucujanaa maninia miijia quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. <sup>20</sup> Jiya shipiniyaquishacarijia, Jesucristoori tariucua pueya niti mosocoriquiano sequesaaquiaari, sesa miijiaca jiyanooshaanura. Saniniuuja quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani.

<sup>21</sup> Naa Jesucristo miiniuucua pocuaratej, niaari Pueyasocua tiuuquiaa. Pueyasocuajaari Neyanu samiitianiquiaariuhua. Na jiyatequiaariiri Jiyaniijajanaa na quiniuria, shacantuuca cumaacaraca quijia na quiniuria. Naacuajitij, niaari quiarijia Pueyasocua tiuya, na samiitianiniuria nijaniyajuhuj. Naaratej, niaari juhujaniya sashiya, shacantuuca quijiacara nia jatanishaanurajuhuj.

<sup>22</sup> Seetanu rupaajanaa tojitiajaca nia quiniuucua, nioojiaari tari jeequejosaaquiaari, niarta Pueyaso pueya panijiaca nia quiniuria seetanujuanaa. Naaratej, seetanujuanaa panitiojuaca nia quiriqia puetunu nioojiatajanaa, maja sesa nia niishiriojonuta quenaaja.

<sup>23</sup> Naa panijiaca nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijia nia quiniuria seetanujuanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniuucua. <sup>24</sup> Tariucuacaanu Pueyaso Rupaajinia naajiotasanoacuajaari naa sequeya:

“Puetunu pueyajanaari rishiyashijiaca juhua jiyasocua. Na cumaaca, puetunu na jittiasanojuanaajuhuj, cunoori soreja, juhua naana shuu. Jiyasocuaari soreja. Naana shuuri tijia. <sup>25</sup> Saniniuuja, Pueyaso Rupa cutaraari pueyaracaanu quijia”.

Cuno rupaacuajaari nia niqiara pohuatasaaquiaari pueyaracaanu quijiacara na jataniniuria nijaniya.

**2** Naaratej, na tarinitiare puetunu sesa nia miiniuujanaa. Seetanujuanaa nia tarinitiare cuaracashijionu. Naajuhuj, majaari sapuenu juhua maninia pueyano niqishano nia quiniu najuhanaj. Majaari tamasaca jittiasanoocua jiaatiajaca nia quiniujuhuj. Majaari coriaacojuaca nia quiniu socua. <sup>2</sup> Naa jaara tari niishiyacuaja pa Jiyaniijaari seetanujuanaa maninia, na rupaacua jiaatiajaca nia quircuarajaj. Naatej, taa shusha rasano conaaja jiaatiaa supenuucuaani, naa Pueyaso Rupaacua jiaatiajaca nia quiriqiajuhuaj, cumueca Pueyaso muerasu nia quiniuria seetanujuanaa. Naacuajitij, niocua tojetaarucujanaa jatanishano pueya quiri.

### Cristoori juhua saminio saajia, Pueyaso quiquiorano tiataja

<sup>4</sup> Saijiniji shipinishano tiaari pueyaracaanu rishijia. Naaratej, pa Jiyaniijaari miriqui sequeshiya juhua saminio saajiaata Pueyaso quiquiora. Mijiria Pueyasora tiajonaari jyaniquiaari cuno saajiaari sesarujajaj. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. <sup>5</sup> Naajuhuj, puetunu Jesuucua tiuujiaca pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniujiaaca sai Pueyasorani, na quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tajoji. Majaari seya pa niqitiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucua, cunoori Pueyaso timitiquiaa. <sup>6</sup> Cunora, tariucuacaanu Pueyaso Rupaajinia,

miriqui Pueyaso sequesano Jesucristojiniijiiri naa naajiotosano quiya:

“Janiyari Sión tuhuananuucua jiyanoehua cua panishano saajia nianutaniani. Cuno saajiaari tama cua saquiriojosanojuaaja. Maniniujiajau saajia seetanujanaari. Cante nocua tiuyani, nojuajaari maja na cararosaanu quiniutianiya”.

<sup>7</sup> Cua panishano pueyanaa, cuno saajiaacua tiuujiaca nia quiniuucua, cuno saajiaari jiyanoehua nia timitiasano. Nocua tiuyashijiaca cutaraari cararosaanutaniani. Nio tariucuacaanu Pueyaso Rupaaajinia naajiotasanoori tari tohuatecanu nojoriria. Naa miriqui sequeyari:

“Tiajonaa jatasano saajia, nojori jiyanihacari cuno saajia naasucua sesarujajau, cuno saajiacuajaari socua jiyanoehua panishano saajiaari jiyatesaaquiaariuhua”.

<sup>8</sup> Tamaqui, nojuajiniijiiri naa miriqui naajiotosano quiyajuhuj:

“Pueyari cuno saajiaacua tiuriiniutianiya. Nocua jiri-atanutanijajariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniiji. Pueyasocuajaari tariucuacaanu sequequiaari Neyanuucua tiuyashijiacaari tiuriiniutianiya puetunurajanaa.

<sup>9</sup> Niajaniya saniniujia, niaari tama Pueyaso saquiriojosano pueyajaaja. Nojuajaari puetunu niajanijajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijiaca nia quiniuriajuhuaj. Puetunu niajanijajanaari tamasaca pueyapuejinijinio saquiriojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niquiara. Tariija, niacuajaari juhua ninishiqui quijiaca quiquiaari. Pueyaso cutaraari nioojia cuhuataquiaari, seetanujanaa shacantuuca cumaacajinia quijiaca nia quiniuria nata.

<sup>10</sup> Tariucuacaanu, Jesucristoocua tiuyashijiaca nia quishacariija, niaari juhua soosano taucuaca quiquiaari Pueyasora. Quiariija saniniujia, niaari Pueyaso panishano pueya. Tariucuacaanu, majaari Pueyaso taraajenu quiija niaacua. Quiariija cutara, niacuara taraajeyari. Cunora, nia jiyanooquiaari.

### Pueyaso panishano miijiaca pa quiriqiaj

<sup>11</sup> Cua panishano cuarta Pueyaso pueyanaa, nia tojiri cua sequesano. Niaari juhua ruconaa mijiria. Nio jiyari maja pueyaracaanu pa quijiara. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. <sup>12</sup> Saaja maninia miijiaca nia quiriqia Pueyaso niishiyashijiaca niquiara. Naacuajitij, nojori jaara niacuara rimiaaqueeriquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniani. Jiyacari, niacuara rimiaaquejacaari niishiniutianiya, Pueyasoori tojetaarucujanaa maninia miijia na sani-

itiosacari nojori, maninia na miishacari niajaniya saniniujia.

<sup>13</sup> Pa Jiyaniija tojjiaca nia quiniuucua, puetunu mijiria pa jitianaa jiyaniijianucua tojitiajaca nia quiriqiajuhuaj. Naacuajitij, nia jiya jiyaniijajanaa tojjiaca nia quiri. Nojuacuajaari jiyaniijajanaa cutara. <sup>14</sup> Cunora, nia jiyatesano jiyaniijianucua tojjiaca nia quiriqiajuhuaj. Nojoricuajaari na jiyaramiquishano, sesa miijiaca saniitiosaanura, maninia miijiaca maniniuhuaqueetasaanura saniniujia. <sup>15</sup> Naacuajitij, saaja maninia miijiaca nia quishacari, niaari niishiyashijiaca sesa miijiaca sanaajanutaniani, najuhuaana nojori sesacasacari niajaniya. Cunora, Pueyasoori paniya maninia miijiaca nia quiniuria.

<sup>16</sup> Tariucuacaanu, Moisés Rootasanoori juhua nia jiyaniija quiija puetunu niaarajanaa nia tojishocoriquiano. Quiariija saniniujia, Jesu cusonuucua nia niti, nojuajaari Moisés Rootasano tohuatequiaari. Naacuajitij, nojuajaari Moisés Rootasano sanaajuaari niaara. Naacuajitij, Moisés Rootasano tonujiaquishacari niaacuara tari, naajaa, majaari nia jiyaniinu naacuajiti nia naata tama nia panishanojuaaja miiniu. Pueyasojuaanaacuajaari nia Jiyaniijajanaa cutara. Naaratej, seetanujanaa na tojitiajaca seya nia quiriqia cutara. <sup>17</sup> Majaari quenaaja niquiriyatu pueyano rerequeteja nia quiniu. Niarta Pueyaso pueya panijiacua nia quiriqia cutara. Seetanujanaa Pueyaso tojjiaca nia quiriqia. Majaari jiya jiyaniijajanaa rerequetejaca nia quiniu.

### Naquiya pa miishacari, sanaa pa rejeretariquia juhua Cristo

<sup>18</sup> Poonijjotesano pueyanaa, seetanujanaa maninia nia camarnu tojjiaca nia quiriqia. Nia camarnu jaara juaajiaca quiriqia, naajaa, saaja na tojjiaca nia quiriqia. Majaari saaja maninia nia jiaajaca tojjiaca nia quiniu, nia jiyanoojacanio. <sup>19</sup> Naa jaara juhua janiya rejeretariquia najuhuaana nia camarnu saniitiosacari niajaniya, cunoori jiyanoehua maninia Pueyasora. <sup>20</sup> Pueyaso cutaraari maja na timiniu nia jaara juhujaniya rejeretare nia camarnu saniitiosacari niajaniya seetanujanaa sesa nia miiniuucua. Saniniujia, nia camarnu jaara saniitiore niajaniya maninia nia miiniuucua, nia jaara na rejeretare juhujaniya, Pueyasoori cuno timitiaja cutara. <sup>21</sup> Pueyasocuajaari nia saquiriojoquiaari naquiya rejeretajaca nia quiniuria maninia nia miiniuucua. Cristojuanaacuajaari naquiya miishaaquiaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniuriajuhuaj. <sup>22</sup> Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuj. <sup>23</sup> Jaara sesacasaaquiaari, nojuajaari maja quenaaja nojori na riuacuanu quiija na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasooocua tiuuquiaari, na niishishacari nojuajaari seetanujanaa maninia nequesoreena cutara. <sup>24</sup> Cristo jaara niyacutesanojinia cuso-

juasaaquiaari, nojuajaari tari puetunu sesa pa miiniujiana cusotaquiaari. Naa pa niti Cristo cusonuucuatej, cunoori quiquiaari maninia miijia pa quiniuria saniniujia, maja socua sesa miijia pa quiniuria. Naajuhuj, nojuajaari pa niti nootusaaquiaari, pa naatanijiosaanura saniniujia. <sup>25</sup> Tarijia, niaari juhua tashuquioono borregohua rucojuaca quiquiaari. Quiarijia saniniujia, niaari nia cojuana Cristoocua tiuquiiioquiaari. Nojuacuajaari nioojia jiiitiana maniniu.

### Camiyono pueyara rootasano

**3** Camishano maajipohuanaa, nia niyaca tojitajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacarijia Pueyaso Rupaa. <sup>2</sup> Nojori niquishacari tojetaarucujanaa maninia miijia nia quishacari, nojori tojiijacajuhuj, saa cunotaja nojoriiri maatia niishiniutianiya Pueyaso Rupaari seetanujuanaa. <sup>3</sup> Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucasano, saaja na muezaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucasano jaara juaaniu maniniu quiriquiajuhuaj? Maja. <sup>4</sup> Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatijaca nia quiriquia cutara, jacaria pocuajuhuj, maja juaajia. Jiyano maajitij, cunoori seetanujuanaa maninia niquishano Pueyasora cutara. Naa jaara nioojia maniniushitiri cutara, cunoori seetanujuanaa shaajeyaquiriquiano. <sup>5</sup> Naajuhuj, Pueyasocua tiuujia tariucuaaanu maajipohuari neyaca tojiijia quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. <sup>6</sup> Supuetana Abraham niqiuocua Saaraari naa neyaca tojiijia quiquiaari. Seetanujuanaa neyaca tojiijia na quishacari, nojuajaari na jiyaniquijia na jiyaniijata. Naacuajitij, niaa jaara maninia miijia quiriquia, niaa jaara nia puereyaquiniutia nia niyaca tojiijia quiriquiajuhuaj, Pueyasora, niaari Saara niqiuojori.

<sup>7</sup> Niajanijarijata canuunaa, nia niqiuocua nia jiiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuajaari Pueyaso jiyanooshanojuhuaj, taa na jiyanooquiaari nijaniyacuaani. Pueyasoori niaata nojori cojiritianutianiya samiitianijionu, pueyaracaanu rishijia nojori quiniurajuhuj. Naacuajitij, maninia nia jiiitariquia nia niqiuocua, Pueyaso mariqui nojuaja nia secojosano tojiyaquiriiri.

### Paatucua taa miiriquia parta pueyani

<sup>8</sup> Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutano. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitiojuaca nia quiri juhua nia tapueyocucata. Taraajetoojuaca nia quiri juhuaj. Naajuhuj, majaari tama nia cuaqueyajaaja nia jiyatenu juhua socua tojihano pueyano nia quiniuria tamonu pueyanojiniji. <sup>9</sup> Naa jaara sesa miishaariquia, majaari na naminiu. Naajuhuj, niaa jaara sesacasaariquia, majaari nojori nia riucuanu nojori nia sesacanurajuhuj. Saaja maninia nia riuhuanere nojori. Tariucuaaanu, Pueyaso paraca nia quishacarijia, nojuacuajaari nia saquiriojuquiaari maninia na miiniuria nijaniya. Naaratej, saaja maninia nia miiriquia nia paracajuhuj. <sup>10</sup> Tariucuaaanu Pueyaso Rupaajiniacuajaari naa naajiotasano quiyajuhuj:

“Cante pueyaracaanu mijiria rishiniucua jiaatiaani, shuquiriaatia na quiniurajuhuj, nojuaja cuara na niti cojuara maja sesa na pocuanura. Cuara na rupaa cojuarajuhua maja na cuaracashijionura. <sup>11</sup> Naajuhuj, cuara sesa na miijionu tarinitiaara saaja maninia na miiniuria. Nojuaja cuara pueya jyanootiooteja quiiria. Cuara naa maninia na miini tarinitiaaquiiria. <sup>12</sup> Cante naa maninia miijiani, Pueyasoori na cojuaja, na secojosano tojiijiaariuhuj. Saniniujia, Pueyasoori sesa miijia samiritiaja saaja”.

<sup>13</sup> ¿Cantucua sesa nia miiriquiani niaa jaara saaja maninia miijia quiriquia? <sup>14</sup> Naajaa, niaa jaara saaja maninia nia miiniucua miitiasaare, nia timiquiore. Pueyasocuaari jyanohua maninia miiniutianiya nijaniya saniniujia. Mijiria quiniaa miananajosacari nijaniya, majaari puerenu, majaari nioojia nia niqijiotenu. <sup>15</sup> Saniniujia, nioojiajinia Cristo nia jiyatere nia jiyaniijajanaara, seetanujuanaa na tojiijia nia quiniuria. Juhucarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuajitij, niaari jeenucuasano quiniutianiya, maninia nia riucuanura tamasa jaara nequesotare nijaniya, casaara juhujaniya naquiya miini rejeretajacate nijaniyani. <sup>16</sup> Jacaria nia pohuatare nia paniniutia nojori, maja nia rerequetenuta nojori. Pueyaracaanu maninia miijia nia quiriquia, sesa nia miiniu mariqui nioojia macuhujareeri. Naacuajitij, pueyaracaanu shitimia maninia miijia nia quishacari Jesucristoocua tiuujia nia quiniucua, niaacuara rimiaaquejacaari tama sesa na pocuanuacuajaaja caririquiniutianiya.

<sup>17</sup> Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniucua, maja sesa nia miiniucua. <sup>18</sup> Cristojuanaacuajaari mosaaquiaari sesa miijia pa quiniucua. Majaari socua na pacutenu quiniutianiya cusonu. Nojuajaari tojetaarucujanaa maninia miijia quiquiaari. Naacuaji-

tij, nojuajaari sesa miijiacaacuara cusoquiaari, Pueya-soocua na jiyatanura niajaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniuucua, nojuajaari samiitiaquiaar-  
 iuhua. <sup>19</sup> Naa sohuanu na quiniuucuatej, nojuajaari macunucua quiqiojia rosequiaari tii tama nojuajini-  
 jijiaaja na pohuatanura macunucua sohuanu. Cuno pojoriiri nujuatejuajinia mishiquionucua quiya. <sup>20</sup> Cuno pojoriiri, noo pojoricuaja tariucuaaanu  
 supuetana Noé tojiyashijia quiquiaaritij, pueyara-  
 caanu Noé poojotasacari Pueyaso rupaa nojori  
 niquiara juucua. Pueyaracaanu Noé tarishishacari na  
 puereetuca buque na shipinishacari, pajaacuaji na  
 tacajara, Pueyasoori jiyacari cuno sesa miijiaca  
 sashiquiaari juucua. Pueyaracaanu sashiquiaariiri no-  
 jori tacatonuhua noojiaca nocua juucua. Puetunu  
 mijiria quiijaca pueyajinijuanaani, saaja ocho  
 pueyari cureeqiaari, buquejiniacuma nojori  
 tiuquitianuucua. Puetunu pueya shushiniushacari pa-  
 jaajinia, cuno pajaari saniniujia Pueyasooocua tiuujia-  
 ca cuataniquiaari na buquejini. <sup>21</sup> Quiarijia pajaniyara  
 saniniujia, cuno pajaari miriqui pa niishitiojia taa  
 Pueyaso miiquiaa pajaniyani, paa jaara moojinia  
 tiuquinishaareni Jesuucua pa tiuushacari. Naatej, taa  
 Noé juhuajaniya cuataquiaari pajaajiniacuaani, Pueya-  
 soocua tiuujia na quiniuucua, pueraari naajuhuj.  
 Naacuajitij, paa jaara moojinia tiuquinishaareni, paari  
 pa timiniutia moojiniji tohuataquiohuani, poojia cajitis-  
 hano seetanujuanaa pa niishishacari paari tari  
 jiyanooshanoni, pocuaji Tacuna Jesucristo samiitianuu-  
 cua macujiniji. Majaari pa tiuquinishaanu quiquiaa pa  
 seca pa jatanura. <sup>22</sup> Jesucristo samiitiasacariuhua, no-  
 juajaari jiyocuacaanu tacaquiaariuhua. Quiarijia cajia  
 Pueyaso miaquetajaraari. Jiyaniijiajanaa na quiniuu-  
 cua, nojuajaari cumaacaraca, tama nojuajaaja na toji-  
 tiniuria Pueyaso seya, puetunu cumaacaraca quiijaca-  
 janaa, samaruhuanio.

#### Maninia miijiaca pa quiriquia, Pueyaso cumaaca pa ji- itianuucua

**4** Naacuajiti pueyanaa, naatej, taa Cristo rejere-  
 taquiaari naquiya miiniu mijiria na quishacar-  
 icuaani, naa rejeretajaca nia quiriquiajuhuaj, niaa jaara  
 naquiya miishaariquia. Naquiya pa miishacari, cunoori  
 sesa pa miiniu pa tarinitijia. <sup>2</sup> Naacuajitij, paa jaara naa  
 naquiya miishaariquiani, na nuhuaji paari saaja Pueya-  
 sora quiniu paniyani. Paari saaja na panishano miiniu  
 paniyani, maja tama pa cuaqueya panishanojuaaja pa  
 miiniuria socua. <sup>3</sup> Tarijia, Pueyaso tojiyashijia nia  
 quishacarijia pueyanaa, niaari jiyanohua sesa miijiaca  
 quiquiaari, taa Pueyaso niishiyashijia mi-  
 iquiaacuaani. Niaari saaja nia cuaqueya miiniu panis-  
 hanoocua shiiniuquijia quiquiaari. Niaari queraatia  
 tamaatia sesa miiniuucua jiaatiajaca quiquiaari. Niaari  
 saaja mashaasequenujuaca quiquiaari. Nia querana-  
 cunuusaqui, niaari tojetaarucujanaa sacuaratia miiji-  
 aca quiquiaari. Niaari rerejuajuhua puera nia  
 ratunura, jiyanohua nia mashaasequenuunurajuhuj.

Naajuhuj, niaari juaashiquiata shipinishano nia  
 pueyasora nia jiyatesano shuquiritiajaca quiquiaari.  
 Niaari na taccoji sacuaratia pueresano casaa mi-  
 iquiaarijuhuaj. <sup>4</sup> Quiarijia saniniujia, Pueyaso ni-  
 ishiyashijia nia cojiyaquishacari naa sacuaratia nia  
 miijionuratej, nojoriiri jiuujiatequiaa nojori shaa-  
 casacari niajaniya. Nojoriiri cunora nia sesacaquiaa.  
<sup>5</sup> Cuno pojori cuaara niishiiria nio, Pueyasoori nojori  
 nequesoreenutaniya na nequesoreesacari puetunu  
 pueyajanaa, saminiucua, macunucuanio. Jiyacaritij, no-  
 jori cuaara tama nojoriicuaaji riucuaarajaaja. <sup>6</sup> Cunora,  
 pa Jiyaniijia Jesucristoori macunucua niquiara pohu-  
 ataquiaari Pueyaso rupaa tama nojuajiniijiaaja, nocua  
 tiuujiacar na jiyatesocoriquiano. Nocua tiuujiaari  
 pueyaracaanu rishijiacara quiriquiano, taa  
 Pueyasocuaani. Sesa miijiaca mijiria nojori quiniuucua,  
 nojoriiri pajaajinia cusunuuquiaari taa puetunu pueya-  
 janaa shaajecoquiaacuaani. Naajaa, Jesuucua tiuujia  
 cutaraari samiitianijiosaanutaniuhua.

<sup>7</sup> Nio pa quishacariini, paari socua quenaacoya jiya  
 puequesacariicuarani. Naaratej, niishiriojuuca nia  
 quiriquia. Maninia nia jiitariquia tama nia cuaqueya-  
 jaaja, saaja Pueyaso secojuuca nia quiniuria pueyara-  
 caanu. <sup>8</sup> Jiyanohua panitiojuuca nia quiriquiajuhuaj.  
 Cunoori socua panishano cutara. Paa jaara panijia  
 quiriquiani, paari queraatia sesa miishano jiyanojia  
 quiniutianiyani. Naaratej, seetanujuanaa panijia nia  
 quiriquia. <sup>9</sup> Niarta Pueyaso pueya jiitiaquishacari na  
 maquejara, na miaquesocoriquianojuhuaj, nojoriicua  
 taraajeja nia quiriquia. Nojori nia tiuquinitariquia nia  
 tiajinia nia timiniutia. Majaari nojori nia ririjiotanu nia  
 taajenuta. <sup>10</sup> Pueyasocuaajaari na Sohuanu niqutio-  
 quiaa puetunu na pueyajanaa, tamaatia maninia casaa  
 miiniu niishijia pa quiniuria. Naaratej, puetunu nia-  
 janiyajanaa cuaara maninia miiria niarta Pueyaso  
 pueya pueyaracaanu, taa Pueyaso cumaquiquiaa nia-  
 janiya maninia nia miiniuriacuajani. Maninia nia pooni-  
 jioteriquia Pueyaso cumaaca, nojuaja niqutiojosano  
 niajaniyani. <sup>11</sup> Naacuajitij, nia pocuasacari, Pueya-  
 soocua nia tiuuri nojuaja cumaquiniuria niajaniya na  
 panishano nia sequenura. Naajuhuj, niaa jaara casaa  
 miiriquia niarta Pueyaso pueya nia naacunura, nojori  
 nia miiriquia maninia Pueyaso niqutiosano cumaaca-  
 ta. Naa nia miiriquiatej, Pueyaso timitiasaanura socua,  
 Jesucristoocua tiuujia nia quiniuucua. Nojuaja  
 cuaara maninuhuaqueetasaaria pueyaracaanu, toje-  
 taarucujanaa maninia miijia na quiniuucua, puetunu  
 cumaacaracajanaa na quiniuucujuhuj. Cuaara naa  
 quiiriatej.

#### Juhujaniya pa rejeretare naquiya miiniu, Pueyaso pueya pa quiniuucua

<sup>12</sup> Cua panishano cuarta Pueyaso pueyanaa, majaari  
 nia shiriquiniu niaa jaara jiyanohua naquiya mi-  
 ishaariquia. Majaari nia jiyaniujuhuaj saa niajaniyaja  
 naa miishiya. <sup>13</sup> Naa jaara naa naquiya mi-  
 ishaariquiatej, nia timiri. Jesucristoocua tiuujia nia  
 quiniuucua, niaacuajaari naa miishiya taa Jesucristo

miishaaquiaari naquiyacuaani. Naa naquiya miiniu nia rejeretasacaritij, niari jyanohua timitianutaniya Jesucristo, shacantuuca na cumaacata na tiuquishacariuhua, na jataniniuria nijaniya juhua nojuaja nia quiniuriajuhuaj. <sup>14</sup> Naajuhuj, niaa jaara sesacasaariquia Jesucristo tojjijaca nia quiniuucua, shuquiriaatia nia quiriqia. Pueyari naa nia sesacaquiaa, shitimia maninia miijijaca nia quishacari, Pueyaso Sohuanuraca nia quiniuucua. <sup>15</sup> Naa jaara naquiya miishaariquia pueyanaa, cuno cuaara quiiria maninia miijijaca nia quiniuucua, maja sesa miijijaca nia quiniuucua. Naa cuaara caririquiria cutara niaa jaara mojua quiri, nohuasejojua, sesa miijia, timia niishiniu panijia tamasaca casaa. <sup>16</sup> Saniniuujia, maja cutaraari nia caririquiniu niaa jaara naquiya miishaariquia Jesuucua tiuujijaca nia quiniuucua. Saaja Pueyaso nia shuquiri-tiarquia cunora.

<sup>17</sup> Quiarijiani, Pueyasoori tama na pueyajaaja saniitioquiaa na tojjitiaaquishacari na rupaa. Paa jaara naa saniitiosaaquiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? <sup>18</sup> Naacuajitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojjiyashijia miishaanutaniyatej? ¿Uhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jyanohua socua naquiya miishaanutaniya, Pueyaso saniitiosacari nojori. <sup>19</sup> Naacuajitij, Pueyaso jaara naa naquiya nia miishaanura paniya, juhujaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipinina. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

### Socua rootasano Pueyaso pueyara

**5** Quiarijia saniniuujia cuarta Pueyaso pueyanaa, janiyari nia jitianaa nacasuyani. Nijaniya, Pueyaso pueya maapue jitiananaa, cua tojjitiare. Janiyacuajaari Pueyaso pueya maanu jitianajuhuj, juhua nijaniyajuhuj. Janiyacuajaari pa Jiyaniijajanaa niqini-ani, nojuaja jaara naquiya miijioquiaari mijiria na quishacarijia canaata. Naajuhuj, nojuajiniji cua pohuatanuucua, janiyari naquiya miishaaquiaajaaniuhuj. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiriti-asaanutaniya jatanishaanuni, juhua nojuaja pa quiniuria mariyata. <sup>2</sup> Cunora Pueyaso pueya jitiananaa, shamaatia nia cojuare Pueyaso pueyaniyoyua, teyano jitianara Pueyaso jiyatequiaari nijaniyacujani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracujani. Majaari nojori nia jitianu nia taajenuta saaja nojori jitianaa nia quiniuucua. Naajuhuj, majaari nojori jitianaa nia quiniu saaja cumaneecaacua nia jiaatiantuta. Saniniuujia, seetanujuanaa nojori nia paniniutia nia jitiariquia niarta Pueyaso pueya. <sup>3</sup> Majaari niarta Pueyaso pueya nia jitianu juhua tama nia seyajaaja.

Nijaniya saniya cuaara maninia miijijaca quiiria nojori niqiuara, nojori niishiniuria nia quijiacate Pueyaso pueya, nia nojori miiniuriajuhuaj. <sup>4</sup> Naacuajitij, pa Jitianajanaa tiuquishacariuhua jiyocuaanu, niari shacantuuca quijiacara jatanishaanutaniya, pueyara-caanu rishijijaca nia quiniuriajuhuaj.

<sup>5</sup> Nijaniya mashiquiorinia, Pueyaso pueya jitianaa tojjijaca nia quiriqiajuhuaj. Puetunu nijaniyajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuaanu Pueyaso Rupaajiniacuaari nia naajiotasano quiya:

“Pueyasoori na juaaniutia niqijia narta pueya shocoteja. Saniniuujia, narta pueyano shocoteyashijia naacujua cutaraari”.

<sup>6</sup> Naarate pueyanaa, puetunu niarta Pueyaso pueyanaa nia jiyateriquia tojjishano pueya nojori quiniuria niaara. Majaari quenaaja nojori nia rerequetenu. Naa juhujaniya niarta Pueyaso pueya tojjijaca nia quishacaritij, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyani-ijianucua nia quiniuriajuhuaj. <sup>7</sup> Pueyanaa, puetunu nia tacaaniujianaa nia niqitiore Pueyaso. Nojuacuajaari niaacua taraajequiaa.

<sup>8</sup> Pueyanaa, nia Paraca sequeeri nia shanacujuquiaa, juhua sare, taa sare shanacujia na sanura casaacuaani. Cunora, soquejaca nia quiriqia pueyara-caanu. Juhua sutejaca nia quiriqia, pueyaracaanu nia secojonura, Sesaaca mariqui juhua sare nia sareeri.

<sup>9</sup> Cumaatia nia nujuatariquia nojuaja, seetanujuanaa Pueyasocua tiuujijaca nia quishacari. Majaari Pueyaso Rupaacuaji nia taacanunu. Naa nia miiriquiatej, nia niishishacari niarta Pueyaso pueyari puetunu tiquiyocujanaa nia naquiya miiquioyajujuaj. <sup>10</sup> Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria. Tojetaarucujanaa pa jyanoojia na quiniuucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniuucua. Naaratej, nojuacuajaari nia jiyatenutaniya seetanujuanaa nioojia niqijioteyashijijaca nia quiniuria, socua jyanohua na cumaaca jitiatajaca nia quiniuria, maja quenaaja Sesaaca pootionura nijaniya. <sup>11</sup> ¿Jyanohua maniniaari pa Que Pueyaso! Nojuacuajaari puetunu cumaacaracajanaa pueyaracaanura. ¿Cuaara naa quiiriatej!

### Pedro sequesano quera na naajio na tucuatascari

<sup>12</sup> Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura nijaniya, cua shiniujiuniuria nijaniyajuhuj maja nia pishiniuria Pueyasocujia. Seetanujuanaa jyanoojia na quiniuucua, naarate nojuajaari nia jitiata maninia, naquiya na miitishacari nijaniyajuhuj. Cunora, nocua nia tiuuriquia, pueyaracaanu na cumaquiniuria nijaniya.



<sup>13</sup> Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa nia-janiyani. Marcoori nia saruhuataajujuaj. Nojuajaari

juhua quiyanu. <sup>14</sup> Nia saruhuatasacari niarta Pueyaso pueya, seetanjuanaa nia paniniutia nia nujuutoore. Pueyaso cuaara nioojia cajitiiria, canapuate Jesu-cristoocua tiuujiacacuajani.

## 2 PEDRO

### Pedro saruhuatasacari narta Pueyaso pueya

<sup>1</sup> Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiuutiquiaari pocuaji Tacuna Jesucristoocua, taa nocua canaa tiuquuaar-icuaani. Nocua nia tiuuniuni, cunoori jiyanoohua panishano. Naacuajitij, Pueyasoori nia jiyanoohuaa juhua sesa miyashijiaca nia quiniuria na niquiara, taa canaa quiyacuaani. <sup>2</sup> Seetanujuanaa maatia nia niishitiri quia Pueyasoni, pa Jiyaniijia Jesunio. Naacuajitij, niaari socua jiyanoohua cumaquishaanutaniya. Niooiaari cajitishaanutaniyajuhaaj, juhuajaniya quijiaca nia quiniuria.

### Pueyaso pueya cuara nio niishitiojosano miijiaca quiri

<sup>3</sup> Jesucristojuanaacuajaari pa sequequiaari na pueya pa quiniuria. Paari na masuunu toji quiaarini, pa niishishacari nojuajaari seetanujuanaa Pueyaso Niyanu, tojetaarucuajanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniuriajuhuaj. <sup>4</sup> Naa jiyanoohua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojitiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacuajitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiri quiani, paa maara tojetaarucuajanaa seseriquiani, taa mijiria quinia pueya sesequiaacuaani tama nojori panishano miijiacajaaja nojori quiniuucua. <sup>5</sup> Cunora, tamajaaja nia saniniujiuriquia tojetaarucuajanaa maninia quijiaca nia quiniuria, juhua Pueyaso. Niaacuajaari tari nocua tiuujia. Naa nocua tiuujia nia quiniuucuatej, jiyanoohua nia saniniujiuri maninia miijiaca nia quiniuria pueyacaanu. Naa maninia miijiaca nia quishacaritij, jiyanoohua nia saniniujiuri socua niishijiaca nia quiniuria, sesa miiniu nia ruuretanura. <sup>6</sup> Naa niishijiaca nia quishacaritij, jiyanoohua nia saniniujiuriquia tama nia cuaqueya miiniu panishanojuaaja rejetejaca nia quiniuria, maja nia miiniuria sacuaatia casaa nia panishano. Naa tama nia cuaqueyajaaja rejetejaca nia quishacaritij, jiyanoohua nia saniniujiuriquia juhua-

janiya sashijiaca nia quiniuriajuhuaj. Naa juhuajaniya sashijiaca nia quishacaritij, jiyanoohua nia saniniujiuriquia seetanujuanaa Pueyaso panijiaca nia quiniuria. <sup>7</sup> Naa Pueyaso panijiaca nia quishacaritij, jiyanoohua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanoohua nia saniniujiuriquia tojetaarucuajanaa panijiaca nia quiniuria.

<sup>8</sup> Naa jaara puetunu nio niishitiojosanojuanaa tojijiaca quiri quia seetanujuanaa, majaari najuhua na Jiyaniijia Jesucristo niishijiaca nia quiniu quiniutianiya. Naajuhua, majaari najuhua quijiaca nia quiniu quiniutianiya. <sup>9</sup> Nio rootasano tojiyashijiaca saniniuujia, nojori juhua cariyujuaru, niishiyashijiaca. Naa nojori quiniuucuatej, nojori niyajetaquia nojoricua-jaari juhua jeequejosaaquiaari sesa nojori miishanojiniji. <sup>10</sup> Cuarta Pueyaso pueyanaa, Pueyasocuaajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiri quia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya.

<sup>11</sup> Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

<sup>12</sup> Niaacuajaari maatia niishitiojosaaquiaari Pueyaso rupaa Jesucristojiniji. Niaari cuno seetanujuanaa rupacua tiuujia. Naajaa, janiyar pueyaracaanu nia niishitiniutianiyan, maninia nia racatanura nia numaa. <sup>13</sup> Mijiria cua rishishacarijia, Jesucristo jiyaramiquishano cua quiniuucua, maniacuajaari pueyaracaanu cua shiniujiuri niajaniya, maja tariucua nia niishishano Jesucristo rupaa jiniji nia niyajetanura. <sup>14</sup> Pa Jiyaniijia Jesucristoori tari cua niishitiriucuaa janiyar quera mosaanutaniyani. <sup>15</sup> Cunora, janiyar nio naajiyani niaarani. Naacuajitij, janiya jaara mosaareni, niaari nio cua naajionee jiitanutaniya cua nuhuaji nia serojosocoriquiano. Maniacuajaari nia jiitanura cua naajionee maja nia niyajetanura puetunujuanaa cua niishitiojosano niajaniya.

### Shacantuca Jesucristo cumaaca niquiniaajiniji pahuatasano

<sup>16</sup> Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pahuatasano na sapojonura pueya. Jesucristo cumaacajiniji canaa po-

huatasanoni, naajuhuaaj, taa na tiuquiniutianihuani, puetunu cunajuanaari maja tama canaa niishishano-juaja. Canaajanaacuajaari canaa namijiatjanaa na niquiquiaarini nojuaja jaara shacantuucara jataquiaari canaa niquiara. <sup>17</sup> Jiyacaritij, na Que Pueyasoori jiyanhua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyanhua cua timitiasano”.

<sup>18</sup> Canaa quishacari pa Jiyaniijata shacantuucara na jatasacari tuhananuucua, canaajanaari naa Pueyaso tojiquiaari jiyocuacaanuji pocuaanoni.

<sup>19</sup> Canaa tojinuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuacaanu nojuajiniji pueyara Pueyaso sequesano caminiujiunaa sequesanoori seetanujuanaajuhuaaj. Naaratej, maniacuajaari nia tojinuria nojori naajio-tasano Pueyaso Jiyarosocoriquiano Pueyanujiniji. Nojori naajiotasanoni, cunoori poojiajina cuhuataquiaa, naatej, taa samaritiu cuhuataa niishiquicuana, cuara juhuaquemajaatijia. Pananuuri saniniuujia muetanuniyacujua, seetanujuanaa na cuhuatanura pajaniya. Naa quiniutianiyajaarihuua pa Jiyaniijia muetasacarihuua pocua. <sup>20</sup> Maninia nia niishiri nio, pueyanaa. Puetunu tariucuacaanu Pueyaso sequesano caminiujiunaa naajiotasanajuanaari maja na naata niishishaanu maatia tama pa niishitiajatajaaja. <sup>21</sup> Tariucuacaanu Pueyaso sequesano caminiujiunaa naajionuutasanoni, cunoori maja tama nojori niishishano-juaja. Pueyaso Sohuanujuanaacuajaari nojori niishitiquiaari nojori pohuatanura Pueyaso sequenu panishano pueyara.

#### Sacuaraatia miijica niishitiojonaajiniji pohuatasano

**2** Tariucuacaanu, noojiaqueya Israel pueyajinijin-oori tama na cuaqueyajaaja jiyatequiaari juhua Pueyaso sequenu panishano caminiujiunaa nojori quiniuria. Naacuajitij, nojoriiri narta Israel pueya sapojonuquiaari. Naajuhua cua panishano pueyanaa, sapojonujuacaari nia tajinia supuenutanijajuhuaaj. Nojori niishitiojosacari sacuaraatia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuara mosaaquiaaricuajani, na pueya nojori quiniuria juucua. Cunora, nojoriiri canashyaquiji niiquiji puetunu shaajasaanutaniyajanaa saniitiosocoriquiano. <sup>2</sup> Queraatia pueyari sacuaraatia miijica quiniutianiyajuhuaaj, sacuaraatia cuno pojori niishitiojosano tojjijaca nojori quiniuucua. Naa nojori miiniuucuatej, Pueyaso niishiyashijiaacari seetanu rupaajanaa sesacanutaniya. <sup>3</sup> Cuno sacuaraatia niishitiojonuujuaacari jiyanhua casamiriaca quiniuucua jiaatiajaca quiniutianiya. Naaratej, nojoriiri najuhua shanhua nojori niishitiojosanota nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijica nojori quiniuucuatej, nojoriiri tariucuacaanujiniji

Pueyaso riuriosanocujaa na saniitiosocoriquiano. Majaari Pueyaso jiyanooni quiniutianiya nojori.

<sup>4</sup> Naajuhuaaj, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereta nojori quejooquiaari ninishiqui. Tii nujatejosano quiyari, nojori saniitiosaanu juuca cuara quiri-jiaatijia. <sup>5</sup> Naajuhuaaj, Pueyasoori Noé quishacari sesa miijica pueya jiyanoyaquiquiaarijuhuaj. Cuno sesa miijica pajaashitiani quiaariiri nojori cusonuunura puetunujuanaa. Saaja Noé curoquiaariiri Pueyaso toji-jia na quiniuucua, socua siete pueyano. Noeri pueyaracaanu cuno sesa miijica pueya numootequiaari juucua, nojori tacatonura noojia Pueyasocua, sesa nojori miiniujiniji. <sup>6</sup> Naajuhuaaj, Sodoma tiacajinia quiniaa pueya quiniuucua jiyanhua sesa miijica, Pueyasoori cuno tiaca catijiatquiaari tojetaarucujanaa juacara. Naa catijiatquiaari Gomorra tiacajaarihuaj. Cuno caapiqui tiaca naa catijiatasaaquiaarini, cunoori quiquiaari cuno nuhaji quiriqiano pueya na numootenura maja naa sesa miijica nojori quiniuria-juhuaj, nojori mariqui saniitiosaarejaarihuaj.

<sup>7</sup> Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanhua taajequiaari tari, cuno pueya miijionuucua sacuaraatia casaa, tariucua nojori jiidishano casaacua.

<sup>8</sup> Puetunu juucajanaa, Lotri narta Sodoma tiacajinia quinia niquiquiaari cararaatia miitioojiano. Sacuaraatia nojori pocoojonu tojiqiaarijiaarihuaj. Maninia pueyano Lot quiniuucua, nojuajaari jiyanhua naquiya miiquiaari noojiajina. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. <sup>9</sup> Naacuajiti pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniuujia, Pueyasoori sesa miijica racatajajaara nujatejosano, nojori saniitiojosaanu juucara. <sup>10</sup> Pueyasoori socua jiyanhua nio pojori saniitioriquiano: na camishoo maajipohua numuetucunuucua jiaatiajacani, maajishuriu numuetucunujuacajuhuaaj, noo pojori-juhuaj, pa Jiyaniijia rootasano ruuretajaca saajatej. Naa sacuaraatia miijiacani, nojoriiri tojetaarucujanaa tojiyashijia. Majaari na pueretunu quiquiaa sacuaraatia tama nojori panishanojuaja nojori miiniuria. Naajuhuaaj, nojoriiri maja na pueretunu quiquiaa jiyocuacaanu cumaacaraca quijica na sesacanura. <sup>11</sup> Saniniuujia, Pueyaso seya cutaraari jiyanhua socua cumaacaraca cuno sesa miijica pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijica nojori sesacanura.

<sup>12</sup> Cuno pojori, saaja sacuaraatia miiniuria niishitiojonaani, nojoriiri niishiyashijia. Nojoriiri juhua nacujiniaaco quijica casami, teyanote saaja puecoosocoriquiano roosaaquiaacuajani. Tojetaarucujanaa niishiyashijia nojori quiniuucua, nojoriiri maninia quijica pa quiniuria pa Jiyaniijia rootasano sesacajiaa. Cunora, nojoriiri juhua puecoosocoriquiano nacujini-acoji casaa. <sup>13</sup> Naacuajitij, nojoriiri naquiya mi-

ishocoriquianojuhuaj, naquiya nojori miitianuucua narta pueya. Nojoriiri jiyanoehua timiquiaa nojori jaara naata quiriquia sesa miiniu juucajuhuaj taa nojori mi-iquiaa niucuacuaani. Cuno pojoriiri sacuaraatia miijia-ca. Majaari na niishiniu caririquiniu. Nojori sapojonuu-cua niajaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajini-atej, nojoriiri jiyanoehua timiquiaa tariucua nojori jii-tishano sesa casaacua nojori niishiriojosacari. <sup>14</sup> Naacua-jitij, nojoriiri maja nareja na niquiniu quiquiaa maa-jipohua. Puetunu maajipohuajanaa niquitiuquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapute jatarinitiaja pa Jiyaniijia tojjiani, cuno pojoriiri nojori shiniujuquiaa na sapojonuta, sesa nojori miiniuriajuhuaj. Naajuhua, cuno pojoriiri tariucua jiiitino puetunu nojori panishanojuanaa nojori jiiitianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. <sup>15</sup> Pueyaso rootasano tojiyashijiaa nojori quiniuucua, nojoriiri juhua tashuquioono Pueyasooocua neteja nuujini. Nojoriiri casamiriaca quiniuucua jiaati-ajaca juhua supuetana Beor niyanu Balaam. Jiyacaritij, Moab jiya jiyaniijaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanoehua queraatia casami na niquitionutaniya, no-juaja jaara nocua quiaare, Israel pueya na shimiojonu-ura nera. <sup>16</sup> Casamiicua jiaatiaja na quiniuucua, Balaam-ri na seru nijinia cajiquiaari. Quiaareeri. Nucuaaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuaajitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

<sup>17</sup> Cuno pojori, pueya sapojoua na niishitiojosano-tani, nojoriiri juhua cuari joojequetano. Naajuhua, no- joriiri juhua niquitioocua paratu piyarojosano, tamoco quiamaa saajaari. Nojori niishitiojosanoori naajuhua. Majaari na tojtiaja na naacunu. Pueyasoori jiyanoehua ninishiqui quiquio tari jiiitaa nojoriicuaji, pueyaracaanu nojori quiquiorano. <sup>18</sup> Nojori pohu- atasanoori najuhua shanohua tojishano. Saaja sapojonuuri. Naacuaajitij, nojoriiri shusha Jesuucua tiu- ujiaca shiniujuquiaa nojori miiniuhua tama nojori cuaqueya panishanojuaja. Cuno Jesuucua tiuujia- cacuaajaari shusha naataja sesa miijiaa pueyajiniinio jatanishaariquiaa juucua, Pueyaso tojjiaa nojori quiniuria juucua. <sup>19</sup> Sapojonuujuaa cuno niishitiojonu- ujuaca quiniuucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari see- tanujuanaa juhuajaniya quijiaa quiniutianiya shuquiriaatia, nojori jaara nojori niishitiojosano tojjia- ca quiriquia. ¿Nojori niishitiojosano pueyatucua taa juhuajaniya quijiaa quiriquiani, tama nojorijaaja jaara sesa miiniuucua jiiitino quiyajaa? Seetanjuanaari, pueyano jaara maja na naata quiriquia sesa casa na miijionu tarinitianu, cuno pueyanoori seetanjuanaa juhua tama sesa na miijosano serujuaaja. Majaari na naata na tarinitianu. <sup>20</sup> Pueyanaa, niaacuajaari niishiya, pueyano jaara pocuaji Tacunaacua tiuujiaa quiri, pa

Jiyaniijia Jesucristoori na cumaquijia na tarinitianura sesa miiniuria na jiiitishano. Saniniuujia, cuno pueyano jaara sesa miijiaa quirioehua, nojuaja jaara sesa mi- ijionura jiiitioehua socua, neraari socua puereeta quiniutianiya Pueyaso niishiyashijiaa pueyajini. <sup>21</sup> Naacuaajiti pueyanaa, pueyano jaara seetanu rupaa- janaa niishijia quiriquia, nojuajaari cocuaatia miya jaara na samiritiarohua sesa miijia na quiniuhua. Cuno pueyanora maara socua maninia quiquiaari ma- ja na niishiniuria Jesucristo rupaa, teyanote na niquiara pohuatasaaquiaaricuaajani, jatanishano pueyano na quiniuria. <sup>22</sup> Naa pa Jiyaniijia samiritiaja pueya quiniuucuatej, sesa miijiaa nojori quiniuhua, nojoriiri nio tariucuacaanu Pueyaso Rupajinia naajio- tasano tohuateequiaa. Naa miriqui sequeyari: "Sareeri coteenu macayoree. Na miaquerohuari". Naajuhua: "Cushiiri nanatosaree juucua. Saaja na coquojiojia neeneecuasuahuariuhua".

### Pa Jiyaniijia tiuquiniuhua cuaracashitishacari

**3** Cua panishano cuarta Pueyaso pueyanaa, niiori tane cu naajione niaacuara. Coteenu cua naa- jiojia, janiyari nia nacasuquiaarini socua cua shiniuji- uniuria niajaniya maja nioojia niquijotejaca nia quini- uria Pueyaso rootasanojini. Janiyari naa miya quiarjia nio cua naajiojiajuhuaj. <sup>2</sup> Maninia nia numaama nia racatariquia tariucuacaanu pueyara Pueyaso seque- sano caminiujunaa pohuatasano, pa Jiyaniijia ji- yaramiquishano pueya pohuatasanonio. Cunocuaajaari pocuaji Tacuna rootasano pajaniyara.

<sup>3</sup> Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supuenutaniya. Nojoriiri tama na cuaqueya miiniu panishano miijia- jaaja. Na macaatiuria niajaniya, nojoriiri nia neque- sotanutaniya: <sup>4</sup> "¿Taa nia Jiyaniijia miijiaarini? No- juacuajaari nia sequequiaari: 'Tacatenutaniuhuanijia'. Majaari na tiuquiniu. Tariucuacaanu na niquinia pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na ship- inishaanujini. Majaari quenaaja tamonu casa jatanu quiquiaa tamaatiara". <sup>5</sup> Majaari naate pueyanaa. Cuno pojoriiri tariucuacaanu Pueyaso miishanojini niishiniu paniyashijiaa. Jiyanoehua tariucuacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajini muetaquiaari, mohuaca jiuujajinia na quiniuria. <sup>6</sup> Na nuhuaji, Pueya- soori cuno mohuacaja pajaashitiquiaari puetunu mi- jiria quijiacajanaa na cusojuanura. <sup>7</sup> Quiarjia saniniu- jia, jiya cajiniocua, nio jyanio, Pueyasoori na cumaaca- ta nojori jiiitaaajaara. Na nuhuaji cutara, puetunujua- naari catenutaniya, Pueyaso saniitiosacari puetunu na ruuretajaca pueyajanaa.

<sup>8</sup> Naajuhua cua panishano cuarta Pueyaso pueyanaa, pueyaracaanu nio nia niishiriquia. Pa Jiyani- iijia, niquiriyatu juucaari juhua mil marijia. Naajuhua, mil marijiaari juhua niquiriyatu juuca nera. <sup>9</sup> Majaari nia jyaniniu maja pa Jiyaniijia tacatenu quiniutiani- uhua. Majaari na tarishiniu najuhanaj, taa tamasa

jiyaniyacuajani. Maja. Maja cutaraari na paniniu pueya quejoosaanura mani quiquiojinia. Naacujitij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

<sup>10</sup> Naajaa, nojuacuajaari tiuquiniutianihua. Pueya jiyanihacari Jesucristo maja na tiuquiniu quiniutianihua, jiyacaritij, canashiyaquiji tiuquiniutianihuari. Juhua nohuasejojua tiuquiniutianihuari, sesa miijiaca na saniitionura. Na nuhuaji, jiya cajiniocuaari shaajenutaniya. Jiyanhua cojuatunenutaniyari na shaajesacari. Casaajiniji jiya shipinishaaquiaarini, cunoori puetunu catenutaniyajanaa. Naacujitij, jiyari puetunu mijirira na jiiiasano casaatajanaa shaajasaanutaniya jiyanhua naseeca manijinia.

<sup>11</sup> Quiaririja pa niishishacari taa pa jiya shaajasaanutaniyani, cunora, seetanujuanaa Pueyaso panijiaca nia quiriquia saa maninia miijiaca nia quiniuria. <sup>12</sup> Naa maninia miijiaca nia quiriquia, Pueyaso cuara pa Jiyaniijia mueraterohua pocuajaatijia. Pa Jiyaniijia sequesano tojijiaca nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacujitij, casaata na shipiniquiaari puetunu casaajanaani, cunoori manijinia mohuaquenutaniya. <sup>13</sup> Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

<sup>14</sup> Naa nia niishishacari casaa pa sashiya nio pa quishacarini, cunora, jiyanhua nia saniniujiriquia

saaja maninia miijiaca nia quiniuria. Tojetaarucujanaa jiyanooshano nia quiriquiajuhuaj, juhuajaniya nia quiniuria pa Jiyaniijia tacoji, na nequesoresacari pajaniya. <sup>15</sup> Naacujiti pueyanaa, nio nia niishiriquia: pa Jiyaniijiaari tarishiyajaara pueyacia na taraajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuhuj, Pueyaso niishitiaja na jiiitanuucua. <sup>16</sup> Nojuacuajaari puetunu na naajioneecajinijanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacujitij, mosanucua, noojia niqijijotejancano, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacujitij, nojoriiri tama na cuaqueyajaaja jiyatequiaa Pueyaso saniitosocoriquiano nojori quiniuria.

<sup>17</sup> Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jiyanhua nia cojuariquia tama nia cuaqueyajaaja maja nia sajojosaanura sesa miijiaca nia quiniuhua. Saaja Pueyaso rupaacua tiuujia nia quiriquia cutara, taa nocua tiuujia nia quiyacuajani, cuno pojori mariqui nioojia niqijijotereeri.

<sup>18</sup> Naajuhuj, socua pocuaji Tacuna niishiniuucua jiaati-ajaca nia quiriquia. Naa maninia nia niishiri pa Jiyaniijia Jesucristo, socua na panijiaca nia quiniuria, socua na cumaaca nia jiiitanurajuhuj. [Pa Jiyaniijiaari jiyanhua maninia! [Nojuaja cuara shuquiritiasaaria quiaririja, pueyaracaanujuhuj! Cuaara na quiiriatej.

# 1 JUAN

## Pueya samiitianijia rupaa

**1** Jiya shipinishaacarijiyojua, Jesucristoori quijia-juhuanajaj. Canaari niaara naajiyani, canaa niishitiniuria niajaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuaj canaa rupuesacari nojuaja. Nojuajaari pueyaracaanu quijia cutara, pa Samiitianijiajaarihuaj, pueyaracaanu quijia pa quiniuriajuhuaj, na sequesanoocua pa tiushacari. <sup>2</sup> Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pohuatajaanihuaj. Co-teenu na Queta quijia jiyocuacaanuuri. Na nuhuaji, canacua muetaquiaariiri. <sup>3</sup> Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiushacari, pocua rupuetootoreni, taa canaa quiya pa Que Pueyaso rupuesanocuaani, Neyanu Jesucristo rupuesanonio. <sup>4</sup> Naa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriqiani, canaari shuquiriniutianiyajaacuhaj.

## Pueyaso pa cuhuatana

<sup>5</sup> Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequesaciaari: "Pueyasoori Cuhuatana cutara. Nojuajaari maja ninishiqui quijia quenaaja". <sup>6</sup> Naacuajitij, paa jaara sequereni: "Pueyaso rupueja cutaranijia", na rupaa pa tojiyaquishacari, paari saaja najuhuana sapojiyani. Paari juhua ninishiqui quijia quiyajaani. <sup>7</sup> Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

<sup>8</sup> Paa jaara sequereni: "Janiya sesa miyashijiani", paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojijia pa quiniu. <sup>9</sup> Paa jaara sesa pa miishano pohuatare saniniunijia, Pueyasoori jiyanootio cutara, na jiyanooniuria pajaniya, taa na sequesaciaaricuaajani. Poojiajiniji jeequenutaniya puetunu sesa casaajanaari. <sup>10</sup> Paa jaara saniniuuja se-

quereni: "Maja sesa cua miiniu", paari Pueyaso jiyateya juhua sapojuuarani. Paa jaara naa quirini, majaari seetanujuanaa na rupaa quiniu poojiajinia.

## Jesucristo pocuaji tacuna

**2** Quiquihuaniyojuanaa cua tojitiare. Nio naajia niaaranijia, maja juhuajaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiitiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia mijia cutarani. <sup>2</sup> Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuj.

<sup>3</sup> Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. <sup>4</sup> Jesu rootasano tojiyashijia jaara sequeriquia: "Pueyaso niishiyaniijia", jiyano pueyanoori sapojujua. Majaari na jitianu Pueyaso rupaa noojiajinia. <sup>5</sup> Cante saniniuuja pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. <sup>6</sup> Cante sequejani: "Janiyari Pueyaso rupuejani", nojuaja cuara quiria juhua Jesucristo, taa na quiquiaari maniacuaani, mijiria na quishacari.

## Quiarinio Pueyaso rootasano pajaniyara

<sup>7</sup> Cuarta Pueyaso muerasunaa, majaari quiarinio nio rootasano, janiya niaara na naajiyani. Niocuajaari tariucuaaanu nia tojishano, majaari quiarinio. Niacuaajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. <sup>8</sup> Naajaa, nio rootasano quiarijia cua naajiosanoni, niioori seetanujuanaa juhua quiarinio niaara. Niaari tari na tojiquiaa, pueya panijia nia quishacari, taa Jesucristo quiquiaari pueya panijiacuaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

<sup>9</sup> Naa jaara sequeriquia: "Pueyasoori coojia cuhuatarucuaani na rupaa cua niishishacari", na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. <sup>10</sup> Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuj, tama nojuajaariija maja sesa na miiniu

quiniutianiya, pueya panijia na quishacari. <sup>11</sup> Cante narta Pueyaso pueya niquiniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhua. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariyojuaru quiya. Majaari na niishiniu Pueyaso casaa.

<sup>12</sup> Quiquiohuaniyojuanaa, niaara naajiyani nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara.

<sup>13</sup> Queyanaa, niaara naajiyani nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiacuajani. Mashiquiorinia, janiya niaara naajiyajaniuhua cua timishacari nia shocotanuucua Sesaaca.

Janiyari niaara naajiocanuni quiquiohuanaa, nia niishiniuucua pa Que Pueyaso, Neyanu Jesucristoocua nia tiuushacari. <sup>14</sup> Janiyari niaara naajiocanujuhua queyanaa, nia tiuuniuucua tariucua pocuaji Quijiaa, nio jiya coteyaquishacarijia. Janiyari niaara naajiocanujuhua mashiquiorinia, seetanujuanaa maninia nia tojiniuucua Pueyaso rupaa, niaa jaara na masequiaari nioojajinia, Sesaaca nia shocotanuucujuhua.

<sup>15</sup> Majaari mijiria sesa miiniuucua nia jiaatianu, mijiria casamiicuanio. Cante mijiria casaacua jiaatijani, cunoori maja pa Que Pueyaso panijia. <sup>16</sup> Mijiria niishijia coretanijosano tama nojori niishishanojinijiaajani, puetunu cunojuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniurijajaja. Paari pa niquishano pa maniniucuasano casaa paniquiaa pueyaracaanuni. Naajuhua, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. <sup>17</sup> Nio jiyari tari tariucushiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

### Jesucristo paraa

<sup>18</sup> Quiquiohuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueree. Naacuajitij, paari niishiyani nio pa quishacariiri jiya puequesacari quera. <sup>19</sup> Cuno Cristo paraani, nojoriiri pajaniyajinijinio pueya quiquianucua. Pocuaji rupertetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiquianu, mariqui pata quiyacuateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

<sup>20</sup> Saniniuujia niajaniya Pueyaso muerasunaa, Jesucristoori nia niquitioquiaari na Sohuanu. Naaratej puetunu niajaniyajanaari Pueyaso niishitijaraca.

<sup>21</sup> Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhua, sapojoua seque-sanoori maja Pueyasojiniji.

<sup>22</sup> Pueyano jaara sequere: "Jesuuri maja Pueyaso Jiyarosano", cunoori sapojoua. Cante sequejani: "Pueyasoori maja Jesu Que", cunocujajari Cristo paraa. Jaara sequerejuhuaj: "Jesuuri maja Pueyaso Niyanu", cunoori Cristo paracajuhua. <sup>23</sup> Cante Pueyaso Niyanu Cristo tamacajani, majaari Pueyaso na jitianu na Querajuhua. Cante Pueyaso Niyanu Cristo jitiaa cutarani, pa Que Pueyaso jitiaa na Querajaariuhua.

<sup>24</sup> Naaratej, Pueyaso rupaa nia racatere nia numaa-taa nia tojiquiaari tariucuaanucujani jaara shushajanaa pohuatasaaquiaari nia niquiara. Niaa jaara naa racatariquia na rupaa nioojajiniate, seetanujuanaa nocua nia tiuushacari, niaari jatiqui quiya pa Que Pueyasota, Neyanu Jesucristotani. <sup>25</sup> Jesucristocujajari na Sohuanu niquitioquiaari pajaniya, pueyaracaanu pa rishiniuria. Nojuajanaari naa pa sequemiaari.

<sup>26</sup> Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhua na cuaracashiniuniutiani.

<sup>27</sup> ¿Casaara nojori nia tojiquiaani? Niaacuajaruhua tari Pueyaso Sohuanu jitiaa, Jesucristo niquitiosano niajaniyani. Naacuajitij, majaari tari panishaanu tamasaca niishitiojonura socua niajaniya. Pueyaso Sohuanucujajari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqui nia quiriquia Jesucristota, taa Pueyaso Sohuanu niishitiojoquiaa nia quiniuriacuajani.

<sup>28</sup> Quiarijiani quiquiohuaniyojuanaa, jatiqui nia quiri Cristota, seetanujuanaa juhuajaniya nia quiniuria pa Jiyaniijia jaara tiuquiriohua pocua. Naa nia quiritij maja nia caririquiniuria nojuaja jaara pa jitiiasuhua. Na rupaa tojiyashijiaaari caririquiniutianiya cutara. <sup>29</sup> Niaacuajaari seetanujuanaa niishiya, Jesucristoori tojearucujanaa sesa miyashijia cutara. Niaa cumaati niishiyajuhua, puetunu maninia miijiacajanaari Pueyaso muerasu.

### Pueyaso muerasu

**3** Pueyanaa, pa Que Pueyasoori jiyanohua pa panijia. Pa sequyari, "cua niquiohua". Seetanujuanaa, paari necohuani. Naaratej, majaari mijiria quiniaa pueya niishiniu pajaniya. Pa niishituyaqiyari nojori niishiyaquiniuucua pa Que Pueyaso. <sup>2</sup> Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiyani. Na tiuquishacariuhua, paari na niquiniutianiyani taa na quiyacuajani. <sup>3</sup> Puetunu na

sashijacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

<sup>4</sup> Cante sesa miijiani, cunoori Pueyaso rootasano na rupaajinia tojiyaquijia. Puetunu sesa miiniujianaari Pueyaso rootasano tojiyaquiniu. <sup>5</sup> Niaari niishiya-juhuaj, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. <sup>6</sup> Naacuajitij, cante jatiqui quiya pa Jiyaniijiatani, nojuajaari maja sesa na miiniu quiquiaa cutara. Cante saniniuuja sesa miijiani, majaari na niishiniu Jesu. Majaari nojuaja na niquiniu quiquiaarijuhuaj. <sup>7</sup> Quiquihuaniojuanaa, tama nia cuaqueyajaaja nia cojuare niaa mariqui sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. <sup>8</sup> Saniniuuja, cante sesa miijiani, nojuajaari Sesaaca pueyano. Shusha jiya coteenujiniji, Sesaacacuajaari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

<sup>9</sup> Puetunu Pueyaso pueyajanaari maja sesa miiniucua na shiiniuquiuniu, quiarinio pueyara Pueyaso rootesano nojori quiniucua. Nojoriiri quiarinio pueyara jatanishano quiya Pueyaso Sohuanu nojori jiiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijiaa nojori quiniu pueyaracaanu. <sup>10</sup> Naacuajitij, maatia niishishanocujaari cante Pueyaso muerasuni. Saniniuuja, cante maninia miyashijiani, nojuajaari maja Pueyaso pueyano. Naajuhuj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

#### Panitioojuaca pa quirij

<sup>11</sup> Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritia: "Panitioojuaca nia quiri". <sup>12</sup> [Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojjia na quiniucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniucua maninia. Saniniuuja, tama na miishanojuaarjia sesa quiquiaari. Cunora tarajanu moquiaariiri.

<sup>13</sup> Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia nijaniya. <sup>14</sup> Paacuajaari juhua macu samiitianijiosaaquiaariuhuanu, seetanujuanaa saminiucua pa quiniuria. Paari seetanujuanaa na niishiyani panitioojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. <sup>15</sup> Naajuhuj, narta pueyano niquiniu paniyashijiacani, nojuajaari juhua pueya mojuja Pueyasora. Niaacuajaari niishiya, pueyano mojujaari Pueyaso samiitianiyaquishoojuja pueyaracaanu na rishiniuria. <sup>16</sup> Paacuajaari niishiyani, Cristoori jiyanohua pa panijia na cusonuucua pocuara. Naacuajiti paari niishiyani

taamuecate seetanujuanaa paniniuni. Paa cuara naa panijia quiirajuhuj, tama pa cuaqueyajaaja pa tarinitianura parta Pueyaso pueyacuara, jiyanohua pa paniniutia nojori. <sup>17</sup> Niaa jaara nareja niquiya niarta Pueyaso pueya casamiijuniucua, puetunu nia panishanojuanaa nia jiiitiasacariucua, niaari najuhuana sequeya: "Pueyaso panijianijia". ¿Pueyaso panijia pueyanoteeri jiyano pueyano, narta Pueyaso muerasu niquitioyaquijia na jiiitiasanojiniji? [Maja! <sup>18</sup> Quiquihuaniojuanaa, majaari najuhuana pa sequenu: "Cuarta Pueyaso pueya panijianijia". Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: "Nojori panianijia".

#### Pueyaso tojjiaari juhuajaniya quijia Pueyaso niquiara

<sup>19</sup> Naacuajitij, paa jaara pueya panijia quirini, paari niishiyani paa seetanujuanaa Pueyaso tojjiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. <sup>20</sup> Pueyaso muerasu pa quishacari, poojia jaara pa taacanuutere saaja nocuaji, naajaa, Pueyaso cutaraari jiyanohua maninia niishijia socua poojia niishishanojiniji. Nojuacuajaari pa niishiya cutara. <sup>21</sup> Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niquiarani. <sup>22</sup> Nojuajaari puetunu pa masesano niquitionutaniya pajaniya, na rupaa pa tojishacari, puetunu na panishanojuanaa pa miishacarijuhuaj. <sup>23</sup> Pueyaso sequesano pueraario: Neyanu Jesucristocua pa tiuuniuria, pa panitioonurajuhuj taa na sequequiaaricujani. <sup>24</sup> Canapuee Pueyaso rootasano tojjiacani, nojoriiri Pueyasota rupuetootesano quijiaa. Naajuhuj, Pueyasoori nojorijinia quiyacujua. Nojuacuajaari na Sohuanu niquitioquiaari pajaniya. Naa na Sohuanu pa jiiitiasacaritij, paari maatia niishiyani Pueyasoori poojajinia quiya.

#### Pueyaso Sohuanujiniji pohuatasano, Cristo Paraca sohuanujinijinio

**4** Cuarta Pueyaso pueyanaa, quiarjiani, queraatia Pueyaso sequenu panishano caminiujunaa pueyari supueya. Majaari ritia nia tiuuniu puetunu nojoriicujanaa. Coteenu nojori nia saniniujuri, nia niishiniuria nojori caminiujushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaaari caneya. Nojoriiri najuhuana cuaracashiniuya na sequesacari: "Janiyacujaari Pueyaso sequenu panishano caminiujuniani: Pueyaso Sohuanu niishitishano janiya". <sup>2</sup> Niaari naa niishiniutianiya cante seetanujuanaa Pueyaso Sohuanu niishitishano caminiujuniani: Pueyaso Sohuanu jiiitajaari naa sequeja: "Pueyaso jiyarosano Jesucristoori pueyanora quiquiaari, mijiria pocuara cusoriquiano". <sup>3</sup> Cante saniniuuja jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiiitanu. Saaja Sesaaca sohuanu jiiitaa noojajinia cu-



taraari. Nojuacuajaari Jesucristo Paraca. Niaacuajaari tari pahuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

<sup>4</sup> Quiquihuaniyojuanaa, niaacuajaari Pueyaso muerasu. Naacuajitij, niaari cuno sapojonuujuaa shocotacanu Pueyaso cumaacata. Nioojiajinia Quiijaari socua cumaacaraca nojori jiiitasano Sesaaca cumaacajiniji. <sup>5</sup> Cuno sapojonuujuaaari saaja Pueyaso niishiyashijiaca, maja Pueyaso muerasu. Naacuajitij, nojoriiri saaja mijiria casaajiniji pohanuanuquiaa. Naarate narta Pueyaso ruuretajacaari nojori tojtiaquiaa. <sup>6</sup> Paa cutaraari Pueyaso pueyani. Naacuajitij, cante Pueyaso tojtiajacani, nojoriiri pa tojtiaquiaa. Canapuate saniniuujia maja Pueyaso pueyani, nojoriiri maja na tojtianu quiquiaa pajaniya. Naacuajitij, pa naata niishiniu cante seetanujuanaa Pueyaso Sohuanu jiiitiaa cutarani, cante saniniuujia sapojoua sohuanu jiiitiaanijia.

### Pueyaso pa panijia cutara

<sup>7</sup> Cua panishano Pueyaso pueyanaa, jyanohua panitioojuaca pa quirij. Pueyasocuajaari pa panijia. Nojuajaari pa panitijia na Sohuanuta, jyanohua panijia pa quiniuriajuhuaj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. <sup>8</sup> Canapuate pueya paniyashijiacani, nojoriiri maja na niishiniu Pueyaso. Pueyasocuajaari panijia cutara. <sup>9</sup> Nojuajaari pa niishitiquiaari taa na paniquiaa jyanohua pajaniyani, Neyanuniyoju na jiyarosacari mijiria pa samiitiani-jioriquiano, pocuara na cusosacari. <sup>10</sup> Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paninuria pajaniya. Neyanu jiyaroquiaariiri pocuara mosocoriquiano, sesa pa miishano jiyanooshaanura. Naa cutarate seetanujuanaa paniniu.

<sup>11</sup> Cua panishano Pueyaso muerasunaa, Pueyaso jaara naa pa paniquiaaricuaa, ¿casaara pa panitioy-aquiyarinijia? Naa panitioojuacara pa quirijiuhuaj.

<sup>12</sup> Majaari quenaaja pa niquiniu quiquiaari Pueyaso, taamuecatejanononi. Naajaa, paa jaara tamasacata panitioojuaca quirini, Pueyasoori poojiajinia quiyacuaja. Naacuajitij, paari tojetaarucujanaa panijiacara quiniutianiya, na paniniu quishacari poojiajinia. <sup>13</sup> Nojuajaari na Sohuanu pa niquitioquiaari poojiajinia na quiniuria. Naacuajitij, paari niishiyani paacuajaari nata rupetooju quiyani. <sup>14</sup> Canaajanaari seetanujuanaa canaa niquishano pohanuani: Pueyasoori Neyanu jiyaroquiaari mijiria, mijiria quiniaa niti mosocoriquiano, nocua tiuujiaa jiyatesaanura Pueyaso pueyara. <sup>15</sup> Cante pueya niquiara sequejani: "Jesuuri seetanujuanaa Pueyaso Niyanu", Pueyasoori noojiajinia quiya. Nojuajaari Pueyasota rupetooju quiyajuhuaj.

<sup>16</sup> Naacuajitij, paari niishiyani Pueyasoori jyanohua pa panijia. Paari na niishiyajaniuhua na rupaacua pa tiuushacari. Pueyaso cutaraari panijia. Paa jaara

pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. <sup>17</sup> Naa Pueyaso quishacari poojiajinatej, paari pueya panijiaari jiyacatequiaa socuani. Naa seetanujuanaa panijia pa quishacaritij, paari juhuajaniya quiniutianiya Pueyaso nequesoreesacari puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuani. <sup>18</sup> Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanojuaja na paniniu Pueyaso puetunu nojiatajanaa. Puerejaari niishiriojiya: "Sanitiosaanutaniyanijia".

<sup>19</sup> Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani. <sup>20</sup> Saniniuujia, cante sequejani: "Janiyari Pueyaso panijiani", narta pueya niquiniu paniyaquiya saajaariuhuj, jiyano pueyanoori sapojoua. Naa na paniaquishacari tarajanu na niquishano na namijiaa cutaratej, ¿maatucua taa Pueyaso panirini, na niquishoo socuani? <sup>21</sup> Pueyasocuajaari naa pa rootaquiaari: "Cante cua panijiani, cuara paniiria narta pueyajuhuaj".

### Taa pa shocotanutaniya mijiria niishishanoni

<sup>5</sup> Naa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua panijiaariuhuj. <sup>2</sup> Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu panijiaacacuhuj. <sup>3</sup> Paa jaara Pueyaso panijia quiri seetanujuanaani, paari na sequesano tojijiaa quiyajaniuhuj. Na rootasano pajaniyani, majaari jiyajeneta na quiniupajaniyara. <sup>4</sup> Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. <sup>5</sup> Cante Jesu jiyateya seetanujuanaa Pueyaso Niyanurani, saaja jiyano pueyano na naata mijiria niishishano shocotanu cutara.

### Pueyaso Niyanujiniji pahuatasano

<sup>6</sup> Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaaquiaari. Canaa niishitiquiaariijaariuhuj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuj, janiyajanaari na niquiquiaari na nanaca shooteyano na shuucujini. Naajuhuj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. <sup>7</sup> Jiuujianaraca jiyocuaaanu quijiaacari pa niishitiya Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojanaa, na Rupaa, na Sohuanunio. Nio jiu-

ujianaraca quijiacani, nojoriiri Pueyasojuhuanajaj.  
<sup>8</sup> Paari mijiria jiidiaa Jesujiniji pa niishitijiacajuhujaj.  
 Cunoori jiuujianaraca quiyajuhujaj. Cuno pojoriiri nio:  
 poojiajinia quijia Pueyaso Sohuanu, jiyocuacaanuji to-  
 jishano rupaa Jesu tiuquinishacari moojinia, naajuhujaj,  
 na nanaca, pueya niquishano na shuucujaji shoyano.  
 Puetunu cunojuanaari mariyata pa niishitiya Jesuuri  
 seetanujuanaa Pueyaso Niyanu. <sup>9</sup> Paa jaara tojiri-  
 quia pueya pohuatanuusaroni, ¿casaara saniya Pueyaso se-  
 quesano pa tojiyaquiyarini? Pueyaso sequesano  
 Neyanujiniijiiri socua seetanu rupaajanaa cutara pueya  
 pohuatanuusanojiniji. <sup>10</sup> Cante Pueyaso Niyanuucua  
 tiuujiani, Pueyaso Sohuanuuri noojiajinia na niishitiya  
 Jesuuri seetanujuanaa Pueyaso Niyanu. Saniniuujia,  
 cante Pueyaso sequesano Neyanujiniji ruuretaja  
 saniniunijia, nojuajaari Pueyaso jiyateya sapojuara,  
 na tiuyaquishacari tama Pueyaso sequesanoocujaja  
 Neyanujiniji. <sup>11</sup> Pueyasocujajaari sequequiaari, Neyanu-  
 ucua tiuujiaacari pueyaracaanu rishijiaa quiniutianiya.  
<sup>12</sup> Cante Pueyaso Niyanu jiidiaa noojiajiniani, nojuajaari  
 tari samiitianishaarohua pueyaracaanu rishijia na  
 quiniuria. Pueyaso Niyanu jiidiaashijiaari saniniuujia  
 maja na rishiniu quiniutianiya.

#### Nio naajio puequenu panishacari rootasano

<sup>13</sup> Nio naajiya niaaranijia nia niishiniuria, Pueyaso  
 Niyanuucua nia tiuushacari niaari tari samiitiani-  
 jiosaarohua pueyaracaanu nia rishiniuria.

<sup>14</sup> Paari Pueyasocua tiuquiaani, pa niishishacari  
 nojuajaari pa tojiquiaa pa secojosacari nojuaja, pa  
 masesano jaara quiri taa na paniyacuajani. <sup>15</sup> Naatej,  
 taa pa niishiyacuaani Pueyasoori pa secojosano to-  
 jiquiaa, paari naa niishiyajuhujaj paari nojuaja pa  
 masesano maseree tarini.

<sup>16</sup> Cante narta Pueyaso pueyano niquiya sesa  
 miyanoni, cuaara Pueyaso secojora nocuara, sesa na  
 miishano jaara na cusojuaashijia quiri. Naacuajitij,  
 Pueyasoori cuno sesa mijia naataniniutianihua, sesa  
 na miishano jaara cusojuaashijia quiri. Quiyajaariuhua  
 tamonu sesa casaa miiniu. Paa jaara cuno sesa casaa  
 miirini, paari cusoqueeni. Naa cua sequesacari nia-  
 janiyatej, majaari cua sequenu niajaniya nia secojona-  
 ra jiyano sesa miishanoocuaratej. <sup>17</sup> Seetanujuanaa,  
 puetunu sesa miishanojuanaari sesa Pueyasora. Naa-  
 jaa, majaari puetunu sesa miishanojuanaa cusojuanu  
 quiniutianiya pajaniya.

<sup>18</sup> Paacuajaari niishiyani pueyanaa, cante Pueyaso ji-  
 itiaa juhua na Que cutarani, nojuajaari sesa  
 miyaquiquiaa, Pueyaso Niyanu cojuasacari nojuaja.  
 Naacuajitij, Sesaacaari maja na naata sesa na miitiniu.  
 Majaari na naata sesa na miiniuujihujaj.

<sup>19</sup> Paari niishiyani paa cutaraari Pueyaso muerasuni.  
 Sesaacaari saniniuujia puetunu mijiria quiniaa Pueya-  
 so niishiyashijiacajanaa jiidiaacujua. Nojuajaari nio jiya  
 camarnu.

<sup>20</sup> Paari niishiyajuhujaj Pueyaso Niyanuuri mijiria  
 pocua niquiaari. Nojuajaari na niishitiaja niqutio-  
 quiaari pajaniya, maninia pa niishiniuria na Que, na  
 Que quiniuria pa Quejuhaj. Nojuajaari Pueyasojua-  
 naa cutara. Paari nata quiya jatiqini, Neyanu Jesu-  
 cristota pa rupuetosacari. Nojuajaari Pueyasojuhua-  
 najaj, pa Samiitianiijaariuhujaj, pueyaracaanu rishijia-  
 ca pa quiniuria. <sup>21</sup> Quiquihuanijojuananaa, saaja Pueya-  
 so pa paniri. Tama pa cuaqueyajaaja pa cojuare, maja  
 tamonu casaacua pa jiaatianura socua Pueyasojiniji.  
 Paa jaara tamonu casaacua jiaatiareni, paari Pueyaso  
 shocoteya nocuarani. Niojuanaa pueyanaa. Tariucujaja.

## 2 JUAN

### Pueyaso Rupaa seetanujuanaa panijiara pa jiyateja

**1** ¿Quiaate quiyajaa cua panishano cua rimiatucuaanaa? Quiaacuajaari Pueyaso saquiriojosano, neyatu quia quiniuria. Quiocuara naajiyaniija, quia panishano muerasuucuaranio.

Janiyari saaquiano Juanni, Pueyaso muerasu jiiitiana. Seetanujuanaa nia paniyanijia, taa puetunu Pueyaso rupaa tojiniaa pueya paniya niajanuyacuani. <sup>2</sup> Pueyasojinijia seetanu rupaajanaari poojiajinia quiya. Naaratej, canaari nia paniyani. Cuno rupaari poojiajinia quiniutianiya pueyaracaanu. <sup>3</sup> Nia tojishacari seetanu Pueyaso rupaajanaa, nia panitioosacarijuhuaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenutaniyajaarihuaj. Nioojia jiyatenutaniya juhuajaniya quijiacarajaarihuaj.

<sup>4</sup> Noojiaqueya quia niquiohuajinijinio niquiquianunijia. Nojori timitiacanunijia nojori tojtianuucua maninia seetanu rupaajanaa, taa pa rootasaaquiaari pa Que Pueyasojinijicuajani. <sup>5</sup> Quiocuara naajiya quiarijianijia cua panishano cua rimiatucuaanaa, cua sequenura quiajaniya: "Jiyanohua pa panitioore". Majaari quiarinio rootasano nio, cua naajiosano quiocuarani. Nio rootasanocuajaari pa jiiitiasano pueyaracaanu Jesucristojinijia. <sup>6</sup> ¿Taate pa naata paniniuni? Paari pueya panijiaa quiyani Pueyaso rootasano pa tojishacari. Niocuajaari na rootasano: puetunu pa miishanojuanaa cuara quiiira Pueyaso pa paniniutia poojiajinia.

### Cristo paraari sapojonuujuaca

<sup>7</sup> Quiarijiani, queraatia sapuenu juhua Pueyaso sequenu panishano caminiujiuniaari mijiria quiya. Nojoriiri pueya niishitiojoquiaa: "Majaari Jesucristo

rosenu quiquiaari jiyocuacaanuji, cuaqueyaraca na quiniuria, seetanujuanaa pueyano na quiniuria". Canapueete naa sequejacani, nojoriiri sapojonuujuaca. Nojoricuajaari Cristo paraa. <sup>8</sup> Tama nia cuaqueyajaaja nia cojuare cuno pueyacuaji, maja nia tojiniuria nojori, niaa mariqui Pueyaso niqitionu panishano pajaniya maseyaquiriiri, pa Jiyaniijia nia poonijionujinijia na niqitionu panishano. Suraatiaja nia tojiriohuarohua seetanu rupaajanaa, nia masenura puetunu Pueyaso jiiitiasanojuanaa niaara. <sup>9</sup> Cante tama na cuaqueyajaaja jiyateja Pueyaso casaa niishijia socua Jesucristo jiyaramiquishano pueya niishitiojosanojinijini, cuno shocotajaari Pueyasoojura quiquii, na shocotanuucua Cristo rupaa. Cante saniniuuja seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuajaari na Que, Neyanuuri nocuaji Tacunajuhuj. <sup>10</sup> Seetanu rupaajanaa jiiitaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhwatanujuhuj nia cumaquiniuria nojuaja. <sup>11</sup> Cante na sequeyani: "Pueyaso cuara cumaquiiria quiajaniya", naa sequejaari cuno sapojoua cojiritiasaaree tari sesa na miishanotaja.

### Juan puecasacari naajionu

<sup>12</sup> Socua queraatia sequenu paniya niajanianijia. Naajaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. <sup>13</sup> Quia tarajanu niquiohuari cua sequeree nojoriria cua saruhwatanura quiajaniya. Nojuacuajaari Pueyaso saquiriojosano maajijuhuj. Tariucuaja.

# 3 JUAN

## Juan maninia pohuatasaaquiaari Gayojiniji

**1** ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiidiana. Seetanujuanaa quia paniyanijia, Pueyaso rupaa quini-uucua coojiajinia. **2** Quiocuara secojoquiaanijia, puetunu quia miishanojuanaa cuara quiiria maninia. Janiyari quiocuara secojoquiaaaniuhuj, maninia quia cuaqueya quiniuria, maja cusosu, taa quioojia quiya maniniacuaani, Pueyaso tojjia quia quishacari maninia.

**3** Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pohuatasacari quia-janiyajiniji. Quiaanaari seetanujuanaa maninia miiijia quiquiaa taa pa rootasaaquiaari Jesucristo rupaacua-jani. Quiaacuajaari maninia tojjiquiaa seetanu rupaa-janaa, sanajanaa. **4** Jiyanohua timiquiaanijia cua tojjishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojjishacaritij, cunoori jiyanohua cua timitiquiaa socua tamonu casaajiniji.

**5** Sanajanaa, quiaacuajaari maninia miiijia, maninia quia miishacari parta Pueyaso muerasu. Quiaa cutaraari maninia miiquiaa, quia tiuquitishacari quia tiajinia quia niishishoo tamaquiicuaajinio Pueyaso muerasu. **6** Pueyaso muerasu rerejosacari niya, Pueyaso rupaa pohuatanura rucoojuacaari canaa niquiara pohu-atanu maninia quia miishanojiniji nojoriria, quia paniniutia nojori. Quiarijiani, nojori quia niquitiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. **7** Nojoriiri Jesucristojiniji pohuatanura rucoojiya. Majaari nojori panishano na masetunu paniniu quiquianu Pueyaso niishiyashijiacajiniji. **8** Naaratej, pajaniya cuara naacuura jiyano pueya, noo pojori canapueete pa Jiyaniijia rupaa pohu-atanura rucoojiyacuaajani. Naa pa miiriti Pueyaso rupaa pohuatanu naacuna pa quiniuriajuhuaj.

## Sesa Diótfrefes miishanojiniji pohuatasano

**9** Janiyari quia quijia tiacajinia Pueyaso pueya maanu-ucua naa naajioquiaarijuhuaj. Janiyari nojori seque-

quiaarini nojori cuara Pueyaso Rupaa pohuatanura rucoojuaca naacuura, cuno pojori jiidianura na panishano. Diótfrefesri saaja tama na cuaqueyajaaja shuquiritiaja, Pueyaso pueya maanu jiidiana na quishacari. Nocuaji cua sequesano ruuretacanuuri. Cua rerequetequiaaariuhuj. **10** Naajaa, janiya jaara niaacua quiaareni, janiyari naa sacuaraatia na miiniuu-cua na nacasunutaniyani. Nojuajaari tamasaca niquiara canaa sesacaquiaa na sapojonuta. Naa socua sesa miiquiaaariuhuj: majaari na tiuquinitianu quiquiaa Pueyaso Rupaa pohuataanaa na tiajinia. Canapueete saniniuuja nojori tiuquitiniu paniquiaa nojori tiajiniani, Diótfrefesri nojori tenujuquiaa saaja. Canapueete Pueyaso rupaa pohuatanura rucoojuaca tiuquinitianu paniquiaaaja na tiajiniani, Diótfrefesri puetunu nojori tenujuquiaajanaa, maja socua nojori rerejonura narta Pueyaso muerasuta.

**11** Sanajanaa, majaari quia jiaatianu cuno sesa miiijiaacua, quiaa mariqui juhua nojuaja quirijiaariuhuj. Saaja quia jiaatiare cutara maninia miiijiaacua, juhua nojuaja quia quiniuria. Cante maninia miiquiaani, cunocuajaari Pueyaso pueyano. Sesa miiijia saniniuuja, nojuajaari Pueyaso niishiyashijia.

## Maninia Demetrio miishanojiniji pohuatasano

**12** Puetunu pueyajanaari saniniuuja maninia pohu-atanuuquiaa Demetrijiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanujuanaa, nojuajaari maninia pueyano, taa tamasaca sequequiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetrijiniji.

## Naajio puequesacari

**13** Janiyari queraatia sequenu paniyajaa quiajaniyani. Naajaa, majaari cua sequenu paniniu saaja cua naajio-jinia. **14** Janiyacuaja quiocua naquerejiyani. Jiyacaritij, pocua maninia pocoojore cutarani.

**15** Pueyaso cuara quioojia jiidiaara maninia, juhua-janiya quia quiniuria. Niya pa rupuenaaari cua seque-uree cua saruhuatanura quiajaniya. Puetunu cuniqui pa rupuenaaajanaa quia saruhuatara canaarajuhuaj. Tariucuaaja.

# JUDAS

## Judas naajiosano Pueyaso saquiriojosano pueyacuara

**1** Janiyari Judasni, Jesucristo seru, Jacobo tarajanu. Niaacuara naajiyaniija canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. <sup>2</sup> Pueyaso cuaara nia jiuujiaaria. Cuaara nioojia cajitiiriajuhuaj. Cuaara paniiria niajaniyajuhuj. Pueyaso cuaara naa miiria jiyanoehua niajaniyatej.

### Sapojonuujacajiniji pohuatasano

<sup>3</sup> Cua panishano pueyanaa, janiyari niaacuara naajionu paniriquiaa jiyanoehua, cua pohuatanura niajaniya taa maninia pa miishaanutaniyani, Pueyaso saquiriojosano pueya pa quiniucua: niajaniya, canaajuhuj. Saniniuujia, quiarijiani, socua maninia cutaraari cua naajionura niaacuara, cua nacasunura niajaniya seetanujuanaa Pueyaso tojijia nia quiniuria. Jiyanoehua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocujaari na rupaa pohuataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaricuaani. <sup>4</sup> Naa nia sequeyanijia Pueyaso rerequetejaca supuesacari jiyasohua nia tajinia. Tariucuaanu Pueyaso Rupaajiniacuajaari cuno sesoriquia pueyajiniji naajiotasaaquiaricuaaja. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: "Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanoojia Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya". Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitioyashijia, pa Jiyaniijajanaa Jesucristoni.

<sup>5</sup> Niaari niishiyacuaja, Pueyasoori Israel pueya supuetanaa mashiquiquiaari Egipto jiyajiniji, Egipto pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijia puecooquiaari. <sup>6</sup> Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijiaa quiquiaari jiyocuaaanucujani. Nojoriiri Pueyasora na poonijosano tiujiaquiaari. Nojori poonijosaaqui tiujiatuquiaarijuhuaj. Cunora, cumayocuata morojosaaquiaariiri, pueyaracaanu ninishiqui nojori quiniuria, cuaara quirijiaatijia Pueyaso saniitionu juuca

cutara. Cuno juuca, Pueyasoori puetunu na tojiyashijiacajanaa saniitionutananiya. <sup>7</sup> Nia niishirijuhua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanoehua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhuaj. Pueyasoori maja na shipiniyu quiquiaari naa pueya quiniuriatej. Naa Pueyaso tojiyashijia nojori quishacaritij, mariyata taa tama Pueyaso seyajaaja na tojiyashijia quiquiaaricuaani, Pueyasoori nojori quejooquiaari mani quiquiojinia, tii naquiya nojori miishaanura pueyacaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijia pa quiniuria taa nojori quiquiaaricuaani.

<sup>8</sup> Cuno pojori, sacuaraatia niishitiojonaa nia tajinia quiyani, nojoricuajaari Pueyaso saniitionujiniji niishiya. Naajaa, nojoriiri juhuajaniya miiquiaa puetunu sesajanaa taa noojiajinia nojori niishiyacuajani. Nojoriiri tama nojori jiuujiaaja curuushojoquiaa nojori miishacari tama nojori niquishanojuaaja na maquenujinia. Pa Jiyaniijia sootiyajaarijuhuaj. Nojoriiri jiyanoehua cumaacaraca quijiaa sesacaquiaajuhuj, jiyocuaanu quijiacani. <sup>9</sup> Supuetana Moisés shaajesacari, Pueyasoori na seya jiyaniijia Miguel jiyarokuvaari Moisés quete na jamonura. Sesaacaari Moisés quete paniquiaari juucua. Nocua Miguelta juayonutaquiaariiri. Miguel cutaraari seetanujuanaa cumaacaraca quijia. Naajaa, majaari na saarjionu quiquiaari Sesaaca. Na sequeree saajaari: "Pueyasojanaa cuaara juaria cutara quiajaniya". <sup>10</sup> Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

<sup>11</sup> Nojoriiri jiyanoehua cocuaatia miiquioquiaa. Nojoriiri narta pueya niqiniyu paniyaquiquiaa, taa supuetana Caín niqiniyu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuaj, naatej, taa supuetana Balaam miiniu paniquiaari juucuaacuaani. Nojoriiri mariyata puetunu quejoosaanutaniyajanaa nojori ruuretunuucua Pueyaso, taa supuetana Coré cusoquiaaricuaani na ruuretasacari Moisés. <sup>12</sup> Nia queranacusacari Pueyaso

niquiara nia panitioonuta, cuno sacuaraatia niishitiojonuujuaaari jiyanoehua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishijia-ca. Puera miaquenujuaca nojori quishacari, cunoori cararaatia. Jiyano pueyari maja na cumaquiniu nia-janiya. Nojoriiri najuhuana quijiaca, juhua niquitioocuaari tajimiaquiaa paratu piyarojosacari. Majaari maru niniu. Nojoriiri najuhuana quiya, juhua mue-tuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nu-jucatajanaa majaratasano. <sup>13</sup> Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanoehua shoniniacu caminia queyocuasacari cushau, curuutuuca. Nojoriiri shanohua niquishiya rupaquijia, juhua rija tiyano. Na nuhuaji, nojoriiri ninishiqui quiniutianiya pueyara-caanu Pueyasooju. <sup>14</sup> Pa supuetana Adánri coteenujanaa shipinishano pueyano quiquiaari mijiria. Enocri séptimo jiyaniijia quiquiaari Adán nuhuaji. Enocri Pueyaso niquitishano nojuaja pohuataquiaari taa nio sesa mijiaca pueya miishaanutaniyani. Nojuajaari naa sequequiaaritij: “Janiyari Jiyaniijia niquirii cunocoji niyano jiyanoehua queraatia na pueyatani. <sup>15</sup> Nijoriiquiaari sesa mijiaca na saniitionura. Rerequetejacaacua tiutianutaniya puetunu sesa nojori miishanojuanaari. Puetunu na sojeacajanaari saniitiosaanutaniya puetunu nojori sesacanuucujanaa pa Jiyaniijia”. <sup>16</sup> Cuno sesa niishitiojonuujuaaari naa miiquioquiaa nia tajinia. Nojoriiri saa juayonuutaquiaajaa. Majaari shuquiriaatia nojori quiniu quiquiaa na jitiasanota. Nojoriiri tama na cuaqueya panishanojuaja mi-iquiaa. Puera pocujaca quiyajaarihuaj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

#### Pueyaso pueyara rootasano

<sup>17</sup> Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano nijaniya. <sup>18</sup> Nojoricujaaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa sojeaca quiniutianiya, na rupaa sojeacajuhuj. Nojoriiri sesa miiniu-

tianiya tama nojori cuaqueyajaaja nojori shuquiritini-uria”. <sup>19</sup> Naa cuno pueya miiniuucuatej, nojoriiri Pueyaso muerasu jiuujia niyaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

<sup>20</sup> Cua panishano Pueyaso muerasunaa, Jesucristo rupaacua nia tiuuri jiyanoehua socua, seetanujuanaa na pueya nia quiniuria maninia. Pueyaso nia secojore Pueyaso Sohuanu cumaacata. <sup>21</sup> Naacujitij, niocua Pueyaso panishano pueya qiri pueyaracaanu. Juhua-janiya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiari maninia jiyanoojia na quiniuucua.

<sup>22</sup> Canapuate pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuuniuria maninia pa Jiyaniijiaacua. <sup>23</sup> Tamasaca nia piriyojorejuhuaj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa mijiaca. Naajaa, nojori nia naacure, Jesucristo nojori niishiniuriajuhuaj. Saniniuujia, tama nia cuaqueyajaaja jiyanoehua nia cojuare niaa mariqui sesa miitishaarejaarihuaj nia cojishacari nojori. Jiyano pueyacu nia taraajere. Saniniuujia, puetunu sesa nojori miishanojuanaa nia soore cutara.

#### Naajio puequesacari Pueyaso maniniuhuaqueetasaanu

<sup>24</sup> Pa Que Pueyasoori pa cojuaquiaa maja pa catenu- ra nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanohua na cumaaca pa shootianura pueyaracaanu. Pa niquishacari nojuaja, paari jiyanoehua na timitianutaniyani.

<sup>25</sup> Jiyanoehua maniniaari pa Que Pueyaso! Nojuajaari niishijiajanaa. Pa jiyatequiaari na muerasuraari pa Jiyaniijia Jesucristo cusonuucua pocuara. Jiyanoehua shanohua na cumaaca! Nojuajaari Jiyaniijiajanaa! Jiyanoehua maninia pa Jiitiana! Nojuajaari puetunu cumaacaracajanaa cutara! Nojuacuajaari pa Que Pueyaso! Jiya shipinishaacarijiyojua, nojuajaari quijia-juhuanajaj. Naa quiyajaari. Naa quiniutianiya pueyara-caanuuri. Taaquiriirinj, naacuaaquinatejaj.

# NIQUISHANO

## Jesucristo niqutishano pajaniyara

<sup>1</sup> Janiyari Pueyaso seru Juanni. Niya naajiotaa Pueyaso niqutishano Jesucristonijia, saniniuujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitijonura janiya taa mijiria quijiaca miishaanutaniyani.

<sup>2</sup> Janiyari puetunu na niqutishanojuanaa caminiujiya nijaniya seetanujuanaani. Niocuajaari seetanujuanaa Pueyaso rupaa, Jesucristojiniji cua caminiujiushano ni-aara.

<sup>3</sup> Shuquiriaatia quijiaca cutaraari noo pojori, canapue te nio cua caminiujiushano Pueyasojinijini seronutaniya Pueyaso pueya maapue niquliarani. Na tojtiajacaari shuquiriaatia quijiaca quiniutianiyajuhuj, nojori tiuuniucua nio naajiojinia cua pohu-atasanoocua. Nio pohuatasano tohuateenuraari tari catecanoya.

## Juan naajiosano siete Pueyaso pueya maapuecuara

<sup>4</sup> Janiyari Juanni. Asia jiyajinia quinia siete Pueyaso pueya maapuecuara naajianijia. Pueyaso cuaara cumaquiiria nijaniya, cuaara nioojia cajitiirajuhuj. Pocua niriqiano pa Que Pueyasoori jyanohua maninia. Nojuajaari pueyaracaanu quijiacuaja. Quiarijia quiyajaariuhuj. Na Sohuanuuri juhua siete saminio casaa niqushano, puetunu tiqiyocuajanaa quijia na quiniucua. Nojoriiri Pueyaso cajishaqui tajoji qituiya. <sup>5</sup> Pueyaso Niyanu Jesucristoori seetanujanaa puera caminiujiunia puetunu na Que Pueyaso Rupaaanaa. Nojuajaari quiarinio na cuaqueyata pa co-teetaquiaari samiitianuhua macujiniji. Nojuacuajaari puetunu mijiria jyaniijianucujanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. <sup>6</sup> Nojuajaari pa jiyatequiaari jyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuqiritianurajuhuj. [Pa Jiyaniijiaari jyanohua maninia! [Pa Jiyaniijia cuaara shuqiritiasaaria pueyaracaanu! [Nojuacuajaari puetunu cumaacaracajanaa pueyaracaanura! Cuaara naa quiiriatej.

<sup>7</sup> [Nia maure! [Pa Jiyaniijia Cristoori cohuajajinia tari cunocojiuhua! Puetunu pueyajanaari na niqiniutianiya, noo pojorijuhuj, na motenaatej. Puetunu mijiria quijiaca pueyapuejanaari nocuaji nujuquenutaniya

nojori martenuta. Taaquiririnij. Naa quiniutianiyacuuaquinateja na tiuquishacariuhua.

<sup>8</sup> Pa Jiyaniijia Pueyasoori tama nojuajiniijiaaja sequeya:

“Janiyacuajaari puetunu casaajanaa coteetanani, na shaajariquianojuhuaj. Puetunu cumaacaracajanaanijia. Janiyacuajaari pueyaracaanu quijiani. Majaari cua supueni quiquiaari. Janiyari niaacua tiuquiriquianohuani”.

## Juan niqushacari Cristo puereeta na shacantuuca cumaacajinia quiyano

<sup>9</sup> Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniucujuhuj, janiyari jaara-jaaja niaata cojiritiashiya naquiya miiniuni. Naaratej, paari mariyata jyaniijianucua jiyatesocoriquianoni. Cunora, paari juhujaniya naquiya miiniu rejere-taquiaani Jesucristo cumaquishacari pajaniya. Pueyaso rupaa Jesucristojiniji cua poojotanuucua, janiyari shoniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. <sup>10</sup> Tamonu juuca, pa Jiyaniijia samiitianuhua pa niishiniu jucani, Pueyaso Sohuanuuri cucua niqianu jyanohua na cumaacata. Janiyari jiyacari rupaa tojirii nacaano cua nijianarani, juhua trompeta jonenenu. <sup>11</sup> Cua sequeriquiaari:

—Casaa cua niqutiniutianiya quiajaniani, cuno quia naajiotare nequesoreetuneerano. Quiocua na nuhuaji na jiyarore Asia jiyajinia nio siete cua saquirojosano pueya maapuecuara. Nojoriiri Éfeso tiacajinia quinia, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

<sup>12</sup> Janiyari cua nijianara tacatequeeni cua niqiniuria cante cucua pocuariquiaani. Cua tacatesacari, janiyari siete samari nujuatacojua niqiriini, orojiniji shipinijosano. <sup>13</sup> Cuno samari nujuatacojua tajiniani, janiyari pueyano niqiriini, juhua Pueyaso Niyanu niqushano. Tucuaque toque cushiriquiaari. Na niuhuacaacuma puecariquiaari. Na jiriqiajinia camarucuteriquiaa orojiniji shipinishano casaari. <sup>14</sup> Pueyaracaanu quijia na quiniucua, na muecacaari tojetaarucujanaa jyanohua cohuaja quiriqiaa juhua sohuanatuu. Maa-tia pueya jiuujia niqijia na quiniucua, na namijiaari juhua mani rimianacuriqiaa. <sup>15</sup> Na niuhuacaari nenecuariqiaa juhua jyanohua naseca casaajinia mohuaquishano bronce. Naa shacantuuca niqushano quiriqiaari puetunu sesa casaajanaa paracaajia na

quiniuucua. Cumaacaraca Jiyaniijia na quiniuucua, na pocuasacari, jyanohua tojishaariquiaari juhua sararajua, jiyocuacaanuji mohuaca tijia. <sup>16</sup> Na miaquetajata siete riya muetujuriquiaari. Naajuhujaj, nijiniaquetucuaja mueruuri na rupaamaji mueranacuriquiaa, na rupaa ruuretajaca na puecoonura. Na jiquiocoori jyanohua shacantuuca quiriquiaa juhua jyanohua pananu jasacari panacari.

<sup>17</sup> Cua niquishacari nojuaja, janiyari cua puerenuta na pajama pojyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuaj.

<sup>18</sup> Janiyari pueyaracaanu quijiani. Macu quiquiaarinijia. Naajaa, janiyari samiitiaquiaariuhuani pueyaracaanu saminio cua quiniuria. Janiyari macunucua quiquio ritataja camaruni. Naacuajitij, janiyari cumaacaracani cua tojiyashijiaa cua quejoonura macunucua quiquiojinia. <sup>19</sup> Pueya niishishocoriquiano, quia niquishano quia naajiotare Juannaa, taa na quiyacuajani, naajuhujaj taa mijirija quijiaa miishaanutaniya na nuhuajini. <sup>20</sup> Quiarijia quia pohuatareera maatia quia niishinuria cua niquitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

### Éfeso tiacajinia quiniaa Pueyaso pueya maanuucara naajionee

**2** Juhuacatecara naa cua sequereeri:

—Éfeso tiacajinia quijia cua seruucara quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucanejojuacuajani, nojuajaari naa quia sequeya: <sup>2</sup> ‘Janiyari puetunu quia miishanojuanaa niishiyani. Quiaari jyanohua poonijioquiaa quiria. Naajuhujaj, quiaari puetunu casaajanaa rejeretaquiaa juhuajaniya. Janiyari niishiyajuhujaj, majaari quia shanacunu quiquiaa sesa mijijaca nia tajinia. Naajuhujaj, quiaari cuno sapojonuujua nequesorecanu, noo pojori canapuate tama sequeriquiaajaajani: “Canaari Jesu jiyaramiquishanoni”. Naa quia nequesoresacari nojoritij, quiaari niishiquianu nojoriiri sapojonuujua seetanujuanaa. <sup>3</sup> Quiaari puetunujua naa taraatia quia miiniu rejeretaquiaa, cucua tiuuji quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. <sup>4</sup> Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. <sup>5</sup> Cunora, quia niishiri taa jyanohua cua panijia quia quiquiaarini. Quioojia quia tacatorohua cucua, maninia mijijia quia quiniuhua, taa quia quiquiaari

coteenucujani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. <sup>6</sup> Quiaari maniniajuhuaj, sacuaraatia casaa Nicolás niishitiojosano tojjijia miishano soojea quia quiniuucua. Janiyari cuno pojori miishano soyajuhujaj. Nio cua sequesano quiajaniyari, cunoori puetunu cua pueyarajanaa. <sup>7</sup> Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji miojuarani, pueyaracaanu rishijiaa nojori quiniuria”.

### Esmirna tiacajinia quiniaa Pueyaso pueya maanuucara naajionee

<sup>8</sup> Jiyaniijia Jesucristoori naa cua sequerejuhuaj:

—Esmirna tiacajinia quijia cua seruucara quia naajiore, Pueyaso pueya maanu jitianani. Naa quia sequere nojuaja: “Naa sequerari cante puetunu casaajanaa coteetenacujani, na tucatajanio. Nojuacuajaari cusoquiaari, na nuhuaji samiitiaquiaariuhuani. Janiyacuajaari nojuajani. <sup>9</sup> ‘Janiyacuajaari niishiyani, quiaari naquiya miishaaquiaa. Quiaari casamijiujuhuaj. Naajaa, quiaari jyanohua casamiriacacuaja niya cua shuriucuanu. Janiyari niishiyajuhujaj, cuno Judiocuacaari quia sesacaquiaa. Nojoriiri tama sequequiaa jaacujua nojoriniaari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanás cuajaari samaruhua jiyaniijia. <sup>10</sup> Quiaari naquiya miishaanutaniya. Naajaa, majaari puerenu. Satanásri noojiaqueya niajanijajinijio nujuatejotenutaniya nujuatejojuajinia nia sanishaanura, niaate cucua tiuujiaca seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjijia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jyanohua shuquiriaatia quijia quia quiniuria pueyaracaanuni. Nio cua sequesano quiajaniyari, cunoori puetunu cua pueyarajanaa. <sup>11</sup> Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruuretajaca cutaraari quejoosaanutaniya mani noshijia caminiajinia”.

### Pérgamo tiacajinia quiniaa Pueyaso pueya maanuucara naajionee

<sup>12</sup> Jiyaniijia Jesucristoori socua cua sequereeri:

—Pérgamo tiacajinia quijia cua seruucara quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucuaja mueruu jitianari naa sequeya: <sup>13</sup> ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa,



quiaari cua tojjia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanoahua maninia. <sup>14</sup> Saniniuujia, maja cutaraari nio cua maniniucuanu: tamasa niajanijiniiniori maja na tarinitianu paniniu sesa na miijionu. Nojoriiri supuetana Balaam niishitiojosano tojjia quiyajaa. Balaamcuajaari Israel pueya paraca Balac niishitiojquiaari na pueya cuaara shiniujuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecoosano quiquiaaricujani juhua Pueyasooacara. Naa sacuaraatia nojori queranacujusacari nojori paraatej, Israel pueyari cuniquijia cuno taatujuri numuetucujuquiaaricujani. <sup>15</sup> Naajuhuj, majaari nio cua maniniucuanu: noojiaqueya niajanijiniiniori maja na tarinitianu paniniu jiyanoahua sacuaraatia casaa Nicolás niishitiojosano. <sup>16</sup> Quiaari nareja niquiquiaa sacuaraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaraatia miijia cua miaquejonura cua rupaamaji mueranacujua mueruuta. <sup>17</sup> Cante numaaracani, nojori cuaara tojiiria Pueyaso Sohuanu sequesano Pueyaso pueya maa-puera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuaaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanooqua quiarinio sesa naajiotasano quiniutianiyacujani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niqutionutaniya cuno saajiacujani”.

#### Tiyatira tiacajinia quiniaa Pueyaso pueya maanucuaa naajione

<sup>18</sup> Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Pueyaso Niyanu, juhua mani rimi-anacuyano namijiaaracani, juhua bronze mohuaquis-hano shacantuuca nihuacaracajuhuj, nojuajaari naa quia sequeya: <sup>19</sup> ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasooqua tiuujia. Quiaari maninia poonijiona Pueyasora, pueya quia naacunura. Naajuhuj, quiaari juhuajaniya rejetaquiaa quiaa jaara taraatia miishaariquia. Janiyari niishiyajuhuj, puetunujuanaa quia miishano quiria quiarijiani, cunoori socua queraatia coteenu quia miishanojiniji. <sup>20</sup> Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunia pueyara. Quiaari juhuajaniya

na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaajaarihuaj nojori miaquenuunura noo shu, teyanote juaashiquiacata shipinijosano taucuaca pueyasohuacuara puecoosano quiquiaacuajani. <sup>21</sup> Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. <sup>22</sup> Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuj, na numuetucunujuuca jaara noojia tacatoyaqiri sesa nojori miiniujiniji, janiyari jiyanoahua naquiya miiniutianiya nojorini. <sup>23</sup> Noo maajipohua juhuaj, paanaturiria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa puecoonutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujajinijianaa nojori niishitiojosano niishijiani, nojori panishanoocua nojori jiaatianunio. Naacuajitij, janiyari maninia miijia niajanijiniinio maninia miiniutianiyani. Niajanijiniinio sesa miijia saniniuujia, nojoriiri saniitiosaanutaniyacujua. <sup>24</sup> Tiyatira tiacajinia quiniaa noojiaqueya niajanijiniinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijia jiyaniquishanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniacuaja. Cunora, majaari socua cua nacasunu quiarijia niajanিয়া. <sup>25</sup> Saaja tama nia cuaqueyajaaja nia cojuare jiyanoahua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatija. <sup>26</sup> Cante cua panishano miiquiaa pueyaracaanuni cuaara shaajeyarejaatija, janiyari cuno pueyano jiyatenutaniya tamasa pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuracuaani. <sup>27</sup> Jiyaniijanucua cua jiyatesano pueyani, nojoriiri cumaacaraca quiniutianiya na jitianano pueya na tojitiuria nojuaja. Na tojitiaashijia na saniitiosacari saniniuujia, nojori piyonutaniya jacanuraari, juhua cumamacata pishano conatu. <sup>28</sup> Naajuhuj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuj. <sup>29</sup> Cante numaaracani, nojuaja cuaara tojiiria Pueyaso Sohuanu sequesano puetunu Pueyaso pueya maa-ruerajanaa”.

#### Sardis tiacajinia quiniaa Pueyaso pueya maanucuaa naajione

**3** Jiyaniijia Jesucristoori socua cua sequere:

—Sardis tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Naa sequeyari cante Pueyaso

Sohuanu jiyaramiquiquiaa cuno siete Pueyaso pueya maapueecuacuajani, nojori jiuujiajania na poonijionura. Nojuacuajaari cuno siete Pueyaso pueya maapue jiiitianaa Jiitianajanaa. Janiyacuajaari cunoni. 'Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. <sup>2</sup> Quia maquenu quia jatare! Suteja quia quiri! Quia cumaquiri noo pojori canapue te jatarinitiaja rishiyajaani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. <sup>3</sup> Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricuajani, cuno quia niishiriohua. Quioojia quia tacatorohua Pueyasooqua, seetanujuanaa na rupaa tojjia quia quiniuria. Quiaa jaara suteja quiniu paniaquiri, janiyari canashiyaquiji quiocua niniutianiya juhua nohuasejuani, quia jiyanihacari maja naasucua juhuanojuaja cua tiuquiniu quiniutianuhua. <sup>4</sup> Quia jiiitiasano pueyajiniinio cuniqui Sardis tiacajiniani, secaja nojorijiniinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojuaquishano janiyara. Naaratej, janiyari nojori cushiyotenutaniya cohuaquieya toqueni, cuata nojori rucanejonura, cua rupueanaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujia nojori quishacari. <sup>5</sup> Canapue te naa sesa miiniu ruuretajacani cua tojtiajaca nojori quiniuucua, nojoriiri naa cohuaquieya toquieya cushiyotesocoriquianojuhuaj. Cunoori quiniutianiya tojetaarucuajanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajionejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuani, na seya tacojiriano, cua sequenura nojoriiri cua timitiasano pueyaniojua. <sup>6</sup> Cunora, cante numaaracani, nojuaja cuara tojiiria Pueyaso Sohuanu sequesano Pueyaso pueya maapuera”.

#### Filadelfia tiacajinia quinia Pueyaso pueya maanucua naajione

<sup>7</sup> Jiyaniijia Jesucristoori socua cua sequeree: —Filadelfia tiacajinia quijia cua seruucua quia naajiorejuhuaj, Pueyaso pueya maanu jiiitianani. Naa quia sequere nojuaja: “Cua tojiri. Janiyacuajaari tojetaarucuajanaa maninia miijiani, cua Que tojjia quia quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiotiu riatataja jiiitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. <sup>8</sup> Janiyari puetunu quia miishanojuanaa niishiyani. Naajuhuj, janiyacuajaari juhua tiotiu riatarucuaa quiocuajini, cua rupaa quia poojotanura. Naacuajitij, tamasaari maja na naata tenujunu quiajaniya.

Quiaacuajaari saaja secaja cumaacaraca. Naajaa, quiaari cua rootasano tojjiaacuaja. Naajuhuj, majaari cua soojeaca pueya niquiara quia tamacanu quiquianu janiya. <sup>9</sup> Naa maninia quia miiniuucua janiyaracuatej, janiyari naa maninia miiniutianiya quiarajuhuj. Janiyari noojiaquieya Satanás pueya maanujiniinio mojquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. <sup>10</sup> Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuajaari jiyacari nia cojuanutaniyani. <sup>11</sup> Quia niishiri: janiyari quera tiuquiuhuani. Majaari quia tarinitianu cua rupaa tojjia, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niquitionu quiniutianiya quiarano na racatasano. <sup>12</sup> Cante sesa miiniu samiritiaja saajani, cua rupaa tojjia na quiniuucua, janiyari jiyocuacaanu Pueyaso Secojoua tiainia na nujuatenutaniya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanoocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. <sup>13</sup> Cante numaaracani, nojuaja cuara tojiiria Pueyaso Sohuanu sequesano Pueyaso pueya maapuera”.

#### Laodicea tiacajinia quinia Pueyaso pueya maanucua naajione

<sup>14</sup> Jiyaniijia Jesucristoori socua naa cua sequeree: —Laodicea tiacajinia quijia cua seruucua quia naajiorejuhuaj, Pueyaso pueya maanu jiiitianani. Naa quia sequere nojuaja: “Cua tojiri. Naa sequeryari noo pueyano cana sequesano te seetanu rupaajanaacuajani. Puetunu na caminiujiushanojuanaa Pueyasojiniijia quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuajaari janiya. Cunora, cua tojiri. <sup>15</sup> Janiyari puetunu quia miishanojuanaa niishiyani. Quiaari najuhua quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. <sup>16</sup> Quiaa jaara cua niishiyashijia quiri quia, janiya maara quiocua tarajerani. Saniniuujia, quiaa jaara seetanujuanaa cua tojjia quiri quia, janiya maara quia timitiareni. Saniniuujia, najuhua cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. <sup>17</sup> Quiaari tama sequequiaajaacujua: Jani-

yari casamiriacani. Janiyari puetunu cua panishanojuanaa jiiitiaani maninia miiija cua quiniuucua'. Maja cutaraari quia niishiniu quioojiaari cusosu. Janiyara, quiaari tojetaarucujanaa casamiiju, cariyajuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. <sup>18</sup> Cunora, janiyari quia numooteyani moseeca pueyanonaa, cua rupaa tojjia quia quiri, seetanujuanaa casamiriaca quia quiniuria. Naajuhuj, maninia miiija quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuj, cua niishitiaja quia masere cutara, quioojia namijia riatenura, seetanujuanaa maninia niquijia quia quiniuria. <sup>19</sup> Janiyari puetunu cua panishano pueyanaa nacasujuani, nojori saniitiojuajuhuj. Cunora, quioojia quia tacatore cucua. Tama quioojiajaaja quia shiniujiurijuhuj shamaatia cua tojjia quia quiniuria. <sup>20</sup> Cua tojiri. Janiyari quioojia tootiuujiniiji jiiquioonuujiani. Cante cua tojijiani, nojuaja cuara na tootiu riatara cucuaji. Janiyacu nocua tiuquiumiani, nata cua miaquenura, shuquiriaatia cua pocojonura nata. <sup>21</sup> Janiyari cua Paraca shocotaquiaarini cua Que tojjia quia quiniuucua. Naaratej, cua Queeri cua cajitiquiaari na shuriucua, Jiyaniijajanaa cajitujinia. Naajuhuj, janiyari Sesaaca shocotajaca cajitijionutaniya cua shuriucuan, jiyaniijianucua nojori quiniuriajuhuaj. <sup>22</sup> Cante numaaracani, nojuaja cuara tojiiria Pueyaso Sohuanu sequesano Pueyaso pueya maapuera'''.

#### Juan niquishacari Jiyocuacaanu Quijiaari manihuaqueetasariquiaa

**4** Na nuhuaji, janiyari mauquiaarini. Janiyari saaja jiya cajiniocua tootiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupajaari cua pacutequiaariuhua sequenu. Naa cua sequereeri:  
—Miji quia tacama. Janiyari quia niquitiniutianiyani taa nio pa quishacari nuhuaji mijiria quinia miishaanutaniyani.  
<sup>2</sup> Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuacaanuuri. Janiyari jiyacarari Jiyaniijajanaa cajitiu niquiriini. Pueyanoori tii cajiriquiaa. <sup>3</sup> Nojuajaari shanohua niquishano quiriquiaa, jyanohua shacantuuca juhua jaspe saajia, jyanohua naatuucajuhuj, juhua cornalina saajia. Naashiiri na cajitiu caco nuuariquiaa. Jyanohua shacantuuca quiriquiaari neeruucua, pocojuanaque juhua esmeralda saajia. <sup>4</sup> Janiyari socua veinticuatro cajitiucua niquirii Jiyaniijajanaa cajitiu shocuan. Tii cajituriquiaari veinticuatro niishijia jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyanio. <sup>5</sup> Jiyaniijajanaa cajitujiniiji, miacanaari nunujuriquiaa. Jyanohua majacuriquiaaariuhuj. Jiyaniijajanaa cajitiu tacoji, tii noshiquioriquiaari siete samari. Cunocujaari siete Pueyaso Sohuanu, puetunu tiqiyocuajanaa quijia na quiniuucua. <sup>6</sup> Jiyaniijajanaa cajitiu tacoji, juhua jyanohua puereetuuca caminiaari

quiriquiaajuhuj, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jyanohua queraatia namijiaraca quiriquiaa, na jiriquiaacumaji, na nijiniaacumajinio. <sup>7</sup> Cuno cuatro saminiucua casaari maatia niquishano quiriquiaa tamonujiniiji. Niquiryatuuri juhua juuru sare niquishano quiriquiaa. Tamonuuri juhua seru juunu caya niquishano quiriquiaa. Tamonu casa jiquicoori juhua pueyano jiquicoo niquishano quiriquiaa. Tamonuuri juhua surohua miooru jaano niquishaariquiaacujua. <sup>8</sup> Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijianiara na niquitiajanio. Nojoriiri pueyaracaanu Pueyaso manihuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijajanaanaa, quiaari saa maniniaja, jyanohua maninia, tojetaarucujanaa maninia miiija! Quiaacuajaari Pueyaso, puetunu cumaacaracajanaa. Quiaari quijiajuhanajaj. Majaari quia supuenu quiquiaari. Quiaari quia pueyacu tacateriquianohua.

<sup>9</sup> Cuno cuatro saminio casaari naa pueyaracaanu manihuaqueetariquiaa Jiyaniijajanaa, na cajitujinia cajiyano, pueyaracaanu Jiyaniijajanaa quiriquiano na quiniuucua. <sup>10</sup> Naa pueyaracaanu cuno cuatro saminio casa timitiasacari Jiyaniijajanaacuaatej, cuno veinticuatro niishijia jiyaniijianucuaari jaarajaaja mojuquetacoquequiaa Jiyaniijajanaacuaara. Nojoriiri na tuhujaa jartaqueequiaa Jiyaniijajanaa cajitiu pajama, naa na sequenuta:

<sup>11</sup> —Nioori quiaara, Jiyaniijanaa. Quiaa cutaraari Jiyaniijajanaa, maja canaa. Quiaacuajaari canaa Pueyaso. Quiaa cuara timitiasaaria pueyaracaanu, jyanohua maninia shacantuuca quijia quia quiniuucua, puetunu cumaacaracajanaa quia quiniuucujuhuj. Quiaacuajaari puetunu casaajanaa shipiniquiaari. Tama quia paniniuucujajaaja, quiaari na shipiniquiaari.

#### Rupanacujusano naajioneejiniiji pohuatasano, Borrego Niquiojuajiniini

**5** Na nuhuaji, janiyari Jiyaniijajanaa cajitujinia cajinia juaashiquiaajinia niquirii naajioneeni. Na miaquetajara na cacariquiaari. Cuno tucuanee naajioneeri jiuniosano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajiotasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. <sup>2</sup> Jiyacaritij, janiyari jyanohua cumaacaraca Pueyaso seru niquiriini. Naa nequesoreeriquiaari jyanohua na nacanuta:

—¿Cante seetanujuanaa maninia miiija cutarani? Cuno cuara rupartaara rupanacutasano, na riatanura cuno naajione.

<sup>3</sup>Jiyacaritij, majaari quenaaja maninia miijia quiniu quiquiaari jiyocuacaanu, jiyajinia, jiya cariquimiano na riatanura cuno jiuniososano naajionee. Tojetaarucua-janaa shaaqui quiquiaariirri cuno naajionee sero-joriquiano. <sup>4</sup>Naaratej, janiyari jiyanoehua nuju-queriquiaani, tojetaarucua-janaa shaaqui maninia miijia quiyaquiniucua cuno naajio na riatanura, na sero-jonurano. <sup>5</sup>Cua nujuquesacari, tamonu cuno veinticuatro niishijiaa jiyaniijianucuaajiniijioori cua sequeree: —Maja nujuquenu. Quia cumantare. Quia niqiri. Pa Jiyaniijiajanaacuajaari jiyanoehua cumaacaraca. Tariucuaaanu Pueyaso Rupaajinia, nojuacuajaari miriqui sequeshiya Juurunu sareta, Judá niquiohuacuajinio supueriquiano, Jiyaniijiajanaa na quiniuria na supuetana David niti. Nojuacuajaari pa paraca Satanás shocotana, tojetaarucua-janaa Jiyaniijia Pueyaso tojjia na quiniucua. Naaratej, nojuaja na naata cuno siete naajio coteeja rupanacujutasano rupareetanu na sero-josocoriquiano.

<sup>6</sup>Jiyacaritij, janiyari Borrego Niquiojua niquiriini Jiyaniijiajanaa cajitiu tajoji nujuuano, cuno cuatro saminio casaa tajiniano. Cuno veinticuatro niishijiaa jiyaniijianucuaari na shocua quiriqiaajuhuaaj. Borrego Niquiojuaari seetanujuanaa juhua mosano samitanohua niquishaariquiaa. Nojuajaari siete jiyaniijia tuhuajaaraca quiriqiaa, puetunu cumaacaracajanaa na quiniucua. Naajuhuaaj, siete namijiaaraca quiriqiaari. Cuno na siete namijiaani, cunocuaajaari Pueyaso Sohuanu, Pueyaso jiyaramiquishano puetunu mijirijanaa. <sup>7</sup>Cua niquishacari, Borrego Niquiojuaari Jiyaniijiajanaa cajitijinia cajiyano juaashiquiajiniji jiuniososano naajionee masetaree. <sup>8</sup>Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jiitariquiaa. Naajuhuaaj, orojiniji shipinijosano suhuococua mueetacoriqiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. <sup>9</sup>Nojoriiri Borrego Niquiojua jaaquequetariquiaa nio quiarinio jaaquequejosano:

—Saaja quiajaniyari seetanujuanaa maninia miijia. Naaratej, quia naata cuno naajionee patanu quia rupa-reetanura na rupanacujusano. Quiaari jiyanoehua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya mase-quaari Pueyasora puetunu tamaatiucua pueya-puejinijiojuanaa, puetunu tamaatia rupaa pocuajacajiniijiojuanaa, puetunu tiacajiniijiojuanaajuhuaaj, puetunu jiyacajiniijiojuanaanio. <sup>10</sup>Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojonaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriqiano-juhuaaj.

<sup>11</sup>Na nuhuaji janiyari tojetaarucua-janaa jiyanoehua jiyanoehua queraatia Pueyaso seya niquiriini. Jiyaniijia-

janaa cajitiu shocua mariquiaari, cuno cuatro saminio casaa shocuaajuhuaaj, niishijiaa jiyaniijianucua shocuanio. Nojoriiri jiyanoehua queraatia quiquiaari, juhua jaaquia, serojiyaquishoo. Janiyari nojori tojirii pa Jiyaniijia Jesu maniniuhuaqueetaanoni. <sup>12</sup>Nojoriiri naa na sequeturiquiaa na nacanuta:

—[Pa Jiyaniijiaari jiyanoehua maninia! Pueyacuara mosaaquiaariirri juhua borrego niquiojua. Naaratej, saaja nojuaja cuaara quiiria Jiyaniijiajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucua-janaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quiijiaa casaajanaa cuaara tojtiaara pa Jiyaniijia. Saaja nojuaja cuaara quiiria jiyanoehua timitiasano. Puetunu quiijiacajanaa cuaara na maniniuhuaqueetaara.

<sup>13</sup>Naajuhuaaj, janiyari puetunu Pueyaso shipinishano saminio casaajanaa tojiriini, jiyocuacaanu quiijiaa, jiyajinia quiijiaa, jiya cariquimia quiijiacajuhuaaj, shoniniacu caminiajinia quiijacano. Puetunu nojorijianaari jiyanoehua na timiniutia sequeturiquiaa:

—[Cuno, na shacantuuca cumaacajinia cajiyani, Borrego Niquiojuanio, nojori cuaara maniniuhuaqueetasaaria pueyaracaanu! [Puetunu casaajanaa cuaara tojtiaara nojori pueyaracaanu! [Nojori cuaara timitiasaariajuhuaaj! [Saa nojorijia cuaara na cumaaca jiitiaara pueyaracaanura!

<sup>14</sup>Jiyacaritij, cuno cuatro saminio casaari nojori rihueneriquiaa saniniuuja:

—[Taaquiriirini! [Cuaara naa quiiriatej!

Cuno veinticuatro niishijiaa jiyaniijianucuaari saniniuuja mojuquetacoqueecujua cuno pueyaracaanu Quijiaacuara, nojori na shuquiritianura.

#### Jiuniososano naajioneequa seis rupanacujutasano rupareetasacari

**6** Na nuhuaji, cua shootiasacari, Borrego Niquiojuaari coteenujuanaa cuno naajioneejinia rupancutasano rupartaree. Naa miiriiri cua niquitishaanura taa mijiria quiniaa miishaanutaniya jiyanoehua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajiniijinio tojirii sequeyanoni: “[Miji]!”. Na pocuanuuri juhua miacana majanu tojishano quiriqiaa. <sup>2</sup>Naa na sequesacaritij, janiyari cohuaajohuana caballo niquirii nocua canujijianoni. Na nijinia cajiniaari balista cacariquiaa. Jiyacaritij, jiyaniijiaari shipinishano nacaque cushitishaa-reeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

<sup>3</sup>Na nuhuaji, Borrego Niquiojuaari segundo rupancutasano rupartaree. Janiyari jiyacari segundo saminio casaajiniijinio tojirii sequeyanoni: “[Miji]!” <sup>4</sup>Naa na sequesacaritij, naatuhuana caballoori nocua canujumaa. Na nijinia cajiniaari cumaaca niquitiosaare. Naacuajitij, nojuajaari mijiria quiijiaa tojetenutaniya tama nojori miaquetojonurajaaja. Cunora, nojuajaari puereetunee nijiniaquetucuaaja mueruu niquitiosaaree.

<sup>5</sup> Na nuhuaji, Borrego Niquiojuaari tercero rupanacutasano rupartaree. Janyari jiyacari tercero cuno saminio casaajiniinio tojirii sequeyanoni: “Miji!” Jiyacaritij, janyari mueruhuana caballo niquirii nocua canujijyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. <sup>6</sup> Jiyacaritij, janyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niquitiosaaria saaja niquiriyatu kilo trigo jajau. Jaara trigo jajau paniyaquiri, cuaara niquitiosaaria tres kilo cebada jajau. Saniniuuja, majaari shiyocua shanacujunu cutara, vinonio. Cunocuaaari queraatia quiniutianiya cutara.

<sup>7</sup> Na nuhuaji, Borrego Niquiojuaari cuarto rupanacutasano rupartaree. Jiyacaritij, janyari cuarto saminio casaa tojirii naa sequeyanoni: “Miji!” <sup>8</sup> Janyari jiyacari tiirihuana caballo niquirii nocua canujijyanoni. Na nijinia cajinia sesaari quiriqiaa “Cusojuana”. Macunucua Quiquoori na neteyotariquiaa, Cusojuana puecoosano na rijionura na miitiasocoriqiano. Nojoriiri cumaaca niquitiosaaree jiyanhua queraatia pueya na cusojuanura. Naacuajitij, jiyanhua queraatia pueyari puecoosaanutaniya miaquetoojosacari. Tamasacaari cusonuunutaniya jiyanhua miaajesacari. Tamasacaari paaqueja cusonu cusonuutanutaniya. Naajuhuaaj, tamasaari sareya sootesaanutaniya. Sacocua satejosaanutaniya jaariuhuaaj. Naacuajitij, jiyanhua jiyanhua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quiijaca pueya cajiniocujajiniiniojuanaa.

<sup>9</sup> Na nuhuaji, Borrego Niquiojuaari quinto rupanacutasano rupartaree. Jiyacaritij, janyari Pueyasoocuaa catijiasaqui juhuacutu cariquiaco niquirii Pueyaso pueya sohuanuhuaani, noo pojori canapuate puecoosaaquiaaricujani Pueyaso Rupaa tojijiaa nojori quiniucua, Jesucristojiniji nojori pohuatanuucujuhuaaj. <sup>10</sup> Jiyacaritij, nojoriiri naa jiyanhua nacaree: —Jiyaniijianaa! Quiaari saa maninija! Quiaari quia sequesano miijia seetanujuanaa. ¿Taa quia tarishiniutianiya jaara canaa puecoonaa quia nequesoreenurani, nojori quia naminiuria canaacua saniniuuja?

<sup>11</sup> Jiyacaritij, puetunu nojorijianaari cohuajaque toqueya niquitiojosaaree. Nojoriiri naa sequesaree:

—Socua rupaquijia nia samaaterejaara, Pueyaso saquirojosano niarta Pueyaso pueyajiniinio cuara puecoosaaria nia shirijaatijia, taa nia puecoosaaquiaaricuaani.

<sup>12</sup> Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiujutiaaree jiyanhua. Janyari na niquiriqiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. <sup>13</sup> Riyari jiya cajiniocujaji toteree jiyocua, taa satuna totequiaa jiyanhua paratucaricuaani. <sup>14</sup> Jiya cajiniocuaari shaajeque-

juhuaj, juhua tucanee naajioneeri jiuniocosaaree. Shoniacu caminiajina, puetunu jiya tucuaatijajanaa, puetunu tuhuananuhuaajuhuaaj, puetunu cunojuaanaari jiyajeetaquee na nujuatusaqui. <sup>15</sup> Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhuaajiniuhuaaj. Naa jamaatiushiijaariuhua noo pojori: pueyacua paaretajaca na cumaacatej, soldadohua jiyaniijianucua, jiyanhua casamiriaca pueya, pueya tojishano pueya, poonitijosano pueyajuhuaaj, puetunu narta pueyajanaano. Puetunu pueyajanaari naa mashiriquiaa juucua. <sup>16</sup> Nojoriiri tuhuananuhua sequeriquiaa, sainio:

—Canaacua nia tiyare canaa nia jamonura cunocuaaji, na cajitijinia cajiya na shacantuca cumaacajiniani! Canaa nia jamojore maja na niquiara canaa quiniuria, naajuhuaaj, maja Borrego Niquiojua saniitionura canaa, jiyanhua na juashacari! <sup>17</sup> Quiarijiacuaaari Pueyaso saniitionu juuca. Jiyanhua puereeta. ¿Cante na naata na nujuatanuni? Shaaqui.

### Pueyaso saquirojosano pueyajiniji pohuatasano, Israel niquiohuacuajinio supueno pueyajiniinio

<sup>7</sup> Naa cua niquiniu nuhuajitij, janyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajarano. Nojoriiri na nujuatusaqui paratu tenujuriqiaa maja na piyarojonura jiya, shoniacu caminia, nacuhuanio. <sup>2</sup> Jiyacarijuhuaj, janyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanhua, noo pojoriicua canapuate cumaacaraca quiriqiaacujani nojori sesonura jiya, shoniacu caminiano. Naa nojori sequereeri:

<sup>3</sup> —Cuaara! Maja juhuanajuaja jiya nia sesonu, shoniacu caminia, nacuhuanio, canaa niojiyquishacarijia Pueyaso sesa, na pueya jiniji, na niishishaanura nojoriiri Pueyaso pueya!

<sup>4</sup> Janyari jiyacari tojiriini taa pueyate na jiniji jiri-oosaareni. Puetunu supuetana Israel doce niquiohuacuajinio supueno pueyapuejiniinioo ciento cuarenta y cuatro mil pueya jirioosaaree. <sup>5</sup> Naacuajitij, supuetana Judá niquiohuacuajinio supueno pueyajini-jinioni, doce mil pueyari jirioosaaree. Supuetana Rubén niquiohuacuajinio supueno pueyajiniinio, doce miljuhuaj. Supuetana Gad niquiohuacuajinio supueno pueyajiniinio, doce miljuhuaj. <sup>6</sup> Supuetana Aser niquiohuacuajinio supueno pueyajiniinio, doce miljuhuaj. Supuetana Neftalí niquiohuacuajinio supueno pueyajiniinio, doce miljuhuaj. Supuetana Manasés niquiohuacuajinio supueno pueyajiniinio, doce miljuhuaj. <sup>7</sup> Supuetana Simeón niquiohuacuajinio supueno pueyajiniinio, doce miljuhuaj. Supuetana Leví niquiohuacuajinio supueno pueyajiniinio, doce miljuhuaj. Supuetana Isacar niquiohuacuajinio supueno pueyajiniinio, doce miljuhuaj. <sup>8</sup> Supuetana Zabulón niquiohuacuajinio supueno pueyajiniinio, doce miljuhuaj. Supuetana José niquiohuacuajinio

supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jiri-oosaaree.

### Cohuajaque toqueya cushitishano pueya maanu

<sup>9</sup> Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojori-iri puetunu nio tiqiyocua jiyacajinijiniojuanaa pueya quiriqiaa, puetunu tamaatiuucua pueyapuejinijiniojuanaa. Quiriqiaaajaarihuua puetunu tamaatia ru-paaca pocuajacajinijiniojuanaa, puetunu tiqiyocua tiacajinijiniojuanaa. Naa tojetaarucuajanaa jiyanoehua queraatia nojori quiniuucuatej, majaari na naata serojosaanu quiriqiaa. Nojoriiri Pueyaso shacantuuca cajitiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuajaque toqueyaraca quiriqiaa. Shuquiriaatia nojori quiniuucua, nojoriiri juhua teruhuanajaquera niquishano mueetacoriqiaa. <sup>10</sup> Puetunu nojorijianaari naa mariyata sequeriquiaa na nacanuta:

—[Jyanohua maniniaari pa Que Pueyaso, na shacantuuca cajitiujinia cajiyani, Borrego Niquiojuajuhua. Nojoricuajaari pa jyanooquiaari, tojetaarucuajanaa quiariniora jatanishano pa quiniuria!

<sup>11</sup> Naajuhua, puetunu Pueyaso seyajanaa, canapuate shacantuuca cajitiu shocua nujuaturiquiaacuajani, niishijiaa jyaniihianucua shocujuhua, cuno cuatro saminio casaa shocuanio, nojoriiri Pueyasoocuaa jacamaturee nojori timitianura nojuaja. <sup>12</sup> Pueyaso na timitiatuacari, naa sequetureeri:

—[Aaquiriirinij, seetanujuanaacuaj! [Canaari pueyaracaanu quia maninihuaqueetanutaniyani! [Quiaacuajaari canaa timitiasano! [Saaja quiajaniyari seetanujuanaa niishijia cutara! [Paacarasho, canaa Pueyasonaa! [Quiaa cuaraa tojishaaria pueyaracaanu! [Quiaari canaa Jyaniihijajanaa pueyaracaanura! [Quiaari puetunu cumaacaracajanaa maninia quia jiitianaara quia shipinishano! [Cuaraa naa quiiria pueyaracaanu, pueyaracaanutej!

<sup>13</sup> Jiyacaritij, tamonu cuno veinticuatro niishijiaa jyaniihianucujinijinioori cua nequesotaree:

—¿Canapuate cuno pojorini, cohuajaque toqueyaracani? ¿Tejenote nojorini?

<sup>14</sup> Janiyari na riuquaree saajani:

—Quiaa cutara na niishiya, jyaniihijanaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jyanohua naquiya miishacari rejeretajaca quiquiaari. Nojori tiuuniuucua Borrego Niquiojuacuaja, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. <sup>15</sup> Naa Pueyaso jyanoooshano pueya nojori quiniuucuatej, nojoriiri Pueyaso cajishaqui tacoji quijiaca. Nojoriiri pueyaracaanu tii Pueyaso Secojojua tiajinia miiquiaa Pueyaso panishano, juuca, niucuanio, nojori timitiasacari nojuaja-

ja. Na shacantuuca cumaacajinia cajijiani, nojuajaari na cumaaca teetenutaniya nojori caco, jatiqiu na quiniuria nojoritia pueyaracaanu. <sup>16</sup> Naacuajitij, majaari socua nojori miaajenu quiniutianiya, jiyamuenuio. Pananuuri maja socua nojori na catijianu quiniutianiya. Naajuhua, majaari socua nasaatia pananu jartanu nojori niishiniu quiniutianiya. <sup>17</sup> Borrego Niquiojuacuajani, Jyaniihijajanaa cajitiu jiuujajinia cajijiani, nojuajanaari nojori jiitianutaniya juhua tama na borregohuajaaja. Nojuajaari nojori rucuanejotanutaniya, nojori na raatenura pueya samiitianiija mohuaca pacartajajiniji, pueyaracaanu shuquiriaatia quijiaca nojori quiniuria. Pueyasojuanaacuajaari nojori namijiaaca tujuunutaniya nojori namijajiniji.

### Séptimo rupanacutasanojiniji pahuatasano, shanohua jaanutaja patajajinijinio

**8** Borrego Niquiojua jaara séptimo rupanacutasano rupartaree, cuno naajione saacatanura puetunujuanaa, tojetaarucuajanaa sanaacara quiquiiri jiyocuaaanu pueyaracaanura. Maja cua niishiniu, media horaruhua. <sup>2</sup> Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niquitiojosaaree. <sup>3</sup> Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniji shipinishano Pueyasoocuaa catijiaa casaa tacoji nujuaseeri, Jyaniihijajanaa cajitiu tacoji. Queraatia shanohua jaanutaja niquitiosaareeri Pueyasoocuaa na catijianura. Jaanutajaari catijiasaariquiano puetunu Pueyaso pueya secjonuusanotajanaa, Pueyasoocuaa na jaanujunura cuno catijiaa casaajiniji. <sup>4</sup> Naacuajitij, Pueyaso seruuri Pueyaso pueya secjosano tacanirii Pueyasoocuaa, shanohua jaanujua najacata. <sup>5</sup> Na nuhuaji, cuno Pueyaso seruuri catijiaa casaajiniji na shanohua jaanutaja pataja mishinirii nishiyata. Jyanohua na majiataree nio jiyacuaari. Miacanaari ritia nunujuquee. Jyanohua majacureeri. Jyanohua cojuatunereeri. Riji-aari jiuquiujiutiareejuhua.

### Trompetaa jonenejosacari

<sup>6</sup> Cuno siete Pueyaso seya, trompetaa cacariquiaani, nojoriiri jeeanecoree na trompetaa na jonenenura.

<sup>7</sup> Jiyacaritij, niquiriyatu cuno Pueyaso serujinijinioori na trompeta jonenu coteeree. Jiyacaritij, miacanajaa shiniituijaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatano.

<sup>8</sup> Segundo Pueyaso seruuri na trompeta joneneeri. Jiyacaritij, casaa juhua puereetuuca tuhuananu noshiyanoori shoniniacu caminiajinia jataaaree. Quera shoniniacu caminia cajiniocuaari nanacara quiquii. <sup>9</sup> Puetunu shoniniacu caminiajinia quijiaca casaajanaari, quera na cajiniocua cusonuuree. Naajuhua, shoniniacu caminiajinia ruhanetasano puereetuuca buqueyajinijinioori, quera puetunu na cajiniocujanaa sesosaaree.

<sup>10</sup> Tercero Pueyaso seruuri na trompeta jonenerree. Jiyacaritij, puereetuuca rijiaari jiyocuacaanuji tiquii, jiyanhua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaj. <sup>11</sup> Cuno rijia sesaari quiriquiaa "Piiquia". Cunora, tee cuno rijia tiyareeni, puetunu cuno mohuacajanaari piiquiara quiquii. Pueya ratusacari cuno mohuaca, queraatia pueyari saaja cusonuuree.

<sup>12</sup> Cuarto Pueyaso seruuri na trompeta jonenerree. Jiyacaritij, casaari pananuucua pitiaree, racaacia, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, rakanio, majaari na cuhuatanu quiriquiaa quera niu-cua cajiniocujuhuj.

<sup>13</sup> Na nuhuaji, janiyari juhua puereetuuca surohua miooru niqiriijiyi cajiniocuanio. Na jaasacari naa nacariquiaa jiyanhuari:

—[Puereeta, puereeta, puereeta! Seetanujuanaa jiyanhua puereeta quiniutianiyari jiyacua quijiaca pueyara, jiuujianaraca curecono Pueyaso seya jaara jonenerree, canapete jonenequiyajaa juhuanjuacajani.

#### Quinto trompeta jonenesacari

<sup>9</sup> Na nuhuaji, quinto Pueyaso seruuri na trompeta jonenerree. Jiyacaritij, janiyari jiyocuacaanuji jiyocua tinio rijia niqiriini. Cuno rijiaari tiotiu riatataja niqitiosaaree, puequeetuujuu raa na riatanura. <sup>2</sup> Na riatasacari, najacaari nojomaa juhua puereetuuca cuhuariquia sesacari. Pananu namijia tiomaari. Jiya cajiniocuaari mueruucara quiquiijuhuj. <sup>3</sup> Sequeruuri cuno najacajiniji mueratumaa. Puetunu nio jiyacujanaa paaquemaari. Sequeruuri cumaaca niqitiosaaree nojuaraca na quiniuria juhua turucuaniiinu. <sup>4</sup> Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeruuri cutaraari jiyaramiquishaare puetunu pueyapuejanaa na sojonura, canapete na jiniji jirioyaquishoo quiriquiaa Pueyaso sesatacuajani. <sup>5</sup> Sequeruuri rootasaareejuhuj, maja nojori cusojuanura pueya. Cinco raca cuaara nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniiinu saashi noonutaniya.

<sup>6</sup> Naa pueya miishacari naquiya na noonutatej, pueyari cusonu paniniutianiya juucua. Saaja cusoy-aquiniutianiyari. Jiyanhua na shaajenu panishacari juucua, nojoriiri saaja rishiniutianiya, jiyanhua naquiya nojori miishacari.

<sup>7</sup> Sequeruuri puereeta niqishano quiriquiaa juhua miaquetoojonura jeenucuasano caballohua. Sequeruuri casaa jitiariquiaa na nacajinia juhua jiyaniijianucara orojiniji shipinijosano nacaqueya. Nojori jiquicoori juhua pueyano jiquicoo niqishano quiriquiaa.

<sup>8</sup> Nojoriiri juhua maaji muecacaraca quiriquiaa, tucamuejarujuri. Juhua juurunu sare quiacaraca quiriquiaajaariuhuj. <sup>9</sup> Nojori jiriquiaqueeri cumueeca quiriquiaa juhua turtuco. Nojori jaacuatuseacari, na nesuhuari jiyanhua cojuatuneriquiaa juhua caballohua jayotasacari queraatia rucuanajotaruhua, miaquetoojonuucua na netecuatusacari. <sup>10</sup> Cuno sequeruuri juhua turucuaniiinu nojuacaraca quiriquiaa. Jiyanhua noonacuracajuhuj. Jaara nojori saare, cunoori quiquiaari nojori na noonura cinco raca.

<sup>11</sup> Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuujuu raa camarujaariuhuj. Hebreo rupaajinia, na sesaari "Abadón". Griego rupaajinia saniniuuja "Apolión". Pueyano rupaajinia saniniuuja, niiori sequeya "Pueya Puecoona".

<sup>12</sup> Janiyari naa niqitishaareeni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiri cureyaja na nuhuajiria.

#### Sexto trompeta jonenesacari

<sup>13</sup> Sexto Pueyaso seruuri na trompeta jonenerree. Janiyari jiyacari rupaa tojirii pocuaanoni, shanhua jaanutaja catijaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni.

<sup>14</sup> Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufrates moo shuriucua morojosano quiyani.

<sup>15</sup> Jiyacaritij, cuno cuatro Sesaaca seyari samaacarojosaaree jiyanhua queraatia pueya nojori puecoonura, quera na cajiniocua puetunu mijiria quijiaca pueyajinijiojuanaa. Cuno Sesaaca seyari tariucuaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijia. <sup>16</sup> Janiyari tojiriini cuno cuatro Sesaaca seya soldadohuari, doscientos mil-lones pueya quiriquiaa saa caballohuaracaja.

<sup>17</sup> Janiyari cuno caballohua niqitishaaree juhua cua maquenujiniani, na nijinia cajitunianio. Jiyanhua tamaatia niqishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niqishano quiriquiaa; naatuca juhua mani, nentuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niqishaariquiaa. Maniiri nojori rupaamaji rimi-anacuriquiaa. Najacaari nojonuucuariquiaajuhuj, azufrenio. <sup>18</sup> Cuno jiuujianaraca puereeta casaata quera na cajiniocua puetunu pueyajinijiojuanaari cusojuasaaree. <sup>19</sup> Naacuajitij, caballohuari cumaaca jitiariquiaa na rupaama, na pitijinijuhuj, nojori puecoonura pueya. Na pituucuaari juhua sacocua

niquishano quiriquiaa. Juhua sacocua nacacaraca quiriquiaajaariuhua pueya na sajitiajara.

<sup>20</sup> Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhua, nojoriiri orojiniji shipinijosano casaa shuquiri-tiariquiaa Pueyaso niti, platajiniji shipinishano, broncejiniji, saajiajinijijuhua, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquiniu. Majaari na tojinu. Majaari na rucuanenujuhuaj. <sup>21</sup> Naajuhua, majaari pueya tarinitianu quiriquiaa narta pueya monu, shimiojonujuhuaj. Naajuhua, majaari nojori tarinitianu quiriquiaa na camishoo maajipohua numuetucujunu, maa-jishuriu numuetucujunujuhuaj. Nohuasejonu tarinitiatuayaquiriquiaajaariuhua.

### Pueyaso seru mueetasano tucanee naajioneeniyojua-jiniji pohuatasano

**10** Na nuhuaji, janiyari socua tamonu jiyanoehua cumaacaraca Pueyaso seru niquirii jiyocua-caanuji roseyanoni. Cohuaja najacajinia cuhuajaa-tiariquiaari. Na nacaacua camarucuteriquiaa naashiiri. Na jiquicoori jiyanoehua shacantuuca quiriquiaa juhua pananu. Na cashacuaari juhua mani niquishano quiriquiaa, naatej, taa mani nujuua na noshishacaritij. <sup>2</sup> Na miaquetajara mueetariquiaa shiitaniyoyua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu camini-aacuaari. Tacujua niaree nio jiyacua saniniuurijia. <sup>3</sup> Nocua na nujuasacari, jiyanoehua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. <sup>4</sup> Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuaaanuji naa cua sequeyano saajani:

—Maja pueya niishitiniu cuno siete miacana sequesano! Maja na naajiotanu! Tama quioojiajiniajaaja quia racatare.

<sup>5</sup> Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuaaanu, seetanujuanaa na sequenura. <sup>6</sup> Naa sequereeri:

—Cuno, pueyaracaanu Quijiani, nojuajaari jiya cajin-iocua shipinina, jiya shipinina, shoniniacu caminia shipininajuhuaj, puetunu tii quijia casaajanaa shipiniano. Nojuajaari seetanujuanaa naa cua pohu-ataniya: “Majaari tari na tarishiniu quiniutianiya. <sup>7</sup> Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujunuaa pueyacuajani”.

<sup>8</sup> Cua tojishano rupaa jiyocuaaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaanoni, jiyacuanio. Nojuaja quia mase-tasee cuno riatasano naajioneeniyoyua, na mueetaani.

<sup>9</sup> Janiyari Pueyaso seruucua quiaareeni. Janiyari na sequeseeni na naajioneeniyoyua na niquitionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitiotaja rupaa na quiniucua.

<sup>10</sup> Janiyari jiyacari cuno naajioneeniyoyua pataree Pueyaso seru juaashiquiajinijini. Janiyari na miaque-reeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee pi-iquiaraari. <sup>11</sup> Jiyacaritij, janiyari naa sequesaaareeni:

—Quiocua Pueyaso sequesano caminiujuriuhua pohuatanu queraatia pueyapue niquiara, queraatia tamaatia jiyacajinia quinia niquiara, queraatia tamaatia rupaa pocuajaca niquiarajuhua, queraatia jiyani-ijianucua niquiaranio.

### Caapiqui Pueyaso sequesano caminiujunuaa miis-hanojiniji pohuatasano

**11** Na nuhuaji, janiyari tia shanacujutaja naajua niquitiosaareeni, juhua nataca niquishano. Janiyari naa sequesaaareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojoua tia quia shanacujusee quia shanacujutajata, orojiniji shipinishano shanohua jaanutaja catijajanio. Quia serojorejuhuaj puetunu Pueyaso secojonujuacajanaa tii. <sup>2</sup> Maja cutaraari quia shanacujunu Secojoua tia carijiniacuma. Cunocuaajaari taucua niquitiosaarucuaa tari. Pueyaso soojeaca taucuaari Pueyaso saquiriojosano na tiacarano jii-tianutaniya pueyaracaanu, cuarenta y dos raca cuara na shocojorejaatijia. <sup>3</sup> Janiyari caapiqui cua saquirio-josano pueya jiyaronutaniyani, janiyajiniji nojori pohu-atanura pueya niquiara. Nojoriiri janiyajiniji pohu-atanutaniya cuara shocojorejaatijia mil dosciento sesenta juuca. Nojoriiri cocuaque toqueya cushiniu-tianiya taa pueya cushiyoquiaacuajani nojori taraaje-sacari.

<sup>4</sup> Cuno caapiqui janiyajiniji pohuatanaani, nojoriiri cuno caapiqui olivo naana, tariucuaaanu Pueyaso Rupaajinia pohuatashiyacuajani. Naajuhua, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. <sup>5</sup> Tamonu jaara sesa miiniu paniri cuno caapiqui pueya, nojoriiri na paraa cati-jianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapuate nojori miiniu paniya sesa juucuaacuajani. <sup>6</sup> Nojori, janiyajiniji pohuatanaani, nojoriiri cumaaca jii-tianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhua, nojoriiri cumaaca jii-tianutaniya mohuaca na jataniniuria nanacara. Nojoriiri cumaaca jii-tianutaniyajuhua nojori sesonura jiya puetunu



puereeta tamaatia casaatajanaa. Nojoriiri pueyara-caanu naa miijionutaniya nojori panishacari. <sup>7</sup>Nojori jaara janiyajiniji pohuatano tucuatere, jiyacaritij, puequeetuuju raamaji tohuatariquiano pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacujitij, nojori puecoonutaniya socuuari. <sup>8</sup>Nojori queteeri cuno puereetuuca niishishano tiaca nuucujinia pojoconutaniya, tee nojori Jiyaniijia mosaaquiaari niyacutesanojinia teetesanoaujani. Cuno tiacaari miriqui jiyaniquishiya Sodomata, Egiptotano. <sup>9</sup>Naacujitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajiniinino pueya, tamaatiuucua rupaaca pocuajaca pueyajuhuj, queraatia tamonu jiyacajiniinino pueyano. Nojori paraari maja na shanacun quiniutianiya nojori jamojosaanura. <sup>10</sup>Puetunu mijiria quiniiaajanaari shuquiritiuniutianiya, macunucua cuno caapiqui Pueyaso sequesano caminiujunia quishacari. Pueyari jiyanhua timiquionutaniya, naquiya nojori miitiajaca puecoosaanuucua. Naaratej, mijiria quijiaaari tama na casamijiniijiaaja nareja niquitiojootoonutaniya nojori shuquiriniutia.

<sup>11</sup>Naaaja, jiuujianaraca juuca, socua tamonu juuca cajiniocua nuhuaji, Pueyasoori nojori samiitianiijiorohua. Inojoriiri na matusaqui saneecuaturuhua! Puetunu nojori niquiniaajanaari jiyanhua shiriitiquituri. <sup>12</sup>Jiyacaritij, cuno caapiqui Jesucristojiniji pohuatanaari puereetuuca rupaa tojitiurii jiyocuacaanuji pocuaano. Naa nojori sequeriquiaari:

—[Miji nia tacatama!

[Jiyacaritij, nojoriiri na paraa niquiara tacataquee cohujajinia jiyocuacaanura! <sup>13</sup>Na paraa shootiasacari nojori, jiyacaritij, rijaari jiyanhua jiuuquiutiaree. Naa rija jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusonuuree. Cureeno pueyari jiyanhua jiuujiatere Pueyasooajaji. Nojoriiri jiyacari niishirii Jiyocuacaanu Quijiaari seetanujanaa Pueyaso cutara.

<sup>14</sup>Janiyari naa segundo naquiya miiniu niquitishaareejaaniuhuj, taa na nuhuaji na miishaanutaniyacua-jani. Tercero naquiya miishacariiri quera ritia cuno nuhuajijia quiniutianiya.

### Séptimo trompeta jonesacari

<sup>15</sup>Séptimo Pueyaso seruuri na trompeta jonereee. Jiyacaritij, puereetuuca rupaacaari jiyocuacaanu tojishaaree. Naa sequeturiquiaari:

—[Quiarijiani, pa Jiyaniijia Pueyasoori tari jitianutaniya puetunu jiyacua jiyaniijianucua jiiitiasanojuanaa! Inojujaari pa Jiyaniijia Cristota Jiyaniijianucuajanaa quiniutianiya! Inojoricuaajari pueyaracaanu Jiyaniijiajanaa quiriquiano!

<sup>16</sup>Jiyacaritij, cuno veinticuatro niishijia jiyaniijianucua, shanhua cajitujinia cajituriquiaa Pueyaso taciini, nojoriiri Pueyasooajara jacamaturee jiyanhua na shuquiritianuta nojuaja. <sup>17</sup>Naa sequeturee Pueyasoori:

—[Paacarasho canaa Jiyaniijianaa! [Quiaari puetunu cumaacaracajanaa! [Quiaari quijiajuhanajaj! [Quiaari pueyaracaanu quijia! [Quiaari tari juhuacatecara quia cumaaca poonijioteree, Jiyaniijiajanaa quia quiniuria pueyaracaanu! <sup>18</sup>Cunora, puetunu jiyacua jiyaniijianucuaajanaari juaaquioya. Naaaja, quiarijiaari quia juaashacari cutara. Quiarijiaari macunucua quia nequesoreenu juucajuhuaj. Saniniujia, quiaari pueyara quia sequesano caminiujunia pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaano, jiyaniijianucua, narejaca pueyano. Naajuhuaj, quiaari jiya sesojuaca pueya shaajanutaniya.

<sup>19</sup>Jiyacarijuhuaj, jiyocuacaanu Pueyaso Secojua tiari riataaaree. Janiyari Pueyaso Quishaquijiana niquiriini. Tii matariquiaari Pueyaso caaja, seetanujanaa na Rupaajanaa na racataja. Cuno na Rupaari na pueya na jyanootiaja, na tojiyashijia na saniitotajajuhuj. Jiyacaritij, miacanaari nunujuree. [Jyanohua majacureeri! [Pueereetatej, jyanohua cojuata! [Rijiaari jiyacari jiuuquiutiaree! [Jyanohua queraatia miacanaaja shiniitijiaacaari juhua maru toterejuhuaj! [Jyanohua puereetaari quiriquiaa!

### Miriqui pohuatasano maajijiniji, puereetuuca Naaquerujinijijuhuj, juhua cohuaniquia niquishano

**12** Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, quia niquishanoni. Juhua toqueta pananujinia cuhuajaatariquiaari. Racaacua nuuariquiaari. Doce riyari na nacaque quiriquiaa. <sup>2</sup>Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. <sup>3</sup>Jiyacaritij, janiyari socua tamonu casa niquitishaaree jiya cajiniocuanio. [Pueereetuuca Naaqueruuri quiriquiaa, naatuhua! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracano. Jiyaniijianucua shipinijosano nacaqueya niquitiacoriquiaari na siete nacacaacua. <sup>4</sup>Cuno naatuhua Naaqueruuri quera na cajiniocua riyajiniinino nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji taci shanacuriquiaa. [Na sashiriquiaari cuara raara, mueya na mianura jaara rasaare! <sup>5</sup>Maajiiri cayaniyujua raree. Nojuajaari puetunu mijiria quijia pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijia na piyotajara. Mueyari na nucua jaariutiasaaree Naaqueruucua. Pueyasoori na shuriucua na ririi, tii na cajitiniuria, Jiyaniijia quiriquianoni. <sup>6</sup>Maajiiri saniniujia cariquia jiyajinia mashirii, tee Pueyaso jeenucuaquiaari tari nocuaji na quijiaracujani, tii na mianuutesaanurajuhuj, cuara shocorejatejia mil do-siento sesenta juuca.

<sup>7</sup>Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhua Naaquerujuhuj puetunu na seyatajanaa. Puetunu nojori-

jianaari puereeta quiaquetooriguiaa jiyocuacaanu. Cuno Naaqueruuri na seyata jiyanoehua quiaque-riquiaa Pueyaso seya juucua. <sup>8</sup> Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanoehua nojori, majaari quiquio quiniu quiriquiaa socua nojoriria jiyocuacaanu.

<sup>9</sup> Naacuajitij, cuno Naaqueruuri jiyocuacaanuji taanusaaree. Nojuacuajaari cuno tariucuacaanu Soconu, Eva sapojoquiaarini. Cuno Sesaaca seque sesaari "Satanás". Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaa-ree.

<sup>10</sup> Jiyacaritij, janiyari jiyocuacaanu quiijaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—Pueyasoori parta Pueyaso pueyacuara Saquiriojotana jatatee tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jataaanuucuatej, Pueyasoori quiarjiaa tohuateenutaniya puetunu na sequesanojuanaa na jiyanooshano pueyara. [Nojuajaari maninia jiitianutaniya pajaniya, jiyanoehua na cumaacata! [Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. <sup>11</sup> [Pueyaso Borrego na quiniuucua, nojuajaari na nanaca shootequiaari, tojetaarucujanaa jiyanooshano pa quiniuria sesa pa miishanojiniji! Naacuajitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaarjianaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quiija na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. <sup>12</sup> [Naaratej, jiyocuacaanunaa, shuquiriaatia quia quiri! [Naa Sesaaca jataaanuucuatej, nia timiquiore jiyocuacaanu quiijacanaa! [Niajaniya saniniuujia, jiyacua quiijacanaa, shoniniacu caminiainia quiijacanio, jiyanoehua nia taraajere! [Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanoehua na juaaniutia!

<sup>13</sup> Cuno puereeta niquishano Naaqueruuri niishishacari nojuaja tari jataaaree jiyocua, nojuajaari cuno mueya nucua neteyojotanu coteeree na mianura juucua.

<sup>14</sup> Cuno maajiiri querajaa puereetuuca nesu niquitiosaaree saaja, juhua jiyanoehua puereetuuca surohua miooru nesu. Cuno nesuta, maajiiri na quiquiojiniaara jaaree cariiquia jiyajinia, tucuacaanu cuno Naaqueruucua. Tii mianuutesaanutaniya pueyaracaanuuri cuaara na shocojorejaatijia jiuujianaraca marijia, socua seis racanio. <sup>15</sup> Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. <sup>16</sup> Jiyari maaji naacutaree. Jiyari juhua na rupaa riataree. Naaqueruuri rupaamaji pojuaretaano moo raturee saajaari. <sup>17</sup> Naaqueruuri jiyamitia maajiicua macaari jiyanoehua. Quiaareeri

maajiicujainio supueno pueyata miaquetoohonura. Cuno pojoricuajaari Pueyaso rootasano tojitiajaca, canapueete Jesucristoocua nojori tiuuniu seetaashijiacacuajani.

<sup>18</sup> Naaqueruuri shoniniacu caminia casaqueyaji nujuasee.

### Caapiqui puereeta niquishano Casaaajiniji pohuatasano

**13** Na nuhuaji, janiyari puereeta niquishano Casaa niquirii shoniniacu caminiaininiji tacaanonni. Siete nacacaraca quiriquiaari, diez nacajaaracanio. Puetunu na diez nacajaacua jiitariquiaa jiyaniijianuucua shipinijosano nacaqueyari. Puetunu na nacacaacuajanaa, sesacaari nocua naajiotasano quiriquiaa. Na nacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. <sup>2</sup> Janiyara, cuno cua niquishano puereeta niquishano Casaa, cunoori juhua marucuatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuacocua juaashococaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitijinijaa na cajitiriiri jiyaniijiajanaa na quiniuria jiyacua. <sup>3</sup> Cuno puereeta niquishano Casaa siete nacacaracani, niquiriyatu na nacacajinijinoori pishano quiriquiaa na mosaanura juucua. [Cuno puereetuuca piyashi na nacaacua quiriquiaani, saaja cushiriikiiri! Puetunu mijiria quiniaa pueyajanaari jiuujiateree na cushirishacariuhua. Cunora, puetunu nojorijianaari cuno puereeta Casaa tojjiiacara quirii. <sup>4</sup> Jiyacaritij, mijiria quiniaa pueyari cuno naatuhuana Naaqueruucua jacamaturee juhua Pueyasooacara, cuno puereeta niquishano Casaa na jiyatenuucua nojori jiyaniijiajanaa na quiniuria. Pueyari cuno siete nacacaraca puereeta niquishano Casaaacara jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoohonura? Shaaqui.

<sup>5</sup> Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasooacara, Pueyaso na rerequetenurajuhuj. Naa miiriiri na jiyaniishacari nojuajaari socua maninia quiija Pueyasojiniji. Naajaa, nojuajaari jiyaniijia jiyatesaaree saaja cuarenta y dos racara. <sup>6</sup> Naacuajitij, cuno puereeta niquishano Casaaari Pueyaso rerequetenu coteeree. Pueyasooacara rimiaaquereeri. Jesuucua tiuujia pueya sesacareejaariuhuj, jiyocuacaanu Pueyaso quiquionio. <sup>7</sup> Mijiria quiijaca Pueyaso saquiriojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyaniijiajanaa na quiniuria, puetunu tamaatiuucua pueyapuejanaa na jiitianura, puetunu tiquiyocua tiacajinijinio pueyajanaa, puetunu tamaatia rupaaca pocuajaca pueyajuhuj, puetunu ta-

monu jiyacajiniajanaa quijiacanio. <sup>8</sup> Naacuajitij, puetunu mijiria quijiaa pueyajanaari cuno puereeta niquishano Casaacuara jacamaturee na shuquiritianura nojuaja, nojori pueyaso na quiniuucua. Cuno pojori-iri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiitiasano naajioneeginia, cante pocuara mosaaquiaaricuaajani. Pueyaso muerasu sesaca cutaraari cuno naajioneeginia naajiotasaaquiaari jiya shipinishaacarijiyojua, pueyaraanu rishijiaca pa quiniuria.

<sup>9</sup> Cante numaacani, nojuaja cuara tojiiria nio: <sup>10</sup> "Cante Pueyaso jiyatesano quiasocoriquianoni, nojuajaari seetanujuanaa quiasano pueyano quiniutianiya. Naajuhuj, cante nijiniaquetucuaja mueruuta mosocoriquianoni, seetanujuanaa naa mosanutaniyari". Naaratej, Pueyaso pueya cuara puetunu casaa-janaa rejeretajaca quiriia, seetanujuanaa nojori tiushacari Pueyasooocua.

<sup>11</sup> Na nuhuaji, janiyari tamonu puereeta niquishano Casaa niquirii jiyajiniji muetaanoni. Caapiqui nacajaraca quiriqiaaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari. <sup>12</sup> Jiyanoehua cumaacaraca quiriqiaaari, juhua narta puereeta niquishano Casaa, teyano naca pishanotucuaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojuquetanijioree juhua Pueyasooocua, nojori timitianura na naca pishano cushiriinohua puereeta niquishano Casaa. <sup>13</sup> Naajuhuj, nojuajaari na cumaacata miiri jiyajeneta casaa pueya jiuujiatenura nocuaji. Jiyanoehua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. <sup>14</sup> Naa na cumaacata na miiniuucua cuno na naca cushiriinohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriqiaa, teyanote na nacajinia mueruuta pishano na quishacari samiitiarohua saajacuajani. <sup>15</sup> Jiyacaritij, nojuajaari cumaaca niquitiosaa-ree pueya shipinishano Casaa na jiyatenura saminiora, pocuajara na quiniuria, nocuara jacamatiuyashijiaca na pueootenurajuhuj. <sup>16</sup> Naajuhuj, cuno caapiqui nacajaraca puereeta niquishano Casaari na pueya sequeere nojori naajiotanura puetunu pueyacuajanaa narta puereeta niquishano Casaa sesa. Naajiotasaa-reeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaa-reeri. Naacuajitij, puetunu mijiria quiniaa pueyacuajanaa naa naajiotasaa-reeri, tojiyaquishoo pueyacuaja, tojishano pueyacuaja, casamiriaca pueyacuaja, casamijiuniucua pueyacuaja, tama nojoriria poonijionujuacuaja pueyacuajuhuj, poonijiotasano pueyacuajano. <sup>17</sup> Jiyacaritij, canapuate cuno puereeta niquishano Casaa sesa naajiotasano jiitiaaquiriqiaa na cuaqueyacuani, nojoriiri maja na naata na panishano

masenu quiriqiaa na cumaneecata. Naajuhuj, maajaari nojori naata na casami niquitiojonu quiriqiaa na cumaneecata. Pueya jaara cuno puereeta niquishano Casaa sesa jiitiaaquiri naajiotasano na cuaqueyacuaja, na naata na sesa número jiitianu nocua naajiotasano.

<sup>18</sup> Nio niishishaanura maninia, jiyanoehua niishitiajaari panishiya cutara. Niishijiaca pueya cuara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. [Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuj]

#### Borrego Niquiojua cojiniaajiniji pohuatasano

**14** Na nuhuaji, janiyari Borrego Niquiojua niquirii-  
ni, Sión tuhuananuucua nujuaano. Ciento cuarenta y cuatro mil pueyari na cojiriqiaa. Borrego Niquiojua sesaari naajiotasano quiriqiaa puetunu nojori jinijijianaa, na Que Pueyaso sesajuhuj. <sup>2</sup> Na nuhuaji, janiyari casaa tojirii juhua sararajua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuyanojuhuj. <sup>3</sup> Cua tojishanoori quiarinio jaaquequejosano quiriqiaa. Jaaquequenuunaari Pueyaso cajituu tacoji jaaquequenuuriquiaa, cuno cuatro saminio casaa tacojijuhuj, cuno veinticuatro niishijiaca jiyaniijianucua tacojinio. Majaari quenaaja tamonu naata quiriqiaa cuno jaaquequejosano niishiniu nojori jaaquequejonurajuhuj. Saaja cuno ciento cuarenta y cuatro mil pueya cutaraari cuno jaaquequejosano niishiriqiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. <sup>4</sup> Nojoriiri tojetaarucujanaa maaji numuetuqueyashijiaca quiquiaari, saaja pocuaji Tacunaacua jiaatijaca nojori quiniuucua. Naaratej, tiqiyocua Borrego Niquiojua rucuanesacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurajuhuj. Nojoriiri socua Pueyaso timitiasano pueya puetunu Pueyaso saquiriojosano pueyajinijionujuanaa, taa pa shuquiritiaa shushajanaa pa carojosano pa nataujinijicuaani. <sup>5</sup> Nojoriiri tojetaarucujanaa sapojonu niishiyashijiaca quiquiaari, tojetaarucujanaa sesa miyashijiaca nojori quiniuucua.

#### Jiuujianaraca Pueyaso seya pohuatasano

<sup>6</sup> Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaa pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaa pocuajaca pueyarajanaajuhuj, puetunu tiqiyocua tiacajinia quijiaa pueyarajanaano. Na pohuatasanoori seetanu rupaajanaa pueyaracaanura. <sup>7</sup> Pueyaso seruuri mijiria quiniaa pueyacuaja nacariqiaa naatej:

—Pueyaso puerejaca nia quiriquia! [Nojuaja nia maniniuhuaqueetare! [Quiarijiaari na neque-soreesacari pueya! [Nocua nia mojuquetacore nia shuquiritianura nojuaja! [Nojuacuajaari jiyocuacaanu shipinina, nio jiya, puereetuuca shoniacu caminia-juhuaj, puetunu samocua nacaca pacartacojuacajanaano!

<sup>8</sup>Jiyacaritij, tamonu Pueyaso seruuri narta Pueyaso seru nuhuajimiaajuhuj. Naa miriqui sequeriquiaa Roma tiacajinijiiri:

—[Babilonia tiaca tari saniitioshiya! [Cuno puereetuuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhuj. Babilonia tiacani, nojuajaari puetunu sesa casaa na miijosanotajanaa juhua mashaasequetejoquiaari puetunu mijiria quijiaca-janaa. Naacuaajitij, puetunu pueyajanaari tama na cuaqueya miiniu panishanojuaaja miijiacara quiquiaari, jiyanhua nojori jiaatianuta sacuaraatia casaa na miiniuria, taa Babilonia tiacajinia quinia miijioquiaacuani.

<sup>9</sup>Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuj. Mijiria quinia pueyacu nacaree naari:

—[Jyanohua puereeta quiniutianiyari noo pojoriria, canapueete cuno puereeta niquishano na naca pishano cushiriinohua Casaacuara mojuquetacoju juhua Pueyasoocuarani! [Jyanohua puereeta quiniutianiyari noo pojoririajuhuaj, canapueete juhua na naca cushiriinohua niquishano shipinishano Casaacuara jacamatujuacani! [Naajuhuj, puereeta quiniutianiyari noo pojoriria, canapueete na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! <sup>10</sup>[Pueyasoori puetunu cuno pueyajanaa saniitionutaniya jyanohua na juaaniutia! [Majaari quenaaja Pueyaso jiuujiaaniu quiniutianiya nojori! [Pueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! <sup>11</sup>[Naa Pueyaso miitiasacari nojoritij, najacaari pueyaracaanu nojonutaniya! [Majaari quenaaja nojori samaraatasaanu quiniutianiya juuca, niucuanio! [Naquiya miiniuuri naa nojori miitianutaniya pueyaracaanu! [Naa miishaanutaniya cuno pojori, canapueete na naca pishano cushiriinohua puereeta niquishano Casaacuara jacamatujuaca juhua Pueyasoocuarani, juhua nojuaja niquishano shipinishano Casaacuara-juhuaj! [Naa miishaanutaniyaariuhuj noo pojori, canapueete cuno puereeta niquishano Casaa sesa naajiotaniniutianiya tama nocuajaajani!

<sup>12</sup>Cunora, Pueyaso saquirojosano pueyani, canapueete na rootasano tojtiajacani, Jesuucua tiuuniu tarinitiaashijiacajuhuj, nojori cuaara juhujaniya rejeretaara naquiya nojori miishacari.

<sup>13</sup>Jiyacaritij, janiyari rupaa tojirii jiyocuacaanuji naa cua sequyanoni:

—Nio quia naajiotare: “[Quiarijiani, jyanohua shuquiriaatia quijiaca cutaraari cuno macunucua,

canapueete tariucua Jyanijia Jesucristoocua tiuujiaa cusonuunutaniyani!” Pueyaso Sohuuanuuri naa sequeyajuhaaj: “[Taaquiriirini! Nojoriiri samaateya, pueyaracaanu na Jyanijia na poonijionuunu nuhuaji. Maninia nojori miishaanocuaari niyaje-taaquishaanutaniya. Cunora, nojoriiri maninia miishaanutaniya”.

**Pueyaso seya senoosacari pueya juhua nataacuaca nio jiyajiniji**

<sup>14</sup>Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Nyanu niquishano quiriquiaa. Jyanijiaari shipinishano nacaque cushitariquiaari, orojiniji shipinishano. Nataacuaca na senootajara shamatucaja jacatunee mueruu mueturiquiaari. <sup>15</sup>Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajianocua nacaree jyanohuari. Naa na sequeereeri:

—[Quia mueruuta quia canuujure, nataacuaca quia senoonura! [Jiyajinia nataacuacacuaari tari noshuriujua! [Cuaara quiarijia senoosaaria!

<sup>16</sup>Jiyacaritij, cohuaja najaca caco cajianoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

<sup>17</sup>Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucaja jacatunee mueruu mueturiquiaajuhuj.

<sup>18</sup>Na nuhuaji, socua tamonu Pueyaso seruuri tohuatamaa Pueyasoocua catijia casaajiniji. Nojuajaari mani camaru. Nojuajaari narta Pueyaso seruucua nacaree, shamatucaja mueruu muetuyanocua. Na sequeereeri:

—[Quia shamatucaja mueruuta uva quia carojotare, jiyajinia moritiaconuni! [Tari noshuriujacuaja!

<sup>19</sup>Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijiana. Uva jaapuejoree saajajinia quejasano puereetuuca surocohuamaari. Pueyaso tii na rapijiotenutaniya jyanohua na juaaniutia. Cuno uvani, nojoriiri Pueyaso ruuretajaca pueyacuaja. <sup>20</sup>Cuno uvaari rapijiosaaree tucuaaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jyanohua nanaca quiniucua, cabollohua rupacuma puecariquiaari. Pueyaso tojiyashijia pueya nanacaari jyanohua tucuaaanu jaateree juhua moo. Tresciento kilómetro jaatereeri.

**Siete Pueyaso seya, siete naquiya miitiaja na mueetacosacari**

**15** Na nuhuaji, janiyari jiya cajiniocua socua niquitishaareni, cua niishiniuria taa mijiria quinia saniitiosaanu tucuatasaanutaniyani. Cua niquishanoori jyanohua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari.

Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

<sup>2</sup>Janiyari casaa niquiriijaanihuaj juhua puereetuca caminia motiiquojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapue te na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhua. Naajuhua, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinionuuriquiaa. <sup>3</sup>Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijanaa, puetunu quia miishanojuanaari jyanohua maninia, nocuaji jiuujiatesano. [Quiaari seetanujuanaa puetunu cumaacarajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quiijaca pueya Jiyaniijajanaa. <sup>4</sup>[Quiaari puere-sano, Jiyaniijanaa! [Quiaari tojetaarucujanaa manini-huaqueetasano seetanujuanaa! [Saaja quiajaniya cutaraari tojetaarucujanaa maninia miiija pueyara-caanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quia-janiya, maninia quia saniitiojonuucua quia paraajuhua.

<sup>5</sup>Naa cua tojinuu nuhuajitij, janiyari jiyocuacaanu Pueyaso Quishaquijianaa niquirii riatelyanoni, tee cuniqui seetanu Pueyaso rupaaajanaa racatasano quiyacuajani. <sup>6</sup>Cua niquishacari, cuno siete Pueyaso seyari Pueyaso Quishaquijijianaa tohuareetariquiaa, canapue te cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. <sup>7</sup>Jiyacaritij, niquiriyatu cuno cuatro saminio casaajinijinioori miacojua niquitiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyaracaanu rishijia Pueyaso juaaquiatacata mishinijosano quiriquiaari. <sup>8</sup>Jiyacaritij, Pueyaso Quishaquijianaari maatia najacata mishiquimiamia. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitiajaca pueya. Cuno najacaari Pueyaso shacantuuca cumaacajiniji quiriquiaa, naa na saniitiojosacari na paraa.

#### Saniitionujiniji pohuatasano

**16** Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—[Nia siete miacojuajiniji Pueyaso juaaquiaca nia taroosee jiyocua!

<sup>2</sup>Niquiriyatu Pueyaso seruuri juhuacatecara co-teeree. Quiaareeri. Na miacojuajiniji jaapuesee jiyocuaari. Jiyacaritij, jyanohua nootuuca sapueyari pueyacu supueree. Noo pueyacu supuereeri, canapue te nocua naajiotasano jiitariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhua. Jyanohua nootujuaaca sapueyari quiriquiaa.

<sup>3</sup>Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniacu camini-ajinia. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniacu camini-ajinia quijia casaajanaari cusonuuree.

<sup>4</sup>Tercero Pueyaso seruuri miacojuajiniji Pueyaso juaaquiaca jaapuesee puetunu moocujinijajanaa, puetunu samocua nacaca pacartacojuacajinijajanaa. Jiyacaritij, nanacara jataquee puetunujuanaari. <sup>5</sup>Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quiijajuhuanajaj. Majaari quia supueni quiquiaari. Quiaari tojetaarucujanaa maninia. Naa quia miitiasacari quia tojtiaashijiatej, quiaari seetanujuanaa maninia namirii nojori. <sup>6</sup>Nojoricujajari quia saquiriojosano pueyajinijinio nanaca shootejoquiaari pueyaracaanu, quia sequesano caminiujuniamia nanacano. Quiarjia saniniujia, naa miiijaca nojori quiniuucuatej, quiaari nojori raatejoree nanaca. [Maniacuaja Jiyaniijianaa!

<sup>7</sup>Jiyacaritij, janiyari Pueyasoocuara catijaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacarajanaa Pueyasonaa. Quiaacuajaari maninia saniitioree quia tojiyashijia, taa quia sequequiaari tariucua-caanu nojoricujajani, quiaari quia tojiyashijia saniitionutaniya. Quiaari seetanujuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

<sup>8</sup>Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jyanohua naseecara quiquii, pueya na catijanura juhua mani. <sup>9</sup>Naa pananu januuca jyanohua nasaatiatej, pueyari jyanohua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniujiniji, nojori tacatonuhua noojia Pueyasoocua, nojori jiyaniijara nojori jiyatenura Pueyaso. Pueyaso rerequetetere saajaari.

<sup>10</sup>Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinohua puereeta niquishano Casaa cajishaqui na jaapueseeeri, tee cuniqui juhua jiyaniijajanaa na cajiriquiaacuajani. [Jiyacaritij, puetunu na jiiitasano jiyacajanaari ninishiquiria quiquii! Cunora, na pueyari na niti saaquioriquiaa jyanohua nooeta naquiya na mi-

iquiosacari. <sup>11</sup> Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujuaaca sa-pueyaraca nojori quiniuucujuhua.

<sup>12</sup> Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuuca Eufrates moojinia. Moori joojequetaquee jiya pajamaji niriqiano jiyaniijianucua niuutijara.

<sup>13</sup> Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohuareetariquiaa juhua cohuaniquia niquishano naatuhuaana Naaqueru rupaamaji. Tohuareetariquiaajaariuhua na naca pishano cushiriinohua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaari mijiria quiniaa pueya sapojoriquiaacuaja, nojori tojinuria na naca pishano cushiriinohua puereeta niquishano Casaa. <sup>14</sup> Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatasano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocuaajari tariucuacaanu niishiriojoquiaari naa cuno juuca na miaquetoojonura nojoritia. Naa paniquiaaricuaajari na paraa na puecoonura.

<sup>15</sup> Jiyacaritij, janiyari pa Jiyaniijajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejojua tiuquiquiaa casami nohuasenuucuaacuaani, juhua-janiya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhua-sunucua quiri cua niquiaraari.

<sup>16</sup> Cua Jiyaniijia sequesano cua tojinu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaajinia, nojori rerejosaqui sesaari, “Armagedón”.

<sup>17</sup> Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitujiniji, janiyari rupaa tojirii naa nacaanoni:

—Tari miishaaree puetunujuanaacuaja!

<sup>18</sup> Jiyacaritij, miacanaari nunujuree. Jiyanohua majacureeri! Cojuataari quiriquiaa puereeta. Rijiaari tojetaarucujanaa jiyanohua jiuuquiujiutaree. Pueyano shipinishaanujiniji, majaari naa rijia jiuuquiujiutianu quijia juhua nio rijia. <sup>19</sup> Naa rijia jiuuquiujiutianuucua jiyanohuatej, cuno puereetuuca tiacaari neequeresetaquee! Jiuujianaracara raqitijiquiri. Puetunu jiyacinia tiacajanaari niyarequetaree. Jiyacaritij, Pueyasoori

cuno puereetuuca Babilonia tiaca saniitioree, taa tariucuacaanu na niishiriojoquiaari cuno juuca na sanitationuracujani. Jiyanohua na juaniutia na saniitioreeri! Niya sequeshiya Babilonia tiacatani, cunoori Roma tiacacuaja. <sup>20</sup> Jiyacarijuhuaj, puetunu shoniacu caminiajina jiya tucuaatiajacajanaari shaajequee, puetunu tuhuananuhujanaano. <sup>21</sup> Naajuhua, jiyocuacaanuji jiyanohua puereetujuaaca miacanajaa shiniitijiaacaari totere pueyacua. Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianuucua shiniitijiaaca miacanajaatej.

**Miriqui pohuatasano Roma tiacajiniji, juhua paanatu**

**17** Na nuhuaji, cucua nimiaari niquiryatu cuno siete Pueyaso seyajinijinio, canapueete siete miacoju patootariquiaacuajani. Cua sequeeseeri:

—Miji quia nimia. Janiya quia niquitiniutianiyani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. <sup>2</sup> Mijiria jiyaniijianucuaari cuno Maaji numuetucujuuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhua.

<sup>3</sup> Pueyaso seru niquitiniuria janiya na niquitiniu panishano, nojuajaari cua sohanu jiyataare cariquia jiyajinia. Janiyari tii niquishii Maajini, naatuhua puereeta niquishano Casaa nijinia cajiyano. Queraatia sesacaari cuno naatuhuaana Casaa cuaqueyacu quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracano. <sup>4</sup> Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitija casa cushitiariquiaari: orojiniji shipinijosano casaa, shanohua saijiniji shipinijosano tiujiaujuhua, noturu shipinijosano saijiniji tiujiaunio. Orojiniji shipinishano miacoju mueetariquiaari. Mishaja quiriquiaari puetunu sacuaraatia na miijosano casaatajanaa, numuetucujusaanu porocua na quiniuucua. <sup>5</sup> Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuuca Babilonia tiacani. Janiyari paanatumuri nucuani, puetunu mijiria sacuaraatia miishanojuanaa coretanijiojua nucuano”. <sup>6</sup> Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanohua timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanohua jiuujiatereeni. <sup>7</sup> Pueyaso seruuri jiyacari cua sequere:

—¿Casaara quia jiuujiateya nocuajini? Quiarijia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracano, Maaji cajitiya na nijiniani, puetunu cunojuanaari miriqui. <sup>8</sup> Cuno puereeta Casaa quia niquishanoni, cunoori tariucuacaanujiniji quijia quiquiaari. Quiarijia

saniniuujia, majaari tari na quiniu. Naajaa, quera tacanutaniuhua cuno puequeetuujü raamajiiri, see-tanujuanaa puetunujuanaa na shaajasaanuhuaa cutara. Pueyaso ruuretajaca pueyari jyanohua shiriiquitiuniutianiya nojori jaara cuno puereeta niquishano Casaa niquiri tacatehuano, teyanote tariucuacaanu quiija quiquiaaricuajani, quiarijia saniniuujia majaari na quiniu. Jiya shipiniyaquishacarijia, cuno pueya sesacacuajaari Pueyaso saquiriojosano pueya sesaca naajiotasaqui naajiotasoo quiquiaari.

<sup>9</sup>Cante niishijiani, nojuaja cuaara niishiiria cua pohu-atasano. Cuno puereeta niquishano Casaa, na siete nacacani, cunoori siete jiyaca jyaniijianucua, mariyata siete tuhananuhua, teyanooqua cuno Paanatu cajiyacuajani. <sup>10</sup>Cuno siete jyaniijianucujinijini, cinco nojorijinijinoori tari shaajasaquiaari. Cuno caapiqui cureenoinijini, niquiriyatuuri jyaniiijia quiya quiarijia. Tamonuuri supueyojua. Nojuaja jaara supuere, saaja rupaquiija rishiniutianiyari jyaniiijia na quishacari.

<sup>11</sup>Cuno puereeta niquishano Casaa, teyanote tariucua-caanu quiija quiquiaaricuajani, nojuajaari cuno cinco shaajasano jyaniijianucujinijinio quiquiaaricuaja. Majaari quiarijia na quiniu. Na nuhuaji supenutaniuhuari octavo jyaniiijia na quiniuria rupaquiija. Na nuhuaji shaajasaanutaniya cutaraari.

<sup>12</sup>Cuno diez nacajaa quia niquishanojaniuhuj, cunoori diez jyaniijianucuaranocujaja. Nojoriiri cumaca niqutiosaanutaniya saaja niquiriyatu hora jyaniijianucua nojori quiniuria cuno puereeta niquishano Casaata. <sup>13</sup>Cuno diez jyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jyaniiijajanaa cuno puereeta niquishano Casaa quiniuria. <sup>14</sup>Nojoriiri Borrego Niquiojuata miaquetojonutaniya. Borrego Niquiojuuari nojori shocotanutaniya saaja, seetanujuanaa jyaniiijajanaa na quiniuucua. [Nojuajaari puetunu jyaniijianucujajanaa jyaniiijia! Natta quiniaa pueyari Pueyaso saquiriojosano pueya, Neyanu tojitiajacatuhuj.

<sup>15</sup>Pueyaso seruuri socua cua sequere:

—Quiaacuajaari cuno Paanatu niquirii puetunu mohuacaacuajanaa cajiyano. Cuno mohuacaacuajaari queraatia tiaca, tamaatiuucua pueyapue, tamaatia rupaaca pocuajacajuhuj, tamaatia jiyacajinia quiijaca pueyanio. <sup>16</sup>Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucujanaa. Na cartetunutaniyari. Tojetaarucujajanaa juhua-su na tiujiatunutaniyari. Nojoriiri cuno Paanatu mi-aquenutaniya. Na nuhuaji, na nuchua catijiatunutaniyari. <sup>17</sup>Pueyasojuaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na miishaanuracuajani. Naajuhuj, Pueyasoori cuno diez jyaniijianucua niishiriojotenu-taniya jatiqui. Naacuajitij, cuno jyaniijianucuaari rojotoonutaniya nojori cuaara cumaquiiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuateesaanu-

taniya taa na sequequiaaricuajani. <sup>18</sup>Naajuhuj, cuno Paanatu quia niquishanoni, nojuajaari cuno puereetucua Roma tiacacuaja, miriqui sequeshiya Babiloniatani. Nojuajaari puetunu mijiria jyaniijianucujajanaa tojitiquiaa nojuaja.

### Babilonia tiaca catetanujiniji pahuatasano

**18** Naa Pueyaso seru niqutiniu nuhuaji janiyatej, janiyari socua tamonu Pueyaso seru niquirii jiyocuacaanu roseyanoni. Jyanohua cumaacaracaari quiriqiaa. Na shacantuuca cumaacaari jiya cuhatariquiaa. <sup>2</sup>Jiyocuacaanu na rupaa paaretaree jyanohuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—[Tari saniitiosaaree Babilonia tiaca! [Juhua niyarequetasaareeri cuno puereetucua tiaca! Samaruhua quiqiora jatanishaaree quiarijia saniniuurijia. Naaquiya quiqiora quiniutianiyajariuhuj, puetunu pueya soosano pueresano jaacuatujuaca casaajanaa quiqioranio. <sup>3</sup>Puetunu jiyacajinijiojuanaa pueyari sajonuusaquiaari Babilonia tiacajinijinio niishitiojosanota, juhujajaniya sacuaraatia miijaca nojori quiniurijuhuj, juhua mashaaseca. Naajuhuj, jiyaca jyaniijianucuaari Babilonia tiacajinia sacuaraatia miijosano miijioquiaajuhuj, cuno paanatu shiniujuniuucua nojori. Babilonia tiacajinia quiniaa pueyari puetunu na panishano casamijanaa masejoquiaa puetunu jiyacajinijijanaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niqutiojonuujuaca pueyari jyanohua cumaneecara pueya.

<sup>4</sup>Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—[Cua muerasunaa, cuno tiacajiniji nia quiojore, niaa mariqui sesa miijacara quiriouhari, cuno sesa miijacania cojiniuucua! Nojorijiniji nia carajere, niaa mariqui puetunu nojoritijajanaa cojiritiasaare naquiya miiniuri. Nojoricuajaari quera saniitioshiya. <sup>5</sup>Cuno tiacajinia sacuaraatia miishanoori puera jyanohua caneyaree. Juhua tuhananuuri maashiyaree jiyocuacaanura. Pueyasocuajaari sacuaraatia nojori miijosano niishiya. Majaari socua tari na naata rejeretanu. <sup>6</sup>Babilonia cuaara namishaaria taa naquiya na miijioquiaa tamasacacuaani. [Nojuaja cuaara saniitionu caminiujiushaaria saniniuujia, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijaca nojori quiniuria juhua nojuajuhuj. Cunora, nojuaja cuaara puetunu Pueyaso juaaquiicajanaa raatesaaria, tama na suhuocojinijajaja mishinishanoni. <sup>7</sup>Naatej, taa tama na cuaqueyajaaja na shuqiritiquiaa sacuaraatia na miishacaricaani, saniniuujia cuaara naa jyanohua miitiasaariajuhuaj. [Jyanohua tama na cuaqueyajaaja timitiaja na quiniuucujuhuj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriatiani, cumaacaraca maaji, pueya tojishano jyaniiijia. Janiyari

maja mashiquioni. Majaari quenaaja cua taraajenu quiniutianiya".<sup>8</sup> Cunora, niquiriyatu juucajiniaja, cuno Paanatuuri jiyanoehua taraatia miitiasaanutaniya. Jiyacaritij, cusonuunuri quiniutianiya, naquiya miiniu, miaajenujuhuaj. Jiyacari catijiatasaanutaniyajaari-uhuj. Jiyanoehua cumaacaraca Jiyaniijia Pueyaso quiniuucua, nojuajaari naa saniitionutaniya cuno Paanatu.

<sup>9</sup> Mijiria jiyaniijianucaaari sacuaraatia miiniuria cojiquiaa cuno Paanatucaaja, tama nojori cuaqueyajaaja nojori shuquiritiniuria. Cunora, nojoriiri jiyanoehua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonu-unutaniya.<sup>10</sup> Nojoriiri na puerenuta na shootianutaniya tucuaaanuji, nojori mariqui saniitiosaarejaari-uhuj. Nojoriiri jiyacari naa sequenutaniya Babilonia tiaca:

—Juhuej! Quiaa taraatia miishiya tiaca maniniuniaa! Quiaari jiyanoehua cumaacaraca quijia juucua Babiloniaa! Quiaari canashiyaquiji saniitiosaaree!

<sup>11</sup> Puetunu jiyacajinijanaa, cumaneecara na casami niquitiojonaa pueyari Babilonia tiacaacua nujuquetunutaniya. Nojoriiri jiyanoehua taraatia quiniutianiya nojori niishishacari, nojoritiucua tee na casami niquitiojore na cumaneecarani.<sup>12</sup> Tucuaaanuji Babilonia tiacajiniara nojori nitiasano casami quijiaari nio: oro, plata, jiyanoehua panishano saijihuaj, noturu shipinijosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaaruque toqueyajuhaaj, juhua jiyaniijia cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiajajiniji shipinijosano casamijihuaj, shanohua naanajiniji shipinijosano casaminio. Nitiasaaquiaajaariuhua bronzejiniji shipinijosano casami, cumueeca casaajiniji shipinijosano casamijihuaj, shanohua mármol saajajiniji shipinijosano casaminio.<sup>13</sup> Naajuhuaj, nio shanohua jaanujua casami: canela, muesu nunacuhua, catijasacoriquiano shanohua jaanujua casaa, mirra-juhuaj, cuaqueyacia shuquiuiutiasano shanohua jaanutajano. Nitiasaaquiaajaariuhua jereeca uva caaca, shiyocua, maninia cashojuajuhuaj, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasacoriquiano shipinijosano casaano, cumaneecara niquitiojosacoriquiano pueyajuhaaj seya nojori quiniuria.<sup>14</sup> Jiyacaritij, Babilonia tiacaari naa sequesaaanutaniya:

—Majaari socua quia mioonu quiniutianiya jiyanoehua quia maniniucasano naana jajau, jiyanoehua quioojia jiaatiasano nocuani! Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanoehua cumaneecata quia masesano casaminio!

<sup>15</sup> Puetunu cuno casami niquitiojonaa pueyajanaari jiyanoehua casamiriaca quia Babilonia tiacajinia quinaa masejonuucua nojori casami. Maja nojori saniitiosaanurajuhaaj, cuno pojoriiri tucuaaanuji na

puerenuta nocua nujuquetunutaniya. Nojoriiri na sa-puenuta naa na sohuarejotanutaniya:

<sup>16</sup> —Juhuej! Babiloniaari tiaca maniniu quijia juucua! Jiyanoehua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohujaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijosano saitiajuhuaj, shanohua niquishano saitianio.<sup>17</sup> Jiyanoehua queraatia puetunu na jiitiasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapuee shoniniacu caminia jinia poonijionaa na cumaneecaracuajani, nojoriiri tucuaaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquicua tiaca tacatajajiniaqueya, rucoonaa pueya, buquejinio poonijionaa pueyajuhaaj, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari.<sup>18</sup> Nojori niquishacari najaca nujaano jiya cajiniocuara, nojoriiri naa sariyocuatere:

—Socua tamonu tiacateeri quia juhua cuno Babilonia tiacajuhaaj? Shaaqui!

<sup>19</sup> Jiyanoehua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuatere:

—Juhuej! Babiloniaari tiaca maniniu quijia juucua! Puetunu shoniniacu caminiajina buque jitianaa-janaari jiyanoehua casamiriaca quia, jiyanoehua casamiriaca Babilonia quiniuucua! Quiarijia saniniujia, canashiyaquiji puetunujuanaari shaajasaaree!

<sup>20</sup> Jiyacaritij, Pueyaso seruuri naa nacaree:

—Nia shuquiriri, jiyocuaaanu quijiacanaa! Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhaaj, Pueyaso sequesano caminiujiaunio! Pueyasocuaajaari niaacua namirii Babilonia!

<sup>21</sup> Jiyacaritij, cumueeca Pueyaso seruuri jiyanoehua puereetuca saajia paree, juhua trigo jajau jacanojotaja saajia. Shoniniacu caminiajina na jatasacari, naa sequereeri:

—Taa cua jatasano saajia shaajamaa shoniniacu caminia queronijiniacuaani, quiaari naa shaajasaanutaniya canashiyaquijihuaj, Babilonia tiacanaa! Majaari socua quia niquishaanu quiniutianiya!<sup>22</sup> Quia nuucuaari tojetaarucuaajanaa sanaaca quiniutianiya! Majaari arpa taquiniojonu tojishaanu quiniutianiya socua, turequenaco jonenenuunujuhuaj, trompeta jonenenuunio! Puetunu tamaatia poonijosano niishijiaa juaashiquiaraca pueyajanaari shaajasaanutaniyajuhaaj! Majaari quenaaja niquiriyatu cureenu quiniutianiya quia quishaqui! Naajuhuaj, majaari socua riquiniunu tojishaanu quiniutianiya!<sup>23</sup> Majaari quenaaja niquiriyatu samaritiu niquishaanu quiniutianiya noshiyano quia quishaqui! Naajuhuaj, majaari camishacari queranacunuunu cojuatunenu tojishaanu



quiniutianiya socua! [Quiaari naa saniitiosaareequij, jiyanhua cumaacaraca quia casami niquitiojonaa pueya quiniuucua puetunu jiyacajinijanaa! [Naa-juhuaj, quiaari puetunu jiyacajinia quijiaca pueyjanaa shimiojona, sapojosano nojori quiniuria puetunu sacuaraatia casaa quia miiijosanotajanaa! <sup>24</sup> [Quiarijia saniniuujia, quiocua tiuutiashiyari pueyara Pueyaso sequesano caminiujuniasa puecoosaanu, Pueyaso saquiriojosano pueya puecoosaanujuhuj, puetunu jiyacajinijanaa pueya puecoosaanunio!

**19** Naa cua tojiniu nuhuajitij, janiyari jiyocuacaanu tojirii queraatia rupaacani. Naa sequeturiquiaa jiyanhuari:

—[Jyanohua maninia pa Pueyaso! [Nojuaja pa shuquiritiare! [Nojuacuajaari pa Jyanoojia! [Nojuajaari jyanohua shacantuuca, tojetaarucujanaa maninia miiija na quiniuucua! [Puetunu cumaacaracajaari-uhuj! <sup>2</sup> [Maninia na niishiniuucua puetunu cuno Paanatu miishano sacuaraatiajanaa, nojuajaari maninia na saniitioree! [Cuno Paanatuuri jiyacua quijiaca pueya sesoquiaari tojetaarucujanaa, sacuaraatia na miiijosano na niishitiojosanota! [Pueyasoori cunora na saniitioree! [Naajuhuj, Babilonia puecoonuucua Pueyaso tojtiajaca pueya, Pueyasoori na namirijii-uhuj!

<sup>3</sup> Jiyocuacaanuji rupaaca cua tojishanoni, nojoriiri na sequerohuacuhuj:

—[Jyanohua maninia pa Pueyaso! [Nojuaja pa timitiariquia pueyaracaanu! [Pueyaracaanu cuno Paanatu saniitiosacari, majaari na najaca turetano quiniutianiya quenaaja!

<sup>4</sup> Cuno veinticuatro niishijia jiyaniijianucua, cuno cuatro saminio casaajuhuj, nojoriiri jiyacari jiyocuara jacamaturee Pueyasooacara. Nojoriiri naa timitiaree Pueyaso, cante na shacantuuca cumaacajinia cajiriquiaacuajani. Nojoriiri naa na sequeturiquiaa:

—[Cuaara naa quiiriatej! [Pa Jiyaniijia cuaara timiti-asaaria pueyaracaanu!

<sup>5</sup> Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—[Pa Pueyaso nia timitiariquia, puetunu na tojtiajaca pueyanaa! [Nojuaja nia shuquiritiare, tojishano pueyanaa, niajanijajuhuj, tojishoo pueyanaa!

#### Borrego Niquiojua camishocoriquiano maaji maniniushishacari

<sup>6</sup> Jiyacaritij, janiyari queraatia pueya tojirii jyanohua nacaanoni, juhua puereetuuca sararajua, juhua miacana majacunujuhuaj. Puetunu nojorijianaari naa sequeriquiaa:

—[Jyanohua maninia pa Jiyaniijia Pueyaso! [Nojuaja pa timitiariquia pueyaracaanu! [Nojuacuajaari Jiyaniijianaa! [Puetunu cumaacaracajanaajuhuj! <sup>7</sup> [Pa shuquiriri! [Pa timiri! [Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! [Cunora, nojuaja pa timitiare jyanohua! Necoranoori tari maniniushirii na caminiuria. <sup>8</sup> Maniniuqui lino toque cushitishaareeri,

cohuajaque shacantuque. Necoranoni, nojoricuajaari puetunu nocua tiuujia pueyjanaa. Naajuhuj, cuno cohuajaque na toqueni, cunocujaari puetunu maninia nojori miiijosanojuanaa.

<sup>9</sup> Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapueete Borrego Niquiojua camishacari queranacujajiniara masuusani!”.

Naa cua sequeree socuaari:

—Cua sequesani, cunoori seetanu Pueyaso rupajanaa.

<sup>10</sup> Jiyacaritij, janiyari Pueyaso seruucua mojuqueta-reeni, juhua Pueyasooacara, nojuaja cua timitianura juucua. Cua sequequee saajaari:

—[Maja pueyanonaa! [Maja naa quia miiniu! Janiyari nareja Pueyaso seruni taa quiajanijacuaani, juhua quia tapueyocujuhuj, noo pojori canapueete pa Jiyaniijia Jesujiniji pohanu tarinitiaashijiacani. [Pueyasooacara quia mojuquetare cutara, quia timitianura nojuaja! Puetunu Jesujiniji pohanu tarinitiaashijiacani, cunoori Pueyaso Sohanu niishitishano na pohanatanaa, janiya, niajanijajuhuj.

#### Cohujahuana caballo nijinia cajiniijiniji pohanu

<sup>11</sup> Na nuhuaji, janiyari jiyocuacaanu Pueyaso quiquio niquirii tariucua riatasanoni. Janiyari tii niquirii cohuajahuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miiija”, “Seetanu sequesajanaa”. Naari na sesaca. Tojetaarucujanaa maninia miiija na quiniuucua, puetunu niishijiajanaajuhuj, nojuajaari seetanujanaa maninia saniitiojua sesa miiijia. Naajuhuj, majaari najuhua na miaquetoojonu na paraata.

<sup>12</sup> Puetunu casaajanaa niquijia na quiniuucua, na namijiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujanaa Jiyaniijianaa na quiniuucua. Tamonu na sesaari naajiotasano quiriquiaajuhuj. Cuno sesaari tama na niishishanojuaaja cutara. <sup>13</sup> Na toqueeri nanacatuque quiriquiaa. Nojuajaari tariucuaanu nio sesaraca quijiacuaja, “Pueyaso Rupaa”. <sup>14</sup> Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijinia cajituriquiaa. Naajuhuj, nojoriiri linojiniji cohuajajuijasano toqueyaraca quiriquiaa, jyanohua cohuajaqueya tojetaarucujanaa. <sup>15</sup> Nojori Jiyaniijianaa rupamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajinijanaa na tojtiaashijia na puetujutajara. Nojuajaari jiyacari nojori Jiyaniijianaa quiniutianiya, nojori na jitianura jyanohua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijioshiya na caaca shoonuracuaani. <sup>16</sup> Na tucaque toqueecua, na ruhuajacuucujuhuj, naa naajiotasanoori quiriquiaa: “Jiyaniijianucua Jiyaniijianaa”, “Camarucua Camarnujanaa”.

<sup>17</sup> Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujuaca casaajanaa jiiquioonuuriquiaa jiyanoehua, teyano jaacuatujuacate shu miojonuujuacacujani. Naa cuno jaacuatujuaca casaa se-queriquiaari:

—[Miji, niya nia rerejosee! [Pueyasoori nia queranacutenutaniya! <sup>18</sup> [Nojuajaari queraatia shu nia mi-anuutenutaniya! [Cuno shuuri jiyaca jiyaniijianucua shu, soldadoehua camarucua shu, jiyanoehua cumueeca puereyaquijiaca shu, caballoehua shu, na nijinia cajituniana pueya shujiuhuj! [Camarucuaaju pueya shuuri quiniutianiyajuhuj, poonijjotesano pueya shu, to-jishoo pueya shujiuhuj, tojishano pueya shunio!

<sup>19</sup> Jiyacaritij, janiyari cuno puereeta niquishano Casaa niquirii, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriqiaa na miaquetojonura cohujohuana caballo nijinia cajijanaa, nata quiniaa na soldadohuatanio. <sup>20</sup> Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacarca quiriqiaacuaja mijiria quijiaca pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaca pueyatej, nojori nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naajuhuj, nojori juhua cuno puereeta niquishano shipinishano Casaacuara mojuquetacoju quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucujaja. Nojori tii pueyaracaanu naquiya miishaanutaniya. <sup>21</sup> Puetunu nojoritia quiniaajanaari saniniuujia puecoosaaree nijiniaquetucujaja mueruuta, teyanote cohujohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujuaca casaajanaari nojori shu tooquioree jiyanoehua.

#### Mil marijara Satanás morosaanujiniji pohuatasano

**20** Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuuju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. <sup>2</sup> Pueyaso seruuri cuno naatuhua Naaqueru juhua cohuaniquia niquishano quiasae. Na morojoreeri mil marijara. Nojuacuajaari cuno tariucuaaanu Soconu, samaruhua jiyaniijiajanaatuhuj. Na sesaari "Satanás". <sup>3</sup> Maninia na morojonu nuhuaji, Pueyaso seruuri puequeetuuju raama na jartaree. Raatiotiu mishiquiorohuari. Tiootiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapojyaquiniucujaja cuara na shocojorejaatijia mil marijia. Cuno mil marijia jaara na shocojore, rupaquijjara cartesaanutaniuhuari na saniitiosaanuhuarajanaa cutara.

<sup>4</sup> Janiyari jiyacari queraatia pueya niquirii jiyaniijia cajitiucujania cajitiuyanoni. Nojori nequesoreenaara Pueyaso jiyatesano pueya quiriqiaa, mijiria quijiaca nojori jitianura. Janiyari noo pojori sohuanuhua niquiriijiaaniuhuj, canapue nacareesaquiaricujani nojori poojotanuucua pa Jiyaniijia Jesujiniji, Pueyaso rupaa tojtijajaca nojori quiniucujuhuj. Nojori cutaraari cuno na naca pishano cushiriinohua Casaacuara jacamatuyaquiquiaari tojetaarucujanaa, juhua nojuaja niquishano shipinishano Casaacuara-juhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. [Cua niquishacari, nojori cuaniquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. <sup>5</sup> Saniniuujia, narta macunucuaari maja na samiitianijiosaanu quiriqiaa cuno mil marijia cuara shocojorejaatijia. Nio macunucua samiitianijiosacari cua niquishanoni, cuno coteenujanaa Pueyaso samiitianijiosacari pueya. <sup>6</sup> Shuquiriaatia quijiaca cutaraari noo pojori, canapue Pueyaso samiitianijionutaniya coteenujanaacuajani. Nojori jiyacari tojetaarucujanaa maninia quijiacara jatanishaanutaniya pueyaracaanu rishijiacara nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianuhua cusonu. Saniniuujia, nojori pueyaracaanu shamaatia timitianutaniya Pueyaso, Cristonio. Naajuhuj, nojori jiyaniijianucua quiniutianiya Cristota, mijiria quijiaca nojori jitiiasacari cuno mil marijara.

#### Sesaaca saniitiosacarijanaa cutara

<sup>7</sup> Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. <sup>8</sup> Nojuaja jaara tohuatesaare, quianutaniyari puetunu jiyacajinia quijiacapueyanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenuutaniya, puetunu nojori soldadohuatajanaa, nojori miaquetojonura pa Jiyaniijia, puetunu na pueyatajanaanio. Nojori soldadohuari jiyanoehua queraatia pueya quiniutianiya, juhua shoniniacu caminia shuriuquico paajia jaaquia. Majaari na naata serojosaanu.

<sup>9</sup> Cua niquishacari, tojetaarucujanaa jiyanoehua queraatia pueyari nijioriquiaa. Jiya pueturiquiaa puetunujuanaari, juhua tereya nojori quiniucua. Nojori Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuacaanuji tinishaare nojoriicua. Puetunu cuno pueyanaari catijiasaaree tojetaarucujanaa. <sup>10</sup> Satanás, cante puetunu cuno pueyanaa sapojoreecujani, nojuajaari caminiajinia jatasaaree tee cuniqui mani noshiya azufretacujani. Tariucuaaanu tii jaque-roosaquiaricujajaari na naca pishano cushiriinohua Casaa, narta puereeta niquishano Casaanio. Cuncuaajari mijiria quijiaca pueya sapojocuaaricujaja, na naca cushiriinohua Casaacuara jacamatujuaca nojori quini-

uria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

### Macunucua nequesoreesacari cohuaja cajitiu tacoji

<sup>11</sup> Na nuhuaji, janiyari Jiyaniijajanaa cohuaja puereetuuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. <sup>12</sup> Jiyacaritij, janiyari puetunu macunucujanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijica pueyanio. Jiyacaritij, na cohuaja cajitiujinia cajiniaari na nequesoreetuneecca riataqueree, socua tamonu nequesoreetuneeenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucujanaari nequesoreesaaree puetunu nojori miishanojinijijianaa, taa cuno nequesoreetuneeccajinia na naajiotasaaquiaaricujani. <sup>13</sup> Cua niquiara, macunucua quiquiojinia racatasano puetunu cusonuuno sohuanuhujanaari na cuaqueya rupuetesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricujani. <sup>14</sup> Na nuhuaji, Cusojuana, macunucua Quiquiojuhuaj, nojoriiri mani noshiyano caminiajinia jaqueroosaaree. Canapuate cuno mani noshiyano caminiajinia quejoosocoriquiano pueyacujani, nojoriiri cusonuunu pacuteriquianocujaja. <sup>15</sup> Naacuajitij, canapuate Pueyaso samiitianijiosocoriquianohua nequesoreetuneejinia naajiotasoo quiriqiaani, nojoriiri mani noshiyano caminiajinia quejoosaaree pueyaracaanura.

### Quiarinio jiya cajiniocujiniji pohuatasano, quiarinio jiyajinijinio

**21** Na nuhuaji, janiyari quiarinio jiya cajiniocua niquiriini, quiarinio jiyanio. Coteenujanaa jiya cajiniocuaari tari shaajasano quiriqiaa, jiyanio. Naajuahuaj, majaari shoniniacu caminia quiniu quiriqiaa tari. <sup>2</sup> Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriqiaari, juhua neyacarano camishocoriquiano niyacoo. <sup>3</sup> Naajuahuaj, janiyari Jiyaniijajanaa cajitiujiniji tojirii jiyanoehua naca-nuni. Naa sequeriquiaari:

—[Pueyaso Quiquioori pueya tajinia quiya tari! [Nojuajanaari nojoritia quiniutianiya! [Nojoriiri na pueya quiniutianiyajuhuj! [Nojuajaari nojori cojiniutianiya, nojori Jiyaniijajanaa na quiniuria, maninia na jitianura nojori! <sup>4</sup> [Nojuajaari puetunu nojori namijiaacajanaa tuujunutaniya! [Jiyacaritij, majaari pueya niishiniu quiniutianiya shaajenu, sapuenu, taraajenu, nootununo! [Puetunu cuno taraatia miiniucujajaari tari shaajasano quiriqiaa!

<sup>5</sup> Na nuhuaji, Jiyaniijajanaa cajitiujinia cajiniaari naa sequeree:

—[Cua tojiri! [Janiyari quiariniora miijia puetunu casaajanaani!

Cua sequereejariuhuj:

—Cua sequesano quia naajiotare. Seetanujuanaari cua sequesano. Janiyacuajaari cua sequesano tohua-teequiaa pueyaracaanuni.

<sup>6</sup> Cua sequerohuariuhuj:

—Cua sequesano cua miishocoriquianoni, janiyari tari na tucuatatee miiniuni. Janiyari quijiajuhanani. Janiyari pueyaracaanu quiriqianojuhuaj. Janiyari puetunu casaajanaa coretanijiani, na shaajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohuanucujaja. Janiyari nareja na niquitioquiaani. Majaari na sami cua masenu quiquiaa na ratuna. <sup>7</sup> Cante puetunu casaajanaa rejeretaja quijiani, cua tojijia na quiniucua, nojuajaari puetunu cua jitiananojuanaa jitian quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujaja. <sup>8</sup> Sesa pueya saniniuuja, nojoriiri puetunu quejoosariquianojuanaa azufreta noshiyano mani caminiajinia. Naa quejoosaanutaniyani nio pojori: Pueyaso tojtiaashijiaca pueya, puerejaca nojori quiniucua, Pueyaso Rupaacua tiuyashijiaca, soosano pueya tama sesa nojori miiniucujaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacura jacamatujuaca juhua Pueyasoocura, puetunu cuaracashijionujuaca pueyajanaano. Puetunu cuno pojorijianaa jaara nequesoreesaare, nojoriiri puetunu taanusaanutaniyajanaa Pueyaso shuriucujaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujajaari sequeshiya, “pueya pacutesacariuhua cusonu”.

### Quiarinio Jerusalén tiacajiniji pohuatasano

<sup>9</sup> Janiyacuajaari tari nia pohuataree cuno siete Pueyaso seyajinijini, canapuate siete miacojua patootanaa quiquiaaricujani, mishaja Pueyaso saniitotajata. Niquiriyatu nojorijinijinioori cucua nimiaa. Nojuajaari cua sequeese:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuj.

<sup>10</sup> Jiyacaritij, nojuajaari cua sohuanu jiyataree jiyanoehua puereetuuca jiyaconaja tuhuananuucua. Tiji cua niquitirii cuno puereetuuca quiarinio Jerusalén tiacaari, Pueyaso shuriucujaji roseyano. Tojetaarucujanaa shanohua maniniushitishano quiriqiaari.

<sup>11</sup> Nenecuariquiaari Pueyaso shacantuucua cumaacata. Na nenecuanuuri juhua jiyanoehua panishano saajia nenecuanu quiriqiaa, juhua jaspe saajia. Maatia niquishiyari na tamajiria, juhua cohuaja motiiquio.

<sup>12</sup> Cuno tiaca shocua matacaari jiyanoehua puereetuuca quiriqiaa, jiyaconajajuhuj. Tiaca shocua matacaari doce tiotihuvaraca quiriqiaa. Niquiriyatu Pueyaso seruuri puetunu cuno tiotujinijijianaa nujua-

turiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tootihuacuajanaa naajiotasano quiriquiaa. <sup>13</sup> Jiuujianaraca tootihuuari pananu muestasamajiria quiriquiaa, cuno tiaca matacaacua. Socua jiuujianaraca tootihuuari quiriquiaa pananu muestasamaji miaquetajara. Naajuhuj, socua jiuujianaraca tootihuuari pananu muestasamaji muenecara quiriquiaa. Socua jiuujianaraca tootihuuari quiriquiaa pananu tiuquishocora. <sup>14</sup> Cuno tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

<sup>15</sup> Cuno Pueyaso seru cuata pocoojoriquiaani, nojujaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tootihuua, tiaca shocua matacanio.

<sup>16</sup> Cuno tiacaari jiyanhua tucuhuaa quiriquiaa. Na cajiniocuaari mariyata juhua na tucuhuaa quiriquiaa-juhuaj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuaa, na jyaconaja, na cajiniocuanio. <sup>17</sup> Na nuhuaji, tiaca mataca shanacujureejaariuhuj. Setenta y cinco metro jiitariquiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiriquiaa. <sup>18</sup> Cuno tiaca matacaari puetunu jaspe saijinijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohuaja motiquio quiriquiaa. Maatia niquishiyari na tamajiria.

<sup>19</sup> Cuno mataca nujuataja doce sairi queraatia tamaatiujiaaca shanhua niquishano saitia maniniushitishano quiriquiaa. Cuno mataca nujuataja doce saijinijinioni, coteenu saajiaari jaspe saitia maniniushitishano quiriquiaa. Jaspe sairi neeruuca cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruuca. Cuarto saajiaari neeruuca esmeralda saitia maniniushitishano quiriquiaa. <sup>20</sup> Quinto saajiaari ónice saitia maniniushitishano quiriquiaa. Ónice sairi pocojuanaque naatuuca cojitishano. Sexto saajiaari naatuuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tiijiaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanhua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanhua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajiaari jiyanhua nentuuca amatista saitia maniniushitishano quiriquiaa. Puetunu cuno saijianaari jiyanhua shanhua sai, sha-

cantujuaaca. <sup>21</sup> Tiaca shocua mataca doce tootihuuari noturu shipinijosano saijiniji shipinijosano quiriquiaa. Niquiriyatu tootiuuri niquiriyatu noturu saajiajiniji shipinishano quiriquiaa. Naa shipinijosano quiriquiaari puetunu cuno doce tootihuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanhua maninia cuno oro quiniuucua, Pueyaso shacantuucaari na tohuariquiriquiaa, juhua motiiquio cohuajaco na quiniuucua.

<sup>22</sup> Cuno tiacajinia, majaari cua niquiniu quirii Pueyaso Quishaqui, tii pa rupenura nojuaja. Cuniqiu, majaari socua Pueyaso Secojoua tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhuj. Puetunu cuno tiacajanaari nojori quishaquicuaja, pueyaracaanu nojori rupesano pa quiniuria. <sup>23</sup> Cuno tiacaari maja na paniniu pananu na cuhuatariquiano, racajuhuj. Pueyaso shacantuuca cumaacacujaaari na cuhuataa. Borrego Niquiojuacuajaari na cuhuatana. <sup>24</sup> Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niquitiosocoriquiano.

<sup>25</sup> Cuno tiaca tootihuuari pueyaracaanu riataquesano quiniutianiya, juuca na quiniuucua pueyaracaanu. Cuniqiu, majaari quenaaja niucua niishishaanu quiniutianiya. <sup>26</sup> Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanhua nojori timitiasano quiniutianiya.

<sup>27</sup> Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhuj, majaari sesa miijia tiuquiniu quiniutianiya tii, sapojonujuacanio. Saaja noo pojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

**22** Na nuhuaji, Pueyaso seruuri cua niquitirii pueya samiitianijitaja moo, cohuajanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajitijiniji pacartariquiaa, tee Borrego Niquiojua cajiyajaaniuhuj. <sup>2</sup> Samiitianijia naanaari tiaca nuu jiuujiaaco nujuatariquiaa, cuno moo shuriuquiocojuhuaj, niiquijiria, na taquijirianio. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujiya muetunuuri. Na muecacaari maninia, puetunu jiyacajinia quijiaca pueyajanaa naarajotajara. <sup>3</sup> Cuniqiu, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhuj, nojoricuajaari cuno tiacajinia quijiaca quiniutianiya, Jiyaniijajanaa cajitii quiniuucua tii. Nojori tojitajacaari nojori timitianutaniya pueyaracaanu tii. <sup>4</sup> Nojoriiri Pueyaso jiquioco shootajaca quiniutianiya. Na sesaari nojori jiniji naajiotasano quiniutianiya. <sup>5</sup> Cuniqiu, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, panunio. Jiyaniijia Pueyasojuanaacuajaari nojori cuhuatanutaniya. Nojoriiri jiyaniijianucua quiniutianiya-

juhuaj, puetunu Pueyaso shipinishanojuanaa nojori jitianura pueyaracaanura.

### Jesucristo quera tiuquiuhua

<sup>6</sup> Na nuhuaji, Pueyaso seruuri cua sequeere:

—Cua niquitishano quiajaniyani, cua sequesano juhuaj, puetunu cunajuanaari seetanujuanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiunaa pueya, nojori pohuatanura pueya niquiara na niishitini panishano. Naajuhuj, nojuacuajaari quiarjia na seru jiyaroree, na tojitiajaca na niishitiniuria taa quiari naataja nojuaja tucatanutaniya puetunu na sequesanojuanaani. <sup>7</sup> Pa Jiyaniijiacuajaari naa sequeya: “Janiya quera tiuquiuhua niaacuani”. Shuquiriaatia quijaca cutaraari noo pojori, canapueete nio naajioneejinia Pueyasojiniji niishitishano tojijiacani.

<sup>8</sup> Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhuajitij, cua tojinu nuhuajijuhuj, janiyari Pueyaso seru pajama mojuquetareeni. Janiyari naa mojuquetaree nojuaja cua timitianura juucuanu, juhua Pueyaso.

<sup>9</sup> Nojuajaari cua sequequee saaja:

—[Maja naa miiniu pueyanonaa! Janiyari Pueyaso serujuhuaj, juhua quiajanijuhuj, juhua puetunu quiarta Pueyaso sequesano caminiujiunaa pueyajuhuj. Naajuhuj, nio naajioneejinia naajiotasano tojijaca pueyani, nojori cuarta Pueyaso seyajuhuj. [Pueyasojanaa quia timitiare cutara!

<sup>10</sup> Cua sequeereejaariuhuj:

—Pueyaso niishitishano nio naajioneejinia quia naajiotasani, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasanoacuajaari quera tohuateya. <sup>11</sup> Naacuajitij, canapueete sesa na miiniu tarinitianu paniyaquiyani, sacuaraatia miiijiojuacajuhuj, cuaara na tarinitiaaquiiriqui. Saniniuujia, canapueete maninia miiijiojuaca cutarani, saaja Pueyasora poonijionuujuacajuhuj, nojori cuaara tarinitiaaquiiria maninia nojori miiniujuhuaj.

<sup>12</sup> Pa Jiyaniijiacuajaari naa pa sequeya:

—[Taaquiririnij! [Quera tiuquiuhuanijia! Janiyari cua tojitiajaca cua niquitiosocoriquiano casaa tiuquitianutaniuhuanu. Janiyari puetunu nojorijanaa nareja niquitiojonutaniyani, maninia nojori miiniuucua quiria, nojori miishano jaara maninia quiri. <sup>13</sup> Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quijijuhuanani. Majaari cua supueno quiquiaari. Janiyari

puetunu casaajanaa coretanijiani, na shaajariquiano juhuaj.

<sup>14</sup> ‘Shuquiriaatia quijaca cutaraari noo pojori, canapueete juhuacarjia nojori jiuujia jeequecanu Borrego Niquiojua nanacatani. Nojori juhua cohujaque toqueyaraca quiniutianiya cua niquiara. Naacuajitij, nojori tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. <sup>15</sup> Saniniuujia, nio pojori Pueyaso tiaca mataca tamajiria jateenutaniya: sacuaraatia casaa miiijia, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueyasooacara, cuaracashijionu porocua pueyanio.

<sup>16</sup> ‘Janiyacujaari cua seru jiyarorucuaa quiocuani, na niishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquiohuacuajinio caneno pueyajinijio supueno, Jiyaniijajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuacaanu Pueyaso Rupaajiniacuajani.

<sup>17</sup> Pueyaso Sohuanuuri Borrego Niquiojua niquioranta naa sequetiuya: “[Miji Jiyaniijanaa!” Canapueete naa nio naajioneejinia naajiotasano tojijiani, nojori cuara naa sequeerajuhuj: “[Miji!” Cante jiyamueyani, nojori cuara niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

<sup>18</sup> Cante nio naajioneejinia juhuacarjia Pueyaso niishitishano tojiriini, taa Pueyaso miiniutaniyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitaja casaata. <sup>19</sup> Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacuajitij, majaari nojori mioonu quiniutianiya cuno tiacajinia naana jajau, pueyaracaanu rishijaca nojori quiniuria, taa nio naajioneejinia na pohuatashiyacuajani.

<sup>20</sup> Cante nio sequeyacuajani, nojuajaari naa sequeya: “[Taaquiririnij, quera tiuquiuhuanijia”.

Jaa, Jiyaniijia Jesunaa. [Naacuaaquinatejaj! [Ritia quia nimiohua canaacua!

<sup>21</sup> Pa Jiyaniijia Jesu cuaara puetunu niajanijajanaa cumaquiiria na Sohuanuta.